

Ibibiliya mu Shimakonde Imbodi Yaambi na dimbande dya Imbodi Yakala

Makonde New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Mateu	4
Malukushi	34
Lukashi	54
Nshuwau.....	86
Vitendo vya Vamyombe	110
Valoma	141
I Vakolintu.....	154
II Vakolintu.....	166
Vagalata	174
Vaepeshu	179
Vapilipo	183
Vakoloshu	187
I Vateshalonika.....	190
II Vateshalonika	193
I Timoti.....	195
II Timoti.....	199
Titu.....	202
Pilemoni	204
Vabalaniya	205
Tiyagu.....	215
I Patulu.....	219
II Patulu.....	223
I Nshuwau.....	226
II Nshuwau	230
III Nshuwau	231
Yudashi.....	232
Maono	234

Mateu

Vanakulumunu vamwe Yesu

Lukashi 3:23-38

- 1** Ali ni lishauma lyamaimyo lyavanakuluvake Yesu Klistu ndukulugwe Daudi na jojo ndukulugwe Ab-
ulaamu.
- 2** Napanelo Abulaamu ammaleké Ishaki,
Ishaki kummaleka Yakobo,
Yakobo kummaleka Yuda
pamo na vakuluvake na vanung'unuvake.
- 3** Yuda kummaleka Peleshi namu Shelaa,
ava, jujukwave kuva Tamali.
Peleshi kummaleka Eshiloni,
Eshiloni kummaleka Alamu,
- 4** Alamu kummaleka Aminadabi,
Aminadabi kummaleka Naashoni,
Naashoni kummaleka Shalamoni,
- 5** Shalamoni kummaleka Buwashi,
aju, anyoke kuva Laabe.
Buwashi kummaleka Obedi,
aju, anyoke kuva Luti.
Obedi kummaleka Yeshe,
- 6** kutwala Yeshe kummaleka Umu Daudi.
Napanelo Umu Daudi kummaleka Shalomoni,
aju, anyoke kuva ndyagwe Uliyashi.
- 7** Shalomoni kummaleka Loboamu,
Loboamu kummaleka Abiyashi,
Abiyashi kummaleka Asha,
- 8** Asha kummaleka Yoshapati,
Yoshapati kummaleka Yolamu,
Yolamu kummaleka Ushiyashi,
- 9** Ushiyashi kummaleka Yotamu,
Yotamu kummaleka Akashi,
Akashi kummaleka Eshekiyashi,
- 10** Eshekiyashi kummaleka Manasheshe,
Manasheshe kummaleka Amomu,
Amomu kummaleka Yoshiyashi,
- 11** Yoshiyashi kummaleka Yekoniyashi
pamo na vanung'unuvake.
Awo uvele wakati wavavakumulénge vanaishilaeli ku-
vaukanavo ku Babiloni.
- 12** Napanelo ling'oto lyavanaishilaeli kukamuligwa kuka
ku Babiloni,
Yekoniyashi anímmaleka Shalatiyeli,
Shalatiyeli kummaleka Shelubabeli,
- 13** Shelubabeli kummaleka Abiude,
Abiude kummaleka Eliyakimu,
Eliyakimu kummaleka Asholi,
- 14** Asholi kummaleka Shadoke,

Shadoke kummaleka Akimu,
Akimu kummaleka Eliyude,
¹⁵ Eliyude kummaleka Eleashali,
Eleashali kummaleka Matani,
Matani kummaleka Yakobo,
¹⁶ kutwala Yakobo kummaleka Yoshe
ntwagwe Maliya,
Maliya jojo ámmaleke Yesu
wavanshema Klistu. †

¹⁷ Nadoni kutunduvangila Abulaamu mpaka Daudi
dindípagwa dimbula dyavanu kumi na nsheshe, ku-
tunduvangila Daudi mpaka pavakamuligwe vanaishi-
laeli kuka ku Babiloni yadavo dindípagwa dimbula ku-
mi na nsheshe na kutunduvangila pavapagwíte
vanaishilaeli ku Babiloni mpaka Klistu dindípagwa mo-
mo dimbula kumi na nsheshe.

Kuvalekwa kumwe Yesu Klistu

Lukashi 2:1-7

¹⁸ Napanelo Yesu Klistu aju, kuvalekwa kwake kuvele
doni. Jujumunu Maliya wantamadíle Yoshe pakulota
kunnomba kanji vakanava kulambana, Maliya andíimi-
ta kwaindila ya Imumu Wanashwe. ¹⁹ Bai Yoshe
alivikíle kunnomba Maliya kwoda avele munu
waishaliya na halatíle kuntaa dyoni nkongwe jo,
andyámuwa muntima mwake kunneka shipiipii.

²⁰ Akuno apanga nnugu wake au, njelo wake *UMU*
andímwidila mwindoti ndamwaulila kushidoni, “Yoshe
ndukulugwe Daudi, haunajope yakumpwashalela
Maliya kuva ndyavo mwaa nae andiimita kwaindila ya
Imumu Wanashwe. ²¹ Nae anammaleka mwana
nnume na wako undamupa lina lya Yesu mwaa alota
kuvaposha venentete vake kwamadambi ave.” ²² Vinu
avi uti vinditandeka pakulota liwikile popo lilove ly-
atangwéle *UMU* kwaindila yankúlava wake aashidoni,
²³ “Mwenu, mwali ntete anammaleka mwana nnume.
Mwana ajo vananshema lina lya Emanuweli,” †† kwaku-
valangangila mana ake, Nnungu ankupagwa namu
wetu.

²⁴ Bai Yoshe pashishwike andítandela momo
mwamwaulidile njelo wake *UMU*, nae anímpwashalela
Maliya kuva nkongwe ndyagwe. ²⁵ Napanelo haléle na
ndyagwe mpaka pammaleke mwana kutwala nae
mwana jo kumupa lina lya Yesu.

† Lina lya a Klistukwali a Masiyalinkuvanavo mana amulolo;
shigalego a Klistushibalaniya a Masiya. Mena ala ankwamba shi-
madengo shamunu wene wampakile Nnungu mauta yani aijá
walivikíle Nnungu kuntumidya kwida. †† Lola Ishaiya 7:14.

Kuwika kwavakumanya-dinondo

2 Napanelo Yesu pavalakwadidye mulikaja lya Beteleemu kulijimbo lya Yudeya muwakati washilangalela Umu Elode, vandíwika pa Yelusalemu vakumanya-dinondo vakwalakela kwalyaloka liduva² kutwala kudya, “Da aijá ávalakwadidye Umu Wawayuda avelé kwashi? Wetu tugwene inondo yake nkono wakwalyalakela liduva, twidilé ndalipudya kwake.”

³ Bai Umu Elode pamo na vanu uti vashinama pa Yelusalemu pavaigwite malove alo, vandyángaikanga.

⁴ Nae andívalalika vanang'olo vavakulungalalela-shadaka pamo na vamwalimu vadishaliya vavayuda kuvaudya, “Da Klistu vammalangenge kuvalakwedya kwashi?”⁵ Vanavo kushidoni, “Mulikaja lya Beteleemu mulijimbo lya Yudeya mwaa kwaindila yankúlava yandikigwé doni,

⁶ “Wako Beteleemu

úvele mushilambo sha Yuda,

mwiko haunava shinu undikidiki

pakati pavananangalaledi vavayuda

mwaa kwako wako andaumulilila nanangalaledi

álota kuvashunga venentete vangu vanaishilaeli.’”[†]

⁷ Napanelo Elode andíwashema kwashipii avalá vakumanya-dinondo kuvaudyangidya wakati wavagwanalele inondo⁸ kutwala kuvaulila vauke ku Beteleemu avalaililila kushidoni, “Mwenu wena mukamanyange shana ing'ano ya nunu ajo, mukankodya ida mungumanyiye pakulota nanangu nguke ndikalipudye.”

⁹ Vanavo vakaigwe malaililo amwe umu, vandyúmananga kuka. Mwe! Ailá inondo yavagwéne nkono wakwalyalakela liduva indívalangalalela mpaka ndaimila lyutu lyavéle nunu.¹⁰ Nadoni vanavo pavagwene inondo yo imidile, vandímamodya kupuwanga.

¹¹ Pavainjilenge nng'ande vandímwona nunu jo pamo na jujumunu Maliya, vanavo kunguguvalila kulipudya kutwala kuutukulanga vituvi vyave kumupa dinudyo adi: shaabu, ubani na mila.¹² Napanelo pavalinguligwe mwindoti pakulota havanaujile kumwe Elode, vanavo vandyúka kwave vapitila indila inji.

Kutukutula kwa ku Mishili

¹³ Vakumanya-dinondo avalá vakauke, andímuumulilila Yoshe mwindoti njelo wake *UMU* kutwala kushidoni, “Takatuka! Ntwale nunu pamo na anyoke utukutule ku Mishili. Koko ko, ikala mpaka pangulota kukumanyiya uje mwaa Elode alota kunnambela nunu ammyae.”¹⁴ Yoshe kutakatuka kuntwala nunu jo pamo na anyoke kuma shilo shosho kuka ku Mishili.¹⁵ Koko ko, nae andíikala mpaka papadile Elode. Vinu avi vinditandeka pakulota liwikile popo lilove lyatangwéle *UMU* kwaindila yankúlava doni,

“Ku Mishili, ninshema mwanangu.”^{††}

Elode ankuvabyanga vana valume

¹⁶ Napanelo Elode pamanyite doni vakumanya-dinondo vaninduwanga, nae andíshimwa namene akalamulila vavabyange vana valume uti va pa Beteleemu pamo na vammakaja anyenjemwake, vana avo vavyaka vivili kwida mwina kwodana na wakati wapatilile dyabali na vakumanya-dinondo.¹⁷ Nadoni vindíwikila popo avilá vyatangwéle nkúlava Yelemiya aashidoni,

¹⁸ “Ku Lamaa lindiigwinika lidi,

shililo na kutangadikanga kukumene.

Ajo ni Lakeli ávalilila vanavake,

nae ankwita kupambadyangigwa,

mwaa uti vandibyaigwa.”[‡]

Kuujiila kwa ku Nashaleti

¹⁹ Napanelo ling'oto lyakupela Elode, andímuumulilila Yoshe ku Mishili mwindoti njelo wake

*UMU*²⁰ ndamwaulila doni, “Takatuka, ntwale mwana jo

pamo na anyoke uke kushilambo sha ku Ishilaeli

mwaa avalá vashilota kwovya shingumi shamwana,

vandipalanga.”²¹ Bai nae andítakatuka kuntwala

mwana pamo na anyoke kuka kushilambo sha ku Ishilaeli.

²² Yoshe napane paigwite doni Alikalau ankulungalalela ku Yudeya adiva lyutu lyatatamunu Elode, nae

andíjopa kuka kwanavo. Palinguligwe mwindoti

andyúka kwisemu ya ku Galileya²³ ndaikala panjini

umo wavashema Nashaleti pakulota liwikile popo

lilove litangaléke kwaindila yavakulava doni, “Vanan-

shema kuva Nnashaleti.”

Nshuwau Wakubatisha ankukandyanga indila

Malukushi 1:1-8; Lukashi 3:1-18; Nshuwau 1:19-28

³ Napanelo mumaduva alo andyúmilila Nshuwau

Wakubatisha kushimbweshe sha ku Yudeya

alaililila² aashidoni, “Lijugulange mwaa utawala

wakuwa undivandika.”³ Aju ni jo wammalangéne

nkúlava Ishaiya doni,

“Lidi linkwigwinika kushimbweshe,

‘Kandyanga indila yake *UMU*

aalowa mwalota kupita.’”^{‡†}

⁴ Jo Nshuwau aju ashigwala dinguvo

dyavakandyéne na magwimbu angamila, kulyunga

nkanda waligwogwe na shakulya shake kuva

madalombwe na ushi wakunundu.⁵ Napanelo koko

ko, vashindamuukila vayelusalemu, vammakaja uti a

ku Yudeya na vamudisemu uti dyananyenje mwake

lundi lwa Yudani.⁶ Vanavo vashindabatishigwa namu

nae mulundi lwa Yudani akuno valivalanganga

madambi ave.

⁷ Napanelo pavagwene mapalishayo na

mashadukayo voe vaidá ndapata ubatisho kwake, nae

kushidoni, “Mmana mmadinyoka dyaishumu mwe!

Anyinyitidilé nyani kutila shaushanga shake Nnungu

shída?⁸ Lodya vyepo vilódyá kulijugulanga.⁹ Hamu-

nakumbukile kutangola vila muntima, ‘Tatagwetu we-

† Lola Mikeya 5:2. †† Lola Osheya 11:1.

‡ Lola Yelemiya 31:15. ‡† Lola Ishaiya 40:3.

tu Abulaamu.' Ninkumwaulila doni, lo majanga ala Nnungu ankuulula kundyuwidya Abulaamu vana. ¹⁰ Imbedo vandilumika palindi lwannandi tayali. Kula nnandi úkapa vyepo vyambone, vandálumula kujela pamoto.

¹¹ "Nangu mwenu apa, ninkumbatisha na medi kulodya kulijugulanga. Napane ling'oto lyangu nangu ankwida munu wadimongo kungupunda nangu wandikavaidile nangu kumuulanga vilatu vyake. Nae mwenu po, anambatisha na Imumu Wanashwe na moto. ¹² Ankuvanavo shombo shakupatangila vyakulya mmakono mwake; andakandyanga palugwa pake kuntwala ngano jo kuntaa mushidimbi kanji makadakada lo, andataa moto úkadimika."

Kubatishwa kumwe Yesu

Malukushi 1:9-11; Lukashi 3:21-22

¹³ Napanelo Yesu ankuma pa Galileya kuka ku Yudani akapate ubatisho kumwe Nshuwau. ¹⁴ Nshuwau napane ankulingangila kunneya, "Nangu ni ngúvaikidile wako ungubatishe. Napanelo uma dashi wako kungwidila nangu?" ¹⁵ Yesu kutwala kunjang'ula kushidoni, "Kwaambi apa leka ive yadavo mwaa indituvaikila tuwisha popo ishaliya uti." Nshuwau kwitikila. ¹⁶ Nadoni po papatile ubatisho, Yesu andyúma mmedi mo kutwala muwakati wowo, mwe! Pamevo pake kuwa kushimuka, nae kumwona Imumu wake Nnungu wakuva mwang'unda ashuluka kwida ndamwikala. ¹⁷ Bai lidi lyakwalakela kuwa kushidoni, "Aju ni mwanangu wakunagwaleka, kwamwaa wake nae ninkupuwanga namene."

Ndamoni ankunnya Yesu

Malukushi 1:12-13; Lukashi 4:1-13

4 Napanelo Imumu aníntwala Yesu kumuukanavo kushimbweshe pakulota atubigwe namu Ndamoni. ² Nae akaunga maduva alubaini shilo na mui na ikankola indala. ³ Bai nkútubya andímwidila ndamwaulila, "Wako ukava umwanagwe Nnungu, lamulila majanga ala ajalukange ave magung'u!" ⁴ Yesu napane kushidoni, "Um! Indyandikigwa doni, 'Munu hananama ligung'u gweka kanji andánama kwakula lilove lyúma nkanywa mwa Nnungu.'" ^{††}

⁵ Ndamoni kuntwala Yesu kumuukanavo mpaka kunjini wakwilimyanga nammika panantutuvilo waing'ande ya Nnungu ⁶ kutwala kumwaulila doni, "Wako ukava umwanagwe Nnungu, daloka apa ukagwilile pai mwaa indyandikigwa doni, " 'Nnungu andavalamulila vanjelo vake, kwamwaa wako wako.

Vanavo vandakudong'a, pakulota haunalijajede palijanga.' " [‡]

⁷ Yesu napane kushidoni, "Namomo indyandikigwa doni, 'Haunanninge ntima UMU Nnungu wako.'" ^{††}

[†] Vanaishilaeli pavaumile ku Mishili, kushimbweshe Nnungu andívapa magung'u pakulota alilodye kenga nae ni Nnungu wave. Lola Kuma 16:12. ^{††} Lola Kumbukumbu 8:3. [‡] Lola Dimu 91:12. ^{††} Lola Kumbukumbu 6:16.

⁸ Ndamoni kuntwala kavili Yesu kumuukanavo pashanya lishinga lyakulepa nannodya utawala uti wamushilambo shapai na kunnodya lishangelo lyake ⁹ kumwaulila doni, "Ukanguguguvalila na kulipudya kwangu nangu, uti avi ndakupa." ¹⁰ Yesu napane kushidoni, "Kuka apa Shatwani! Mwaa indyandikigwa doni, 'Lipudye kumwe UMU Nnungu wako na untumikile jojo bai.'" ^{†††} Bai Ndamoni anínneka. Mwe! Vanjelo kwida nantumika.

Yesu ankutunduvanga shimadengo shake

Malukushi 1:14-15; Lukashi 4:14-15

¹² Napanelo Yesu paigwite doni Nshuwau andyungwa, nae andyúja kuka ku Galileya. ¹³ Akanyema pa Nashaleti kuka ndaikala ku Kapalanaumu njini uvéle nanyenje litanda kwisemu ya ku Shebuluni namu Naputali ¹⁴ pakulota liwikile popo lilove litangaléke kwaindila yankúlava Ishaiya kushidoni, ¹⁵ "Shilambo sha Shebuluni na shilambo sha Naputali, kulodya nkono wakulitanda, mwangu unji walundi lwa Yudani, Galileya shilambo shavamidi, ^{†††} ¹⁶ Venentete váshinama mushii, vandyona lilangadyo likumene vila ali, vanu váshinama mushilambo shashimbedi shíidanavo kupela, lindivamulikila lilangadyo." ^{†††} ¹⁷ Napanelo kutunduvanga muwakati wowo wo, Yesu andítunduvanga kulaililila aashidoni, "Lijugulange mwaa utawala wakuwa undivandika."

Yesu ankuvashema vakwoda vatandi

Malukushi 1:16-20; Lukashi 5:1-11

¹⁸ Napanelo Yesu apita awena nanyenje litanda lya Galileya, andívona vanung'unumunu vavili, Simoni wavaxshema Patulu pamo na nkulumunu [§] Andaleya vateja dingau dyave mulitanda. Vovo vo, shimadengo shave shivele shakwaka dyomba. ¹⁹ Nae kuvaulila kushidoni, "Ngwoda! Nangu nantenda muve mmanu mmakuvaka vanu." ²⁰ Vanavo kulakenneu dingau dyave, kumwoda. ²¹ Paukile mushu padyoko kuvona vanung'unumunu vanji vavili, Tiyagu na nung'unumunu ^{§†} Nshuwau vanavake Shebedeu vatataliyanga dingau dyave mwingalava pamo na tatagwave, nae kuvashema. ²² Vanavo kunnakenneu tatagwave na ingalava yo, kumwoda.

Yesu dinkumwidila dimbumba dyoe

Lukashi 6:17-19

²³ Napanelo Yesu ashindatanela makaja a ku Galileya apita apundisha muvitala vyave vyakulipudidya avalanganga ntenga wambone wautawala, aponia vilwele na mauvilo uti kwavenentete. ²⁴ Nadoni shimbili

^{††} Lola Kumbukumbu 6:13. ^{†††} Mmidi mana ake ni munu ákavele walikola lyako; apa linkuvamba vanu uti vákavele vayuda. [§] Lola Ishaiya 9:1-2. [§] Hainamanyika shinu kenga Andaleya avele nang'olo kwali ndyoko. ^{§†} Hainamanyika shinu kenga Nshuwau avele nang'olo kwali ndyoko.

shake shindyúmanikanga mushilambo uti sha Shiliya, venentete vashindavaidanavo kwake nae vanu vavénavo mauvilo akuvilingananga na malwele, vamajini, vashalala na vakulamala kutwala nae kuvaponia.

²⁵ Nae dishindamwoda dimbumba dyoe dya ku Galileya, dya ku Dekapolishi, dya ku Yelusalemu, dya ku Yudeya na dyakumwangu unji wa Yudani.

Kwalaligwa

Lukashi 6:20-23

5 Napanelo Yesu akone dimbumba adilá, andík-wela palishinga kwikala. Vakwoda vake pavammandike, ² andítunduvanga kuvapundisha aashidoni,

³ “Vandyalaligwa avalá vamashikini mwimumu, mwaa vanavo utawala wakuwa wàve.

⁴ Vandyalaligwa avalá valíla, mwaa vanavo vandapambadyangigwa.

⁵ Vandyalaligwa avalá valishapéya, mwaa vanavo vandapata shilambo kuva shave.

⁶ Vandyalaligwa avalá vavénavo indala na inyota yaishaliya,

mwaa vanavo vandaikuta.

⁷ Vandyalaligwa avalá vavénavo shididi, mwaa vanavo vandaanangiligwa shididi.

⁸ Vandyalaligwa avalá vavénavo mitima víkave ushapu,

mwaa Nnungu, vanavo vandamwona.

⁹ Vandyalaligwa avalá vatandédyá amani, mwaa vanavo vandashamegwa vana vake Nnungu.

¹⁰ Vandyalaligwa avalá vapapatígwa kwamwaa waishaliya,

mwaa vanavo utawala wakuwa wàve.

¹¹ “Mundyalaligwa mwenu pavantukananga, pavampapata, pavantangalela vinu uti vyakunyata, vanambilila kwamwaa wangu nangu. ¹² Litamange na puwangila mwaa inudyo yenu kuwa ko ing'umene. Amo nimomo mwavavatandalele vakulava mwenu mukanava.

Munyu na lilangadyo

Malukushi 9:50; Lukashi 14:34-35

¹³ “Mwenu ni munyu wamushilambo, napane munyu ukadalala ulota kunogwa dashi kavili? Wanavo haunavanavo kavili madengo ila pavanajaa vanu ni kuluvatanga tu. ¹⁴ Mwenu ni lilangadyo lyamushilambo na njini uvéle pashanya lishinga, haunapiika. ¹⁵ Namomo hapali ánakaledya itaa kuvika nshilongo ila vavika pashinu pakwaneka pakulota ivamulikile vanu uti vapgwíte nng'ande amo. ¹⁶ Nadoni inimmaikila lilangadyo lyenu limulike pakati pavanu pakulota vone matendo enu ashalowa na vamupe lishangelo Tatagwenu ávele kuwa.

Yesu aidilé ndawisha popo lilamulo

¹⁷ “Hamunakumbukile kenga ngwidilé ndamalidya Lilamulo na Vakulava. Hangwidile ndamalidya, ngwidilé ndatadya viwikile popo vinu avyo.

¹⁸ Ninkumwaulila mwiu doni, shilambo shakuwa na shapai vikanava kupita, hashipali shilóta kwapuka nkati mu Lilamulo ata palukavéle lutembo kwali lukweu ludikidiki vela, vindapagwa mpaka uti vitandeké.

¹⁹ Woewoe álota kwiludyanga lilamulo lidikidiki pakati pamalamulo ala kutwala kuvapundisha vanu vanji vatandele momo, ajo kuutawala wakuwa, vananshema kuva ndyoko. Napane aijá álota kutandedya malamulo ala na kuvapundisha vanu vanji kutandela momo, kutwala wakuwa ko, nae vananshema kuva nang'olo.

²⁰ Napavedoni ninkumwaulila mwiu, ishaliya yenu ikanapunda yavamwalimu vadishaliya na mapalishayo, mwiko muutawala wakuwa hamwinjila.

Shishimwashimwa

²¹ “Mwenu mundigwa ashilá shavavaulidile vanyakala doni, ‘Haunammyae munu na woewoe álota kubyaa, vandamuukanavo paukumu.’ ²² Napane nangu jo ninkumwaulila doni, kula munu álota kunshunalila nung'unumunu vandamuukanavo paukumu. Namomo álota kuntukana nung'unumunu, vandamuukanavo kwikamati, nakavili, ámwaulila nung'unumunu do, ‘Hauvé ding'ano!’ vandamuukanavo kumoto wakushena. ²³ Napane ukauka ndaumya shadaka ku alutali, popo ukumbukila doni, apali nung'unumunu ávenavo mwaa namu wako, ²⁴ bai shinantandi leka yakumya yo uke ukaigwanenavo nung'unumunu jo, ling'oto uje wide umye shadaka shako. ²⁵ Igwania shipajelo namu waukashenienavo akuno muka kulibengi pakulota hanakupalakedye kumwe nkúukumu, nkúukumu nanae jo kukupalakedya kumwe nkúshunga kutwala nae kukujela nkalaboshi.

²⁶ Ninkukwaulila mwiu doni, kushinu ako wako hauma shinu ukanava kulipanga mpaka ishingho yamwisho.

Lung'unuku

²⁷ “Mwenu mundigwa ashilá shavavaulidile vanyakala doni, ‘Hamunalavalave.’ ^{†28} Napane nangu jo ninkumwaulila doni, kula munu álota kunnola nkongwe ang'unuka, muntima mwake mo, andilavalava tayali kwankongwe ajo. ²⁹ Ikava kenga liu lyako lyakunkanakono linkukutadya utege, usha ujae kushu ko. Kudyanga ikwove imbandi imo yamili wako kuliko mili wako uti wakulinganana kujela kushena. ³⁰ Ikava kenga nkanakono wako ukakutadya kutega, lumula ujae kushu ko. Kudyanga ikwove imbandi imo yamili wako kuliko mili wako uti wakulinganana kujela kushena.

Kulakananga

Mateu 19:9; Malukushi 10:11-12; Lukashi 16:18

³¹ “Namomo vanditangola doni, woewoe ánneka ndyagwe inimmaikila amupe italaka. ^{††32} Napane nangu jo, ninkumwaulila doni, kula munu ánneka ndyagwe paukavele mwaa waugoni, ajo ankuntadya nkong-

† Lola Kuma 20:14; Kumbukumbu 5:18. †† Lola Kumbukumbu 24:1.

we jo alavalave. Namomo woewoe álota kunnomba nkongwe wavannakile, ankulavalava.

Kulilapa

³³ “Namomo mwenu mundigwa ashilá shavavaulidile vanyakala doni, ‘Haunatimbanje vyaulilapidile † na tandedya uti avilá vyaulilapidile kumwe *UMU*.’ ³⁴ Napane nangu jo ninkumwaulila doni, hamunalilapile mwiko, mulilapila kuwa mwaa kwanavo ko ni shiteng'u shake Nnungu, ³⁵ ata hamunalilapile shilambo shapai mwaa pai apa ni lyutu lyakupumudya madodo ake, na ata hamunalilapile ku Yelusalemu mwaa wanavo ni nji-ni umwe *UMU* Nang'olo. ³⁶ Namomo haunalilapile muti wako mwaa wako hauulula kujalulanga yuli yako kuva yakudimba na ugwimbu wakudimba kuva yuli. ³⁷ Mwenu mukashidoni, ‘Elo’ ive mwiu elo, mukashidoni ‘Mene’ ive mwiu mene. Shinji shakupunda apo, shinkwalakela kumwe aijá nkalau.

Kulipilila

Lukashi 6:29-30

³⁸ “Mwenu mundigwa ashilá shavatangwele doni, ‘Átumbula liu nanae vantumbule. Átema lino nanae vanteme.’ ^{††39} Napane nangu jo ninkumwaulila doni, hamunammikile makukulu nkalau. Woewoe ákukoma lilatuma kunkanakono, nshiliulile kunshanda. ⁴⁰ Ákukashali alota akupoke ikanju yako, likoti yadavo nnakele atwale. ⁴¹ Woewoe ákukanyilidya muwene shuuluta shimo, wako wenanavo vyuluta vivili. ⁴² Ákujugwa shinu, mupe na aijá álota akukope, hanamwime.

Linagwaledyo kwavamongo

Lukashi 6:27-28, 32-36

⁴³ “Mwenu mundigwa ashilá shavatangwele doni, ‘Nnagwaledye nkweni na mmangedye mmongo wako.’ ^{††44} Napane nangu jo ninkumwaulila doni, vanagwaledye vamongo venu na vashwalidye avalá vampapáta ⁴⁵ pakulota muve mmana mmatatagwenu ávele kuwa. Mwaa nae vanu vakalau na vambone, liduva lyake ankuvavalila na vo vanu vaishaliya na vaungave-ishaliya vo, imbula ankuvatanyela. ⁴⁶ Da mwenu mukavanagwaledya gweka avalá vannagwalédya mulota kupata inudyo shani? Da ata avalá vakukatisha-ukodi havanatandela momo? ⁴⁷ Namomo mukavaudyanga vanung'unumunu gweka, munkuten-da shinu shani shikumene shipundile apo? Da i mo mwavatandela vamidi? ⁴⁸ Napavedoni mwenu inimmaikila muve mmanu mmashalowa-uti kenga Tatagwenu wakuwa, nae washalowa-uti.

Umya kwantima shii

6 “Lishunge pakulota hamunatende vitendo vyenu vyaishaliya pamevo pavanu kwambangidya vyoneke. Mukatenda davo po, Tatagwenu ávele kuwa

† *Lola Valawi 19:12; Ishabu 30:2.* †† *Lola Kuma 21:24; Valawi 24:20; Kumbukumbu 19:21.* ‡ *Lola Valawi 19:18.*

hamupa shinu inudyo. ² Napavedoni paumya lipwashalelo haunaambeke lipalapanda kenga mwavatandela vanu vamalambi muvitala vyakulipudidya na mudibalabala valota vapate lishangelo kwavanu. Ninkumwaulila mwiu doni vanavo tayali vandipata inudyo yave. ³ Wako paumya lipwashalelo, shitandéka kunkanakono kwako, nkono nshanda wo haunamanye ⁴ pakulota lipwashalelo lyako live lyashipii. Nadoni Tatamunu áona kwashipii, andakupa inudyo.

Pamushwali

Lukashi 11:2-4

⁵ “Napanelo pamushwali hamunave kenga avalá vanu vamalambi. Vanavo kuanagwela kushwali vaimidile muvitala vyakulipudidya na nanyenje dibalabala pakulota vaaneke kwavanu. Ninkumwaulila mwiu doni, vovo vo tayali vandipata inudyo yave. ⁶ Wako ukalota kushwali injila kushumba shako ushime nnango wo utwale ushwali unjugwe Tatako ávele mushipii. Nadoni Tatako áona kwashipii andakupa inudyo. ⁷ Pamushwali hamunaujidyeyidye malove kenga mwavatandela vamidi. Vanavo vandákumbukila doni pavaujidyaujidya kutangola, vyavajugwa avilá vindaigwinika. ⁸ Mwenu hamunave kenga vanavo! Tatagwenu, ata mukanava kunjugwa, nae andimanya kaladavo ashilá shamulóta. ⁹ Napanelo amu ni mwakushwalidya mwenu,

“ ‘Atata wetu úvele kuwa,
lina lyako lilimyangike,
¹⁰ utawala wako wide,
malotelo ako atandeki,
mushilambo shapai kenga kuwa.
¹¹ Ligung'u lyetu lyakula liduva, tupa nelo.
¹² Makosha etu, tulivaliva
kenga mo mwatuvalivalivila wetu vatutagela.
¹³ Haunatuukenavo kukutubigwa
kanji tuposha kumakono kumwe nkalau.’ ^{††}
¹⁴ “Mwaa mukavalivaliva vanu kupujungula kwave,
nanae Tatagwenu ávele kuwa anannivaliva mwenu.
¹⁵ Napane mukanavalivaliva vanu, nanae Tatagwenu
hannivaliva kupujungula kwenu.

Pamunga

¹⁶ “Napanelo pamunga hamunalilodye kuva mushipalodi kenga mwavatandela vanu vamalambi. Vanavo vandányadyanyadyanga kumevo valilodye kwavanu kenga vandyunga. Ninkumwaulila mwiu doni, vovo vo tayali vandipata inudyo yave. ¹⁷ Napane wako paunga, navanga medi kumevo mmuti mo, pakala mauta ¹⁸ pakulota vanu havanakumanye kenga undyunga. Akumanye gweka Tatamunu ávele mushipii na jo Tatamunu áona kwashipii, andakupa inudyo.

†† *Maandiko anji ákavele akala uti, vandyánjedyo malove ala: a Utawala, dimongo na lishangelo, ngwengwe vyàko. Ame.*

Mali akuwa

Lukashi 12:33-34; 11:34-36; 16:13

¹⁹“Napanelo hamunalikandyedye mali mushilambo shapai mwavananganga vinu ushwa na umandi, mwavatumula vakwiva kutwala kwiva. ²⁰Kondya mali enu kuwa, kwanavo ushwa na umandi havanaulula shinu kwanonga na kwavakatutumula vakwiva. ²¹Po palota kupagwa mali ako ntima wako undapagwa popo.

²²“Liu ni shenje shamili. Liu lyako likava lingumi, mili uti lindaumbala lilangadyo. ²³Kanji liu lyako likava lilwele, mili wako uti shindaumbala shii. Napanelo lilangadyo mumili mwako likava shii, shii asho mwaa shani shilota kwilimyanga namene!

²⁴“Hapali munu wakuulula kuvatumikila vanang'olo vavili. Jumo anammangedya, junji jo kunnagwaledya; jumo kumwigwilila, junji jo kumwiludyanga. Mwenu hamuulula kuntumikila Nnungu akuno mutumikila mali.

Angaikila utawala wa Nnungu na ishaliya yake

Lukashi 12:22-31

²⁵“Napavedoni nangu ninkumwaulila hamunaangaikangile shingumi shenu kwa ashilá shamulota kulya kwali shamulota kukumbila na ata mili vyenu kwa ashilá shakulota kugwadya. Da shingumi i shinu shikumene kupunda shakulya na mili i shinu shamana kupunda dinguvo? ²⁶Lola vyuni vyulukánga kuniania. Vyanavo havinapanda, havinanang'ena na havivenavo vidimbi. Ata ivele davo Tatagwenu ávele kuwa ankulisha. Kushi mwenu po hamuvenavo mana namene kupunda vyuni? ²⁷Wakwashi pakati penu na kwan-gaikanga kwake ankuulula kwanjadyedya isaa imo vela yashingumi shake?

²⁸“Napanelo mwaa shani dinguvo dyo, munkwan-gaikila? Lola maukutu adinduva mumwitu mo mwakulumukila. Anavo madengo hanakola na hanalikandyangidya dinguvo. ²⁹Nangu ninkumwaulila kushidoni, ata jo Shalomoni jo na lishangelo lyake uti, hagwalidile kulinganana na anavo. ³⁰Napane ikava kenga maukutu amumwitu anáma jo nelo lunduno kujela pamoto Nnungu ankunnemya, kushi mwenu mmanu mmalikulupililo lidikidiki hannemya kupunda apo?

³¹“Bai mwenu hamunaangaikange muushidoni, ‘Tulota kulya nyamani?’, ‘Tulota kukumbila nyamani?’, ‘Tulota kugwala nyamani?’ ³²Doni, vinu avyo uti vamidi ni vaangaikangila. Tatagwenu wakuwa ankumanya kenga uti avyo mwenu munkulota. ³³Mwenu kanji shitan-di angaikangila utawala † na ishaliya yake; vinu vinji vyo, vinanjadyeka. ³⁴Nadoni hamunangaikangile liduva lyalunduno mwaa vyalunduno, vyalunduno. Migagolo vyaliduva limo vinkutosha kwaliduva lyolyo.

Hamunavaukumu vanji

Lukashi 6:37-42

⁷“Hamunavaukumu vanu kwambangidya namwenu hamunaukumigwe na Nnungu. ²Mwaa mo mwamulota kuvaukumila vavenu, namwenu Nnungu anamukumila momo. Shipimo shosho shamulota kuvapimila vavenu, namwenu Nnungu anampimila shosho. ³Mwaa shani unkwona shikoko muliu lyanung'unumunu kutwala kwiludyanga likangolo livéle muliu mwako? ⁴Umwaulila dashi nung'unumunu doni, ‘Leka ndikushe shikoko muliu mo,’ akuno muliu mwako lishingeme likangolo likumene? ⁵Umunu washinankulaba davo gwe! Shitan-di likangolo lishingéme muliu mwako mo, usha. Apo undalola shana kutwala kusha shikoko asho muliu lyanung'unumunu.

⁶“Hamunavape vang'avanga vinu vyakwilimyanga na ata hamunavape vanguluve majanga amali. Vovo vo vankuulula kuluvatanga kutwala kumuujila mwemwe mmene kunshapwalanga.

Jugwa mundapata

Lukashi 11:9-13

⁷“Jugwa mundapata, lambela mundona na taa odi vananshimulila. ⁸Kula munu ánajugwa vandámupa, ánalambela andóna na ánataa odi vanánshimulila. ⁹Wakwashi pakati penu ánatenda mwanagwe akanjugwa ligung'u nae kumupa lijanga? ¹⁰Kwali akanjugwa yomba nae kumupa nyoka? ¹¹Ikava kenga mwenu pamo na ukalau wenu munkumanya kuvapa vanavenu vyambone, kushi Tatagwenu ávele kuwa hamamodya kuvapa vinu vyambone avalá vanjúgwa? ¹²Napavedoni kula shinu shamulota mwenu vavenu vantandele, namwenu vanavo vatandele vyovyoy mwaa lyolyo ali ni Lilamulo na Vakulava.

Nnango udikidiki

Lukashi 13:24

¹³“Injilila pannango udikidiki mwaa indila na nnango uvaúkanavo vanu kukubamalegwa, úkumene. Vainjilíla amo, vavelé voe. ¹⁴Pakuva nnango wo, údikidiki na indila yo, idikidiki yúka kushingumi, vaanaléla nnango awo me vavé padyoko!

Kula nnandi na vyepo vyake

Lukashi 6:43-44

¹⁵“Lishunge kwavakulava vakushang'apa. Vanavo vankumwidila mwenu vágwalenge magwogwe adingandolo kanji mmitima myave vavele mavinji akukalipa. ¹⁶Vanavo mundavamanya kwadindila dyavyepo vyave. Da vandépa dyuwe mwinalala kwali kwepa nshambalau mulilonga? ¹⁷Nadoni kula nnandi wakukonda upa vyepo vyambone napane úkakondile upa vyepo vyakunyalanyalanga. ¹⁸Hainaulukika shinu nnandi wakukonda kupa vyepo vyakunyalanyalanga na úkakondile kupa vyepo vyambone. ¹⁹Kula nnandi úkapa vyepo vyambone vandálumula kujela pamoto.

† Maandiko anji akala ankushidoni, a ...utawala wa Nnungu.

²⁰ Napavedoni vanavo mundavamanya kwadindila dyavyepo vyave.

Mwiko hanimmanyite

Lukashi 13:25-27

²¹ "I uti avalá vangwaulíla 'Umu, Umu' vandainjila muutawala wakuwa, ila aijá átandedya malotelo ake Atata ávele kuwa. ²² Muliduva alyo vanu voe vanangwaulila doni, 'Umu, Umu! Da wetu palina lyako hatulavile, palina lyako hatukumulenge majini na palina lyako hatutandile vyamakango vyoe?' ²³ Ni apo pangulota kuvaulila ngala doni, 'Mwiko hanimmanyite. Ngunyema apa mwenu mútandedya ungave-lilamulo.'

Wamang'amung'amu na ákave ding'ano

Lukashi 6:46-49

²⁴ "Napavedoni kula munu áigwilila malove angu na kutandedya mwalatanggalakela, ankuva kenga munu wamang'amung'amu ádangile ing'ande yake pashanya lijanga lyakulitandika. ²⁵ Medi kutonya, dyundi kuumbalanga, imepo kupunga yuka shalatoto na ing'ande ayo kanji ing'ande yo kugwa do mene mwaa wakudenga palijanga. ²⁶ Napane kula munu áigwilila malove angu kanji mene kutandedya mwalatanggalakela, ankuva kenga munu ákave ding'ano ádangile ing'ande yake palitimbwitimbwi. ²⁷ Medi kutonya, dyundi kuumbalanga, imepo kupunga yuka shalatoto na ing'ande ayo kutwala ing'ande yo, kujiuka."

²⁸ Bai Yesu pamalidile kutangola malove alo, dimbumba dyavanu dindíshanga namene mapundisho ake ²⁹ mwaa nae ashipundisha kenga munu ávenavo madalaka i kenga vamwalimu vave vadishaliya.

Yesu ankumwaladyanga wamangundula

Malukushi 1:40-45; Lukashi 5:12-16

8 Napanelo Yesu pashulwike palishinga dimbumba dyavanu dindímwoda. ² Mwe! Popo po kumwidila munu jumo wamalemba mumili kunguguvalila kutwala kushidoni, "Nang'olo, ukalota unkuulula kungutadya ngutakate!" ³ Yesu kunyalodya nkono wake kunkwaa kushidoni, "Elo ndilota, takata!" Malemba lo kulambalakenne, mili wo kutakata. ⁴ Yesu kutwala kumwaulila kushidoni, "Wako, haunamwaulile munu ila wena ukalilodye kwankúlangalalela-shadaka, umye shadaka shalamulidile Musha pakulota uve ushuda kwavanavo."

Likulupililo lyanang'olo wavaing'ondo

Lukashi 7:1-10

⁵ Napanelo Yesu ainjila nkaja mu Kapalanaumu andímwidila nang'olo jumo wavaing'ondo miya wavaloma nanjugwangila aashidoni, ⁶ "Nang'olo, ntumika wangu andididimanga magwangwa na nnwele namene." ⁷ Yesu kushidoni, "Nangu ndaida namponia." ⁸ Nang'olo wavaing'ondo do, "Nang'olo, nangu hanguvaikidile kungwidila wako kwing'ande kwangu. Wako tangola lilove limo tu, ntumika wangu andapona. ⁹ Mwaa ata nanangu momo ninkupagwa mwina

madalaka na ninkuvanavo vaing'ondo vandivalamulila. Ndámwaulila jumo doni, 'Wena!' Nae kuukinne. Kumwaulila junji doni, 'Ida!' Nae kwidinne. Namomo ndámwaulila ntumika wangu, 'Tenda ashi!' Nae kutandenne shosho."

¹⁰ Yesu paigwite malove ala andíshanga na andívaulila avalá váshimwoda kushidoni, "Ninkumwaulila mwiu doni, ku Ishilaeli akuno hangunava kumwona munu walikulupililo kenga aju. ¹¹ Nangu ninkumwaulila, vandaaloka vanu voe nkono wakwalyalakela liduva na wakwalyenda liduva kwida ndaikala namu Abulaamu, Ishaki namu Yakobo pandamu muutawala wakuwa ¹² napane avalá vene utawala kujalegwa panda kushii. Kwanavo ko kunda-pagwa shililo na kutuka shulu nkanywa." ¹³ Bai Yesu andímwaulila nang'olo wavaing'ondo aijá kushidoni, "Wena! Vitandeke kenga mo mwaukulupilidile." Mwisaa yoyo, ntumika jo kuponneu.

Yesu ankuvaponia vanu voe

Malukushi 1:29-34; Lukashi 4:38-41

¹⁴ Napanelo Yesu pawikile paing'ande imwe Patulu anínkodya nkwegwe Patulu álele paigoli umpwateka mili ¹⁵ nae kunkwaa mmakono, mili wo kuponnenne kutakatuka kutunduvanga kuntumika. ¹⁶ Muwakati wayalyulo vanu kuvaidanavo kumwe Yesu vamajini voe. Nae majini lo, kwalilove lyake andíkumulanga namomo valwele uti andívaponia. ¹⁷ Napavedoni lindíwikila popo lilove lyatangwéle nkúlava Ishaiya doni, "Kudabadabanga kwetu, anditwala jo mwene, malwele etu, andilitika." †

Kukamadyanga mwakumwadela Yesu

Lukashi 9:57-62

¹⁸ Napanelo Yesu akone imbumba yavanu intang'anadidye andívalamulila vakwoda vake vaamboke vauke litanda nkono unji. ¹⁹ Mwalimu jumo wadishaliya anímmandika kumwaulila, "Mwalimu, nangu ndakwoda kwoekwoe kwaulota kuka." ²⁰ Yesu kushidoni, "Vanansheto vankuvanavo vivava, vyuni vyakuniania vinkuvanavo vyanda kanji Mwana Wamunu havé pashinu pakwijamidya muti wake." ²¹ Nkwóda wake junji, "Nang'olo, nguleka shitandi nguke ndikanshike atata." ††²² Yesu kushido, "Ngwoda! Valeke vakupela vavashike vakupelamwave."

Yesu ankumaladya shimbunga

Malukushi 4:35-41; Lukashi 8:22-25

²³ Napanelo nae painjidile mwingalava vakwoda vake vandímwoda. ²⁴ Mwe! Mulitanda mo kulipuka shimbunga shakujowa shíshitadya mawimbi kugang'olagang'ola ingalava, Yesu akuno álele lwono. ²⁵ Vakwoda vake kumuukila ndamwimulanga vaashidoni, "Nang'olo tuposha, wetu kupela aku!" ²⁶ Nae kushidoni, "Mwenu mmanu mmalikulupililo lidikidiki mwaa

† *Lola Ishaiya 53:4*. †† *Shitangodi shamba munu aju ashilota annidile tatake mpaka apele ling'oto amwode Yesu.*

shani munkujopa?" Nae kutakatuka apalá kutangalela shimbunga sho pamo na litanda, vyanavo kulimaladya do, kimyaa. ²⁷ Bai vanavo vandíshanga vaashidoni, "Da munu aju avalalélé mwashi átenda ata mpaka imepo na litanda kumwigwilila?"

Yesu ankuvaponia vanu vavili vamajini

Malukushi 5:1-20; Lukashi 8:26-39

²⁸ Yesu akawike litanda mwangu unji yani isemu yavagadalenu, vandímwidila vanu vavili vamajini vashaalakela kumakabuli. Vanavo vashindajowa namene mpaka kutadya indila ayo mene kupitika.

²⁹ Mwe! Vanavo kukugwanga pashanya po vaashidoni, "Yesu mwanagwe Nnungu! Da wako ulota nyamani kumili kwetu wetu? Da widilé ndatupa shaushanga wakati wake ukanava kuwika?"

³⁰ Napanelo mwakushu padyoko shindípagwa shipinga shikumene shavanguluve shíshipita shilya. ³¹ Alalá majini anínjugwangila Yesu aashidoni, "Pakuva unku-tukumulanga, bai tulumulila tuke tukavainjile vanguarduluve avalá." ³² Nae do, "Wenananga!" Mwe! Majini lo kuumananga kuka ndaviinjilanga vanguluve kutwala shipinga uti shavanguluve kwalalela mwibondi kuka ndalijalanga mulitanda kuwanga. ³³ Avalá vakushungadinguluve vandyúma vatukuta kuka kukaja ndavalanganga uti vinu vitandéke na vivatandéke avalá vanu vamajini. ³⁴ Mwe! Vanu uti vapalikaja alyo kumuukila Yesu. Vakankodye vanínjugwangila aume mushilambo shave.

Yesu ankumponia wakudidimanga mili

Malukushi 2:1-12; Lukashi 5:17-26

⁹ Napanelo Yesu akakwele mwingalava, andyám-boka litanda kuka kukaja kwake. ² Mwe! Popo po, vanu kumwidanavo munu wakudidimanga mili vana-didyé mwigoli. Yesu pagwene likulupililo lyave, andímwaulila wakudidimanga jo kushidoni, "Mwanangu lyunge ntima! Madambi ako andilivalivika." ³ Mwe! Pakati pavamwalimu vadishaliya kutangadikanga shivenevene vaashidoni, "Aju ankukupulu." ⁴ Yesu amanya makumbukililo ave andívaulila doni, "Mwaa shani munkukumbukila kunyata mmitima myenu?" ⁵ Shakwashi shíkakamadyenge kutangola? Ni kushidoni, 'Madambi ako andilivalivika,' kwali kushidoni, 'Takatuka twala mwanda uke?' ⁶ Napane pakulota mumanye doni, Mwana Wamunu ankuvanavo madalaka akulivalivila madambi mushilambo amu..." andímwaulila wakudidimanga jo kushidoni, "Takatuka! Twala igoli yako uke kwing'ande kwako." ⁷ Nae kutakatuka kuka kwing'ande kwake. ⁸ Bai imbumba yavanu paigwene shitendo ashu vandíjopa namene kutwala kumupa lishangelo Nnungu ávapele vanu madalaka ainamuna ai.

Kushamegwa kumwe Mateu

Malukushi 2:13-17; Lukashi 5:27-32

⁹ Napanelo Yesu paumile apo andímwona munu jumo walina Mateu áikele pashitala shaukodi. Nae kumwaulila doni, "Ngwoda!" Mateu kutakatuka kum-

woda. ¹⁰ Yesu ávele nng'ande mwake Mateu alyo na vakwoda vake, mwe! Kwida vakukatisha-ukodi voe na vakutega, nae kulyanavo. ¹¹ Mapalishayo pavagwene davo kutwala kuvaudya vakwoda vake, "Mwaa shani mwalimu wenu alyo na vakukatisha-ukodi pamo na vakutega?" ¹² Yesu paigwite malove alo kushidoni, "Vangumi havanannambela nkúlaula. Vanánnambela nkúlaula, valwele. ¹³ Wena mukalipundishe mana amalove ala, 'Shangulota ni shididi i shadaka.' † Nangu hangwidile ndavashema vaishaliya ila vakutega."

Ing'ano yakunga

Malukushi 2:18-22; Lukashi 5:33-39

¹⁴ Napanelo vakwoda vake Nshuwau vandímuukila Yesu ndamudya, "Wetu pamo na mapalishayo tundáunga, kushi vakwoda vako me havanaunga?"

¹⁵ Yesu kushidoni, "Ilota kuulukika dashi vanu vakulalikigwa pashitamu kuvanavo shipalodi mwene nkúlomba ápagwite popo? Undawika wakati wavalota kumumya nkúlomba pakati pave. Bai apo ni pavalota kunga. ¹⁶ Hapali ánatwala shipande shainguvo ikalikukutike kutenda shivamba mwinguwo yakala. Mwaa shosho sho shindalakananga na inguvo yakala kutwala lilanga lyo kumamodya. ¹⁷ Namomo havanataa ugwalwa wavinyu waambi muvitumba vyamagwogwe vyakala. Ukatenda davo vitumba vyo vindapapuka, ugwalwa wo kujaikanga, vitumba avyo kutwala kwanangeka. Mene, ugwalwa wavinyu waambi vataa muvitumba vyaambi undona vinu avyo uti, kushungika."

Kudyuka kwamwali na kupona kwankongwe

Malukushi 5:21-43; Lukashi 8:40-56

¹⁸ Akuno atangola malove alo, mwe! Kuwika apalá nkútawala jumo kunguguvalila kutwala kushidoni, "Mwanangu mwali andipela ambi apa. Napane tuke ukammikile makono na nae andanama!" ¹⁹ Yesu kutakatuka pamo na vakwoda vake kumwoda nae.

²⁰ Mwe! Nkongwe jumo e auwile vyaka kumi na mbili ulwele úkavele wakumalala kutumila kummandika Yesu, kukwaa nkumbu waikanju yake. ²¹ Nae ashona doni, "Kona ngukwaa yo ikanju yake ai, ndapona."

²² Yesu kushiliuka. Pangwene, kumwaulila kushidoni, "Lyunge ntima mwanangu. Likulupililo lyako lindikuponia." Kutunduvangila muwakati wowo nkongwe jo kupona. ²³ Yesu akawika paing'ande imwe nkútawala aijá, akavona vanu vamwomba kanyembe pashililo po na kwona imbumba yavanu ililanga. ²⁴ Nae kutwala kushidoni, "Umananga, mwali jo hanapela shinu ankulala." Vanavo kumweka. ²⁵ Napane ling'oto lyakuvaumadyanga vanu nng'ande mo, Yesu andíinjila kunkamula mwali nkono, mwali jo kutakatuka.

²⁶ Nadoni dyabali dyashitendo ashi dindyándavala mwisemu ayo uti.

† *Lola Osheya 6:6.*

Kulola kwavakuputala na kutangola kumwe bubu

²⁷ Napanelo Yesu paumile apo, vandímwoda vakuputala mevo vavili vakugwa pashanya po vaashidoni, “Mwanagwe Daudi, twanangila shididi!”
²⁸ Akainjila nng'ande, vakuputala mevo vo kummandi-ka nae kuvaudya, “Mwenu munkukulupila mwiu kenga nangu ninkuulula kumwangangola?” Vanavo do, “Elo nang'olo.”
²⁹ Yesu kuvakwaa mevo ave kushidoni, “Intandekke kulingana na likulupililo lyenu.”
³⁰ Vanavo mevo ave andyújila kulola shana. Yesu kutwala kuvaililila namene aashidoni, “Shitendo ashi hamunamwaulile muni.”
³¹ Napane vanavo vakaume apo ni kupita vaandadya dyabali adyo mwisemu ayo uti.
³² Vovo vo vauka, mwe! Vanu vakamwidanavo muni jumo bubu walijini.
³³ Pavakumulenge lijini lyo, bubu jo kutangolenneu. Dimbumba dyavanu dindíshanga kutwala kushidoni, “Shitendo kenga ashi hashinava kwaneka akuno ku Ishilaeli!”
³⁴ Mapalishayo kanji kushidoni, “Aju ankukumulanga majini kwadimongo dyake nang'olo wave majini.”

Vamadengo vavé padyoko

Lukashi 10:2

³⁵ Napanelo Yesu ashindatanela minjini uti na makaja apita apundisha muvitala vyakulipudidya avalanganga ntenga wambone wautawala, aponia vilwele na mauvilo uti.
³⁶ Nae akone dimbumba kwadimbumba dyavanu andyánangila shididi mwaa wakuvona kudabadabanga na kujaikanga kenga dingandolo díkave nkúshunga.
³⁷ Napavedoni andívaulila vakwoda vake doni, “Mwiu mapuno avé oe napane vamadengo vavé padyoko.”
³⁸ Napavedoni mwenu njugwe mwene mapuno pakulota avatumidye vamadengo mumapuno ake.”

Vamyombe kumi na mbili

Malukushi 3:13-19; Lukashi 6:12-16

10 Napanelo Yesu akavashema vakwoda vake kumi na mbili kuvapa madalaka kwamajini mashapu, akuvakumulanga, akuponia vilwele na mauvilo uti.
² Mena avamyombe avo kumi na mbili ni ala: ntandi, Simoni wavanshema Patulu pamo na nung'une walina Andaleya, kwatika Tiyagu mwanagwe Shebedeu pamo na nung'une walina Nshuwau,
³ kwida Pilipo namu Balutolomeu, naida Tome namu Mateu aijá nkúkatishaukodi, naatika Tiyagu mwanagwe Alupeu namu Tadeu,
⁴ kwida Simoni wa ku Kanaa, namalilila Yudashi Shikaliyote aijá e annimídye Yesu.

Yesu ankuvatumidya vamyombe kumi na mbili

Malukushi 6:7-13; Lukashi 9:1-6

⁵ Napanelo Yesu andívatuma avalá kumi na mbili avalaililila doni, “Kwavamidi, hamunauke na ata minjini vyavashamaliya, hamunainjile
⁶ ila vaukile vanaishilaeli, vo vangandolo vajaikéngé vo.
⁷ Mwamulota kupita mo, valanganga ntenga au, 'Utawala wakuwa undi-

vandika.’
⁸ Valwele vaponie, vakupela vadyuwe, vama-lembe vatadye vatakate na majini kumulanga. Mwenu mupatilé monyo, namwenu momo jaula monyo.
⁹ Mmikaka myenu mo hamunanyukate njuluku woe kwali padyoko.
¹⁰ Hamunanyukate ikoba, dikanju mbili, vilatu na ata ipimbo. Mmádengo inim-
 maikila apate shakulya shake.

¹¹ “Panjini woewoe kwali palikaja lyoelyoe lyamulota kwinjila, nnamebe muni ávaikidile mutwale mwikale paing'ande pake mpaka muliduva lyamulota kutumuka.
¹² Pamuwika paing'ande po, vaudyange vene ing'ande.
¹³ Ikava kenga vanu vaing'ande ayo vandi-vaikila, amani yenu ipagwe na vanavo. Ikanava davo, amani yo imuujile mmene.
¹⁴ Napanelo muni woewoe ákalota kumpwashalela kwali kumwigwilila malove enu, pamuma paing'ande po kwali panjini po, pumunanga litutunga mmadodo mwenu.
¹⁵ Ninkumwaulila mwiu doni, muliduva lyaukumu shilambo sha ku Shodoma na sha ku Gomola vindadyanga kuliko likaja alyo.

Kupapatigwa kundaida

Malukushi 13:9-13; Lukashi 21:12-17

¹⁶ “Mwenu, nangu ninkuntumidya kenga mmangandolo shing'ati mavinji. Napavedoni ava mmajanja kenga dinyoka na múkavele makukulu kenga ding'unda.
¹⁷ Lilaledye kwavanu. Vanavo vanantwala mwenu kumuukanavo mudikamati na muvitala vyave vyakulipudidya, vananshapa viboko.
¹⁸ Vandamuukanavo kwavanang'olo vamajimbo na kwavaumu kwamwaa wangu nangu pakulota muve mmashuda vangu kwavavano na kwavamidi.
¹⁹ Napane vakankamudya kwavavano, hamunajugulange mukumbukila mwakutangalela kwali shakutangola. Shakutangola sho, mundapata muwakati wowo
²⁰ mwaa hamunava shinu mwenu múlota kutangola ila ni Imumu watatagwenu átangola mmitima myenu.

²¹ “Nung'unumunu anannimya nung'unumunu pakulota vampedye. Tatamunu anannimya mwanamunu. Vana vandavatenda ing'ondo vatatamunu na kuvabyaa.
²² Vanu uti vanammangedya kwamwaa wangu nangu napane aijá álota kulipililila mpaka kumwisho andaambwalegwa.
²³ Panjini umo vakampapata tukutila njini unji. Ninkumwaulila mwiu doni, hamumalila shinu minjini uti vya ku Ishilaeli Mwana Wamunu ákanava kwida.

²⁴ “Nkwóda hanalangalela kumpunda mwalimu wake na ntumika hanalangalela kumpunda nang'olo wake.
²⁵ Nkwóda akava kenga mwalimu wake panditosha na ntumika akava kenga nang'olo wake panditosha. Napanelo ikava kenga tatamunu wapaing'ande vaninshe-
 ma kuva Beelishebuli, kushi avalá valikola vapaing'ande pake i nimpomo?”

† Mmandiko ashigalego vaandiké doni, a shaabu, nkuva kwali lyava. Uti avi vivele vitali vyavashikandyanga njulukulu.

Hamunajope

Lukashi 12:4-9

²⁶ “Napavedoni vanavo hamunavajope. Hashipali shinu shilipiídye shíkaundukuka na hashipali shinu shashipii shíkaumilila kulangele. ²⁷ Vyandimwaulila kushii tangalela kulangele na vyamwigwa kumatu valangangila panantutuvilo. ²⁸ Hamunavajope avalá vabyáa mili vákaulula kubyaa ungumi ila njope jo áulu-la kubamola uti mili ungumi kushena. ²⁹ Da hamunashumidya vyuni vivili kwaidoshi imo? Kanji vovo vo hapali ata jumo álota kugwa pai bila mwene Tatagwenu kuungila nkono. ³⁰ Ata wo ugwimbu wammyuti vyenu Nnungu andimanya ishabu yake. ³¹ Napavedoni hamunajope mwaa mwenu ni múvenavo mana namene kuliko vyuni vité kwinjipa.

³² “Napanelo kula munu álota kunguvalanganga nangu pamevo pavanu, nanangu nammalanganga pamevo pake Atata ávele kuwa. ³³ Napane aijá álota kungukana pamevo pavanu nanangu nankana pamevo pake Atata ávele kuwa.

Hangwidinavo amani kanji ing'ondo

Lukashi 12:51-53; 14:26-27

³⁴ “Hamunakumbukile kenga nangu ngwidinavo amani mushilambo amu. Hangwidinavo amani, ngwidinavo ing'ondo. ³⁵ Nangu ngwidilé ndatadya, “ ‘Mwana nnume ammangedye tatamunu, mwana nkongwe ammangedye jujumunu, nannombwa ammangedye navyalamunu.

³⁶ Vammongo vamu vandava vo valikola vake jo mwene.’ †

³⁷ “Aijá ánnagwaledya namene tatake kwali anyoke kuliko mwangunagwaladyedya nangu, ajo kwangu nangu havaikidile. Namomo aijá ánnagwaledya namene mwanagwe nnume kwali nkongwe kuliko mwangunagwaladyedya nangu, ajo momo kwangu nangu, havaikidile. ³⁸ Munu ákalitika nshalaba wake kungwoda nangu, kwangu nangu havaikidile. ³⁹ Aijá ánamatila shingumi shake andakatoka na aijá ákatoka shingumi shake kwamwaa wangu nangu andanamatila.

Dinudyo

Malukushi 9:41

⁴⁰ “Ámpwashalela mwenu, angupwashalela nangu na ángupwashalela nangu, ampwashalela aijá ángutumididye. ⁴¹ Aijá ámpwashalela nkúlava kwamwaa wakuva nkúlava andapata inudyo kenga nkúlava. Namomo ámpwashalela munu waishaliya kwamwaa wakuva waishaliya andapata inudyo kenga waishaliya. ⁴² Ninkumwaulila mwiu doni, munu álota kumupa luwene vela alu lwamedi akukumbila ndyoko jumo pakati pavadyoko ava kwamwaa wakuva nkwóda wangu nangu, ajo mwiko hakatoka inudyo yake.”

Vakwoda vamwe Nshuwau Wakubatisha

Lukashi 7:17-23

11 Napanelo Yesu pamalidile kuvapa malailililo vakwoda vake kumi na mbili avalá, andyúma kuka ndapundisha na ndavallanganga ntenga mumakaja aise mu ayo.

² Nshuwau jo ávele nkalaboshi, paigwite uti vinu vyashitenda Klistu andívatuma vakwoda vake ³ vaka-mudye doni, “Da wako ni aijá úshilota kwida kwali tunnindile junji?” ⁴ Yesu kushidoni, “Wena mukamwaulile Nshuwau jo vyamwigwa na vyamwona avi. ⁵ Vakuputala mevo vankupata kulola, vakudidimanga madodo vankuwena, vamailemba vankuvatadya kutakata, vákaigwa vankwigwa, vakupela vankuvadyuwa na vama-shikini vankuvalangangiligwa ntenga wambone. ⁶ Andijaligwa aijá ákangunyatila nangu.”

Mapundisho kwamwaa umwe Nshuwau

Lukashi 7:24-35

⁷ Napanelo vakwoda vake Nshuwau akuno vauma, Yesu andítunduvanga kumanyiya imbumba yavanu ing'ano imwe Nshuwau aashidoni, “Da mwenu muukile ndalola nyamani kushimbweshe akulá? Muukile ndalola udani úshipunga imepo? ⁸ Da muukile ndalola nyamani? Nannola munu ágwalidile dinguvo dyabei? Mwenu, vanu vagwalíla dinguvo dyabei vaikala mud-ing'ande dyavaumu. ⁹ Kanji napanelo muukile ndalola nyamani? Muukile nannola nkúlava? Elo, ninkumwaulila doni, nae pankulava po, andipunda.

¹⁰ Aju ni aijá wavamwandike doni,

“ ‘Mushu mwako, nannagaledya múntenga wangu, nae andakukandyangidya indila yako.’ ††

¹¹ “Ninkumwaulila mwiu doni, pakati pavanu vamu-shilambo shapai ashi, haumilidile nkúlava ámpundile Nshuwau Wakubatisha. Ata ive davo aijá ndikidiki muutawala wakuwa wo, nae ni nang'olo ámpundile Nshuwau jo. ¹² Kutunduvangila wakati umwe Nshuwau Wakubatisha mpaka ambi apa, utawala wakuwa unkuka na dimongo na valikanyilídyá vankwinjila. ¹³ Mwaa Vakulava uti pamo na Lilamulo vandilava mpaka Nshuwau ¹⁴ napane ikava kenga munkuulula kwamini, bai nae ni jojo Liyashi áshilindiligwa kwida. ¹⁵ Aijá ávenavo matu akwigwidya, aigwe.

¹⁶ “Napanelo vanu vaimbula ai ndivalinganiange na nyamani? Vanavo vavelé kenga vadyoko vaikaléngé mumautu aumbala vaulanila doni,

¹⁷ “ ‘Tundimwambela magoma,

mwenu hamuvinile.

Tundimba dimu dyashililo,

mwenu hamulidile.’

¹⁸ “Shapo lola, andida Nshuwau pakalya na pakakumbila, mwenu muushidoni, ‘Anintawala lijini ajo.’ ¹⁹ Andi-

†† *Lola Malakiya 3:1. ‡ Kwali: a ...utawala wakuwa unku-tandegwa ing'ondo na vanu vakalau vankukamula kwankukunya. Kwali: a ...utawala wakuwa vanu vankwinjila kwankukunya na vanu vankukunya vankupata.*

da Mwana Wamunu alya na akumbila, mwenu muushidoni, 'Nnole munu wakululuka na lilevi, njave vakukatisha-ukodi na vakutega.' Kanji napane limanyi-lo lyake Nnungu linkulilodya kuva lyashaliya nkati muvitendo vyake."

Dilana kwamakaja ákalijugulenge

Lukashi 10:13-15

²⁰ Yesu napane kutwala kutunduvanga kutangadikanga minjini vyatandile makango oe mwaa havalotile kulijugulanga, ²¹ "Upambale wako Kolashimu! Upambale wako Beteshaida! Makango atandéke kwenu leka átandeke ku Tilu namu ku Shidoni, vanavo doni vâliligulenge tangu kala. Doni vâlitaenge maguni na vâpakalenge liu. ²² Nangu ninkumwaulila mwiu doni, muliduva lyaukumu vatilu namu vashidoni vandadyanga kuliko mwenu. ²³ Nawako Kapalanaumu! Da ulota kulikwedy mpaka kuwa? Bai vandakupandamwalela kumoka. Makango atandéke kwako wako leka átandeke ku Shodoma, nji ni awo ukandipagwa mpaka nelo. ²⁴ Napane nangu ninkukwaulila mwiu doni, muliduva lyaukumu shilambo sha ku Shodoma shindadyanga kuliko mwenu."

Idananga kwangu nangu nampumudya

Lukashi 10:21-22

²⁵ Napanelo muwakati awo Yesu andítangola kushidoni, "Ninkukulambwalela † Atata, *UMU* wakuwa na pai, pakuvapiyanga vinu avi vanu valimanyilo na valipundishídye kuvalodya vanu vila. ²⁶ Elo Atata, mwaa amu ni momo mwaulatatelele umwene. ²⁷ Vinu uti aningukamudya Atata. Hapali junji ámmanyite Mwana ila Atata na hapali ámmanyite Atata ila Mwana pamo namu aijá walota kunnodya mwene Mwana.

²⁸ "Idananga kwangu mwenu uti dándabadabyenge dibasha, nangu nampumudya. ²⁹ Lyunge likangoti lyangu na lipundishe kwangu. Nangu ni wakulimaladya na wantima wakulishapeya na mwenu mundapata kupumula kwaungumi wenu. ³⁰ Mwaa likangoti lyangu halinapwateka shinu na ibasha yangu inkugaluka."

Kwaliduva lyakupumula Yesu ni *UMU*

Malukushi 2:23-28; Lukashi 6:1-5

12 Napanelo muwakati awo Yesu apita mulishamba lyangano muliduva lyakupumula, vakwoda vake indívakola indala kutwala kumpulula ngano kumamena. ² Mapalishayo pavagwene davo vakaashidoni, "Wako, vakwoda vako vankutenda shinu shilaéka muliduva lyakupumula." ³ Yesu kushidoni, "Da mwenu hamunava kushomya vyatandíle Daudi painkodíle indala pamo na avalá vavenavo? ⁴ Nae jo andíinjila nng'ande mwake Nnungu kulya alalá magung'u avashimumidya Nnungu, magung'u áshilaeka kulya nae pamo na vavagwe ila gweka vakulangalalela-shadaka. ⁵ Kwali hamunava kushomya mu Lilamulo pavaandike doni, vakulangalalela-shadaka

† Kwali: a Ninkukutumbanga...

vankunyatyanga liduva lyakupumula nng'ande mwake Nnungu pavakavanavo makosha? ⁶ Bai nangu ninkumwalila doni, apa apali nang'olo kuliko ing'ande yake Nnungu. ⁷ Mwenu leka mumanyite mana amalove ala, 'Shangulota ni shididi i shadaka,' hamukanavaukumu vanu vákave makosha. ⁸ Mwaa kwaliduva lyakupumula, Mwana Wamunu, Umu."

Yesu ankumponia wakudidimanga nkono

Malukushi 3:1-6; Lukashi 6:6-11

⁹ Paumile apo andyúka ndainjila mushitala shave shakulipudidya. ¹⁰ Mwe! Mo mushitala mo kupagwa munu jumo wakudidimanga nkono. Vanavo valota vapaté shakunkanidyanga Yesu, vandímudya, "Da lilamulo linkutuleka kumponia munu muliduva lyakupumula?" ¹¹ Yesu kushidoni, "Da wakwashi pakati penu álota kutenda akavanavo ngandolo wake, ngandolo ajo kulijela mulipondo muliduva lyakupumula kutwala nae mene kuka ndamumya? ¹² Kushi munu jo i nimpomo kuvanavo mana makumene kuliko ngandolo. Napavedoni muliduva lyakupumula lyo, linkutuleka tutende wambone." ¹³ Nae kutwala kumwaulila munu jo kushidoni, "Nyalodya nkono wako wo!" Nae kunyalodya kutwala nkono wo kupona kuva kenga mo mwauvalalele unji. ¹⁴ Bai mapalishayo pavaumanenge nshitala amulá, vandíikala shemba pakulota vammalidyé.

Ntumika átandalagwidye na Nnungu

¹⁵ Yesu pamanyite nnugu wave, mulyutu alyo andílyumadyanga kutwala imbumba ing'umene yavanu kumwoda, nae valwele uti kuvaponia. ¹⁶ Napanelo andívaduma havanatadye kummanya vanu ¹⁷ pakulota liwikile popo lilove litangaléke na nkúlava Ishaiya doni,

¹⁸ "Nnole ntumika wangu wanintandwele, nae ni wakunagwaleka wangulitamangila muungumi wangu.

Nammika Imumu wangu,

nae andavalanganga kwavamidi ishaliya yangu.

¹⁹ Jojo jo hapwatana na munu na ata hakugwanga, hapagwa munu wakwigwa mudibalabala lidi lyake.

²⁰ Nae lupambai lupwajikéngé hatema, lutambi lututuma lyoi hadima, mpaka atadye ishaliya iteme.

²¹ Kwake nae vamidi vandavanavo lilindilililo." ††

Ánkupulu Imumu Wanashwe, Nnungu hannivaliva

Malukushi 3:20-30; Lukashi 11:14-23

²² Napanelo vanu vandímwidanavo kumwe Yesu munu jumo walijini, wakuputala mevo na bubu nae kumponia, munu jo kutangola na kulola. ²³ Imbumba uti yavanu indishanga iishidoni, "Da aju, ava jo mwanagwe Daudi?" ²⁴ Kanji mapalishayo pavaigwite davo kushidoni, "Munu aju mwakumulangila majini ni kwaindila imwe Beelishebuli nang'olo wave majini."

²⁵ Yesu amanya makumbukililo avo andívaulila kushi-

†† Lola Ishaiya 42:1-4.

doni, "Kula utawala ukalijavanianga ubyaananga shivenevene, utawala awo undatimbikanga. Haupali njini kwali likola lilijavanianga kutandana ing'ondo shivenevene lilóta kulikukumula. ²⁶ Shatwani akalikumulanga jo mwene, ankulijavanianga, napane utawala wake ulota kulikukumula dashi? ²⁷ Ikava kenga nangu ninkukumulanga majini kwaindila imwe Beelishewuli, kushi vadyoko venu vakumulanga kwaindila imwe nyani? Bai vovo vandava vakuukumu venu. ²⁸ Napane ikava kenga ninkukumulanga majini kwaindila ya Imumu wake Nnungu, bai manya doni utawala wa Nnungu mwenu po, undimwikila.

²⁹ "Da mwashi munji mwakwinjilila nng'ande mwamunu wadimongo ndakuunganga vyang'ande mwake mukanave shitandi kumunga mwene ing'ande jo? Ni apo palota kuulula kukuunganga vyang'ande. ³⁰ Aijá ákalyunganianga namu nangu, ankunguvangedya na aijá ákakungaila pamo namu nangu, ankumwadilanga. ³¹ Napavedoni ninkumwaulila, madambi na kukupulu uti kundalivalivigwa napane kunkupulu Imumu Wanashwe hakulivalivigwa. ³² Munu álota kuntangola kunyata Mwana Wamunu, analivalivigwa napane áija álota kuntangola kunyata Imumu Wanashwe, halivalivigwa ata muwakati au na ata muwakati ulóta kwida.

Nnandi ùmanyika kwavyepo vyake

Lukashi 6:43-45

³³ "Nnandi wakukonda upa vyepo vyambone, nnandi wakunyalanyalanga upa vyepo vyakunyalanyalanga. Kwaindila yavyepo vyake ni paulota kumanya nnandi awo. ³⁴ Mmanu mmashinankulaba mmakunyata mitima mwe! Mwenu mulota kutangola dashi malove ambone akuno múvele mmanu mmakunyata mitima? Munu atangola vimuumbéle muntima mwake. ³⁵ Mnu wakwalala ntima, mulipeta lyake lyambone aumya vinu vyambone. Mnu wakunyata ntima, mulipeta lyake lyakunyata aumya vinu vyakunyata. ³⁶ Nangu ninkumwaulila doni, muliduva lyaukumu vanu vandajang'ulanga malove uti akudidimanga. ³⁷ Kwamalove ako undapata shaliya na kwa lo malove ako undaukumigwa."

Shimanyikilo shimwe Janashi

Malukushi 8:11-12; Lukashi 11:29-32

³⁸ Napanelo pakati pamapalishayo na vamwalimu vadishaliya vandímwaulila Yesu, "Mwalimu, tulota wako ututandele shimanyikilo twone." ³⁹ Nae akavajang'ula kushidoni, "Ni imbula yaukalau na yakulavalava ijúgwa shimanyikilo. Havalodya mnu shimanyikilo shinji ila ashilá shankúlava Janashi. ⁴⁰ Mo mwapagwidídye Janashi munda mwasamaki maduva matatu shilo na mui, yadavo andapagwa Mwana Wamunu maduva matatu shilo na mui pai po muulongo. ⁴¹ Avalá vanenive paukumu vandatakutuka kwimila kuvaukumu vanu vaimbula ai. Vanenive vo, pavaigwite kuvalanganga kwantenga Kumwe Janashi vandílijugulanga. Mwenu! Apa apali nang'olo kuliko Janashi.

⁴² Namomo paukumu andatakutuka umu nkongwe wakwina shilambo kwimila pakati pavanu vaimbula ai kuvaukumu. Nae pakulota kwigwilila limanyilo lyake Shalomoni, aaleké kumwisho shilambo. Mwenu! Apa apali nang'olo kuliko Shalomoni.

Kuujila kwalijini nkalau

Lukashi 11:24-26

⁴³ "Lijini nshapu panauma mumili mwamunu apita adumbadumba kushimbweshe alambela lyutu lyakupumulilila napane hanakodya, ⁴⁴ kanji aashidoni, 'Kudyanga nguujile kwing'ande kwangu kwangwaleke.' Pawika ako akodya ing'ande yo akapali mnu, vâpyailenge shana na vinu uti vâpangenge shana. ⁴⁵ Nadoni nae andauja kuka ndavatwala majini anji saba akumamodya kubanga kumpunda nae kutwala kwinjilanga nng'ande mo kwikala. Bai shinamidyo shamunu ajo shindava shakumamodya kunyata kupunda shamwanda utandi. Nimumo momo mwailota kuvalela kwaimbula ai yaukalau."

Jujumunu na vanung'unuvake Yesu

Malukushi 3:31-35; Lukashi 8:19-21

⁴⁶ Napanelo Yesu akuno atangola na imbumba yavanu, mwe! Anyoke pamo na vanung'unuvake kwida panda ndajugwa vatangonavo. ⁴⁷ Mnu jumo kumwaulila Yesu, "Panda po, andida anyoko pamo na vanung'unuvako valota vatangole namu wako." ⁴⁸ Nae kushidoni, "Da ajala ni wakwashi na vanung'unuvangu ni vakwashi?" ⁴⁹ Akanyalodya nkono kuvaalota vakwoda vake kutwala kushidoni, "Ajala na vanung'unuvangu ni ava apa. ⁵⁰ Aijá átandedya mwalatela Atata ávele kuwa, ajo ni mwanetu, numbwangu na ajala."

Nkong'o waulongo wakuvilingananga

Malukushi 4:1-9; Lukashi 8:4-8

13 Muliduva lyolyo Yesu paumidile panda andyúka ndaikala nanyenje litanda. ² Popo po dindyúmbalanila dimbumba dyavanu, kuntang'anedyo mpaka kuntadya nae kukwela mwingalava kwikala kuvaleka vanu uti vâimidile kumwangu. ³ Nae andívaulila vinu vyo kwamikong'o aashidoni, "Mwenu! Nkúpanda jumo andyúma kuka ndamwadilila imbeju. ⁴ Pashimwadilila kupagwa igwilidíle nanyenje indila vyuni kwida ndadadola. ⁵ Inji kugwilila padinyanga pauvéle ulongo padyoko kwodamwaa ulongo wo hauvele woe, yanavo kumalenneu. ⁶ Palikamadile liduva, milandi vyo kujuminne mwa dinyija hadilitavalakadíle. ⁷ Inji kugwilila padimiva, dimiva dyo kukulumuka kutwala kushinya milandi vyo. ⁸ Inji kavili kugwilila paulongo walutuba, yanavo kulundula vye-po; imo imiya, inji sitini na inji yo salasini. ⁹ Aijá ávenavo matu akwigwidya, aigwe."

Mana amikong'o

Malukushi 4:10-20; Lukashi 8:9-15

¹⁰ Napanelo vakwoda vake vanimmandika kumudya doni, "Mwaa shani unkutangola na venentete

kwamikong'o?" ¹¹ Yesu akavajang'ula kushidoni, "Mwaa mwenu vanintadya mumanye vipii vyautawala wakuwa kanji vanavo mene. ¹² Kula munu ávenavo vandamwanjadyedya kuvanavo vyoe. Ákavenavo ata sho shavenavo sho, vanampoka. ¹³ Ni ashi shandi-vatangalela kwamikong'o mwaa,

"Vanavo ata valola avi, havanona shinu, vaigwa avi, havanaigwa shinu ata havanamanya shinu shaambíka.'

¹⁴ Kwavanavo ankuwikila popo malove ankulava Ishaiya atédoni,

"Mwenu ata mwigwa avi, mundaigwa kanji mwiko hamumanya shaambíka,

mulola avi, mundona kanji mwiko hamwanalela.

¹⁵ Mitima vyavenentete ava vindinanopa,

kwigwa vankwigwa kanji matu ave andidivana, na mevo ave andyulugwala.

Leka ikavé davo vakandyona na mevo ave, vakandigwa na matu ave,

kwanalela mmitima myave,

kutwala kushiliuka na nangu ndikandivaponia.' †

¹⁶ "Kanji mevo enu mwenu andijaligwa mwaa ankulo-la na matu enu mwaa ankwigwa. ¹⁷ Ninkumwaulila mwiu doni, vakulava na vaishaliya voe vashindalota vone vyamwona mwenu avi kanji havagwene na vaigwe vyamwigwa mwenu avi kanji havaigwite.

¹⁸ "Mwenu napanelo igwilila mana ankong'o wankú-panda. ¹⁹ Munu akaigwilila lilove lyámba utawala, akanaigwa shana, andáaloka nkalau kumpokenneu lilove lyavapandile muntima mwake. Aju ni imbeju igwilidíle nanyenje indila. ²⁰ Imbeju igwilidíle padinyanga ni munu áigwilila lilove kutwala kupwashalela na lipuwilo. ²¹ Kwodamwaa havé dinyija, hanalikiniya. Kupata kwene mauvilo kwali kupapatigwa, kuujinneu kunyuma. ²² Imbeju igwilidíle padimiva ni munu áigwilila lilove kanji mangaikangilo awakati au pamo na lung'unuku lwamali, avyo vindáshinya lilove kutwala nae mene kupa vyepo. ²³ Napanelo imbeju igwilidíle paulongo walutuba, aju ni aijá áigwilila lilove na kwigwa shana, álundula mwiu vyepo; munu jumo miya, junji sitini na junji jo salasini."

Nkong'o wangano na nashitani

²⁴ Yesu kuvakang'ela nkong'o unji aashidoni, "Utawala wakuwa uvelé kenga munu ápandile imbeju yambone mulishamba mwake. ²⁵ Napane shilo vanu válalenge lwono, mmongo kwida ndapanda imbeju yanashitani mo mmapondo angano kutwala kulyukila. ²⁶ Bai ngano aijá kumela kukulumuka, nanae nashitani jo kumela. ²⁷ Napanelo vatumika vake kuka ndamudya, 'Nang'olo, da wako haupandile imbeju yambone mulishamba amulá? Kushi nashitani jo, aalakadilé kwashi?' ²⁸ Nae kushidoni, 'Vinu avyo atandilé mmongo.' Vatumika do, 'Napane unkulota tuke tukandabwalange?' ²⁹ Nae kushidoni, 'Mene! Mwaa mukandabola inkuulukika kumpambanianga na ngano. ³⁰ Leka vikulumuke pamo mpaka muwakati wamapuno. Bai

muwakati wowo ndavaulila vakupuna kushidoni, shi-tandi mwangange nashitani jo mumuungange vitinda muntae moto, mutwale mumwangange ngano muke mukammike mushidimbi mwangu.' "

Nkong'o waimbeju yanshupi

Malukushi 4:30-32; Lukashi 13:18-19

³¹ Kutwala kuvakang'ela kavili nkong'o unji aashidoni, "Utawala wakuwa uvelé mwaimbeju yanshupi yatwete munu kuka ndapanda mulishamba mwake. ³² Imbeju ai idikidiki namene kuliko dimbeju dinji uti, napane paimela po undáuma nnandi ukumene wakupunda milandi vinji mpaka vyuni vyakuniania kwida ndaden-ga vyanda mudinavi dyake."

Nkong'o wankukumuku

Lukashi 13:20-21

³³ Kavili kuvakang'ela nkong'o unji aashidoni, "Utawala wakuwa uvelé mwankukumuku watwete nkongwe kupiya mudipishi nnatu dyaunga wangano mpaka unga uti kukumuka."

Kwaulangila kwamikong'o

Malukushi 4:33-34

³⁴ Vinu avi uti Yesu ashindaulila imbumba yavanu atumila mikong'o. Hashipali shashivaulila kwabila kutumila mikong'o ³⁵ pakulota liwikile popo lilove litan-galéke kwaindila yankúlava aashidoni, "Ndatangola ngutumila mikong'o, ndavalanganga vinu vilipiídye tangu kukandyangig-wa shilambo." ††

³⁶ Napanelo Yesu palakile imbumba yavanu ailá, akauka ndainjila nng'ande. Vakwoda vake vakamuuki-la ndanjugwa, "Twautila mana ankong'o wanashitani mulishamba." ³⁷ Nae akavajang'ula kushidoni, "Aijá ápandile imbeju yambone, Mwana Wamunu ³⁸ na lishamba lyo, shilambo. Ailá imbeju yambone, avo ni vana vamuutawala, nashitani jo vanavake nkalau na ³⁹ mmongo ámpandile nashitani ni Ndamoni. Kupuna ni mwisho wawakati, vakupuna kuva vanjelo. ⁴⁰ Nadoni kenga mo mwavanankungailila nashitani kuntaa moto, nimomo mwaulota kuvalela mwisho wawakati. ⁴¹ Mwana Wamunu andavatuma vanjelo vake kutwala vanavo kukungailila pamo muutawala wake avilá uti vitádyá lipagwe lidambi na avalá uti vatandédyá un-gave-lilamulo. ⁴² Vovo vo, vandavajela kulitungulu, kushinu kulota kupagwa shililo na kutuka shulu nkany-wa. ⁴³ Bai avalá vaishaliya vandashenga kenga liduva muutawala watatagwave. Aijá ávenavo matu akwig-widya, aigwe.

Nkong'o wamali alipiídye

⁴⁴ "Napanelo utawala wakuwa uvelé mwamali alip-iídye mulishamba, aanaladíle munu jumo kutwala nae kupiya kavili. Napane kwamwaa wakumuumbala

† Lola Ishaiya 6:9-10.

†† Lola Dimu 78:2.

lipuwilo, andyúka nashulusha vinu vyake uti vyavénavo kuka ndashuma lishamba alyo.

Nkong'o walijanga lyamali oe

⁴⁵ "Namomo utawala wakuwa uvelé mwankushulusha jumo áshilambela majanga amali oe. ⁴⁶ Nae pakadidye lijanga limo livénavo mali oe andyúka ndashulusha uti vyavénavo kuka ndashuma lijanga alyo.

Nkong'o walungau

⁴⁷ "Namomo utawala wakuwa uvelé mwalungau lwa-vatajile mmedi kutwala kujola dyomba dyakula namuna. ⁴⁸ Dyomba dikajole dyoe vene kuutidya lungau kumwangu kutwala kwikalanga, kutandola dyomba dyambone kujela muvikapu vyave dyomba kaligwa dyo, kujaa ako. ⁴⁹ Amu nimomo mwailota kuvalela mwisho wawakati; vanjelo vandaida ndavaapula vakalau mushipinga shavanu vaishaliya. ⁵⁰ Vakalau vo kuvajela kulitungulu kushinu kulota kupagwa shililo na kutuka shulu nkanywa."

⁵¹ Napanelo Yesu andívaudya, "Da mundigwa shana vinu avi uti?" Vanavo do, "Elo tundigwa." ⁵² Nae kuvaulila kushidoni, "Doni napanelo kula mwalimu álitandile nkwóda wautawala wakuwa ankuva mwatatamunu wapaing'ande áumya mulipeta mwake vinu vyaambi na vyakala."

Vakwave Yesu vankumwita

Malukushi 6:1-6

⁵³ Napanelo Yesu pamalidile kukong'a mikong'o avyo andyúma palyutu alyo. ⁵⁴ Akawika kwave kutunduvanga kuvapundisha venentete mushitala shave shakulipudidya. Vanavo kutwala kushanga, "Da li-manyilo ali na makango ala apatilé kwashi? ⁵⁵ Aju da i jo mwanagwe nkúveda aijá? Anyoke aju i Maliya? Vannung'unuvake i Tiyagu, Yoshe, Simoni, namu Yudashi? ⁵⁶ Valumbuvake da i vo vatwikanavo wetu ava? Kushi napane vyatenda avi apatilé kwashi?" ⁵⁷ Nadoni vanavo vashinammikila shitundi. Yesu kutwala kushidoni, "Nkúlava havanamwiludyanga ila mushilambo shake na pakaja pake." ⁵⁸ Bai palyutu alyo, Yesu hatandíle makango oe kwamwaa waungakulupila wave.

Kubyaigwa kumwe Nshuwau Wakubatisha

Malukushi 6:14-29; Lukashi 9:7-9

14 Napanelo mumaduva alo Elode nang'olo walijimbo andíigwanga dyabali dimwe Yesu. ² Nae akaigwe dyabali adyo andívaulila vatumika vake kushidoni, "Ajo Nshuwau Wakubatisha ajo! Andidyuka pakati pavakupela. Ni ashi shitádyá vyamakango avyo vipagwe namu nae." ³ Ivé doni, jo Elode aju anínkamula Nshuwau kumunga mang'unyang'unya kutwala kunjela nkalaboshi kwamwaa umwe Elodiya ndyagwe Pilipo nung'une mwene. ⁴ Nshuwau aju ashinashashulanga Elode aashidoni, "Haikuvaikidile wako kunnomba nkongwe aju." ⁵ Jo Elode jo, ashindalota

ammyae Nshuwau napane ashivajopa venentete kwamwaa vanavo vashinankulupila Nshuwau jo kuva nkúlava.

⁶ Napanelo muliduva lyashitenda Elode shikukulu shakumbukumbu yakuvalekwa kwake, mwana nkongwe umwe Elodiya andívina landa pamevo pavanu avalá. Elode kutwa kumwida lipuwilo lyoe ⁷ mpaka kuntadya kulivikila alilapila kujaula shinu shoeshoe shakajugwile. ⁸ Bai mwali jo kwading'ano dyapatíle kwanyoke akaashidoni, "Ngupa popo apa mushani muti umwe Nshuwau Wakubatisha." ⁹ Umu kutwala kumwidila shipalodi, napane kwodamwaa andílilapa pamevo pavanu vavénavo pashikukulu apalá, andílamulila vamupe. ¹⁰ Nae akavatuma vamadengo vake vakanshinde Nshuwau kukalaboshi. ¹¹ Vanavo muti wo kwidanavo mushani ndamupa mwali, mwali jo kuka ndamupa anyoke. ¹² Vakwoda vake Nshuwau vakaida ndatwala mili wo kuka ndashika. Vakashike vandyúka nammalangangila Yesu dyabali adyo.

Yesu ankulisha imbumba yavanu dyalupu mwanu

Malukushi 6:30-44; Lukashi 9:10-17; Nshuwau 6:1-14

¹³ Yesu akaigwe dyabali dyo andyúma palyutu alyo kukwela mwingalava kuka kushimbweshe gweka yake. Napanelo dimbumba dyavanu pavamanyite dindyúmananga mmakaja mwave kuka vamwoda na mado-do. ¹⁴ Yesu akashuluka mwingalava, nae kwona dimbumba dyavanu adilá, kwanangila shididi kutwala kuvaponia valwele uti pakati pave.

¹⁵ Napanelo wakati wayalyulo pauwikile po, vakwoda vake vanímmandika kumwaulila doni, "Pashinu apa panalugwangwa vila na wakati wo undipita. Vaulile venentete vaukanange mmakaja vakashume shakulya valye." ¹⁶ Yesu kushidoni, "Hainabidi shinu vanavo kuukananga. Vape mwenu po shakulya." ¹⁷ Vanavo do, "Um! Wetu apa hatuve shinu ila magung'u mwanu na dyomba mbili bai." ¹⁸ Yesu kushidoni, "Idanavo." ¹⁹ Nae akavalamulila venentete vaikalange muukoka, akatwala magung'u mwanu alalá na dyomba mbili adilá, akalola kuwa kutwala kwalaliya. Akamajaniange magung'u alalá andívapa vakwoda vake, vakwoda vake vo, kuvajavila venentete. ²⁰ Nadoni vanu uti vandílya kwikuta. Vakalakatange makombo alalá, vandyúmbadya makalala kumi na mbili. ²¹ Vanu ve valíle vavele valume dyalupu mwanu kwabila kuvavangilila vakongwe na vadyoko.

Yesu ankuwena pashanya medi

Malukushi 6:45-56; Nshuwau 6:16-21

²² Yesu kutwala kuvakanyalidyangidyanne vakwoda vake vakwalange mwingalava vauke valangalela litanda nkono unji vanneke nae alaila imbumba yavanu. ²³ Akalaile imbumba ailá, andíkwela gweka yake palishinga kuka ndashwali. Liduva palidimbile, nae kupagwa gweka mulyutu alyo. ²⁴ Napanelo muwakati wene wo ingalava ivele kushu na kumwangu mawimbi agang'olagang'ola mwaa ishilodya kwaishaalakela imepo. ²⁵ Muwakati wamatingatinga kumanga kulan-

gala nae kutwala kuvaukila vakwoda vake awena pashanya medi. ²⁶ Vakwoda vake avalá pavangwene awena pashanya medi vanavo ni kujopa doni kutwala kushidoni, "Mwenu litailei!" Bai kwamwaa wakujopa vandikugwanga. ²⁷ Yesu kutangalenneu kushidoni, "Lyunge ntima! Ni nangu apa. Hamunajope." ²⁸ Patulu kushidoni, "Nang'olo, ikava kenga ni wako ngulamulila ngwide ko kwaulele wako nguwená pashanya medi." ²⁹ Yesu do, "Ida!" Patulu akashuluka mwingalava amulá kumuukila Yesu awena pashanya medi. ³⁰ Pagwene napane imepo kupunga na dimongo nae kujopa. Akatunduvanga kutitimila kutwala kutangola pashanya po aashidoni, "Nang'olo nguposha!" ³¹ Yesu kunyaladyedyanneu nkono kunkamula kutwala kushidoni, "Umunu walikulupililo lidikidiki, mwaa shani undyam-bambidya?" ³² Napane vanavo vainjila mwingalava, imepo yo kulimaladya do, jii. ³³ Bai vanu ve vavéle mwingalava amulá vandilipudya kumwe Yesu vaashidoni, "Mwiu, wako umwanagwe Nnangu." ³⁴ Ling'oto lyakwamboka litanda Iyo vandíshiya ku Geneshaleti. ³⁵ Bai vanu vashilambo asho vakamanye doni aju apa Yesu, vandyandadya dyabali mwisemu ayo uti. Napane vanu vandívaidanavo kwake nae valwele vave uti ³⁶ kutwala vo valwele vo kunjugwangila pakulota vankwae munkumbu waikanju yake tu. Nadoni uti avalá vankwaídye, vandípona.

Yadi na malamulo

Malukushi 7:1-13

15 Napanelo Yesu vandímwidila mapalishayo pamo na vamwalimu vadishaliya vakwalakela ku Yelusalemu ndamudya, ² "Mwaa shani vakwoda vako havanaodedyá shinu yadi yavatulakalele vanyakala vetu? Mwaa vanavo pavalya, havananavanga shinu medi mmakono." ³ Nae akavajang'ula kushidoni, "Mwaa shani namwenu na yadi yenu yo, hamunaodedyá shinu malamulo ake Nnangu?" ⁴ Mwaa Nnangu atédoni, 'Mwishimu tataka na anyoko' † na 'Aijá álota kumwiludyanga tataka kwali anyoke inimmaikila vammalidyé.' ††⁵ Kanji mwenu munkupundisha doni, 'Munu woewoe akamwaulila tataka kwali anyoke kushidoni, Sho shangushilota ndikupe sho, ni shadaka shakumupa Nnangu, ⁶ bai munu ajo hainammaikila shinu kavili kumwishimu tataka kwali anyoke.' Nadoni pamwodedya yadi yenu ai inkuntadya mwiludyange lilove lyake Nnangu. ⁷ Mmanu mmamalambi mwe, Ishaiya animmalanganga shana patédoni, ⁸ "Venentete ava po pakanywa apa vankungutumbyanga, ila ntima wave uvelé kushu namu nangu. ⁹ Vanavo vankulipudya bule, vapundisha kenga mapundisho shii malamulo avanu vene.'" ‡

† Lola Kuma 20:12; Kumbukumbu 5:16. †† Lola Kuma 21:17; Valawi 20:9. ‡ Lola Ishaiya 29:13.

Shintáa munu ushapu

Malukushi 7:14-23

¹⁰ Bai andíshema imbumba yavanu kwaulila doni, "Igwilila na mumanye shaambíka. ¹¹ Shinu shintáa munu ushapu i ashilá shinjilíla pakanywa ila ni ashilá shúma pakanywa. Asho mwiu shinkuntaa munu ushapu."

¹² Napanelo vakwoda vake vandímuukila ndamudya doni, "Da unkumanya kenga mapalishayo pavaigwite vyautangwele avilá indivanyatila?" ¹³ Nae kushidoni, "Kula nnandi wakapandile Atata wakuwa undabubuligwa. ¹⁴ Valeke, vanavo ni vananagalaledi vakuputala mevo vavalangalaléla vakuputalamwawe. Munu wakuputala akannangalalela wakuputalamwagwe, vanu avo uti vandagwilangila mulipondo." ¹⁵ Napanelo Patulu anínjugwa aashidoni, "Mana ankong'o au, twaulila." ¹⁶ Yesu kushidoni, "Da namwenu momo hamunava kumanya? ¹⁷ Da hamumanyite kenga vinu uti vinjilíla pakanywa vyuka mmunda kutwala kuka nshoo? ¹⁸ Napane ashilá shúma nkanywa shaaloka muntima. Asho ni shintádyá munu kuva nshapu. ¹⁹ Muntima mwamunu munkuma makumbukililo akunyata, kubyaa, kunama nankongwe waukannambile, kulavalava, kwiva, ushuda waushwang'a na kukupulu. ²⁰ Vinu avi ni vintádyá munu ave nshapu. Napane kulya ukanavenge medi mmakono mo haku-nantadya munu kuva nshapu."

Likulupililo lyankongwe nkanaani

Malukushi 7:24-30

²¹ Napanelo Yesu paumile palyutu alyo andyúka kwisemu ya ku Tilu na ya ku Shidoni. ²² Mwenu! Nkongwe jumo nkanaani waisemu ayo kumuukila akugwa pashanya po aashidoni, "UMU, mwanagwe Daudi, ngwanangila shididi! Mwanangu nkongwe anintawala lijini kupunda apo." ²³ Yesu nae kulamana na kunjang'ula. Vakwoda vake vakamuukila nanjugwa, "Nkumulange auke, ankupita atwoda akuno anyakonya." ²⁴ Yesu do, "Nangu havangutumididye kwavanu vanji ila kwavangandolo vajaikenge va ku Ishilaeli bai." ²⁵ Bai nkongwe aijá kuwika kunguguvallila kushidoni, "UMU, ngupwashela." ²⁶ Yesu, "Hashinava shambone kutwala ligung'u lyavana kuvajalela vang'avanga." ²⁷ Nkongwe jo doni, "UMU, shinu asho mwiu! Napane ata vo vang'avanga vo vandálya dingalamwamwa digwilangíla mulyungu imesha yanakulugwave." ²⁸ Yesu kutwa kushidoni, "Ajáló, likulupililo lyako likumene namene! Nadoni vikutandeké kenga mo mwaulatadile." Bai muwakati wowo mwanagwe jo kuponnenne.

Yesu ankuvaponia vanu voe

²⁹ Napanelo Yesu akaume apo andyúka mpaka nanyenje litanda Iya Galileya kutwala kukwela palishinga kwikala. ³⁰ Bai popo po kumwidila dimbumba kwadimbumba dyavanu vavaidanavo vakulamala,

vakuputala mevo, vakukwava, vabubu na vanji vaté kwinjipa, kuvavika mmadodo mwake, nae kutwala kuvaponia. ³¹ Dimbumba dyavanu dikavone vabubu vatangola vakulamala vaponia vakukwava vawena na vakuputala mevo valola, dyanavo dindimupa lishange-lo Nnungu umwe Ishilaeli.

Yesu ankulisha imbumba yavanu dyalupu nsheshe

Malukushi 8:1-10

³² Yesu akavashema vakwoda vake kuvaulila, "Nangu ninkuvaanangila shididi vanu ava mwaa ankupita maduva matatu vavele namu nangu na vovo vo havavé shakulya. Nadoni kulailananganavo vâdobile indala, hangutamwa ngwonadavo vandadilikanga ndila." ³³ Vakwoda kutwa kumudya, "Da pakulota kuvalisha vanu ava munu apata pashi magung'u akuvatosha panalugwangwa apa?" ³⁴ Yesu, "Muvenavo magung'u mangapi?" Vanavo do, "Saba na dindemba padyoko do." ³⁵ Nae akavalamulila vanu uti vaikalange pai, ³⁶ akatwala magung'u saba alalá na dindemba adilá akannambwalela Nnungu, kumajanianga kuvapa vakwoda vake vanavo kutwala kuvajavila venentete. ³⁷ Vanu uti kulya mpaka kwikuta. Vakatalange makombo, vandyumbadya makalala saba. ³⁸ Napanelo vanu ve valíle vavele valume dyalupu nsheshe kwabila kuvavangila vakongwe na vadyoko. ³⁹ Bai Yesu akavalaile venentete vo, andíkwela mwingalava kuka isemu ya ku Magadana.

Vananangalaledi vavayuda vajugwa shimanyikilo

Malukushi 8:10-12

16 Napanelo mapalishayo pamo na mashadukayo vandímuukila Yesu nanninga kunjugwa avalodye shimanyikilo shakwalakela kuwa. ² Nae kushidoni, "Mwenu ukawika wakati wayalyulo pamunona kuwa ko maundi akunduvalenge muushidoni, 'Imepo ilota kuva yambone.' ³ Namomo linyeiku muushidoni, 'Nelo indatonya imbula mwaa maundi andikunduvala na lyundi lindidimbya.' Mmanu mmamalambi mwe! Mwenu munkumanya kujavanianga vyamwona kumaundi napanelo munkutatakela kujavanianga vimanyikilo vyawakati. ⁴ Eti vanu vaimbula yakunyata mitima na yakulavalava vajugwa shimanyikilo! Bai hashipali shimanyikilo shavalota kwona ila shimwe nkúlava Janashi." Bai nae andívaleka kutwala kulyumadyanga kuka.

Nkukumuku wamapalishayo na mashadukayo

Malukushi 8:13-21

⁵ Napanelo vakwoda vake pavaukile mwangu nkono unji walitanda, vandíliviliva kunyukata magung'u. ⁶ Yesu kuvaulila kushidoni, "Ava mevo na lishunge kwamwaa wankukumuku wamapalishayo na wamashadukayo." ⁷ Vanavo vashindataukananga shiven-evene vaashidoni, "Ni mwaa wetu wetu watukanyukete magung'u." ⁸ Yesu amanya makumbukililo ave andívaulila kushidoni, "Mmanu mmalikulupililo lidikidiki, mwaa shani munkutaukananga

ing'ano yakumwova magung'u? ⁹ Da mpaka ambi hamunava kumanya? Hamunakumbukila shinu magung'u mwanu alalá avalíle vanu dyalupu mwanu avalá? Makombo lo, muumbadidye makalala mangapi? ¹⁰ Kwali magung'u saba alalá avalíle vanu dyalupu nsheshe avalá? Makombo ake muumbadidye makalala mangapi? ¹¹ Da mwaa shani hamunamanya shinu do nangu haninamba shinu magung'u? Napane lilaledye kwamwaa wankukumuku wamapalishayo na wamashadukayo." ¹² Bai vanavo vandímanya shana kenga nae hashamba nkukumuku wamagung'u; ashamba mapundisho amapalishayo na amashadukayo.

Patulu ankummalanganga Yesu kuva Klistu

Malukushi 8:27-30; Lukashi 9:18-21

¹³ Napanelo Yesu akawika isemu ya ku Shashaleya imwe Pilipo, akavaudya vakwoda vake kushidoni, "Da vanu vamwona Mwana Wamunu kuva nyani?" ¹⁴ Vanavo do, "Vanji Nshuwau Wakubatisha, vanji Liyashi na vanji Yelemiya kwali nkúlava jumo pakati pavakulava vakala." ¹⁵ Nae kuvaudya vanavo, "Kushi mwenu po, nangu mungwona kuva nyani?" ¹⁶ Simoni Patulu patwete kujang'ula akaashidoni, "Wako Klistu mwanagwe Nnungu mumi." ¹⁷ Yesu akanjang'ula kushidoni, "Undijaligwa wako Simoni Bali-Janashi! Hanava shinu munu ákupundishidye vinu avi ila ni Atata ávele kuwa. ¹⁸ Namomo ninkukwaulila doni, wako Patulu † na nangu pashanya lijanga lyolyo ali, ndadenga liganisha lyangu na liganisha alyo milango vyakumoka havylulula kutema. ¹⁹ Nangu ndakukamudya myungulilo vyautawala wakuwa; uti vyaulota kunga mushilambo shapai, kuwa momo vindaungigwa, shaulota kuungula mushilambo shapai, kuwa shindaunguligwa." ²⁰ Bai nae andívaduma vakwoda vake pakulota havanammalangange kwamunu woe-woe.

Yesu ankumanyiya kaladavo yakupela na kudyuka kwake

Malukushi 8:31-33; Lukashi 9:22

²¹ Napanelo kutwala apo Yesu kutunduvanga kuvamanyiya ngala vakwoda vake doni, nae inimmaikila auke ku Yelusalemu, koko ko akapate mauvilo oe kwavanang'olo, kwavakulangalalela-shadaka vanang'olo na kwavamwalimu vadishaliya, apele na muliduva lyantatu lyake adyuke. ²² Patulu akanshamela Yesu kwagweka kutwala kunduma, "UMU, ata padyoko! Shinu asho hashikutandeka." ²³ Yesu kushiliuka kushidoni, "Tumuka mushu mwangu Shatwani! Wako ni lijanga lyakungutadya ngulikuvale. Wako haunakumbukila shinu mwakumbukilila Nnungu, ukumbukila mwavakumbukilila vanu."

† *Mushigalegu lina Iya a Patulumana ake a lijanga.*

Nkwóda umwe Yesu anyukate nshalaba

Malukushi 8:34-9:1; Lukashi 9:23-27

²⁴ Bai kutwala kuvaulila vakwoda vake doni, “Munu akalota kungwoda nangu, alishukulu jo mwene anyukate nshalaba wake angwode. ²⁵ Mwaa woewoe álota aposhe shingumi shake andakatoka na woewoe álota akatoke shingumi shake kwamwaa wangu nangu, andaposha. ²⁶ Da munu alota kupata wambone shani akapata shilambo ashi uti kutwala kukatoka shingumi shake sho? Kwali shinu shani shalota kuulula kumya munu abadilishe na shingumi shake? ²⁷ Nadoni Mwana Wamunu andaida mulishangelo lyatatake pamo na vanjelo vake, napane apo anannipa kula munu kwodana na matendo ake. ²⁸ Nangu ninkumwaulila mwiu doni, po pakati penu apa vanji mwiko havapela vakanava kumwona Mwana Wamunu aida muutawala wake.”

Yesu ankujalukanga ing'ope

Malukushi 9:2-13; Lukashi 9:28-36

17 Napanelo akapite maduva sita, Yesu akantwala Patulu, Tiyagu namu Nshuwau nung'une Tiyagu kuvaukanavo gwekayavo ndakwela palishinga lyakulepa. ² Popo po, nae kujalukanga pamevo pave, ing'ope yake kushenga kenga liduva, dinguvo dyake kung'ala kenga lilangadyo. ³ Mwenu! Popo po kwane-ka Musha namu Liyashi vatangola namu nae. ⁴ Patulu kutwa kumwaulila Yesu kushidoni, “Nang'olo ni shambone kupagwa po papa. Napanelo ukalota, ngukandyange mautu matatu, limo lyako, linji Musha na linji lyo limwe Liyashi.” ⁵ Patulu akuno atangola, kuwa kwaloka lyundi lyakushenga kuvainikidya, mo mulyundi mo kwigwini-ka lidi liishidoni, “Aju ni mwanangu waninnagwaledya, ángupa lipuwilo, jojo jo, mwigwilile.” ⁶ Vakwoda vake pavaigwite malove alo vandígwanga ding'ope kutindya pai na kujopa doni. ⁷ Nae akavavandika apalá, kuvakwaa kutwa kushidoni, “Takatukanga, hamunajope.” ⁸ Vanavo pavang'amwile mevo vangwené gweka jo Yesu aju bai.

⁹ Pavashishuluka palishinga apalá Yesu andívaleya vakwoda vake vo doni, “Hamunamwaulile munu vya-mugwene avilá mpaka padyuka Mwana Wamunu pakati pavakupela.” ¹⁰ Napanelo vakwoda vake vo kumudya, “Mwaa shani vamwalimu vadishaliya vaashidoni ivaikidile Liyashi ave ntandi kwida?” ¹¹ Nae do, “Mwiu Liyashi andava ntandi kwida na andapangananga vinu uti. ¹² Bai ninkumwaulila doni, Liyashi jo andida ila vanavo havammanyite, vaníntenda uti vyavalatíle vantende. Nadoni momo Mwana Wamunu andauvavanga mmakono mwave.” ¹³ Bai apo vakwoda vake vandímanya doni amwamba Nshuwau Waku-batisha.

Yesu ankumponia ndyoko walijini

Malukushi 9:14-27; Lukashi 9:37-43

¹⁴ Napanelo vakawika paimbumba yavanu munu ju-mo kumuukila Yesu kunguguvalila ¹⁵ kutwala kushidoni, “Nang'olo mwanangile shididi mwanangu, nae ankuvanavo ulwele washikoko na ankuvavanga namene. Myanda vyo andágwilila pamoto kwali mmedi. ¹⁶ Nangu ndimwidanavo kwavakwoda vako, vanavo havamuulwile kumponia.” ¹⁷ Yesu kutwala kushidoni, “Mmanu mmaimbula íkukulupila na yakudumbadumba! Da nangu ndapagwa namu mwenu mpaka duvani? Nannaga mwenu mpaka duvani? Mwidenavo apa ndyoko jo!” ¹⁸ Bai Yesu kushulan-ga lijini lyo, lyanavo kuma mundyoko mo kutwala muwakati wowo ndyoko jo kupona.

¹⁹ Napanelo vakwoda vake vakamuukila àvele kwagweka ndamudya, “Mwaa shani wetu hatuulwile kukulupilanga lijini lyo?” ²⁰ Nae kushidoni, “Ni kwamwaa walikulupililo lyenu lidikidiki. Ninkumwaulila mwiu doni, mukavanavo likulupililo kenga imbeju yanshupi mundalamulila lishinga ali do, ‘Tumuka apa wena apalá,’ lyanavo kuka. Hashipali shilóta kunka-madyangidya.” ²¹ †

Yesu ankumanyiya kavili yakupela na kudyuka kwake

Malukushi 9:30-32; Lukashi 9:43-45

²² Napanelo vavele pamo ku Galileya, Yesu andí-vaulila vakwoda vake kushidoni, “Mwana Wamunu vanannimya kunkamudya kumakono kwavanu, ²³ vanavo vanampedyo napane muliduva lyantatu lyake andadyuka.” Bai vakwoda vake vandívanavo shipalodi shoe.

Ukodi wamwing'ande ya Nnungu

²⁴ Yesu pamo na vakwoda vake vakawika pa Kapalanaumu. Napanelo vanu váshipwashalela ukodi wamwing'ande ya Nnungu vandímuukila Patulu ndamudya, “Da mwalmu wenu jo andáumya dishingo mbili dyo?” ²⁵ Nae do, “Elo andáumya.” Bai Patulu po painjidile nng'ande akanava kutangola shinu, Yesu kumuudidyanneu, “Simoni, da wako po wona dashi? Vau-mu vamushilambo vo vavatwalangila vananyanyi ada kwali ukodi? Vavatwalangila vanavave kwali vamidi?” ²⁶ Patulu do, “Vamidi.” Yesu kutwa kushidoni, “Napavedoni vanavave vo vava muunaiti. ²⁷ Kanji napanelo pakulota havanashimwe, wena kulitanda ukajele indawana mmedi. Yomba ntandi waulota kunkangola njamyé ikanywa yo undakodya dishingo nsheshe utwale ungulipile nangu pamo namu wako umwene.”

† Maandiko anji ákavele akala uti, vandyánjedya malove ala: a kanji lijini lyainamuna ai halinaulukika kukumulangigwa kwabila kushwali na kunga. Mumaandiko oe ashigalegu malove ala hapali.

Nyani nang'olo muutawala wakuwa

Malukushi 9:33-37, 42-48; Lukashi 9:46-48; 17:1-2

18 Muwakati wowo vakwoda vake vandímuukila ndamudya kushidoni, “Nyani álota kuva nang'olo muutawala wakuwa?” ² Yesu kunshema ndyoko ndikidiki, kunkamula kumwimidyá shing'ati shave ³ kutwala kushidoni, “Ninkumwaulila mwiu doni, mwenu mukanauiyanga mitima vyenu kulitenda kenga mmadyoko mmadikidiki, mwiko hamwinjila muutawala wakuwa. ⁴ Napavedoni woewoe álota kulishapeya kutwala kuva mwandyoko ndikidiki, aju andava nang'olo muutawala wakuwa. ⁵ Woewoe álota kumpwashalela ndyoko ndikidiki kenga aju palina lyangu munu ajo angupwashalela nangu. ⁶ Napane woewoe álota kuntadya kukuvala ndyoko jumo pakati pavadikidiki ava vangukulupíla nangu, kudyanga munu ajo kumuungangila lijanga lyakwidopa pang'ulo kuntitimidyá mwimanga kumedi makumene. ⁷ Shipambale shilambo kwamwaa wavitendo vivatádyá vanu vatege. Ngwengwe vyakunyata vivatádyá vanu vatege vindaumilila napane apambale aijá álota kwidanavo vyakunyata avyo! ⁸ “Napanelo ikava kenga nkono wako kwali lidodo lyako vinu avyo vinkukutadya ukuvale, lumula ujae kushu ko. Kudyanga kwinjila mushingumi ùlamele kuliko kuvanavo makono uti mavili kwali madodo uti mavili kutwala kuka kushena kwauvele moto úkamalilika. ⁹ Namomo ikava kenga liu lyako linkukutadya ukuvale usha ujae kushu ko, kudyanga winjile mushingumi ùlamele kuliko kuvanavo mevo uti mavili kutwala kuka kumoto wakushena.

Nkong'o wangandolo wakujaika

Lukashi 15:3-7

¹⁰ “Lilaledye kwambangidyá hamunamwiludyange ata ndyoko jumo pakati pavadyoko ava! Nangu ninkumwaulila doni, vanjelo vave kuwa ko, ngwengwe vankwonana namu Atata ávele kuwa. ¹¹ ¹² Da mwenu mwona dashi? Ikava kenga munu ankuvanavo dingandolo miya anjaika jumo, haleka adilá tisini na tisa ko kumashinga kuka annambela jumo ánjaike? ¹³ Akankodya, ninkumwaulila mwiu doni, anampuwangila namene kuliko adilá tisini na tisa dikanjaíke. ¹⁴ Nimumo momo Tatagwenu ávele kuwa hanalota shinu ata padyoko kunjaika ndyoko jumo pakati pavadyoko ava.

Nung'unumunu akakukwawedya, igwanianavo

¹⁵ “Napanelo nung'unumunu akakutagela muukile ukandume mùvele mmavili yenu. Ikava kenga andakwigwilila, unimposha. ¹⁶ Kanji akanakwigwilila, ntwale munu jumo kwali vavili pakulota 'likosha lyoelyoe vaakikishe vashuda vavili kwali vatatu.’ ¹⁷ Ikava kenga havaigwilila vanu avo, mmalangange kuliganisha. Ika-

† Maandiko anji ákavele akala uti, vandyánjedyá malove ala: a Mwana Wamunu aidilé ndaambola ashilá she shijaika. Mumaandiko oe ashigalegu malove ala hapali. †† Lola Kumbukumbu 19:15.

va kenga navanavo havaigwilila momo, bai mmalangile kuva mmidi kwali nkúkatisha-ukodi. ¹⁸ Ninkumwaulila mwiu doni, uti vyamulota kunga pai apa, kuwa momo vindaungigwa na avilá vyamulota kuungula pai apa, kuwa momo vindaunguligwa. ¹⁹ Namomo ninkumwaulila doni, ²¹ vanu vavili pakati penu vakaigwania mushilambo amu kwashinu shoeshoe shakujugwa, Atata ávele kuwa andavapa. ²⁰ Mwaa poepoe pavakadyanianga vanu vavili kwali vatatu palina lyangu nangu, nangu ngupali popo.”

Nkong'o wammádengo ákannivaliva muje

²¹ Bai Patulu akamuukila ndamudya, “*UMU*, da nung'unumunu akangutagela ninnivalive myanda mingapi? Myanda saba?” ²² Yesu kushidoni, “Mene, nakwaulila shinu kuva myanda saba ila myanda sabini kuujiila myanda saba. ²³ Nadoni utawala wakuwa wo uvelé mwaumu jumo áshilota atende shikonda na vatumika vake. ²⁴ Patundvenge kutenda shikonda sho, vandímwidanavo munu jumo e avénavo udeni wanjuluku woe. ²⁵ Kwodamwaa havenavo shakunnipa nang'olo wake, nang'olo wake jo kulumulila vanshulushe nae, ndyagwe, vanavake na vinu uti vyavénavo pakulota udeni wo, amalidyé. ²⁶ Ntumika aijá kunguguválila kulipudya aashidoni, ‘Nang'olo wangu ngwanangila shididi nangu ndakulipa uti udeni awo.’ ²⁷ Bai nang'olo wake andímwanangila shididi kutwala kunneka auke na udeni wo, kunnivaliva. ²⁸ “Kanji napane ntumika aijá paumile apo anínkodya ntumikamwagwe washindai dinali miya. Nae apalá kunkamula, kunkaba kabali kutwa kushidoni, ‘Njuluku wangu wo, ngulipa popo apa!’ ²⁹ Muje jo kunguguválila kunjugwangila aashidoni, ‘Ngwanangila shididi, nangu ndakulipa.’ ³⁰ Nae kwita kuntwala kuka nanjela nkala-boshi mpaka udeni wo, aliye. ³¹ Napanelo vatumikamwagwe vanji vakone shitendo asho, vandívanavo shipalodi shoe kutwala kuka nammanyiya nang'olo wave vinu uti vitandéke. ³² “Nang'olo wave akanshema kumwaulila doni, ‘Wako ni untumika wakubanga namene. Nangu udeni wako uti ndikulivaliva mwaa wako uningujugwangila. ³³ Da napane hainaululike nawako kumwanangila mujo jo shididi kenga mo mwandikwanangilidile wako?’ ³⁴ Bai nang'olo wake jo áshimwidye namene anínkamudya kwavakushunga-kalaboshi mpaka udeni wo uti, aliye. ³⁵ Napavedoni Atata wakuwa anantandela momo ikava kenga namwenu mmitima myenu mo, kula munu hannivaliva nung'unumunu.”

Ing'ano yakulakananga

Malukushi 10:1-2

19 Yesu pamalidile kutangola malove alo, andyúma pa Galileya kuka kwisemu ya ku Yudeya mwangu unji wa Yudani. ² Dimbumba dyavanu dindímwoda koko, nae kutwala kuvaponia. ³ Napanelo

‡ Kummalangila munu kuva mmidi kwali nkúkatisha-ukodi mana ake, mene kungana na munu ajo. †† Maandiko anji akala: a Ninkumwaulila mwiu doni...

mapalishayo vandímwidila ndamudya vanninga vaashidoni, “Da lilamula linkutuleka munu kunneka ndyagwe kwamwaa waing'ano yoeyoe?”⁴ Yesu kushidoni, “Da mwenu hamushamidye, ‘Namalunda, ko kunantandi ko avakandyengé vanu, nnume na nkongwe,’⁵ na kavili, ‘Kwamwaa au, jo nnume jo ananneka tatake na anyoke kuka ndalyunganianga na nkongwe vavili ava kuva mili umo?’^{†6} Nadoni havava shinu kavili vanu vavili vandava mili umo. Napavedoni shaunganienge Nnungu hanapagwe wakwapukanianga.”⁷ Vanavo kumudya, “Napane mwaa shani andilamulila Musha kumwandikila nkongwe italaka kutwala kunneka?”⁸ Yesu kushidoni, “Musha jo andilamulila muvaleke vadyavenu mwaa mwenu mitima vyenu vyakunanopa kanji kunantandi ko, haivé mwanavo.⁹ Nangu ninkumwaulila doni, munu woewoe álota kunneka ndyagwe paukava mwaa waugoni annomba nkongwe junji, kushu ajo ankulavalava.”¹⁰ Vakwoda vake kutwala kushidoni, “Ikava kenga ing'ano yan- nume na ndyagwe ive doni, kudyanga kwikala vila bila kulomba.”¹¹ Yesu kushidoni, “Havanava shinu vanu uti valóta kuulula kutandedya malove ala ila avalá vap- atíle lyululilo alyo.¹² Mwaa vapali vákammilangila ma- ta nkongwe tangu shivalakwelo shave, kupagwa vanji kwamwaa wakuunigwa na vanumwave na kupagwa vanji kavili valiténda vo vene kwamwaa wautawala wakuwa. Aijá áulula kutandedya malove ala, atand- edye.”

Yesu ankuvapwashalela vadyoko

Malukushi 10:13-16; Lukashi 18:15-17

¹³ Napanelo vanu vandívaivanavo vadyoko kumwe Yesu pakulota avavikile makono na avashwalidye, na- pane vakwoda vake kutwala kuvashulanga.¹⁴ Yesu kushidoni, “Valeke vadyoko vaide kwangu, hamunaval- eye! Utawala wakuwa wavanu kenga ava.”¹⁵ Bai ling'oto lyakuvavikila makono, nae andyúma lyutu alyo.

Nnemba ntajili

Malukushi 10:17-31; Lukashi 18:18-30

¹⁶ Mwe! Munu jumo akamwidila Yesu ndamudya kushidoni, “Mwalimu ngutende shinu shani shambone ngupate shingumi shíkamalilika?”¹⁷ Yesu kushidoni, “Mwaa shani ungudya ing'ano yashinu shambone? Wambone avelé jumo tu bai. Ukalota kwinjila mushingumi, igwilila malamulo.”¹⁸ Nae kushidoni, “Malamulo shani?” Yesu kushidoni, “Haunabyae, hau- nalavalave, haunaive, haunaumye ushuda waush- wang'a,¹⁹ mwishimu tatakona anyoko ‡ na nnag- waledye mujo kenga wako umwene.”^{†20} Nnemba jo kushidoni, “Nangu malamulo ala ninkwigwilila, napane shakwashi shingubakidile?”²¹ Yesu kushidoni, “Ukalota kuva umunu washalowa-uti wena ukashulushe vyau- venavo uti, njuluku wo uvajavile vákave pashinu. Apo

undavanavo libadila kuwa ling'oto wide ungwode.”

²² Nnemba aijá paigwite malove alo andyúma na shipalodi mwaa avenavo mali oe namene.

²³ Napanelo Yesu kutwala kuvaulila vakwoda vake kushidoni, “Ninkumwaulila mwiu doni, pandika- madyanga namene ntajili kwinjila muutawala wakuwa.

²⁴ Ninkumwaulila kavili doni, shíkakamadyenge ni ku- paleta ngamila palilanga lyakashinji kuliko kwinjila ntajili muutawala wa Nnungu.”²⁵ Bai vakwoda vake pavaigwite malove alo, vandíshanga namene kutwala kushidoni, “Ikava davo po aambwalegwa nyani?”

²⁶ Yesu akashiliuka kuvalola kutwa kushidoni, “Kwa- vanu shindikamadyanga kanji Nnungu vinu uti ankuul- ula.”²⁷ Patulu kutwa kumudya Yesu, “Nang'olo! Wetu vyetu uti tundileka kukwoda wako, napane tulota ku- pata nyamani?”²⁸ Yesu kushidoni, “Nangu

ninkumwaulila mwiu doni, mwenu úngwoda nangu muwakati wakudyuwangigwa vinu uti, Mwana Wa- munu palota kwikala pashiteng'u shake shalishangelo, namwenu momo mundaikala muviteng'u kumi na mbili muukumu makola kumi na mbili avanaishilaeli.

²⁹ Napanelo kula munu álakile ing'ande yake, vakulu- vake, valumbuvake, tatake, anyoke, vanavake kwali mashamba kwamwaa wangu nangu, andapata vyoe vyakwanjadyeka myanda miya na shingumi shíka- malilika sho, andapata.

³⁰ “Nadoni voe vatandi vandava vamwisho na voe vamwisho vandava vatandi.

Nkong'o wamalipo kwavamadengo

20 “Mwaa ivé doni, utawala wakuwa uvelé mwatatamunu áumile paing'ande pake lyamba linyeiku kuka ndavalambela vamadengo vakulima mulishamba mwake.² Nae akaigwananavo kuvalipa dinali imo † kutwala kuvatumidya kulishamba lyake.³ Napanelo muwakati wasatatu yalyamba, nae akauma akavona vanu vanji vaimilenge vila pashiwanja⁴ nae kutwa kushidoni, ‘Namwenu, wena kulishamba mukalime nangu nannipa njuluku uvaikidíle.’⁵ Vanavo kuka. Muwakati wasasita na wasatisa akauma kutwala kutandela momo.⁶ Muwakati wasakumi akauma kavili kuvakodya vanu vanji vaimilenge vila nae kuvaudya, ‘Mwaa shani mwimilengé vila apa tangu lyamba?’⁷ Vanavo kushidoni, ‘Hapali munu átupele madengo.’ Nae do, ‘Namwenu, wena koko kulishamba ko mukalime.’

⁸ “Napanelo paiwikile yalyulo aijá mwene lishamba andímwaulila mmádengo wake áshikondya njuluku kushidoni, ‘Vashamange vamadengo uti uvalipe nju- luku wave uvatunduvangila vamwisho uvamalilila vatandi.’⁹ Vakawika avalá vasakumi kula munu kupata dinali imo imo.¹⁰ Avalá vatandi pavavikile vashona kenga vandapata njuluku woe kanji navanavo kutwala kupata dinali imo imo tu.¹¹ Pavapatile vanavo vandí- tunduvanga kuntangadikanga tatamunu mwene lishamba aijá¹² vaashidoni, ‘Vanu ava vamwisho

† *Lola Kutunduvanga 1:27; 5:2.* †† *Lola Kutunduvanga 2:24.*

‡ *Lola Kuma 20:12-16; Kumbukumbu 5:16-20.* †† *Lola Valawi 19:18.*

‡‡ *Dinali imo ushiva nshala uvaikidíle kunnipa munu kwaliduva limo lyakukola madengo.*

vakadilé madengo isaa imo, napane wako nang'olo mwaa shani uvalinganianga namu wetu túlipilidile madengo makumene na lítutimbile liduva?"

¹³ "Nae kutwala kumwaulila munu jumo pakati pave kushidoni, 'Mbwana nangu haninakwanela shinu. Da hatupakanidile ndikulipe dinali imo?' ¹⁴ Twala vyako uke! Nangu ngulota ninnipe aju wamwisho kenga mo mwandikulipidile wako. ¹⁵ Da hanguwenavo shaliya yakutumila mali angu mwangulatela nimwene? Kwali uvénavo ing'ou mwaa nangu ni wambone?" ¹⁶ Nadoni vamwisho vandava vatandi na vatandi vandava vamwisho."

Yesu ankumanyiya mwanda wantatu yakupela na kudyuka kwake

Malukushi 10:32-34; Lukashi 18:31-34

¹⁷ Napanelo Yesu pashuka ku Yelusalemu andí-vashamela kwagweka vakwoda vake kumi na mbili kuvaulila kushidoni, ¹⁸ "Tunkuka ku Yelusalemu. Koko ko, Mwana Wamunu vanankamudya kumakono kwavanang'olo vavakulangalalela-shadaka na kwavamwalimu vadishaliya. Vovo vo, vandaumya ukumu yakumpedya ¹⁹ namomo vanankamudya kwavamidi vanniule, vanshape viboko, vankamele panshalaba napane muliduva lyatatu lyake nae andadyuka."

Mwana wa Munu aidilé ndatumika

Malukushi 10:35-45

²⁰ Napanelo nkongwe jumo jujugwave vanavake Shebedeu andímuukila Yesu pamo na vanavake nanguguvailila kutwala kunjugwa amwangangole shinu shimo. ²¹ Yesu kutwala kumudya, "Ulota nyamani?" Nae doni, "Ninkukujugwa ulivikile kuvavika vanavangu vavili ava muutawala wako, jumo kunkanakono junji kunshanda." ²² Yesu kushidoni, "Mwenu hamumanyite shamujugwa. Da mwenu mundafula kukumbila luwene lwolwo lwangulota kukumbila nangu?" Vanavo do, "Tundafula." ²³ Yesu kushidoni, "Mwiu mwenu mundakumbila luwene lwangu kanji yakwikala kunkanakoko kwali kunshanda kwangu, ayo hainava shinu yakujava nangu. Vene mautu alo ni avalá vavapanganangididye mwene Atata."

²⁴ Bai avalá vakwoda vake vanji kumi pavaigwite davo, vandíshimwidya vanung'unumunu avalá vavili. ²⁵ Yesu kuvashema vakwoda vake kutwala kuvaulila kushidoni, "Mwenu munkumanya kenga avalá vakutawala vavamidi vandálitumbudya kwavenentete na vakumene vave vandátumila madalaka kwavanavo. ²⁶ Kwenu mwenu hainave davo. Aijá ágambela ave nang'olo pakati penu inimmaikila ave ntumika wenu ²⁷ na aijá ágambela ave ntandi pakati penu ave ntumwa wenu. ²⁸ Nimumo momo Mwana Wamunu haidile pakulota vantumike; nae aidilé ndatumika na kujaula shingumi shake shive lyambolelo lyavanu voe."

Yesu ankuvaponia vakuputala mevo vavili

Malukushi 10:46-52; Lukashi 18:35-43

²⁹ Napanelo pavashuma pa Yeliko, ishindamwoda imbumba yavanu. ³⁰ Mwenu! Vandípagwa vanu vavili vakuputala mevo ve vaikéle nanyenje indila. Vovo vo, pavaigwite kenga Yesu ankupita vanditangola pashanya po vaashidoni, "UMU, mwanagwe Daudi, twanangila shididi!" ³¹ Imbumba yavanu kuvashulanga vavaulila vamaalale kanji vanavo vashindamamodya kutangola pashanya po vaashidoni, "UMU, mwanagwe Daudi, twanangila shididi!" ³² Yesu akaimila kutwala kuvashema kuvaudya, "Da mulota nintandele nyamani?" ³³ Vanavo kushidoni, "UMU, tulota mevo etu, alole!" ³⁴ Yesu kuvaanangila shididi, kuvakwaa mevo ave, muwakati wowo vanavo kulalenneu kutwala kumwoda.

Imbumba inkupuwangila kwinjila kumwe Yesu

Malukushi 11:1-11; Lukashi 19:28-40; Nshuwau 12:12-19

21 Vanavo vakavandika pa Yelusalemu. Napane vawika pa Betepashi, palishinga lyamilandi vya Ulivela, andívatuma vakwoda vake vavili avaulila kushidoni, ² "Wena kulikaja livéle mushu. Pamwinjila nkaja mo, munankodya punda vamuungangidile mwanagwe ávele popo, mwenu muungule muvaidenavo. ³ Ika-va kenga andapagwa wakumudya shamumuungulila mwenu mwaulile doni, 'UMU ankuvalota, andavaujiya.' ⁴ Vinu avi uti vinditandeka pakulota liwikile popo lilove litangaléke kwaindila yankúlava kushidoni,

⁵ "Mwaulile Shiyau,

'Lola, UMU wako ankukwidila.

Nae ni wakulishapeya na ankwadilé punda, punda ndikidiki, mwanagwe punda.' " †

⁶ Namwiu vakwoda vake vakauka na vakatandela mo mwavalumulidile. ⁷ Vanavo kumwidanavo punda jo pamo na mwanagwe, kuvatandikanga dinguvo pashanya pave, Yesu kutwa kwikala pashanya po. ⁸ Napanelo imbumba yavanu ishindapita itandikanga dinguvo dyave nndila, vanji kupanyulanga dinavi kupita vatandikanga. ⁹ Imbumba íshuka mushu na íshimwoda, dishindatangola pashanya po diishidoni, "Kushibika kupagwe na mwanagwe Daudi.

Aaliligwe aijá áida palina limwe UMU.

Kushibika kupagwe kushanya-uti." ††

¹⁰ Bai akainjila nkaja mu Yelusalemu, nkaja mo uti ni kupagwa shititumbu kutwala vanu kudya, "Da aju nyani?" ¹¹ Imbumba yavanu kutwala kushidoni, "Aju ni aijá nkúlava, ‡ Yesu wa ku Nashaleti ya ku Galileya." ††

Kuvingangigwa kwavakushulusha mwing'ande ya Nnungu

Malukushi 11:15-19; Lukashi 19:45-48; Nshuwau 2:13-17

¹² Napanelo Yesu andíinjila mwing'ande ya Nnungu kutwala kuvakumulanga vanu uti nng'ande mo

† Lola Shakaliya 9:9. †† Lola Dimu 118:25-26. ‡ Lola Kumbukumbu 18:18. †† Kwali: a Aju ni Yesu, nkúlava wa ku Nashaleti ya ku Galileya.

váshishumidya na váshishuma vinu, kugang'alanga dimesha dyavakushenji-njuluku na dikiti dyavakushumidya-ding'unda ¹³ kutwala kuvaulila doni, "Vandyandika doni, 'Ing'ande yangu indashamegwa ing'ande yakushwalidya,' † napane mwenu munditenda kuva shivava shavakwiva." ††

¹⁴ Mo mwing'ande ya Nnungu mo, kumwidila vakuputala mevo na vakulamala nae kuvaponia. ¹⁵ Napane vanang'olo vavakulangalalela-shadaka pamo na vamwalimu vadishaliya pavagwene vyamakango vyashitenda na pavavaigwite vadyoko mwing'ande ya Nnungu vatangola pashanya po vaashidoni, "Kushibika kupagwe na mwanagwe Daudi," vanavo vandishimwanga ¹⁶ kutwala kumudya, "Unkwigwa vya-vatangola ava?" Nae kushidoni, "Elo! Da mwenu hamushamidye, 'Mmakanywa avadyoko na avanunu undilipanganiangidya lutumbyango lwako?'" ¹⁷ Bai nae andívaleka kuma panjini po kuka ku Betaniya ndalala.

Yesu ankutaa dilana nnandi

Malukushi 11:12-14, 20-24

¹⁸ Lyamba linyeiku pashuja auka kunjini inínkola indala. ¹⁹ Bai akone nnandi uvéle mwankuju †† nanyenje indila nae kuukila mene kukodya shinu ila mamba gweka nae kushidoni, "Unnandi wako, mwiko haunape kavili." Nnandi muwakati wowo wo, kujuminneu.

²⁰ Vakwoda vake pavagwene shitendo asho vanavo kushanga kutwa kumudya, "Da nnandi wo ujumililé mwashi shipajelo?" ²¹ Yesu kushidoni, "Ninkumwaulila mwiu doni, mukavanavo likulupililo na mukanaambambidya, mundatenda i gweka vitandéke munnandi au. Ata lishinga ali apa mukalamulila doni, 'Bubuka apa uke ukalijele mwimanga,' vindatandakela momo. ²² Namomo shinu shamulota kujugwa kwaindila yakushwali, mukakulupila mundapata."

Nyani akupele madalaka ala?

Malukushi 11:27-33; Lukashi 20:1-8

²³ Yesu akainjila mwing'ande ya Nnungu. Napanelo nae apundisha, kumwidila vanang'olo vavakulangalalela-shadaka pamo na vanang'olo vavenentete ndamudya, "Vinu avi utenda kwamadalaka shani na madalaka ene lo akupelé nyani?" ²⁴ Nae kushidoni, "Nanangu momo ndamudya shinu shimo mukangwaulila, nanangu madalaka angutandela vinu avi, ndamwaulila. ²⁵ Da ubatisho umwe Nshuwau walakadilé kwashi? Walakadilé kuwa kwali kwavanu?" Vanavo kwaulanila shivenevene vaashidoni, "Tukaashidoni, 'Walakadilé kuwa,' nae andatudya, 'Mwaa shani hamunkulupidile?' ²⁶ Ata tukaashidoni, 'Walakadilé kwavanu,' tuvajopa venentete mwaa vanavo uti vankumwamini Nshuwau kuva nkúlava." ²⁷ Bai vaninjang'ula doni, "Hatumanyite." Yesu kutwa kushi-

doni, "Nanangu momo madalaka angutandela vinu avi, hanimwaulila.

Nkong'o wavana vavili

²⁸ "Napane da mwenu mwona dashi? Munu jumo andívanavo vanavake vavili. Nae akamuukila mwana ntandi ndamwaulila doni, 'Mwanangu, wena ukakole madengo nelo kulishamba lyamilandi vyavinyu.'

²⁹ Mwana jo kutwa kwita, 'Hangutamwa,' kanji ling'oto andílilingulanga muntima mwake kutwala kuka.

³⁰ Tatamunu akamuukila mwana wambili ndamwaulila momo, mwana ajo kushidoni, 'Ndauka nang'olo,' kanji haukíle. ³¹ Napanelo pakati pavana ava vavili, wakwashi átandadidye malotelo atatamunu?" Vanavo do, "Jo ntandi jo." Yesu kushidoni, "Bai ninkumwaulila mwiu doni, vakukatisha-ukodi namu vakulavalava vankulangalela kwinjila muutawala wa Nnungu kunkaneka mwenu. ³² Mwaa Nshuwau andímwidila mwenu nannodya indila yaishaliya † kutwala mwenu me kunkulupila. Vakukatisha-ukodi na vakulavalava vo vaninkulupila, napane mwenu ata mwona avi, hamulijugulenge pakulota munkulupile.

Nkong'o wvakukodi vakalau

Malukushi 12:1-12; Lukashi 20:9-19

³³ "Napanelo igwilila nkong'o unji! Andípagwa ntajili jumo e alimíle lishamba lyake lyamilandi vyavinyu. Lishamba alyo nae andítang'anedyo na lingongo kwimba shima shakuminyangila vinyu, kudenga libo-do lyakulepa kutwala kuvakodisha vakulima mwene kutwala mwanda kuka. ³⁴ Pauwikile wakati wamapuno nae kuvatumidya vatumika vake kwavakulima ko vakatwale isemu yake yavyepo. ³⁵ Vakulima kuvakamula vatumika vo, jumo kunkoma, junji kumyaa na junji jo kumwamanga majanga. ³⁶ Nae kuvatumidya vanji voe kupunda mwavalelele vatandi, navanavo kuvatandela momo. ³⁷ Kumwisho kwake nae kuntumidya mwanagwe aashidoni, 'Mwanangu aju vandamwishimu!' ³⁸ Kanji avalá vakulima po pavangwene mwanagwe, vanavo vandyáulanila vaashidoni, 'Aju ni walota kunkamudya vinu uti, idananga tummyae lishamba lyo live lyetu.' ³⁹ Nadoni vanavo vanínkamula kumumya mulishamba mo, kumpedya.

⁴⁰ "Napavedoni paida mwene lishamba alota kuvatandela mwashi vakulima avo?" ⁴¹ Vanavo kushidoni, "Andavamalidya uti kwaukalau kutwala lishamba lyo kuvakamudya vanji valóta kwidanavo vyepo ukawika wakati wake." ⁴² Yesu kushidoni, "Da mwenu hamushamidye mmaandiko,

" 'Vakudenga lijanga lyavaitile lyo, lindyuka ndava lijanga lyapalitinuna.

Átandile davo ni *UMU*,

ni vyamakango kwetu wetu.' †††

⁴³ "Napavedoni ninkumwaulila, utawala wa Nnungu mwenu vanampoka kuvapa venentete vanji valóta kulodya vyepo vyake. ⁴⁴ Aijá álota kugwilila palijanga ali,

†† *Mushigalegu: a ...andímwidila mwenu mwindila yaishaliya.*

††† *Lola Dimu 118:22-23.*

† *Lola Ishaiya 56:7.* †† *Lola Yelemiya 7:11.* ‡ *Lola Dimu 8:2.* †† *Nnandi au uvele kenga shimanyikilo shalikulupililo lyavanaishilaeli. Yesu patangwele yannandi au ashamba likulupililo lyavanaishilaeli halishivanavo vyepo. Nadoni vanavo indivaikila vaukumigwe. Linganianga Yelemiya 8:13; Oshaya 9:10-16; Mikeya 7:1-4.*

andapandakanga na aijá walilota kungwilila, andatipulikanga.”⁴⁵ Bai vanang'olo vavakulangalalela-shadaka pamo na mapalishayo pavaigwite mikong'o avyo, vandimanyinneu do, avamba vanavo.⁴⁶ Vanavo vashindalambela dindila dyakumuungila kanji vashindavajopa venentete mwaa vanavo vashindamwamini nae kuva nkúlava.

Nkong'o wakwita kuka kushitamo

Lukashi 14:15-24

22 Napanelo Yesu andítangolanavo kavili atumila mikong'o aashidoni,² “Utawala wakuwa uvelé mwaumu jumo e apanganiéngé shitamo shamwanagwe.³ Nae kuvatumidya vatumika vake vapite vavashe-ma vakulalikigwa kanji vakulalikigwa vo, kwitananga.

⁴“Nae kuvatuma kavili vatumika vanji avalaililila kushidoni, ‘Kavaulile vakulalikigwa doni, “Mwenu! Nangu ndipanganianaga tayali shitamo sho. Ding'ombe dyangu pamo na vanavave vakunyeta, ndishindanga. Nadoni vinu uti vivelé tayali. Idananga kushitamo akuno.”⁵ Vanavo mene kutanana kutwa myanda kuka, jumo kundila kwake, junji kumipango vyake.⁶ Napane vanji vo kuvakamula vatumika vo kuvakamanga na kuvabyaa.⁷ Bai umu kutwala kushimwa. Nae akavatumidya vaing'ondo vake ndavabamola avalá vakubyaa na kutaa moto njini wave.

⁸“Napanelo nae kuvaulila vatumika vake kushidoni, ‘Shitamo ashi mwiu shivelé tayali kanji napanelo vakulalikigwa havavaikidile.⁹ Napavedoni wena mudibalabala, uti vamulota kuvakodya vo, valalike vaide kushitamo.’¹⁰ Bai vatumika vakauka ndindila uti kupita vavakunganga vanu uti vavashivakodya, vakalau na vambone mpaka pashitamo po kuumbalanila vakulalikigwa.

¹¹“Napanelo umu akainjila nng'ande amulá kuvalola vakulalikigwa avalá pandamu kumwona munu jumo wavakangwadidye dinguvo dyashitamo.¹² Nae kutwala kumudya, ‘Mbwana, wako winjidilé dashi nng'ande amu bila kugwalila dinguvo dyashitamo?’ Nae kumalala vila.¹³ Bai umu jo kuvaulila vatumika vake kushidoni, ‘Nkamule mumunge mmadodo pamo na mmakono mukanjele panda po kushii! Kushinu kulota kupagwa shililo na kutuka shulu nkanywa.’

¹⁴ Nadoni vanu voe vankulalikigwa ila vakutandalegwa vavelé padyoko.”

Vimwe Shashali mwing'e mwene Shashali

Malukushi 12:13-17; Lukashi 20:20-26

¹⁵ Napanelo mapalishayo vakaumananga apo kutwala kwikala nguguvale wakunteja ntego vampate mu lo malove ake.¹⁶ Nadoni vankuvatumidya vakwoda vave na vanu vashipinga shimwe Elode kuka ndamudya, “Mwalimu, wetu tundimanya shana kenga wako ni umunu waumwuu na unkupundisha kwaumwuu indila yalota Nnungu úkatakigwa kupundishigwa na munu mwaa haunalola ing'ope yamunu.¹⁷ Kanji napanelo twaulila, wako wona dashi? Ni shambone nkati mulilamulo lyetu kunnipa Shashali

ukodi † kwali mene?”¹⁸ Yesu amanya vyakunyata vyave kutwala kushidoni, “Mwaa shani munkungulinga? Mmanu mmashinankulaba mwe!¹⁹ Ngulodya akuno yela yamunalipa ukodi yo.” Vanavo kunnodya dinali imo²⁰ kutwala nae kuvaudya, “Da ing'ope ai na namakong'o aju mwene nyani?”²¹ Vanavo do, “Shashali!” Nae kushidoni, “Bai vimwe Shashali mwing'e mwene Shashali na vimwe Nnungu mwing'e mwene Nnungu.”²² Vanavo pavaigwite davo vandíshanga kutwala kunneka kuumananga kuka.

Ing'ano yakulomba mukudyuka

Malukushi 12:18-27; Lukashi 20:27-40

²³ Napanelo muliduva lyolyo Iyo Yesu vandímwidila mashadukayo vánataukanga kudyuka kwavakupela kutwala kumudya doni,²⁴ “Mwalimu, Musha atwaulidilé doni, nnume akapela bila kummalakela mwana ndyagwe, nung'une wawakujala inimmaikila ainjile ding'ande pakulota ammalakele vana wakujala.^{††25} Napanelo pakati petu vandípagwa vanning'unumunu saba. Ntandi jo kulomba kutwala kupela, kwodamwaa hamalakadile mwana, nung'une jo andíinjila ding'ande.²⁶ Nanae wambili kuntandakela momo, wantatu mpaka namalilikila wasaba.²⁷ Kumwisho kwake nanae nkongwe jo kupela.²⁸ Napanelo kushi muliduva lyakudyuka vanu Iyo, mwene namwili aju shana alota kuva wakwashi pakuva vanu saba ava uti vaninnomba?”

²⁹ Yesu kushidoni, “Mwenu munkuduwangika mwaa me kumanya Maandiko na ata dimongo dyake Nnungu.³⁰ Muwakati wakudyuka vapidile hakupali kulomba kwali kulombwa, valota kuva kenga vanjelo kuwa.³¹ Da napane ing'ano ai yakudyuka vapidile, hamushamidye mwatangaladile Nnungu? ³² Nae atédoni, ‘Nangu ni Nnungu umwe Abulaamu, Nnungu umwe Ishaki na Nnungu umwe Yakobo.’ Mwenu, Nnungu jo hanava shinu Nnungu wavakupela, nae ni Nnungu wawangumi.”³³ Bai dimbumba dyavanu pavaigwite davo vandíshanga namene mapundisho ake.

Lilamulo likumene ni lyakwashi?

Malukushi 12:28-34

³⁴ Napanelo mapalishayo vakaigwe kenga Yesu andivadima nshasholo mashadukayo, vandímwikalila shemba.³⁵ Bai pakati pave munu jumo, mwalimu wadishaliya andímudya Yesu anninga aashidoni,³⁶ “Mwalimu, lilamulo likumene nkati mu Lilamulo ni lyakwashi?”³⁷ Yesu kushidoni, “Nnagwaledye *UMU*, jo Nnungu wako na ntima wako uti, ungumi wako uti na ding'anong'ano dyako uti.^{‡38} Ali ni lilamulo litandi na likumene.³⁹ Lyambili lilinganana na alyo ni ali, Nnagwaledye mujo kenga wako umwene.^{††40} Mumalamulo

† Ukodi au wavaloma ushililodya venentete kupagwa mumalamulo ake Shashali, ni wakunnodya nae kuva umu wave. †† Lola Kumbukumbu 25:5. ‡ Lola Kumbukumbu 6:5. †† Lola Valawi 19:18.

ala mavila ni mwalipandukanga Lilamulo uti na Vakulava."

Da Klistu mwanagwe nyani?

Malukushi 12:35-37; Lukashi 20:41-44

⁴¹ Bai mapalishayo vakadyaniéngé, Yesu andívaudya,
⁴² "Mwenu, ing'ano imwe Klistu ai mwona dashi? Jojo jo mwanagwe nyani?" Vanavo do, "Mwanagwe Daudi."
⁴³ Yesu kushidoni, "Napanelo mwaa shani jo Daudi alangalalegwa na Imumu, aninshema kuva nang'olo wake? † Mwaa nae atédoni,
⁴⁴ " Umu andimwaulila Nang'olo wangu †† doni, Ikala kunkanakono kwangu mpaka nangu ndivavike vamongo vako kumaulu kwako." ‡
⁴⁵ "Napanelo ikava kenga Daudi jo ankunshema Nang'olo, †† ilota kuululika dashi kavili nae kuva mwanagwe?" ⁴⁶ Bai hapagwíte munu wakujang'ula ata lilove limo na kutunduvangila muliduva alyo hapagwíte kavili munu wakulyalaveka kumudya shinu shoeshoe.

Vapambale vamwalimu na mapalishayo

Malukushi 12:38-40; Lukashi 11:39-52; 20:45-47

23 Napanelo Yesu andítangola na imbumba pamo na vakwoda vake kushidoni, ² "Vamwalimu vadishaliya pamo na mapalishayo vandidiva lyutu lyake Musha. ³ Napavedoni igwilila na tandedya uti avilá vyavatangola ila hamunavajedye vyavatenda. Vanavo vyavatangola havanatandedya shinu. ⁴ Vandáunga dibasha dyakwidopa dikamadyánga mwakunyakatila kuvatika vanu vanji vene kulamana na kudabunya vela. ⁵ "Vovo vo kula shinu shavatenda, ava mandole kwa-vanu. Ni ashi shivatádyá vatumbudye vidingo vyave vyavalyunga na valapeye mapepe adikanju dyave! ^{†††} Muvikukulu kuvanagwela kwikala mumautu aishima na muvitala vyamikodyanio vaikale viteng'u vya-mushu. ⁷ Vanavo mumautu aumbala kuvanagwela vavaudyange na یشima na vanu vavasheme 'Labi.' ⁸ Kanji mwenu hanapagwe wakushamegwa 'Labi' mwaa mwalimu wenu avelé jumo bai. Mwenu apa uti mmanung'unumunu gweka. ⁹ Namomo mwenu mushilambo amu hanapagwe munu wakunshema 'Atata' mwaa Tatagwenu wakuwa avelé jumo bai. ¹⁰ Na ata hamunashamegwe 'Mmanang'olo' mwaa nang'olo wenu avelé jumo bai, nae ni Klistu. ¹¹ Nadoni nang'olo pakati penu inimmaikila ave ntumika wenu. ¹² Woewoe álitumbudya jo mwene, vanantaa dyoni na woewoe álishapeya, vanantumbudya.

† Kwali: a Umu wake. †† Kwali: a Umu wangu. ‡ Lola Dimu 110:1. †† Kwali: a Umu. †† Vayuda vashindavanavo lidyavalelo lyakulyunga vidingo vyamaandiko pashenye na mmakono, namene-namene muwakati wavashishwali. Lidyavalelo ali lishaalakela mu-maandiko kenga Kuma 13:9, 16; Kumbukumbu 6:8; 11:18. Namomo mapepe alalá adikanju vanaishilaeli vashindalamuliligwa vavikange mudinguvo dyave voodedya Malamulo ake Musha. Lola Ishabu 15:38; Kumbukumbu 22:12.

¹³ "Napanelo mupambale mwenu mmamwalimu mmadishaliya na mmapalishayo. Mmanu mmashinankulaba mwe! Mushalangila maalati utawala wakuwa kwavanu! Mwenu mmene hamunainjila shinu na vainjila avalá, munkuvaleyá. ¹⁴ †††

¹⁵ "Mupambale mwenu mmamwalimu mmadishaliya na mmapalishayo. Mmanu mmashinankulaba mwe! Mumalila imanga na mwangu pakulota mumpate wakuliinjidyanga jumo tu bai, mukampata munkumpindula kuva mwana wakushena kumpunda mmene.

¹⁶ "Mupambale mwenu mmananangaledi múkalola muushidoni, 'Woewoe álilapila ing'ande ya Nnungu, kulilapa ako hakuvé mana, napane aijá álilapila shaabu ivéle mwing'ande yake Nnungu, andyungigwa kwakulilapa ako.' ¹⁷ Mmanu mmakubanga na múkalola davo mwe! Na apa shikumene ni shakwashi, shaabu kwali ing'ande ya Nnungu itadídye shaabu sho shiil-imyange? ¹⁸ Namomo munkushidoni, 'Woewoe álilapila alutali, kulilapa ako hakuvé mana, napane aijá álilapila shadaka shapashanya alutali, andyungigwa kwakulilapa ako.' ¹⁹ Mmanu mmakubanga na múkalola davo mwe! Na apa shikumene ni shakwashi, shadaka kwali alutali lutadídye shadaka sho shiilimyange?

²⁰ Napavedoni aijá álilapila alutali, alilapila lwo alutali na vinu uti vivéle pashanya pake. ²¹ Aijá álilapila ing'ande ya Nnungu alilapila kwaing'ande ayo na kwa aijá ánama amo. ²² Namomo aijá álilapila kuwa, alilapila kushiteng'u shake Nnungu na kwa aijá áikele pashiteng'u asho.

²³ "Mupambale mwenu mmamwalimu mmadishaliya na mmapalishayo. Mmanu mmashinankulaba mwe! Mumya lipungu lyakumi lyamamba akunung'ila, linjano na inakilo kutwala vinu vikumene vya Lilamulo yani ishaliya, shididi na likulupililo, me kwodedyá. Mwenu inimmaikila mwodedye vinu avi bila kwiludyanga vinji vyo. ²⁴ Mmananangaledi múkalola davo mwe! Mmanu múnanshinyina njanjema mmedi kutwala kummila ngamila.

²⁵ "Mupambale mwenu mmamwalimu mmadishaliya na mapalishayo. Mmanu mmashinankulaba mwe! Munáukanga diwene pamo na vyani panda gweka nkati mo muumbele lung'unuku na ulavilavi. ²⁶ Mmapalishayo múkalola davo mwe! Shitandi diwene pamo na vyani, ukanga nkati mo pakulota panda po napana-vo, patakate.

²⁷ "Mupambale mwenu mmamwalimu mmadishaliya na mmapalishayo. Mmanu mmashinankulaba mwe! Muvelé mwavyonga vyavapakenge lila. Panda apa mwui kwaneka kuva vyakwalala, nkati mwake mo muumbele magwangwa na dinamuna uti dyaudagwa. ²⁸ Ni kenga mwenu panda apa vanu vankumwona ku-

††† Maandiko anji ákavele akala uti, vandyánjedyá malove ala: a Mupambale mwenu mmamwalimu mmadishaliya na mmapalishayo. Mmanu mmashinankulaba mwe! Mwenu vyavanamwili munkulyanga na mukushwali mo, mundátima do jii kanji ni kuliku-lukuwa tu bai. Bai mundapata shaushanga shakujowa kupunda apo. Mumaandiko oe akala malove ala hapali.

va mmanu mmaishaliya napane nkati mo, shindimuumbala shinankulaba na ungave-lilamulo.

²⁹ "Mupambale mwenu mmamwalimu mmadishaliya na mmपालिशयो. Mmanu mmashinankulaba mwe! Muumbila vyonga vyavakulava na kupita munemya vyonga vyavanu vaishaliya. ³⁰ Mutangola doni, 'Wetu leka tūpagwite muwakati wavanyakala vetu, hatunaliinjidyange na vanavo mukujaa myadi vyavakulava.'

³¹ Napavedoni munkulyumidya mwemwe mmene ushuda wakuva mmana va avalá vavabyéngé vakulava. ³² Bai napanelo mwenu dududila madengo avatundunge vanyakalavenu.

³³ "Mwenu mmanyoka, udukulu wadinyoka dyaishumu mwe! Mulota kutila dashi ukumu yakushena?

³⁴ Napavedoni nangu ninkuntumididya mwenu vakulava, vanu valimanyilo na vamwalimu. Napane mwenu vovo vo, vanji mundavabyaa, vanji kuvapambilila, vanji muvitala vyenu vyakulipudidya kuvashapa viboko na vovo vo, kula likaja mundavalumbata. ³⁵ Nadoni mwenu mundapakala makosha amyadi vijaíke muulongo vyavanu vaishaliya. Mundapakala kutunduvangila kumyadi vimwe Abeli muni waishaliya mpaka kumyadi vimwe Shakaliya mwanagwe Balakiya wamummyee pakatipakati akuno kwalutali ako kulyutu yakujowa. ³⁶ Ninkumwaulila mwiu doni, shaushanga ashi shindavawikila vanu vaimbula ai.

Kutangadikangila kwa Yelusalemu

Lukashi 13:34-35

³⁷ "Yelusalemu, wako Yelusalemu! Aijá ávabyaanga vakulava na kuvaamanga majanga uti avalá vanimpalakadedya. Myanda mingapi nangu vyangulin-gangidile kuvavika pamo vanavako kenga mwanavautamilila ng'uku vanavake, mwenu me kulota!

³⁸ Mwenu! Likaja lyenu lindava lidembe.

³⁹ Ninkumwaulila doni, mwiko hamungwona kavili mpaka muwakati wamulota kutangola kushidoni, 'Aalaligwe aijá áida palina limwe *UMU*.'

Kubamalegwa kwaing'ande ya Nnungu

Malukushi 13:1-2; Lukashi 21:5-6

24 Yesu akauma mwing'ande ya Nnungu. Nae au-ka, vakwoda vake vandímuukila kutwala kunangudyanga vashanga ding'ande adilá dya-paing'ande ya Nnungu. ² Yesu kushidoni, "Mwenu munkwona uti vinu avi? Ninkumwaulila mwiu doni, mwiko haliikala lijanga pashanya lijangamwagwe palikabamolegwa."

Vimanyikilo vyakulilodya mwisho

Malukushi 13:3-13; Lukashi 21:7-19

³ Nae akaikala palishinga lyamilandi vya Ulivela kutwala vakwoda vake kumuukila áve gweka ndamudya, "Twaulila! Da vinu avi vilota kutandeka duvani? Shimanyikilo shani shilóta kulilodya kwida kwako na mwisho wawakati?" ⁴ Nae kutwala kuvaulila kushidoni, "Lilaledye pakulota hanapagwe wakunduwanga.

⁵ Vandaida vanu voe vatumila lina lyangu vaashidoni,

'Nangu Klistu,' vovo vo vandavaduwinga vanu voe.

⁶ Mundaigwa ding'ondo na manyinyi ading'ondo, mwenu po, hamunajope. Vinu avyo vindivaikila vitandeki ila haunava shinu mwisho. ⁷ Venentete vandatandana ing'ondo na venentetemwave, utawala undatandana ing'ondo na utawalamwagwe. Indaumilila indala na shindangenda mumautu akuvilingananga.

⁸ Vinu avyo uti ni shitunduvangilo tu shamauvilo akushuluwa. †

⁹ "Napanelo vanavo vanankamula kumuukanavo ndamuuyanga na vanammyaa. Mwemwe mundavangadika kwavenentete uti kwamwaa walina lyangu.

¹⁰ Muwakati awo voe vandavainjidyanga mulidambi, vanji vandavalimya na vanji vandavangadika. ¹¹ Vandaumilila vakulava voe vakushang'apa na vovo vo, vandavaduwinga voe. ¹² Linagwaledyo lyavanu voe lindapunguka kwamwaa wakwanjadyeka ungave-lilamulo, ¹³ napane aijá álota kulipililila mpaka kumwisho, ajo andaambwalegwa. ¹⁴ Nadoni ntenga wambone wautawala undavalangangigwa mushilambo uti pakulota uve ushuda kwavenentete uti kutwala kuwika mwisho.

Shakujowa shiídanavo kubamola

Malukushi 13:14-20; Lukashi 21:20-24

¹⁵ "Napanelo pamulota kwona shakudabukanga shiídanavo kubamola shávalangenge nkúlava Daniele shiimidile palyutu lyakwilimiyanga, †† muni áshomya amanye mana ake. ¹⁶ Bai vavéle ku Yudeya vatukutule kumashinga. ¹⁷ Ávele panda apumula hanatakutuke kwinjila nng'ande ndatwala shinu shoeshoe. ¹⁸ Namomo ávele kumagwelu hanauje kuka ndatwala dinguvo dyake. ¹⁹ Vapambale vakongwe valóta kuvanavo vitumbo na valóta kujang'edya mumaduva alo. ²⁰ Shwali pakulota hamunatile muwakati washipwepwe kwali muliduva lyakupumula. ²¹ Muwakati awo andapagwa mauvilo makumene ainamuna íkaumilidile tangu kukandyangigwa shilambo mpaka nelo apa na lolo lo, mwiko hapagwa shinu kavili. ²² Leka *UMU* akapungwile maduva alo hanapagwe ata muni jumo e akambwaléngwe, napane kwamwaa wavakutandalegwa, maduva lo, andipungula.

Kwida kwa Mwana Wamunu

Malukushi 13:21-27; Lukashi 21:7-9, 25-28

²³ "Napanelo muni akamwaulila doni, 'Mwenu, Klistu aju apa,' kwali, 'Apali aju,' hamunankulupile. ²⁴ Mwaa vandaumilila vaklistu vakushang'apa na vakulava vakushang'apa. Vovo vandatenda vimanyikilo vikumene na vyakutikinikanga kwambangidya vavaashadyange ikaululika ata mpaka vakutandalegwa. ²⁵ Ngwigwa! Vinu avi nimwaulila kaladavo.

²⁶ "Napavedoni vanu vakamwaulila kushidoni, 'Mwenu! Nae apali kushimbweshe akulá,' hamunauke. Kwali vakaashidoni, 'Apali nng'ande amulá,' hamu-

† *Lola Ishaiya 13:6-9; 26:17. Masiya akanava kuwika, wakati awo vayuda vashishema kuva wamauvilo akushuluwa.* †† *Lola Daniele 9:27; 11:31; 12:11.*

nakulupile. ²⁷ Kenga mo mwakunatandela kumeta kú-nalangadya kula kushinu kwamwanda umo ni momo mwailota kuvalela kwida kwa Mwana Wamunu. ²⁸ Pau-vele ntui, malembo andaumbalanila popo. ²⁹ Po palota kumalilikinneu mauvilo amaduva alo, 'Liduva lindadimba, mwedi hauvala, dinondo kuwa ko dindagwanga na vyadimongo vyakuniania vindating'inigwa.' †

³⁰ "Bai muwakati wowo kuwa shindaaneka shi-manyikilo shake Mwana Wamunu kutwala makola uti amushilambo kutangadikanga. Vovo vo vandamwona Mwana Wamunu aaloka mumaundi na dimongo pamo na lishangelo lyoe. ††³¹ Muwakati wowo nae andavatumidya vanjelo vake vaditalumbeta dyakuma namene vauke vakavatwalange vakutandalegwa vake mudisemu nsheshe dyamushilambo kutunduvangila nkono unji wakuwa ndamalilila nkono unji.

Kwankungu lipundishe

Malukushi 13:28-31; Lukashi 21:29-33

³² "Napanelo kwankungu lipundishe nkong'o au. Pau-naipukila mwenu mumanyinneu doni, shipondo shindiwika. ³³ Namomo mukona vinu avyo vitandeka, manyinneu doni, mwisho uwikile, uvé mo mmilango myenu. ³⁴ Ninkumwaulila mwiu doni, vanu vaimbula ai havamalilika vinu avi vikanava kutandeka. ³⁵ Kuwa na pai kundapita ila malove angu mwiko hapita.

Liduva alyo na isaa hapali ámanyite

Malukushi 13:32-37; Lukashi 17:26-30, 34-36

³⁶ "Napane liduva lyene lyo na isaa, hapali ámanyite, ata vanjelo kuwa havamanyite, ata Mwana hamanyite ila ámanyite ni Atata bai. ³⁷ Kenga mo mwaivalaléle muwakati umwe Noe nimumo momo mwailota kuvalela kwida kwa Mwana Wamunu. ³⁸ Ni kenga momo likanava kuwika livambwe, vanu vashindalya, vashindakumbila, vashindalomba na kulombwa mpaka muliduva lyainjidile Noe mwingalava ³⁹ vanavo pavakamanyanya shinu kudabanga kwida vila livambwe ndavalya do kobo! Nadoni kwida kwake Mwana Wamunu kulota kuvalela momo. ⁴⁰ Vanu vavili vavele mulishamba, jumo andatwaligwa junji kulakegwa. ⁴¹ Vakongwe vavili vatipula, jumo andatwaligwa junji kulakegwa. ⁴² Napavedoni ava mevo mwaa hamumanyite liduva lyalota kwida *UMU* wenu. ⁴³ Kanji napanelo manya doni, tata-munu wapaing'ande leka ámanyite wakati wakwida nkwiwa, akandiikala mevo na hanaleke ing'ande yake vatutumula. ⁴⁴ Napavedoni namwenu momo lipanganiane mwaa Mwana Wamunu andaida muwakati wamukalindila mwenu.

Nkong'o wantumika wakukulupilika

Lukashi 12:41-48

⁴⁵ "Da ntumika shani wakukulupilika na wading'ano wammikile nang'olo wake kuwa nanangalaledi wapaing'ande pake na kuvapa shakulya muwakati uvaikidíle? ⁴⁶ Andijaligwa ntumika aijá walota

† *Lola Ishaiya 13:10; 24:23; 34:4; Eshekieli 32:7; Yoweli 2:10, 31; 3:15.* †† *Lola Daniele 7:13-14.*

kunkodya nang'olo wake pauja atandela momo.

⁴⁷ Ninkumwaulila mwiu doni, anankamudya vyake uti. ⁴⁸ Kanji napanelo ntumika aijá nkalau akatangola shintimatima doni, 'Nang'olo wangu ankutima kuja,' ⁴⁹ bai kutunduvanga kuvakamanga vatumikamwagwe, kulyanga gwamba na kukumbila pamo na vakwambalwa, ⁵⁰ nang'olo wake andaida muliduva lyakalindila na wakati wakamanyite. ⁵¹ Nae anannumulanianga kutwala shingumi shake ndaanganianga na shavamalambi. Kushinu ako kundapagwa shililo na kutuka shulu nkanywa.

Nkong'o wavali kumi

25 "Napanelo kuwika kwautawala wakuwa ko † ku-lota kuva mwavali kumi vatwéte dikalaboi dyave kuka nannindila nkúlomba. ² Pakati pave mwanu vavele vakupuwanikanga, vanji mwanu vo kuva vading'ano. ³ Vakupuwanikanga vo pavatwete dikalaboi dyave, havanyukéte mauta alibadila. ⁴ Napanelo avalá vading'ano, pavatwete dikalaboi dyave vandínyukatinneu mauta muvitumba vyave. ⁵ Bai nkúlomba patimile kuwika, uti vali vo vandíindila mpaka kuukila mulwono. ⁶ Napane shilo shing'ati panda po kwigwinika kukugwanga kwavanu vaashidoni, 'Nkúlomba ankwi-da, wena munkanshinge.' ⁷ Bai uti vali avalá kutakatukanga kupanganianga dikalaboi dyave. ⁸ Avalá vakupuwanikanga kuvaulila vading'ano doni, 'Tumajela mauta enu dikalaboi dyetu mauta andimalilika!' ⁹ Vading'ano vo kushidoni, 'Hatutamwa! Twonadavo mauto lo, hatutosha wetu namu mwenu. Wena ko kwavanashumidya ko, mukashume.' ¹⁰ Vanavo pavaukile kukushuma mauta, kunyuma akuno nkúlomba kuwika. Bai avalá ve valipanganiéenge vandíinjila namu nkúlomba pashitamo kutwala ing'ande yo kugalola. ¹¹ Ling'oto, vali vanji vo kuwika kutwala kushema, 'Nang'olo, nang'olo wako, tushimulila!' ¹² Nae kushidoni, 'Ninkumwaulila mwiu doni, nangu mwenu po hanimmanyite.' ¹³ Napavedoni ava mevo mwaa liduva lyene lyo na isaa, hamumanyite.

Nkong'o wavatumika vatatu

Lukashi 19:11-27

¹⁴ "Namomo ilota kuva kenga munu átenda shimwanda kutwala kuvashema vatumika vake kuvakamudya mali ake. ¹⁵ Jumo kumupa ditalendu mwanu, junji kumupa mbili kutwala wantatu jo kumupa imo, yani kwodana na lyululilo lyakula munu mwene jo kuma kuka. ¹⁶ Bai akauma aijá ápatile ditalendu mwanu, nae akatenda nshulusho mpaka kwanjadyedya dinji mwanu. ¹⁷ Aijá ápatile mbili, nanae kwanjadyedya dinji mbili. ¹⁸ Napane aijá ápatile italendu imo, akauma kuka ndaimbila pai kutwala wo nju-luku wo wanang'olo wake wo, kupiya.

† *Mushigalegu vaandiké doni, a Utawala wakuwa uvelé kenga...Napanelo apa vaamba kuwika kwautawala wakuwa yani ivelé kuwika kwa Mwana Wamunu wakati úkamanyika. Lola 24:44, 50 na yadavo 25:13.*

¹⁹“Ukapite wakati woe, nang'olo wave ankuja na ankutenda shikonda na vanavo. ²⁰Bai akaida apalá aijá ápatile ditalendu mwanu, kumya ditalendu dinji mwanu aashidoni, ‘Nang'olo, uníngukamudya ditalendu mwanu. Lola napane nindyanjadyedya dinji mwanu.’ ²¹Nang'olo wake kushidoni, ‘Shambone namene! Wako ni untumika shii na wakukulupilika! Undikulupilika kwavinu padiki napavedoni ndakukamudya vinu vyoe. Bai ida upuwange na nang'olo wako.’ ²²Akaida aijá waditalendu mbili nanae kushidoni, ‘Nang'olo, uníngukamudya ditalendu mbili. Lola napane nindyanjadyedya dinji mbili.’ ²³Nang'olo jo kushidoni, ‘Shambone namene! Wako ni untumika shii na wakukulupilika. Undikulupilika kwavinu padiki napavedoni ndakukamudya vinu vyoe. Bai ida upuwange na nang'olo wako.’

²⁴“Kumwisho akaida aijá ápatile italendu imo kutwala kushidoni, ‘Nang'olo, nangu ndíkumanya kenga wako ni umunu wakunanapanga, únapuna paukalimile na únalimangila paukapandile. ²⁵Napanelo kwamwaa wakukujopa, ndítwala italendu yako yo kuka ndapiya pai. Lola, shako sho, ashi.’ ²⁶Nang'olo wake kushidoni, ‘Wako ni untumika nkalau na umwondo! Da undímanya kenga nangu ni nimunu ngúnapuna pandikalimile na ngúnalimangila pandikapandile? ²⁷Bai ukanditwala njulukuku wangu kuka ndavika kulibengi pakulota nimwene pandikaujite ngukodye shangu namu ashilá shaanjadyeke. ²⁸Bai mpoke njulukuku wo mumupe ávenavo ditalendu kumi jo. ²⁹Kula ávenavo vandamupa na andavanavo kupunda apo. Napane aijá ákavenavo, ata sho shavenavo sho, vanampoka. ³⁰Bai ntumika aju wakubanga ntwale munjele panda kushii ko! Kushinu ako kundapagwa shililo na kutuka shulu nkanywa.’

Ukumu yamwisho

³¹“Mwana Wamunu palota kwida mulishangelo lyake pamo na vanjelo vake andaikala pashiteng'u shake shalishangelo. ³²Venentete uti vandaumbalanila pamevo pake, nae kuvaapukanianga kenga mo mwanavaapukaniangidya nkúshunga-dinyama vambudi na vangandolo ³³kutwala vangandolo kuvavika kunkanakono kwake, vambudi kuvavika kunshanda. ³⁴Napane jo Umu jo andavaulila avalá vakunkanakono kwake kushidoni, ‘Idananga mwenu mwalaligwe namu atata! Pwashalela utawala wavankandyangididye tangu kukandyangigwa kwashilambo. ³⁵Mwaa paingukodíle indala shakulya muningupa, paingukodíle inyota medi muningupa, panguvéle ninjeni muningupwashalela, ³⁶panguvé na uwou muningugwadya, panguvé ninnwele muningutumika na panguungwidye, mwenu muningulola!’

³⁷“Napanelo avalá vaishaliya kumudya, ‘Nang'olo, da duvani patukugwene ikukodile indala kutwala wetu kukulisha, ikukodile inyota wetu kukupa medi, ³⁸úvele unjeni wetu kukupwashalela, úvenavo uwou wetu kukugwadya, ³⁹úvele unnwele wetu kukutumika na úungwidye, wetu kwida ndakulola?’ ⁴⁰Umu kutwa

kushidoni, ‘Ninkumwaulila mwiu doni, kula shinu shamuntandalele ndikidiki-uti pakati pavanung'uvan-gu ava, mungutandalelé nangu.’

⁴¹“Bai napanelo andavaulila avalá vavé kunshanda kwake kushidoni, ‘Tumukanga apa mwenu mmanu mmadilana! Kuka kushena, kumoto úkamalilika wavankandyangididye Ndamoni pamo na vanjelo vake. ⁴²Mwaa paingukodíle indala shakulya hamungupele, paingukodíle inyota medi hamungupele, panguvé ninjeni hamungupwashaladile, ⁴³panguvé na uwou hamungugwadidye, panguvé ninnwele hamungutumikidile na panguungwidye, mwenu hamungulodile!’ ⁴⁴Namomo navanavo vandajang'ula, ‘Nang'olo, da duvani patukugwene wako ikukodile indala kwali inyota, úvele unjeni kwali na uwou, úvele unnwele kwali úungwidye kutwala wetu mene kukutumikila?’ ⁴⁵Nae kutwa kuvajang'ula kushidoni, ‘Ninkumwaulila mwiu doni, kula mwanda wamukantandadile ndikidiki-uti pakati pa ava, hamungutandadile nangu.’ ⁴⁶Bai ava vandauka kushaushanga shíkamalilika, avalá vaishaliya kuka kushingumi shíkamalilika.”

Nguguvale wakummyaila Yesu

Malukushi 14:1-2; Lukashi 22:1-2; Nshuwau 11:45-53

26 Napanelo Yesu akamalile kutangola malove ala uti, andívaulila vakwoda vake kushidoni, ²“Mwenu mundimanya kenga andibakila maduva mavili pakulota kuwika Pasaka. Mwana Wamunu vanankamudya kwavanu pakulota vankamele panshalaba.”

³Napanelo vanang'olo vavakulangalalela-shadaka namu vanang'olo vavenentete vandíkadyania paing'ande imwe nkúlangalalela-shadaka nkumene aijá wavanshema Kaipashi ⁴kutwala kwikala nguguvale wakuteja ntego vankamule na vammayae. ⁵Napane vovo vo vashishidoni, “Haunave wakati washikukulu mwaa inkuulukika venentete kutenda mandamano akupinga.”

Yesu ankupakigwa mauta ku Betaniya

Malukushi 14:3-9; Nshuwau 12:1-8

⁶Napanelo Yesu àvele ku Betaniya paing'ande imwe Simoni wamalemba ⁷àikele pandamu, popo po kuwika nkongwe jumo ànyukete ishupa yamauta akuning'angila auka njulukuku woe kutwala kummimininganga mmuti. ⁸Vakwoda vake pavagwene shitendo asho kuvanyatila, vanavo do, “Da asala ai uti yanyamani? ⁹Mauta ala vakandishumidya na njulukuku woe namene kutwala kuvapa vákave pashinu.” ¹⁰Yesu amanya makumbukililo ave andítangola kushidoni, “Mwaa shani nkongwe jo munkumwangaishanga? Nae aningutangandalele shinu shambone. ¹¹Vákave pashinu vo, ngwengwe mundapagwanavo napane nangu, hangupagwa ngwengwe namu mwenu. ¹²Nae andimimininganga mauta mumili mwangu pakulota angupanganiane yakungushika. ¹³Ninkumwaulila mwiu doni, kula kushinu kwavalota kusalanganga ntenga wambone mushilambo amu, namomo vinu vyatandile

nkongwe aju vandavalanganga kenga kumbukumbu kwake nae."

Yudashi ankupakanila yakunnimya Yesu

Malukushi 14:10-11; Lukashi 22:3-6

¹⁴ Napanelo jumo pakati pa avalá kumi na mbili, aijá walina Yudashi Shikaliyote, andívaukila vanang'olo vavakulangalalela-shadaka ¹⁵ ndavaudya doni, "Mulota kungulipa nyamani nangu ndikankamudya mwenu Yesu jo?" Vanavo kutwala kunnipa dishingo salasini dyalyava. ¹⁶ Bai kutunduvangila apo, Yudashi ashindalambela litala lyakunkamudinya kwavanavo.

Yesu ankulya Pasaka na vakwoda vake

Malukushi 14:12-21; Lukashi 22:7-13, 21-23; Nshuwau 13:21-30

¹⁷ Napanelo muliduva litandi lyashikukulu shama-gung'u ákave nkukumuku, Yesu vandímuukila vakwoda vake ndamudya doni, "Da Pasaka ai, ulota tukakupanganiangidye pashi ulye?" ¹⁸ Nae kushidoni, "Wena kunjini ko mukatangole na munu jumo kushidoni, 'Mwalimu atédoni, "Wakati wangu undivandika, nadoni paing'ande pako apa ndatandela Pasaka na vakwoda vangu." " ¹⁹ Mwiu vakwoda vake kutenda kenga mo mwavatumidile; vanavo vandí panganianga Pasaka ayo. ²⁰ Pauwikile wakati wayalyulo Yesu kwikala pandamu na vakwoda vake. ²¹ Akuno valya kutwala kuvaulila doni, "Ninkumwaulila mwiu doni, pakati penu jumo anangulimya." ²² Vakwoda vake kutwala kuvaida shipalodi shoe namene na kutunduvanga kudya vaashidoni, "Nang'olo, da nangu apa?" ²³ Nae kushidoni, "Aijá álidya pandamu namu nangu ni jojo álota kungulimya. ²⁴ Mwana Wamunu andapalela kenga mo mwavandikidile vamwamba nae napane apambale aijá álota kunnimya Mwana Wamunu jo! Munu ajo kudyanaga hanavalekwe." ²⁵ Kutwala Yudashi aijá nannimya kumudya, "Labi, da nangu apa?" Yesu kushidoni, "Wako ni úvalanganga."

Ndamu umwe Umu

Malukushi 14:22-26; Lukashi 22:14-20; I Vakolintu 11:23-25

²⁶ Muwakati wavashilya, Yesu akatwala ligung'u kwalaliya kutwala kumajanianga kuvapa vakwoda vake aashidoni, "Twala mulye! Au ni mili wangu." ²⁷ Namomo akatwala shikombe akalambwalela kutwala kuvapa vakwoda vake aashidoni, "Kumbilanga uti mwenu apa. ²⁸ Avi apa ni myadi vyangu, myadi vyaimbodi vivajaikíla voe kwakulivalivigwa kwamadambi. ²⁹ Ninkumwaulila doni, mwiko hangukumbila kavili ugwalwa au wavyepo mpaka muliduva alyo lyangulota kukumbila ugwalwa waambi namu mwenu muutawala umwe Atata." ³⁰ Vakaimba lwimu kutwala kuumananga kuka kulishinga lyamilandi vya Ulivela.

Patulu anankana Yesu

Malukushi 14:27-31; Lukashi 22:31-34; Nshuwau 13:36-38

³¹ Napanelo Yesu ankuvaulila kushidoni, "Mwenu uti shilo sho shanelo ashi munangwambukanga mwaa indyandikigwa doni,

" 'Nammyaa nkúshunga kutwala dingandolo dyamushipinga asho kumwadilikananga.' †

³² Napane pangudyuka po, nangu ndalangalela kuka ku Galileya." ³³ Patulu kutwala kushidoni, "Ata ikava kenga vavangu ava uti vandakuleka, nangu mwiko handikuleka!" ³⁴ Yesu kushidoni, "Ninkukwaulila mwiu doni, shilo sho shanelo ashi ng'uku akanava kungavavanga unangukana myanda mitatu." ³⁵ Patulu do, "Ata ikava yakupela namu wako, nangu mwiko handikukana." Kutwala vakwoda vake vanji uti kutangalela momo.

Pa Geteshemani

Malukushi 14:32-42; Lukashi 22:39-46

³⁶ Napanelo Yesu ankuka pamo na vakwoda vake kulyutu lyavashema Geteshemani na ankuvaulila kushidoni, "Ikalinga apa! Nangu nguka mushu amulá ndashwali." ³⁷ Nae kuntwala Patulu namu vanavake Shebedeu vavili. Bai kutunduvanga kumwida shipalodi na kumwida kwangaikanga ³⁸ kutwala kushidoni, "Ungumi wangu unkuvanavo shipalodi shakutadya kupela. Mwenu ikalinga popo apa, mupimile namu nangu."

³⁹ Nae akauka mushu padyoko kugwa ing'ope kutindya pai kutwala kushwali aashidoni, "Atata, ikaululika nyemya pamili pangu luwene alu † ila hauntende mwangulatela nangu, tenda mwaulatela wako umwene." ⁴⁰ Bai nae ankuja, ankuvakodya vakwoda vake vavele mulwono kutwala kumudya Patulu, "Shasho! Da mwenu po hamuvé dimongo dyakupimila namu nangu ata isaa imo vela ai? ⁴¹ Pimila na shwali pakulota hamunainjile mukutubigwa! Imumu mwiu inkuva tayali, mili ni udabadabéngé."

⁴² Nae akauka kavili mwanda wambili kutwala kushwali aashidoni, "Atata, ikava kenga hayululika luwene alu kunyema bila kukumbila nangu, bai ive mo mwaulatela wako umwene." ⁴³ Akauja kavili kuvakodya vâlalenge mwaa mevo ave andidapelwa na lwono.

⁴⁴ Nae akavaleka kuka kavili ndashwali mwanda wamtatu aujidya malove lolo matandi. ⁴⁵ Bai ankuujila kwavakwoda vake kutwala kushidoni, "Da mpaka ambi munkulala? Doni po munkupumula? Mwenu, andiwika wakati wavalota kunkamudya Mwana Wamunu kumakono kwavakutega. ⁴⁶ Takatukanga tuke! Wakungulimya jo, andivandika!"

Kukamuligwa kumwe Yesu

Malukushi 14:43-50; Lukashi 22:47-53; Nshuwau 18:3-11

⁴⁷ Napanelo Yesu akuno atangola kwidinneu Yudashi jumo pakati pa avalá kumi na mbili pamo na imbumba yavanu vanyukatenge maambila na dilungu. Vanu avo, vandítumigwa na vanang'olo vavakulangalalela-shadaka na vanang'olo vavenentete. ⁴⁸ Jo wakunnimya jo andívapa shimanyikilo aashidoni, "Munu jo wangulota kumwambatila ni jojo, mwenu nkamulinne." ⁴⁹ Nae

† *Lola Shakaliya 13:7.* †† *Luwene lwamba Yesu, mana ake ni shitundi sha Nnungu shavavikila avalá vaténda vyamadambi mushilambo. Lola Dimu 75:8; Ishaiya 51:17, 22.*

kukinneu kumwe Yesu ndaashidoni, "Labi, umumi?" Bai kutwala kumwambatila. ⁵⁰ Yesu kushidoni, "Mb-wana, tenda shawidilile." Bai avalá vavé namu nae vakamuukila Yesu kunkamula kumunga.

⁵¹ Napanelo mwe! Jumo pakati pa avalá vavé namu Yesu akakamula lyambila lyake, kwalamola, kummyaa ntumika wake nkúlangalalela-shadaka nkumene kutwala kunnnumula lyatu lyake. ⁵² Yesu kushidoni, "Jela lyambila lyako mwishavi! Uti avalá vakulupíla maambila andavapedya lo maambila. ⁵³ Da nangu naulule kunjugwangila Atata kutwala nae kutumididyanneu dimbumba dyavanjelo vaing'ondo dyakupunda kumi na mbili? ⁵⁴ Na davo po alota kuwikila dashi popo Maandiko atédoni, 'Indivaikila itandakele momo?'" ⁵⁵ Muwakati wowo Yesu kutangalela imbumba kushidoni, "Kenga nkalau shamwida na maambila na dilungu kwida nangukamula? Kula liduva ngushindapagwa mwing'ande ya Nnungu ngwikele ngupundisha ata hamunguungile. ⁵⁶ Uti avi vinkutandeka pakulota awikile popo Maandiko avakulava." Bai vakwoda vake uti vanínneka kutwala kutukutanga.

Yesu paikamati

Malukushi 14:53-65; Lukashi 22:54-55, 63-71; Nshuwau 18:12-14, 19-24

⁵⁷ Napanelo avalá vankamwíle Yesu vandímuukanavo kwing'ande imwe Kaipashi nkúlangalalela-shadaka nkumene kulyutu lyavakadyaniéngé vamwalimu vadishaliya pamo na vanang'olo. ⁵⁸ Patulu ashindamwoda Yesu kwakushu mpaka mulugwani lwankúlangalalela-shadaka nkumene jo. Nae akainjila kutwala kwikala pamo na vakushunga pakulota aone ashilá shilóta kutandeka. ⁵⁹ Bai vanang'olo vavakulangalalela-shadaka pamo na ikamati uti vashindalam-bela ushuda waushwang'a pakulota vammalidyé, ⁶⁰ napane havapatíle ata ikava kenga vandípatikananga vashuda voe. Kudabanga vila kwida vanu vavili ⁶¹ naashidoni, "Aju apa ashitangola doni, 'Nangu ninku-ulula kubamalanga ing'ande yake Nnungu kutwala kudenga kwamaduva matatu kumalila.'" ⁶² Bai nkúlangalalela-shadaka nkumene kutakatuka kutwa kushidoni, "Da hashipali shakujang'ula vyavakutambudyanga avi?" ⁶³ Yesu kumalala. Nkúlangalalela nkumene jo do, "Palina lya Nnungu mumi, twaulila ikava kenga wako ni Klistu aijá mwanagwe Nnungu!" ⁶⁴ Yesu kushidoni, "Wako ni útangola. Leka apo kutunduvangila ambi apa mundamwona Mwana Wamunu àikele kunkanakono kwake Wadimongo-uti na aida mu-maundi kuwa." ⁶⁵ Bai nkúlangalalela-shadaka nkumene aijá andípapulanga dinguvo dyake aashidoni, "Andikupulu! Napane tulambela ushuda shani kavili? Mwenu mundigwa kukupulu aku. ⁶⁶ Napanelo mwona dashi?" Vanavo do, "Inimmaikila apele." ⁶⁷ Bai vanavo kunshunangila mata kumevo, kunkanyola na kunkoma malatuma ⁶⁸ vaashidoni, "Wako Klistu, tualangangila akukanywelé nyani?"

Patulu ankunkana Yesu

Malukushi 14:66-72; Lukashi 22:54-62; Nshuwau 18:15-18, 25-27

⁶⁹ Napanelo Patulu andíikala mulugwani kutwala ntu-mika jumo mwali kumuukila ndamwaulila doni, "Nawako uvele pamo namu Yesu wa ku Galileya."

⁷⁰ Nae kukana vanu uti vamwigwa aashidoni, "Shawamba wako sho nangu hangunamanya shinu." ⁷¹ Bai pashuumila pannango walugwani, ntumika junji nkongwe kumwona kutwala kuvaulila vanu vavéle apo kushidoni, "Munu aju avele pamo namu Yesu wa ku Nashaleti." ⁷² Patulu kukana alilapa mwanda unji aashidoni, "Nangu munu ajo hanimmanyite." ⁷³ Muwakati padyoko vanu vavéle mulyutu alyo vandímuukila ndamwaulila kushidoni, "Wako mwiu wamushipinga shosho tunkukumanyila shitangodi shako." ⁷⁴ Nae kutunduvanga kulitaa dilana na kulilapa, "Nangu munu ajo hanimmanyite!" Ng'uku kutwala kungavalenneu. ⁷⁵ Patulu kukumbukilinneu malove atangwéle Yesu kushidoni, "Ng'uku akanava kukangavela wako unangukana myanda mitatu." Nadoni nae andyúmila panda ndatumbula ing'uto.

Yesu vankumuukanavo kumwe Pilatu

Malukushi 15:1; Lukashi 23:1-2; Nshuwau 18:28-32

27 Napanelo lyamba linyeiku, vanang'olo uti vavakulangalalela-shadaka pamo na vanang'olo vavenentete vandíikala nguguvale kutwala kuunganila vamyae Yesu. ² Nadoni vanavo vakamunga kumuukanavo kumwe Pilatu nang'olo walijimbo.

Yuda ankulipambilila

Vitendo 1:18-19

³ Napanelo Yudashi aijá annimídyé Yesu, pamanyite doni Yesu andyukumigwa andíilingulanga kutwala kujija dishingo salasini adilá dyalyava kwavanang'olo vavakulangalalela-shadaka na kwavanang'olo ⁴ aashidoni, "Nditega. Nditadya vijaike myadi víkave makosha." Vanavo kushidoni, "Wetu shetu nyamani? Mwaa awo wako wako umwene." ⁵ Bai nae akajaa dishingo adilá mwing'ande ya Nnungu mwene kuka ndalipambilila. ⁶ Napanelo vanang'olo vavakulangalalela-shadaka vakatwala dishingo adilá kutwa kushidoni, "Lilamulo linkutuleya njulukuku au kuvika mulishanduku lyanjuluku waing'ande ya Nnungu mwaa upatikanenge mummyadi." ⁷ Bai vanavo kupakanila njulukuku awo vashume lishamba limwe pundi jumo wakumba ulongo pakulota live lyutu lyaku-vashika vakwaloka. ⁸ Ni ashi shavashamela mpaka nello lina lya Lishamba Lyamyadi. ⁹ Napavedoni andíwikipila popo malove atangaléke kwaindila yankúlava Yelemiya doni, "Vanditwala dishingo salasini dyalyava, shilinga shavagwene vanaishilaeli kutosha kunshumida nae.

¹⁰ Vanavo njulukuku awo kushuma lishamba limwe pundi wakumba ulongo,

kenga mo mwangulamulidile *UMU* ngutende." †

Yesu pamevo pamwe Pilatu

Malukushi 15:2-14; Lukashi 23:3-5, 13-23; Nshuwau 18:33-19:15

¹¹ Napanelo Yesu vandimwimidya pamevo pake nang'olo walijimbo nae kutwala kumudya, "Da wako ni umu wavayuda?" Yesu kushidoni, "Wako ni úvalangan-ga." ¹² Bai vanang'olo vavakulungalalela-shadaka pamo na vanang'olo pavashinkashali, nae hashijang'ula.

¹³ Pilatu kutwala kumudya, "Da vinu vyoe vyavakukashali avi haunaigwa shinu?" ¹⁴ Yesu kula-mana na kujang'ula ata lilove limo mpaka nang'olo walijimbo kushanga.

¹⁵ Napanelo kula pashishiwika shikukulu, Pilatu ashindavaungulila nkúngwa jumo wavashinjugwa venentete. ¹⁶ Andípagwa nkúngwa jumo wakumanyika namene walina Yesu Balabashi. ¹⁷ Bai vanu vâumbal-anidile Pilatu kuvaudya, "Wakwashi wamulota nimuungulile, Yesu Balabashi kwali Yesu wavanshema Klistu?" ¹⁸ Andyúdyá davo mwaa andímánya kenga vandimuukanavo kwake nae kwamwaa waing'ou. ¹⁹ Namomo Pilatu áikele palibengi, ndyagwe kumpalakadyedya ntenga wakushidoni, "Haunaliin-jidyange mumwaa wamunu ajo waishaliya. Nangu ne-lo nindyuvauvanga namene ngulatanga kwamwaa wake nae." ²⁰ Kanji vanang'olo vavakulungalalela-shadaka pamo na vanang'olo vandívatumbilikanga venentete pakulota vanjugwe avaungulile Balabashi, Yesu jo vammalidyé. ²¹ Kutwala nang'olo walijimbo kudya kavili, "Pakati pavanu ava vavili, wakwashi wamulota nimuungulile?" Vanavo do, "Balabashi!" ²² Nae, "Napane kushi Yesu wavanshema Klistu nintandele mwashi?" Vanavo uti do, "Nkamele panshalaba!" ²³ Nae kudya kavili, "Da nae po atandilé shaukalau shani?" Vanavo kumamodya kukugwanga pashanya po, vaashidoni, "Nkamele panshalaba!"

Pilatu ankunkamudya Yesu vankamele panshalaba

Malukushi 15:15; Lukashi 23:24-25; Nshuwau 19:16

²⁴ Napanelo Pilatu pamanyite doni hashipali shuululika na shititumbu shinkutunduvanga, andítwala medi kunavanga mmakono pamevo pavanu uti aashidoni, "Kujaika kwamyadi vyamunu aju, nangu hanguve makosha. Ing'ano ayo yenu mmene." ²⁵ Venentete uti kushidoni, "Makosha akujaika myadi avyo atupate wetu pamo na udukulu wetu." ²⁶ Bai Pilatu andívaungulila Balabashi, Yesu jo kunshapa viboko na kuvaing'a vakankamele panshalaba.

Vaing'ondo vankumwiludyanga Yesu

Malukushi 15:16-20; Nshuwau 19:2-3

²⁷ Vaing'ondo vake nang'olo walijimbo vakantwala Yesu kumuukanavo kwing'ande yanang'olo wave kushema shipinga uti shavaing'ondo kuntang'anedyá. ²⁸ Vanavo vakamulanga dinguvo dyake kungwadya ikanju yanauvi. ²⁹ Vakadinga lidaka lyamiva kungwadya

† *Lola Shakaliya 11:12-13.* † *Mumaandiko amo akala ni mwavaandike lina lya a Yesu Balabashianji muvele a Balabashitu. Nimumo momo munshitali wa 17.*

mmuti, mmakono mwake kunkamudya nkungulandi, kunguguvalila mushu mwake akuno vantanila vaashidoni, "Shikamu *UMU* wavayuda!" ³⁰ Vanínshu-nangila mata kutwala kumpoka nkungulandi wo kunkanyalela jo mwene mmuti. ³¹ Vakantanile, vandímula ailá ikanju yanauvi kungwadya dinguvo dyake kumuukanavo nankamela panshalaba.

Kukamalalegwa kumwe Yesu

Malukushi 15:21-32; Lukashi 23:26-43; Nshuwau 19:16-27

³² Napanelo pavashuma nkaja mo vanínkodya munu jumo wa ku Shilene walina Simoni, vanavo kutwala kumuungila alitike nshalaba umwe Yesu. ³³ Vakawika palyutu lyavashema Gologota, yani lyutu lyashivanga, ³⁴ vanavo kumupa ugwalwa wavinyu wawanganiéngé na shinu shakukalala nae akalinge andíta kukumbila. ³⁵ Vakankamela panshalaba kutwala dinguvo dyake kujavananga kwaindila yakujalanga gudugudu ^{††36} na vâikalenge popo vashinannaledya. ³⁷ Napanelo pamuti pake vandíkamela shibau shavaandike nkanidyo umwámba nae doni, "Aju *YESU, UMU WAVAYUDA.*" ³⁸ Popo po, vandívakamela vakwiva vavili pamo namu nae, jumo kunkanakono junji kunshanda.

³⁹ Bai vanu váshipita apo vashindamwabalanga Yesu akuno vapukunianga myuti ^{‡40} vaashidoni, "Wako ún-abamola ing'ande ya Nnungu na kudenga kwamaduva matatu, bai liposhe gwegwe umwene! Shuluka panshalaba po ukava umwanangwe Nnungu!" ⁴¹ Na yada-vo vanang'olo vavakulungalalela-shadaka pamo na vamwalimu vadishaliya na vanang'olo vashinanniulan-ga vaashidoni, ⁴² "Vanji andivaposha kanji kuliposha mwene hanaulula shinu. Ashii aju, Umu wa ku Ishilaeli! Bai ashuluke ambi popa panshalaba po pakulota tunkulupile. ⁴³ Aju apa ashinankulupila Nnungu bai Nnungu jo aide amposhe ikava kenga ankunnag-waledya ^{‡†} mwaa ashishidoni, 'Nangu nimwanagwe Nnungu.' " ⁴⁴ Nimumo momo vakwiva avalá wavakamadíle pamo namu nae navanavo vashinanniulanga.

Kupela kumwe Yesu

Malukushi 15:33-41; Lukashi 23:44-49; Nshuwau 19:28-30

⁴⁵ Napanelo kutunduvangila wakati wasasita mpaka satisa shilambo uti shindida shii. ⁴⁶ Paiwikile satisa, Yesu kukugwa pashanya po aashidoni, "Eloi, Eloi, lama sabakitani?" yani "Nnungu wangu, Nnungu wangu, mwaa shani uningwambukanga?" ^{‡‡47} Bai pakati pavanu ve vapagwíte apo vanji vo pavaigwite, vanavo kushidoni, "Anshema Liyashi ajo." ⁴⁸ Munu jumo pakati pave kutukutinneu ndatwala shipande shaivonu kushuvika muulimu, kupambya munkungulandi kuka ndamupa Yesu akumbile. ⁴⁹ Vanu vanji kushidoni, "Nneke! Leka tulole ikava kenga Liyashi jo andaida namposha."

†† *Lola Dimu 22:18. Maandiko anji ankushidoni, a ...vandijalanga gudugudu pakulota liwikile popo lilove lyatangwele nkúlava doni, "Vandijavananga dinguvo dyangu namomo vandijalanga gudugudu kwamwaa wadinguvo dyangu."* ‡ *Lola Dimu 22:7; 109:25.* ‡† *Lola Dimu 22:8.* ‡‡ *Lola Dimu 22:1.*

⁵⁰ Bai Yesu andikugwa kavili pashanya po kutwala kujaa imumu. ⁵¹ Mwe! Inguvo ailá yamwing'ande ya Nnungu kupapuka kuma kushanya mpaka mwina, † shilambo kundangenda na majanga kutumbukanga. ⁵² Vyonga kushimukanga, mili vyo vyavakwilimyanga vpadíle, kudyuka. ⁵³ Vanavo pavaumanenge muvyonga ling'oto lyakudyuka Yesu, vandíinjila munjini wakwilimyanga vanu voe kutwala kuvona. ⁵⁴ Napane nang'olo wavaing'ondo pamo na avalá vavénavo vashinshunga Yesu, pavagwene shilambo shindangenda na vinu vinji vishitandeka, vanavo kujopa kutwala kushidoni, "Munu aju mwiu avele mwanagwe Nnungu." ⁵⁵ Popo po vandíimilanga vakongwe voe kwakushu valola, vakongwe avo ni vovo ve vamwodíle Yesu kuma ku Galileya vapita vantumika. ⁵⁶ Pakati pavakongwe avo, andipagwa Maliya wa ku Magadale-na, Maliya anyoke Tiyagu namu Yoshe na kupagwa jugwawe vanavake Shebedeu.

Kunshika kumwe Yesu

Malukushi 15:42-47; Lukashi 23:50-56; Nshuwau 19:38-42

⁵⁷ Napanelo paiwikile yalyulo kuwika munu jumo ntajili wa ku Alimateya walina Yoshe, nanae ashiva nkwóda wake Yesu. ⁵⁸ Bai nae andyúka kumwe Pilatu ndajugwa mili wake Yesu, Pilatu kulamilila vamupe. ⁵⁹ Nae kutwala mili aulá kukulunganga mwinguvo yakutakata yakunamikanga ⁶⁰ kuka ndashika mushonga shake shaambi shatumidídye vapeakeye mulijanga. Nae kwingiliya lijanga likumene kudiva pannango, mwene kuka. ⁶¹ Po pashonga po, andíikala Maliya wa ku Magadale-na namu aijá Maliya junji.

Vakulaledya shonga

⁶² Napanelo palyamba lyake, yani liduva lyakupumula, †† vanang'olo vavakulangalalela-shadaka pamo na mapalishayo, vandímuukila Pilatu ⁶³ ndamwaulila kushidoni, "Nang'olo, wetu tunkukumbukila doni aijá munu nshwang'a ávele mumi ashishidoni, 'Akapita maduva matatu, nangu ndadyuka.' ⁶⁴ Napavedoni lamulila vashunge namene shonga shake mpaka muliduva lyantatu pakulota vakwoda vake havanaide ndamwiva shilo kutwala kuvaulila venentete doni, 'Andidyuka pakati pavakupela.' Nadoni kushang'apa aku kulota kuva kwakumamodya kupunda kutandi." ⁶⁵ Pilatu kutwala kushidoni, "Munkuvanavo vaing'ondo, wena mukashunge mwamuululila mmene." ⁶⁶ Bai vanavo vandyúka ndashunga shonga sho kwaindila yakuvika shimanyikilo palijanga po na kuvavika vakulaledya.

Kudyuka kumwe Yesu

Malukushi 16:1-8; Lukashi 24:1-12; Nshuwau 20:1-10

28 Napanelo likapite liduva lyakupumula, palishi-tunduvanga liduva litandi Iyaishumana, Maliya wa ku Magadale-na namu Maliyamwagwe vandyúka

† Inguvo ayo ishiinikidya lyutu lyakwilimyanga. Ikapapuke, inding'a litala lyakuwika vanu mulyutu alyo. †† Mushigalegu: a ...yani liduva ling'oto lyaliduva lyakulipanganianga...

ndalola shonga. ² Mwe! Kwashingangala kuumilila shindangenda shakujowa, kuwa ko kwaloka njelo wake *UMU* kwida ndagang'ola lijanga kutwala kwikalila. ³ Njelo jojo jo, avele wakumalameta, dinguvo dyake divele dyakushwalela kenga lila. ⁴ Vaing'ondo vashishunga shonga sho vandítatamela kwamwaa wakujopa mpaka kwaneka kenga vandipalanga. ⁵ Napane njelo jo kuvaulila vakongwe vo kushidoni, "Hamunajope! Nangu ndimanya kenga mwenu munnambela Yesu wavankamadile panshalaba. ⁶ Nae apa hapali. Andidyuka kwodana na kenga mo mwatangaladíle. Ida mulole davo palyutu lyaléle. ⁷ Wena shipajelo mukavaulile vakwoda vake doni, nae po andidyuka pakati pavakupela. Nadoni ankuka alangalela ku Galileya, koko ko mwenu mundamwona. Lola, nangu apa nimmanyi ya tayali."

⁸ Vakongwe avalá vakaumananga shipajelo shosho vatukuta akuno vavenavo kujopa na lipuwilo likumene, vandyúka ndavamanyiya vakwoda vake. ⁹ Kwashingangala Yesu kuvaumililila kutwala kushidoni, "Mmangumi!" Vanavo kumuukila, kumwambatila mmadodo mwake kutwala kulipudya. ¹⁰ Bai Yesu andívaulila kushidoni, "Hamunajope! Wena mukavaulile vanung'unuvangu vauke ku Galileya, koko ko vanangwona."

Dyabali dyavakulaledya

¹¹ Vakongwe vauka, mwe! Vaing'ondo vanji vashishunga shonga vandyúka kuka kukaja ndavavalangangila vanang'olo vavakulangalalela-shadaka vinu uti vitandéke. ¹² Napane vanang'olo vavakulangalalela-shadaka vo pavaikele nguguvale pamo na vanang'olo vandyúnganila kuvapa vaing'ondo njuluku woe kutwala kuvalaililila doni, ¹³ "Mwenu valanganga doni, 'Shilo wetu tulele lwono, vandída vakwoda vake ndaiva mili.' ¹⁴ Napanelo ing'ano ai ikawika kwanang'olo walijimbo, wetu tunantumbilikanga kwambangidya mwenu hamunapate shaushanga." ¹⁵ Vanavo vakapwashalela njuluku kutwala kutandedya kenga momo mwavapakanidile. Bai lilove alyo kutwala kwandavala pakati pavayuda uti mpaka nelo.

Malailililo amwisho

Malukushi 16:14-18; Lukashi 24:44-49; Nshuwau 20:19-23; Vitendo 1:6-8

¹⁶ Napanelo vakwoda vake Yesu kumi na moja vandyúka ku Galileya mpaka ndawika kulishinga lyavalatadíle Yesu. ¹⁷ Vanavo vakamwone, vandílipudya ila vanji pakati pave po, vashindamwambambidya. ¹⁸ Yesu kutwala kuvavandika kuvaulila kushidoni, "Vaningukamudya madalaka uti kuwa na pai. ¹⁹ Napavedoni wena mukavatadye vanu vave vakwoda vangu muvenentete uti muvabatisha palina Iya Tata, Iya Mwana na Iya Imumu Wanashwe ²⁰ na muvapundisha kutandedya uti avilá vyaninnamulidile. Nadoni nangu ninkupagwa namu mwenu mumaduva uti mpaka mwisho wawakati."

Malukushi

Nshuwau Wakubatisha ankukandyanga indila

Mateu 3:1-2; Lukashi 3:1-7; Nshuwau 1:26-27

1 Shitunduvangilo shantenga wambone um-malangánga Yesu Klistu Mwana wa Nnungu.
² Kwodana na avilá vyandikíke mulibuku lyake nkúla-va Ishaiya,
 “Wako, mushu mwako ninkuntumidya múntenga wangu,
 nae andakukandyangidya indila yako.” †
³ “Lidi linkwigwinika kushimbweshe liishidoni,
 ‘Kandyanga indila yake *UMU*
 aalowa mwalota kupita.’ ” ††
⁴ Nadoni andyúmilila Nshuwau na andípagwa avapa vanu ubatisho kushimbweshe alaililila ubatisho wakulijugulanga kwakulivalivigwa kwamadambi.
⁵ Vashindamuukila vanu vakuma mudisemu uti dya ku Yudeya pamo na vanu uti va pa Yelusalemu, vashindapata ubatisho kwake nae kulundi lwa Yudani vali- jugulanga madambi ave. ⁶ Nae ashigwala dinguvo dyavakandyenge na magwimbu angamila, ashilyunga nkanda waligwogwe lyangandolo, shakulya shake shishiva madalombwe na ushi wakunundu ⁷ na ashindaalanganga ntenga wakushidoni, “Kunyuma kwangu nangu, ankwida munu walyululilo lyoe kungupunda nangu; ata pakulota ngutepe nimulange vilatu vyake, hanguvaikidile ata padyoko vela. ⁸ Nangu ninkumbatisha mwenu na medi; nae po, anambatisha na Imumu Wanashwe.”

Kubatishwa kumwe Yesu

Mateu 3:13-17; Lukashi 3:21-22

⁹ Napanelo mumaduva lolo lo, Yesu andyúma pa Nashaleti, akulá ku Galileya kwida ndabatishwa namu Nshuwau mu Yudani. ¹⁰ Bai Yesu paumile mmedi amulá kwona kuwa kujavanwike na anshulukila Imumu wakuva kenga ng'unda ¹¹ kutwala kuwa kwigwinika lidi litédoni, “Wako ni umwanangu wanikunagwaledya, gwegwe unkwidanavo lipuwilo kwangu.”

Shatwani ankunninga Yesu

Mateu 4:1-11; Lukashi 4:1-13

¹² Bai napanelo Imumu kuntwala Yesu kumuukanavo kushimbweshe; ¹³ koko ko kwikala maduva alubaini atubigwa namu Shatwani anama pamo na vanyama vakunundu kutwala vanjelo kutunduvanga kuntumiki- la.

Yesu ankutunduvanga shimadengo shake

Mateu 4:12-17; Lukashi 4:14-15

¹⁴ Napanelo muwakati aulá waungwidyé Nshuwau Yesu andyúja kuka ku Galileya apita avalanganga ntenga wambone wa Nnungu ¹⁵ aashidoni, “Undiwika wakati, utawala wa Nnungu undivandika nadoni li- jugulange madambi enu na kulupila ntenga wambone wa Nnungu.”

Yesu ankuvashema vakwoda vatandi

Mateu 4:18-22; Lukashi 5:1-11

¹⁶ Bai Yesu apita awanawananga nanyenje litanda lya Galileya amulá anímwona Simoni avele namu nkulumunu ‡ Andaleya vateja dingau mmedi mwaa vovo vo shimadengo shave shivele shakwaka dyomba. ¹⁷ Napanelo nae kuvaulila, “Ngwoda nangu pakulota nangu nintende muve mmanu mmakuvaka vanu.” ¹⁸ Bai vanavo kuleka dingau dyave kutwala kumwoda. ¹⁹ Paumile apo, mushu mwake kunkodya Tiyagu mwanagwe Shebedeu avele pamo na nung'unumunu †† Nshuwau vatataliyanga dingau dyave mwingalava. ²⁰ Bai kuvashema vanavo kutwala kumwoda kunneka tatagwave pamo na vamadengo vashibalugwa amulá mwingalava.

Yesu ankukumulanga majini

Lukashi 4:31-37

²¹ Napanelo Yesu pamo namu vanavo vandyúka mpaka pa Kapalanaumu. Muliduva lyakupumula, bai Yesu kuka kushitala shakulipudidya ndapundisha ²² kutwala vanu kushanga mapundisho ake mwaa ashindavapundisha kenga munu ávenavo madalaka i kenga vamwalimu vadishaliya. ²³ Bai apalá pashitala kwaneka munu e avénavo lijini nshapu; jojo jo kutwala kukugwa pashanya po, ²⁴ “Wako Yesu wa ku Nashaleti, da wetu namu wako shako nyamani? Widilé ndatumalidya? Nangu ndikumanya, wako ni wakwilimyanga wake Nnungu.” ²⁵ Yesu kunshulanga aashidoni, “Malala na uma mumili mwamunu mo!” ²⁶ Mwiu lijini nshapu aijá kungang'ola munu jo na akuno akugwa pashanya po kutwala kuma mumili mo kuka. ²⁷ Vanu uti ni kushanga doni na kutunduvanga kuudyania vaashidoni, “Da shinu ashi nyamani? Mapundisho aambi! Mapundisho avénavo madalaka! Mpaka nae ata majini mashapu ankulamulilila kutwala anavo

‡ Hainamanyika shinu kenga Andaleya avele nang'olo kwali ndyoko. †† Hainamanyika shinu kenga Nshuwau avele nang'olo kwali ndyoko.

† Lola Malakiya 3:1. †† Lola Ishaiya 40:3.

kumwigwilila.”²⁸ Bai shimbili shake kuumanginneu kwisemu uti ya ku Galileya.

Yesu ankuvaponia vanu voe

Mateu 8:14-17; Lukashi 4:38-41

²⁹ Napanelo vakaumanange mushitala amulá, Yesu aníntwala Tiyagu namu Nshuwau kuka mpaka paing'ande yashiikala Simoni na nkulumunu Andaleya. ³⁰ Popo nkwegwe Simoni andílala avele nnwele kutwala vanavo bai kummanyiya Yesu ing'ano ayo. ³¹ Nae kumuukila aijá nnwele kunkamula nkono, kunktatuwa, nnwele jo kupona kutwala kutunduvanga kuvatumikila.

³² Napanelo muwakati wayalyulo liduva lidimbile, vanu vandívaukanavo kumwe Yesu valwele uti na vanu vamajini. ³³ Likaja alyo uti vanu kuka naumbalanila paing'ande apo ³⁴ kutwala nae kuvaponia valwele voe vavilwele vyakuvilingananga na majini kukumulanga; majini lo kuleya hanatangole mwaa anavo ashinamanyanya shalowa.

Yesu ankuvalanganga ntenga ku Galileya

Lukashi 4:42-44

³⁵ Napanelo palyamba lyake, linyeiku, Yesu andítakatuka kuma kuka kulyutu lyakwagweka; koko ko nae ashindashwali ³⁶ kutwala Simoni pamo na vavagwe kupita vannambela. ³⁷ Vakankodye, vanavo kumwaulila doni, “Vanu vankukulambela akulá!” ³⁸ Yesu kushidoni, “Tuke kunji kumakaja ashitanono pakulota nakwanavo ndikavalanganga ntenga mwaa ashi ni shingutadíye ngwide.” ³⁹ Yesu kutwala kupita mumakaja uti a ku Galileya avalanganga ntenga muvitata vyave vyakulipudíya na akumulanga majini.

Yesu ankumwaladyanga wamangundula

Mateu 8:1-4; Lukashi 5:12-16

⁴⁰ Napanelo Yesu andímwidila munu jumo ávenavo malemba mumili, jojo jo kutwala kunguguvalila kunjugwangila kushidoni, “Ukalota, unkuulula kungutadya ngutakate.” ⁴¹ Nae andímwanangila shididi shoe namene na andínyalodya nkono wake kutwala kunkwaa kumwaulila doni, “Elo ndilota, takata!” ⁴² Bai munu jo malemba kunnambalakanga kutwala nae jo kutakata. ⁴³ Yesu kunkumulanga na kunneya namene uti ⁴⁴ kushidoni, “Wako, ngwigwa shana, hashinapagwe shakuvalanganga kwamunu ila wena ukalilodye kwankúlangalalela-shadaka ukaumye kwakuushani-angigwa kwako ushupu kenga mo mwalamulidile Musha pakulota uve ushuda kwavanavo.” ⁴⁵ Munu aijá kanji paumile apalá ni kupita avalanganga na aadadya vinu uti vintandéke mpaka kuntadya Yesu mene kuulula kuka mushu ainjila ngala mumakaja; nae kuva munu wakwikala kushimbweshe na koko ko vanu vammakaja uti vashindamuukila nae.

Yesu ankumponia wakudidimanga madodo

Mateu 9:1-8; Lukashi 5:17-26

² Napanelo akapite maduva apitile, Yesu andyúja kuka ndainjila kavili pa Kapalanaumu na andímanyika doni andiwika paing'ande. ² Vanu voe vandyúmbalanila paing'ande po ata pakushunila mata mene kwaneka na nae ashindavavangangila ntenga wa Nnungu. ³ Popo po kuwika vanu nsheshe vanyukete munu adidiméngé madodo. ⁴ Ikavakamadyangidye kummandika Yesu mwaa wakuumbalanila vanu, vandíkwela pashanya ing'ande kubamola ulungu shalototo namu pavéle Yesu kutwala kupata lilanga lyakupalaedya nng'ande ligadolo lyaléle munu ajo. ⁵ Bai Yesu pavagwene vanu avo kuvanavo likulupililo, andímwaulila wakudidimanga madodo jo kushidoni, “Mwanangu, madambi ako andilivalivika.” ⁶ Napanelo mulyutu lyolyo vandíikalanga vamwalimu vadishaliya vatangadikanga shintimatima kushidoni, ⁷ “Da munu aju mwaa shani ankutangola davo? Aju ankukupulu! Ánaulula kulivaliva madambi ni gweka Nnungu bai.” ⁸ Yesu muntima mwake andímanya ashilá shavashitangadikanga vanavo nadoni andívaudya, “Mwaa shani mwenu munkuvanavo matangadikilo alo mmitima myenu? ⁹ Munu aju shakwashi shamwona kuva shíkakamadyanga kumwaulila? Ni kumwaulila doni, ‘Madambi ako andilivalivika’ kwali kumwaulila doni, ‘Takatuka utwale ligadolo uwene?’ ¹⁰ Bai pakulota mumanye doni Mwana Wamunu ankuvanavo mushilambo amu madalaka akulivaliva madambi,” andímwaulila wakudidimanga madodo jo, ¹¹ “Ninkukwaulila wako apa doni, takatuka, twala ligadolo lyako na wena kwing'ande kwako.” ¹² Bai nae kutakatuka kutwala ligadolo lyake kuma vanu uti vamwona kutwala vovo vo kushanga na kumupa lishange-lo Nnungu vaashidoni, “Wetu shinu ashi, mwiko hatunava kwona.”

Kushamegwa kumwe Lawi

Mateu 9:9-13; Lukashi 5:27-32

¹³ Yesu akauke kavili nanyenje litanda, imbumba yavanu indímuukila koko na nae ashindavapundisha. ¹⁴ Pashipita awena, andímwona Lawi mwanagwe Alupeu àikele nshitala shaukodi kutwala Yesu kushidoni, “Ngwoda!” Nae kutakatuka kumwoda. ¹⁵ Napanelo Yesu andíikala alya shakulya paing'ande imwe Lawi pamo na vakukatisha-ukodi, vakutega pamo na vakwoda vake; popo po vandyúmbalanila mwaa vashindamwoda vanu voe. ¹⁶ Napanelo pakati pavamwalimu vadishaliya vamapalishayo, vakamanye doni nae ankulyanavo vakutega pamo na vakukatisha-ukodi, vandívaudya vakwoda vake kushidoni, “Mwaa shani nae alyanavo vakukatisha-ukodi pamo na vakutega?” ¹⁷ Bai Yesu akaigwe malove alo, andíva-jang'ula vamwalimu vo kushidoni, “Munu mumi hanannambela nkúlauula, ánannambela ava nnwele. Nangu apa hangwidile ndavashema vaishaliya, ngwidilé ndavashema vakutega.”

† *Lola Valawi 14:1-32.*

Ing'ano yakunga

Mateu 9:14-17; Lukashi 5:33-39

¹⁸ Napanelo vakwoda vake Nshuwau namu mapalishayo vâungile, vanu vandyúka ndamudya Yesu, "Mwaa shani vakwoda vake Nshuwau pamo na vama-palishayo vankunga, vakwoda vako wako havanaunga shinu?" ¹⁹ Nae kushidoni, "Da inkuululika vambodi valalikígwe pashitamo kunga mwene nkúlomba àpag-wite popo? Muwakati nkúlomba àpagwite namu vana-vo hainaululika shinu kunga. ²⁰ Undawika wakati, wakati wavalota kumumya nkúlomba pakati pave; ni wakati au wavalota vanavo kunga. ²¹ Hapali munu ánatwala shipande shainguvo yaambi kutenda shiv-amba mwinguvo yakala; ukatenda davo shivamba sho shindalikukutika kutwala inguvo yakala yo ku-mamodya kupapuka. ²² Namomo hapali ánataa ugwal-wa wavyepo waambi muvitumba vyamagwogwe vyakala; ukatenda davo, ugwalwa pawaa po, unda-papulanga vitumba kutwala ugwalwa kujaikanga na vi-tumba vyo, kwanangeka. Vatwala ugwalwa waambi kutaa muvitumba vyambi."

Kwaliduva lyakupumula Yesu ni UMU

Mateu 12:1-8; Lukashi 6:1-5

²³ Napanelo muliduva limo lyakupumula Yesu apita mulyala limo lyangano vakwoda vake mwavashipita, vashindatamanga mai angano kuting'inda kumamena. ²⁴ Kutwala mapalishayo kumudya, "Wako, mwaa shani vakwoda vako vankutenda shinu shilaéka na lilamulo kutenda muliduva lyakupumula?" ²⁵ Nae kushidoni, "Da hamunava kushomya vyatandile Umu Daudi muwakati washangile na wainkodile indala nae pamo na avalá vavénavo? ²⁶ Bai mumaduva áshikola madengo Abiyatali nkúlangalalela-shadaka nkumene, Daudi andiinjala mwing'ande ya Nnungu kutwala magung'u ashadaka shakumupa Nnungu kulya; magung'u áshilaeka na lilamulo kulya munu vila, avashilya gweka bai vakulangalalela-shadaka. Kanji nae andílya, tuleke apo anji andívapa vavagwe." ²⁷ Kutwala kavili kushidoni, "Munu hakandyangigwe kwamwaa waliduva lyakupumula, liduva lyakupumula ni likandyangigwe kwamwaa wamunu. ²⁸ Napavedoni Mwana Wamunu nae ni UMU ata mpaka muliduva lyakupumula."

Yesu ankumponia wakudidimanga nkono

Mateu 12:9-14; Lukashi 6:6-11

3 Napanelo Yesu andiinjala kavili mushitala shakulipudidya na momo mo andípagwa munu jumo wakudidimanga nkono. ² Mo mushitala mo, vashinnaledya namene valota vamwone ikava kenga anamponia munu ajo muliduva lyakupumula pakulota vapate nkanidyo wakunkashalidya. ³ Bai Yesu andímwaulila munu wakudidimanga nkono jo kushidoni, "Imila shing'ati ashi!" ⁴ Kutwala kuvaudya kushidoni, "Da muliduva lyakupumula lilamulo linkutuleka tutandedye vyambone kwali vyakunyata? Kuposha shingumi kwali kumalidya?" Vanavo kumalalanga do,

vii! ⁵ Akavalole vanu uti vantang'anadídye avalá kwashitundi akuno àvenavo shipalodi shoe kwamwaa wakunanopa mitima vyave, nae kumwaulila munu jo doni, "Nyalodya nkono wako!" Nae kunyalodya kutwala nkono kuujila kuva ungumi. ⁶ Bai mapalishayo vandyúmananga kuka ndalyunganianga namu vashipinga shimwe Elode kumulya shemba Yesu valambela dindila dyakummalididya.

Imbumba yoe inkumwoda Yesu

⁷ Napanelo Yesu andínyema pamo na vakwoda vake kuka kulitanda na imbumba yavagalileya indímwoda koko pamo na ⁸ vanu voe vakwaloka ku Yudeya, ku Yelusalemu, ku Idumeya, vakwalakela nkono unji wa Yudani na nanyenje likaja lya Tilu namu Shidoni; kumwoda mwaa wakwigwinikanga vinu uti vyashitenda nae. ⁹ Kwamwaa wakuumbalanila vanu, Yesu kuvaulila vakwoda vake vampanganangidye ingalava pakulota vanu vo havananshinye ¹⁰ mwaa akavaponie vanu voe valwele vanji vashindagang'alananga vakanyilidya avakwae. ¹¹ Vanu vamajini mashapu ngwengwe pavashimwona Yesu, majini lo ashindangugualila kutwala kukugwa pashanya po aashidoni, "Wako Umwana wa Nnungu." ¹² Kanji Yesu ashindashulanga namene majini pakulota hanamwaulange ngala.

Vamyombe kumi na mbili

Mateu 10:1-4; Lukashi 6:12-16

¹³ Napanelo Yesu andíkwele palishinga limo kutwala kuvashema vanu vavalatile mwene, vanavo kumwidila. ¹⁴ Nae kuvatandola kumi na mbili vovo vo kuvavika kuva vamyombe pakulota vapagwe namu nae na avatume vapite vavalanganga ntenga wa Nnungu ¹⁵ na vavenavo madalaka akukumulangila majini. ¹⁶ Vanu kumi na mbili avo vavele ava: Simoni wampéle nae lina linji lya Patulu ¹⁷ kwatika Tiyagu na nkulumunu Nshuwau vanavake Shebedeu vavapéle nae lina linji lya Bowanelisheshi yani vanaing'uva ¹⁸ kwida Andaleya, Pilipo, Balutolomeu, Mateu, Tome, kwatika Tiyagu mwanagwe Alupeu kwida Tadeu ndaida Simoni wa ku Kanaa ¹⁹ kumalilila Yudashi Shikaliyote jojo ánimidye Yesu.

Vakwave vankumwona Yesu kupungukanga

²⁰ Napanelo Yesu andiinjala nng'ande mwake kutwala kuumbalanila kavili imbumba yavanu mpaka popo Yesu na vakwoda vake ata litala lyakulyela shinu mene kuvapagwidya. ²¹ Valikola vake pavaigwite vandímuukila vakankamule vamuukenavo kukaja mwaa vashitangola doni, "Nae andipungukanga."

Kukupulu

Mateu 12:22-32; Lukashi 11:14-23; 12:10

²² Vamwalimu vadishaliya vaalakadile ku Yelusalemu vashindatangola doni, "Munu aju anintawala Beelishbuli; jojo ankukumulanga majini kwalilamulo limwe jo nang'olo wave majini jo, Beelishbuli." ²³ Napavedoni

Yesu andíwashema kutwala kutangonavo kwamikong'o aashidoni, "Iloa kuululika dashi Shatwani kulikumulanga jo mwene? ²⁴ Utawala woewoe ukalijavanienge kutwala kubyaananga shivenevene, utawala awo hamunapagwe munji ni kutimbikanga tu bai.

²⁵ Vanalikola vakalijavanienge kutwala kutandana ing'ondo shivenevene, likola alyo hamunapagwe munji ni kutimbikanga tu bai. ²⁶ Napavedoni Shatwani akalijavanienge kutwala kulitenda ing'ondo jo mwene, nae hamunampagwidye mwakuka mushu apagwa, akanditimbikanga. ²⁷ I mwanavo! Da apali munu wakwinjila gwamba nng'ande mwamunu wadimongo pakulota kwiva mali ake? Mene, shitandi antuntula dimbuu mwene jo kutwala kukunga uti vyanng'ande.

²⁸ Ninkumwaulila mwiu uti doni, vanu vandalivalivigwa madambi ave pamo na kukupulu kwave uti ²⁹ kanji munu álota kunkupulu Imumu Wanashwe halivalivigwa, nae andavanavo likosha lyashimadambi shíkamalilika." ³⁰ Bai Yesu andítangola davo mwaa vashitangola doni, "Munu aju ankuvanavo lijini nshapu."

Jujumunu na vanung'unuvake Yesu

Mateu 12:46-50; Lukashi 8:19-21

³¹ Napanelo anyoke pamo na vanung'unuvake vandiwika mulyutu alyo; vavele po panda po vandítuma vavashamele. ³² Mo nng'ande mo, vandíikalanga vanu voe vantang'anedidye kutwala vanu kumwaulila doni, "Nang'olo, anyoko, vanung'unuvako pamo na valumbuvako vapali panda po, vandákulota." ³³ Nae kuvaudya, "Ajala na vanung'unuvangu ni vakwashi?" ³⁴ Bai akavalole vanu vantang'anedidye nae kushidoni, "Mwenu, ajala na vanung'unuvangu ni ava vavéle apa ³⁵ mwaa munu woewoe átenda mwalatela Nnungu, munu aju ankwitika kuva mwanetu, numbwangu na ni ajala."

Nkong'o waulongo wakuvingananga

Mateu 13:1-9; Lukashi 8:4-8

4 Napanelo mumwanda unji kavili Yesu andítunduvanga kupundisha ávele nanyenje litanda. Popo po, imbumba ing'umene yavanu iníntang'anedyá mpaka kuntadya nae kukwela mwingalava kwikala kunyamela padyoko kumedi kuleka imbumba yavanu ivele kumwangu. ² Nae ashindavapundisha vinu vyoe kwadindila dyamikong'o kenga avi, ³ "Tela matu mwigwe! Nkúluma jumo andyúka ndamwadilila imbeju yake yaulende. ⁴ Pashimwadilila, kupagwa igwilidile nanyenje indila kutwala vyuni kwida ndadadalanga. ⁵ Inji kugwilila paulongo wapashanya lijanga lyakulitandika kutwala kumalenneu mwaa ulongo wo hauvéle woe. ⁶ Likakamele liduva nandi wo kunyala kutwala kujuma mwaa dinyija hadilitavalakadíle. ⁷ Inji kavili kugwilila paulongo wanashilanga, paimadile nanae nashilanga akamele nandi wo kubyaika kutwala mene kupa vyepo. ⁸ Napanelo imbeju inji kugwilila paulongo walutuba, yanavo yo kukonda kukulumuka

† a Beelishbulini lina linji limwe a Shatwani.

kutwala kupa vyepo, lipata limo salasini, linji sitini na linji lyo miya."

⁹ Kutwala kavili kuvaulila doni, "Munu akavanavo matu akwigwidya, aigwe!"

Mana amikong'o

Mateu 13:10-23; Lukashi 8:9-15

¹⁰ Napanelo Yesu ávele gweka yake, vakwoda pamo na avalá kumi na mbili vandímuudyangidya mana amikong'o avyo. ¹¹ Nae kushidoni, "Mwenu apa vanintadya mumanye vipii vyautawala wa Nnungu, vanu vanji vákapagwite nkati, vanavo kula lilove linkuvaidila kwamikong'o ¹² pakulota

"Valola avi, vandona kanji havaanalela, vaigwa avi, vandaigwa kanji havamanya shaambíka Leka ikave davo vakandishiliuka kutwala kulivalivigwa madambi ave." †

¹³ Kutwala Yesu kuvaudya, "Da mwenu hamunamanya shinu mana ankong'o au? Ikava davo po mulota kumanya dashi mana amikong'o vinji uti? ¹⁴ Bai nkúluma, apanda lilove lya Nnungu. ¹⁵ Imbeju kugwilila nanyenje indila, vankuva vanu vapwashaléla lilove lipandígwa; vanavo muwakati wowo wavaigwa lilove, Shatwani kwidinneu ndaukula lilove lyavapandile mmitima myave. ¹⁶ Namomo imbeju kugwilila paulongo wapashanya lijanga lyakulitandika, vankuva vanu vaigwilíla lilove lya Nnungu kutwala kupwashalenneu na lipuwilo ¹⁷ kanji kwamwaa úkave wakuvanavo dinyija, lilove lyo lipagwa muwakati padyoko mwaa vikavakodya vyamapipili kwali kupapatigwa kwamwaa walilove, vanavo vandájaika. ¹⁸ Vanji ni vapandígwa munashilanga. Vanavo ni avalá vaigwilíla lilove ¹⁹ kanji mangaikangilo awakati au, lung'unuku lwamali na lwavinu vinji, avyo vindáinjila ndashinya lilove mpaka kutadya mene kupa vyepo. ²⁰ Napanelo imbeju kugwilila paulongo walutuba, vankuva vanu vaigwilíla lilove kupwashalela kutwala kupa vyepo salasini, sitini na miya."

Nkong'o waitaa

Lukashi 8:16-18

²¹ Yesu kutwala kuvaudya doni, "Da itaa vanákaledya kutwala likalala kwinikeya kwali kuukanavo mulyungu igoli ndavika? Mene! Vakaledya pakulota vavike pashinu pakwaneka. ²² Hashipali shinu shashipii shíkavele shakulota kwaulika na hashipali shinu shilipiidyé shíkavele shakulota kuumilila kulangele. ²³ Munu akavanavo matu akwigwidya, aigwe."

²⁴ Kutwala kuvaulila doni, "Vikila kuntima vinu vyamwigwa avi! Shipimo shosho shamulalyangidya mwenu vinu vyamwigwa, namwenu shipimo shosho vanannalyangidya na yadavo vanamwanjadyedya ²⁵ mwaa munu ávenavo vanamwanjadyedya na aijá ákavenavo ata sho shavenavo sho, vanampoka."

† Lola Ishaiya 6:9-10.

Nkong'o waimbeju mwaikulumukila

Mateu 13:31-32, 34; Lukashi 13:18-19

²⁶ Yesu kavili kushidoni, "Utawala wa Nnungu un-kulinganana na kenga munu panamwadihila imbeju muulongo; ²⁷ mui kwali shilo kulala kwali kutakatuka imbeju ako kumela na kukulumuka. Mwavitandakela mwene bila kumanya ²⁸ mwaa wo wene ulongo wo ni útandedya vinu vipe; shinantandi kwipukila mamba kwatika mai kutwala mai lo kutandeka. ²⁹ Po pavitandakanga po, munu jo atwalinneu shipula shake shake kupita aenga mwaa wakati wamapuno undiwika."

³⁰ Kutwala kavili kushidoni, "Utawala wa Nnungu tulandaniange na nyamani kwali tutumile nkong'o shani pakulota tuvalangange shana? ³¹ Uvelé kenga imbeju yanshupi; pavapanda idikidiki kupunda dimbeju uti dipandika muulongo ³² kanji vakapanda yanavo kumela kukulumuka kutwala kuva nnandi ukumene kupunda milandi vinji kulijava dinavi shana na vyuni vyakunia-
nia kudenga vyanda vyave mulyuku mo."

³³ Bai nae atumila mikong'o vyoe kenga avyo ashindapundisha lilove lya Nnungu kwodana na mo mwavashuululila kwigwilila. ³⁴ Hashitangola na vanu bila kutumila mikong'o kanji pashipagwa na vakwoda vake gweka uti ashindavavangangila mana ake.

Yesu ankumaladya shimbunga

Mateu 8:23-27; Lukashi 8:22-25

³⁵ Napanelo muliduva lyolyo liduva lyenda kukudimba Yesu andívaulila vakwoda vake kushidoni, "Twamboke tuke litanda nkono unji." ³⁶ Vanavo kuleka dimbumba dyavanu popo kuka ndainjila mwingalava yavéle Yesu kumuukanavo; namomo dingalava dinji dinímpalakela. ³⁷ Bai mo mulitanda ni kulipuka shimbunga, napanelo mawimbi ankwinjila mwingalava na medi mwingalava mo kuumbala. ³⁸ Yesu avele kunyuma ingalava andílala lwono àijamidile litandiko lyakumuti. Bai vanavo kumwimulanga kutwala kushidoni, "Mwalimu, da kupela aku kwatupalanga tuvanu, hanajugulanga shinu?" ³⁹ Nae akatakataka kushulanga shimbunga na kutangalela litanda lya kushidoni, "Limaladye! Haunapikitange!" Imepo kumalala kutwala pashinu po kumalalika do, kimyaa! ⁴⁰ Nae kuvaudya vakwoda vake kushidoni, "Mwaa shani mwenu munkujopa namene? Da hamunava kuvanavo likulupililo?" ⁴¹ Bai vanavo vandíjopa doni kutwala kuudyania shivenevene vaashidoni, "Da aju nyani átenda ata mpaka imepo na litanda kumwigwilila?"

Yesu ankumponia munu wamajini

Mateu 8:28-34; Lukashi 8:26-39

5 Bai vanavo vakaamboka vakawika litanda nkono unji lijimbo lyavagelasha. ² Napanelo Yesu pashulwike mwingalava, kumakabuli ko kwalakenneu munu jumo walijini nshapu kumwidila. ³ Nae ashinama ko kumakabuli na jojo jo, ata kwaupingo hapali munu áshuulula kumunga kavili. ⁴ Myanda vyoe vashindamunga upingo mmadodo na mmakono; mang'un-

yang'unya lo, ashindalundumulanga, vitali vyake kulumulanga na hapali áshimuulula kundabyadabyanga. ⁵ Shilo na mui ngwengwe ashindapita akugwanga-kugwanga kumakabuli na kumashinga alibyaanga-byaanga majanga mumili.

⁶ Napanelo nae apalá pangwene Yesu kwakushu kuntukutula kuka ndanguguvalila mushu mwake ⁷ kutwala kutangola pashanya po aashidoni, "Wako Yesu mwanagwe Nnungu Wapashanya-uti, da wako namu nangu shako nyamani? Ninkukujugwa pamevo a Nnungu, haunangupe shaushanga." ⁸ Andíjugwa davo mwaa Yesu anínnamulila lijini jo doni, "Wako lijini nshapu, mumili mwamunu ajo, kuma!" ⁹ Bai Yesu kumudya, "Lina lyako nyani?" Nae kushidoni, "Lina lyan-gu Imbumba mwaa tuvelé tuvoe." ¹⁰ Kutwala kunjugwangila Yesu pakulota hanavakumulange mulijimbo alyo. ¹¹ Napanelo popo po, indípagwa iminga yadinguluve íshilya palishinga. ¹² Uti alalá majini aníjugwangila Yesu, "Tulamulila tuke kwavanguluve akulá tukavainjile!" ¹³ Yesu kulamulilinneu, majini mashapu anavo kuumananga kuka ndaviinjilanga vanguluve; iminga yadinguluve íshiwikila shilinga shadyalupu mbili yo kupandamokela mwibondi kuka ndatitimidanga mmedi.

¹⁴ Bai vanu vashishunga dinguluve adyo vandítukutanga kuka ndavalanganga kunjini na mmagwelu kutwala vanu kuumananga kuka ndalola shitendo ashoshuumidíle. ¹⁵ Pavavandike pavele Yesu kumwona aijá munu wamajini e avénavo imbumba yamajini àikele, àgwete inguvo, àvenavo ding'ano dyashimunu kutwala vanavo kujopa. ¹⁶ Avalá vanu vagwéne vene shitendo asho, kuvavavangangila vanji shinu shintandéke aijá wamajini na kuvalanganga shivatandéke vanguluve ¹⁷ kutwala vanavo kutunduvanga kunjugwangila Yesu aume mushilambo shave.

¹⁸ Napanelo Yesu pashiiinjila mwingalava aijá e avénavo majini ashinanjugwangila pakulota anneke vauke pamo. ¹⁹ Yesu kwita kumwaulila doni, "Wena kukaja mpaka kwavakwenu; koko ko, vavavangangile vinu uti vyakutandalele *UMU* na mwakwanangilidile shididi." ²⁰ Bai nae andyúka kutwala kutunduvanga kuvalanganga ku Dekapolishi vinu uti vyatandile Yesu na vanu uti vashindashanga.

Kudyuka kwamwanagwe Yailu na kupona kwankongwe

Mateu 9:18-26; Lukashi 8:40-56

²¹ Napanelo Yesu akakwela kavili mwingalava kwambokela litanda nkono unji. Popo po, iníntang'anedyo imbumba yavanu apalá pavéle nanyenje litanda. ²² Mwenu! Kuwika apalá nanangalaledi washitala shakulipudidya walina Yailu. Nae pamwene Yesu andínguguvalila mmadodo mwake ²³ kunjugwangila namene aashidoni, "Mwanangu nkongwe ndikidiki nnwele, ninkunnalela po pantima apa! Nadoni ninkukujugwa tuke ukammikile makono kwambangidya apone na ave mumi." ²⁴ Yesu kutwala kuka namu nae.

Napanelo yo imbumba yavanu yo ishindamwoda na inshinya. ²⁵ Popo po, andípagwa nkongwe jumo auwíle vyaka kumi na mbili ulwele úkavele wakumalala kutumila. ²⁶ Nae andípita mmakono mwavamitela voe na kujanga vyake uti kanji haulwíle kupona; mauvilo andyúka mushu amamodya. ²⁷ Bai kwoda andígwa shimbili shimwe Yesu, andyúka ndalijalanianga mwimbumba yavanu kumuukila Yesu kunyuma kwake kutwala kukwaa ikanju yake ²⁸ mwaa ashikumbukila doni, "Wona ngukwaa padyoko vela ikanju yake ndapona." ²⁹ Bai nae myadi kuma ko kumalalinne, kulyona mumili mwake mauvilo alalá kumalilika. ³⁰ Yesu kumanyinne kenga mo mumili mwake dipali dimongo dyumíle kutwala kushiliuka kulola imbumba kudya doni, "Nyani ákwaidye ikanju yangu?" ³¹ Vakwoda vake do, "Wako unkwona imbumba yavanu indikushinya, unnambela dashi munu ákwaidye?" ³² Kanji nae ashindamyangamyanga tu nnyenje mwake alota amwone munu átandile shitendo asho. ³³ Nkongwe jo àmanyire ashilá shintandéke akuno ajopa na atatamela, anímmandika Yesu kuguguvala mushu mwake kutwala kummalangangila umwiu uti. ³⁴ Yesu kutwala kushidoni, "Mwanangu, likulupililo lyako lindikuposha, wena kwaamani na pona shilwele shako!"

³⁵ Napanelo Yesu akuno ankutangola, avalá vanu vake aijá nanangaledi washitala shakulipudidya vandiwika kumwaulila nang'olo wave kushidoni, "Mwanavo jo andipela! Haunauke mushu undingadinga mwalimu jo." ³⁶ Yesu bila kutanana malove alo, amwaulidilé nanangaledi jo kushidoni, "Haunajope, ila kulupila." ³⁷ Nae andíleya kumwoda munu woewoe ila antwete Patulu, Tiyagu namu Nshuwau nung'une Tiyagu. ³⁸ Pawikile paing'ande kwona shijungulima shavanu na kuvona vanu valila namene na vatan-gadikanga. ³⁹ Nae andiinjala nng'ande amulá kuvaudya, "Mwaa shani munkujungulikanga na munkulila? Mwana aju hanapela shinu alelé vila." ⁴⁰ Vanu apalá vakamwakanga. Napanelo nae kuvau-madyanga vanu uti nng'ande amulá kuntwala tata-munu, jujumunu pamo na avalá váalekenavo kuka mpaka pavéle mwana. ⁴¹ Nae aninkamula kutwala kushidoni, "Talita kumi!" mana ake doni, "Ndyoko, nangu ninkukulumulila, takatuka!" ⁴² Ndyoko ávenavo vya-ka kumi na mbili vyaulinga jo, kutakatukinne kutunduvanga kuwena kutwala vanu kushanga namene-uti. ⁴³ Yesu kuvaleyá namene pakulota havanammanyie munu kutwala kuvalumulila vamupe ndyoko jo shakulya.

Vakwave Yesu vankumwita

Mateu 13:53-58

6 Napanelo Yesu akauma palyutu alyo kuka mpaka kwave; vakwoda vake vashindamwoda. ² Likawike liduva lyakupumula andyúka kushitala shakulipudidya kutwala kutunduvanga kupundisha; vanu voe váshimwigwilila vandíshanga kutwala kushidoni, "Na aju vitendo avi apatilé kwashi? Limanyilo ali lyavam-

pele na aju livé dashi na makango ala atenda nae ankutandela mwashi? ³ Na aju i jo nkúveda mwanagwe Maliya, nkulugwe Tiyagu, Yoshe, Yudashi namu Si-moni? Da valumbuvake i ava vavéle namu wetu apa?" Vanavo mwaa wake nae ishindavanyatila. ⁴ Yesu kushidoni, "Hapali nkúlava ákaishimika ila mushilambo shake kwavavele vatatawake na valikola vake ni kwakanaishimika." ⁵ Nae popo po haimmaikidile kutenda makango ila andíavikila makono valwele padyoko kutwala kuvaponia. ⁶ Nadoni nae andíshanga kwamwaa waungakulupila wave.

Yesu ankuvatumidya vamyombe kumi na mbili

Mateu 10:5-15; Lukashi 9:1-6

Napanelo nae kuma kupita apundisha mumakaja ashitanono. ⁷ Andíwashema avalá kumi na mbili kutwala kuvatuma vavili-vavili na kuvapa madalaka akulamulilila majini mashapu. ⁸ Andívaleya kunyukata shinu shoeshoe mushimwanda shave ila vanyukate ipimbo bai; shakulya mene, lipeta mene na dishingo mene. ⁹ Vagwale vilatu tu; dikanju mbili havanagwale. ¹⁰ Andívaulila kavili kushidoni, "Paing'ande yoeyoe yamulota kuwikila, ikalanga popo mpaka pamulota kuma likaja alyo. ¹¹ Palyutu lyoelyoe vakanampwashalela na vakanalota kumwigwilila, pamuma po, lipumunange litutunga mmadodo mwenu pakulota uve ushuda kwave vanavo." ¹² Bai vanavo vandyúma kupita avalangangila vanu valijugulange madambi ave. ¹³ Majini oe vashindakumulanga na valwele voe vashindavapaka mauta kutwala valwele vo vashindavaponia.

Kubyaigwa kumwe Nshuwau Wakubatisha

Mateu 14:1-12; Lukashi 9:7-9

¹⁴ Napanelo umu Elode andígwa vinu avyo víshitandeka kwodamwaa shimbili shimwe Yesu shindyúmanikanga kula kushinu. Vanu vashindatangola kushidoni, "Nshuwau Wakubatisha andidyuka pakati pavakupela ni ashi shitádyá vyamakango avyo vipagwe namu nae." ¹⁵ Vanji doni, "Liyashi ajo." Vanji, "Aju nkúlava, avelé kenga nkúlava jumo pakati pavakulava vakala." ¹⁶ Kanji Elode paigwite malove alo nae kushidoni, "Nshuwau ajo; jo waninnamulidile nangu vashinde, apo jojo jo, andidyuka."

¹⁷ Jo Elode jo, kala po andílamulila vamunge Nshuwau vanjele nkalaboshi mwaa nae aníntwala Elodiya nkongwe washinnomba nung'une mwene walina Pilipo kutwala kunnomba. ¹⁸ Napanelo Nshuwau ashinanduma Elode kushidoni, "Haiku-vaikidile unnombe nkongwe ndyagwe nung'uno." ¹⁹ Napavedoni Elodiya ashinammikila shitundi Nshuwau, ashindalota ammyae kanji haishuululukika ²⁰ mwaa Elode ashinanjopa Nshuwau. Nae ashinanshilidyanga pakuva anímmanya kenga avele munu waishaliya na wakwilimiyanga wake Nnangu. Ishinan-nagwela kumwigwilila Nshuwau ata ikava kenga pashimwigwilila po, ashinampuwanianga.

²¹ Napanelo muliduva lyashitenda Elode shikukulu shakumbukumbu yakuvalekwa kwake lindipatikana litala kumwe Elodiya lyakutandela amulá mwashilota. Muliduva alyo Elode andívapa shakulya vananangaledi vakumene vaishilikali yake, vananangaledi vavaing'ondo na vananangaledi vakumene vakwalo-ka ku Galileya. ²² Bai mwanagwe Elodiya nkongwe kwinjila mulyutu lyo kuvina landa kutwala Elode pamo na vakulalikigwa kuvanagwela namene. Umu jo ikanagwele, andímwaulila mwali kushidoni, “Ngujugwa shinu shoeshoe nangu ndakupa!” ²³ Nae kulilapila kushidoni, “Ngujugwa shoeshoe shaulota, ata paikavele inushu yautawala wangu, ndakupa.” ²⁴ Mwali kuma kuka ndamudya anyoke, “Ngujugwe nyamani?” Anyoke kushidoni, “Kanjugwe muti umwe Nshuwau Wakubatisha.”

²⁵ Mwali kuukinneu kumwe umu ndamwaulila kushidoni, “Ninkulota ungupe ambi popa mushani muti umwe Nshuwau Wakubatisha.” ²⁶ Umu shindímwidila shipalodi shoe namene napane kwodamwaa andílilapa pamevo pa avalá vakulalikigwa, halatíle kumwitila. ²⁷ Umu kutwala kuntuma mwing'ondo akaidenavo muti wo. Nae kuka kukalaboshi nanshinda Nshuwau ²⁸ kutwala muti wo kwidanavo ávikile mushani ndamupa mwali, mwali kutwala kuka ndamupa anyoke. ²⁹ Vakwoda vake Nshuwau vakaigwe dyabali adyo vandyúka ndatwala mili wo ndashika.

Yesu ankulisha imbumba yavanu dyalupu mwanu

Mateu 14:13-21; Lukashi 9:10-17; Nshuwau 6:1-14

³⁰ Napanelo avalá vamyombe vandyúka kuka kumwe Yesu kutwala kummalangangila vinu uti vyavatandile na vyavapundishidye. ³¹ Yesu kutwala kuvaulila kushidoni, “Mwenu, tuke kushimbweshe tukapumule padyoko kwagweka.” Mwaa pashinu apo vandípagwa vanu voe váshida na váshuma váshitadya mpaka vana-vo litala lyakulyela shinu mene kuvapagwidya. ³² Vanavo kwinjilanga mwingalava gweka yave kuka kushimbweshe.

³³ Napanelo vanu voe vakavona vauma na vamanya kwavashuka, vanu vakwalakela mminjini uti kutukuta namadodo kulitandya vanavo kuwika. ³⁴ Yesu pashulwike mwingalava, kwona imbumba yavanu nae kwanangila shididi mwaa ishiva kenga imbumba yadingandolo díkavenavo nkúshunga † kutwala kutunduvanga kuvapundisha vinu vyoe. ³⁵ Liduva napanelo liinjila mmamba, vakwoda vake vanímmandika kutwala kumwaulila doni, “Pashinu apa panalugwangwa vila na wakati wo undipita. ³⁶ Vaulile venentete vaukanange mmala na mmakaja akuvandika vakashume shinu valye.”

³⁷ Yesu kutwala kuvajang'ula kushidoni, “Shinu sho, vape mwenu po!” Vanavo kushidoni, “Shosho sho shilotege dinali dimiya mbili! †† Napanelo indivaikila tuvape kulya tujanga njulukú au?” ³⁸ Nae kushidoni, “Da mwenu po muvénavo magung'u mangapi? Wena

† *Lola I Vaumu 22:17.* †† *Dinali dimiya mbili uvele njulukú woe mwaa dinali imo uvele nshala wamunu kwaliduva limo.*

mukalole!” Pavaukile ndalola vakamwaulila doni, “Apagwité magung'u mwanu na dyomba mbili.” ³⁹ Napanelo Yesu andívalamulila vakwoda vake vavikadyange venentete muukoka kwamapungu. ⁴⁰ Venentete vo kwikalanga mapungu avanu miya-miya na avanu amusini-amusini. ⁴¹ Yesu kutwala alalá magung'u mwanu pamo na adilá dyomba mbili kulola kuwa kwalaliya kumajanianga magung'u kuvapa vakwoda vake vavajavile namomo kuvajavila adilá dyomba mbili vanu uti. ⁴² Vanavo uti kulya mpaka kwikuta. ⁴³ Vakwoda vake vakatwalange makombo amagung'u pamo na adyomba vandyúmbadya makalala kumi na mbili. ⁴⁴ Vanu ve valíle magung'u alo vavele valume dyalupu mwanu.

Yesu ankuwena pashanya medi

Mateu 14:22-33; Nshuwau 6:15-21

⁴⁵ Yesu kutwala kuvakanyalidyangidyanneu vakwoda vake vakwalange mwingalava vauke valangalela litanda nkono unji yani ku Beteshaida vanneke nae alaila imbumba yavanu. ⁴⁶ Akalaile imbumba, andyúka kulishinga ndashwali. ⁴⁷ Pauwikile wakati wayalyulo ingalava kuwika shing'ati litanda nae avelé gweka kumwangu. ⁴⁸ Napanelo nae avona vakwoda vake kuvauvanga pavashandesha ingalava mwaa imepo ishaaloka mushu mwave, muwakati walyamba kumanga kulangala, nae kuvaukila awena pashanya medi. Alota avapite mushu mwave, ⁴⁹ vanavo pavangwene awena pashanya medi, vashona doni, “Ali litailei,” kutwala vanavo kukugwanga. ⁵⁰ Vanavo uti vakamwone vanínjopa, nae kutangalenneu kushidoni, “Lyunge nti-ma! Ni nangu apa. Hamunajope!” ⁵¹ Yesu kukwela mwingalava amulá kupagwa pamo namu vanavo kutwala imepo yo kumalala do, jii! Vanavo kushanga ⁵² mwaa ata lo makango amagung'u alalá, mana ake havamanyíte; mitima vyave vandítadya vinanope.

Yesu ankuvaponia vamidi

Mateu 14:34-36

⁵³ Napanelo vakaamboke litanda lyo vandíwika shilambo sha ku Geneshaleti kushiya ingalava yave kutwala kuungangila. ⁵⁴ Vanavo pavaumanenge mwingalava venentete kummanyinneu Yesu. ⁵⁵ Bai venentete kuumananga kupita vatukuta mumakaja aise-mu ayo vapita vavanyukata valwele mudigoli kuvaukanavo kulyutu lyavashiigwanga kenga Yesu avelé kwanavo. ⁵⁶ Kulyutu lyoelyoe kwashuka nae, mminjini mmakaja madikidiki kwali mmagwelu, vanu vashindavawala valwele kuvaladya mumautu aumbala kutwala kunjugwangila avaleke valwele vankwae padyoko vela munkumbu waikanju yake. Uti avalá váshinkwaa, vashindapona.

Yadi na malamulo

Mateu 15:1-9

7 Napanelo Yesu vandímwidila mapalishayo pamo na vamwalimu vanji pakati pavamwalimu vadishaliya vakwalakela ku Yelusalemu ² kutwala vovo

vo kuvona vakwoda vanji vamwe Yesu valya na makono mashapu kwamwaa mene kunavanga medi kwayadi yave. ³ Mapalishayo pamo na vayuda uti havanavya bila kunavanga medi kwayadi yave, vanavo vananawanga nyamani, yadi yavanyakala. ⁴ Pavanauja kumautu aumbala vakananavanga medi kwayadi yave, havanavya shinu. Namomo vankunanawanga diyadi dinji dyoe kenga mwakuukangila diwene, vitumba na vyombo vinji vyavitali.

⁵ Napanelo mapalishayo avalá na vamwalimu vadishaliya vandímudya Yesu kushidoni, “Mwaa shani vakwoda vako havanaodedyá shinu yadi yavanyakala, vankulya mmakono müvenavo ushapu?” ⁶ Yesu kushidoni, “Nkúlava Ishaiya andivalanganga shana vya-mushu amwamba mwenu mmanu mmamalambi aashidoni,

“Venentete ava vangwishimu po pakanywa apa, ila ntima wave uvelé kushu namu nangu.

⁷ Kwangu nangu vanavo vankulipudya bule, vapundisha kenga mapundisho shii malamulo avanu vene.’[†]

⁸ Mwenu munkuleka lilamulo lya Nnungu munanawanga nyamani, yadi yavanu.”

⁹ Kutwala kavili kushidoni, “Mwenu ngwengwe munkulambela dinamuna dyambone dyakukwapela lilamulo lya Nnungu mwambangidya munanawange yadi yenu. ¹⁰ Musha anditangola kushidoni, ‘Mwishimu tatakona anyoko,’^{††} na ‘Munu woewoe álota kumwiludyanga tatakona anyoke, vampedye,’^{†††} kanji mwenu munkukwepa. Munkwona kenga munu akamwaulila tatakona kwali anyoke doni, ‘Inudyoyoye yanishilota nimwing’e ailá, ayo ni Kolibaa’ (Kolibaa, mana ake inudyoyoye^{†††}), ¹² bai mwenu munkuneya munu ajo kuntandela shinu shoeshoe tatakona kwali anyoke.

¹³ Amu ni mwamuputangila mwenu lilove lyake Nnungu kanji kwamwaa wayadi yenu yamupundishania. Namomo munkutenda vinu vinji vyoe vyakuva kenga avi.”

Shintáa munu ushapu

Mateu 15:10-20

¹⁴ Napanelo Yesu andíshema kavili imbumba yavanu kutwala kushidoni, “Mwenu uti ngwigwilila na ngwigwawa shana. ¹⁵ Hashipali shinu shalakéla panda kumwinjila munu shuulúla kuntaa ushapu ila shintáa ushapu ni ashilá shúma mumunu. ¹⁶ Munu ávenavo matu akwigwidya, aigwe.” ¹⁷ Napanelo akanyeme paimbumba apalá, painjidile nng’ande, kwamwaa wankong’o aulá vakwoda vake kumudya. ¹⁸ Nae kushidoni, “Da namwenu momo hamunamanya shinu? Da hamunamanya shinu kenga shinu shapanda shiinjíla mumili mwamunu hashuulula kuntaa ushapu? ¹⁹ Hashinantaa ushapu mwaa hashinamwinjila muntima, shanavo shuka muliu kutwala ling’oto kunya.” Yesu patangwele

[†] Lola Ishaiya 29:13. ^{††} Lola Kuma 20:12; Kumbukumbu 5:16. [‡] Lola Kuma 21:17; Valawi 20:9. ^{†††} Kolibaa ivele inudyoyoye yashilivikila munu kwa Nnungu wake kanji inudyoyoye ayi, munu ashindaikalanavo mpaka wakati walota mwene kumya.

davo ashimanyiya kenga vyakulya uti hashipali shivénavo ushapu. ²⁰ Nae kuka mushu aashidoni, “Ashilá shúma mumunu ni shintáa ushapu. ²¹ Ni muntima wamunu múma makumbukililo akunyata; kulavalava, kwiva, kubyaa, kulanavo nkongwe ákavele wako, ²² liu, ukalau, ushwang’a, kutaduka, ing’ou, kwabola, kulyona na imbeve. ²³ Vyaukalau avi uti yuma muntima mwamunu; ni vyovyovyovintáa ushapu.”

Likulupililo lyankongwe mmidi

Mateu 15:21-28

²⁴ Napanelo Yesu andyúma palyutu alyo kuka kwisemu yananyenje mwake likaja lya Tilu. Koko ko, nae awika paing’ande imo ashilota alipiyange kanji haiyululíke. ²⁵ Bai nkongwe jumo ávenavo mwanagwe namako, namako jo ávenavo lijini nshapu, akaigwe vamtambulanga Yesu, nae kumuukila kungwilangila mmadodo mwake. ²⁶ Nkongwe jo avele mmidi wa ku Shilopoinike; napanelo anínjugwa Yesu pakulota anku-mulange lijini mumili mwamwanagwe. ²⁷ Yesu kumwaulila doni, “Shitandi valeke vana valye mpaka vaikute mwaa hashinava shambone kutwala shakulya shavana kuvajalela vang’avanga.” ²⁸ Nkongwe jo kushidoni, “Elo *UMU* kanji ata vo vang’avanga vo, vandálya dingalamwamwa dyashakulya shavana digwilangila mwina imesha.” ²⁹ Yesu kushidoni, “Po paujang’wile davo po, twala mwanda uke, lijini jo, tayali andyuma mumili mwamwanavo mo.” ³⁰ Bai nkongwe pawikile kukaja kunkodya mwanagwe álele paigoli, lijini jo ámuumile tayali.

Yesu ankumponia ákaigwa

³¹ Napanelo Yesu andyúma mwisemu ayo yananyenje mwake likaja lya Tilu kupita ku Shidoni kuka mpaka kulitanda lya Galileya apitila shilambo sha Dekapolishi. ³² Vanu vankumwidanavo kumwe Yesu munu jumo ákaigwa na walutata vankunjugwangila ammikile makono. ³³ Nae pamuumidye mwimbumba yavanu, andímuukanavao kwagweka kunjela vyala kumatu na kunkamulangila mata mululimi. ³⁴ Paladile kuwa, andísha ntima aashidoni, “Epataa!” Yani, “Shimuka!” ³⁵ Kumatu ko kudiuka, lulimi lyo kungaluka na kutunduvanginne kutangola shana. ³⁶ Yesu andívaleya havanammalangangile munu kanji kila mwashivalaedyavavano vashindamamodya kummalanganga. ³⁷ Vashindashanga kupunda apo vaashidoni, “Uti vinu ankutenda shana, ankutadya mpaka vákaigwa vaigwe na vabubu vatangole.”

Yesu ankulisha imbumba yavanu dyalupu nsheshe

Mateu 15:32-39

8 Napanelo mumaduva lolo lo, imbumba yavanu yúmbalanidile kavili na paikavanavo shakulya, Yesu kuvashema vakwoda vake kuvaulila doni, ² “Vanu ava ninkuvaanangila shididi mwaa vankutwala maduva matatu vavelé namu nangu na havave shakulya. ³ Napavedoni ndikavaulila vaukanange kuding’ande

kwave vâdobile indala, inkuululika kudilikanga shing'ati indila mwaa vanji vo vaaleke kushu." ⁴ Vakwoda vake kushidoni, "Vanu ava pakulota kuvalisha munu apata pashi magung'u panalugwangwa apa?" ⁵ Yesu kuvaudya, "Muvénavo magung'u mangapi?" Vanavo do, "Saba." ⁶ Yesu ankuvalamulila venentete vaikalange pai. Nae patwete magung'u saba alalá kunambwalela Nnungu kumajanianga, andívapa vakwoda vake pakulota vavajavile venentete, vanavo kutandela momo. ⁷ Namomo dindípagwa dindemba padyoko do, nae paalalidye andívaulila doni, "Nadyanavo, java." ⁸ Vanu uti kulya mpaka kwikuta. Makombo lo avele oe, makalala saba. ⁹ Palyutu alyo vanu vavele dyalupu nsheshe, bai nae andívalaila.

Mapalishayo vajugwa shimanyikilo

Mateu 16:1-4

¹⁰ Napanelo nae andíkwelenneu mwingalava pamo na vakwoda vake kuka kwisemu ya ku Dalamana. ¹¹ Mapalishayo vandímwidila Yesu kutunduvanga kujuganavo vanninga ntima vanjugwa alodye shimanyikilo shakwalakela kuwa. ¹² Nae akaisha ntima namene kutwala kushidoni, "Mwaa shani vanu vaimbula ai vangujugwa shimanyikilo? Ninkumwaulila mwiu doni, vanu vaimbula ai havalodya munu shimanyikilo shoeshoe."

Nkukumuku wamapalishayo na umwe Elode

Mateu 16:5-12

¹³ Napanelo nae pavalakile, andíkwela mwingalava kuka litanda nkono unji. ¹⁴ Vakwoda vake vandívaliliva kunyukata magung'u, mwingalava mo vavénavo ali, limo bai. ¹⁵ Napanelo ashindavaduma aashidoni, "Lilaledye! Lishunge kwaing'ano yankukumuku wamapalishayo na umwe Elode!" ¹⁶ Vanavo kutaukananga shivenevene vaashidoni, "Shamumwona kutangola davo po, mwaa wetu hatunyukete magung'u." ¹⁷ Yesu amanya shivéle mmitima myave kushidoni, "Mwaa shani munkutaukananga ing'ano yakumwova magung'u? Da hamunava kwigwa na kwanalela? Mitima vyenu vindinanopa? ¹⁸ Mevo mwenu munkuvanavo kanji hamunalola shinu; matu munkuvanavo kanji hamunaigwa shinu. Da hamunakumbukila shinu? ¹⁹ Pandivajavidile vanu dyelupu tano magung'u mwanu apalá, makombo muumbadidye makalala mangapi?" Vanavo do, "Kumi na mbili." ²⁰ "Kushi pandivajavidile vanu dyalupu nsheshe magung'u saba apalá, makombo lo muumbadidye makalala mangapi?" Vanavo do, "Saba." ²¹ Kutwala Yesu kushidoni, "Napanelo hamunava kwanalela?"

Yesu ankumponia wakuputala mevo pa Beteshaida

²² Vanavo vakauka ndawika pa Beteshaida. Pavawikile, vankumwidanavo kumwe Yesu munu jumo wakuputala mevo kunjugwangila ammikile makono. ²³ Nae pankamwile nkono munu jo andímuukanavo kunyenje likaja, kunshunila mata mmevo, kummika

makono kumudya, "Dashi unkwona shinu shoeshoe?" ²⁴ Munu aijá pang'amwile mevo kushidoni, "Ninkuvona vanu vilinga-vilinga kenga milandi vinkuwena doni." ²⁵ Yesu kummika kavili makono kumevo nae akuno alola ndoo! Munu jo kupona vinu uti kwona shana. ²⁶ Bai Yesu anínnamulila auke akapumule pang'ande pake amwaulila doni, "Nkaja mo, haunamwaulile munu."

Patulu ankummalanganga Yesu kuva Klistu

Mateu 16:13-20; Lukashi 9:18-21

²⁷ Napanelo Yesu pamo na vakwoda vake vandyúma kuka kumakaja a ku Shashaleya imwe Pilipo. Vâvele ndila nae andívaudya vakwoda vake kushidoni, "Da vanu vanguvalanganga nangu kuva nyani?" ²⁸ Vanavo do, "Nshuwau Wakubatisha, vanji Liyashi, vanji kavili do nkúlava jumo pakati pavakulava." ²⁹ Nae kuvaudya vanavo, "Kushi na mwenu po, mulota kunguvalanganga nangu kuva nyani?" Patulu patwete kujang'ula kushidoni, "Wako Klistu." ³⁰ Nae kutwala kuvaduma pakulota havanammalangange kwavanu.

Yesu ankumanyiya kaladavo yakupela na kudyuka kwake

Mateu 16:21-23; Lukashi 9:22

³¹ Napanelo Yesu andítunduvanga kuvapundisha vakwoda vake aashidoni, "Mwana Wamunu inimmaikila apate mauvilo oe; inimmaikila vamwite vanang'olo, vakulangalalela-shadaka vanang'olo pamo na vamwalimu vadishaliya, apele na muliduva lyantatu lyake adyuke." ³² Malove alo nae ashitangola ngala kutwala Patulu kunshamela Yesu kwagweka kuntangalela. ³³ Yesu pashiliwike kuvalola vakwoda vake, aníntangalela Patulu doni, "Tumuka mushu mwangu Shatwani! Wako haunakumbukila shinu mwakumbukilila Nnungu, ukumbukila mwavakumbukilila vanu."

Nkwóda umwe Yesu anyukate nshalaba

Mateu 16:24-28; Lukashi 9:23-27

³⁴ Bai nae kushema imbumba yavanu pamo na vakwoda vake kuvaulila kushidoni, "Munu akalota kungwoda nangu, alishukulu jo mwene anyukate nshalaba wake angwode. ³⁵ Mwaa woewoe álota aposhe shingumi shake, andakatoka kanji woewoe álota akatoke shingumi shake mwaa wangu nangu na kwamwaa wantenga wambone, andaposha. ³⁶ Da munu alota kupata wambone shani akapata shilambo uti kutwala kukatoka shingumi shake? ³⁷ Da shinu shani shalota kuulula kumya munu abadilishe na shingumi shake? ³⁸ Munu woewoe waimbula ai yakulavalava † na yakutega akangwanangila nangu dyoni na kwanangila malove angu, Mwana Wamunu momo andamwanangila dyoni paida mulishangelo lyatatake ávele pamo na vanjelo vakwilimiyanga."

† Klistu ni lina limwe aijá walivikile Nnungu kuntumidya kwida.

†† Yesu patangwele imbula ai ni yakulavalava, inkuvanavo mana doni, vanu vashindatenda vamwambukanga Nnungu wave.

9 Kutwala kavili kushidoni, “Ninkumwaulila mwiu doni vapali vanu vanji popo apa, vanavo mwiko havapela vakanava kwona utawala wa Nnungu wida na dimongo.”

Yesu ankujalukanga pamevo pave

Mateu 17:1-13; Lukashi 9:28-36

2 Akapite maduva sita, Yesu akantwala Patulu, Tiyagu namu Nshuwau kuvaukanavo kushinu kwagweka kulishinga lyakukulumuka. Koko ko, nae kujalukanga pamevo pave; **3** dinguvo dyake kuva dyanashwe na dyakushenga namene, kushwalela kwákaulula nkúshapa woewoe wamushilambo ashi kuwisha shilinga asho. **4** Popo po kwaneka Liyashi, Musha vatangola namu Yesu. **5** Patulu kutwala kumwaulila Yesu kushidoni, “Labi, ni shambone mwapagwididye pashinu apa, leka tukandyange mautu matatu akwikala limo lyako, linji limwe Musha na linji live limwe Liyashi.” **6** Nae hashimanya shashitangola mwaa vovo vo vashindajopa.

7 Bai kutwala kushuluka lyundi kuwa kuvainikidya, mo mulyundi mo kwigwinika lidi litédoni, “Aju ni mwanangu waninnagwaledya! Jojo jo mwigwilile!” **8** Kwashingangala vakalalyange nyenje mwave vanu vo vavagwene vyo, ngwee kumwona jo Yesu aju gweka na vanavo.

9 Napanelo pavashishuluka mulishinga Yesu andívalleya havanammalangangile munu vinu vyavagwene mpaka palota kudyuka Mwana Wamunu pakati pavakupela. **10** Bai vanavo vandípiyanga ing'ano ayo vaudyanya shivenevene mana akudyuka aku pakati pavakupela. **11** Nadoni vakwoda vake vandímudya, “Mwaa shani vamwalimu vadishaliya vankushidoni, ‘Ivaikidilé Liyashi ave ntandi kwida?’” **12** Yesu do, “Mwiu paida Liyashi, andapanganianga vinu uti. Kanji mwaa shani indyandikigwa imwamba Mwana Wamunu doni, ‘Inimmaikila auvauvange vinu vyoe na ailudyangigwe?’” **13** Nangu apa ninkumwaulila doni, Liyashi jo andida na jojo jo, vanintenda uti vyavalatile kwodamwaa indyandikigwa imwamba nae.”

Yesu ankumponia ndyoko walijini

Mateu 17:14-21; Lukashi 9:37-43

14 Napanelo vanavo pavawikile pavavéle avalá vakwoda vanji vandyóna imbumba ing'umene yavanu ivatang'anadidye na vamwalimu vadishaliya vataukananganavo. **15** Imbumba po paingwene Yesu indyangaikanga kutwala kuntukutila kuka ndamuudyanga. **16** Nae kuvaudya vamwalimu vadishaliya, “Da mwenu mutaukananganavo nyamani?” **17** Munu jumo mwimbumba mo patwete kuli-

† *Lola Malakiya 4:5-6. Mulibuku limwe Malakiya vandyándika doni, likanava kuwika Liduva limwe Umu shitandi andaida Liyashi ndapanganianga vinu uti. Mwimbandi ai Yesu ankunninganianga Liyashi kuva Nshuwau Wakubatisha. Namomo ankushidoni, “Elo Liyashi paida andapanganianga vinu uti kanji likanava kuwika Liduva limwe Umu, Mwana Wamunu andapela.” Nae ashitangola davo mwaa vanu havashikumbukila kenga Klistu inimmaikila auvauvange.*

jang'ulidya kushidoni, “Mwalimu, ndimwidanavo mwanangu kwako wako, nae ankuvanavo lijini ántaa ububu. **18** Lijini aju pashinu poepoe panankodya, anángwiidya pai, nkanywa mo kutuka shulu akuno akwishakwishanga meno na andájuma do, go. Ndivajugwa vakwoda vako pakulota vankumulange kanji vana-vo vanintatakela.”

19 Yesu do, “Shasho! Mwenu mmanu mmaimbula íkakulupila! Da nangu ndapagwa namu mwenu mpaka duvani? Nannaga mwenu mpaka duvani? Bai pane mwidenavo akuno ndyoko jo!” **20** Vanavo kumwidanavo. Napanelo lijini po pangwene Yesu aníntainneu shalala ndyoko jo, ndyoko kugwa kunneka agalagata pai na atuka shulu nkanywa. **21** Yesu kumudya tatake mwana, “Shitendo ashi shinditwala wakati woe tangu shintunduvange?” Tatamunu kushidoni, “Tangu shidyoko shake. **22** Nomomo myanda vyoe anánjela pamoto na mmedi alota ammyae. Napanelo ukaulula kutenda shinu shoeshoe, twanangila shididi, tupwashela!” **23** Yesu kushidoni, “Ukaulula? Vinu uti vinkululika kwa aijá ákulupila.” **24** Tatamunu kutangalenneu pashanya po aashidoni, “Nangu ninkukulupila ila ngupwashela kutema ungakulupila wangu.”

25 Napanelo Yesu pagwene iminga yavanu yumbalanila anínshulanga lijini nshapu jo kushidoni, “Wako lijini bubu na úkaigwa, nangu ninkukulumulila kuma mumili mwandyoko aju na haunainjile kavili!” **26** Lijini akuno akuta kungwiya ndyoko jo na dimongo kuma kunneka ndyoko álele kenga andipela mpaka kuvatadya vanu kushidoni, “Alo, andipela!” **27** Yesu kanji kunkamula ndyoko jo nkono kuntakatuwa kutwala ndyoko jo kwimila. **28** Bai Yesu painjidile nng'ande vavele gweka vakwoda vake vandímudya doni, “Da mwaa shani wetu hatuulwile kunkumulanga lijini jo?” **29** Nae kushidoni, “Lijini wakuva doni ankuululika kukumulangigwa kwaindila yakushwali bai.”

Yesu ankumanyiya kavili yakupela na kudyuka kwake

Mateu 17:22-23; Lukashi 9:43-45

30 Vanavo vandyúma palyutu alyo kupitila ku Galileya. Napanelo Yesu hashilota vanu vammanye pavele **31** mwaa ashindavapundisha vakwoda vake kushidoni, “Mwana Wamunu vananimya kunkamudya kumakono kwavanu, vanavo vanampedyá, ling'oto lyakupela, muliduva lyantatu lyake andadyuka.” **32** Vakwoda vake havashigwa shashamba vanavo vashindajopa kumudya.

Nyani nang'olo pakati pavakwoda?

Mateu 18:1-5; Lukashi 9:46-48

33 Bai vanavo vandíwika ku Kapalanaumu. Napanelo ávele paing'ande andívaudya vakwoda vake kushidoni, “Da mwenu ndila amulá mushitaukananga nyamani?” **34** Vanavo kummalalanga mwaa vashipita vataukananga vammanye nyani nang'olo pakati pave. **35** Yesu kwikala kuvashema avalá kumi na mbili kuvaulila doni, “Munu akang'ang'anikila ave ntandi andava wamwisho na andava ntumika wavanu uti.” **36** Nae antwete

ndyoko ndikidiki kumwimidya shing'ati shave kunka-mula kushidoni, ³⁷ "Munu woewoe ámpwashalela mwana ndikidiki kenga aju palina lyangu nangu, angupwashalela nangu; woewoe ángupwashalela nangu i do angupwashalela nangu gweka, ankumpwashalela momo aijá ángutumididye."

Ákatuvangedya ankupagwa upande wetu

Lukashi 9:49-50

³⁸ Napanelo Nshuwau andítangola kushidoni, "Mwalimu, tungwené munu akumulanga majini palina lyako, wetu kunneya mwaa nae hashitwoda wetu." ³⁹ Yesu kushidoni, "Mene, mukananneye. Hapali munu álota kutenda makango palina lyangu, jojo jo kuulula kungutangalenneu kunyata ⁴⁰ mwaa munu ákatuvangedya ankupagwa upande wetu. ⁴¹ Ninkumwaulila mwiu doni, aijá álota kumupa luwene lwamedi mukumbila palina lyangu nangu kwamwaa wakuva mwenu mmake Klistu, mwiko munu ajo hakatoka shinu kupa-ta lidaka lyake.

Shambyomboyo shakutadya kukuvala

Mateu 18:6-9; Lukashi 17:1-2

⁴² "Munu woewoe akantadya kukuvala ndyoko jumo pakati pavadikidiki ava vangukulupila nangu, kudyanganga munu ajo kumuungila lijanga lyakwidopa pang'ulo kutwala kunjela mwimanga.

⁴³ "Nkono wako ukakutadya ukuvale, lumula. Kudyanganga kwinjila mushingumi ùlamele kuliko kuvanavo makono uti mavili kutwala kuka kushena kumoto úkadimika. ⁴⁴ ^{†45} Lidodo lyako likakutadya ukuvale, lumula. Kudyanganga kwinjila mushingumi ùlamele kuliko kuvanavo madodo uti mavili kutwala kukujela kushena. ⁴⁶ ^{††47} Liu lyako likakutadya ukuvale, usha. Kudyanganga kwinjila muutawala wa Nnungu na liu limo kuliko kuvanavo mevo uti mavili kutwala kukujela kushena, ⁴⁸ kushinu

" 'kwákawa shong'o wave na moto úkadimika.' ‡

⁴⁹ Mumanye kenga kula munu vanantakila munyu na moto. ^{†50} Munyu, wambone kanji ukadalala ulota kuu-jidya dashi kavili kuva munyu? Mwenu avanavo munyu mmili myenu na avanavo amani munu na munumwagwe."

Ing'ano yakulakananga

Mateu 19:1-12; Lukashi 16:18

10 Yesu paumile apo, andyúka kulijimbo lya Yudeya mpaka mwangu unji wa Yudani. Bai imbumba yavanu indímwidila kavili na nae kenga lidyavalelo lyake ashindavapundisha.

† Mumaandiko anji kanji ákavele akala uti, vandyánjedyá inamba idikidiki ya 44 ilinganána na inamba ya 48. †† Mumaandiko anji kanji ákavele akala uti, vandyánjedyá inamba idikidiki ya 46 ilinganána na inamba ya 48. ‡ Lola Ishaiya 66:24. †† Vayuda pavashintandela Nnungu shadaka shakutaa moto, vashitumila munyu uvanavo mana aimbodi namu Nnungu. Linganianga: Valawi 2:13; Kuma 30:35; Eshekieli 43:24. Apa Yesu ankutangola ing'ano yakulyumya.

² Napanelo mapalishayo vandímuukila kumudya doni, "Da lilamulo linkutuleka munu kunneka ndyagwe?" Vovo vo, vashinanninga. ³ Nae kushidoni, "Da Musha annamulidilé dashi?" ⁴ Vanavo, "Musha atulamulidilé munu amwandikile italaka nkongwe atwale aneke." ^{†5} Nae kutwala kushidoni, "Musha andimwandikila lilamulo alyo mwaa mwenu mitima vyenu vyakunanopa. ⁶ Kanji tangu kunantandi kukandyanga Nnungu shilambo, 'nae ankandyengé nnume na nkongwe.' ^{††7} 'Nadoni nnume andalyu-madyanga patatake na panyoke kuka ndalyunganian-ga na nkongwe ndyagwe ⁸ kutwala vanu vavili ava kuva mili umo.' ^{†††} Nadoni vanu vavili ava havanava shinu vavili; ni mili umo bai. ⁹ Napavedoni shaunganienge Nnungu, munu hanapukaniange."

¹⁰ Napanelo vavele kavili paing'ande, vakwoda vake vandímuudyangidya ing'ano ayo. ¹¹ Yesu kutwala kuva-jang'ula kushidoni, "Munu woewoe áneka ndyagwe kuka nannomba nkongwe junji, munu ajo ankulavala-na na ankuntagela ndyagwe ntandi. ¹² Namomo nkongwe áneka ntwagwe kuka ndalombwa na nnume junji, nkongwe ajo ankulavalava."

Yesu ankupapwashalela vadyoko

Mateu 19:13-15; Lukashi 18:15-17

¹³ Napanelo vanu vashindavaidanavo vadyoko kumwe Yesu avavikile makono kutwala vakwoda vake kuvashulanga. ¹⁴ Yesu pagwene shitendo asho inínny-tila kutwala kushidoni, "Valeke vadyoko vaide kwan-gu, hamunavaleye mwaa utawala wa Nnungu wavanu vavéle mwavadyoko. ¹⁵ Ninkumwaulila mwiu doni, aijá ákapwashalela utawala wa Nnungu kenga ndyoko, ajo mwiko hainjila shinu muutawala awo." ¹⁶ Bai nae andí-vatwala vadyoko vo kuvavikila makono na kuvaalaliya.

Nnemba ntajili

Mateu 19:16-30; Lukashi 18:18-30

¹⁷ Napanelo Yesu pashuukanavo kavili mushu na shimwanda shake, munu jumo aníntukutila kuka ndaguguvala mushu mwake ndaashidoni, "Mwalimu wambone, ngutandelé mwashi pakulota ngupate shingumi shíkamalilika?" ¹⁸ Nae kushidoni, "Mwaa shani unguhemba kuva wambone? Hapali munu wambone; wambone ni gweka Nnungu bai. ¹⁹ Wako unkumanya malamulo, 'Haunabyae, Haunalavalave, Haunaive, Haunaumye ushuda waushwang'a, Haunatindinganiange na Mwishimu tatako na anyoko.' "²⁰ Nnemba jo kushidoni, "Mwalimu, nangu malamulo ala ninkwodedyá tangu shidyoko shangu." ²¹ Yesu panadile aninnagwaledya kutwala kushidoni, "Shindikubakila shinu shimo. Uti vyauvenavo wena ukashulushe, njuluku wo uvape vákave pashinu. Undavanavo libadila kuwa; ling'oto, ida ungwode."

²² Nnemba aijá paigwite lilove alyo andítangadikanga shintimatima na andívanavo shipalodi shoe mwaa avenavo vinu vyo.

‡‡ Lola Kumbukumbu 24:1-3. ‡†† Lola Kutunduvanga 1:27.

‡‡‡ Lola Kutunduvanga 2:24.

²³ Yesu kushiliuka kulalyanga nnyenje mwake kuvaulila vakwoda vake kushidoni, "Pandikamadyanga namene vatajili kwinjila muutawala wa Nnungu!"
²⁴ Vakwoda vake vandishanga malove alo kanji nae kavili kushidoni, "Mmanavangu, me pandikamadyanga namene † kwinjila muutawala wa Nnungu. ²⁵ Shíkakamadyenge ni kupaleta ngamila mulilanga lyakashinji kuliko kwinjila ntajili muutawala wa Nnungu." ²⁶ Vanavo kumamodya namene kushanga kutwala kudyania shivenevene vaashidoni, "Ikava davo po, aambwalegwa nyani?" ²⁷ Yesu kuvalola kutwala kushidoni, "Kwavanu shinu ashi hashinaululika shinu kanji kwa Nnungu i mwanavo mwaa Nnungu vinu uti ankuulula."
²⁸ Napanelo Patulu kushidoni, "Wetu tundileka vyetu uti kukwoda wako." ²⁹ Yesu kushidoni, "Ninkumwaulila mwiu kenga, kula muni álakile ing'ande yake, ávalakile vanung'unuvake kwali vakuluvake, ávalakile valumbuvake, ánnakile tataka kwali anyoke, ánnakile ndyagwe kwali vanavake, álakile mashamba kwamwaa wangu nangu na kwamwaa wantenga wambone, ³⁰ muni aju muwakati wowo au, kwakwanjadyeka myanda miya andapata ding'ande adyo, vanung'unumunu avo, valumbumunu avo, vajujumunu avo, vana avo na mashamba alo pamo na kupapatigwa. Namomo muwakati wida, muni ajo andapata shingumi shikamalilika. ³¹ Kanji manya kenga vanu voe vatandi vanda vavamwisho na vavamwisho vandava vatandi."

Yesu ankumanyiya mwanda wantatu yakupela na kudyuka kwake

Mateu 20:17-19; Lukashi 18:31-34

³² Napanelo vanavo vauka mushu na shimwanda shave sha ku Yelusalemu, Yesu álangaladile vakwoda vake vandímwoda kunyuma akuno vashanga shimwanda asho na vanu vanji váshivoda vashindajopa. Nae ni pavashamadile kavili kwagweka avalá kumi na mbili kuvaulila vinu uti vilóta kuntandeka aashidoni, ³³ "Mwenu, tunkuka ku Yelusalemu. Koko ko, Mwana Wamunu vananimya kunkamudya kumakono kwavanang'olo vavakulangalalela-shadaka na kwavamwalimu vadishaliya. Vovo vo, vandamuukumu apele na vanankamudya kumakono kwavamidi. ³⁴ Vanavo vandamwiludyanga, kunshunangila mata, kunshapa viboko na vanampedyá. Kanji muliduva lyantatu lyake andadyuka."

Mwana wa Muni aidilé ndatumika

Mateu 20:20-28

³⁵ Napanelo Tiyagu namu Nshuwau vanavake Shebeu vandímukula Yesu ndamwaulila doni, "Mwalimu, wetu tulota utwangangole shoeshoe shatulota kujukugwa." ³⁶ Nae, "Mulota nimwangangole nyamani?" ³⁷ Vanavo do, "Paulota kupagwa mulishangelo lyako, tupa litala lyakwikala, jumo kunkanakono junji kushanda kwako." ³⁸ Nae kushidoni, "Hamunamanya

† Mmaandiko anji vandyándika doni, a Mmanavangu, me pandikamadyanga namene muni ákulupila mali kwinjila muutwala wake Nnungu.

shinu shakujukugwa. Da mwenu munkuulula kukumbila luwene lwangukumbila nangu kwali kupata ubatisho wangupata nangu?" ³⁹ Vanavo, "Elo, tunkuulula." Yesu kushidoni, "Luwene lwangukumbila nangu, mundakumbila. Ubatisho wangupata nangu, mundapata ⁴⁰ kanji yakwikala kunkanakono kwali kushanda kwangu, ayo hainava shinu yakujava nangu. Vene mautu alo ni avalá vavapanganiangididye."

⁴¹ Bai vanji kumi vo vakaigwe malove alo, vanímmikila shitundi Tiyagu namu Nshuwau. ⁴² Yesu kuvashema kuvaulila doni, "Mwenu munkumanya kenga avalá vavavavika kuva vakutawala vavamidi vandálitumbudya kwavenentete na vakumene vave vandátumila madalaka kwavanavo. ⁴³ Kwaupande wenu mwenu hainave davo. Aijá álota ave nang'olo pakati penu inimmaikila ave ntumika. ⁴⁴ Namomo aijá álota ave ntandi, inimmaikila ave ntumwa wenu mwenu uti. ⁴⁵ Ata jo Mwana Wamunu aju haidile vantumike; nae aidilé ndatumika na kujaula shingumi shake shive lyambolelo lyavanu voe."

Wakuputala mevo Balitimeu ankupata kulola

Mateu 20:29-34; Lukashi 18:35-43

⁴⁶ Bai Yesu pamo na vakwoda vake vandíwika pa Yeliko. Napanelo pavashuma nkaja mo nae na vakwoda vake pamo na imbumba yavanu, ndila mo andíikala muni jumo nkújugwajugwa wakuputala mevo walina Balitimeu mwanagwe Timeu. ⁴⁷ Nae paigwite kenga Yesu wa ku Nashaleti ankupita mulyutu alyo andítunduvanga kushema pashanya po aashidoni, "Mwanagwe Daudi, †† Yesu wako, ngwanangila shididi." ⁴⁸ Vanu kunshulanga vawwaulila amalale kanji nae kuka mushu tu ashema pashanya po, "Mwanagwe Daudi, ngwanangila shididi!" ⁴⁹ Yesu kwimila kutwala kushidoni, "Nsheme!" Vanavo kushema aijá wakuputala mevo kumwaulila doni, "Lyunge ntima! Takatuka, ankukushema." ⁵⁰ Nae kutwala ikanju yake kujela ako, kudaloka kwimila kutwala kumuukila. ⁵¹ Yesu kumudya, "Da ulota ndikutandele nyamani?" Nae doni, "Mwalimu, ngulota nguujile kulola." ⁵² Yesu kushidoni, "Wena, likulupililo lyako lindikuposha." Muwakati wowo muni jo kulalenneu kutwala kupita amwoda Yesu mwashuka.

Imbumba inkupuwangila kwinjila kumwe Yesu

Mateu 21:1-11; Lukashi 19:28-40; Nshuwau 12:12-19

11 Napanelo vanavo pavavandike pa Yelusalemu vavele pa Betepashi na Betaniya, palishinga lyamilandi Vyaulivela Yesu andívatuma vakwoda vake vavili ² kutwala kuvaulila doni, "Wena palikaja livéle mushu mo. Pamwinjila munankodya mwana wapunda ákana kunkwela muni vamuungangidile. Mwenu muungule mumwidenavo. ³ Akamudya muni kushidoni, 'Da punda jo mumuungulila nyamani?' Mwaulile doni, ' *UMU* ankunnota, ling'oto andamuujija.' "

†† Lola II Samuwele 7:12-16. Mwanagwe Daudi vavamwamba Masiya, aijá wavashinindila vayuda kwida.

⁴ Vanavo kuka nankodya mwana wapunda vamuungangidile pannango nanyenje ibalabala kutwala kumuungula. ⁵ Napanelo pakati pavanu ve vapagwite apo kuvaudya, "Mumuungulila nyamani punda jo?" ⁶ Vanavo kuvajang'ula kenga mo mwavaulidile Yesu, vanu vo kuvaleka vauke. ⁷ Bai vanavo kumwidanavo punda jo kumwe Yesu kuntandikanga dinguvo, Yesu kunkwela. ⁸ Vanu voe kupita vatandikanga dinguvo dyave mwindila, vanji kwanganga dinavi dyamilandi kupita valadyanga ndila. ⁹ Vanu vashuka mushu na vashaloka panyuma vashindapita vatangola pashanya po vaashidoni, "Ashibike!"
 "Aalaligwe áida palina limwe *UMU!*" †
¹⁰ "Walaligwe utawala wida watatagwetu Daudi!" ††
 "Kushibika kupagwe kushanya-uti!"
¹¹ Bai Yesu andíinjila pa Yelusalemu kukinneu ndainjila nng'ande ya Nnungu. Nae andíalyanga shana kula shinu kanji kwodamwaa wakati undípita andyúma namu avalá kumi na mbili kuka ku Betaniya.

Yesu ankutaa dilana nnandi

Mateu 21:18-19

¹² Palyamba lyake pavashuma pa Betaniya Yesu kunkola indala. ¹³ Akone kwakushu nnandi uvéle mwankuju ‡ úvele na mamba ake, nae kuka ndalola nakapanji andona shinu shoeshoe. Pavandike hagwene shinu ila akodidye mamba mwaa hauvele wakati wakupa vyepo. ¹⁴ Bai nae andítangalela nnandi awo kushidoni, "Kwako wako mwiko, halya munu kavili vye-po." Malove alo, vakwoda vake vashindaigwa.

Kuingangigwa kwavakushulusha mwing'ande ya Nnungu

Mateu 21:12-17; Lukashi 19:45-48; Nshuwau 2:13-17

¹⁵ Vanavo vankuwika pa Yelusalemu. Yesu painjidile mwing'ande ya Nnungu andítunduvanga kuvakumulanga vanu vashishumidyanga na vashishumanga vinu, kugang'alanga dimesha dyavakushenji-njuluku na dikiti dyavanu vashishumidyanga ding'unda. ¹⁶ Nae ashindaleya munu kunyukata shinu shanshulushu mwing'ande ya Nnungu ¹⁷ na ashindapundisha aashidoni, "Da havaandike, 'Ing'ande yangu indashamegwa ing'ande yakushwalidya venentete uti?' †† Kanji mwenu munditenda kuva shivava shavakwiva." †††
 †††¹⁸ Malove alo, vanang'olo vavakulungalalela-shadaka pamo na vamwalimu vadishaliya vashindaigwa. Vanavo vashindalambela dindila dyakummalididya mwaa vashinanjopa kwoda vanu uti vashindashanga mapundisho ake. ¹⁹ Pauwikile wakati wayalyulo vanavo vandyúma panjini po.

† *Lola Dimu 118:25-26.* †† *Lola II Samuwele 7:12-16.* ‡ *Nnandi au uvele kenga shimanyikilo shalikulupililo lyavanaishilaeli. Yesu patangwele yannandi au, ashamba likulupililo lyavanaishilaeli halishivanavo vyepo. Nadoni vanavo indivavaikila vaukumigwe. Linganianga: Yelemiya 8:13; Osheya 9:10-16; Mikeya 7:1-4.* †† *Lola Ishaiya 56:7.* ††† *Lola Yelemiya 7:11.*

Lipundisho kwannandi wataile Yesu dilana

Mateu 21:20-22

²⁰ Napanelo lyamba lyake vapita pannandi po ndakodya ujumile kutunduvangila dinyija. ²¹ Patulu kukumbukila kutwala kumwaulila Yesu, "Labi, lola nnandi wataile dilana wo, undijuma." ²² Yesu kushidoni, "Mwenu, Nnungu nkulupile. ²³ Ninkumwaulila mwiu kenga munu woewoe átangalela lishinga ali doni, 'Bubuka apa uke ukalijele mwimanga,' atangola bila kwambambidyanga muntima mwake, akulupila kenga vyatangwele vindátandeka, vindatandakela mo mwatangaladile. ²⁴ Napavedoni ninkumwaulila, uti vyamulota kujugwa kwaindila yakushwali kulupila kenga mundipata nadoni vindakutandakela momo. ²⁵ Pamushwali, shikapagwa shinu muntima mwako na munumwavo, nnivalive pakulota Tatagwenu ávele kuwa nanae annivalive kupujungula kwenu." ²⁶ ††

Nyani akupele lilamulo ali?

Mateu 21:23-27; Lukashi 20:1-8

²⁷ Vanavo vankwinjila kavili pa Yelusalemu. Napanelo Yesu apita awanawananga mwing'ande ya Nnungu, vandímwidila vanang'olo vavakulungalalela-shadaka, vamwalimu vadishaliya pamo na vanang'olo ²⁸ kutwala kumudya, "Vinu avi unkutenda kwamadalaka shani? Da madalaka ene lo autandela vinu avi akupelé nyani?" ²⁹ Yesu kushidoni, "Nanangu ndamudya shinu shimo mukangujang'ula, nanangu madalaka angutandela vinu avi, ndamwaulila. ³⁰ Da ubatisho umwe Nshuwau walakadilé kuwa kwali kwavanu? Ngujang'ula!" ³¹ Vanavo kwaulanila shivenevene vaashidoni, "Tukaashidoni, 'Walakadilé kuwa,' nae andatudya, 'Mwaa shani hamunkulupidile?' ³² Ata tukaashidoni, 'Walakadilé kwavanu...' " Vanavo vashindavajopa venentete mwaa venentete vashindamwamini Nshuwau kuva nkúlava. ³³ Bai vaníjang'ula, "Wetu hatumanyite." Yesu kutwa kushidoni, "Ata nanangu momo hanimwaulila madalaka angutandela vinu avi."

Nkong'o wawakukodi vakalau

Mateu 21:33-46; Lukashi 20:9-19

12 Napanelo Yesu andítunduvanga kutangola na vanavo atumila mikong'o aashidoni, "Munu jumo andílima lishamba lyamilandi vyavinyu kutwala kudangela lingongo, kwimba shima shakuminyangila vyepo na kudenga libodo lyakulepa; kuvakodisha vakulima mwene kutwala mwanda kuka. ² Pauwikile wakati wakupuna, nae kuntumidya ntumika jumo kwavakulima vo akatwale isemu yavyepo vyamulishamba lyake. ³ Vanavo kunkamula, kunkanyalanga, kunneka auka makonodavo. ⁴ Nae kuntumidya ntumika junji; vanavo kumbandulanga mmuti na kuntukananga. ⁵ Kuntumidya kavili junji; ajo vanavo

††† *Mumaandiko oe akala inamba idikidiki ya 26 hainapagwa shinu. Mumaandiko anji vandyándika doni, a Kanji mwenu mukanannivaliva munu kupujungula kwake, nanae Tatagwenu ávele kuwa hannivaliva shinu kupujungula kwenu.*

kumpedya. Nae kuvatumidya vanji voe; vanavo, vanji kuvakamanga, vanji vo kuvapedya.

⁶“Napanelo andijalila munu jumo e avele mwanagwe washinnagwaledya mwene. Bai kumwisho kwake anintumidya jojo jo aashidoni, ‘Apa mwanangu aju vandamwishimu!’ ⁷ Kanji avalá vakulima vandyáulanila shivenevene vaashidoni, ‘Aju ni jojo walota kunkamudya lishamba. Idananga akuno tummalidye kwambangidya lishamba live lyetu.’ ⁸ Nadoni vanavo vaninkamula kumpedya kutwala kunjela kunyenje lishamba. ⁹ Napanelo mwene lishamba jo alota kutandela mwashi? Nae andaida ndavabyanga uti vakulima avo kutwala lishamba lyo kuvapa vanu vanji. ¹⁰ Da mwenu hamushamidye Maandiko ala, “Vakudenga lijanga lyavaitile lyo, lindyuka ndava lijanga lyapalitinuna.

¹¹ Átandile davo ni *UMU*, ni vinu vyamakango kwetu wetu.” [†]
¹² Napavedoni vanavo vashindalambela dindila dyakunkamulila mwaa vandimanya kenga nkong’o awo, ashivakang’ela vanavo. Kanji kwodamwaa vashindajopa imbumba yavenentete, vaninneka kutwala kuukananga.

Vimwe Shashali mwing'e mwene Shashali

Mateu 22:15-22; Lukashi 20:20-26

¹³ Napanelo vandivatuma mapalishayo vanji pamo na vanu vashipinga shimwe Elode vauke vakampatikiangiye mumalove ake. ¹⁴ Vanavo kumuukila kutwala kushidoni, “Mwalimu, wetu tundimanya shana kenga wako ni umunu waumwii úkananapela mumaoni avanu mwaa haunalola ing’ope yamunu kanji un-kupundisha kwaumwii indila yalota Nnungu. Napanelo ni shambone nkati mulilamulo lyetu kunnipa Shashali ukodi ^{††} kwali mene? Wetu po, tunkuulula kulipa kwali mene?” ¹⁵ Nae amanya avi shinankulaba shave, andivajang’ula kushidoni, “Mwaa shani munkungulinga? Ngupa yela [‡] imo ngulole!” ¹⁶ Vanavo kwidanavo ndamupa kutwala nae kuvaudya, “Da ing’ope ai imwe nyani na namakong’o aju umwe nyani?” Vanavo kushidoni, “Shashali.” ¹⁷ Kutwala Yesu kushidoni, “Vimwe Shashali, mwing'e mwene Shashali na vimwe Nnungu, mwing'e mwene Nnungu.” Bai vanavo vashinanshanga.

Ing'ano yakulomba mukudyuka

Mateu 22:23-33; Lukashi 20:27-40

¹⁸ Napanelo mashadukayo, vanu vánaashidoni hakupali kudyuka kwavakupela, vanimmandika Yesu kutwala kumudya, ¹⁹ “Mwalimu, Musha atwandikidilé doni, nkulumunu akapela anneka namwili bila kummalakela mwana, nung'unumunu ainjile ding'ande pakulota ammalakele vana wakujala. ^{†††} Nadoni vandipagwa vanung'unumunu saba vashitumbo shimo.

[†] *Lola Dimu 118:22-23.* ^{††} *Ukodi au wavaloma ushililodya venentete kupagwa mumalamulo ake Shashali. Ni wakunnodya nae kuva umu wave.* [‡] *Yela ayo, lina lyake dinali.* ^{†††} *Lola Kumbukumbu 25:5.*

Ntandi jo kulomba kutwala kupela kwabila kummaleka mwana. ²¹ Kwida wambili kwinjila ding'ande nanae kupela bila kummalekela nkongwe jo mwana. Kwatika wantantu nanae kutandakela momo. ²² Vanung'umunu ava uti saba hapali hammaleke mwana. Kumwisho kwake nanae nkongwe jo kupela. ²³ Napanelo kushi muliduva lyakudyuka vanu lyo nkongwe ajo mwene alota kuva wakwashi pakati pavalume avo? Mwaa vanu avo uti vaninnomba!” ²⁴ Kutwala Yesu kushidoni, “Shitadidye mwenu muduwangike da i mwaa mwenu me kumanya Maandiko na ata dimongodyake Nnungu? ²⁵ Mwenu, pavalota kudyuka vanu mukupela, hakupali kulomba na kulombwa kanji uti valota kuva kenga vanjelo kuwa. ²⁶ Kwamwaa wakudyuka vanu, da hamushamidye mulibuku limwe Musha pavele palyukutu? [‡] Popo po, Nnungu atédoni, ‘Nangu ni Nnungu umwe Abulaamu, Nnungu umwe Ishaki na Nnungu umwe Yakobo.’ ^{†††} Nadoni nae hanava shinu Nnungu wavakupela, ni Nnungu wavangumi. Mwenu mundiduwangika namene!”

Lilamulo likumene ni lyakwashi?

Mateu 22:34-40; Lukashi 10:25-28

²⁸ Napanelo mwalimu jumo pakati pavamwalimu vadishaliya andivandika kwigwilila shavashitaukananga. Bai nae pagwene kenga Yesu andivajang’ula shana, andimudya kushidoni, “Pakati pamalamulo uti, lilamulo shani likumene lipundile anji uti?” ²⁹ Yesu kushidoni, “Lilamulo likumene lipundile anji ni ali, ‘Igwa wako Ishilaeli! *UMU* Nnungu wetu, nae ni jumo tu bai! ³⁰ Nnagwaledye *UMU* Nnungu wako na ntima wako uti, ungumi wako uti, ding'anong'ano dyako uti na dimongo dyako uti.’ ^{†††} Lyambili ni ali, ‘Nnagwaledye mujo kenga mo mwaulinagwaladyedya wako umwene.’ [‡] Hapali malamulo anji makumene akupunda ala mavili.”

³² Munu jo kutwala kushidoni, “Shambone namene Mwalimu! Unditangola viu pautédoni, Nnungu avelé jumo bai hapali junji kavili wakumpunda nae. ³³ Namwii kunnagwaledya Nnungu na ntima wako uti, makumbukililo ako uti, dimongo dyako uti na kunnagwaledya mujo kenga mo mwaulinagwaladyedya wako umwene kunkuvanavo mana makumene kuliko vyadaka na vyadaka vyakutikinyuki-uti.” ³⁴ Bai Yesu pangwene munu jo kujang’ula na limanyilo andimwaulila kushidoni, “Wako hauvé kushu na utawala wa Nnungu.” Nadoni kutunduvangila apo hapali munu áshilyalaveka kumudya shinu shoeshoe.

Da Klistu mwanagwe nyani?

Mateu 22:41-46; Lukashi 20:41-44

³⁵ Napanelo Yesu akajang’ule, akuno apundisha mwing'ande ya Nnungu andyúdyu doni, “Ivenavo mana shani vamwalimu vadishaliya pavaashidoni, ‘Klistu, mwanagwe Daudi?’ ³⁶ Jo mwene Daudi alan-galalegwa na Imumu Wanashwe atédoni,

^{††} *Lola Kuma 3:1-4.* ^{†††} *Lola Kuma 3:6.* ^{†††} *Lola Kumbukumbu 6:4-5.* [‡] *Lola Valawi 19:18.*

“UMU andimwaulila Nang'olo † wangu doni, 'Ikala kunkanakono kwangu mpaka nangu ndivavike vamongo vako kumaulu kwako.' ††

³⁷ Napanelo ikava kenga jo mwene Daudi ankunshema Klistu kuva Nang'olo wake, † ilota kuululika dashi kavili nae kuva mwanagwe?” Nadoni imbumba ing'umene yavanu ailá ishimwigwilila na lipuwilo.

Lilaledye na vamwalimu vadishaliya

Mateu 23:1-36; Lukashi 20:45-47

³⁸ Yesu pashipundisha ashitangola doni, “Lilaledye na vamwalimu vadishaliya! Vanavo kuvanagwela namene kugwala mikwakwala muumbala vaudyangigwe na ishima, ³⁹ muvitala vyakulipudidya kwikala muviteng'u vyamushu na muvikukulu kuvanagwela mumautu aishima. ⁴⁰ Vanavo vyavanamwili vankulyanga na mukushwali mo, vandátima do jii kanji ni kulikulukuwa tu bai. Vovo vo vandapata ukumu yakujowa kupunda apo.”

Shadaka shaumidyé namwili

Lukashi 21:1-4

⁴¹ Napanelo Yesu andíkala mushu lishanduku lyashadaka. Nae ashilola imbumba yavanu mwavashijalela njulukulu mulishanduku na kuvona vatajili voe vajela njulukulu woe. ⁴² Bai popo po, kwida namwili jumo ákave pashinu ndajela dishingo mbili dyakunyambikanga. ⁴³ Nae kuvashema vakwoda vake kuvaulila kushidoni, “Ninkumwaulila mwiu doni, namwili aju ákave pashinu, nae ni ájadile poe mulishanduku lyashadaka kuvapunda vanu vanji uti. ⁴⁴ Vanu vanji vo vaumidyé padyumbele, nae aumidyé paungapata wake kujela uti shavenavo na kujela uti shingumi shake.”

Kubamalegwa kwaing'ande ya Nnungu

Mateu 24:1-2; Lukashi 21:5-6

13 Napanelo Yesu pashuma mwing'ande ya Nnungu nkwódá wake jumo andímwaulila kushidoni, “Mwalimu, lola majanga alalá mwamanyikangidile na ding'ande adilá kumanyikanga doni!” ² Yesu kushidoni, “Unkwona ding'ande adi ding'umene adi? Bai haliikala lijanga pashanya lijangamwagwe palikabamalegwa.”

Vimanyikilo vyakulilodya mwisho

Mateu 24:3-14; Lukashi 21:7-19

³ Yesu akaikala pashanya lishinga lyamilandi vya Ulivela livéle shalato naing'ande ya Nnungu, Patulu, Tiyagu, Nshuwau namu Andaleyá kumudya kwagweka kushidoni, ⁴ “Twaulila, vinu avi vilota kutandeka duvani? Shimanyikilo shani shilota kulilodya vinu avyo uti nivelé pepi na kuwikila popo?” ††

† Kwali: a Umu andimwaulila Umu wangu doni. †† Lola Dimu 110:1. ‡ Kwali: a Umu wake. †† Lola Daniele 12:1-7. Vakwoda vake Yesu vandívanavo mana akudya wakati wamwisho. Nkúlava Daniele andívalanganga kenga undawika wakati wamauvilo kwatika mwisho. Kudya kwave kushinanapela malove avakulava avalangán-ga mwisho, kenga Daniele na vakulava vanji.

⁵ Nae kutwala kutunduvanga kuvaulila doni, “Lilaledye pakulota hanapagwe wakunduwanga. ⁶ Vandaida vanu voe vatumila lina lyangu vaashidoni, ‘Nangu ni nene!’ Vovo vo, vandavaduwanaga vanu voe. ⁷ Mukaigwa ding'ondo na manyinyi ading'ondo mwenu hamunajope. Vinu avyo vindivaikila vitandeki kanji haunava shinu mwisho. ⁸ Venentete vandatandana ing'ondo na venentetemwawe, shilambo shindatandana ing'ondo na shilambomwagwe. Shindau-milila shindangenda mumautu akuvilingananga namomo indaumilila indala. Vinu avi uti ni shitunduvangilo tu shamauvilo akushuluwa. ††

⁹ “Mwenu lilaledye! Vanu vandamuukanavo mudikamati na muvitala vyakulipudidya vananshapa viboko. Kwamwaa wangu nangu mundaimila mushu wananangalaledi vamajimbo na mwavaumu kenga ushuda kwavanavo. ¹⁰ Napanelo ukanava kuwika mwisho indivaikila ntenga wambone uvalangangigwe kwavenentete uti. ¹¹ Vakantwala vamuukanavo nankamudya, hamunangaikange mulambela mwakujang'ulila. Sho shilóta kumwidila muwakati awo mwenu tangola shosho mwaa i mwenu múlota kutangola ila ni Imumu Wanashwe. ¹² Nkulumunu anankamudya nung'unumunu vampedye na tatamunu anatandela momo kwamwanamunu. Vana vandavavangedya vatatawawe na vandavapedya. ¹³ Mwenu mundavangadika na vanu uti kwamwaa wangu nangu kanji aijá álota kulipililila mpaka kumwisho, ajo andambolegwa.

Shakudabukanga shídanavo kubamola

Mateu 24:15-28; Lukashi 21:20-24

¹⁴ “Mukona shakudabukanga shídanavo kubamola shíimidile palyutu líkavaikidile, ††† munu áshomya amanye mana ake, napane avalá vavéle ku Yudeya vatukutile kumashinga. ¹⁵ Ávele panda apumula hanatakatuke kwinjila nng'ande ndatwala shinu shoeshoe. ¹⁶ Ávele kundila hanauje kuka kukaja ndatwala ikanju yake. ¹⁷ Vapambale vakongwe valóta kuvanavo vitumbo na valóta kujang'edya mumaduva alo. ¹⁸ Shwali pakulota vinu avyo havinatandeki muwakati washipwepwe. ¹⁹ Mwaa mumaduva alo andapagwa mauvilo ainamuna íkanava kwaneka tangu kunantandi kukandiyanga Nnungu shilambo mpaka nelo na haipagwa kavili. ²⁰ Leka UMU akapungwile maduva alo hanapagwe ata munu jumo akambwalegwe kanji kwamwaa wavakutandalegwa vavatandwele nae, maduva lo, andipungula. ²¹ Bai munu akamwaulila doni, ‘Mwenu, Klistu aju apa,’ kwali, ‘Avelé akulá,’ hamunankulupile. ²² Mwaa vandaumilila vaklistu vakushang'apa pamo na vakulava vakushang'apa. Vovo vo, vandatenda vimanyikilo na vyakutikinikanga kwambangidya vavaashadyange ikaulukika vakutandalegwa. ²³ Napavedoni mwenu lilaledye! Nangu ninaililidile kaladavo kwamwaa wavinu uti.

†† Lola Ishaiya 13:6-9; 26:17. Masiya akanava kuwika, wakati awo vayuda vashishema kuva wakati wamauvilo akushuluwa. ††† Lola Daniele 9:27; 11:31; 12:11.

Kwida kwa Mwana Wamunu

Mateu 24:29-31; Lukashi 21:25-28

²⁴ “Kanji napanelo mumaduva alo amwisho, ling'oto lyamauvilo lo, liduva lindadimba, mwedi hauvala, ²⁵ dinondo kuwa ko dindagwanga na vyadimongo vyakuni-ania vindating'inigwa. ^{†26} Bai apo vandamwona Mwana Wamunu aaloka mumaundi na dimongo dyoe pamo na lishangelo. ^{††27} Kutwala nae andavatuma vanjelo avalá vauke vakavatwalange vakutandalegwa vake mudisemu nsheshe dyamushilambo kutunduvangila kumwisho kwake shilambo shapai mpaka kumwisho kwake shilambo shakuwa.

Kwankungu lipundishe

Mateu 24:32-35; Lukashi 21:29-33

²⁸ “Napanelo kwankungu lipundishe nkong'o au, pau-naipukila mwenu mumanyinneu doni, shipondo shindiwika. ²⁹ Namomo mukona vinu avyo vitandeka manyinneu doni, mwisho undiwika, uvé mo mmilango myenu. ³⁰ Ninkumwaulila mwiu doni, vanu vaimbula ai havamalilika vinu avi vikanava kutandeka. ³¹ Kuwa na pai kundapita ila malove angu mwiko hapita.

Liduva alyo na isaa hapali ámanyite

Mateu 24:36-44

³² “Napane liduva lyene lyo na isaa, hapali ámanyite, ata vanjelo kuwa havamanyite, ata Mwana hamanyite ila ámanyite ni Atata bai. ³³ Lilaledye, ava mevo! Mwenu hamumanyite wakati wamwisho duvani paulota kuwika. ³⁴ Inkulinganana na munu ávenavo mwanda. Panauma pang'ande pake avapele madalaka vatumika vake kula munu na madengo ake anánna-mulila nkúshunga-nnango ave mevo. ³⁵ Napavedoni namwenu ava mevo mwaa hamumanyite wakati walota kuja nang'olo mwene ing'ande; inkuulukika kwali kuva lyulo, shilo shing'ati, kumatingatinga kwali lyamba. ³⁶ Doni, ava mevo, akaida shingangala hanankodye mulele. ³⁷ Vyanimwaulila mwenu avi, ninkuvaulila vanu uti kushidoni, ava mevo!”

Nguguvale wakummyaila Yesu

Mateu 26:1-5; Lukashi 22:1-2; Nshuwau 11:45-53

14 Akuno àbakidile maduva mavili pakulota kuwika Pasaka na shikukulu shamagung'u ákavele nkukumuku, vanang'olo vavakulangalalela-shadaka na vamwalimu vadishaliya vashindalambela dindila dyakushang'apa pakulota vankamule Yesu vammyae. ² Vanavo vashindatangola vaashidoni, “Haunave wakati washikukulu mwaa inkuulukika venentete kutenda mandamano akupinga.”

Yesu ankupakigwa mauta ku Betaniya

Mateu 26:6-13; Nshuwau 12:1-8

³ Bai nae àvele ku Betaniya, àikele pandamu nng'ande mwake Simoni aijá wamangundula, kuwika nkongwe jumo ànyukete ishupa yamauta akuning'angila ambone-uti aúka njuluku woe. Nkongwe ishupa yo kutumbula kutwala kumiminila mauta mmuti mwake Yesu. ⁴ Napanelo vanji ve vapagwíte mulyutu alyo vandíshanga, “Mauta ala mwaa shani ankujaikanga pashikapali? ⁵ Akandyululika kushulushika kupunda dinali dimiya nnatu † kuvajavila vákavele pashinu.” Nadoni vanavo vashinantangadikanga.

⁶ Kanji napanelo Yesu kushidoni, “Nneke. Mwaa shani munkumwangaishanga? Nae aningutandela shinu shambone. ⁷ Mwenu ngwengwe munkupagwa pamo na vákavele pashinu; mukalota munkuulula kuvatandela wambone wakati woewoe. Napane nangu hangupagwa ngwengwe namu mwenu. ⁸ Nae atandilé shaulwile. Apakilé kaladavo mauta mumili wangu apanganianga mashiko angu. ⁹ Ninkumwaulila mwiu doni, kula kushinu kwavalota kuvalanganga ntenga wambone mushilambo amu, namomo vinu vyatandile nkongwe aju vandavalanganga kenga kumbukumbu kwake nae.”

Yudashi ankupakanila yakunnimya Yesu

Mateu 26:14-16; Lukashi 22:3-6

¹⁰ Kutwala Yudashi Shikaliyote, jumo pakati pa avalá kumi na mbili kuvaukila vanang'olo vavakulangalalela-shadaka pakulota avakamudye Yesu. ¹¹ Bai vanavo vakamwigwe, vandípuwanga namene kutwala kulivika kunnipa njuluku. Nadoni nae andítunduvanga kulambela dindila dyakuvakamudiyda.

Yesu ankulya Pasaka na vakwoda vake

Mateu 26:17-25; Lukashi 22:7-14, 21-23; Nshuwau 13:21-30

¹² Napanelo muliduva litandi lyashikukulu shamagung'u ákavele nkukumuku pavashinshinda ngandolo wa Pasaka, vakwoda vake Yesu vandímudya kushidoni, “Ulota Pasaka ai tukakupanganiangidye kwashi ulye?”

¹³ Yesu kutwala kuvatuma vakwoda vake vavili kuvaulila kushidoni, “Wena kunjini. Koko ko mundakadyania na munu jumo ànyukete shilongo shamedi, mwode ¹⁴ mpaka paing'ande yalota kwinjila. Mwenu mwaulile mwene ing'ande jo doni, ‘Mwalimu ankudya, “Shumba shangu shangulota kulyela Pasaka na vakwoda vangu shakwashi?”’ ¹⁵ Nae anannangudya nshana wakulyandaula shana úvenavo vyombo uti, bai mwenu panganianga popo po.”

¹⁶ Napanelo vakwoda vake vakauke nkaja mo vandíkadyedya kenga mo mwavaulidile. Bai vanavo vandípanganianga Pasaka. ¹⁷ Pauwikile wakati wayalyulo, Yesu andyúka pamo na vakwoda vake kumi na mbili. ¹⁸ Napanelo àvele pandamu valya, Yesu andítangola kushidoni, “Ninkumwaulila mwiu doni, munu

† Lola Ishaiya 13:10; 24:23; 34:4; Eshekieli 32:7; Yoweli 2:10, 31; 3:15. †† Lola Daniele 7:13-14.

‡ Dinali dimiya nnatu uvele njuluku woe, úshilinganana na nshala wammádengo kwamwaka.

jumo pakati penu álya namu nangu, anangulimya.”
¹⁹ Vanavo vandítunduvanga kuvanavo shipalodi kula munu amudya nae doni, “Da nangu?”²⁰ Kutwala Yesu kushidoni, “Ni jumo pakati penu mwenu kumi na mbili, munu áldiya pamo namu nangu mundamu.
²¹ Ninkumwaulila mwiu doni, Mwana Wamunu andaukila kenga mo mwavaandikidile vamwamba nae, napane aijá munu álota kunnimya Mwana Wamunu, munu ajo apambale! Kudyanga jojo jo, hanavalekwe.”

Ndamu umwe *UMU*

Mateu 26:26-30; Lukashi 22:14-20; I Vakolintu 11:23-25

²² Napanelo pavashilya, Yesu andítwala ligung'u kwalaliya kumajanianga kuvapa vakwoda vake aashidoni, “Twala mulye. Au ni mili wangu.”²³ Namomo andítwala luwene kunnambwalela Nnungu kuvapa vakwoda vake vanavo uti kukumbila.²⁴ Kutwala kushidoni, “Avi ni myadi vyangu, myadi vyaimbodi vilóta kuvajaikila vanu voe.”²⁵ Ninkumwaulila mwiu uti doni, mwiko hangukumbila kavili ugwalwa au wavyepo mpaka muliduva alyo lyangulota kukumbila muutawala wa Nnungu.”²⁶ Bai vakamalile kwimba lwimu vandyúmananga kuka kulishinga lyamilandi vya Ulivela.

Patulu anankana Yesu

Mateu 26:31-35; Lukashi 22:31-34; Nshuwau 13:36-38

²⁷ Napanelo Yesu andívaulila vakwoda vake kushidoni, “Mwenu uti munangwambukanga mwaa vandyandika doni,
 “Nammyaa nkúshunga kutwala dingandolo kumwadilikananga.”[†]
²⁸ Napane pangudyuka po, ndalangalela kuka ku Galileya.”²⁹ Patulu kutwala kushidoni, “Ata ikava kenga vavangu uti vandakwambukanga, nangu mene!”
³⁰ Yesu kushidoni, “Ninkukwaulila mwiu doni, shilo sho shanelo ashi, ng'uku akanava kukangavela myanda mivili, wako unangukana myanda mitatu.”³¹ Patulu nae kulitaukanga na dimongo aashidoni, “Ata ikauluka kupela namu wako, mwiko handikukana.” Namomo vanji avalá uti kutangalela momo.

Pa Geteshemani

Mateu 26:36-46; Lukashi 22:39-46

³² Napanelo vanavo vankuwika palyutu lyavashema Geteshemani. Yesu ankuvaulila vakwoda vake kushidoni, “Mwenu ikalanga apa nangu mwanda ndashwali.”³³ Nae ankuntwala Patulu, Tiyagu namu Nshuwau kutunduvanga kwangaikanga na kumwida matuva³⁴ kutwala kushidoni, “Ungumi wangu unkuvanavo shipalodi shakutadya kupela. Mwenu ikalanga popo apa na mupimile.”³⁵ Nae kuka mushu padiki doni, kugwa kuunama pai kutwala kushwali pakulota wakati wida, ikaululika kwake nae haunamwike.³⁶ Napane kushidoni, “Aba, Atata, vinu uti wako unkuulula. Nyemya luwene alu pamilya pangu ila haunatende

mwangulatela nangu, tenda mwaulatela wako umwene.”³⁷ Bai Yesu kuujila kwavakwoda vake ndavakodya vâlalenge lwono kutwala kumwaulila Patulu kushidoni, “Simoni, da unkulala? Hauvé dimongo dyakupimila ata isaa imo?”³⁸ Pimila na shwali pakulota hamunainjile mukutubigwa. Mwiu imumu inkuva tayali, mili ni udabadabenge.”

³⁹ Nae kutwala kuka kavili ndashwali aujidya malove lolo matandi.⁴⁰ Paujite kuvakodya kavili vâlalenge mwaa mevo ave andíidapelwa na lwono na havashimanya shakunjang'ula.⁴¹ Paidile mwanda wamtatu kuvaulila kushidoni, “Munkulala na munkupumula mpaka ambi? Panditosa! Napanelo wakati undiwiki. Mwenu! Mwana Wamunu vaninnimya vankamudya kumakono kwavakutega.⁴² Takatukanga tuke! Mwenu, aijá wakungulimya jo ankwida!”

Kukamuligwa kumwe Yesu

Mateu 26:47-56; Lukashi 22:47-53; Nshuwau 18:1-11

⁴³ Napanelo Yesu akuno atangola, Yudashi aijá wamushipinga sha avalá kumi na mbili kwidinneu na imbumba yavanu vanyukatenge maambila na dilungu. Vanavo vatumigwidye na vanang'olo vavakulungalalela-shadaka, vamwalimu vadishaliya na vanang'olo.⁴⁴ Nadoni nannimya andívapa shimanyikilo aashidoni, “Aijá wangulota kumwambatila ni jojo, nkamulinneu mumukenavo munshunga.”

⁴⁵ Yudashi pawikile kukinneu kumwe Yesu ndaashidoni, “Labi!” Kutwala kumwambatila.⁴⁶ Bai vanu avalá vanínkamula Yesu kumunga.⁴⁷ Napanelo munu jumo e aimidile popo, kwalamolenneu lyambila lyake kumyaa ntumika wake nkúlangalalela-shadaka nkumene kunnnumula lyatu.⁴⁸ Yesu kutwala kushidoni, “Kenga nkalau shamwida na maambila pamo na dilungu kwida nangukamula?”⁴⁹ Kula liduva ngushipagwa namu mwenu mwing'ande ya Nnungu ngupundisha, ata hamunguungile. Napane avi uti ni pakulota Maandiko awikile popo.”

⁵⁰ Bai vakwoda vake uti vanínneka kutwala kutukutanga.⁵¹ Napanelo popo po, andípagwa nnemba jumo áshipita amwoda Yesu àjambele likuba tu. Vanavo kunkamula,⁵² nae kujaa likuba lyo kutukuta matakudavo kuka.

Yesu paikamati

Mateu 26:57-68; Lukashi 22:53-55, 63-71; Nshuwau 18:12-14, 19-24

⁵³ Napanelo Yesu vandímuukanavo kumwe nkúlangalalela-shadaka nkumene kulyutu lyavakadyaniéenge vanang'olo vavakulungalalela-shadaka, vanang'olo pamo na vamwalimu vadishaliya.⁵⁴ Patulu andímwoda Yesu kwakushu mpaka ndainjila mulugwani lumwe nkúlangalalela nkumene kutwala kwikala pamo na vakushunga kujota moto.

⁵⁵ Bai vanang'olo vavakulungalalela-shadaka pamo na ikamati uti, vashindalambela ushuda wakulota kummalididye Yesu kanji havapatíle.⁵⁶ Vanu voe vashindaumya ushuda waushwang'a vammalanganga Yesu kanji ata wo ushuda wave, haushigwinika.⁵⁷ Bai

† *Lola Shakaliya 13:7.*

vanji vandítakatuka kumya ushuda waushwang'a vaashidoni, ⁵⁸ "Wetu tundimwigwa munu aju aashidoni, 'Nangu ndabamola ing'ande ai ya Nnungu yavadangile na makono kutwala nangu kudenga inji kwamaduva matatu kanji i namakono.'" ⁵⁹ Ata kwaushuda awo, haushigwinika.

⁶⁰ Napanelo nkúlangalalela-shadaka nkumene andítakatuka kumudya Yesu kushidoni, "Da hashipali shakujang'ula vyavakutambudyanga avi?" ⁶¹ Nae kumalala. Halipali lilove ata limo lyajang'wile kutwala nkúlangalalela nkumene kumudya kavili, "Da wako Klistu, aijá Mwanagwe Wakwalaligwa?" ⁶² Nae kushidoni, "Elo, nangu ni nene. Bai mwenu mundamwona Mwana Wamunu àikele kunkanakono kwake Wadimongo-uti aida mumaundi kuwa." ⁶³ Nkúlangalalela nkumene kutwala kupapulanga dinguvo dyake kushidoni, "Shapo tulambela ushuda shani kavili?" ⁶⁴ Da mwenu shi mundimwigwa akupulu, napane mwona dashi?" Vanu uti vandimuukumu kenga inimmaikila apele. ⁶⁵ Vanji pakati pave kutunduvanga kunshunangila mata, kumwinikidya kumevo, kunkoma kutwala kumudya, "Valanga, akukanywelé nyani?" Nadoni vakushunga vaníntwala kupita vankanyola malatuma.

Patulu ankunkana Yesu

Mateu 26:69-75; Lukashi 22:56-62; Nshuwau 18:15-18, 25-27

⁶⁶ Napanelo Patulu àikele mulugwani pai, ntumika jumo mwali umwe nkúlangalalela-shadaka nkumene kuwika. ⁶⁷ Pangwene Patulu ajota moto, anínnola kutwala kushidoni, "Nawako momo undípagwa pamo namu Nnashaleti Yesu." ⁶⁸ Patulu kutwala kukana aashidoni, "Nangu namanya shinu. Ata sho shautangola sho, hangumanyite." Bai nae kutumuka kuka ndaimila pannango. ⁶⁹ Napanelo jo ntumika aijá andímwona kavili Patulu, nae kuvaulila vanu vapagwite apo kushidoni, "Aju nanae, wamushipinga shosho." ⁷⁰ Patulu nae kukana kavili. Bai muwakati padyoko vanu vapagwite apo, vandímwaulila kavili kushidoni, "Mwiu uti, wako wamushipinga shosho mwaa gwegwe, ungalileya." ⁷¹ Napane Patulu kutunduvanga kulitaa dilana na kulilapa aashidoni, "Nangu namanya shinu munu aju wamuwamba mwenu aju." ⁷² Ng'uku kukangavalenne mwanda wambili kutwala Patulu kukumbukila malove e amwaulidíle Yesu doni, "Akanava ng'uku kukangavela myanda mivili, wako unangukana myanda mitatu." Bai Patulu andíkumulila kumuti kulila.

Yesu vankumuukanavo kumwe Pilatu

Mateu 27:1-2, 11-14; Lukashi 23:1-5; Nshuwau 18:28-38

15 Napanelo lyamba linyeiku vanang'olo vavakulangalalela-shadaka, vanang'olo, vamwalimu vadishaliya pamo na ikamati uti yavayuda vandíikala nguguvale kutwala kumunga Yesu kumuukanavo kumwe Pilatu. ² Pilatu kumudya Yesu, "Wako umu wavayuda?" Yesu kushidoni, "Wako ni úvalanganga." ³ Bai vanang'olo vavakulangalalela-shadaka vashinantambudyanga vinu vyoe namene. ⁴ Pilatu ku-

mudya kavili mwanda unji, "Haunajang'ula shinu? Lola vinu vyoe vyavakutambudyanga." ⁵ Yesu nae hashipali shajang'wile kuntadya Pilatu jo kushanga.

Pilatu ankunkamudya Yesu vankamele panshalaba

Mateu 27:15-26; Lukashi 23:13-25; Nshuwau 18:39-19:16

⁶ Napanelo kula pashishiwika shikukulu, Pilatu ashindavaungulila nkúngwa jumo wavashinjugwa venentete. ⁷ Bai andípagwa nkúngwa jumo walina Balabashi aungwídye pamo na vakalaumwagwe ve vavabyée vanu pamandamano akupinga. ⁸ Nadoni imbumba yavenentete indímuukila Pilatu nanjugwa avatandele kenga mo mwanamaduva. ⁹ Pilatu kutwala kuvaudya, "Mulota nimuungulile umu wavayuda?" ¹⁰ Nae ashindamanya kenga vanang'olo vavakulangalalela-shadaka vaninkamudya Yesu kwake kwamwaa waing'ou. ¹¹ Kanji napane vanang'olo vavakulangalalela-shadaka vo vandíkang'ela imbumba yavanu pakulota vanjugwe Pilatu avaungulile Balabashi.

¹² Pilatu kutangola navanavo kavili avaudya, "Napanelo mulota nintandele mwashi munu aju wamunshema umu wavayuda?" ¹³ Vanavo kujunga pashanya po vaashidoni, "Nkamele panshalaba!" ¹⁴ Pilatu nae kushidoni, "Mwaa wanyamani? Da shaukulau shani shatandile?" Kanji vanavo vashindamamodya kujunga pashanya po vaashidoni, "Nkamele panshalaba!" ¹⁵ Bai Pilatu alota atendedye imbumba yavanu ivanagwele, andívaungulila Balabashi na akanshape Yesu viboko anínjaula vankamele panshalaba.

Vaing'ondo vankumwiludyanga Yesu

Mateu 27:27-31; Nshuwau 19:2-3

¹⁶ Napanelo vaing'ondo vaníntwala Yesu kumuukanavo nng'ande mwananangalaledi walijimbo na popo po, vandívaimang'anianga vaing'ondo uti. ¹⁷ Vanavo apalá vankungwadya ikanju yailangi yanshambalau, vankukandyanga lidaka lyamiva kungwadya mmuti ¹⁸ kutwala kutunduvanga kumuudyanga vaashidoni, "Shikamu umu wavayuda." ¹⁹ Vashinankanyola mmuti na nkungulandi, vashinanshunila mata na vashinangugugalila kutwala kulipudya kwake. ²⁰ Ling'oto lyakumwiludyanga, vandímula ikanju yanshambalau yo kutwala kungwadya dinguvo dyake. Bai vaníntwala kumuukanavo panda likaja nankamela panshalaba.

Kukamalalegwa kumwe Yesu

Mateu 27:32-44; Lukashi 23:26-43; Nshuwau 19:17-27

²¹ Napanelo munu jumo wa ku Shilene walina Simoni tatake Alishandale namu Lupu ashipita apo aaloka kwaludeya, vanavo vanínnamulila anyukate nshalaba. ²² Bai vanavo vaníntwala Yesu kumuukanavo palyutu lya Gologota kwakuvalangangila mana ake lyutu lyashivanga. ²³ Napanelo vandímupa vinyu yavataíle mila kanji nae hakumbidíle. ²⁴ Vanavo apalá vankunkamela panshalaba, vankujavananga dinguvo dyake vatenda shimwavi pakulota vamanye shakupata kula munu.

²⁵ Napane indíwika satatu yalyamba, vanavo kunkamela panshalaba. ²⁶ Pamuti pake vandyándika malove ankanidyo amwamba nae doni, “*UMU WAVAYUDA*.” ²⁷ Vandívakamela vakwiva vavili pamo namu nae, jumo kunkanakono junji kunshanda. ²⁸ ^{†29} Vanu váshipita apo vashindamwabalanga vaapukunianga myuti vaashidoni, “Wako únabamola ing'ande ya Nnungu kutwala kudenga mumaduva matatu, ³⁰ liposhe gwegwe umwene na shuluka panshalaba po bai.” ³¹ Namomo vanang'olo vavakulangalalela-shadaka pamo na vamwalimu vadishaliya vashindamwabalanga vatangola shivenevene vaashidoni, “Vanji andivaposha kanji kuliposha mwene hanaulula shinu! ³² Ashi aju, Klistu, Umu Wavanaishilaeli! Bai ashuluke panshalaba pakulota twone na tukulupile.” Namomo avalá vavakamadíle pamo namu nae vashinantukana.

Kupela kumwe Yesu

Mateu 27:45-56; Lukashi 23:44-49; Nshuwau 19:28-30

³³ Napanelo kutunduvangila sasita yamui mpaka satisa yalyulo, shilambo uti shindíinjila shii. ³⁴ Bai paiwikile satisa Yesu andíkugwa pashanya po aashidoni, “Eloi, Eloi, lama sabakitani?” mana ake, “Nnungu wangu, Nnungu wangu, mwaa shani uningwambukanga?” ^{†35} Napanelo vanu vanji ve vapagwite apo, pavamwigwite atangola davo vanavo kushidoni, “Mwigwilile! Anshema Liyashi.” ³⁶ Munu jumo pakati pave kutukuta kuka ndashuvika shipande shaivonu muulimu kutwala kupambya munkungulandi kuka nankumbidya Yesu akune atangola doni, “Nneke! Leka tulole ikava kenga Liyashi jo andaida nanshuluwa panshalaba.”

³⁷ Bai Yesu patangwele pashanya po andíjaa shingumi ³⁸ kutwala inguvo yamwing'ande ya Nnungu ailá kupapuka kuma kushanya mpaka pai. ^{†39} Napanelo nang'olo wavaing'ondo e aimidíle mushu mwake Yesu, paigwite shikutilo na mwajaidile shingumi Yesu, andítangola kushidoni, “Munu aju mwiu avele mwanagwe Nnungu.”

⁴⁰ Namomo popo po, vandípagwa vakongwe vaimilenge kushu valola. Pakati pave vanji vo vavele ava: Maliya wa ku Magadalela, Maliya anyoke nsemba ndikidiki Tiyaagu namu Yoshe pamo namu Shalome. ⁴¹ Yesu ávele ku Galileya vakongwe ava vashindamwoda na vashinantumika. Namomo vakongwe vanji vo ve vaukíle namu nae ku Yelusalemu vandípagwa mulyutu alyo.

Kunshika kumwe Yesu

Mateu 27:57-61; Lukashi 23:50-56; Nshuwau 19:38-42

⁴² Napanelo liduva lilota lidimbe, kwoda livele liduva lyakulipanganianga pakulota liwike liduva lyakupumula, ⁴³ Yoshe wa ku Alimateya munu wakwishimika mwikamati yavayuda kanji nanae momo ashindalindi-

† *Mumaandiko anji akala vandyánjedya malove ala: a Nadoni kutwala kuwikila popo Maandiko aashidoni, “Vanimpambanianga mushipinga shamajambashi.” Lola Ishaiya 53:12. †† Lola Dimu 22:1. ‡ Inguvo ayo ishiinikidya lyutu lyakwilimiyanga. Ikapapuke, indíng'a litala lyakuwika vanu mulyutu alyo.*

la utawala wa Nnungu, andímuukila Pilatu pakajugulanga shinu nanjugwa mili umwe Yesu. ⁴⁴ Pilatu kutwala kushushukanga paigwite kenga Yesu andijaa tayali shingumi. Nae kunshema nang'olo wavaing'ondo kumudya ikava kenga mwiu Yesu andijaa tayali shingumi. ⁴⁵ Pilatu paigwite shana malove amwe nang'olo wavaing'ondo, nae anínnamulila Yoshe akatwale mili wake Yesu. ⁴⁶ Bai Yoshe andíshuma ishanda yakunamikanga kusha mili umwe Yesu panshalaba kwavilidyanga na ishanda yo kutwala kuka ndavika mushonga shavapakaidye mulijanga. Akavike, andíngiliya lijanga kuka ndadiva pannango washonga.

⁴⁷ Napanelo Maliya wa ku Magadalela pamo namu Maliya anyoke Yoshe vandyóna lyutu alyo lyavavikíle mili umwe Yesu.

Kudyuka kumwe Yesu

Mateu 28:1-8; Lukashi 24:1-12; Nshuwau 20:1-9

16 Bai likadimbe liduva lyakupumula, Maliya wa ku Magadalela, Maliya anyoke Tiyaagu pamo namu Shalome vandíshuma mauta akunung'angila pakulota vauke vakapake mili wake Yesu. ² Napanelo liduva litandi lyaishumana, lyamba linyeiku, kumanga kulangala, vanavo kuka kushonga. ³ Pavashuka vashindaudyania vaashidoni, “Da lijanga livéle pannango pashonga apalá, atugang'alela nyani?” ⁴ Napane pavaladile kwona lijanga vágang'aladidye nnyenje, lijanga lyolyo lyo livele likumene namene. ⁵ Vanavo vakainjila mushonga kutwala kumwona nsemba jumo áikele kunkanakono, ágwete ikanju yanashwe, vanavo kushushukanga doni. ⁶ Nsemba jo kushidoni, “Hamunajope! Mwenu munnambela Yesu wa ku Nashaleti wavankamadile panshalaba. Nae andidyuka, apa hapali. Lola palyutu lyavannadídye. ⁷ Kanji napane, wena mukavaulile vakwoda vake pamo namu Patulu kenga nae ankuka alangalela ku Galileya. Koko ko, mundamwona kenga mo mwamwaulidíle.” ⁸ Bai vana-vo vandyúma apalá pashonga vatukuta akuno vatatamela na kushanga. Vovo vo, havammalangidíle munu woewoe, vashindajopa.

Yesu ankulyumilidya kumwe Maliya na kwavanji ††

Lukashi 24:13-35; Nshuwau 20:11-18

[⁹ Yesu akadyuke liduva litandi lyaishumana lyamba linyeiku, munu ntandi kumuumililila avele Maliya wa ku Magadalela aijá wamuumídye majini saba. ¹⁰ Jojo akauma kuka ndavavalangangila váshoodananavo, vanavo vâpagwite mushipalodi na mushililo. ¹¹ Bai vanavo vakaigwe kenga Yesu mumi, nae andimwona, havakulupidíle.

¹² Napanelo ling'oto lyavinu avyo Yesu andívaumilila vakwoda vake vavili ávalalele munji vanavo vauka kwaludeya. ¹³ Kutwala vanavo kuja kuka ndavavalangangila vavave, ata ive davo havakulupidíle.

†† *Maandiko akala-uti inamba idikidiki ya 9 mpaka ya 20 hadipali kanji napanelo mumaandiko anji akulupilika dinamba adi dipali.*

Malailililo amwisho

Mateu 28:16-20; Lukashi 24:44-53; Nshuwau 20:19-23; Vitendo 1:6-11

¹⁴ Muwakati unji kavili Yesu kuvaumilila avalá kumi na moja uti vàikalenge valya. Nae kutwala kuvashulanga kwamwaa waungakulupila wave na kunanopa kwamitima mwaa vo vangwéne àdyukile, havavakulupidíle.

¹⁵ Napanelo Yesu andívaulila doni, “Wena mushilambo uti mupita mummalangangila kula munu ntenga wambone. ¹⁶ Aijá álota kukulupila na kubatishwa, andaambwalegwa kanji ákukulupila, andaukumigwa.

¹⁷ Avalá valota kukulupila vandavanavo vimanyikilo avi: kwamwaa wangu nangu vandakumulanga majini, vandatangola dinangodi dyaambi, ¹⁸ vandakamula dinyoka kwali vakakumbila ishumu, hashipali shilota kuvatandeka, vandavavikila makono valwele kutwala vanavo kuona.”

¹⁹ Napanelo *UMU* Yesu akamalile kutangola namu vanavo, nae po kutanduligwa kuka kuwa ndaikala kunkanakono kwake Nnungu. ²⁰ Bai vakwoda vake vandyúmananga kuka vavalanganga ntenga wambone mumautu uti, *UMU* avapwashela na alodya ntenga awo kuva wiu kwamwaa wavimanyikilo vís-hoodana na ntenga awo.]

Lukashi

Shavandikidile kumwe Teopilo

1 Nang'olo Teopilo, vanu voe vandívanavo ntima wakwimyanga shana namene vinu vitandéke pakati petu ² kenga mwavatuvalangangidile avalá vo vavéle kutunduvangila kunantandi mashuda vagwéne vene na vatumika valilove. ³ Napanelo nanangu yada-vo, pangulambadile kumanya shana vinu uti kutunduvangila kunantandi, ininguvaila ngwandike nikupangila shana ⁴ kwambangidya uvenavo uwakika kwavinu vyavakupundishidye.

Kuvalanga kwakuvalekwa kumwe Nshuwau

⁵ Muwakati umwe Elode umu wa ku Yudeya, andípagwa nkúlangalalela-shadaka jumo walina Shakaliya wamushipinga shavakulangalalela shavanaabiyashi. [†] Ndyagwe Shakaliya nanae avele wamushipinga shaudukulu umwe Aloni, ^{††} lina lyake Lishabeti. ⁶ Bai vanu vavili ava uti vavele vaishaliya pamevo pake Nnungu. Vanavo vashindanama bila makosha mumalailililo uti na malamulo ake *UMU*. ⁷ Kanji vanu vovo vo havavenavo vana mwaa Lishabeti avele nkongwe ákavaleka na uti ava vandíkangapalanga.

⁸ Muliduva limo Shakaliya andípagwa akola madengo kenga nkúlangalalela-shadaka paing'ande ya Nnungu mwaa ivele ishumana yashipinga shake. ⁹ Napanelo kenga lidyavalelo lyavakulangalalela-shadaka vandítenda nningo wakuntandola munu; nningo au kungwilila Shakaliya ainjile mwing'ande imwe *UMU* akatutumidye lubani. ¹⁰ Pauwikile wakati wakututumidya lubani, imbumba yavanu uti ivele panda ishwali. ¹¹ Nng'ande mo Shakaliya andímwona njelo wake *UMU* àimidile kunkanakono kwake alutali lwavashitutumyangidya lubani. ¹² Nae akamwone njelo aijá andíshushukanga na kujopa namene. ¹³ Kanji njelo andímwaulila kushidoni, "Shakaliya, haunajope! Myembe vyako vindiigwinika. Napavedoni jo ndyavo Lishabeti jo, anammaleka mwana nnume na wako unanshema lina lya Nshuwau. ¹⁴ Wako indakunagwela namene na undapuwanga namomo vanu voe vanda-puwanga pakuvalekwa mwana ajo ¹⁵ mwaa jojo jo, *UMU* anankulupila namene. Nae hakumbila shinu ugwalwa wakuma muvyepo na ata shinu shoeshoe shak-

[†] Muwakati umwe Shakaliya vindípagwa vipinga ishilini na nsheshe vyavakulangalalela-shadaka. Kula shipinga shishindavana-vo ishumana yake yakukola madengo mwing'ande ya Nnungu. ^{††} Aloni avele nkúlangalalela-shadaka ntandi wavayuda. Napanelo ni udukulu wake nae bai we uvaikidile kupagwa mushimadengo shake Nnungu.

wambalwisha. Imumu Wanashwe andapagwa namu nae kutunduvangila ata mo mmunda mwanyoke. ¹⁶ Jojo jo andavatadya vanaishilaeli voe vamuujile *UMU*, Nnungu wave. ¹⁷ Nae andauka mushu mwake nkati mwimumu na kwadimongo dimwe Liyashi ndashinjiulila mitima vyavatatumunu kuvana, kuvashinjiulila vákalgwa kwalimanyilo lyavaishaliya kwambangidya avapanganiange venentete vakumpwashalela shana *UMU*."

¹⁸ Kutwala Shakaliya kumudya njelo kushidoni, "Ata nangu malove ako lo ndakulupila? Shapo ngwona nangu pamo na ndyangu uti tundikangapalanga!" ¹⁹ Njelo kushidoni, "Wako! Nangu Gabuliyeli ngúpagwa pamo na Nnungu, unkwigwa? Nditumigwa ngwide ngutangole namu wako ndikuvalangangila ntenga wambone vila au. ²⁰ Bai hautangola, undava ububu mpaka muliduva lyavilota kutandeka vinu avi mwaa haukulupidile vinu vyanguvalenge vilóta kutandeka muwakati uvaikidíle." ²¹ Napanelo venentete ve vavéle panda vanninda Shakaliya aume mwing'ande ya Nnungu amulá, vakamwone kutima vanavo kushanga. ²² Nae paumidile panda hashuulula kutangola na munu. Vanavo kumanyinneu doni, mo nng'ande mo, shipali shagwene. Nae ashitangola vila na makono na andyúka mushu ava vi bubu. ²³ Bai akamalilike maduva ake akutumika, nae andyújila kwing'ande yake.

²⁴ Napanelo upitilé wakati padyoko tu, Lishabeti nkongwe ndya Shakaliya kwimita. Akaimite, kutwala kwikala nng'ande myedi mwanu alipiyapiyanga aashidoni, ²⁵ "Vinu avi angutandilé *UMU*. Nae maduvano aningutanana kwambangidya anguushaniange dyoni kwavanu."

Kuvalanga kwakuvalekwa kumwe Yesu

²⁶ Napanelo vikapite myedi sita, njelo Gabuliyeli Nnungu kuntuma auke kunjini umo wa ku Galileya wavashishema Nashaleti ²⁷ kwamwali jumo ntete we wantamadíle nnemba jumo kunnomba walina Yoshe walikola limwe Daudi. Mwali aju vashinshema Maliya. ²⁸ Múntenga akawike pavele nkongwe aijá atédoni, "Mashala ako wako útanangwidye. *UMU* avelé namu wako!" ²⁹ Maliya akaigwe malove alo, andíitukanga namene kutwala kulyudya shintimatima kushidoni, "Shuudyangidi ashi shuudyangidi shani?" ³⁰ Kanji njelo kushidoni, "Maliya, haunajope! Wako Nnungu andikutanana. ³¹ Lola! Undaimita kummaleka mwana nnume kutwala kumupa lina lya Yesu. ³² Jojo jo andava nang'olo. Vananshema mwanagwe Wapashanya-uti.

Mwana ajo, *UMU* Nnungu anantakatuwidya shiumu shanakulumunu Daudi. ³³ Andavatawala venentete vake Yakobo muvyaka víkamalilika; utawala wake hauva na mwisho.”

³⁴ Maliya kunjang'ula njelo jo doni, “Da shinu ashi shilota kuvalela mwashi nangu nikanava kummanya nnume?” ³⁵ Njelo do, “Andakushulukila Imumu Wanashwe na dimongo dyake Wapashanya-uti dindakwinikidya. Nadoni jo mwana waulota kummaleka jo, vananshema Wakwilimyanga, Mwana wa Nnungu. ³⁶ Lola! Ata jo nkuluvo Lishabeti àkangapele avi, andimita shitumbo shamwana nnume. Jo wavashinshema ákavaleka jo, ambi apa ankuvanavo shitumbo shamyedi avi, sita. ³⁷ Mwaa Nnungu pake po, hashipali shinkamadyangídyá.” ³⁸ Kutwala Maliya kushidoni, “Elo, ntumwa nkongwe umwe *UMU*, apali apa; vingutandeke kenga mo mwautangaladile mo.” Bai nae akatangole davo, njelo andínyema.

Maliya namu Lishabeti vankupuwanga

³⁹ Napanelo mumaduva lolo Maliya andítakatuka ku-ka shipajelo kumashinga panjini umo wa ku Yuda. ⁴⁰ Akawike, andíinjila nng'ande mwake Shakaliya kutwala kumuudyanga Lishabeti. ⁴¹ Lishabeti paigwite lidi lyake Maliya, mmunda mwake mwana kupikita namene, Lishabeti kunnangalalela Imumu Wanashwe ⁴² kutwala kwatuka kutangola aashidoni, “Wako ni wakwalaligwa pakati pavakongwe na waulota kummaleka momo, andyalaligwa. ⁴³ Da yaleké dashi anyoke *UMU* wangu kwida nangulola nangu? ⁴⁴ Undimanya? Nangu pangwigwite lidi lyako unguudyanga, mwana mmunda mwangu amu andipikitinneu mwaa wakupuwanga. ⁴⁵ Undijaligwa mwaa wako undikulupila vyavakwaulidile vilóta kutandeka vyalakela kumwe *UMU*.”

Lwimu lwalutumbyangilidyo lumwe Maliya

⁴⁶ Napanelo Maliya kushidoni, “Ungumi wangu unkuntumbyanga *UMU*, ⁴⁷ imumi yangu kulitamangila *UMU* Nnungu mwamboli wangu. ⁴⁸ Nae andyona kwiludyangika kwankongwe ntumwa wake. Mwenu! Kutunduvangila ambi apa, vanu vadimbula uti vanangushema wakwalaligwa ⁴⁹ mwaa Wadimongo-Uti aningutandela vikumene; lina lyake lindiilimyanga. ⁵⁰ Ankuvaanangila shididi avalá vanjópa, vanu vaimbula ai kwida imbula ai. ⁵¹ Nae anditenda vikumene na nkono wake; andivamwadilikanianga vaimbeve mumakumbukililo ammitima vyave. ⁵² Andivashuluwa vakutawala muviteng'u, kuvakwedya vakavallangigwa. ⁵³ Andiviikutiya vyambone vákave pashinu, vatajili kuvakumulanga shing'alang'ala. ⁵⁴ Animpwashela Ishilaeli ntumika wake

akumbukila shididi shake ⁵⁵ kenga mo mwalivikidile kwatatagwetu Abulaamu pamo na udukulu wake wamushu uti.” ⁵⁶ Bai Maliya andíkanavo Lishabeti kenga myedi mitatu doni kutwala kuujiila kwave.

Kuvalekwa kwake Nshuwau

⁵⁷ Napanelo Lishabeti likamwikile liduva lyake lyakushuluwa, anímmaleka mwana nnume. ⁵⁸ Vashitanonomwagwe pamo na vakwave vakaigwe doni *UMU* andimwanangila shididi Lishabeti, vandípuwanganavo namene. ⁵⁹ Muliduva lyanane vanavo kuntwala mwana aijá kuka nankumula likumbi. Napanelo valota vansheme lina lya Shakaliya lina lyolyo lyatatake, ⁶⁰ jujumunu kushidoni, “Mene! Mwana aju lina lyake Nshuwau.” ⁶¹ Vanavo, “Aba! Nkwenu shani walina ali?” ⁶² Kutwala kumudya tatamunu vatan-gola na makono lina linnagwadíle vansheme mwanagwe. ⁶³ Tatamunu kujugwa libau kwandika doni, “Lina lyake Nshuwau.” Vanu uti kushanga. ⁶⁴ Muwakati wowo ikanywa imwe Shakaliya kuunguka, lulimi kungaluka kutangola antumbyanga Nnungu. ⁶⁵ Kutwala vashitanonomwagwe uti kujopa. Dyabali adi, dindíginika mushilambo uti shamashinga sha ku Yudeya. ⁶⁶ Vanu uti váshiigwanga dyabali adyo vashindakumbukila mmitima vyave vaashidoni, “Mwana aju alota kuva kenga nyani?” Mwaa mwiu vashindona doni dimongo dimwe *UMU* dipali namu nae.

Kulava na lutumbyango lumwe Shakaliya

⁶⁷ Napanelo tatamunu Shakaliya alangalalegwa na Imumu Wanashwe andyáulanga ntenga wake Nnungu aashidoni, ⁶⁸ Atumbyangilike *UMU* Nnungu wa ku Ishilaeli mwaa andida na andivaambola venentete vake. ⁶⁹ Nkati muudukulu umwe Daudi ntumika wake, ⁷⁰ kenga mo mwatangaladile kwaindila yavakulava wakwilimyanga vakala ⁷¹ kwida ndatwambola kwavamongo vetu na kumakono kwauti avalá vatunyatíla. ⁷² Nadoni andilodya shididi shake shalivikile kwatatavetu, andikumbukila imbodi yake yakwilimyanga ⁷³ yakulilapa kwalilapile kwatatagwetu Abulaamu ⁷⁴ kwambangidya túvele mukuposhegwa kumakono kwavamongo vetu, tuntumikile patukajopa ⁷⁵ tunama pamevo pake mukwilimyanga na mwishaliya mumaduva uti ashingumi shetu. ⁷⁶ Napanelo unnemba wako undashamegwa unkúla-va wake Wapashanya-uti mwaa undalangalela upita unkandyangidya *UMU* dindila dyake. ⁷⁷ Undavatadya venentete vake vamanye kwambola kwaindila yakulivalivigwa madambi ave

⁷⁸ kwamwaa washididi shalilotelo lyamuntima limwe Nnungu wetu

shitwidíla paituvalila Yana yúma kushanya

⁷⁹ ivalangadye avalá vapágwa mushii na mukupela na itulangalalele mwindila yaamani.

⁸⁰ Bai mwana jo andíkulumuka na kunanopa mwimu-mu. Ashindanama mulilangalanga lyashimbweshe mpaka muliduva lyalyumilididye kwavanaishilaeli.

Kuvalekwa kumwe Yesu

Mateu 1:18-25

2 Napanelo mumaduva alo Shashali Agustu andyúmya lilamulo lyakulota vanu uti vavilambo víshilangalalegwa na Loma valyandikishe. ² Shaandika ashi shivele shitandi; shosho sho shitandeki muwakati wavele Kilinu gavana wa ku Shiliya. ³ Nadoni vanu uti vandyúka ndalyandika kanji kula munu ashuka ndalyandika kwave. ⁴ Napanelo Yoshe dadavo andyúma ku Galileya palikaja lya pa Nashaleti kwambokela ku Yudeya kuka kwavo Daudi ku Beteleemu mwaa Yoshe avele washipinga shaudukulu umwe Daudi. ⁵ Ako nae aukile kukulyandikisha; andyúka pamo namu Maliya nkongwe wantamadíle kunnomba, jo Maliya aju ávele na shitumbo. ⁶ Vávele ko ku Beteleemu, Maliya kumwikila liduva lyakushuluwa ⁷ kutwala kummaleka mwana nnume wakulijedya. Nae kunkulunganga mwinguvo kunnadya mushombo shakulyela vanyama mwaa shumba shavajeni havapatíle lyutu lyakulala.

Njelo ankuvaumililila vakushunga-dinyama

⁸ Napanelo koko ko vandípagwa vakushunga-dinyama váshishunga vipinga vyave shilo kwilanga. ⁹ Bai akaaneka apalá njelo wa Nnungu, lishangelo limwe *UMU* kuvatang'anedyá vanavo ni kujopa doni. ¹⁰ Kanji njelo kushidoni, "Mwenu, hamunajope! Ngwigwa, nangu ngwidinavo ntenga wambone vila au ulóta kwidanavo lipuwilo likumene kwavenentete ava uti.

¹¹ Nelo apa kwavo Daudi andivalekwa mwamboli kwamwaa wenu mwenu; Klistu, *UMU*. ¹² Ashi shindava shimanyikilo shenu: pamuka, munankodya mwana vánkulungenge mwinguvo na vännadidye mushombo shakulyela vanyama." ¹³ Kwashingangala kwanaken-neu imbumba yavakuwa ñyunganienge namu njelo jo vantumbyanga Nnungu kushidoni,

¹⁴ "Lishangelo livelé namu Nnungu kushanya-uti; amani namu vanu mushilambo, vanu vovo vavatanene mwene Nnungu."

¹⁵ Vanjelo avalá vakanyamange kuka kuwa, vakushunga-dinyama vandyáulanila kushidoni, "Takatakanga tuke ku Beteleemu tukalole vitandéke vyatwaulidile *UMU* avi." ¹⁶ Vanavo shipajelo kuka kunkodya Maliya namu Yoshe, mwana álele mushombo shakulyela vanyama. ¹⁷ Vakamwone, vandyáulanga dyabali dyamwana ajo dyavapatíle. ¹⁸ Vanu uti váshigwa vyavashivalanganga vakushunga-dinyama, vashin-

dashanga ¹⁹ kanji Maliya vinu avyo ashindavika muntima na ashindakumbukila. ²⁰ Bai avalá vakushungadinyama vandyúja vamupa lishangelo na vanshiba Nnungu mwaa wavinu uti vyavaigwite na vyavagwene kwodana na mo mwavaigwididye.

²¹ Paliwikile liduva lyanane, liduva lyakunkumula mwana vanavo vandímupa lina lya Yesu, lina lyampéle njelo wa Nnungu anyoke akanava kunnyakulila.

Yesu vankunkamudya *UMU*

²² Napanelo Maliya namu Yoshe, ukavawikile wakati wakulyushanianga ushapu kwodana na Lilamulo lyake Musha, †† vanavo vandímuukanavo mwana ku Yelusalemu nankamudya *UMU*. ²³ Vanavo vanínkamudya *UMU* kwodana na Lilamulo lyake *UMU* liishidoni, "Kula mwana nnume ntandi kuvalekwa, mwapulile *UMU*." ²⁴ Namomo vandyúka ndatenda shadaka shilamulígwa mu Lilamulo lyake *UMU* liishidoni, "makanda mavili amadeya nnume na nkongwe kwali makanda mavili avang'unda nnume na nkongwe."

Kulava na lutumbyango lumwe Shimiyau

²⁵ Napanelo ku Yelusalemu ko, andípagwa nang'olo jumo wavashinshema Shimiyau; nang'olo aju avele munu waishaliya na wakunjopa Nnungu. Nae ashindalindila kupambadyangigwa kwavanaishilaeli ‡ na Imumu Wanashwe andípagwa namu nae. ²⁶ Jo Imumu Wanashwe andímwaulila Shimiyau doni, hapela akana-va kumwona Klistu wake *UMU* kuntumidya. ²⁷ Napanelo muliduva limo, Shimiyau alangalalegwa na Imumu Wanashwe andyúka kwing'ande ya Nnungu kutwala vatatamunu pavamwidinavo nunu Yesu vantende shiv-aikidíle vantende kwodana na Lilamulo, ²⁸ Shimiyau anínyukata nunu mmakono kuntumbyanga Nnungu aashidoni,

²⁹ " *UMU*, uninneka ntumika wako aukilé mu amani kenga mwautangaladile.

³⁰ Mwaa nangu ndyona kwambola kwako

³¹ kwaupanganienge pamevo pavanu uti;

³² lilangadyo lilóta kuvalangadya vamidi †† na lyakuvapa lishangelo venentete vako vanaishilaeli."

³³ Tatamunu namu jujumunu kutwala kushanga mwaa wamalove áshitangaleka amwamba mwana.

³⁴ Bai Shimiyau andívaalaliya na kumwaulila jujumunu Maliya kushidoni, "Mwana aju alota kuva shamby-ombyo shakuvatadya vanaishilaeli vanji vagwe, vanji vatakatuke; alota kuva shimanyikilo shilóta kunyatilika na vanu. ³⁵ Kwaupande wako wako lyambila lindakupulinganianga muungumi. Andatadya makumbukililo avo alipiídye alilodye ngala."

†† Kwodana na Lilamulo lyake Musha, nkongwe akammaleka mwana nnume, ashindavanavo ing'osho mumaduva alubaini. *Lola Valawi 12:1-8.* ‡ Kupambadyangigwa kwavanaishilaeli kuvele nkati mukwambwalegwa kwaindila imwe mwamboli walivikile Umu kuvapalakadyedya. *Lola Ishaiya 40:1; 57:18; 61:2-3.* †† Kwali: a valangadavo.

† *Lola Mikeya 5:2.*

³⁶ Napanelo andipagwa nkúlava jumo nkongwe wali-na Ana mwanagwe Panuweli walikola lyavanaasheli. Nkongwe aju andikangapala. Mushali shake andilomb-wa vyaka saba kutwala ntwagwe kupela ³⁷ kunneka nae mushinamwili. Jojo jo avele liputa wavyaka samanini na nsheshe vyashingumi na hashuma mwing'ande ya Nnungu antumikila shilo na mui nkati mukunga na kushwali. ³⁸ Napanelo nkongwe aju muwakati wowo, nae kulyumilidya kutwala kunnamb-walela Nnungu na kutunduvanga kuvalanganga ing'ano yamwana ajo kwavanu uti vashilindila kwambolekwa kwa Yelusalemu.

Pa Nashaleti

³⁹ Maliya namu Yoshe pavamalidile kutandedya uti kwodananavo Lilamulo lyake *UMU*, vandyújila ku Galileya kuka mpaka kwavo ku Nashaleti. ⁴⁰ Bai mwana jo ashindakulumuka, ashindang'amukanga avanavo li-manyilo lyoe na litananilo lyake Nnungu lishandapag-wa kwake nae.

Ndyoko Yesu mwing'ande ya Nnungu

⁴¹ Bai tatamunu na jujumunu kula mwaka vashindau-ka kushikukulu sha Pasaka ku Yelusalemu. ⁴² Napanelo mwana jo akawishe vyaka kumi na mbili vyashingumi, muwakati wa Pasaka kenga mwanamaduva vanavo vandyúka ku Yelusalemu. ⁴³ Shikukulu shikapite, vana-vo pavashuja ndyoko jo andiikala koko kanji vanavo havashimanya ⁴⁴ vona kenga nae apali mumwanda muvipinga vyavanu vanji, vandiwena mwanda walidu-va limo kutwala kutunduvanga kunnambela mwavali-kola na mwavanedi. ⁴⁵ Kwodamwaa havangwéne, vanavo vandyújila ku Yelusalemu kuka nannambela.

⁴⁶ Napanelo akapite maduva matatu, vanavo vaninkodya àikele mwing'ande ya Nnungu shing'ati vamwalimu avaigwilila vyavashitangola na avaudya vyakuvaudya. ⁴⁷ Vanu uti vashimwigwilila, vashin-dashanga ding'ano dyake na mwavashivajang'ulila. ⁴⁸ Tatake na anyoke pavangwene, vandishanga kut-wala jujumunu kushidoni, "Mwanangu, mwaa shani unditutenda davo? Shapo lola, nangu pamo na tatako tundidumbadumba tukulambela." ⁴⁹ Nae kushidoni, "Mushingulambalela eshi? Hamunamanya shinu doni nangu ininguvaikila ngupagwe mwing'ande imwe Ata-ta?" ⁵⁰ Kanji vanavo havashigwa shana shashivatan-galela. ⁵¹ Nae andyúja shalumo namu vanavo kuka ku Nashaleti; tatamunu namu jujumunu nae ashin-davaishimu. Napanelo jujumunu vinu avi uti ashindavi-ka muntima. ⁵² Bai Yesu ashindakulumuka mulimanyi-lo, mulitananilo lyake Nnungu na lyavanu.

Nshuwau Wakubatisha ankukandyanga indila

Mateu 3:1-12; Malukushi 1:1-8; Nshuwau 1:19-28

3 Mushaka shakumi na tano shautawala umwe Umu Nang'olo Tibeliu Shashali, ku Yudeya alangalalela Ponji Pilatu, ku Galileya alangalalela Elode nung'une wavashinshema Pilipo alangalalela ku Itu-

leya pamo na ku Talakoniti, ku Abileni alangalalela Lis-haniya, ² vakulangalalela-shadaka vakumene vavele Anashi namu Kaipashi, Nnungu anditangola lilove lyake namu Nshuwau mwanagwe Shakaliya kushimb-weshe ³ kutwala nae kupita awena muvilambo uti vivéle nanyenje Yudani alaililila ubatisho wakulijugu-langa kwakulivalivigwa kwamadambi.

⁴ Avyo ni vyavaandike mulibuku lyamalove ake nkúla-va Ishaiya doni, "Lidi lyamunu linkwigwinika kushimbweshe liishidoni, 'Kandyanga indila yake *UMU*, aalowa mwalota kupita.

⁵ Makabakobo uti andaivililika, mashinga na dindunda uti vindagwalalila, dindila dyakudingukanga dindauduka, dyakwimbikanga dindakandyangigwa ⁶ kutwala vanu uti kwona kwambola kwake Nnungu."

⁷ Nadoni Nshuwau andyúulila imbumba yavanu imwidilile avape ubatisho kushidoni, "Mmana mmadinyoka dyaishumu mwe! Anyinyitidile nyani kuti-la shaushanga shake Nnungu shida? ⁸ Lodya vyepo vilódyá kulijugulanga. Hamunaashidoni, 'Tatagwetu wetu Abulaamu.' Mwaa nangu ninkummanyiya ngala doni, ata majanga lolo ala, Nnungu ankuulula kundyuwidya Abulaamu vana. ⁹ Imbedo tayali vandilu-mika mulushija lwannandi. Kula nandi úkapa vyepo vyambone vandálumula kujela pamoto."

¹⁰ Imbumba yavanu yo kutwala kumudya kushidoni, "Shapo na wetu po tutandelé mwashi?" ¹¹ Nae kushi-doni, "Ávenavo mikogo mivili, unji wo anjaulile aijá ákavenavo na ávenavo shakulya atandele momo." ¹² Kuwika shipinga shavakukatisha-ukodi valota avape ubatisho, navanavo kumudya, "Mwalimu, wetu apa tu-tandele mwashi?" ¹³ Nae kushidoni, "Ukodi wakupunda shilinga shavannamulidile mutwale, hamunantwalile munu." ¹⁴ Vaing'ondo vanji navanavo kumudya, "Kushi wetu tutandele mwashi?" Nae kushidoni, "Hamu-nankwinyange munu woewoe shinu shake, hamunan-tambudyange munu shákatandile kanji puwangila nshala wenu wamupata."

¹⁵ Bai venentete vashindaangaikanga na kula munu ashindalyudya muntima mwake ikava kenga Nshuwau ni Klistu ¹⁶ kutwala nae kuviigwiniya kushidoni, "Nan-gu ninkumwing'a mwenu ubatisho ngutumila medi kanji aijá áida kunyuma kwangu; nae avelé na dimon-go kungupunda nangu wandikavaidile nangu ku-muungulanga vilatu vyake. Jojo jo andamwing'a mwenu ubatisho wa Imumu Wanashwe pamo na mo-to. ¹⁷ Ankuvanavo shombo shakupatangila vyakulya mmakono mwake pakulota akandyange palugwa pake antwale ngano akankondye mushidimbi shake kanji makadakada lo, andataa moto úkadimika."

¹⁸ Bai Nshuwau ashindavalaililila vanu ntenga wambone atumila malove ala na malailililo anji. ¹⁹ Kan-ji kwodamwaa Nshuwau anínshashulanga Elode mwaa wakunnomba ndyagwe nung'une mwene walina

† Klistu ni aijá mwamboli walivikile Nnungu kuntumidya.

Elodiya na mwaa wakunshashulanga vinu vinji vyakunyata vyashitenda, ²⁰ bai Elode akatwale myaa vyakala avilá kupambanianga na mwaa au ni pantwete Nshuwau kunjela nkalaboshi.

Kubatishwa kumwe Yesu

Mateu 3:13-17; Malukushi 1:9-11

²¹ Napanelo vanu uti pavashuka ndapata ubatisho, nanae Yesu andyúka ndapata. Pashishwali kuwa kundíshimuka; ²² kukashimuke, Imumu Wanashwe wakwaneka shana wakuva mwang'unda kushuluka kuntulila mumili kutwala kuwa kwigwinika lidi lishishidoni, "Wako ni umwanangu wapantima, ninkukunnagwaledya namene; kwamwaa wako wako nangu ninkupuwanga namene."

Vanakulumunu vamwe Yesu

Mateu 1:1-17

²³ Napanelo Yesu patunduvenge shimadengo shake ávenavo vyaka salasini vyaulinga vammaanya kuwa mwanagwe Yoshe kenga mwavashikumbukilila,

Yoshe aju kuwa mwanagwe Yeli,

²⁴ Yeli kuwa mwanagwe Matati,

Matati kuwa mwanagwe Lawi,

Lawi kuwa mwanagwe Meliki,

Meliki kuwa mwanagwe Yanai,

Yanai kuwa mwanagwe Yoshe,

²⁵ Yoshe kuwa mwanagwe Matatiya,

Matatiya kuwa mwanagwe Amoshi,

Amoshi kuwa mwanagwe Naumu,

Naumu kuwa mwanagwe Eshili,

Eshili kuwa mwanagwe Nagai,

²⁶ Nagai kuwa mwanagwe Maati,

Maati kuwa mwanagwe Matatiya,

Matatiya kuwa mwanagwe Shemei,

Shemei kuwa mwanagwe Yosheki,

Yosheki kuwa mwanagwe Yoda,

²⁷ Yoda kuwa mwanagwe Yowanani,

Yowanani kuwa mwanagwe Lesha,

Lesha kuwa mwanagwe Shelubabeli,

Shelubabeli kuwa mwanagwe Shalatiyeli,

Shalatiyeli kuwa mwanagwe Neli,

²⁸ Neli kuwa mwanagwe Meliki,

Meliki kuwa mwanagwe Adi,

Adi kuwa mwanagwe Koshamu,

Koshamu kuwa mwanagwe Elimudamu,

Elimudamu kuwa mwanagwe Eli,

²⁹ Eli kuwa mwanagwe Yoshuwa,

Yoshuwa kuwa mwanagwe Eliyesheli,

Eliyesheli kuwa mwanagwe Yolimu,

Yolimu kuwa mwanagwe Matati,

Matati kuwa mwanagwe Lawi,

³⁰ Lawi kuwa mwanagwe Shimiyau,

Shimiyau kuwa mwanagwe Yuda,

Yuda kuwa mwanagwe Yoshe,

Yoshe kuwa mwanagwe Yonamu,

Yonamu kuwa mwanagwe Eliyakimu,

³¹ Eliyakimu kuwa mwanagwe Meleya,

Meleya kuwa mwanagwe Mena,
Mena kuwa mwanagwe Matata,
Matata kuwa mwanagwe Natani,
Natani kuwa mwanagwe Daudi,
³² Daudi kuwa mwanagwe Yeshe,
Yeshe kuwa mwanagwe Obedi,
Obedi kuwa mwanagwe Buwashi,
Buwashi kuwa mwanagwe Shalamoni,
Shalamoni kuwa mwanagwe Naashoni,
³³ Naashoni kuwa mwanagwe Aminadabi,
Aminadabi kuwa mwanagwe Adimini,
Adimini kuwa mwanagwe Aluni,
Aluni kuwa mwanagwe Eshiloni,
Eshiloni kuwa mwanagwe Peleshi,
Peleshi kuwa mwanagwe Yuda,
³⁴ Yuda kuwa mwanagwe Yakobo,
Yakobo kuwa mwanagwe Ishaki,
Ishaki kuwa mwanagwe Abulaamu,
Abulaamu kuwa mwanagwe Tela,
Tela kuwa mwanagwe Nakole,
³⁵ Nakole kuwa mwanagwe Shelushi,
Shelushi kuwa mwanagwe Lagau,
Lagau kuwa mwanagwe Pelegi,
Pelegi kuwa mwanagwe Ebeli,
Ebeli kuwa mwanagwe Shala,
³⁶ Shala kuwa mwanagwe Kainani,
Kainani kuwa mwanagwe Alipashadi,
Alipashadi kuwa mwanagwe Shemu,
Shemu kuwa mwanagwe Noe,
Noe kuwa mwanagwe Lameki,
³⁷ Lameki kuwa mwanagwe Metushala,
Metushala kuwa mwanagwe Enoki,
Enoki kuwa mwanagwe Yaledi,
Yaledi kuwa mwanagwe Malaleeli,
Malaleeli kuwa mwanagwe Kainani,
³⁸ Kainani kuwa mwanagwe Enoshi,
Enoshi kuwa mwanagwe Sheti,
Sheti kuwa mwanagwe Adamu
kutwala Adamu aju kuwa mwanagwe Nnungu.

Ndamoni ankunnya Yesu

Mateu 4:1-11; Malukushi 1:12-13

4 Bai Yesu kuja kulundi akulá àmuumbele Imumu Wanashwe. Imumu jojo jo anínnangalalela Yesu ² kushimbweshe mumaduva alubaini Ndamoni antubya. Mumaduva alo uti nae andíkala pakalya shinu; kumwisho nae kunkola indala ³ kutwala Ndamoni kushidoni, "Wako ukava umwanagwe Nnungu, dyuwa lijanga ali live ligung'u." ⁴ Yesu kushidoni, "Um! Indyandikigwa doni, 'Munu hananama ligung'u gweka.'" ⁵ Ndamoni kuntwala kumuukanavo pashanya, muwakati ungwipi kunnodya viteng'u uti vitawála mushilambo shapai ⁶ kutwala kumwaulila doni, "Wako nangu ndakupa madalaka aviteng'u avi uti pamo na lishangelo lyake mwaa nangu vaningukamudya, nene

† Vanaishilaeli pavaumile ku Mishili, kushimbweshe Nnungu andívapa magung'u pakulota ailodye kenga nae ni Nnungu wave. Lola Kuma 16:12. †† Lola Kumbukumbu 8:3.

ninkuulula kumupa aijá waninnota. ⁷ Napavedoni wako ukalipudya kwangu nangu, avi uti vindava vyako." ⁸ Yesu kushidoni, "Um! Indyandikigwa doni, 'Lipudye kumwe *UMU*, jo Nnungu wako na untumikile jojo bai.'" ¹⁹ Ndamoni kuntwala kavili kumuukanavo ku Yelusalemu nammika panantutuvilo waing'ande ya Nnungu kutwala kumwaulila doni, "Wako ukava umwanagwe Nnungu, daloka apa ¹⁰ mwaa indyandikigwa doni, 'Nnungu andakukamudya kwavanjelo vake vakushililidye,' ^{††11} vanavo vandakudong'a pakulota haunalijajede palijanga." ¹² Yesu kushidoni, "Mene wako! Vatédoni, 'Hauanninge ntima *UMU*, jo Nnungu wako.'" ¹³ Bai Ndamoni akamalile vyakutubya vyake uti, andinyema padyoko mpaka muwakati uvaikidíle.

Yesu ankutunduvanga shimadengo shake

Mateu 4:12-17; Malukushi 1:14-15

¹⁴ Napanelo Yesu andyúja na dimongo dya Imumu Wanashwe kuka ku Galileya. Bai dyabali dyake dindyú-manga uti muvilambo vyashitanono namu Galileya. ¹⁵ Nae ashindavapundisha muvitala vyavo vyakulipudidya na vanavo uti vashindamupa lishangelo.

Vakwave Yesu ku Nashaleti vankumwita

¹⁶ Napanelo andíwika palikaja lyake lyakulumukidile pa Nashaleti; akawike apo, muliduva lyakupumula nae mwalyavalelo lyake, andíinjila mushitala shakulipudidya. Akainjile, andítakatuka pakulota ashomye; ¹⁷ vanavo kumupa shidingo shalyamba shamalove ake nkúlava Ishaiya. Nae kudingulanga mpaka pashinu pavaandike doni, ¹⁸ "Imumu wake *UMU* aningushuluki la mwaa aningupaka mauta pakulota ndivavallangile vamashikini ntenga wambone, kungutuma ngwide ngwaule kuvaambola kwavakungwa, vákalola nivape kulola, vakutawaligwa nivape unaiti ¹⁹ na nguvallangange doni, au ni wakati walitananilo lyake *UMU*." ²⁰ Akashomye, andídinga kumuujidya ntumika mwene kuliikalila. Akaikale, vanu uti vapagwíte mushitala mo, mevo ave uti kumwe Yesu do, jenje. ²¹ Vakannole, nae kushidoni, "Nelo pamevo penu Maandiko ala andiwikila popo."

²² Vanu uti vashindamwimyanga na vashinanshanga vyambone vyashitangola kutwala kushidoni, "Da aju i jo mwanagwe Yoshe aju?" ²³ Nae kushidoni, "Panikaambambidya mwenu mundatangola nkong'o uushidoni, 'Nkúlaula alilaula mwene!' Nadoni mundatangola, 'Vinu uti vyatwigwenge, vyautandile ku Kapalanaumu napenu apa momo tandedya!'" ²⁴ Kutwala kavili kushidoni, "Ninkumwaulila mwiu doni, hapali nkúlava ápwashalalegwa mushilambo shake.

²⁵ Kwakutangola mwiu muwakati umwe Liyashi, ko ku Ishilaeli akuno vandípagwa vanamwili voe namene; muwakati wowo muvyaka vitatu na nusu, kuwa kundishimigwa kutwala mushilambo uti kwinjila mpwapwa. ²⁶ Napanelo Nnungu hantumíle Liyashi ku-

vaukila vanamwili ava kanji antumile pa Shalapeta bai, kushilambo sha Shidoni akulá kwankongwe namwili washilambo ashó. ²⁷ Namomo muwakati umwe nkúla-va Elisheu, ko ku Ishilaeli akuno vandyúmbala vama-lemba. Napanelo pakati pave, hapali áukile ndatakata ila Naamani tu munu wa ku Shiliya!" ²⁸ Bai vanu uti mushitala amulá vakaigwe malove alo ni kushimwa doni, ²⁹ kutakatukanga kunkumulanga nka-ja amulá, kuntwala kumuukanavo pashanya lishinga lyavadangile kaja yavo vakangang'aledye pai. ³⁰ Kanji nae andyúma shing'ati shave kuvativaniva kuma.

Yesu ankukumulanga lijini

Malukushi 1:21-28

³¹ Napanelo Yesu andyálalela ku Kapalanaumu njini umu wa ku Galileya. Koko ko muliduva lyakupumula nae ashindavapundisha venentete ³² kutwala vanavo kushanga namene mapundisho ake mwaa lilove lyake lindivanavo madalaka. ³³ Napanelo kupagwa munu ju-mo mushitala ávenavo imumu yalijini nshapu mumili mwake. Jo lijini jo, andíkuta namene ³⁴ aashidoni, "Iya! Yesu wa ku Nashaleti, da wetu po tukukawadidyé nyamani? Widilé ndatubamola? Nangu ndikumanya shana wako jo. Wako ni Wakwilimiyanga wake Nnungu."

³⁵ Yesu kunshulanga, "Malalila kushu ko gwe! Uma mumili mo!" Lijini kungwidya pai munu jo shing'ati shave kutwala kuma pakantenda shaushanga shoeshoe.

³⁶ Vanu uti kushanga kutwala kwaulanila vaashidoni, "Jii, lilove ali, lilove shani? Nae ankuvanavo madalaka mwiu, ankulumulila na dimongo majini mashapu, vanavo kutwala kuma!" ³⁷ Bai dyabali dyake dishindaandavala mumautu uti alilanga alyo.

Yesu ankuvaponia vanu voe

Mateu 8:14-17; Malukushi 1:29-34

³⁸ Yesu kutakatuka kuma mushitala amulá kutwala kuwika paing'ande imwe Simoni; nkwegwe jo Simoni aju, ushinampwateka namene mili. Yesu akawike, vanavo kunjugwa amponie. ³⁹ Yesu kutapela apalá pavele nnwele kutwala kutangalela shilwele ashilá; shilwele sho do, jii. Nnwele apalá kutakatuka kutwala kuvaatumikinneu.

⁴⁰ Napanelo liduva palishwele vanu uti ve vavénavo valwele vavilwele vyakuvilingananga vashindavaidanavo kumwe Yesu. Nae ashinammikila mikono kula munu kutwala kuvaponia. ⁴¹ Namomo majini ashindaumananga mumili mwavanu voe akuta aashidoni, "Wako, umwana wa Nnungu!" Nae ashindavashulanga, hashivaleka vatangola mwaa vanavo vanímmanya doni, nae avele Klistu.

⁴² Palyamba lyake, linyeiku, Yesu kuma kuka kulyutu lyakunamagweka kanji imbumba yavanu ni kunnambela mpaka kunkodya. Vakankodye, vashinammandikanga namene valota hanavanyeme ⁴³ kanji nae andívaulila kushidoni, "Ininguvaikila nangu nguvalangange ntenga wambone wautawala wa Nnungu mukakaja anji momo mwaa ni shosho shavangutu-

† *Lola Kumbukumbu 6:13.* †† *Lola Dimu 91:11-12.*

midile.”⁴⁴ Bai nae andyúka mushu avalanganga nten-ga muvitala vya ku Yudeya.

Yesu ankuvashema vakwoda vatandi

Mateu 4:18-22; Malukushi 1:16-20

5 Muliduva limo Yesu àvele nanyenje litanda Iya Geneshaleti, imbumba yavanu inshinya ilota kwigwa ntenga wa Nnungu,² nae andyóna dingalava mbili ðivele panshiko vene vakwaka vashulwike vasha-pushanga dingau.³ Yesu kwinjila mwingalava imo ye ivéle imwe Simoni kutwala kunjugwa amwangaladyedye anyeme padyoko kumwangu. Nae kwikala mwingalava mo kutwala kuvapundisha venentete.

⁴ Napanelo akamalile kutangola andímwaulila Simoni kushidoni, “Wena kumedi makumene mukajele lungau lwenu mwake.”⁵ Simoni kushidoni, “Mwalimu, wetu tundikukula shashilo shoe ashi, hatupatile shinu. Kanji kwodamwaa utangwelé wako, nangu ndajela lungau mmedi.”⁶ Bai vakatandele momo mo, vandípa-ta dyomba dyoe namene mpaka lwo lungau lwo kulota kupapuka.⁷ Vasimoni kuvapyalika vavave vavéle mwingalava inji vauke vakavapwashele. Vanavo kuka kutwala dingalava mbili adi uti kuumbadyanga dyomba mpaka dyo dingalava dyo, kulota kutitimila.

⁸ Simoni Patulu akone davo andyúka ndakola mauulu kumwe Yesu aashidoni, “Nang'olo wangu, ngunyema; nangu ni nimunu wakutega.”⁹ Mwaa nae andíshanga pamo na vanu uti vavénavo kwamwaa wadyomba dyoe dyavapatíle pashako asho¹⁰ namomo vanavake Shebedeu, Tiyagu namu Nshuwau vavagwe Simoni, navanavo vandíshanga. Kanji Yesu kumwaulila Simoni kushidoni, “Haunajope, kutunduvangila ambi apa wako undava umunu wakuvaka vanu.”¹¹ Bai vanavo vakaukenavo dingalava dyavo kumwangu, vandílakanga vinu vyavo uti popo po; vene tota kuka vamwoda Yesu.

Yesu ankumwaladyanga wamangundula

Mateu 8:1-4; Malukushi 1:40-45

¹² Napanelo Yesu àvele palikaja limo munu jumo wa-malemba apalá kuumilila! Akamwone Yesu kutapela pai kutwala kushidoni, “Nang'olo wangu, ukalota unkuulula kungutadya ngutakate.”¹³ Yesu kunyalodya nkono kunkamula kushidoni, “Ndilota, takata!” Munu aijá muwakati wowo malemba kumuuminneu.¹⁴ Napanelo Yesu kunnamulila hanamwaulile munu junji kanji andímwaulila kushidoni, “Wena ukalilodye kwankúlangalalela-shadaka, utwale umye shadaka kwakuushaniangigwa kwako ushapu kenga mo mwalamulidile Musha pakulota uve ushuda kwavana-vo.”¹⁵ Kanji dyabali dimwe Yesu dindímamodya kwan-davala na dimbumba dyavanu voe dindíkadyanianga valota vamwigwilile na avaponie vilwele vyave.¹⁶ Yesu kanji ashindavanyema auka kushimbweshe. Koko ko, ashindashwali.

Yesu ankumponia wakudidimanga madodo

Mateu 9:1-8; Malukushi 2:1-12

¹⁷ Muliduva limo Iyapagwíte Yesu apundisha, popo po vandípagwa mapalishayo pamo na vamwalimu vadishaliya ve vaalakéngé mumakaja uti a ku Galileya, ku Yudeya na ku Yelusalemu. Napanelo dimongo dyake *UMU* dyakuponedya dindípagwa namu Yesu.¹⁸ Mwenu, muwakati wowo vanu vannyukéte munu wakudidimanga madodo apalá kuumilila. Vanavo ku-lambela litala Iyakumwishidya pavele Yesu¹⁹ kanji vakatatakele mwaa waumbala wavanu, vandíkwela pashanya ing'ande kuvambulanga kutwala kumpaleya munu aijá pamo na igoli yake mpaka mushu mwake Yesu shing'ati vanu.²⁰ Yesu akone likulupililo Iyave, andímwaulila nnwele jo kushidoni, “Wako madambi ako andilivalivika.”²¹ Napanelo vamwalimu vadishaliya pamo na mapalishayo vandyánjanga kuudyania shiv-enevene vaashidoni, “Aju avelé kenga nyani, átangola malove akukupulu aju? Tukanneka Nnungu, nyani junji áulula kulivaliva madambi amunu?”²² Yesu nae aka-manye makumbukililo ave, andívajang'ula kushidoni, “Mutangadikanga nyamani mmitima myenu mo?”²³ Popo apa shikamadyéngé namene ni nyamani? Kushidoni ‘Madambi ako andilivalivika,’ kwali kushi-doni ‘Takatuka uwene?’²⁴ Bai pakulota mumanye doni, Mwana Wamunu mushilambo amu andivanavo madalaka akulivaliva madambi...” Nae andímwaulila munu wakudidimanga madodo, “Ninkukwaulila takatuka utwale igoli yako uke kwenu.”²⁵ Munu ku-takatukinneu kutwala igoli yaléle kuka kwave amupa lishangelo Nnungu.²⁶ Bai vanu ni kushanga doni, vandímupa lishangelo Nnungu na kundívaida kujopa kutwala kushidoni, “Nelo tundyona vyamakango.”

Kushamegwa kumwe Lawi

Mateu 9:9-13; Malukushi 2:13-17

²⁷ Kutwala apo Yesu andyúma apalá; akaume nae andímwona munu jumo nkúkatisha-ukodi walina Lawi àikele pashitala shaukodi, Yesu kumwaulila kushidoni, “Ngwoda!”²⁸ Nae apalá andíleka vinu vyake uti popo po, mwene tota kuka amwoda Yesu.

²⁹ Napanelo Lawi kwing'ande kwake, andítalakanga shakulya shoe shakumpuwangila Yesu. Po pavashilya po, shindípagwa shipinga shikumene shavakukatisha-ukodi pamo na vanji.³⁰ Napanelo mapalishayo pamo na vamwalimu vave vadishaliya vashindavatan-gadikanga vakwoda vake Yesu vaashidoni, “Mwaa shani munkulyanavo vakukatisha-ukodi na vakutega?”³¹ Yesu kushidoni, “Vanu vangumi havanannambela nkúlaula kanji vánannambela nkúlaula vava valwele.³² Nangu handivaidilile vaishaliya kanji ndivaidilile vakutega pakulota valijugulange.”

Ing'ano yakunga

Mateu 9:14-17; Malukushi 2:18-22

³³ Vanavo napane kushidoni, “Vakwoda vake Nshuwau pamo na vamapalishayo dimindi dyoe

vankunga na vankushwali; napanelo mwaa shani wako wako vankulya na vankupuwanga?"³⁴ Yesu kushidoni, "Da mwenu, vanu vavalalike pashitamo mwene nkúlomba àpagwite namu vanavo, nyani álotu kuva-tenda vaunge?"³⁵ Undawika wakati wavalota kumumya nkúlomba pakati pave; ni wakati au wavalota vanavo kunga." ³⁶ Kutwala kutangola kavili nkong'o au, "Hapali munu ánapapula inguvo yaambi kutenda shilaka mwinguvo yakala; ukatenda davo inguvo yaambi yo unaanonga na leka apo, shilaka shosho sho hashivaila mwinguvo yakala mo. ³⁷ Namomo hapali munu ántaa ugwalwa wavyepo muvitumba vyamagwogwe vyakala; ukatenda davo ugwalwa waambi wo undapapula vitumba; ugwalwa kujaikanga kutwala vitumba vyo, kwanangeka. ³⁸ Vawala ugwalwa waambi kutaa muvitumba vyambi. ³⁹ Napanelo namomo hapali munu ántenda akakumbila ugwalwa wakala kulota akumbile ugwalwa waambi mwaa ona doni, 'ugwalwa wakala ni wamana.'"

Kwaliduva lyakupumula Yesu ni UMU

Mateu 12:1-8; Malukushi 2:23-28

6 Muliduva limo lyakupumula, Yesu apita mulyala lyangano, vakwoda vake vandítamanga mai angano kuting'inda, kumamena. ² Kanji mapalishayo vanji kuvatangalangila vaashidoni, "Mwaa shani mwenu munkutenda shinu shilaéka na lilamulo kutenda muliduva lyakupumula?" ³ Yesu kuvajang'ula kushidoni, "Da hamunava kushomya vyatandíle Umu Daudi painkadíle indala nae pamo na avalá vavénavo?"⁴ Mwainjilidile mwing'ande ya Nnungu kutwala magung'u ashimadengo sha Nnungu kulya; magung'u áshilaeka na lilamulo kulya munu vila ila gweka vakulangalalela-shadaka. ^{††} Kanji nae andílya anji kuvapa vavagwe." ⁵ Kutwala kavili kushidoni, "Mwene liduva lyakupumula lyo ni Mwana Wamunu."

Yesu ankumponia wakudidimanga nkanakono

Mateu 12:9-14; Malukushi 3:1-6

⁶ Muliduva linji lyakupumula akainjile mushitala shakulipudidya, momo mo andípagwa munu jumo wakudidimanga nkanakono. ⁷ Napanelo vamwalimu vadishaliya pamo na mapalishayo vashinannumbata valota vamanye ikava kenga ankuponia muliduva lyakupumula kwambangidya vapate nkanidyo. ⁸ Kanji nae amanya makumbukililo ave, andímwaulila munu wakudidimanga nkono kushidoni, "Takataka wimile shing'ati!" Nae kutakatuka kwimila. ⁹ Yesu kushidoni, "Nangu ninkumudya mwenu po, da muliduva lyakupumula lilamulo linkutuleka tutandedye vyam-bone kwali vyakunyata? Kuposha shingumi kwali kwanonga?" ¹⁰ Andívalola vanu uti vantang'anadídye avalá kutwala kumwaulila kushidoni, "Nyalodya nkono wako!" Nae kutandela momo, nkono kuva kenga patandi. ¹¹ Bai vanavo shindívatindimbukanga shitundi kutwala kupakanila mwakuntandela Yesu.

† Lola 1 Samuwele 21:1-6. †† Lola Valawi 24:9.

Vamyombe kumi na mbili

Mateu 10:1-4; Malukushi 3:13-19

¹² Mumaduva lolo lo, liduva limo Yesu andyámb-wakela kumashinga ndashwali; shilo uti andíshwedyá anjugwa Nnungu. ¹³ Palyamba lyake andíwashema vakwoda vake kuvatandola kumi na mbili pakati pave; ava kuvashema Vamyombe. ¹⁴ Vanu avo vavele ava: Simoni washilota kumupa Yesu lina lya Patulu, Andaleya nung'une jo Patulu, Tiyagu namu Nshuwau, Pilipo, Balutolomeu, ¹⁵ Mateu, Tome, Tiyagu mwanagwe Alupeu, Simoni wavashinshema Shelote, ^{†16} Yuda mwanagwe Tiyagu namu Yudashi Shikaliyote áukile ndava nan-nimya.

Imbumba yoe inkumwoda Yesu

Mateu 4:23-25

¹⁷ Yesu andyálenavo vamyombe avalá kuka ndaikalanga pantadala. Popo po, shindípagwa shipinga shikumene shavakwoda vake na kupagwa imbumba yavenentete vakwalakela mumautu uti ashilambo sha ku Yudeya, vakwalakela ku Yelusalemu, vanji vakwalakela nanyenje imanga ya ku Tilu na ku Shidoni. ¹⁸ Vanu ava vaidilile kumwigwilila na kuvaponia vilwele vyave; avalá váshangaishangigwa na majini mashapu kutwala kupona. ¹⁹ Kula munu ashindalota ankwaé Yesu mwaa mumili mwake mushindauma dimongo na nae vanu ava uti andívaponia.

Kwalaligwa na dilana

Mateu 5:1-12

²⁰ Napanelo Yesu andíng'amula mevo ake kuvalola vakwoda vake kuvaulila kushidoni, "Mundyalaligwa mwenu mmamashikini, utawala wa Nnungu, wènu. ²¹ Mundyalaligwa mwenu múvele na indala ambi apa, mundaikuta. Mundyalaligwa mwenu múlila ambi apa, mundeke. ²² "Mundyalaligwa mwenu pavannyatila vanu, kumwambukanga, kuntukana na kumumya shimbili shakunyata mwaa wa Mwana Wamunu. ²³ Muliduva alyo, mwenu litamange na puwanga mwaa mwe! Kuwa ko, inudyo yenu ikumene. Ata vanyakala vave vashivatandela momo vakulava. ²⁴ "Kanji mupambale mwenu mmatajili mwaa mundipata tayali kupambadyangigwa kwenu. ²⁵ Mupambale mwenu mwíkwite mwaa inankola indala. Mupambale mwenu mwéka mwaa mundalamadika na mundalila. ²⁶ "Mupambale mwenu pavamwing'a shimbili vanu uti mwaa vanyakala vave vashivatandela momo vakulava vakushang'apa.

‡ Lina lya a Shelotelishinnodya Simoni kuva munu áshivikila namene dukuduku kwaunaiti wavenentete vayuda muutawala wavaloma.

Linagwaledyo kwavamongo

Mateu 5:38-48

²⁷ “Kanji nangu ninkumwaulila mwenu múngwig-wilila ambi apa doni, vanagwaledye vamongo venu, vatanane vannyatíla, ²⁸ vaalaliye vannikíta na vash-walidye vamuuvyánga. ²⁹ Aijá álotá kukukanyola utung'u umo, nshiliulile unji. Álotá kukula likoti, lishati momo nnakele. ³⁰ Munu woewoe akakujugwa shinu, mupe; aijá álotá kutwala shinu shako haunandai. ³¹ Ashilá shinnagwéla mwenu vantandele, namwenu dadavo vatandele navanavo. ³² Shapo mwenu muka-vanagwaledya avalá vannagwalédyá, inkupagwa paida shani kwenu? Ata vakutega tu momo vandávanag-waledya avalá vánavanagwaledya vanavo. ³³ Namomo mwenu mukavatandela wambone avalá vantandéla, inkupagwa paida shani kwenu? Ata vakutega tu dada-vo, vandátandela momo. ³⁴ Na mukavakapesha vamu-venavo lilindilililo lyakupata, inkupagwa paida shani kwenu? Ata vakutega tu vandákapashania pakulota kupata kavili shilinga shosho. ³⁵ Bai vanagwaledye va-mongo venu, tandedya wambone, kapesha pa-mukalindila kupata shinu shoeshoe. Mukatenda doni, inudyo yenu indava ikumene na mwiu mundava mmanavake Wapashanya-uti. Mwaa nae andá-vatanana vakanalambwalela na vakalau.

³⁶ “Ava mmashididi kenga Tatagwenu nanae ni washididi.

Hamunavaukumu vanji

Mateu 7:1-5

³⁷ “Hamunamuukumu munu namwenu Nnungu hamuukumu. Hamunamunge munu namwenu Nnungu hamunga. Valivalive vankawédyá namwenu Nnungu anannivaliva. ³⁸ Nadoni mukajaula namwenu Nnungu andamupa; andatwala shipimo shambone, shak-winyila, shakuumbala, shakupakatika kumwing'a. Doni, mo mwamuvapela vavenu, namwenu Nnungu anampela momo.”

³⁹ Kutwala kuvaulila nkong'o au, “Inkuululika munu ákalola kunkamula nnandi ákalolamwagwe? Da vanu vavili ava uti havagwilila mulipondo? ⁴⁰ Nkwóda hana-manyá mpaka kumpunda aijá ámpundisha kanji nkwó-da woewoe akalipundisha shana ava kenga jo mwene ámpundisha.

⁴¹ “Mwaa shani unkwona shikoko shivéle muliu lyanung'unumunu kuleka kwona likangolo livéle muliu mwako? ⁴² Úmwaulila dashi nung'unumunu, ‘Shate nikushe shikoko shivéle muliu mwako,’ wako likangolo livéle muliu mwako, úkaulula kwona? Umunu wamalambi davo gwe! Shitandi usha likangolo livéle muliu mwako kutwala apo undalola shana pakulota ushe shikoko shivéle muliu lyanung'unumunu.

Nnandi umanyika kwavyepo vyake

Mateu 7:16-20; 12:33-35

⁴³ “Haupali nnandi wakukonda úpa vyepo vyakun-yambikanga na haupali nnandi wakujumajumanga

úpa vyepo vyambone. ⁴⁴ Ivelé doni, kula nnandi umanyika mwaa wavyepo vyake; havanepa malalange mwinalala na havanepa nshambalau mulilonga.

⁴⁵ Munu wakwalala ntima mwaa wavyambone vipag-wíte muntima mwake, nae aumadyanga vinu vyam-bone kanji munu wakunyata ntima mwaa wavyakuny-ata vipagwíte muntima mwake, nae aumadyanga vinu vyakunyata. Kula munu atangola kwodana na vimuumbéle muntima mwake.

Wamang'amung'amu na ákave ding'ano

Mateu 7:24-29

⁴⁶ “Mwaa shani mungushema ‘Nang'olo, Nang'olo’ na mwenu shanimwaulila nangu hamunatandeya shinu? ⁴⁷ Munu woewoe áida kwangu nangu áigwilila malove angu na átandedya, nangu ndamwaulila walinganene-navo. ⁴⁸ Munu ajo avelé mwamunu ádangile ing'ande yake; andimba mapondo akukadaleka mpaka kundon-da mulijanga kutwala kudenga. Livambwe likaide, me-di kukanyola ing'ande yo kanji ing'ande yo, kulamana na kuting'ina mwaa wakudenga shana. ⁴⁹ Kanji aijá áigwilila malove angu kanji mene kutandedya, avelé mwamunu ádangile ing'ande yake pashanya ulongo kwabila kukadaleya mapondo; livambwe kugang'ola ing'ande yo kutwala ing'ande nneu do, jiu, kujiuka.”

Likulupililo lyanang'olo wavaing'ondo

Mateu 8:5-13

7 Napanelo Yesu akamalile mapundisho ake pame-vo pavenentete, andyúka ku Kapalanaumu. ² Pa-likaja lyolyo, andípagwa nang'olo jumo wavaing'ondo miya wavaloma. Nae andívanavo ntumika wake wash-intanana namene e avéle nnwele wakuleka indaja. ³ Nang'olo ajo akaigwe vantambulanga Yesu, andívatuma vanang'olo vavayuda kuka nanjugwa Yesu auke akamponie ntumika wake. ⁴ Vanavo vakawike pavele Yesu vanínjugwangila namene vaashidoni, “Nang'olo ajo, wako indikuvaikila umpwashéle ⁵ mwaa nae anku-vanagwaledya namene venentete vetu na ni jojo átu-dangalele shitala shakulipudidya.” ⁶ Kutwala Yesu kuka namu vanang'olo avo; pavavandike paing'ande, nang'olo kuvatuma vavagwe kuka ndamwaulila Yesu kushidoni, “Nang'olo, haunashumbukange mwaa nan-gu hanguvaikidile kungwidila wako kwing'ande kwangu. ⁷ Ni ashi shingutadídye kulyona kunyambikanga kwida nangu nimwene ndatangola namu wako. Kanji ukatangola lilove limo tu, ntumika wangu andapona. ⁸ Mwaa nangu ni nimunu ngúvele mwina madalaka na ninkuvanavo vaing'ondo vandivalamulila. Nikanna-mulila jumo, ‘Wena!’ Nae kukinneu. Junji, ‘Ida!’ Kwidin-neu. Nikannamulila ntumika wangu, ‘Tenda ashi!’ Nae kutandenneu shosho.” ⁹ Yesu akaigwe malove ala, anínshanga munu ajo; nae kushiliuka kutwala kwaulila imbumba yavanu íshimwoda kushidoni, “Ninkum-manyiya ngala doni, ata mo mvanaishilaeli, hanguna-va kukodya likulupililo kenga ali.” ¹⁰ Bai vanu vava-tumíle avalá pavaujidile kukaja, vanínkodya ntumika jo àponile.

Yesu ankundyuwa mwana wanamwili

¹¹ Napanelo ling'oto lyawakati padyoko, nae andyúka kulikaja limo lyavashema Naimu; vakwoda vake vandyúka namu nae pamo na imbumba yavanu vanji. ¹² Akawike pashengo likaja, mwe! Vanu kwaloka vanyukete maiti; maiti ala avele amwana nnume avéle jumo jojo. Mwene nkúvaleka avele nkongwe namwili na imbumba yavanu vapalikaja ishinampalakela. ¹³ *UMU* akamwone namwili jo andímwanangila shididi kutwala kushidoni, "Haunalile." ¹⁴ Nae kuvandika, kukamula igoli yavanyukatidíle maiti ailá, vanu vanyukéte igoli kwimila nae kushidoni, "Nnemba! Ninkukwaulila, takatuka!" ¹⁵ Maiti apalá takatuku, ngoo, kutunduvanginne kutangola nae kumwila kumwing'a mwene anyoke. ¹⁶ Vanu uti kuvainjila kujopa kutwala kumupa lishangelo Nnungu vaashidoni, "Pakati petu andyumilila nkúlava nkumene namene!" Vanavo kavili kushidoni, "Nnungu andida ndavaangan-gola venentete vake!" ¹⁷ Bai dyabali adyo dimwe Yesu dindígwini ku Yudeya na muvilambo uti vyashitanono.

Vakwoda vamwe Nshuwau Wakubatisha

Mateu 11:2-6

¹⁸ Napanelo vakwoda vake Nshuwau vanímmalang-gangila Nshuwau vinu avyo uti. ¹⁹ Nshuwau akaigwe, andíavashema vakwoda vake vavili kuvatuma kumwe *UMU* vakamudye doni, "Da wako ni gwegwe watukulindila kwida kwali tunnindile junji?" ²⁰ Bai vakawike pavele Yesu vanavo kushidoni, "Nshuwau Wakubatisha anditutuma twide tukudye doni, 'Da wako ni gwegwe watukulindila kwida kwali tunnindile junji?' " ²¹ Muwakati wowo Yesu andívaponia valwele voe vavilwele vyakuvilingananga, vamauvilo na vamaji-ni aukalau. Na yadavo vákalola andívatadya kupata kulola. ²² Yesu napane andívajang'ula vanu avalá kushidoni, "Wena mukammalangangile Nshuwau vyamug-wene na vyamwigwite. Kamwaulile doni, vákalola vankupata kulola, vakudidimanga madodo vankuwe-na, vamaimba vankutakata, vákaigwa vankwigwa, vakupela vankuvadyuwa na vamashikini vankuvalan-gangiligwa ntenga wambone. ²³ Andijaligwa munu ákangunyatila nangu."

Mapundisho kwamwaa umwe Nshuwau na Mwana

Wamunu

Mateu 11:7-19

²⁴ Napanelo avalá vaidíle na ntenga umwe Nshuwau vakatumuke mulyutu alyo Yesu andítunduvanga kutangola ing'ano imwe Nshuwau avaulila vanu vapag-wíte apo kushidoni, "Da kushimbweshe muukile ndalo-la nyamani? Muukile ndalola udani úshipunga imepo? ²⁵ Kanji muukile ndalola nyamani? Muukile nannola munu ágwalangidile shana? Mwenu! Vagwalangidile dinguvo dyakushenga na vanáma mukupuwanga, vaikalanga muding'ande dyavaumu. ²⁶ Kanji shana

muukile ndalola nyamani? Muukile nannola nkúlava? Elo nkúlava kanji nangu ninkumwaulila doni, nae pankulava po, andipunda; ²⁷ ni jojo aijá wavamwandike doni, 'Lola, nannangaledya njelo wangu apite akukandyangidya indila yako umwene úkanava kupi-ta.' ²⁸ Nangu ninkumwaulila ngala doni, pakati pavanu vamushilambo shapai haumilidile nkúlava ámpundile Nshuwau. Kanji aijá ndikidiki muutawala wa Nnungu aju ni nang'olo ámpundile nae. ²⁹ Vanu uti na ata vakukatisha-ukodi vamwigwilidile Nshuwau, vandímu-pa ishaliya Nnungu mwaa wakuvapa ubatisho Nshuwau ³⁰ kanji mapalishayo namu vamwalimu vadishaliya pakwita kuvapa ubatisho Nshuwau, vandiludyanga malotelo a Nnungu pamili pavo.

³¹ "Vanu vaimbula ai ndivalinganiange na nyamani? Vanu ava vavele mwananyamani? ³² Leka ndivalingani-ange na vadyoko vaikaléngé mumautu aumbala vatanganila doni,

" 'Tundimwambela magoma,
mwenu hamuvinile.
Tundimba dimu dyashililo,
mwenu hamulidile.'

³³ Shapo lo, andida Nshuwau Wakubatisha munu ákashilya na ákashikumbila ugwalwa wavyepo mwenu kushidoni, 'Anintawala lijini ajo.' ³⁴ Kwida Mwana Wa-munu álya na ákumbila mwenu muushidoni, 'Nnole munu wakululuka, lilevi, njave vakukatisha-ukodi na vakutega.' ³⁵ Kanji napane limanyilo lyake Nnungu linkulilodya kuva lyaishaliya kwa avilá vyavatenda vaitikidíle."

Yesu ankupakigwa mauta nng'ande mwake mpal-ishayo

³⁶ Napanelo mpalishayo jumo anínnalika Yesu kwing'ande yake akalye shakulya; Yesu kwinjila nng'ande amulá kutwala nanae kwikala pandamu. ³⁷ Mwe! Nkongwe jumo nkútega wapalikaja lyolyo aka-manye doni Yesu avelé nng'ande mwake mpalishayo alye shakulya, nae andítwala ishupa yake yamauta akunung'angila ³⁸ kuka ndamwimila Yesu pamadodo pake, kulila, myodi kugwilila mmadodo mwake Yesu kutwala ugwimbu wake kupukutanga myodi mmado-do mo, kupalapata na kupakanga mauta. ³⁹ Napanelo mpalishayo aijá annalike Yesu akone davo, andítango-la shintimatima aashidoni, "She! Aju leka ávele nkúlava mwui, shi akanimanya nkongwe ánkamulanga aju; nkongwe aju, nkútega!"

⁴⁰ Kanji Yesu andímwaulila kushidoni, "Simoni! Shipali shinu shangulota kukwaulila wako." Simoni, "Shinu shani mwalimu?" ⁴¹ "Munu jumo ntajili ashindavadai vanu vavili njuluku wake. Jumo ashindai dinali dimiya mwanu, junji kundai amushini. ⁴² Kanji vanu vavili ava

† *Lola Malakiya 3:1.* †† *Vayuda vakannalika munu kwing'ande kwake, munu ajo ashindalindila kumwambatila, kunnavyanga medi mmadodo na ikava kenga munu ajo waishima vashinampaka mauta muti. Kanji vitendo avi uti mpalishayo Yesu hantandile. Nadoni mpalishayo anímmikila dyelwelu ding'umene Yesu. Napanelo nkongwe wamadambi aijá andítenda vinu uti vivaikidíle atandedye mwene ing'ande.*

uti kwodamwaa havavenavo njuluku wakunnipa, nae andivalivalivila uti. Napanelo pakati pavanu vavili ava, wakwashi álota kunnagwaledya namene mwene njuluku?" ⁴³ Simoni kushidoni, "Nangu ngwona jo wanivalidile poe jo." Yesu kushidoni, "Undyamuwaa shana." ⁴⁴ Nae kushiliuka kunnola nkongwe kutwala kumudya Simoni kushidoni, "Unkumwona nkongwe aju? Nangu ndiinjila nng'ande mwako, wako haungupele medi akunavanga mmadodo kanji nkongwe aju, aningunavyanga madodo myodi kutwala kungwanyalanga na ugwimbu wake. ⁴⁵ Haungukumbatidile kanji nkongwe aju, te ndikainjile hanapumula shinu kungupalapata mmadodo. ⁴⁶ Haungupakile mauta mmuti kanji nkongwe aju, aningupaka mauta akuning'ila mmadodo. ⁴⁷ Nadoni ninkukwaulila ngala doni, madambi ake avéle oe, andilivalivika; ni ashi shalodya linagwaledyo likumene. Kanji kwaupande wako wako, nangu nikwaulila doni, munu ánalodya linagwaledyo lidikidiki, Nnungu annivaliva padyoko madambi ake."

⁴⁸ Kutwala apo andímwaulila nkongwe aijá kushidoni, "Madambi ako mwiu andilivalivika." ⁴⁹ Bai avalá vanu vapagwíte pavashilya apalá vandyúdyanianga vaashidoni, "Da aju avelé kenga nyani áulula kuvalivaliva vanu madambi?" ⁵⁰ Kanji Yesu andímwaulila nkongwe jo kushidoni, "Likulupililo lyako lindikuposha, wena kwaamani."

Vakongwe váshintumikila Yesu na mali ave

8 Vinu ayo vikapite, Yesu ashindapita atanela makaja makumene na madikidiki alailila na avalanganga ntenga wambone wautawala wa Nnungu. Vamyombe kumi na mbili avalá vandímwoda pamo na ² vakongwe vavaponídye majini aukalau na vilwele vinji. Vakongwe avo vavele ava: Maliya wavashinshema Maliya wa ku Magadalema nkongwe jojo wamuumídye Yesu majini saba, ³ Shuwana ndyagwe Kusha ndyoko wake Elode, Susana pamo na vakongwe vanji váshintumikila na mali ave.

Nkong'o waulongo wakuwilingananga

Mateu 13:1-9; Malukushi 4:1-9

⁴ Napanelo vanu vaaloka mmakaja uti vamwidila Yesu na dimbumba dyavanu dikadyanienge, nae andítangola nkong'o au, ⁵ "Munu jumo andyúka ndamwadilila imbeju yake yaulende. Pashimwadilila, indípagwa igwilidíle nanyenje indila; vanu kuluvatanga kutwala vyuni vyakuniania kudadalanga. ⁶ Inji kugwilila padinyanga; paimadile, kujuma mwaa haupagwíte ntalolo. ⁷ Inji kugwilila panashilanga; paimadile na nashilanga momo pamadile, kubyaa. ⁸ Kanji inji kugwilila paulongo wambone, kumela, kupa vyepo vyoe namene vyakuwikila imiya kula lutavi." Akamalile kutangola nkong'o au andílailila aashidoni, "Avé na matu, aigwe."

Mana ankong'o

Mateu 13:10-23; Malukushi 4:10-20

⁹ Vakwoda kutwala kumudya, "Da nkong'o au wamba nyamani?" ¹⁰ Nae kushidoni, "Mwenu jo vanintadya mumanye vipii vyautawala wa Nnungu kanji vanji vo, 'vipii avi vandavavalangangila kwamikong'o kwambangidya valola avi, havanone shinu na vaigwilila avi, havanamanye shinu.'

¹¹ "Napanelo mana ankong'o au ni ala: imbeju yo ni lilove lya Nnungu; ¹² igwilidíle ndila ailá inkwitika kuva vanu vaigwilíla lilove lya Nnungu kutwala Ndamoni kwida ndausa lilove alyo mmitima mwave pakulota havanakulupile na havanambwalegwe. ¹³ Igwilidíle padinyanga inkwitika kuva vanu vánatenda pavaigwilila lilove lya Nnungu, kupwashalela na lipuwilo kanji mwaa úkave wakulitalalakele, vakulupila kwawakati kutwala akavakodya malingo kutila. ¹⁴ Igwilidíle panashilanga inkwitika kuva vanu vaigwilíla lilove lya Nnungu kanji vakaikalanga, mangaiko, mali na ditama dyashinamilo kuvatita dimumu kutwala vyepo vyavo mene kukamala. ¹⁵ Kanji imbeju igwilidíle paulongo wambone inkwitika kuva vanu vánatenda vakaigwa lilove lya Nnungu kuvikila kuntima wiu na kupa vyepo kwaindila yakulipililila.

Lilangadyo lyaitaa

Malukushi 4:21-25

¹⁶ "Hapali munu ánatenda akakaledya itaa kwinkidya kwali kuvika mulyungu igoli kanji avika pashinu pakwaneka pakulota vanu vainjila nng'ande mo, vone kulangala. ¹⁷ Ivelé doni, hashipali shinu shilipiídye shilóta hashinaundukuke na ata hashipali shinu shíkamanyika shilóta hashinamanyike. ¹⁸ Igwilila shana vyanimwaulila mwaa munu ávenavo, Nnungu andamwanjadyedya na aijá ákavenavo, sho padyoko shalyona kuvanavo sho, Nnungu anampoka."

Jujumunu na vanung'unuvake Yesu

Mateu 12:46-50; Malukushi 3:31-35

¹⁹ Napanelo anyoke na vanung'unuvake vandímuukila kanji havaulwíle kummandika mwaa waimbumba yavanu. ²⁰ Vanu kumwaulila, "Anyoko pamo na vanung'unuvako vapali panda po, valota wonanenavo." ²¹ Kanji nae kushidoni, "Ajala na vanung'unuvangu ni avalá vaigwilíla lilove lya Nnungu na kuvikila mmitendo."

Yesu ankumaladya shimbunga

Mateu 8:23-27; Malukushi 4:35-41

²² Muliduva limo Yesu andívaulila vakwoda vake doni, "Twamboke tuke litanda nkono unji," vanavo kwinjila mwingalava kutwala mwanda. ²³ Vávele mmedi vauka, Yesu kulala kuukila mulwono. Mulitanda mo ni kwida shimbunga; ingalava kuteka medi, vanu kupagwa mushijoidyo. ²⁴ Vanavo kumwimulanga Yesu, "Mwalimu, mwalimu! Wetu po kupela!" Nae kutakatuka, kutangalela shimbunga pamo na mawimbi akujowa

alalá; bai shimbunga pamo na mawimbi kulimaladya kutwala kuva shana. ²⁵ Nae kuvaulila vakwoda vake, “Da likulupililo lyenu livé pashi?” Kanji vanavo vandijopa na vandyúdyania vashanga, “Da munu aju átangalela imepo na medi kutwala kumwigwilila, avalalélé mwashi?”

Yesu ankumponia munu wamajini

Mateu 8:28-34; Malukushi 5:1-20

²⁶ Kutwala apo vanavo vandíwika kushilambo sha ku Gelasha shivéle shalato litanda nkono unji na pa Galileya. ²⁷ Yesu pashulwike mwingalava munu jumo wamajini wapalikaja Iya Gelasha Iyo, andímwidila. Munu aju andínama vyaka vyo awena matakodavo na hashiikala nkaja; ashiikala kuvyonga bai. ²⁸ Nae akamwone Yesu andíkutakutanga kugwilangila mmadodo mwake kutwala kutangola pashanya po aashidoni, “Yesu mwanagwe Nnungu Wapashanya-uti, da wako shako nyamani kumili kwangu? Ninkukujugwangila haunanguvyauvyange!” ²⁹ Nae andíjugwa davo mwaa Yesu anínnamulila Ijini nshapu aijá aume mumili mwamunu ajo. Ijini jojo jo, myanda vyo aníntawala munu aju; ata vakammika pashinu vamuungile mang'unyang'unya avitali mmakono na mmadodo, nae ashindalundumula Ijini kuntwala kumuukanavo kunundu. ³⁰ Napanelo Yesu andímudya, “Da wako lina lyako nyani?” Nae kushidoni, “Imbumba,” mwaa nae avele na majini oe namene. ³¹ Napanelo majini alalá anínjugwangila Yesu hanavajele kuli-tavaleva. ³² Pakati popo, shindípagwa shipinga shikumene shavanguluve shíshipita shilya pashanya lishinga. Nadoni majini anínnamadikila Yesu avala-mulile vauke vakavainjile vanguluve vovo nae kuvala-mulila. ³³ Bai majini alalá andímuumananga munu aijá kuka ndavainjilanga vanguluve kutwala vanguluve vo uti kwalela shipajelo kulijalangila mulitanda, kuwanga. ³⁴ Napanelo vanu váshilanga dinguluve avalá vakone vitandeke avilá, vandítukuta kuka ndavalanganga kukaja na mumakaja ashitanono. ³⁵ Vanu kuka ndalola vitandéke avilá; pavawikile pavéle Yesu, vanínkodya munu wamuumile majini aijá àikele pavéle Yesu na ding'ano dyake dimwikalenge shana na ágwalangidile. Vanavo vakamwone, vandijopa namene. ³⁶ Avalá vagwéne vene vandívalangangila vanu avo mwaukile ndaponela munu aijá wamajini. ³⁷ Kutwala vanu uti vashilambo sha ku Gelasha sho kunjugwa Yesu avanyeme mwaa vashindajopa namene. Bai Yesu kwinjila mwingalava pakulota auje. ³⁸ Napanelo munu wamuumile majini aijá kujugwa auke namu Yesu kanji Yesu kushidoni, ³⁹ “Mene! Uja uke kwenu ukavallangange vitendo vikumene uti vyakutandelele Nnungu.” Bai nae andyúka adingula likaja uti avalanganga vitendo vikumene uti vyantandelele Yesu.

Kudyuka kwamwanagwe Yailu na kupona kwankongwe

Mateu 9:18-26; Malukushi 5:21-43

⁴⁰ Napanelo Yesu akauje, imbumba yavanu inímp-washalela mwaa vanu uti vandíikala vannindila. ⁴¹ Mwe! Kuwikinneu munu jumo wavashinshema Yailu avele nkútawala wapashitala shakulipudidya. Pawikile pavéle Yesu nae andíshidika kunjugwangila Yesu auke kwing'ande kwake ⁴² mwaa ko kwing'ande kwake ko, mwanagwe nkongwe ávele jumo jojo na wavyaka kumi na mbili avele nnwele wakuleka indaja. Bai Yesu pashuka, vanu vashinashinya namene. ⁴³ Napanelo andípagwa nkongwe jumo ávenavo shilwele shampapa shauwile vyaka kumi na mbili; nkongwe aju andímalila vyake uti avapa vakulaula kanji hapali nkúlaula áulwile kumponia. ⁴⁴ Nkongwe ajo andívandika kunyuma kwake Yesu kunkwaa munkumbu waikanju; akankwae, myadi vyo kumalalin-neu. ⁴⁵ Yesu kuya, “Nyani ángukwaidye?” Vanu uti kukana. Vakakane, Patulu kushidoni, “Mwalimu! Vanu vandikutang'anedyana na vandikushinya namene!” ⁴⁶ Yesu, “Mene, apali ángukwaidye mwaa nimwene ndimanya shana, mumili mwangu amu dimongo dindikola madengo.” ⁴⁷ Napanelo nkongwe aijá akone doni hayululika kuligwadyagwadyanga, anímmandika Yesu atatemala kutwala kushidika; akashidike, andívalanganga pamevo avanu uti shintadídye ankwa na kulivalanganga mwaponedinneu. ⁴⁸ Kanji Yesu kushidoni, “Namwana, likulupililo lyako lindikuponia; wena kwaamani.” ⁴⁹ Akune Yesu atangola, kwaloka munu jumo wapaing'ande yankútawala wapashitala kwida ndamwaulila nang'olo wake kushidoni, “Haunanshim-buwange mwalimu jo, mwanavo andipela.” ⁵⁰ Kanji Yesu akaigwe nae kushidoni, “Haunajope; kulupila tu. Mwanavo andapona.” ⁵¹ Yesu akainjile nng'ande amulá, halatíle amwode munu woewoe ila bai Patulu, Tiyagu, Nshuwau, tatake mwana pamo na anyoke. ⁵² Pashinu apo vanu uti vashindalilanga na vashinan-namadikila kanji Yesu kushidoni, “Hamunalile! Hanapela shinu, ona lwono.” ⁵³ Vanu uti kumweludyan-ga mwaa vandímanya doni, andipela. ⁵⁴ Kanji nae anínkamula; akankamule kushidoni, “Mwali, takatuka!” ⁵⁵ Mwali kumuujila imumu kutwala kutakatuka, Yesu kulumulila vamupe shakulya. ⁵⁶ Bai vatatawake vandíshanga namene kanji Yesu andívaulila havanamwaulile munu.

Yesu ankuvatimidya vamyombe kumi na mbili

Mateu 10:5-15; Malukushi 6:7-13

9 Napanelo Yesu andíwashema avalá kumi na mbili kuvapa dimongo na madalaka akulamulilila majini uti na akuponedyana vilwele ² kutwala kuvatuma vauke valanganga ntenga wautawala wa Nnungu na vaponia vilwele. ³ Andívaulila doni, “Mushimwanda shenu hamunanyukate shinu; ipimbo mene, lipeta lyashakulya mene, njulukulu mene na ata dinguvo mbili

mene. ⁴ Mukawika palikaja, paing'ande yoeyoe yamulota kuwikila, ikalanga popo mpaka muliduva lyakuma. ⁵ Palikaja lyoelyoe vakamwita kumpwashalela, pamuma po pumunanga litutunga mmadodo mwenu pakulota uve ushuda kumili kwave." ⁶ Bai vanavo vandyúma kuka vatanela mmakaja vavalanganga ntenga wambone na vavaponia valwele kula pashinu.

Elode dinkumilingangianga ding'ano

Mateu 14:1-12; Malukushi 6:14-29

⁷ Napanelo umu Elode andígwa uti víshitandeka kutwala kumilinganianga ding'ano mwaa vandípagwa vashishidoni, "Nshuwau jo, andidyuka," ⁸ vanji doni, "Mene, Liyashi andyuja," vanji doni, "Mene, andidyuka nkúlava jumo wakala." ⁹ Kanji Elode kushidoni, "Nshuwau, nangu ndilamulila kunnumula ukoti! Kushi wanimwigwanga kutenda vinu avi aju, nyani kavili?" Bai Elode ashinannambela munu ajo amwone.

Yesu ankulisha imbumba yavanu dyalupu mwanu

Mateu 14:13-21; Malukushi 6:30-44; Nshuwau 6:1-14

¹⁰ Napanelo vamyombe vake avalá pavaujite vaním-malangangila uti vinu vyavatandile. Kutwala apo Yesu andívaukanavo nkono wakunjini wa Beteshaida vanyema padyoko. ¹¹ Kanji imbumba yavanu ikammanyemwawanalele, indímwoda. Nae kuvapwashalela kutwala kutangonavo ing'ano yautawala wa Nnungu na kuvaponia vilwele vanu vashibidi kuvaponia. ¹² Liduva lyuka mmamba, vamyombe vake Yesu kumi na mbili avalá vandímwidila Yesu ndamwaulila doni, "Vaapukaniange vanu vauke mmala na mmakaja avandíke vakapate shamoto na vakapumule. Mwaa patuvele apa panalugwangwa vila." ¹³ Kanji Yesu kushidoni, "Vape mwenu po shakulya sho!" Vanavo kushidoni, "Wetu hatuve shakulya! Tavenavo magung'u mwanu na dyomba mbili bai. Kwali tuke wewe apa tukashume shakulya shakuvatosha vanu ava uti." ¹⁴ Ashii pashinu popo po, vandípagwa valume dyalupu mwanu. Napanelo nae andívaulila vakwoda vake kushidoni, "Vaikadyange vanu vo muvipinga vyavanu amusini-amusini." ¹⁵ Vanavo kutandela momo, kuvaikadyanga vanu uti. ¹⁶ Yesu kutwala magung'u mwanu alalá pamo na dyomba mbili adilá kulola kuwa kwalaliya kutwala kuvapa vakwoda vake vavajavile venentete. ¹⁷ Bai vanu vo vandílya na uti vandípuwanga; pavatwalenge makombo vandyúmbadya makalala kumi na mbili.

Patulu ankummalanganga Yesu kuva Klistu

Mateu 16:13-19; Malukushi 8:27-29

¹⁸ Muliduva limo Yesu àvele gweka ashwali, vakwoda vake vanímmandika nae kuvaudya kushidoni, "Da vanu vangwona nangu kuva nyani?" ¹⁹ Vanavo kushidoni, "Vakwona kuva Nshuwau Wakubatisha, vanji Liyashi, vanji nkúlava jumo wakala andidyuka." ²⁰ Yesu kuvaudya kavili, "Kushi mwenu mungwona kuva

nyani?" Patulu kushidoni, "Wako Klistu † wake Nnungu."

Yesu ankumanyiya kaladavo yakupela na kudyuka kwake

Mateu 16:20-28; Malukushi 8:30-9:1

²¹ Nae kuvaduma havanammanyiye munu ²² na kutangola kavili doni, "Mwana Wamunu inimmaikila auvauvange namene; vanang'olo, vakulangalalela-shadaka vanang'olo pamo na vamwalimu vadishaliya, vana-vo vandamwita. Indimmaikila vamyae kanji muliduva lyantatu andadyuka."

²³ Namomo andívaulila vanu uti doni, "Munu akalota kungwoda nangu, alishukulu; kula liduva anyukate nshalaba wake angwode. ²⁴ Mwaa woewoe álota aposhe shingumi shake andakatoka kanji woewoe álota akatoke shingumi shake mwaa wakungunagwaledya nangu, andaposha. ²⁵ Da munu alota kupata wambone shani akapata shilambo uti kanji alijaa jo mwene kwali alivikila jo mwene? ²⁶ Munu woewoe akangwanangila nangu dyoni na kwanangila dyoni malove angu, muliduva lyakwida Mwana Wamunu na lishangelo lyake, mulishangelo lyolyo lyatatake na lyavanjelo vakwilimiyanga, nanae munu ajo andamwanangila dyoni. ²⁷ Ninkumwaulila mwiu doni, vapali vanu popo apa, vanavo havapela vakanava kwona utawala wa Nnungu."

Yesu ankujalukanga ing'ope

Mateu 17:1-8; Malukushi 9:2-8

²⁸ Napanelo akatangole malove alo, ling'oto lyakupita ishumana imo, nae aníntwala Patulu, Nshuwau namu Tiyagu kuvaukanavo kulishinga ndashwali. ²⁹ Pashishwali ing'ope yake indíjalukanga na ikanju yake kuva yakushenga kubidanga mevo. ³⁰ Mwe! Kwaneka apalá na lishangelo vanu vavili, Musha namu Liyashi vatangonavo. ³¹ Vanavo vandyámbangila mwaa ing'ano yakupela kwake Yesu ku Yelusalemu atandedya malotelo ake Nnungu. ³² Napanelo Patulu pamo na vavagwe vandílala lwono; vakashishuke, vandyóna lishangelo lyake Yesu na kuvona vanu vavili vavéle namu Yesu avalá. ³³ Vanu avo vakatumuke pavéle Yesu, Patulu kumwaulila Yesu kushidoni, "Mwalimu! Ni shambone mwatupagwididye pashinu apa, leka tukadyange mautu matatu akwikala; limo lyako, linji Musha na linji lyo live limwe Liyashi." Nae atangwele pakamanya shamba. ³⁴ Pashitangola lindívainikidya lyundi; likavinikidye, vanavo ni kujopa doni. ³⁵ Mo mulyundi mo lindyúma lidi líshishidoni, "Aju ni mwanangu, wakatandalegwa wangu, jojo jo mwigwilile!" ³⁶ Lidi alilá likamalale, Yesu vangwené àvele gweka. Bai vana-vo vandímalala na mumaduva lolo, havammalangidíle munu avilá vyavagwéne.

† Lina Iya a Klistumana ake a wakupakigwa mauta.

Yesu ankumponia ndyoko walijini

Mateu 17:14-18; Malukushi 9:14-27

³⁷ Napanelo palyamba lyake vanavo vakaalele palishinga apalá, imbumba yavanu indímuukila Yesu. ³⁸ Mwe! Munu jumo wamwimbumba kunjugwa doni, "Mwalimu! Ninkukujugwa unnole mwanangu mwaa avelé jojo aju bai. ³⁹ Lipali lijini línantenda amwinjila; akamwinjila, ndyoko kukugwanginnee, kungalagayanganga mpaka kumuumadyanga shulu nkanywa. Ukashimwona anneka mpaka ankajang'alange. ⁴⁰ Nangu ndivajugwa vakwoda vako vankumulange lijini ajo kanji havaulwile." ⁴¹ Yesu kushidoni, "Shasho! Mwenu ni mmanu múkakulupila na múkamanyikanga! Da nangu ndapagwa namu mwenu ninnaga mpaka duvani? Mwidena akuno mwanavo jo." ⁴² Mwana amuukila Yesu, lijini liníngwiidya pai kungalagayanganga kanji Yesu anínshulanga lijini nshapu jo, kumponia mwana nae kuntwala kumwing'a mwene tatake. ⁴³ Bai vanu uti vandishanga shiumu shalishangelo lyake Nnungu.

Yesu ankumanyiya kavili yakupela

Mateu 17:22-23; Malukushi 9:30-32

Pavishivashangania vinu vyashitenda Yesu, nae andívaulila vakwoda vake kushidoni, ⁴⁴ "Tela matu enu mwigwe avi! Mwana Wamunu andakumuligwa kumakono kwavanu." ⁴⁵ Kanji vakwoda vake avalá, havashimanya shashamba mwaa shindílipiya nadoni vanavo havaigwíte na vandíjopa kumuudyangidya shashamba.

Nyani nang'olo pakati pavakwoda?

Mateu 18:1-5; Malukushi 9:33-41

⁴⁶ Napanelo pakati pavakwoda, undyúmilila ntau wakudyania nyani nang'olo pakati pave. ⁴⁷ Kanji Yesu amanya makumbukililo ammitima vyave, aníntwala ndyoko kumwimidya pepi na mwene ⁴⁸ kutwala kuvaulila kushidoni, "Woewoe álota kumpwashalela ndyoko kenga aju palina lyangu, angupwashalela nangu na woewoe álota kungupwashalela nangu, ampwashalela aijá ángutumididye. Jo álota kuva ndyoko pakati penu mwenu uti, bai jojo andava nang'olo." ⁴⁹ Nshuwau kushidoni, "Mwalimu! Tundimwona munu áshivinganga majini palina lyako, wetu kunneya mwaa nae havéle mushipinga shetu shikwóda wako." ⁵⁰ Kanji Yesu kushidoni, "Hamunaneye! Mwaa woewoe ákavele mmongo wetu, ajo wètu."

Likaja limo lya ku Shamaliya linkumwita Yesu

⁵¹ Napanelo Yesu maduva ake akupwashalalegwa kuwa akavandikange, andyámuwa kumalidya mwanda kuka ku Yelusalemu. ⁵² Nae kuvalangaledya vanu; vanu ava vandínjila palikaja lya pa Shamaliya vakapanganiange kuwika kwake. ⁵³ Kanji vene kaja ayo, havalotíle kumpwashalela mwaa vandímanya shana doni, nae auka ku Yelusalemu. ⁵⁴ Kutwala vakwoda vake, Tiyagu namu Nshuwau pavagwene davo, vanavo kushidoni,

"Nang'olo, da shii tushamele moto kuwa uvashulukile vapyange?" ⁵⁵ Yesu kanji andívaulila vo vene kuvashulanga. ⁵⁶ Bai vanavo vandyúma kuka likaja linji.

Kukamadyanga mwakumwadela Yesu

Mateu 8:19-22

⁵⁷ Napanelo vavele mushimwanda, munu jumo andímwaulila Yesu kushidoni, "Nang'olo, nangu ndakwoda kwoekwoe kwaulota kuka." ⁵⁸ Yesu kushidoni, "Vanansheto vankuvanavo vivava, vyuni vyakuniania vinkuvanavo vyanda kanji Mwana Wamunu have pashinu pakwijamya muti wake." ⁵⁹ Yesu kutwala kumwaulila munu junji kushidoni, "Ngwoda!" Kanji nae kushidoni, "Nang'olo, shitandi nguleka nguke ndikanshunge atata mpaka papela ninshike." ⁶⁰ Yesu, "Valeke vakupela vashikane shivenevene kanji wako apa, wena uvalanganga utawala wa Nnungu." ⁶¹ Munu junji kavili kushidoni, "Nang'olo, nangu ndakwoda kanji shitandi nguleka nguke ndikavajugwe valikola vangu." ⁶² Yesu kushidoni, "Munu ánalima akuno alola kunyuma, hanakulupilika muutawala wa Nnungu."

Vamadengo vavé padyoko

Mateu 11:20-24

10 Vikapite avyo, *UMU* andívaalota vakwoda vanji sabini kuvatuma vavili vavili vauke valangalela mmakaja uti ashilota kupita nae ² kuvaulila kushidoni, "Mapuno avelé oe napane vamadengo vavelé padyoko nadoni njugwe mwene mapuno avatumidye vamadengo vanji mumapuno ake. ³ Wenananga! Kanji lola, ninkuntumidya kenga mmangandolo shing'ati mavinji. ⁴ Hamunanyukate iposhi, hamunanyukate lipeta, hamunanyukate vilatu na ndila mo, hamunatumimange muntaa munu nandele. ⁵ Paing'ande yoeyoe yamulota kuwikila, shitandi tangola doni, 'Amani ipagwe paing'ande apa.' ⁶ Paing'ande apo, akapagwa munu ávenavo amani, amani ayo inampata nae kanji akanapagwa, amani ai indamuujila mmene. ⁷ Hamunapite mutanela ding'ande. Ikalanga paing'ande imo yoyo mulya na mukumbila ashilá shavalota kumupa vene mwaa mmádengo inimmaikila apate nshala.

⁸ "Mulikaja lyoelyoe lyamuwika vanavo vampwashalela, shakulya shoeshoe shavamupa lyaa, ⁹ vawe vaponie na muvaulile vanu doni, 'Utawala wa Nnungu undimwikila.' ¹⁰ Kanji pamuwika palikaja vanavo vaita kumpwashalela, wena mudyengo muushidoni, ¹¹ 'Litutunga lyankaja amu litunamatidíle mmadodo ali, tunkumpumunila mmene. Ikala mumanya doni, utawala wa Nnungu undiwika.'

¹² Ninkumwaulila doni, muliduva lyaukumu venentete va ku Shodoma vandapata shaushanga shaangolo kuvapunda vanu valikaja alyo. ¹³ Upambale wako Koolashimu! Upambale wako Beteshaida! Leka ku Tilu namu ku Shidoni átandeki makango atandéke kwenu mwenu, vanavo doni vàlijugulenge kaladavo, valitaan-

† *Vashamaliya havashigwania na vayuda nadoni vakamanye doni Yesu auka ku Yelusalemu vanavo vandíta kumpwashalela nkaja mwave.*

ga maguni, kulipakanga liu valilodya kulijugulanga kwamadambi ave. ¹⁴ Napavedoni, vatilu namu vashidoni paukumu vandavang'unulangila padiki mevo kumpunda mwenu. ¹⁵ Kushi wako Kapalanaumu, ulota ulikwedye mpaka kuwa? Bai vandakupan-damwalela kumoka.

¹⁶ "Munu ámwigwilila mwenu angwigwilila nangu, ámwita mwenu angwita nangu na ángwita nangu, amwita aijá ángutumididye."

Shivaikidíle vapuwangile vakwoda

Mateu 11:25-27; 13:16-17

¹⁷ Bai avalá sabini vandyúja na lipuwilo vaashidoni, "Nang'olo, palina lyako majini ni kutwishimu doni."

¹⁸ Yesu kushidoni, "Nangu ndimwona Shatwani agwa kuwa mwainaa yamoto. ¹⁹ Lola, nangu ndimupa mwenu madalaka akuluvatila dinyoka, vinila na kumupa dimongo dyakutimbangila dimongo dyavamongo pashikantandeka shinu. ²⁰ Mwenu hamunapuwange mwaa majini kumwishimu kanji puwanga mwaa mena enu andyandikigwa kuwa." ²¹ Muwakati wowo, Yesu andípuwanga namene kwindila ya Imumu Wanashwe kutwala kushidoni, "Ninkukulambwalela Atata, *UMU* wakuwa na pai úpiidye vinu kwavanu vakumanya na vamang'amung'amu kutwala kusalodya vanu vila. Ninkukulambwalela mwaa wako Atata utandalelé mwaulotalele. ²² Atata aningukamudya vinu uti. Hapali muni junji ámmanyite Mwana pakavele Atata na hapali ámmanyite Atata pakavele Mwana pamo namu aijá walota kummalangangila Mwana." ²³ Kutwala kuvashiliukila vakwoda vake kuvaulila vanavo gweka kushidoni, "Andijaligwa mevo aóna vinu vyamwona mwenu. ²⁴ Ninkumwaulila doni, vakulava voe pamo na vaumu vashindalota vone vyamwona mwenu avi kanji havagwene na vashindalota vaigwe vyamwigwa mwenu avi kanji havaigwite."

Nkong'o wanshamaliya wantima shii

²⁵ Mwe! Mwalimu jumo wadishaliya kutakatuka kunninga Yesu aashidoni, "Mwalimu, Ngutendé nyamani pakulota ngupate shingumi shikamalilika?" ²⁶ Yesu kushidoni, "Da mu Lilamulo mo, vaandiké nyamani? Paunashomya po wigwa dashi?" ²⁷ Nae kushidoni, "Nnagwaledye *UMU* Nnungu wako na ntima wako uti, ungumi wako uti, dimongo dyako uti, ding'anong'ano dyako uti na nnagwaledye mujo kenga mo mwaulinagwaladyedya umwene." ²⁸ Yesu kutwala kushidoni, "Undijang'ula shana. Tandedya vyovyovo vyo, uname." ²⁹ Kanji mwalimu wadishaliya pakulota alilodye kuvanavo ishaliya andímudya Yesu doni, "Shapo na nyan-gu jo ni wakwashi kavili?" †

³⁰ Yesu kushidoni, "Munu jumo andyúma pa Yelusalemu kwalalela ku Yeliko; nindila kukodyanianavo vakwi-

† *Vamwalimu vadishaliya vavave vashivavika kuwa gweka vakavakaidile kuvanagwaledya. Nadoni mwalimu aju wadishaliya ashindalota kulilodya kuwa muni shii mwaa ashindavanagwaledya vanu uti vashivona kuwa vavagwe.*

va, vanavo kumuulanga uti vyagwéte, kunkanyalanga kuka kunneka ádilike. ³¹ Kwakulolowananga nkúlangalalela-shadaka jumo kwalalela indila yoyo; akamwone muni aijá, nae nanyenje, shembe, shembe, ajo áuka jo. ³² Namomo mulawi jumo pawikile palyutu alilá akamwone, nanae, vee, kulyukila. ³³ Kanji nshamaliya †† jumo áshuka kwashuka, pawikile palyutu lyavéle muni aijá, akamwone andímwanangila shididi.

³⁴ Anímmandika kumuukanga makana atanga mauta na ugwalwa wavyepo, kunkwedyo mupunda wake kumuukanavo paing'ande yavajeni kutwala kumwangan-galanga. ³⁵ Palyamba lyake, andyúmya njuluku kumupa mwene ing'ande kumwaulila doni, 'Mwangaikangile muni aju nimwene panguja shinu shoeshoe shalota kutumila, nangu ndakuujidya.' ³⁶ Dashi, pakati pavanu ava vatatu, wakwashi waumwona kulilodya kuwa muje muni wavankanyaléngé vakwiva avo?" ³⁷ Nae kushidoni, "Jo ámwanangidile shididi jo." Kutwala Yesu kushidoni, "Bai wena ukatandele momo."

Yesu kwing'ande imwe Malita

³⁸ Napanelo Yesu andyúkanavo mushu shimwanda shake pamo na vakwoda vake. Pavawikile palikaja limo, nkongwe jumo wavashinshema Malita kumpwashalela kwing'ande yake. ³⁹ Jo Malita aju, andívana-vo nung'une wavashinshema Maliya. Nae andíikala pepi na pamadodo amwe *UMU* amwigwilila shashitan-gola. ⁴⁰ Kanji Malita ashinangaikangila mukutumika poe; nae kuka pavele Yesu ndamwaulila doni, "Nang'olo! Da inkukunagwela mwanetu kunguleka nangu ngukola madengo gweka? Mwaulile angup-washele!" ⁴¹ *UMU* kushidoni, "Malita, Malita, shapo wako muntima mo unkwangaikangila vinu vyoe ⁴² kanji shilatégwa ni shinu shimo. Ni Maliya átandwele shinu asho shambone, hayululika kumpoka."

Pamushwali

Mateu 6:9-13; 7:7-11

11 Napanelo Yesu ápagwite mulyutu limo ashwali; painwike, nkwóda wake jumo andímwaulila kushidoni, "Nang'olo, tupundisha kushwali kenga mwavapundishididye Nshuwau vakwoda vake mo."

² Yesu kushidoni, "Mukalota kushwali, kaashidoni, " 'Atata, lina lyako liilimyangike.

Utawala wako wide.

³ Tupa shakulya shetu shanelo.

⁴ Tulivaliva madambi etu

mwaa nawetu tunánnivaliva woewoe átagela. Haunatulangalalele mukutubigwa.' "

⁵ Nae kavili kushidoni, "Tuke tulole, muni jumo pakati penu kuvanavo mbwadigwe; napanelo muni aju kumuukila mbwadigwe ajo shilo shing'ati ndamwaulila doni, 'Nyagwe, ngukapesha magung'u matatu ⁶ mwaa aninguwikila njeni kwing'ande kwangu na nangu hanguvenavo shakulya shakumupa,' ⁷ kut-

†† *Vayuda vashindavaishimu vakulangalalela-shadaka pamo na valawi kuvailudyanga vashamaliya kuvona kuwa vanu vashapu vakavakaidile kupata shingumi shikamalilika.*

wala mbwadigwe jo kunjang'ula àvele mo nng'ande doni, 'Haunangudingadinge. Nangu ing'ande ndijela nkong'o. Panguvele apa ndilala na vanavangu; hangu-ulula kutakatuka kwida ndakupa magung'u lo.' Dashi inkuululika kunjang'ula davo? ⁸ Mene, ninkumwaulila doni, ata akanatakutuke kuka ndamupa mwaa wakuva mbwadigwe kanji mwaa wakulota hanapate dyoni, andatakutuka kuka ndamupa kula shinu shalota.

⁹ "Napavedoni nangu ninkumwaulila doni,

"Jugwa mundapata,
lambela mundona,
taa odi mundapita;

¹⁰ kula munu ájugwa anápata,
álambela anóna

na átaa odi, anápita.

¹¹ Da tatamunu shani apa, ánatenda mwanagwe akanjugwa ligung'u nae kumupa lijanga, akanjugwa yomba nae kumupa nyoka ¹² kwali akanjugwa lii nae kumupa shinila? ¹³ Bai ikava kenga mwenu mmanu mmakalau munkumanya kujaula vinu vyambone kuvapa vanavenu, Atata nimpomo nae kuwa ko, ananjaula Imumu Wanashwe kuvapa avalá vanjúgwa."

Madalaka amwe Yesu ankwalakela kwashi?

Mateu 12:22-30; Malukushi 3:20-27

¹⁴ Napanelo Yesu anínkumulanga lijini bubu mumili mwamunu jumo. Lijini jo paumile bubu kutunduvanga kutangola, imbumba yavanu ni kushanga doni. ¹⁵ Kanji vanu vanji pakati pave kushidoni, "Aju ankukumulanga majini kwalilamulo limwe Beelishbuli nang'olo wave majini." ¹⁶ Vanji pakulota kunninga vanínjugwa alodye shimanyikilo shakwalakela kuwa. ¹⁷ Kanji Yesu amanya makumbukililo ave, andívaulila kushidoni, "Shilambo shoeshoe shavabyaananga shivenevene, shinábamoka na valikola vapwatána shivenevene, likola lyave linátimbikanga. ¹⁸ Shatwani akalitenda ing'ondo jo mwene, utawala wake ulota kuka dashi mushu? Ninkutangola davo mwaa mwenu po munkushidoni nangu ninkukumulanga majini kwalilamulo limwe Beelishbuli! ¹⁹ Kanji napane ikava kenga nangu ninkukumulanga majini kwalilamulo limwe Beelishbuli, kushi vakwoda venu vankukumulanga kwalilamulo limwe nyani? Ikava davo mwenu vovo vo, vandava vakuukumu venu. ²⁰ Kanji ikava kenga nangu ninkukumulanga majini kwadimongo dyake Nnungu, bai utawala wa Nnungu unimpata bai. ²¹ Munu wadimongo, wakulipanganianga shana na mabyanilo ake, akalaledya vinu vyapaing'ande pake; vinu avyo, vipagwa mu amani. ²² Kanji akamwidila munu junji wadimongo wakumpunda nae antenda ing'ondo antema, anámpoka mabyanilo ashilikulupilila na kunteka mateka. ²³ Nadoni woewoe ákalyunganienge namu nangu, ankunguvangedya na woewoe ákakungaila namu nangu, ankumwadila.

Kuujila kwalijini nshapu

Mateu 12:43-45

²⁴ "Mwenu, lijini nshapu akauma mumili mwamunu, anápita adumbadumba kushimbweshe alambela pashinu pakwikala. Akanakodya aashidoni, 'Leka nguujile kwing'ande yangu kwangumile.' ²⁵ Pawika, anákodya ing'ande yo vâpyailenge na vinu vâvikenge shana; ²⁶ nae kuja kuka ndavashema majini anji saba akumamodya kubanga kumpunda nae. Vanavo kuka ndamwinjila munu ajo kwikalanga kutwala shinamilo shamunu aju muwakati awo, kuva shakumamodya kunyata kupunda shitandi."

²⁷ Bai nae akatangole malove ala, nkongwe jumo wamwimbumba kutangola namene kushidoni, "Andijaligwa nkongwe ákuvaleke na kukujang'edya." ²⁸ Kanji Yesu kushidoni, "Vamamodye namene kujaligwa avalá vaigwilíla lilove lya Nnungu na kuvikila kuntima."

Shimanyikilo shimwe Janashi

Mateu 12:38-42

²⁹ Napanelo imbumba nnyenje mwake Yesu ishindaanjadyeka kutwala nae kavili kushidoni, "Vanu vaimbula ai vakalau. Ashii vajugwa shimanyikilo shakwalakela kuwa! Kanji havona shimanyikilo ila shimwe Janashi bai. ³⁰ Mo mwavalalele Janashi shimanyikilo kwavanenive, nanae Mwana Wamunu andava shimanyikilo kwavanu vaimbula ai. ³¹ Paukumu umu nkongwe wakwina shilambo andatakutuka pakati pavanu ava kuvavalanganga kenga vankuvanavo makosha. Nae andyáloka kushinu kushu kwida ndaigwilila mapundisho ake Shalomoni kanji mwenu, ápagwite apa aju ni nang'olo namene kumpunda Shalomoni. ³² Vanenive yadavo paukumu vandatakutuka pakati pavanu vaimbula ai kutwala kuvaukumu mwaa pavaigwite kuvalanganga kwantenga kumwe Janashi vanavo vandíjugulanga. Mwenu, ápagwite apa aju ni nang'olo namene kumpunda Janashi.

Nkong'o waitaa na waliu

Mateu 6:22-23

³³ "Hapali munu ánatenda akakaledya itaa kwini kidya kwali kuvika pashinu pakulipiya kanji avika pashinu pakwaneka kwambangidya vanu vainjila nng'ande mo vone kulangala. ³⁴ Kwaupande wenu mwenu, liu ni itaa iinjídya lilangadyo mumili wenu. Liu likanava lingumi, mili uti undávanavo shii; likava lingumi, mili uti undávanavao lilangadyo. ³⁵ Napavedoni lalyanga shana ikava kenga lilangadyo livéle mumili wenu halinava shinu shii. ³⁶ Ikava kenga mili wenu uti unkuvanavo lilangadyo paukavanavo shii nkono unji, popo po mili awo uti undávanavo lilangadyo kenga painammulikila mwenu itaa lilangadyo lyake."

Vapambale mapalishayo na vamwalimu vadishaliya

Mateu 23:1-36; Malukushi 12:38-40; Lukashi 20:45-47

³⁷ Napanelo Yesu akuno atangola kwaloka mpalishayo jumo kunnalika kwing'ande kwake akalye

shakulya. Nae kuka kwinjila nng'ande kwikala pandamu. ³⁸ Mpalishayo kutwala kushanga namene mwaa wakumwona Yesu pakanavanga medi pandamu paikéle. ³⁹ Kanji *UMU* kushidoni, "Mwenu mmopalishayo muukanga diwene na midamu panda gweka kanji nkati mo mundyumbalanga kushonda na ukalau. ⁴⁰ Mmanu mmakupuwanikanga davo mwe! Da ákandyenge panda havele jojo ákandyenge nkati? ⁴¹ Laledya shana vinu vyammitima vyenu kenga mo mwamunanaliyangidya shadaka shakuvapa vamáshikini, mundona mwiu mundava mmakutakata.

⁴² "Mupambale mwenu mmopalishayo! Mwenu mumya likumi lyavinu uti vyakulunganga dimbogwa kuleka linagwaledyo kwa Nnungu na kutandedya vyaishaliya. Kudyanga pamukatandadidye vinu avi pamukailudyanga vinji. ⁴³ Mupambale mwenu mmopalishayo! Mwenu múnagwaledya kwikala mumautu akulikwedya amuvitala vyakupudidya na múnagwaledya namene kumuudyanga na ishima ing'umene muumbala. ⁴⁴ Mupambale mwenu! Mwenu múvele kenga vyonga vigwalalidile vanu kupita valuvatanga pashanya pavakamanya shipagwite mulyutu alyo." †

⁴⁵ Kutwala mwalimu jumo pakati pavamwalimu vadishaliya kushidoni, "Mwalimu, pautangola davo po nawetu unkutuliula." ⁴⁶ Yesu kushidoni, "Mupambale namwenu mmamwalimu vadishaliya! Mwenu múvala mulila vanu valitike vyambumba víkaululika kulitika, mmene pamukadabunya ata padiki. ⁴⁷ Mupambale mwenu! Múpita muumbanga vyonga vyavakulava vavyéngé vanakuluvenu. ⁴⁸ Mwenu ni mmashuda múungidile nkono vitendo vyavanakuluvenu; vanavo vandibya mwenu kuumbila vyonga. ⁴⁹ Nimomo mwalitangaladile Limanyilo Iya Nnungu doni, 'Ndavapalakadyedya vakulava na vamyombe, vanji vandavabyaa vanji vo kuvapapata,' ⁵⁰ kwambangidya vanu vaimbula ai vadaigwe myadi vyavakulava vyavajéngé kutunduvangila kunantandi shilambo. ⁵¹ Vandadaigwa kutunduvangila myadi vimwe Abeli †† mpaka myadi vimwe Shakaliya ‡ wavamyaidile mwing'ande ya Nnungu pakatipakati akuno ku alutali ako kulyutu Iya Nnungu. Ninkumwaulila ngala doni, myadi avyo Nnungu andavadai vanu vaimbula ai. ⁵² Mupambale mwenu mmamwalimu vadishaliya! Múpiidye mungulilo walimanyilo; mmene hamwinjidile na ata avalá váshilota kwinjila, mundivadivilila."

⁵³ Bai Yesu akamalile kutangola malove alo, vamwalimu vadishaliya namu mapalishayo vashinannyatila na vashinanshinya ⁵⁴ vannumbata vapate nkanidyo kumili kwake.

Nkukumuku wamopalishayo

Mateu 10:26-27

12 Napanelo pavishitandeka vinu avyo, vanu makumi manga vandyúmbalanila mpaka ku-

† *Mumalamulo avayuda munu akavandika ntui ata akamanya, kwavanavo ashaaneka andilyambukisha udagwa. Lola Ishabu 19:11-22. †† Lola Kutunduvanga 4:1-10. ‡ Lola II Maimyo 24:20-22.*

tadya kuluvatananga kutwala Yesu kuvashiliukila vakwoda vake kuvaulila kushidoni, "Lilaledye! Hamunapakalange nkukumuku wamopalishayo yani shinankulaba. ² Hashipali shinu shavapiidye shilóta hashinamilile kulangele na hashipali shinu shavagwadyagwadyenge shilóta hashinamanyike. ³ Shinu shoeshoe shaulota kutangalela pashii vanu vandaigwa mui liduva livala na shaulota kunyinyitila kushumba shindavalangangigwa panantutuvilo.

Hamunajope

Mateu 10:19-20, 28-33

⁴ "Nangu mwenu mmavangu ninkumwaulila doni, hamunanjope munu ábyaa mili kutwala mene kuvanavo munji mwakuntandela ⁵ kanji ninkumwaulila nyani ávaikidile munjope; njope aijá ávenavo madalaka ánatenda akampedyá muni kuntwala kunjela kushena. Mwiu jojo jo, njope! ⁶ Da vanu havanashumidya vyuni mwanu na dishingo mbili? Bai Nnungu vovo vo, hapali ata jumo wannivaliva. ⁷ Ata wo ugwimbu wammyuti vyuni wo, Nnungu andimanya ishabu yake. Mwenu hamunajope mwaa munkuvanavo mana makumene kupunda vyuni vyoe!

⁸ "Ninkumwaulila doni, munu woewoe álota kulivalanganga kuva wangu pamevo pavanu, Mwana Wamunu momo anammalanga kuva wake pamevo avanjelo vake Nnungu. ⁹ Kanji aijá álota kungukana pamevo avanu, nanangu nankana pamevo avanjelo vake Nnungu. ¹⁰ Muni álota kuntangola kunyata Mwana Wamunu, analivalivigwa; kanji álota kunkupulu Imumu Wanashwe, halivalivigwa ata padyoko vela. ¹¹ Mwenu vakamuukanavo kuvitala vyakupudidya, kwavakutawala na kwavamadalaka, hamunan-gaikange mulambela mwakulishilididya na mwakutangalela ¹² mwaa muwakati wowo, Imumu Wanashwe anampundisha mwakutangalela."

Nkong'o wantajili wakupungukanga ding'ano

¹³ Napanelo munu jumo pakati paimbumba yavanu andímwaulila Yesu kushidoni, "Mwalimu, mwaulile nkulwangu angujavile vinu uti vyalakile atata papadile." ¹⁴ Yesu kushidoni, "Wako! Da nangu angwalweté nyani kuva nkúukumu kwali nkújavanianga pakati penu?" ¹⁵ Kutwala kwaulila imbumba yavanu kushidoni, "Lilaledye! Lishunge kwaing'ano yaliu mwaa shingumi shamunu hashivele muumbala wavinu."

¹⁶ Akavakang'ela apalá nkong'o au, "Muni jumo ntajili andílagwedya namene mulyala lyake. ¹⁷ Nae, 'Nduu, ngutandelé mwashi? Ngutae pashi vilyo vyangu?' ¹⁸ Kutwala kushidoni, 'Idavo, ndimanya mwakutandela. Ndaadulanga makuta angu ala, ngudenge anji makumene ngutae vilyo uti na vinji vyangu vyambone. ¹⁹ Ling'oto ndaulila ungumi wangu doni, 'Wako Ungumi! Napanelo undivanavo vyambone vyakutosha kutumila vyaka vyoe. Napavedoni pumula, lyaa, kumbila na puwanga.'" ²⁰ Kanji Nnungu kushidoni, 'Wako undipungukanga! Shilo sho shanelo ashi ndakupoka ungumi wako! Panikupoka po, kushi vinu

vyaukandyenge vyo, vyanyamani?' ²¹ Shinu ashi shinkulandananga na munu álikungailila mali kanji akavele ntajili pamevo a Nnungu."

Angaikila utawala na malotelo ake

Mateu 6:25-34

²² Yesu kutwala kuvaulila vakwoda vake kushidoni, "Hamunaangaikangile shingumi shenu kwa ashilá shamulota kulya na ata mili vyenu kwa ashilá shakulota kugwadya. ²³ Mwaa shingumi ni shinu shikumene kupunda shakulya na mili ni shinu shamana kupunda dinguvo. ²⁴ Valole shana vanashove vo; vanavo havanapanda ata havananang'ena, havavenavo makuta ata vidimbi kanji Nnungu ankuvalisha. Kushi mwenu, hamuvenavo mana makumene kupunda vyuni? ²⁵ Apali munu pakati penu ánaulula kwangangola kula shinu, ávele tayali kwanjadyedya padyoko vela shingumi shake? ²⁶ Ikava kenga vinu vidikidiki nyenda avi vinkunnema kutandedya, mwaa shani munkwan-gaikangila vinji? ²⁷ Lola shana maukutu adinduva mwakulumukila mo; vyanavo havinakola madengo, havinalikandyangidya dinguvo kanji ninkumwaulila doni, Shalomoni na lishangelo lyake uti hagwalidile kupunda vyanavo. ²⁸ Kanji ikava kenga Nnungu ankunemya maukutu amadíle mumwitu alindíla muliduva lyake kujalegwa pamoto; kushi mwenu, mmanu mmalikulupililo lidikidiki, Nnungu annemya kupunda apo? ²⁹ Mwenu hamunalambe shakulya na ata shakukumbila. Hamunajugulange. ³⁰ Venentete uti vamushilambo vankwangaika valambela vinu avyo namwenu momo Tatagwenu andimanya kenga vinu avyo, munkulota. ³¹ Shitandi kanji angaikangila utawala wa Nnungu; vinu avyo uti momo Nnungu andamupa. ³² "Hamunajope mwenu mmakwoda vangu mwaa Tatagwetu ininnagwela kumupa utawala wake. ³³ Shulushanga uti vyamuvenavo njuluku wo, muvape vamashikini! Likandyangidye mapeta ákapapukanga na mali ákapunguka kuwa; kwanavo nkwíva hanapita na ushwa haupali. ³⁴ Po panapagwa mali enu, ntima wenu upagwa popo.

Nkong'o wammádengo wakulilaledya

Mateu 24:45-51

³⁵ "Likunjangile dinguvo dyenu na kaledya ditaa dyenu. ³⁶ Tenda kenga mwavanatandela vanu vá-naikala mevo vannindila nang'olo wave áukile kushikukulu shashitamo pakulota pauja ako kutaa kwene odi, vanavo vanshimulilinneu. ³⁷ Vandijaligwa vatumika avo valóta kuvakodya nang'olo wave vavele mevo pauja. Nangu ninkumwaulila mwiu doni, nae andagwalangila pakulota avatumike kutwala kuvaikadyanga pandamu kwida ndavatumika. ³⁸ Nang'olo wave akawika shilo shing'ati kwali kumatiningatinga, vandijaligwa vatumika avo valota kuvakodya vavele mevo! ³⁹ Manya doni, tatamunu mwene ing'ande leka ámanyite wakati walota kwida nkwíva, akananneke nkwíva ajo atema ing'ande. ⁴⁰ Nadoni

ikalanga mevo mwaa Mwana Wamunu andaida shingangala."

⁴¹ Kutwala Patulu kumudya, "Nang'olo, nkong'o au utukang'alele wetu gweka kwali watuvanu uti?" ⁴² *UMU* kushidoni, "Da wakwashi wavankamudidye wakukulupilika na wading'ano wammikile nang'olo wake kuva nanangalaledi wapaing'ande pake wakuva-pa vamadengomwagwe shakulya muwakati uvaikidíle? ⁴³ Andijaligwa ntumika walota kunkodya nang'olo paida atandedya momo. ⁴⁴ Ninkumwaulila mwiu doni jojo jo, nang'olo anammika kuva munu wakulaledya vyake uti. ⁴⁵ Kanji ntumika jojo akaashidoni, 'Nang'olo wangu ankutima kuja,' kutwala kuvakamanga vatumikamwagwe valume na vakongwe, kutunduvanga kulyanga gwamba na kwambalwa, ⁴⁶ nang'olo wake ntumika jo andaida muliduva na muwakati wakalindila kutwala kumupa shaushanga shikumene ampambanianga mushipinga shavanu vákakulupila. † ⁴⁷ "Napanelo ntumika ámanyite malotelo anang'olo wake kanji aikala vila na pakatandedya vilotéka, vananshapa viboko vyoe namene. ⁴⁸ Kanji aijá ákashimanya malotelo anang'olo wake kanji akowa likosha livaikidíle vanshape, vananshapa viboko padyoko. Nadoni munu woewoe wavampele vinu vyoe, vanandai vyoe na wavankamudidye vinu vyoe, vanandai vyakupunda apo.

Hangwidinavo amani kanji umongo

Mateu 10:34-36

⁴⁹ "Nangu ngwidilé ndakong'a moto mushilambo shapai. Kwalala dashi kwona moto awo utumbulwike tayali! ⁵⁰ Ninkuvanavo ubatisho unguvaikidíle ngubatishwe, napane kutumbula dashi vingushanona muntima ata mpaka utandeki. ⁵¹ Da mwenu mwona kenga nangu ngwidinavo amani mushilambo? Um! Mene, ninkumwaulila ngala doni, ngwidinavo umongo. ⁵² Kutunduvangila ambi apa, vanu mwanu uropaing'ande imo vandaapukananga, vatatu vandaungana kuvilingananganavo vavili na vavili vandaungana kuvilingananganavo vatatu. ⁵³ Tatamunu na mwanagwe nnume vandavilingananga, jujumunu na mwanagwe nkongwe vandavilingananga, navyalamunu na navyalagwe vandavilingananga."

Kwaulangila vimanyikilo

Mateu 5:25-26; 16:2-3

⁵⁴ Kutwala momo kwaulila imbumba yavanu kushidoni, "Pamunona lyundi lyalakela kwalyenda liduva lidimbya mwenu mutangalenneu kushidoni 'Andatonya medi,' namwiu kutonya. ⁵⁵ Namomo pamunona imepo yakwalakela kwina shilambo ipunga mwenu muushidoni, 'lilota kwida litukuta,' namwiu kutandakela momo. ⁵⁶ Mmanu mmashinankulaba mwe! Mwenu munkumanya kwaulangila vimanyikilo vya-mushilambo na vyakuwa kanji mwaa shani hamunaulula shinu kwaulangila wakati au watuvele?

† Kwali: a vákakulupilika.

⁵⁷ “Mwaa shani hamunaamuwa shinu mwemwe mmene avilá vivaikidíle kutenda? ⁵⁸ Akuno uka namu waukashenienavo kumwe nkútawala, likanyalidye kwigwanianavo shing'ati indila. Ikanava davo andaku-utangidya kumwe nkúukumu, nkúukumu jo kukuwisha kumwe nkúshunga na nkúshunga kukujela nkalaboshi. ⁵⁹ Ninkukumanyiya ngala doni, nkalaboshi amo hauma ng'odo paukanava kulipanga njuluku mpaka idoshi.”

Kulijugulanga

13 Muwakati wowo, vandípagwa vanu vammalangangidíle Yesu ing'ano yavagalileya; vagalileya avo Pilatu andívabyaa vatenda shadaka shakutaa moto, myadi vyavo kwanganikana namu myadi vyavanyama vashadaka. ² Kutwala Yesu kushidoni, “Da mwenu mwona kenga vagalileya avo pakupela davo vavele vakutega kuvapunda vagalileya vanji uti? ³ Bai mene! Kanji mwenu mukanalijugulanga madambi enu mundapalela mo mwavapalalele vanavo. ⁴ Ata avalá vanu kumi na nane livagwalaléle libodo lya ku Shilowamu kutwala kupalanga, mwona kenga vavele vakutega vakumamodya kuvapunda vayelusalemu vanji uti? ⁵ Bai mene! Kanji mwenu mukanalijugulanga madambi enu mundapalela mo mwavapalalele vana-vo.”

Nkong'o wankungu úkapa

⁶ Kutwala kulunda kukong'a nkong'o au, “Undípagwa nkungu wapandíle munu jumo mulishamba lyake lyamilandi vyavyepo; † paukile ndalola vyepo, haka-didye shepo ata shimo. ⁷ Nae kumwaulila munu áshilaledya lyala alyo kushidoni, ‘Wako, ndiilanianga vyaka vitatu ngwida ndalola vyepo munnandi au kanji hangunakodya. Lumula. Mwaa shani udive lyutu muulongo amu?’ ⁸ Nkúlaledya kushidoni, ‘Nang'olo lindila mwaka au yadavo pakulota nangu ngwimbange nanyenje yake ngutaange mboleya. ⁹ Ukapa vyepo, mwambone kanji ukanapa, undalamulila valumule.’”

Yesu ankumponia nkongwe ákashuuduka

¹⁰ Muliduva limo lyakupumula, Yesu andípagwa apundisha mushitala shakulipudidya. ¹¹ Mwe! Mo mushitala mo kupagwa nkongwe avénavo lijini lyauwíle vyaka kumi na nane ákashuuduka. ¹² Yesu akamwone anínshema kutwala kushidoni, “Namwana, undyambolekwa mushilwele shako!” ¹³ Anímmikila makono, nkongwe jo kuudukinneu kutwala kumupa lishangelo Nnungu. ¹⁴ Nanangalaledi wamushitala ashanga mwaa wakuponia Yesu muliduva lyakupumula, nae andyáulila imbumba yavanu kushidoni, “Apali maduva sita avaikidíle kukola madengo; mumaduva lolo lo, idananga vamponie kanji muliduva lyakupumula ali, um, mene.” ¹⁵ *UMU* kutwala kushidoni, “Mmanu mmashinankulaba mwe! Apali munu pakati penu

† *Lishamba lyamilandi vyavyepo linkulinganana na venentete vanaishilaeli. Lola Ishaiya 5:1-2.*

ákananshimulila ng'ombe wake kwali punda wake muliduva lyakupumula kuka nankumbidya medi?

¹⁶ Kushi nkongwe aju mwanagwe Abulaamu wamuungile Shatwani vyaka kumi na nane, haimmaikidile kumwambola mukungwa muliduva lyakupumula?” ¹⁷ Yesu akatangole doni, andívataa dyoni vamongo vake uti kanji venentete vandípuwanga mwaa wavitendo vyalishangelo vyashitandedya nae.

Nkong'o waimbeju yanshupi na wankukumuku

Mateu 13:31-33; Malukushi 4:30-32

¹⁸ Kutwala Yesu kavili kushidoni, “Utawala wa Nnungu ngulandaniange na nyamani na uvelé mwanyamani? ¹⁹ Uvelé mwaimbeju yanshupi yapandile munu mulyala lyake; yanavo kumela, kukulumuka, kulijava dinavi kutwala vyuni vyakuniania kudenga vyanda mudinavi dyake.” ²⁰ Kavili kushidoni, “Utawala wa Nnungu ngulinganiange na nyamani? ²¹ Uvelé mwankukumuku watwete nkongwe jumo kutaa mudipishi nnatu dyaunga kutwala unga uti kukukumuka.”

Nnango udikidiki

Mateu 7:13-14, 21-23

²² Yesu andyúka mushu na shimwanda sha ku Yelusalemu apita atanela mmakaja makumene na madikidiki apundisha. ²³ Kutwala munu jumo kumudya Yesu kushidoni, “Da nang'olo, vanu vakupwashegwa valota kuva padyoko?” Nae kushidoni, ²⁴ “Likanyilidye kwambangidya mwinjilile pannango udikidiki mwaa ninkumwaulila doni, vanu voe vandalota vainjile kanji havaulula. ²⁵ Tatamunu mwene ing'ande palota kutakatuka kushima nnango, mwenu mundapagwa panda na mundatunduvanga kutaa odi muushidoni, ‘Nang'olo, nang'olo, tushimulila!’ Nae ananjang'ula doni, ‘Nangu mwenu hanimmanyite kwamwaloka.’ ²⁶ Kutwala mwenu kulingangila kushidoni, ‘Shasho! Wetu tundilya na kukumbila shalumo namu wako na kavili gwegwe undipita upundisha mudyengo dyetu.’ ²⁷ Kanji nae andatangola doni, ‘Ngwigwa, nangu hanimmanyite kwamwaloka! Ngunyema apa mwenu uti mótenda vinu vyakunyata.’ ²⁸ Pamumwona Abulaamu, Ishaki, Yakobo namu vakulava uti vavele kuutawala wa Nnungu, mwenu vângang'aladidye panda, popo po mundalila na mundatuka shulu. ²⁹ Vandaaloka vanu kwalyuma liduva, kwalyuka liduva, kushanya na kwina shilambo kutwala kupata mautu pandamu muutawala wa Nnungu. ³⁰ Igwa shana, pakati pavamwisho vanji vandava vatandi na pakati pavatandi vanji vandava vamwisho.”

Kutangadikangila kwa Yelusalemu

Mateu 23:37-39

³¹ Muwakati wowo atangola vandíwika mapalishayo kumwaulila kushidoni, “Tila uke! Mwaa Elode ankukupapata akubyae.” ³² Yesu kushidoni, “Wena mukamwaulile nansheto ajo doni, ‘Nangu apa, nelo na lunduno ninkukumulanga majini na kuvaponia valwele; ntondo kwinka. ³³ Kanji ata ikava davo iningua

vaikila nelo, lunduno mpaka ntondo nguvene nguka ku Yelusalemu mwaa nkúlava haimmaikidile apalele panda Yelusalemu.³⁴ Boo, Yelusalemu! Yelusalemu! Wako úvabyaanga vakulava na úvaamanga majanga avalá vavakutumididya! Dimindi dyoe ndilingangila kuvautamila vanavako kenga mwanavautamililila ng'uku vanavake kanji mwenu mene kulota.³⁵ Lola, ing'ande yenu indava lidembe na nangu ninkumwaulila doni, hamungwona kavili mpaka muwakati wamulota kutangola doni, 'Aalaligwe aijá áida palina limwe *UMU*.'"

Yesu ankumponia wakuvimbanga mumili

14 Napanelo muliduva limo lyakupumula, Yesu akauke kwing'ande yanang'olo wamapalishayo ndalya shakulya, vanavo vashinannaledya pepi-pepi.² Mwe! Popo po, kuwika mushu mwake Yesu munu jumo avénavo shilwele shakuvimbanga mili.³ Kutwala Yesu kuvaudya vamwalimu vadishaliya namu mapalishayo kushidoni, "Lipali lilamulo lyakumponia munu muliduva lyakupumula?"⁴ Vanavo kumalalanga. Yesu kunkamula munu aijá kumponia kutwala kumwaulila auke.⁵ Yesu kuvaudya kavili, "Apali munu pakati penu álota kunneka pakamumya ng'ombe wake kwali punda wake ágwilidile mulipondo muliduva lyakupumula?"⁶ Vanu uti do, vii.

Nkong'o wakulalikigwa kushikukulu †

⁷ Napanelo Yesu akavone vakulalikigwa vanji vatan-dola mautu akulitandya, nae andívakang'ela nkong'o aashidoni,⁸ "Munu akakulalika kushikukulu, haunaikale mulyutu lyakulitandya mwaa inkuululika kulalikigwa munu junji waishima wakukupunda wako.⁹ Kutwala mwene ánnalike mwenu mmanu mmavili kwida ndakwaulila wako po doni, 'Tumuka apo umpishe aju!' Undaumila kudyoni kuka ndaikala kunyuma-uti.¹⁰ Kanji vakakulalika, ikala lyutu lyakunyuma-uti kwambangidya mwene ákulalike paida po, akwaulile doni, 'Nyangu, apa tumuka ukaikale mushu amulá.' Davo po wako undapata lishangelo pamevo avanu uti valota kupagwa mulyutu alyo.¹¹ Mwaa, munu woewoe álitumbudya vanantaa dyoni na aijá álijandya vanantumbudya."

Nkong'o wakwita kuka kushikukulu

Mateu 22:1-10

¹² Kutwala kumwaulila aijá mwene ánnalike ndalya shakulya kushidoni, "Ukapanganianga shakulya kwali shikukulu, haunavalalike vabwativako, vanung'unuvako kwali vakuluvako, valikola vako na ata vavavo vatajili; mwaa inkuululika vanavo kukuujidya vilava kutwala nshala wako kuva wowo.¹³ Kanji ukapanganianga shikukulu, valalike vamashikini, vakulamala, vákalola,¹⁴ undona undajaligwa mwaa vanavo havavenavo shakukuujidya vilava. Wako vandakulipa muliduva lyakudyuka vaishaliya."

¹⁵ Napanelo munu jumo aikéle namu Yesu akaigwe malove alo, nae kushidoni, "Andijaligwa munu álota kupata lyutu pandamu muutawala wa Nnungu."

¹⁶ Kanji Yesu kushidoni, "Munu jumo andítenda shikukulu kutwala kuvalalika vanu voe namene.¹⁷ Paliwikile liduva lyakulya shikukulu, nae kuntuma ntumika wake auke akavaulile vakulalikigwa kushidoni, 'Vinu akulá uti vivele tayali, tuke!' ¹⁸ Vanavo kula munu kutangola shake. Ntandi aju kushidoni, 'Nangu ndishuma inundu ngulota nguke ndikalole; ninkujugwa samani!' ¹⁹ Junji kushidoni, 'Nangu ngushumilé ambi apa ding'ombe mwanu ngulota nguke ndikavalin-gangile kulima; ninkujugwa samani!' ²⁰ Kutwala junji kavili kushidoni, 'Nangu ngulombilé ambi apa, ako hangwida.' ²¹ Ntumika kuja, kummalangangila nang'olo wake malove ala uti; tatamunu mwene ing'ande jo áshimwidye andímwaulila ntumika wake kushidoni, 'Uma shipajelo upite uwená mudibalabala na mudindila dyapalikaja upita uvatwalanga vamashikini, vakulamala namu vákalola uvaidenavo.' ²² Ntumika kuja kumwaulila nang'olo wake kushidoni, 'Nangu vyaungutumile vyo, nditandeya kanji mautu andijalila.' ²³ Nang'olo kumwaulila kavili ntumika wake kushidoni, 'Wena mudibalabala na mudindila dyanyenje likaja upite uvakumulanga vanu uvaidenavo vaumbalanile ²⁴ mwaa nangu ninkumwaulila doni, vanu vatualalike avalá hapali álota kwida ndalya shikukulu ashi.'"

Nkwóda umwe Yesu anyukate nshalaba

Mateu 5:13; 10:37-38; Malukushi 9:50

²⁵ Napanelo Yesu, imbumba yavanu ipita impalakela, nae andíshiliuka kwaulila doni,²⁶ "Munu akaida kwan-gu alota kungwoda nangu kanji akanamwiludyanga tatake, anyoke, ndyagwe, vanavake, vakuluvake kwali vanung'unuvake, valumbuvake na ata kwiludyanga shingumi shake, hava shinu nkwóda wangu.²⁷ Namomo munu ákanyukata nshalaba wake kutwala kungwoda, hava shinu nkwóda wangu.²⁸ Da nyani pakati penu akalota kudenga, ákanaikala shitandi kukumbukila vyalota kutumila pakulota amanye kenga vindatosha kwali mene? ²⁹ Akanatenda davo, po palota kutunduvanga kudenga, akanamalila vanu uti pavamwona vandamweka ³⁰ vaashidoni, 'Munu aju andítunduvanga shana kudenga kanji gwo, mwenu, atatakadile.' ³¹ Da umu shani ánatenda akalota kunden-da ing'ondo umumwagwe ávenavo vaing'ondo voe vakuwikila dyalupu ishilini vakuvapunda vake dyalupu kumi, ákanaikala shitandi kulalyanga shipinga shake akanava kuka kwing'ondo? ³² Akalalyanga, aanalela vyakunanopa, vamongo vavele kushu avatuminneu vadyoko vake kuka ndapakanila ipagwe amani.³³ Napavedoni munu woewoe pakati penu ákalota kuleka vinu vyavenavo uti, hava shinu nkwóda wangu.³⁴ Munyu wo, wambone. Kanji wo munyu ukadalala ulota kutakila nyamani? ³⁵ Wanavo haunamanyikanga muulongo na ata kwakutenda mboleya, vatwala vila kujaa bai. Aijá ávenavo matu, aigwe."

† Kwavayuda shikukulu shishilodya utawala wa Nnungu.

Nkong'o wangandolo wakujaika

Mateu 18:12-14

15 Napanelo vakukatisha-ukodi uti namu vanu vanji vakutega vandímuukila valota vamwig-wilile. ² Kanji mapalishayo pamo namu vamwalimu vadishaliya kuntangadikanga vaashidoni, "Kumanya dashi, munu aju kuvapwashalela vakutega na kulyanavo!"

³ Nadoni Yesu andívakang'ela nkong'o au, ⁴ "Apali munu pakati penu ávenavo dingandolo miya álota kutenda akanjaika jumo mene kuvaleka tisini na tisa mwilanga kutwala kupita annambela jumo ájaike mpaka kumpata? ⁵ Akampata, anantwala kunnyukata pali-vala na lipuwilo lyoe namene. ⁶ Pawika kukaja kuvashema vabwativake na vavagwe vavandikanengenavo kutwala kuvaulila doni, 'Puwanga namu nangu mwaa ngandolo wangu e ajaíke, ndimwona.' ⁷ Kulandana na shitendo asho ninkumwaulila doni, kuwa lindapagwa lipuwilo lyoe mwaa wankútega jumo álijugulanga madambi ake kuliko vaishaliya tisini na tisa vákalota kulijugulanga.

Nkong'o waishingo yakujaika

⁸ "Kwali nkongwe shani ávenavo dishingo kumi álota kutenda ikanjaika imo mene kukaledya itaa kutwala shipyai kupyaila uti nng'ande alambela shanashana mpaka kwona? ⁹ Akona, andavashema vabwativake vakongwe na vanu vavandikanengenavo kutwala kushidoni, 'Puwanga namu nangu mwaa ishingoyangu ingujaíke, ndilakota.' ¹⁰ Kulandana na shitendo asho ninkumwaulila doni, kwavanjelo vake Nnungu lindapagwa lipuwilo lyoe namene mwaa wankútega jumo álijugulanga madambi ake."

Nkong'o wamwana wakujaika

¹¹ Kutwala kavili kushidoni, "Munu jumo andívanavo vanavake vavili. ¹² Ndyoko aju andímwaulila tatake kushidoni, 'Atata, ngupa lipungu lyangu lyamali lyangushilota ngupate paulota kupela!' Tatamunu kuvajavanidya uti vavili. ¹³ Akapite maduva padyoko, ndyoko aju kukunga vyake uti kuma kuka kushilambo shakushu namene. Koko ko, nae andíjanga vinu uti vyavénavo mushinamilo shaupuju. ¹⁴ Akajange uti vyavénavo, mushilambo asho kuumilila indala ing'umene namene, ndyoko kutunduvanga kuvauvanga. ¹⁵ Nae kumuukila munu jumo mwene shilambo asho; munu ajo kumwaulila ndyoko jo auke akanshungile dinguluve dyake kwilanga. ¹⁶ Ndyoko aju ashindavanavo malotelo akulya shakulya shakukalala shavashilya vanguluve kwilanga kanji hashuluula na yadavo hapali munu áshimwing'a shinu shoeshoe. ¹⁷ Ndyoko padimwidile ding'ano kutwala kushidoni, 'Atata ankuvanavo vamadengo voe vashibalugwa valya mpaka kwikuta; kushi nangu apa ngupalela eshi? ¹⁸ Kudyanga ngume nimuukile atata ndikamwaulile doni, "Atata, nangu nditega kuwa na nditega kwako.

¹⁹ Nadoni hanguvaikidile kungushema nimwanavo kanji nguvika mulikundi lyavamadengo vako vashibalugwa."

²⁰ "Nae kutakatuka kuujila kwatatake. Akanava kuwika paing'ande ávele mwakushu padyoko, tatake kumwona. Akamwone, tatamunu andímwangila shididi kutwala kutukuta kuka ndamwambatila. ²¹ Mwana kumwaulila tatamunu kushidoni, 'Atata, nangu nditega kuwa na nditega kwako. Nadoni hanguvaikidile kungushema nimwanavo.' ²² Kanji tatamunu kuvaulila vatumika vake kushidoni, 'Idanavo shipajelo dinguvo dyamana, ipete na vilatu mungwadye. ²³ Namomo nt-wale mbudi nannume na wakunyeta shanashana munshinde tummamene, tupuwange; ²⁴ jo mwanangu aju, andípela kanji andídyuka, andíjaika kanji andyaneka.' Bai vanavo vandítunduvanga kupuwanga.

²⁵ "Napanelo mwanagwe nang'olo avele kumala. Auja ávele pepi na paing'ande, andígwa mwimbo na magoma. ²⁶ Nae kunshema ntumika jumo kumudya nyamani shishitandeka pakaja. ²⁷ Ndyoko kushidoni, 'Nung'uno jo, andyuja. Nadoni tataka aninshinda mbudi wakunyeta shanashana mwaa mwanagwe andyuja ávele mumi.' ²⁸ Bai mwana nang'olo andíshimwa na hashindaita kuwika paing'ande. Tatamunu kuma kuka nampambadyanga ²⁹ kanji mwana anínjang'ula tatake doni, 'Shasho! Nangu ndikutumika vyaka vyoe pandikapujungula mwiko lilamulo lyako, wako haungupele ata liduva limo mbudi wakuka nammame-na na vavangu tupuwanga. ³⁰ Nelo apa pauja mwanavo aju, munu ámalilidile vyako kumalaja, wako unshindila mbudi nannume na wakunyeta!' ³¹ Kutwala tatamunu kushidoni, 'Mwanangu! Wako ngwengwe upali namu nangu na vinu vyangu uti, vyàko. ³² Apa, hampagwite munji! Indívaikila wetu tupuwange; nung'uno aju, andípela kanji mumi, andíjaika kanji andyaneka.' "

Nkong'o wammádengo njanja

16 Namomo Yesu andívaulila vakwoda vake kushidoni, "Andípagwa munu jumo ntajili namene avénavo munu jumo wankamudídye vinu vyake. Napanelo ntajili jo, vandímwaulila kushidoni, 'Munu wako jo, vyako kujaanga.' ² Nae kunshema wankamudídye aijá kumudya, 'Da vyandikwigwanga avi kushidashi? Ngupa ishabu yakushunga kwako mwaa wako hauva shinu kavili wakukamulila vyangu.' ³ Wankamudídye aijá do nduu, 'Ngutandelé mwashi? Nang'olo wangu ankungumya mukushunga; kulima hangulula, kupita ngujugwajugwa ngwona dyoni! ⁴ Idavo, ndimanya shakutenda pakulota vakangumya mukushunga ngupate pakuwikila.' ⁵ Nae kuvashema jumo-jumo vanu vavénavo madeni kwanang'olo wake kutwala kumudya ntandi, 'Wako nang'olo wangu akudai nyamani?' ⁶ Munu jo kushidoni, 'Mangandingo miya amauta akulya.' Mmádengo kutwala kushidoni, 'Twala sheti shako shaudeni, shipajelo wandike amusini.' ⁷ Kumudya junji, 'Wako akudai nyamani?' Nae kushidoni, 'Maguni miya angano.' Mmádengo kushidoni, 'Twala

sheti shako wandike samanini.’⁸ Kutwala nang'olo aijá kuntumbyanga wankamudidyé aijá waungave-shaliya mwaa waujanja wake. Bai amu ni momo, vanu vawakati au vankuvanavo ujanja washinamidyo shave kuvapunda vanu valilangadyo mushinamidyo shave.

⁹“Nangu ninkumwaulila doni, panga dimbodi kuwa mutumila mali aungave-ishaliya pakulota mushu mo akamalilika, vanavo kuwa ko, vampwashalele.

¹⁰Ánakulupilika muvinu vidikidiki anákulupilika muvinu vikumene; waungave-ishaliya muvinu vidikidiki hanava waishaliya muvinu vikumene. ¹¹Shapo pakushi mwenu hamunakulupilika shinu mumali aungave-ishaliya, nyani álota kunkulupila muumwiu? ¹²Ikava kenga hamunakulupilika shinu muvinu víkave vyenu, nyani álota kumupa vyenu mmene? ¹³Hapali ntumika áulula kuvatumikila vanang'olo vavili, inkuululika kunnyatila jumo kunnagwaledya junji kwali kuntumbyanga jumo kumwiludyanga junji. Hayululika kuntumika Nnungu na kutumikila mali.”

Lilamulo na utawala wa Nnungu

Mateu 5:31-32; 11:12-13; Malukushi 10:11-12

¹⁴Bai mapalishayo vanu vakunagwaledya njuluku pavaigwite malove ala, vandímwiludyanga. ¹⁵Yesu kutwala kushidoni, “Mwenu ni mmanu múlivika kuva vaishaliya kwavanu kanji Nnungu andimanya mitima vyenu. Vinu vyavona vanu kuva vyamana, Nnungu pake po ona kuva vyakudabukanga. ¹⁶Lilamulo na Vakulava vindyaloka vitawala mpaka wakati umwe Nshuwau. Kutunduvangila apo, ntenga wambone wautawala wa Nnungu unkuvalangangigwa na kula munu álikanyilidya ankwinjila. ¹⁷Mwenu kanji shinu shíkakamadyenge ni kulambaleka kuwa na pai kuliko kulambaleka lumbalukila lwa Lilamulo.

¹⁸“Kula munu áneka ndyange kutwala kunnomba nkongwe junji munu aju ankulavalava; ata aijá ánnomba nkongwe wavannakile ankulavalava.

Nkong'o wantajili namu Lashalu

¹⁹“Andípagwa munu jumo ntajili áshigwalanga dinguvo dyamana; munu aju kula liduva ashindalya na ashindaikuta go-go-go. ²⁰Pannango pake ashindapagwa munu mmashikini walina Lashalu wawilonda vyoe mumili. ²¹Nae ashindalota alye dyangenga díshigwilangila pai pandamu wantajili, ata vang'avanga vashinannamba muvilonda. ²²Napanelo mmashikini aju kupela, vanjelo vake Nnungu kuntwala kumuukanavo kumwe Abulaamu; nanae ntajili kupela kutwala kunshika. ²³Ntajili ávele kumoka andíng'amula mevo akuno auvauvanga kumwona Abulaamu kushu, Lashalu ávele namu nae. ²⁴Ntajili kutwala kushema, ‘Atata Abulaamu, ngwanangila shididi! Ntume Lashalu jo adabidyé shala mmedi aide angudidimidye mululimi mwaa ninkupata mauvilo makumene namene mmoto mwanguvele amu.’ ²⁵Kanji Abulaamu kushidoni, ‘Mwanangu, kumbukila

† Kwali: a na vanu vankwinjila kwankukunya. Kwali: a unku-tandegwa ing'ondo.

mushingumi shako undipata vinu vyambone kenga momo Lashalu mushingumi shake kupata vyakunyata. Ambi apa Lashalu ankupagwa mukupambadyangigwa, wako kupagwa mumauvilo. ²⁶Tuleke apo, kwatuvele wetu na kwamuvele mwenu pakati apa pavele lipondo likumene namene líkaululika kupita munu wakuno kwida ako na wako kwida akuno.’ ²⁷Ntajili kushidoni, ‘Ikava davo, bai ninkukujugwa untume auke kwing'ande imwe atata. ²⁸Ninkuvanavo vanning'unuvangu mwanu vangulota auke akavaumidyé ushuda kwambangidya vanavo havanaide momo mulyutu ali lyamauvilo.’ ²⁹Abulaamu kushidoni, ‘Ako apali Musha na Vakulava; valeke vaigwilile vyovyó vyo.’ ³⁰Ntajili kushidoni, ‘Mene wako atata Abulaamu. Leka áukile munu ádyukile pavakupela ndatangonavo, vanavo vakandilijugulanga.’ ³¹Kanji Abulaamu kushidoni, ‘Vakanamwigwilila Musha na Vakulava ata pakaukile munu ádyukile pavakupela, havashambegwa.’”

Shambyomboyo shakutadya kukuvala

Mateu 18:6-7, 21-22; Malukushi 9:42

17 Yesu kutwala kuvaulila vakwoda vake kushidoni, “Vyakunyata vitádyá vanu kutega ngwengwe vindaumilila kanji apambale aijá álota kwidanavo vyakunyata avyo! ²Kudyanga munu ajo kumuungangila lijanga lyakwidopa paukoti kunjela mwimanga kuliko kuntadya kunkuvadya ndyoko ata pakavele jumo pakati pavadyoko ava. ³Shungana! Nung'unumunu akatega, ntangalele! Akalyambila, nnivalive. ⁴Akaku-tagela dimindi saba muliduva limo lyolyo, jojo jo akwidila dimindi saba aashidoni, ‘Ninkulyambila,’ nnivalive.”

Ing'ano yalikulupililo

⁵Vamyombe kutwala kumwaulila *UMU* kushidoni, “Twanjadyedya likulupililo!” ⁶*UMU* kushidoni, “Leka múvenavo likulupililo lidikidiki vela mwaimbeju yanshupi, mukanditangalela nnandi wankwedu kushidoni, ‘Bubuka apa uke ukalipandikile kwimanga,’ wanavo kumwigwilila.

Ntumika atandedya vyavantuma

⁷“Wakwashi pakati penu ávenavo ntumika wake ánalimanga mala kwali ánashunga ding'ombe álota kutenda ntumika ajo akauja kundila kumwaulila doni, ‘Idinneu akuno tulye?’ ⁸Da shitandi hanamwaulila doni, ‘Ngukandyangidya shakulya, likunjangile, ngutumikila pangulya, nikaikuta ling'oto ulye wako?’ ⁹Da inkuululika nang'olo ajo kunnambwalela ntumika aju mwaa wakutandedya uti avilá vyantumile? Hayululika. ¹⁰Ata namwenu momo, mukatandedya avilá vyavantuma tangola doni, ‘Wetu tuvatumika vila túkave pashinu tutandadidyé vyo vivaikidíle tutandedye avi bai.’”

Yesu ankuvaponia vamangundula kumi

¹¹ Napanelo Yesu pashuka ku Yelusalemu andípita pakati-pakati vilambo avi: Shamaliya namu Galileya. ¹² Akawike palikaja limo, vandímuukila vanu kumi va-malemba. Vanavo kwimilanga kushu ¹³ kutangola pashanya po vashema vaashidoni, “Yesu, Nang’olo, twanangila shididi.” ¹⁴ Yesu akavone, andívaulila doni, “Wenananga mukalilodye kwavakulangalalela-shadaka.” Bai vanavo vauka, mili vyave vyo, kutakata. ¹⁵ Napanelo munu jumo pakati pave akalyone mili wake kutakata, andyúja atangola pashanya po amupa lishangelo Nnungu. ¹⁶ Kutwala kugwilangila pamadodo pake Yesu annambwalela. Napanelo munu jojo jo, avele nshamaliya. ¹⁷ Yesu kutwala kumudya, “Da hamutakete mmanu kumi? Kushi mwanu na nsheshe vo vavelé kwashi?” ¹⁸ Hapagwite ata jumo wakwida ndamupa lishangelo Nnungu ila jo mmidi aju bai?” ¹⁹ Kutwala kumwaulila doni, “Takatuka uke likulupililo lyako, lindikuposha.”

Kwida kwautawala wa Nnungu

Mateu 24:23-28, 37-41

²⁰ Napanelo mapalishayo vamudya liduva lilóta kuwika utawala wa Nnungu, nae kujang’ula, “Utawala wa Nnungu haunaida na vimanyikilo vyakwaneka ²¹ na ata hamwalota doni, ‘Au apa,’ kwali, ‘Aulá,’ mwaa wo utawala wa Nnungu wo, upali po pakati penu apa.” ²² Nae kutwala kuvaulila vakwoda vake kushidoni, “Unkwida wakati wamulota kunnagwela mwone kananga liduva limo vela pakati pamaduva a Mwana Wamunu kanji hamwona. ²³ Vandamwaulila doni, ‘Alilá akulá,’ kwali ‘Ali apa,’ kanji hamunatumuke na hamunavode. ²⁴ Mwaa mo mwamunanela kumeta kulangadya kuwa nkono au mpaka nkono unji, bai ni momo mwalota kuvalela Mwana Wamunu muliduva lyake. ²⁵ Kanji shitan-di inímmaikila auvauvange namene, aitagwe na vanu vaimbula ai.

²⁶ “Mo mwavitandakalele mumaduva ake Noe, mumaduva ake Mwana Wamunu vindatandakela momo. ²⁷ Mumaduva alo vanu vashindalya na vashindakumbila, vashindalombana na vashindaunga vitamo mpaka muliduva lyainjidile Noe mwingalava kutwala livambwe kwida kuvalya vanu uti. ²⁸ Ilota kutandakela mo mwavitandakalele muwakati umwe Loti; vanu vashindalya na vashindakumbila, vashindashuma na vashindashulusha, vashindapanda na vashindadenga ²⁹ kanji muliduva lyaumile Loti ku Shodoma, moto wakwalakela kuwa undíshuluka na lyou lyakulakila lyou momo lindíshuluka kutwala kuvalya vanu uti.

³⁰ Muliduva lyalota kulilodya Mwana Wamunu ilota kutandakela momo. ³¹ Muliduva alyo munu akava panda, vinu vyake vivele nng’ande, hanainjile kuka ndatwala na akava kumala, hanaujile kukaja. ³² Nkumbukile ndya Loti jo. ³³ Munu woewoe álota kugambela kuukanavo mushu shingumi shake andakatoka na álota kukatoka shingumi shake andaukanavo mushu. ³⁴ Ninkumwaulila doni, muliduva alyo vanu vavili vèlele

paigoli imo, jumo vanantwala junji kunneka. ³⁵ Vanu vavili vandapagwa vatipula, jumo vanantwala junji kunneka.” ³⁶ ¹³⁷ Kutwala vanavo kumudya, “Nang’olo, vilota kutandakela kwashi?” Nae kushidoni, “Po paulota kupagwa ntui, malembo andaumbalanila popo.”

Nkong’o wanamwili namu nkúukumu

18 Napanelo nae andíkong’a nkong’o avamanyiya vakwoda vake vashwalye ngwengwe pavakaujila kunyuma ² aashidoni, “Palikaja limo andípagwa nkúukumu ákashinjopa Nnungu na ákashimwishimu munu woewoe. ³ Palikaja lyolyo momo kupagwa nkongwe jumo namwili; nkongwe ajo ngwengwe ashindamuukila nkúukumu nankanyilidya aashidoni, ‘Ngupa ishaliya kumili kwamongo wangu.’ ⁴ Nkúukumu andítwala wakati aita kumwangangola kanji mushu mwake andíkumbukila doni, ‘Ata ikava kenga nanjopa Nnungu na ata namwishimu munu ⁵ kanji mwaa nkongwe aju ankungudingadinga namene, ndamupa ishaliya pakulota hanangutimbange kwida kwaida ngwengwe aku.’” ⁶ *UMU* kavili kushidoni, “Dashi, mundigwa mwatandalele nkúukumu waungave-shaliya aju? ⁷ Kushi Nnungu vakutandalegwa vake vannamadikíla shilo na mui vo, havapa ishaliya? Mwona kenga andatimatimanga kwavanavo? ⁸ Ninkumwaulila ngala doni, nae andavapa ishaliya shipajelo kanji kushi Mwana Wamunu paida po, andakodya likulupililo mushilambo?”

Nkong’o wampalishayo namu nkúkatisha-ukodi

⁹ Nae kavili kukong’a nkong’o avaulila vanu váshilikulupila vo vene valyona kuva vaishaliya vavailudyanga vanu vanji: ¹⁰ “Vanu vavili vandyúka kukushwali kwing’ande ya Nnungu. Jumo aju avele mpalishayo junji jo kuva nkúkatisha-ukodi. ¹¹ Mpalishayo aju andíimila kutwala kushwali shintimatima doni, ‘Nnungu, ninkukulambwalela mwaa hanguvele kenga vanji; vakwiva, vakushonda, vaungave-ishaliya, vakulavalava na ata hanguvele kenga munu aju nkúkatisha-ukodi aju. ¹² Ndáunga dimindi mbili mwishumana na ndáku-pa likumi lyavinu uti vyangupata.’ ¹³ Kanji nkúkatisha-ukodi andíimila kushu na pakanyanyulila shilaka kuwa; nae ashindalikanyalanga pantima aashidoni, ‘Nnungu, ngwanangila shididi nangu ninkutega.’

¹⁴ Ninkumwaulila doni, nkúkatisha-ukodi jo andyúja kuka kukaja Nnungu àmpete ishaliya kanji mpalishayo jo, ng’odo. Mwenu, munu álitumbudya, Nnungu anantaa dyoni kanji álijandya, Nnungu anantumbudya.”

Yesu ankuvapwashalela vadyoko

Mateu 19:13-15; Malukushi 10:13-16

¹⁵ Vanu vashindavaukanavo vana vadikidiki kumwe Yesu pakulota avavikile makono; vakwoda vake

† *Inamba idikidiki ya 36 mumandiko matandi haipali kanji mumandiko aambi apali malove ala: a Vanu vavili vandapagwa mulyala, jumo vanantwala junji kunneka.*

vakavone vandivashulanga ¹⁶ kanji Yesu kuvashamela kutwala kushidoni, "Valeke vadyoko vaide, hamunaval-eye mwaa utawala wa Nnungu wavanu vavéle mwavadyoko." ¹⁷ Ninkumwaulila mwiu doni, munu ákapwashalela utawala wa Nnungu kenga ndyoko, hainjila mwiko muutawala awo."

Nanangaledi ntajili

Mateu 19:16-30; Malukushi 10:17-31

¹⁸ Kutwala nkútawala jumo muyuda kumudya Yesu kushidoni, "Mwalimu Wambone, ngutandelé mwashi pakulota ngupate shingumi shíkamalilika?" ¹⁹ Yesu kumudya, "Mwaa shani ungushema wambone? Hapali wambone junji ni gweka Nnungu tu bai. ²⁰ Wako undi-manyama malamulo ala: haunalavalave, haunabyae, haunaive, haunaumye ushuda waushwang'a na mwishimu tatako na anyoko." ²¹ Nae kushidoni, "Nangu malamulo ala ngutandandidyé kutunduvangila kushidyoko shangu." ²² Yesu paigwite malove alo andimwaulila doni, "Shindikwijalila shinu shimo. Shulusha vyauvenavo uti, njuluku wo uvjavile vamashikini; undavanavo mali kuwa na wide ungwode." ²³ Kanji nae paigwite davo andivanavo shipalodi namene mwaa avele ntajili nkumene. ²⁴ Yesu pangwene munu ajo kuanavo shipalodi shoe andítangola kushidoni, "Pandikamadyanga namene ntajili kwinjila muutawala wa Nnungu. ²⁵ Shíkakamadyenge ni kupaleta ngamila palilanga lyakashinji kuliko kwinjila ntajili muutawala wa Nnungu." ²⁶ Kutwala vanu vaigwite malove ala kushidoni, "Ikava davo nyani álota kwambolegwa?" ²⁷ Kanji Yesu kushidoni, "Shinu shákaulula munu, Nnungu ankuulula."

²⁸ Patulu kushidoni, "Lola, wetu apa tundileka vyetu uti kutwala kukwoda." ²⁹ Yesu kushidoni, "Nangu ninkumwaulila mwiu doni, munu áleka vyake kwali ndyagwe kwali vanung'unuvake na vakuluvake kwali tatakwa kwali vanavake mwaa wautawala wa Nnungu, ³⁰ aju andapata vyoe muwakati au na muwakati wida, kupata shingumi shíkamalilika."

Yesu ankumanyiya mwanda wantatu yakupela na kudyuka kwake

Mateu 20:17-19; Malukushi 10:32-34

³¹ Napanelo Yesu andívatwala avalá kumi na mbili kuvaulila kushidoni, "Mwenu, apa tunkwamboka kuka ku Yelusalemu; koko ko, vindatandeka vinu uti vyavaandike vakulava vimwamba Mwana Wamunu ³² kenga, vanankamudya kwavamidi kutwala vanavo kuntukananga, kumuvyanga, kunshunangila mata, ³³ kunshapa viboko, vanampedyo na muliduva lyantatu andadyuka." ³⁴ Kanji vamyombe havashimwigwa shana shashamba, mana amalove alo andílipiya; havashimanya shashilota kwamba Yesu.

Nkúputala mevo ashijugwajugwa ankupata kulola

Mateu 20:29-34; Malukushi 10:46-52

³⁵ Napanelo pavandike pa Yeliko, munu jumo wakuputala mevo andíikala nanyenje indila ajugwajug-

wa. ³⁶ Nae akaigwe imbumba yavanu ipita, andyúdyá víshitandeka ³⁷ kutwala vanu kumwaulila doni, "Yesu wa ku Nashaleti ankupita." ³⁸ Napanelo nae kutangola pashanya po ashema aashidoni, "Yesu, Mwanagwe Daudi! Ngwanangila shididi!" ³⁹ Kutwala vanu valangaladile kunshulanga vamwaulila amalale kanji nae kuka tu mushu amamodya kutangola pashanya po, "Mwanagwe Daudi wako! Ngwanangila shididi!" ⁴⁰ Yesu kwimila, kutuma vamwidenavo munu aijá. Akavandike, Yesu andímudya, ⁴¹ "Da ulota ndikutandele mwashi?" Nae kushidoni, "Nang'olo, ngulota ngulole." ⁴² Yesu kushidoni, "Lola! Likulupililo lyako lindikuponia." ⁴³ Munu jo muwakati wowo kulalenneu kutwala kumwoda Yesu apita amupa lishangelo Nnungu. Bai vanu uti vakone shitendo asho vaníntumbyanga Nnungu.

Yesu namu Shakeu

19 Yesu nkaja mu Yeliko apitile vila ndila. ² Napanelo mulikaja lyolyo lyo, andípagwa munu jumo wavashinshema Shakeu. Nae avele nanangaledi wavakukatisha-ukodi na avele ntajili. ³ Jojo jo, ashindalota amwone Yesu mwalalalele kanji haishululika kumwona mwaa andíipika na vanu vandíinjipa. ⁴ Bai nae andítukutula mushu ndakwela munnandi † pakulota amwone Yesu mwaa Yesu ashuka shalato lyutu lyolyo. ⁵ Yesu pawikile apalá paladile muwa andimwona Shakeu nae kushidoni, "Shakeu! Shuluka shipajelo mwaa nelo ininguvaikila ngupumulilile paing'ande pako." ⁶ Shakeu kushulukinneu kumpwashalela Yesu na lipuwilo lyoe. ⁷ Kutwala vanu uti pavagwene davo kutangadikanga vaashidoni, "Kumanya dashi kulitenda shijeni kwankútega!" ⁸ Kanji Shakeu andítakatuka kumwaulila Yesu kushidoni, "Nang'olo ngwigwa, nangu ndatwala inushu yamali angu ndivape vamashikini; ata akapagwa munu wanimwividile shake, ndamujidya nimwanjadyedya myanda nsheshe." ⁹ Yesu kushidoni, "Nelo paing'ande apa kundimwikila kwambolegwa mwaa munu aju momo avelé mushipinga shaudukulu umwe Abulaamu. ¹⁰ Mwaa Mwana Wamunu aidilé ndavalambela na ndavaposha vajiáke."

Nkong'o wavamadengo kumi

Mateu 25:14-30

¹¹ Napanelo vanu vamwigwilila pashitangola, Yesu andíjilika avakang'ela nkong'o mwaa wakuvandika pa Yelusalemu na vanu vashona kenga utawala wa Nnungu undawikinnee. ¹² Nadoni andítangola kushidoni, "Andípagwa munu jumo walikola lyashiumu atwéte mwanda kuka kushilambo shakushu vakankamudye shiumu ling'oto aje. ¹³ Akanava kuka, nae andívashe-ma vatumika vake kumi kuvajavila njuluku kutwala kuvaulila doni, 'Tandela mishulushu mpaka panguja.' ¹⁴ Kanji vanu vakushilambo shake vashinannyatila. Nadoni vandívatuma vanu vamuukile vakatangole doni, 'Hatutamwa kututawala munu aju.' ¹⁵ Bai munu aijá paujite ling'oto lyakunkamudya shiumu, andítuma

† Nnandi au vashishema a shikamoluwowo wo ulinganene kenga nkungu.

vanshamele vatumika vavapéle njuluku avalá pakulota amanye shapatile kula munu munshulushu wake. ¹⁶ Kumwidila ntandi kushidoni, 'Nang'olo, njuluku wako waungupéle, undyanjadyeka dimindi kumi.' ¹⁷ Nae kushidoni, 'Shambone namene! Wako ni untumika shii. Ikava kenga undikulupilika kuvinu vidikidiki, undavanavo madalaka amakaja makumene kumi.' ¹⁸ Kwida wambili kushidoni, 'Nang'olo, njuluku wako undyanjadyeka dimindi mwanu.' ¹⁹ Ajo kumwaulila kushidoni, 'Wako undavanavo madalaka amakaja mwanu.' ²⁰ Kwida wantatu kushidoni, 'Nang'olo njuluku wako wo au, twala, nangu ndyútika mulilesho; ²¹ nishindakujopa mwaa wako ni umunu wakudingadinga, undátwala shinu shaukakandidye na undánang'ena paukapandile.' ²² Kanji nang'olo kushidoni, 'Wako ni untumika wakubanga namene! Ndakuukumu kwodananavo avilá vyauvalangenge wako umwene. Namwiu, wako undímanya shana doni nangu ni nimunu wakudingadinga, walukwinnyango na ngunanang'ena pandikapandile.' ²³ Kanji napanelo mwaa shani hauvikile njuluku wangu kubengi pakulota nimwene panguja ngutwale njuluku wangu na ashilá shanjadyéke?' ²⁴ Nae kuvatuma vanu vapagwíte apo kushidoni, 'Tendi ako, mpoke njuluku wavenavo wo mumupe áanja-didyé dimindi kumi jo.' ²⁵ Kanji vanavo kushidoni, 'Aba! Nang'olo, nae ankuvanavo dyela dyanjadyéke dimindi kumi.' ²⁶ Nae kushidoni, 'Ninkumwaulila doni, munu ávenavo vanamwanjadyedya kanji ákavenavo ata sho shavénavo padyoko sho, vanampoka.' ²⁷ Napanelo vamongo vangu vákashilota nangu nguve ni umu wave vo, vaidenavo apa muvatanalange nangu nivona.' "

Imbumba inkupuwangila kwinjila kumwe Yesu

Mateu 21:1-11; Malukushi 11:1-11; Nshuwau 12:12-19

²⁸ Yesu akatangole malove ala nae andyúkanavo mushu mwanda aamboka alodya ku Yelusalemu. ²⁹ Pavandike pa Betepashi na pa Betaniya, palishinga lyavashema Lyamilandi Vyaulivela, andívatuma vakwoda vake vavili ³⁰ kushidoni, "Wena kulikaja livéle mushu! Pamwinjila nkaja mo, munankodya mwana wapunda akanava kunkwela munu vamuungangidile; mwenu muungule mumwidenavo!" ³¹ Munu woewoe akamudya shamumuungulila, mwenu mwaulile doni, 'Nang'olo ankunnota.' " ³² Vakwoda vakauke, vandíkodya mo mwatangaladile Yesu. ³³ Napanelo pavashimuungula mwana wapunda aijá vene kuvaudya, "Da nnyama jo mumuungulila eshi?" ³⁴ Vanavo kushidoni, "Nang'olo ankunnota." ³⁵ Bai vanavo vaníntwala kumuukanavo kumwe Yesu. Pavawikinavo, vaníntandikanga dinguvo dyave pashanya kuntwala Yesu kunkwedya.

³⁶ Napanelo Yesu pashuka vanu vashindatwala dinguvo dyave kutandika mwindila. ³⁷ Pavavandike pa Yelusalemu, paibondi ya Lishinga Lyamilandi Vyaulivela, imbumba yavakwoda vake ishindapuwanga na ishinantumbyanga Nnungu vajunga pashanya po mwaa wamakango uti avagwene na ³⁸ vashindatwala doni,

"Aalaligwe Umu áida palina limwe *UMU!*

Amani ipali kuwa, lishangelo kushanya-uti!" †

³⁹ Napanelo mapalishayo vanji valijalaniéenge mwimbumba vandímwaulila Yesu kushidoni, "Mwalimu, vatangalele vakwoda vako!" ⁴⁰ Nae kushidoni, "Ninkumwaulila doni, ata ava vakamalala kanji majanga lo andanyonya."

Kutangadikangila kunji kwa Yelusalemu

⁴¹ Napanelo pawikile pashengo, bai pagwene likaja alilá andílilangila ⁴² aashidoni, "Ajaa shonde! Wako Yelusalemu, kwalala dashi leka nawako umanyite padyoko vela shinu shilóta kukupa amani nelo apa! Kanji gwo, bai, shindilipiya. ⁴³ Undakuwikila wakati wavalota vamongo vako kukutang'anedyá kukudangela lingongo kutwala kukushinya kula kushinu. ⁴⁴ Vanavo vandakubamola pamo na vanavako vauvénavo nkaja mwako; havakulakela lijanga liikele pashanya lijangamwagwe mwaa wako haumanyite wakati wakwidilile Nnungu."

Kuingangigwa kwavakushulusha mwing'ande ya Nnungu

Mateu 21:12-17; Malukushi 11:15-19; Nshuwau 2:13-17

⁴⁵ Napanelo Yesu akainjile mwing'ande ya Nnungu andívakumulanga vanu vashishumidyanga vinu nng'ande amo ⁴⁶ avaulila doni, "Indyandikigwa doni, 'Ing'ande yangu nangu ni ing'ande yakushwalidya,' †† kanji mwenu mundipindulanga kutenda shivava shavakwiva!" ‡

⁴⁷ Kula liduva nae ashindapundisha mwing'ande ya Nnungu. Napanelo vanang'olo vavakulangalalela-shadaka, vamwalimu vadishaliya pamo na vanang'olo vavenentete vashindalambela mwakumyaila ⁴⁸ kanji havashipata dindila dyakumyaila mwaa venentete uti vandítitimila mukumwigwilila.

Madalaka ala akupelé nyani?

Mateu 21:23-27; Malukushi 11:27-33

20 Napanelo muliduva limo Yesu ávele mwing'ande ya Nnungu avapundisha venentete na avalangangila ntenga wambone, vandímwidila vanang'olo vavakulangalalela-shadaka, vamwalimu vadishaliya pamo na vanang'olo ² ndamudya doni, "Twaulila ako! Wako vinu avi utenda kwamadalaka shani kwali madalaka ene akupelé nyani?" ³ Nae kushidoni, "Nanangu ndamudya. Ngwaulila, ⁴ ubatisho umwe Nshuwau walakadilé kuwa kwali kwavanu?" ⁵ Vanavo kutangola shivenevene vaashidoni, "Tukaashidoni walakadilé kuwa, nae andaashidoni, 'Kanji mwaa shani hamunkulupidile?' ⁶ Namomo tukaashidoni, 'Walakadilé kwavanu,' venentete uti vandatwamanga majanga mwaa vanavo vaninkulupila

† Lola Dimu 118:26. †† Lola Ishaiya 56:7. ‡ Lola Yelemiya 7:11.

Nshuwau kuva nkúlava." ⁷ Bai vanavo vanínjang'ula kushidoni, "Hatumanyite kwawalakadile ubatisho awo." ⁸ Kutwala Yesu kushidoni, "Bai nanangu han-imwaulila madalaka angutandela vinu avi."

Nkong'o wawakukodi vakalau

Mateu 21:33-46; Malukushi 12:1-12

⁹ Napavedoni Yesu andívakang'ela venentete nkong'o au, "Munu jumo andílima lishamba lyake lyamilandi vyavyepo [†] kutwala kuvakodisha vakulima, mwene kuka kushilambo shinji ndaikala maduva oe namene. ¹⁰ Pauwikile wakati wakupuna, mwene lishamba aníntumidya ntumika wake kwavakulima akatwale lipungu lyake lyavyepo vyamulishamba kanji vakulima munu ajo kunkanyalanga kunkumulanga makonodavo. ¹¹ Nae kuntuma ntumika junji, vanavo kunkanyalanga, kuntukananga na kunkumulanga makonodavo. ¹² Kuntuma wantatu nanae ajo vanavo kumyaa kutwala kunkumulanga yadavo. ¹³ Napanelo mwene lishamba, 'Nduu! Ngutandelé mwashi? Idavo, leka nintumidye mwanangu wapantima na waninnag-waledya namene nakapanji nae pavamwona, vandamwishimu.' ¹⁴ Kanji vakulima po pavangwene, vandyáulanila kushidoni, 'Aju ni jojo wavalota kunkumudya lyala ali. Mmanemba! Idananga akuno tumalidye kwambangidya lyala ali live lyetu.' ¹⁵ Bai vanavo vandíngang'alangila kunyenje lishamba kutwala kummalidya. Napanelo mwene lishamba alota kuvatandela mwashi vanu avo? ¹⁶ Nae andavaukila vanu avo ndavatanalanga kutwala lishamba lyo, kuvapa vanu vanji."

Bai venentete pavaigwite malove alo kutwala kushidoni, "Shonde hainave davo." ¹⁷ Kanji Yesu andívalola ndoo! Kutwala kushidoni, "Da shavaandikidile doni ni nyamani, 'Lijanga lyavaitile vakudenga, lyolyo lyo lindyuka ndava lijanga shii lyakudangela?' ^{††18} Munu woewoe álota kugwilila palijanga alyo, andatamakananga na walilota kungwilila jo, andakandikanga." ¹⁹ Napanelo vamwalimu vadishaliya na vanang'olo vavakulangalalela-shadaka vashindalota vamwinjilinneu mwaa vandímanya shalowa kenga nkong'o awo ushivakumbyanga vanavo kanji vashindavajopa venentete.

Vimwe Shashali mwing'e mwene Shashali

Mateu 22:15-22; Malukushi 12:13-17

²⁰ Napavedoni vanavo vandítunduvanga kumwodaoda. Vandívatumidya vanu valitende kenga vanu shii kumbe vavele vyaleko pakulota vapatikaniange mulilove lyakuma nkanywa mwake vakankamudye kumadalaka na utawala umwe gavana. ²¹ Nadoni vanavo vandímudya kushidoni, "Mwalimu, wetu tundimanya shana kenga wako unkutangola vinu viu na un-kupundisha shana; haunatangola shinu ulola ing'oipe kanji unkupundisha kwaumwiu indila yalota Nnungu. ²² Napanelo twaulila! Ni shambone nkati mulilamulo lyetu kunnipa Shashali ukodi [‡] kwali mene?" ²³ Nae

[†] Lishamba lyamilandi vyavyepo linkulinganana na venentete vanaishilaeli. Lola Dimu 80:8; Ishaiya 5:1-2. ^{††} Lola Dimu 118:22.

amanya avi shinankulaba shave andívajang'ula kushidoni, ²⁴ "Ngulodya dinali imo. Da muyela ai ipisha na namakong'o vimwe nyani?" Vanavo kushidoni, "Vimwe Shashali." ²⁵ Yesu kutwala kushidoni, "Bai vimwe Shashali, mwing'e mwene Shashali na vimwe Nnungu, mwing'e mwene Nnungu." ²⁶ Napavedoni vanavo havapatíle lilove lyakunkanidyanga pamevo avenentete, vandíshanga majang'ulidi ake na vandímalalanga.

Ing'ano yakulomba mukudyuka

Mateu 22:23-33; Malukushi 12:18-27

²⁷ Kutwala shipinga shamashadukayo vanu vá-naashidoni hakupali kudyuka kwavakupela kwida ndamudya Yesu ²⁸ kushidoni, "Mwalimu, Musha anditulakela lilamulo lyandike doni, nkulumunu akapela ane-neka ndyagwe ákave mwana, nung'unumunu ainjile ding'ande pakulota ammalakele vana wakujala. ^{†29} Napanelo vandípagwa vanung'unumunu saba vashitumbo shimo; ntandi kulomba kutwala kupela akanava kummaleka mwana. ³⁰ Kwida wambili kwinjila ding'ande, ³¹ kwatika wantatu mpaka kumalilika uti vanung'unumunu saba avalá vainjila ding'ande kanji uti kupalanga pavakammaleka mwana na namwili ajo ³² kutwala kumwiso kwake nanae namwili jo kupela. ³³ Napanelo kushi muliduva lyakudyuka vanu lyo, mwene namwili aju shana alota kuva wakwashi ikava kenga vanu saba ava uti vaninnomba?"

³⁴ Yesu kushidoni, "Vanu vawakati au ni valombána ³⁵ kanji avalá vavóna Nnungu kuvaikila vapate mautu muwakati wída na mukudyuka pakati pavakupela, vanavo havallombana. ³⁶ Vovo vo, havapela kavili valota kuva kenga vanjelo vake Nnungu ni vanavake Nnungu, vana valóta kwalakela mukudyuka kwavakupela. ³⁷ Ata jo Musha jo, mwing'ano ailá yapagwíte nae palyukutu líshikalela moto, panshamile *UMU* kuva Nnungu umwe Abulaamu, Nnungu umwe Ishaki na Nnungu umwe Yakobo, andilodya doni vakupela vankudyuka. ³⁸ Mwenu, Nnungu aju hanava shinu Nnungu wavakupela kanji wavangumi mwaa kwake nae vanu ava uti vangumi." ³⁹ Kutwala vamwalimu vanji vadishaliya kushidoni, "Mwalimu, undijang'ula shana." ⁴⁰ Nadoni vanavo havavenavo ntima wakumudya kavili shinu shinji.

Da Klistu mwanagwe nyani?

Mateu 22:41-46; Malukushi 12:35-37

⁴¹ Napanelo Yesu andívaudya kushidoni, "Inkuululika dashi vanu kutangola doni, Klistu mwanagwe Daudi? ⁴² Da shi Daudi anditangola mulibuku lyake Iya Dimu aashidoni, ' *UMU* andimwaulila Nang'olo [‡] wangu doni, "Ikala kunkanakono kwangu ⁴³ mpaka nangu ndivavike vamongo vako vave likukwa lyakuvika madodo ako." ' ^{†††44} Napanelo ikava kenga Daudi nae po anshema ku-

[‡] Ukodi au wavaloma ushililodya venentete kupagwa mumalamulo ake Shashali. Ni wakunnodya nae kuva umu wave. ^{††} Lola Kumbukumbu 25:5-10. ^{‡‡} Kwali: a Umu andimwaulila Umu wangu doni... ^{†††} Lola Dimu 110:1.

va Nang'olo wake, ilota kuva dashi kavili kuva mwanagwe?"

Lilaledye na vamwalimu vadishaliya

Mateu 23:1-36; Malukushi 12:38-40

⁴⁵ Akuno venentete vamwigwilila, Yesu andívaulila vakwoda vake kushidoni, ⁴⁶ "Lilaledye namene na vamwalimu vadishaliya ivanagwéla kupita vawena vâgwete mikwakwala, ivanagwéla vavaudyange na ishima ing'umene namene muumbala, ivanagwéla kwikala muviteng'u vitandi muvitala vyakupudidya, ivanagwéla kwikala mumautu shii mmikukulu ⁴⁷ na vâpita vavalyangila vanamwili vyavo valishang'apila kuva vanu shii vatenda delee, pakushwali. Vovo vo, vandapata ukumu yakujowa kupunda apo."

Shadaka shaumidye namwili

Malukushi 12:41-44

21 Napanelo Yesu andílalyanga kutwala kuvona vatajili vajela njuluku mulishanduku lyashadaka, ² namomo kumwona namwili ákave pashinu nanae ajela njuluku wake padyoko namene mulishanduku lyolyo. ³ Yesu kutwala kushidoni, "Mwiu, nkongwe aju ni ájadile poe kuvapunda vanu avalá uti ⁴ mwaa vanu vanji uti vajadilé vatwala padyumbele kanji nkongwe aju muungave-pashinu wake aumididyé uti vyavénavo."

Kubamalegwa kwaing'ande ya Nnungu

Mateu 24:1-8; Malukushi 13:1-8

⁵ Napanelo vanji valambwalela ing'ande ya Nnungu mwavadangadile na majanga akumanyikanga na mwavanamadidye na vinu vyashadaka vyavashimumidya Nnungu, Yesu andívaulila doni, ⁶ "Uti vyamwona avi, lindawika liduva lyakubamalegwa pavakaleka lijanga liikele pashanya lijangamwagwe." ⁷ Vanavo kumudya, "Mwalimu! Da vinu vyene vyo vilota kutandeka duvani na pavilota kutandeka po, shilota kulilodya shimanyikilo shani?"

⁸ Yesu kushidoni, "Lilaledye! Hanapagwe wakunduwanga mwaa vandaida vanu voe vatumila lina lyangu vaashidoni, 'Nangu ni Masiya' na kushidoni, 'Wakati undiwika' kanji hamunavode. ⁹ Mukona ding'ondo na vijungulima, mwenu hamunaitukange mwaa vinu avi shitandi vindivaikila vitandeki kanji hauva shinu wakati wamwisho."

Vimanyikilo vyakulilodya mwisho

Mateu 24:7-8; Malukushi 13:8

¹⁰ Kutwala kavili kushidoni, "Venentete vandatandana ing'ondo shivenevene na utawala umo undatandana ing'ondo na utawala unji. ¹¹ Mumautu akuvilingananga mundaumilila vindangenda vyakujowa, shivanga, vilwele, vinu vyakwituwanga na kuwa kundalilodya vimanyikilo vikumene namene.

Kupapatigwa kundaida

Mateu 24:9-14; Malukushi 13:9-13

¹² "Kanji vinu avyo uti vikanava kutandeka, kwamwaa walina lyangu mwenu vanankamula kumuuvyauvyanga, vamuukanavo kuvitala vyakupudidya, vanjela mudikalaboshi na vamuukanavo kwavaumu na kwavananangaledi vashilikali. ¹³ Napanelo lyolyo lyo, lindava litala lyakulota mwenu kunguumidya nangu ushuda. ¹⁴ Napavedoni mmitima mwenu amuwa kaladavo kuleka kulipundisha mwakulishililididya. ¹⁵ Nangu apa nantadya mutangole malove alimanyilo; malove alo, vamongo venu havapinga ata kutaukanga hakupagwa. ¹⁶ Napanelo mwenu ata vatatavenu, vakuluvenu na vanung'unuvenu, vakwenu, vabwadivenu vananimya na pakati penu vanji vandabyaigwa. ¹⁷ Vanu uti vanammangedya mwaa wangu nangu ¹⁸ kanji mmyuti mwenu mo, haukulika ugwimbu ata ukava umo. ¹⁹ Ni mwaa wakulipililila kwenu kwamulota kupata ungumi wenu.

Kubamalegwa kwa Yelusalemu

Mateu 24:15-22; Malukushi 13:14-20

²⁰ "Napanelo mukavona vaing'ondo vâtang'anadidye Yelusalemu, manyinneu doni wakati wakubamalegwa likaja alyo undiwika. ²¹ Napavedoni vanu valóta kupagwa ku Yudeya vatilile kumashinga, vapanjini vaume na valóta kupagwa kumala, havanaujile kukaja. ²² Mumaduva alo shindaumilila shaushanga vitandeka vinu uti vyandikíke. ²³ Shonde vakongwe vilota kuvakodya vinu avyo vâmitenge na vilota kuvakodya vajang'edya mwaa mushilambo ashi andaida mauvilo makumene; Nnungu andavang'unulangila mevo venentete ava. ²⁴ Vanu voe vandavabyaa maambila, vanji kuvakamula mikole kuvaukanavo muvilambo uti vyavamidi na Yelusalemu vamidi vandatimbanga mpaka wakati wave uvamalilikile.

Kwida kwa Mwana Wamunu

Mateu 24:23-31; Malukushi 13:21-27

²⁵ "Liduva, mwedi na dinondo vinu avi vyakuwa vindavanavo vimanyikilo; mushilambo venentete vandalijugulanga kwamwaa washilindimu shamawimbi shilóta kulindimuka mwimanga. ²⁶ Vanu vandadilikanga matuva vakumbukila vinu vilóta kutandeka mushilambo mwaa vyadimongo vyakuniania vindating'inigwa. ²⁷ Apo vandamwona Mwana Wamunu aaloka mulyundi na dimongo pamo na lishangelo lyoe. ²⁸ Pavilota kutandeka vinu avyo, mwenu takatukanga mwimilange munyanyulile vilaka kuwa mwaa kwambolegwa kundi-vandika."

Kwankungu lipundishe

Mateu 24:32-35; Malukushi 13:28-31

²⁹ Napanelo Yesu andívakang'ela nkong'o au, "Lola nkungu na milandi vinji uti. ³⁰ Pamunona viipukila,

† *Lola Daniele 7:13.*

mwemwe mmene mundamanyinneu doni shipondo shiwikile. ³¹ Nadoni pamwona vinu avi vitandeka, mo-mo manyinneu doni utawala wa Nnungu undivandika. ³² Ninkumwaulila mwu doni, vanu vaimbula ai havamalilika vinu avi vikanava kuumilila. ³³ Shilambo shakuwa na shapai, vindapita kanji malove angu mwiko hapita.

³⁴ "Lishunge! Hamunaleke mitima vyenu viidapelwa kwambalwa na ulevi na mangaikangilo ashinamidyo ashi kutwala liduva alyo kunkodya shingangala kenga ntego ³⁵ mwaa liduva alyo, vanu uti ndyoko na nkulu mushilambo uti, lindavawikila. ³⁶ Ngwengwe muve mevo mujugwa mupate dimongo kwambangidya vilóta kutandeka vyo vinkowe na mwimile bila kujagajega pamevo pake Mwana Wamunu."

³⁷ Yesu kula liduva, mui ashindapagwa mwing'ande ya Nnungu apundisha, shilo kuka ndaikala kulishinga lyavashema Lyamilandu Vyaulivela. ³⁸ Lyamba linyeiku, vanu uti vashindauka kwing'ande ya Nnungu ndamwigwilila.

Yudashi ankupakanila yakunnimya Yesu

Mateu 26:1-5, 14-16; Malukushi 14:1-2, 10-11; Nshuwau 11:45-53

22 Napanelo shikukulu shamagung'u ákave nkukumuku shavashishema Pasaka, † shishindavandikanga. ² Nadoni vanang'olo vavakulangalalela-shadaka pamo na vamwalimu vadishaliya vashindalambela dindila dyakummalididya Yesu mwaa vashindavajopa venentete. ³ Napanelo Shatwani andímwinjila Yudashi wavashinshema Shikaliyote munu wamushipinga shavakwoda vake Yesu kumi na mbili avalá. ⁴ Kutwala Yudashi kuka ndalya shemba na vanang'olo vavakulangalalela-shadaka pamo na vanang'olo vavakushunga-ing'ande ya Nnungu avalodya mwakunnimidya nae Yesu kwavanavo. ⁵ Kutwala vanavo kupuwanga na kulivika kunnipa njuluku. ⁶ Bai Yudashi andívaungila nkono na andílambela dindila dyakuvakamudidya Yesu shipiipii.

Yesu ankulya Pasaka na vakwoda vake

Mateu 26:17-25; Malukushi 14:12-21; Nshuwau 13:21-30

⁷ Napanelo liduva lyashikukulu shamagung'u ákave nkukumuku livaikidíle vayuda kunshinda ngandolo wapasaka lindíwika. ⁸ Likawike, Yesu aníntuma Patulu namu Nshuwau aashidoni, "Wena mukapanganiange shikukulu sha Pasaka tulye." ⁹ Vanavo kumudya, "Ulota tuke tukapanganiange kwashi?" ¹⁰ Yesu kushidoni, "Lola, pamwinjila nkaja mundashingananavo munu jumo ányukete shilongo shamedi; mwenu mwode mpaka paing'ande yalota kwinjila ¹¹ mutwale mumwaulile mwene ing'ande ayo doni, 'Mwalimu andákudya, Shumba shani shalota kulyela shikukulu sha Pasaka na vakwoda vake?' ¹² Nae anannangudya lyutu lyakulyandaula shana livenavo vinu uti; mwenu panganianga

† Shikukulu shamagung'u ákave nkukumuku shishitandeka muwakati waishumana imo ling'oto lyaliduva lya Pasaka kanji kwodamwaa vishindalundananga vashindaunganianga kushema uti a Pasaka. Lola Kuma 12:1-20; Kumbukumbu 16:1-8.

popo." ¹³ Vanavo pavaukile vandyánela mo mwavaulilidile Yesu; bai vanavo vandípanganianga Pasaka ayo.

Ndamu umwe UMU

Mateu 26:26-30; Malukushi 14:22-26; I Vakolintu 11:23-25

¹⁴ Wakati pauwikile, Yesu andíikala pandamu pamo na vamyombe vake ¹⁵ kutwala kuvaulila doni, "Ingingu-nagwela namene kulya shikukulu sha Pasaka ashi namu mwenu nikanava kuuvauvanga. ¹⁶ Ninkumwaulila doni, hangulya kavili shikukulu sha Pasaka shinji namu mwenu mpaka pashilota kutandeka shiilanianga mana ake uti muutawala wa Nnungu." ¹⁷ Muwakati wowo Yesu andítwala shikombe kunnambwalela Nnungu kutwala kushidoni, "Twala mulakalanile.

¹⁸ Ninkumwaulila doni, hangukumbila kavili ugwalwa wavinyu mpaka pawida utawala wa Nnungu."

¹⁹ Namomo andítwala ligung'u kunnambwalela Nnungu, kumajanianga kuvapa vakwoda vake aashidoni, "Au ni mili wangu ujaulika mwaa wenu mwenu. Tenda shinu ashi mungukumbukila nangu."

²⁰ Pavamalidile kulya, andítwala shikombe kutandela momo aashidoni, "Shikombe ashi ni imbodi yaambi yamyadi vyangu vijaika mwaa wenu mwenu.

²¹ "Kanji mwe! Namalimya álota kungulimya nangu, apali namu nangu po pandamu apa. ²² Kutangola mwu, Mwana Wamunu ankuukila mo mwampangilidile Nnungu kanji shonde muni álota kunnimya jo!" ²³ Bai vanavo vandyúdyania, "Apali apa wakutenda shitendo asho?"

Vakwoda vankuudyania kavili, nyani nang'olo?

²⁴ Napanelo pakati pavakwoda undyúmilila ntau valota vammanye nyani áshivaikila kuva nang'olo pakati pave. ²⁵ Yesu kutwala kushidoni, "Vaumu vashilambo ashi vankulitumbudya kwavenentete vave na avalá vakumulidíle madalaka vankulivika kuva vanu vakutandedya wambone kwavenentete. ²⁶ Kanji mwenu hamunave davo; nang'olo pakati penu alitende kuva kenga ndyoko uti na nanangaledi ave kenga ntumika. ²⁷ Mwenu! Da nang'olo shana ava aijá ánaikala pandamu kwali aijá ánavatumikila vaikaléngé pandamu? Da hanava aijá ánaikala pandamu? Kanji napanelo nangu pakati penu nguvelé kenga aijá ánavaan-gaikangila vanu pandamu.

²⁸ "Mwenu ni múnapagwa ngwengwe namu nangu mumauvilo angu. ²⁹ Napavedoni ninkunkamudya utawala kenga mo mwangukamudididye nangu Atata ³⁰ pakulota mulye na mukumbile pandamu wangu muutawala wangu na mwikale muviteng'u muukumu makola kumi na mbili amwe Ishilaeli."

Patulu anankana Yesu

Mateu 26:31-35; Malukushi 14:27-31; Nshuwau 13:36-38

³¹ Yesu kavili kushidoni, "Simoni, Simoni, ngwigwa. Shatwani andijugwa ampate mwenu pakulota ampete kenga ngano. ³² Kanji nangu ndikujugwila

kwambangidya likulupililo lyako halinajaike. Napanelo wako paunguujila po, vanonowange vavung'unumunu." ³³ Patulu kushidoni, "Nang'olo, nangu nguvelé tayali kwinjila namu wako nkalaboshi na kupela namu wako." ³⁴ *UMU* kutwala kushidoni, "Patulu, ninkukwaulila doni, nelo ng'uku ntandi akanava kukangavela wako unangukana myanda mitatu."

Yesu vanantenda kuva nkalau

³⁵ Kutangola kavili kushidoni, "Panintumile pamukanyukata njuluku, lipeta kwali vilatu, dashi shindipagwa shimwovíte?" Vanavo do, "Hashipagwite."

³⁶ Yesu kushidoni, "Napanelo aijá ávenavo njuluku na ávenavo lipeta anyukate. Ákave na lyambila, ashulushe likoti lyake ashume lyambila. ³⁷ Ninkumwaulila doni, ambi apa vilota kutandeka avilá vyandikíke doni, 'Vanimpambanianga mushipinga shavaungave-lilamulo.' Mwaa uti vyavaandike vingwamba nangu, mwiu vindatandeka." ³⁸ Vanavo, "Nang'olo, lola! Apa tunkuvanavo maambila mavili." Nae kushidoni, "Ing'ano ai tuleke."

Palishinga Lyamilandi Vyaulivela

Mateu 26:36-46; Malukushi 14:32-42

³⁹ Napanelo Yesu andyúma kuka kenga lidyavalelo lyake ku Lishinga Lyamilandi Vyaulivela, vakwoda vake kumwoda. ⁴⁰ Pawikile palyutu, andívaulila vakwoda vake kushidoni, "Shwali kwambangidya hamunainjile mukutubigwa." ⁴¹ Nae kuvaleka kuka shitamba shamadodo salasini doni ndaguguvala kushwali ⁴² aashidoni, "Atata! Ukalota nyemya pamili pangu luwene alu † ila hainave mwangulatela nangu, ive mwaulatela wako umwene." [⁴³ †Popo po, andyúmilila njelo wakwalakela kuwa kwida nannonowanga. ⁴⁴ Yesu nkati mukuvavunga kwake, andíshwali na dimongo namene na lyuduku lyashuma ligwilangila pai kuva kenga matweni makumene amyadi.] ⁴⁵ Patakatwike pashishwali akauke kwavakwoda vake, andívakodya vâlalenge mwaa wamatuva ⁴⁶ kutwala nae kuvaudya, "Mwaa shani mundilalanga? Takatukanga mushwali pakulota hamunainjile mukutubigwa."

Kunnimya kumwe Yesu

Mateu 26:47-56; Malukushi 14:43-50; Nshuwau 18:1-11

⁴⁷ Napanelo Yesu akuno atangola kuwika imbumba yavanu wakulangalela kuva Yudashi munu wamushipinga sha avalá kumi na mbili; nae andyúka mpaka pavéle Yesu nankumbatila. ⁴⁸ Yesu kanji kushidoni, "Yudashi, unnimya Mwana Wamunu kwaindila yakumwambatila?" ⁴⁹ Napanelo avalá vavéle namu Yesu vakamanye víshilota kutandeka avilá vandímudya, "Nang'olo, tuvabyae maambila?" ⁵⁰ Munu jumo pakati pave kumwangenue lyatu lyankanakono ntumika wake nkúlangalalela-shadaka nkumene. ⁵¹ Yesu

† Luwene *Iwámba Yesu mana ake ni shitundi sha Nnungu shavavikila avalá vaténda vyamadambi mushilambo. Lola Dimu 75:8; Ishaiya 51:17, 22. †† Mumaandiko matandi anji ashigalegu dinamba mbili adi 43 namu 44, hadipali.*

napane kushidoni, "Bai, leka." Nae kukamula lyatu alilá kumponia. ⁵² Kutwala apo, andívaudya vanang'olo vavakulangalalela-shadaka, vanang'olo vavakushungaling'ande ya Nnungu pamo na vanang'olo vamuukidíle nankamula avalá kushidoni, "Kenga nkalau shamwida na maambila pamo na dilungu?" ⁵³ Nangu panishipagwa ngwengwe namu mwenu mwing'ande ya Nnungu, mwenu hamunguungile. Kanji au ni wakati wenu, wakati wamadala akushii."

Patulu ankunkana Yesu

Mateu 26:57-58, 69-75; Malukushi 14:53-54, 66-72; Nshuwau 18:12-18, 25-27

⁵⁴ Bai vanavo vanínkamula kumuukanavo kwing'ande yankúlangalalela-shadaka nkumene; Patulu andyúka amwoda mwakushu. ⁵⁵ Vanavo vandíkong'a moto wave shing'ati lugwani vene kwikalanga nanae Patulu kuka ndaikala popo. ⁵⁶ Napanelo ntumika jumo mwali anínnola Patulu ndoo kutwala kushidoni, "Munu aju momo andípagwa namu Yesu." ⁵⁷ Patulu doni, "Gwee! Nangu munu ajo hanimanyite." ⁵⁸ Kutima padyoko munu junji pakati pave kunnola Patulu nanae kushidoni, "Nawako momo uvelé mpinga wowo." Patulu do, "Wako! Nangu nkati mo, hangupali." ⁵⁹ Ikapite isaa kenga imo doni munu junji anímmalanganga kavili aashidoni, "Mwiu, munu aju momo andípagwa mpinga wowo mwaa nanae aju, ngalileya." ⁶⁰ Nae do, "Jii! Nangu shautangola wako sho, hangumanyite." Bai Patulu akuno atangola, ng'uku kukangavalenneu ⁶¹ kutwala *UMU* kushiliuka kunnola Patulu, Patulu kukumbukilinneu malove ake *UMU* amwaulidíle kushidoni, "Nelo ng'uku ntandi akanava kukangavela wako unangukana myanda mitatu." ⁶² Bai Patulu andyúmila panda ndatumbula ing'uto.

Yesu vankumwiludyanga

Mateu 26:67-68; Malukushi 14:65

⁶³ Napanelo vanu váshinnaledya Yesu vaníntukana, vanínkanyola ⁶⁴ namomo vandímunga lilesho kumevo vamudya, "Valanga, akukanywelé nyani?" ⁶⁵ Vovo vo vashinantangalela malove anji oe akumwabolanga.

Yesu paikamati

Mateu 26:59-66; Malukushi 14:55-64; Nshuwau 18:19-24

⁶⁶ Napanelo wiku paushwenge, nkodyanio wavanang'olo vavenentete kutunduvangila vanang'olo vavakulangalalela-shadaka pamo na vamwalimu vadishaliya vandíikala nguguvale kuntwala Yesu kumwimidyapaikamati yave. ⁶⁷ Vanavo kumudya, "Wako ukava Klistu, twaulila!" Kanji nae kushidoni, "Ndikamwaulila ata hamukulupila ⁶⁸ na ndikamudya hamungujang'ula ata padyoko. ⁶⁹ Kanji kutunduvangila ambi apa Mwana Wamunu andaikala kunkanakono kwake Nnungu Wadimongo-uti." ⁷⁰ Vanavo uti kumudya, "Da napanelo wako po umwanagwe Nnungu?" Nae kushidoni, "Mwenu ni múnguvalanganga."

⁷¹ Vanavo do, "Shapo tulambela ushuda shani kavili? Da i tundimwigwa tuvene vyatangwele?"

Yesu pamevo pamwe Pilatu

Mateu 27:1-2, 11-14; Malukushi 15:1-5; Nshuwau 18:28-38

23 Bai vanang'olo uti vaikamati avalá vandí-takatukanga kuntwala Yesu kumuukanavo kumwe Pilatu. ² Vanavo vandítunduvanga kuntambudiyanga vinu vaashidoni, "Munu aju tuninkadyedya avatindinganianga venentete vetu aleya kunnipa Shashali ukodi wakunnodya nae kuva umu wetu na kavili jojo kulivika jo mwene kuva Klistu yani umu." ³ Pilatu kumudya, "Wako ni umu wavayuda?" Yesu kushidoni, "Wako ni úvalanganga." ⁴ Napanelo Pilatu andí-vaulila vanang'olo vavakulangalalela-shadaka na venentete uti kushidoni, "Nangu munu aju namwona shinu likosha." ⁵ Kanji vanavo vashindang'ang'anikila vaashidoni, "Aju ankupita avatubya venentete na mapundisho ake ku Yudeya akuno uti kutunduvanga ku Galileya mpaka nkaja amu."

Yesu pamevo pamwe Elode

⁶ Napanelo Pilatu paigwite vatambulanga ku Galileya, nae andyúdyá, "Da munu aju ngalileya?" ⁷ Bai Pilatu pamanyite doni Yesu avele munu ávele mwina madalaka amwe Elode, nae andílamulila vamuukena-vo kumwe Elode mwaa mumaduva lolo nae andípag-wa po pa Yelusalemu. ⁸ Napanelo Elode pangwene Yesu andípuwanga namene mwaa andíikala maduva oe ava na mweshe wakumwona pakuva ashindaigwa vantambulanga. Nae ashindavanavo lilindilililo lyakumwona atenda shimanyikilo shoeshoe. ⁹ Nadoni Elode andímuudyangidya vinu vyoe namene kanji nae hashijang'ula. ¹⁰ Vanang'olo vavakulangalalela-shadaka pamo na vamwalimu vadishaliya pashinu apo, vashinantambudiyanga na dimongo vinu vyoe. ¹¹ Bai Elode pamo na vaing'ondo vake vaníntanila na vandímwiludyanga, kungwadya ikanju yashiumu kutwala kumuujidya kumwe Pilatu. ¹² Napanelo Elode namu Pilatu vanu vákashiigwania muwakati wapanyuma, muliduva alyo vandípagana imbodi.

Pilatu ankunkamudya Yesu vankamele panshalaba

Mateu 27:15-26; Malukushi 15:6-15; Nshuwau 18:39-19:16

¹³ Kutwala apo Pilatu andívashema vanang'olo vavakulangalalela-shadaka, vakutawala pamo na venentete kuvaulila doni, ¹⁴ "Mwenu muningu-palakadyedya munu aju na munimbalanganga kenga ankuvatindinganianga venentete. Kanji lola, nangu paninnalyenge nae pamevo penu, haningwene likosha lyoelyoe pakati pavinu uti vyamumwaulenge ¹⁵ na ata Elode momo mwaa nae andimuujiidya kwetu wetu. Mwenu! Munu aju hashipali shatandile shakulota apalele. ¹⁶ Nangu ndalamulila vanshape viboko ngutwale ninneke."

[¹⁷ †Jo Pilatu aju ashindalamuliligwa avaungulile venentete nkúngwa jumo pashikukulu sha pasaka.]

¹⁸ Kanji imbumba yavanu inditangola kwaunapamo ijunga iishidoni, "Munu ajo atuntamwa, tuungulila Bal-abashi," ¹⁹ eti munu wavanjadíle nkalaboshi mwaa wakuvalangalalela venentete kupinga shilikali na kumyaa munu! ²⁰ Napanelo Pilatu andítangonavo kavili alota amuungule Yesu. ²¹ Kanji vanavo vandíjunga vaashidoni, "Nkamele panshalaba! Nkamele panshalaba!" ²² Pilatu kutangola kavili mwanda wantatu kushidoni, "Da munu aju atandilé shakunyata shani? Nangu namwona likosha lyakupalela nae; ndalamulila vanshape viboko ngutwale ninneke." ²³ Kanji vanavo vashindang'ang'anikila vajunga pashanya po valota Yesu vankamele panshalaba. Bai kujunga koko ko kundítema. ²⁴ Nadoni Pilatu andyámuwa kutandela momo mwavashilatela vanavo. ²⁵ Andímuungula munu wavanjadíle nkalaboshi mwaa wakupinga shilikali na kubyaa kuntwala Yesu kunneka nkati mulotelo ave.

Kukamalalegwa kumwe Yesu

Mateu 27:32-44; Malukushi 15:21-32; Nshuwau 19:17-27

²⁶ Napanelo pavashimuukanavo, vanínkamula munu jumo walina Simoni wa ku Shilene aaloka kuludeya, vanavo kuntika nshalaba apite amwoda Yesu. ²⁷ Ishindamwoda imbumba yavenentete, nkati mwake vandípagwa vakongwe váshipita vatangadikanga vannilila. ²⁸ Kanji Yesu andívashiliukila kutwala kuvaulila doni, "Mmakongwe mmayelusalemu! Hamunangulilile nangu! Lililile mmene na valilile vanavenu. ²⁹ Mwaa mwe! Undawika wakati wavalota kutangola doni, 'Vandíjalig-wa vakongwe vákaimite, vákavaleke na vákajang'adidyé.' ³⁰ Muwakati awo vanu vandatangalela mashinga doni, 'Tameka mutunyanyakedye na mutubulikidyé!' ³¹ Shapo vanu pavatenda doni nandi umbii, kushi kwamwenu milandi vyakujuma ilota kuva dashi?"

³² Namomo vandívatwala vanu vavili vanji vavele vakalau kuvaukanavo ndavapedya pamo namu Yesu. ³³ Pavawikile palyutu lyavashema Pashivanga, Yesu vanínkamela panshalaba pamo na vakalau vavili avalá; jumo kunkanakono junji kunshanda. ³⁴ Kanji Yesu kushidoni, "Atata, valivalive mwaa havanamanya shinu shavatenda." Bai vanavo vandíjalanga gudugudu kwambangidya vajavanange dinguvo dyake.

³⁵ Venentete vandíimilanga pepi valola na vakutawala vashinantanila vaashidoni, "Andivaposha vanji ambi apa aliposhe mwene ikava kenga nae ni Klistu wake Nnungu na Wakutandalegwa." ³⁶ Namomo vaing'ondo vashinammandika vantanila vatwala ugwalwa vamupa ³⁷ vaashidoni, "Wako ukava mwiu umu wavayuda, liposhe gwegwe umwene." ³⁸ Na yadavo pamuti pake vandíkamela shibau shavaandike doni, "AJU NI UMU WAVAYUDA."

³⁹ Napanelo nkalau jumo wavankamadíle palyutu lyolyo ashindamwabalanga Yesu aashidoni, "Da wako i Klistu? Bai liposhe gwegwe umwene na utuposhe

† Mumaandiko matandi ashigalegu inamba ai ya 17 haipali kanji mumaandiko aidilé mushu vandyanjedya inambi ai ya 17.

nawetu!"⁴⁰ Kanji nkalau junji anínshulanga muje aashidoni, "Da wako mpaka ambi haunanjopa shinu Nnungu ata padyoko muwakati nawako unakupata ukumu yoyo?"⁴¹ Wetu apa tunkupata mauvilo ala kwashaliya mwaa tunkuukumigwa kwodana na vitendo vyetu. Kanji aju apa hashipali shakunyata shatandile."⁴² Kutwala kumwaulila Yesu doni, "Yesu, ngukumbukila paulota kwida na utawala wako."^{†43} Yesu kushidoni, "Ngwigwa, wako jo nelo aju mwiu undapagwa namu nangu kulyutu lyalipuwilo."

Kupela kumwe Yesu

Mateu 27:45-56; Malukushi 15:33-41; Nshuwau 19:28-30

⁴⁴ Wakati awo uvele wakati wasasita kutwala mushilambo uti kwida shii mpaka muwakati wasatisa,⁴⁵ liduva lidimbile. Mwing'ande ya Nnungu inguvo íshidivilikidya lyutu Lyanashwe-uti, indípapuka shing'ati kuma kushanya mpaka mwina.⁴⁶ Bai Yesu andíkuta pashanya po aashidoni, "Atata, mmakono mwako ninkukamudya imumu yangu."^{††} Patangwele davo, nae kujaa shingumi.

⁴⁷ Napanelo nang'olo wavaing'ondo pagwene vinu vitandéke avilá, andímupa lishangelo Nnungu aashidoni, "Munu aju mwiu avele waishaliya."^{‡48} Kutwala imbumba yavanu vakodyaniéngé palyutu alyo pakulota valole shitendo ashó, pavagwene avilá vitandéke, vandyújila kumakaja valikanyalanga pashuva.⁴⁹ Vavagwe Yesu pamo na vakongwe váshimwoda kutunduvangila ku Galileya, vandíimilanga kushu valola víshitandeka.

Kunshika kumwe Yesu

Mateu 27:57-61; Malukushi 15:42-47; Nshuwau 19:38-42

⁵⁰ Napanelo munu jumo walina Yoshe wamushipinga shaikamati, munu wambone doni na waishaliya,⁵¹ haungidile nkono vitendo vyavavagwe. Nae avele wa pa Alimateya likaja lya ku Yudeya na ashilindila utawala wa Nnungu.⁵² Munu aju andímuukila Pilatu nanjugwa mili wake Yesu.⁵³ Bai Yoshe andíshuluwa mili aulá, kwavilidyanga mushanda kuka ndashika muntupa wamulijanga wavakanava kunshika munu.

⁵⁴ Liduva alyo livele liduva lyakupanganianga na wakati wakatunduvanga liduva lyakupumula ushinda-vandikanga.⁵⁵ Napanelo vakongwe avalá vaaléke namu Yesu ku Galileya, vandímwoda Yoshe, vandyóna shonga ashilá na mwavaladyadidye mili.⁵⁶ Bai vanavo vandyújananga kutwala kupanganianga vinu vyakunung'angila vyakutaa mumili na mauta akunung'ila.

Muliduva lyakupumula vanavo vandípumula kwodana na lilamulo.

Kudyuka kumwe Yesu

Mateu 28:1-10; Malukushi 16:1-8; Nshuwau 20:1-10

24 Kanji muliduva litandi lyaishumana linyeiku, vakongwe avalá vandítwala vyakunung'angila

† Mumaandiko anji akala ashigalegu vaandike doni, a ...pauwika kuutawala wako. †† Lola Dimu 31:5. ‡ Kwali: a "Munu aju mwiu avele munu ákave makosha."

vyavapanganiéngé avilá kuukanavo kushonga.

² Pavawikile, vandíkodya lijanga lyavadvile pantupa vágang'aladile nnyenje.³ Vakainjile, mili wake *UMU* Yesu, havakodidye.⁴ Napanelo vanavo váshangile shিতendo ashó, kwashingangala vandyúmilila vanu vavili vagwalenge dinguvo dyakumalameta.⁵ Vakongwe na kujopa kwave kutapangila pai kutwala vanu vavili vo kushidoni, "Mwaa shani munkunnambela munu mumi pakati pavakupela?"⁶ Nae apa hapali, vanindyuwa. Mwenu kumbukila avilá vyamwaulidíle ávele ku Galileya⁷ doni, indivaikila Mwana Wamunu vakankamudye kumakono kwavalume vakutega, vankamele panshalaba na muliduva lyantatu adyuke."^{‡18} Nadoni vanavo vandíkumbukilinneu malove ake.

⁹ Napanelo pavaumile pashonga kuka kukaja, vandívalanganga avilá vyavagwéne uti kwa avalá kumi na moja na kwavakwoda vanji.¹⁰ Napanelo vakongwe vaidínavo dyabali adyo kwavamyombe vavele ava: Maliya wa ku Magadaleña, Shuwana, Maliya anyoke Tiyagu pamo na vakongwe vanji vavéle mushipinga shosho.¹¹ Bai vanavo malove avalangenge vakongwe havakulupidíle vagwene kuva akudidimanga.

¹² Kanji Patulu andyúka atukuta kushonga; akatepe kupandalela nkati amulá agwene ishanda gweka kutwala nae kuujila kukaja ashanga ashilá shitandéke.

Yesu ankulilodya mwindila ya ku Emau

Malukushi 16:12-13

¹³ Muliduva lyolyo lyo, vakwoda vavili vauka kulikaja lya Emau livéle mushitamba shavyuluta kenga kumi doni ukauma pa Yelusalemu,¹⁴ vashindapita vaulanila vinu uti vitandéke.¹⁵ Napanelo pavashuka vomba mwaa wave na vaudyana, jo mwene Yesu jo kuwika kulijalanianga mushipinga shave kuka shalumu¹⁶ kanji vanavo havashimanya ata padyoko.

¹⁷ Napanelo nae andívaudya, "Da mupita mwaulanila nyamani niindila amu akuno muwena?" Vanavo kwimilanga vavele na shipalodi.¹⁸ Kutwala munu jumo pakati pave walina Kalaupashi kushidoni, "Da wako po ni unjeni gweka yako ku Yelusalemu akuno úkamanya vipitíle mumaduva matatu ala?"¹⁹ Nae kushidoni, "Vyakwashi?" Vanavo kushidoni, "Vintandéke Yesu wa ku Nashaleti munu avéle nkúlava, avénavo vitendo na malove adimongo pamevo pa Nnungu na pamevo pavanu uti.²⁰ Nae vanang'olo vavakulangalalela-shadaka na vakutawala vetu vaninjaula pakulota vamupe ukumu yakupela; nadoni, vaninkamela panshalaba.²¹ Kanji wetu tundívanavo lilindilililo lyakuva nae munu wakulota kwambola Ishilaeli; napanelo tangu kutandeka vinu avi nelo apa tunkutenda maduva matatu.

²² Kanji napanelo, vakongwe vanji vamushipinga shetu nelo vanditujuwanga. Vanavo vandyúka lyamba linyeiku kushonga²³ kanji mili havakodidye. Vanavo kuja kwida ndavalanganga kenga na ata momo vandívona vanjelo vake Nnungu vavili valilodya kwavanavo kutwala vovo vo kwaulanga kenga Yesu mumi.

²⁴ Kutwala vavetu vanji vamushipinga shetu kuka koko,

‡† Lola 9:22, 44.

navanavo kukadyedya momo mwavaulidile vakongwe kanji Yesu nae havangwene.”

²⁵ Napanelo Yesu kushidoni, “Shasho! Mwenu mma-jinga namene na mmakukakova mmitima pakulota kukulupila uti vyavatangwele vakulava! ²⁶ Da haim-
maikidile Klistu auvauvange atwale ainjile mulishange-
lo lyake?” ²⁷ Bai nae mumaandiko uti andíviigwiniya ku-
tunduvangila kumwe Musha na kwavakulava vinu
vimwamba nae.

²⁸ Pavawikile pashengo likaja lyavashuka, Yesu
andílivika kenga munu áuka mushu na shimwanda
shake ²⁹ kanji vanavo vanínkanyilidya aikale
vaashidoni, “Pagwa namu wetu popo apa mwaa liduva
lindishwa.” Bai Yesu andíinjila nkaja kutwala kwikana-
vo. ³⁰ Napanelo pavaikalenge kulya shakulya, nae
andítwala ligung'u kwalaliya kumajanianga kutwala
kuvapa. ³¹ Muwakati wowo vanavo kung'amukanga
kutwala kumanya kanji nae andívalambaleka. ³² Bai
vanavo vandyáulanila, “Da mitima vyetu havishitubuka
pashitutangalela niindila atwigwiniya Maandiko?”

Yesu ankulilodya kavili kwavakwoda

Nshuwau 20:19-23

³³ Kutwala vanavo muwakati wowo kutakatukangin-
neu kuujila ku Yelusalemu; ako vandívakodya kumi na
moja avalá na vanu vanji vákadyanienge pashinu
pamo ³⁴ vaashidoni, “Mwenu, *UMU* andidyuka mwiu! Si-
moni jo andimwona shana mwene.” ³⁵ Namomo avalá
vakwoda vavili, navanavo vandívalanganga vi-
vatandéke niindila na kuvalanganga kenga vaním-
mánya kwaindila yashimajanidyo shaligung'u.

³⁶ Vanavo vavalanganga vinu avi, jo mwene Yesu
vangwené vila àimidile shing'ati shave kutwala ku-
vaulila doni, “Amani ipagwe namu mwenu.” ³⁷ Kanji
vanavo vandíshushukanga na vandíjopa mwaa
vashimwona kenga lyoka ³⁸ kutwala nae kushidoni,
“Mwaa shani munkushanga namene na munkuvanavo

makumbukililo alo mmitima vyenu? ³⁹ Lola manda an-
gu na madodo angu; nangu ninene. Ngukamulanga
mwamini mwaa lyoka halinavanavo mili na magwang-
wa kenga mwamungwanela nangu.” ⁴⁰ Akatangole da-
vo, andívalodya manda na madodo ake. ⁴¹ Kanji vana-
vo pavakakulupila mwaa walipuwilo na vashanga,
Yesu andívaudya, “Da mundivanavo shinu shoeshoe
shakulya?” ⁴² Vanavo kumupa shipande shayomba
wakunjanikila ⁴³ nae kumamena vanavo vannola.

Malailililo amwisho

Mateu 28:16-20; Malukushi 16:14-18; Vitendo 1:6-8

⁴⁴ Kutwala kuvaulila doni, “Vitandéke avi ni avilá
vyanishipita nimmalangangila mwenu tûvele shalumo
kenga indivaikila vinu uti vyandikígwe mu Lilamulo
lyake Musha, mu Vakulava na mu Dimu vingwamba
nangu, vitandeké.” ⁴⁵ Bai andívaungula myuti pakulota
vaigwe shana Maandiko ⁴⁶ kutwala kuvaulila doni,
“Vandyandika doni, indivaikila Klistu apele kutwala
muliduva lyantatu adyuke pakati pavakupela ⁴⁷ na pali-
na lyake, uvalangangigwe ntenga wakulijugulanga na
wakulivalivigwa kwamadambi muvenentete uti kutun-
duvangila ku Yelusalemu. ⁴⁸ Vinu vyovyoye avi mwenu ni
mmashuda. ⁴⁹ Mwenu! Nangu nampalakadyedya
shalivikile Atata kanji mwenu pagwa po pa Yelusalemu
apa mpaka mupate dimongo dyakwaloka kushanya.”

Yesu ankutanduligwa kuka kuwa

Malukushi 16:19; Vitendo 1:9-11

⁵⁰ Kutwala apo andívaukanavo ku Betaniya kutwala
kuvanyaladyedya makono kuvaalaliya. ⁵¹ Avaalaliya
nae andívanyema kutanduligwa kuka kuwa. ⁵² Vanavo
mulyutu alyo vandílipudya kwake nae kutwala kuujila
ku Yelusalemu vapuwanga namene. ⁵³ Vanavo ng-
wengwe vashindapagwa mwing'ande ya Nnungu van-
tumbiyanga Nnungu.

Nshuwau

Lilove lindyuka ndava mili

1 Kunantandi avele Lilove, jo Lilove andípagwa namu Nnungu na Lilove aju kuva Nnungu. ² Nae kunantandi apagwite namu Nnungu. ³ Vinu uti vikandyangiké kwaindila yake, hashipali shikandyangiké ata shinu shimo bila nae. ⁴ Nae ni avele ntipu washingumi na sho shingumi ashii ni lilangadyo kwavanu. ⁵ Lilangadyo linkumulikila mushii na shii hashuulwile kutema lilangadyo.

⁶ Napanelo andípagwa munu jumo wantumidídye Nnungu walina Nshuwau. ⁷ Nae aidilé ndava nshuda wakuumidya ushuda lilangadyo pakulota kwaindila yake nae vanu uti vakulupile. ⁸ Nae po havéle lilangadyo ila aidilé ndaumidya ushuda lilangadyo.

⁹ Lilangadyo liu limmulikíla kula munu lindída mushilambo. ¹⁰ Nae andípagwa mushilambo na kwaindila yake nae shilambo shindikandyangigwa kanji sho shilambo sho, shiníntikinanga. ¹¹ Andída kwave kanji vakwave havampwashaladile. ¹² Napane uti avalá vampwashaladíle, vo vakulupidíle lina lyake, nae andivapa aki yakutandegwa kuva vana va Nnungu. ¹³ Vanavo, vana va Nnungu i kwaindila yaudukulu ata i kwashimunu kwali kwamalotelo antwamunu ila kwamalotelo ake jo mwene Nnungu.

¹⁴ Jo Lilove jo andyúka ndava mili kutwala kunama namu wetu. Wetu tundyona lishangelo lyake, lishangelo lyakuva Mwana jumo jojo wakwalakela kwa Tatamunu, lyolyo lyumbéle umonyo na umwiu. ¹⁵ Kwake nae, Nshuwau andyumya ushuda na anditangola pashanya po aashidoni, "Aju ni jojo aijá wanishim-langanga nangu nguushidoni, 'Ling'oto lyangu nangu ankwida munu wakungupunda nangu mwaa ata nangu nikanava kupagwa, nae andípagwa.'" ¹⁶ Doni, mukuumbaligwa kwake, wetu uti tundipata umonyo kuleka umonyo ^{††17} mwaa Lilamulo lindipatikananga kwaindila imwe Musha; umonyo na umwiu kwida kwaindila imwe Yesu Klistu. ¹⁸ Nnungu, hapali munu ata jumo ángwene ila jumo wagweka, àvele Nnungu, jo áijeme pashuva sha Tatamunu ni átutadidye tummanyé.

† Ku Maagano Akala, kwalilove lyake, Nnungu andikandyanga shilambo (lola Kutunduvanga 1:3, 6, 9; Dimu 33:6) kulyumilidya kwavanu (lola Yelemiya 1:4; Eshekieli 33:7), kuvaambola na kuukumu shilambo (lola Dimu 107:20; Ishaiya 55:11). Mulibuku ali lyandike Nshuwau, nae ankulodya vitendo na malove ake Yesu kuva vitendo na malove ake Nnungu. Mushu mo, Yesu ankwaneke kuva namumba (lola 2:1-12), ankunnodya Nnungu kwavanu (lola 14:6-7), ankwambola na ankuukumu shilambo (lola 3:36). †† Kwali: a umonyo pashanya umonyo.

Ushuda umwe Nshuwau Wakubatisha

Mateu 3:1-12; Malukushi 1:1-8; Lukashi 3:1-18

¹⁹ Napanelo au ni ushuda waumidye Nshuwau vayuda pavavatumile pa Yelusalemu vakulangalalela-shadaka pamo na valawi ndamudya doni, "Da wako unyani?" ²⁰ Nae pakalipiyapiyanga andívalanganga ngala, "Nangu hangunava shinu Klistu." ²¹ Vanavo kumudya, "Pane, wako po unyani? Wako po, Liyashi?" [†] Nae do, "Mene, nangu hangunava shinu nae." Vanavo, "Da wako po, unkúlava watushikulindila wide mushilambo?" ^{††} Nae kushidoni, "Mene."

²² Vanavo kutwala kumudya kavili, "Kanji napanelo wako po unyani? Livalangange ako, tuukenavo majibu kwa avalá vatutumíle." ²³ Nshuwau kushidoni, "Nangu ni lidi likúgwa kushimbweshe, 'Alowa indila yake Umu,' ^{†††} ni sho shitangodi ashilá shimwe nkúlava Ishaiya."

²⁴ Napanelo pakati pavanu ve vatumigwídye vandípagwa mapalishayo. ²⁵ Vanavo vakaudya kushidoni, "Ikava kenga wako haunava shinu Klistu, haunava Liyashi na ata haunava shinu aijá nkúlava, mwaa shani vanu unkuvapa ubatisho?" ²⁶ Nshuwau kushidoni, "Nangu ninkuvapa vanu ubatisho mmedi; pakati penu po napanelo apali wamukammanyite. ²⁷ Nae ni aijá áaloka panyuma pangu ákavaikidile nangu kumuulanga vilatu vyake." ^{†††28} Vinu avi vitandeke ku Betaniya mwangu unji walundi lwa Yudani palyutu lyashivapela Nshuwau vanu ubatisho.

Yesu ni Ngandolo wa Nnungu

²⁹ Palyamba lyake Nshuwau andímwona Yesu amwidila kutwala kushidoni, "Mwenu! Ngandolo wa Nnungu aijá áusha lidambi lyashilambo. ³⁰ Aju ni jojo wanishimlanganga nguushidoni, 'Ling'oto lyangu nangu ankwida munu wakungupunda nangu mwaa ata nangu nikanava kupagwa, nae andípagwa.'

³¹ Munu ajo ata nene hanishimanya kanji shingutadídye nangu ngwide nivape vanu ubatisho

‡ Lina Iya a Klistumana ake a Masiyayani aijá walivikile Nnungu kuntumidya kwida. Vayuda uti vashinannindila Masiya ave wakuvaambola venentete uti va ku Ishilaeli. †† Nnungu andílivikila kuntumidya nkúlava Liyashi likanava kuwika Liduva limwe Umu. Lola Malakiya 4:5. Ata ikava kenga Nshuwau andíkana yakuva Liyashi kanji Yesu anímmalanganga yakuva Liyashi. Lola Mateu 11:14; 17:11-12. Nshuwau andítangola davo kwambangidya venentete havanankulupile nae kenga Mwamboli. †† Vayuda vashinannindila nkúlava wakuva kenga Musha. Lola Kumbukumbu 18:15-18. ††† Lola Ishaiya 40:3. ††† Nshuwau patangwele doni, a "ákavaikidile nangu kumuulanga vilatu vyake," ashilodya kenga Yesu ni munu wakwishimika kupunda apo kumpunda nae.

mmedi ni pakulota nae amanyike kwavanaishilaeli.”
³² Nshuwau akaumya ushuda aashidoni, “Nangu ndimwona Imumu ashuluka kenga ng'unda kwalakela kuwa kwida ndaikala namu nae. ³³ Nangu munu ajo hani-nammanyeye leka aijá ángutumile nivape vanu ubatisho mmedi akangwaulidile doni, ‘Munu waulota kumwona Imumu ashuluka kwida ndaikala namu nae, ajo ni jojo álota kuvapa vanu ubatisho mu Imumu Wanashwe.’
³⁴ Nangu ndimwona na ninkumya ushuda, aju ni Mwana † wa Nnungu.”

Vakwoda vatandi vankummanya Yesu

³⁵ Palyamba lyake Nshuwau andípagwa kavili pamo na vakwoda vake vavili. ³⁶ Pamwonite Yesu apita andítangola doni, “Mwenu! Ngandolo wa Nnungu aju.”
³⁷ Vakwoda vavili avalá pavaigwite malove alo vandímwoda Yesu. ³⁸ Yesu akavona vakwoda vake Nshuwau avalá vamwoda nae kuvaudya, “Mulambela nyamani?” Vanavo, “Labi,” (Labi, kwakuvalangangila, Mwalimu), “da uwikidilé kwashi?” ³⁹ Nae do, “Ida mulole!” Bai vanavo vandyúka na vandyóna lyutu lyawikidíle kutwala kwikanavo mpaka kudimba liduva. Wakati wene wo uvele wakati wasakumi yalyulo. ⁴⁰ Pakati pavanu avo vavili vamwigwíte Nshuwau atangola na vamwodíle Yesu, jumo avele Andaleya nung'une Simoni Patulu. ⁴¹ Jojo jo shitandi ankuka ndakadyania na nkulumunu Simoni, ankumwaulila doni, “Tunimpata Masiya” (Masiya, kwakuvalangangila, Klistu ††). ⁴² Bai Andaleya akantwala Simoni kumuukanavo kumwe Yesu. Yesu akannola Simoni ndoo, akamwaulila kushidoni, “Wako lina lyako Simoni mwanagwe Nshuwau. ‡ Napane kutunduvangila ambi apa vandakushema Kepashi” (Kepashi kwakuvalangangila kunji, Patulu ††).
⁴³ Palyamba lyake Yesu andyámuwa kuujiila ku Galileya. Napanelo ankumwona Pilipo ankumwaulila doni, “Ngwoda!” ⁴⁴ Pilipo avele mwenentete wa pa Beteshaida likaja limwe Andaleya namu Patulu. ⁴⁵ Jo Pilipo jo ankunkodya Nataniyele ankumwaulila doni, “Tunimpata munu wamwandike Musha mu Lilamulo na yadavo Vakulava, Yesu wa ku Nashaleti, mwanagwe Yoshe.” ⁴⁶ Kutwala Nataniyele kumudya Pilipo doni, “Ku Nashaleti kunkuululika kwaloka shinu shambone?” Pilipo kushidoni, “Ida ulole.”

⁴⁷ Yesu kumwona Nataniyele amwidila kutwala kushidoni, “Mwenu! Aju ni mwishilaeli mmwui ákave malambi.” ⁴⁸ Nataniyele kumudya, “Ungumanyidilé kwashi?” Yesu kushidoni, “Ata Pilipo akanava kukushe-ma, wako úvele mwina nkungu, nangu ndíkwona.”
⁴⁹ Nataniyele kunjang'ula, “Labi, wako Mwana wa Nnungu, kwavanaishilaeli wako ni umu.” ††⁵⁰ Yesu akanjang'ula kushidoni, “Da kwamwaa wakukwaulila

† Mumaandiko anji akala vaandiké doni, a nkútandalegwa. Apa Nshuwau ankukumbuwanga malove atangwele nkúlava Ishaiya doni a Nammiminila Imumu wangu nkútandalegwa wangu. Lola Ishaiya 42:1. †† Klistu ni aijá mwamboli walivikile Nnungu kuntumidya kwida. ‡ Nshuwau aju tatake Simoni hanava shinu Nshuwau aijá áshivapa vanu ubatisho na ata hanava shinu aijá áandike libuku ali mwaa mulibuku ali vankupagwa vanshuwau vatatu. †† Lina lya a Patulumana ake a lijanga lyakulitandika. ††

ndikugwene úvele mwina nkungu, ni paukulupila? Bai undona vinu vikumene kupunda avi.” ⁵¹ Nae kuka mushu aashidoni, “Ninkumwaulila mwiu uti doni, mundona kuwa kúshimwike na vanjelo va Nnungu vakwela na vashuluka mu Mwana Wamunu.” †††

Yesu ankujalulanga medi kuva vinyu

2 Muliduva lyantatu shindítandeka shikukulu shashitamo ku Kanaa ya ku Galileya na koko ko, andípagwa anyoke Yesu. ² Pashikukulu ashu yadavo vanínalika Yesu pamo na vakwoda vake. ³ Napanelo ugwalwa wavinyu ukamalilike, jujumunu anímwaulila Yesu kushidoni, “Vinyu vindimalilika.” ⁴ Yesu kutwa kushidoni, “Da wako namu nangu shako nyamani? Wakati wangu haunava kuwika.” ⁵ Bai jujumunu andívaulila avalá vatumika vapaing'ande doni, “Vinu uti vyalota kumwaulila, mwenu tandedya.”

⁶ Napanelo popo po, vindípagwa vilongo sita vyamajanga vyavashitaa medi kwakwodananavo kulyushani-anga ushapu kwavayuda. Kula shilongo shishindainjila malitululu akuwikila kenga miya doni. ⁷ Yesu kuvaulila avalá vatumika vapaing'ande kushidoni, “Takangila medi mmilongo muumbadyange.” Vanavo kuum-badyanga uti do, jalele! ⁸ Yesu kuvaulila doni, “Napane teka mukamupe nanangalaledi washikukulu.” Vanavo kuteka kuukanavo. ⁹ Nanangalaledi palingile medi ajalukéngé kuva ugwalwa wavinyu pakamanya kwawalakadile kanji vatumika vapaing'ande ve vatakangidíle medi mmilongo vàmanyite kwawalakadile, nae anínshema nkúlomba ¹⁰ kutwala kumwaulila doni, “Kula munu shitandi avapa vanu vinyu shii, ling'oto lyavanavo kukumbila shana-shana ni panatwala vikave mana kuvapa. Kanji wako po undikondya vinyu shii mpaka muwakati au!” ¹¹ Ashi ni shimanyikilo shitandi shatandile Yesu ku Kanaa ya ku Galileya. Amu ni mwalaladidye lishangelo lyake kutwala vakwoda vake kunkulupila.

Kuvingangigwa kwavakushulusha mwing'ande ya Nnungu

Mateu 21:12-13; Malukushi 11:15-17; Lukashi 19:45-46

¹² Ling'oto lyavinu avyo andyálela kuka ku Kapalanaumu pamo na anyoke, vanung'unuvake na vakwoda vake. Koko ko, vandíikala maduva avaiكالéngé.

¹³ Napanelo shivandikenge shikukulu sha Pasaka ††† shavayuda, Yesu andyámboka kuka ku Yelusalemu.

¹⁴ Koko ko, paing'ande ya Nnungu andívakodya avalá vakushulusha-ding'ombe, dingandolo, ding'unda na

Nnungu andítangola kaladavo, umu walota kuvapa vanaishilaeli alota kuva mwanagwe. Lola II Samuwele 7:12-14; Dimu 2:6-7. ††† Lola Kutunduvanga 28:12. Vanjelo vashindakwela na vashulukila Yakobo. Shitendo ashi shishillodya kwigwania kupagwite pakati pake nae namu Nnungu. Namomo patangola Nshuwau doni, a “vanjelo va Nnungu vakwela na vashuluka mu Mwana Wamunu,” kunkulilodya kwigwania kupagwite pakati pamwe Yesu namu Nnungu. ††† Shikukulu ashi vayuda vashikumbukila liduva lyapitile múntenga wakubyaa ashumba ding'ande dyavavéle vanaishilaeli ku Mishili kutwala kupita avabyaanga vana uti valume vatandi kuvalekwa vavamishili.

vakushenji-njuluku vâikalenge vakola madengo ave. ¹⁵ Bai Yesu akakandyanga mishasha vyadimbuu kutwala kuvakumulanga uti vanu avo apalâ paing'ande ya Nnungu pamo na ding'ombe, dingandolo; vakushenji-njuluku vo, nae dishingo dyave kumwadilanga na dimesha dyo, kupindulanga. ¹⁶ Avalâ vakushulushading'unda kuvaulila doni, "Uti vinu vyenu apa ushani-anga! Hamunatende ing'ande imwe Atata kuva yakushulushidya!" ¹⁷ Bai vakwoda vake vandíkumbukila Maandiko alalâ avaandike doni, "Dukuduku yaing'ande yako inangwoma muntima." †

Yesu ankumanyiya kaladavo yakudyuka kwake

¹⁸ Napanelo vayuda vakanjang'ula kushidoni, "Pakuva unkutenda vinu avi, napane ulota kutulodya shi-manyikilo shani?" ¹⁹ Nae kushidoni, "Bamalanga ing'ande ya Nnungu ai, nangu ndadenga mumaduva matatu kumalila." ²⁰ Vayuda kutwa kushidoni, "Ing'ande ai inditwala vyaka alubaini na sita idangeka! Napanelo wako ulota udenge mumaduva matatu bai?" ²¹ Kanji nae ing'ande yashamba, ashamba wo mili wake. ²² Napavedoni akadyuke pakati pavakupela, vakwoda vake vandíkumbukila kenga nae andítangola vinu avyo. Nadoni vanavo vandíkukulupila Maandiko na lilove lyatangwéle Yesu.

²³ Yesu pavéle pa Yelusalemu pashikukulu sha Pasa-ka, vanu voe vakone vimanyikilo vyake vyashitenda, vandíkukulupila lina lyake ²⁴ ila mwene jo hashilikulupidya vanu avo mwaa wakuvamanya shana vanu uti. ²⁵ Nae hashilota munu aumye ushuda wamunu mwaa andimanya shivéle muntima wamunu.

Inimmaikila muvalekwe kwakuwa

3 Napanelo andípagwa mpalishayo walina Nikodemu nkútawala jumo wavayuda. ² Munu aju andímuukila Yesu shilo ndamwaulila doni, "Labi, wetu tundimanya shana kenga wako apa walakadilé kwa Nnungu, gwegwe umwalimu. Vimanyikilo vyautenda wako avi, hapali munu wakuulula kutenda bila Nnungu kupagwa pepi-pepi namu nae." ³ Yesu akanjang'ula kushidoni, "Ninkukwaulila mwiu mwiu, munu akanavalekwa kwakuwa † haulula shinu kwona utawala wa Nnungu." ⁴ Nikodemu kutwala kushidoni, "Da munu alota kuvalekwa dashi ávele nang'olo? Da ankuulula kwinjila kwamwanda wambili mmunda mwanoyoke kutwala kuvalekwa?" ⁵ Yesu kunjang'ula, "Ninkukwaulila mwiu mwiu, munu akanavalekwa kwamedi na Imumu ‡ haulula kwinjila muutawala wa Nnungu. ⁶ Doni, shivalékwa kwamili, mili na shivalékwa kwa Imumu, imumu. ⁷ Haunashange mwaa wakukwaulila doni, inimmaikila muvalekwe kwakuwa. ⁸ Imepo indápunga palyutu lyoelyoe lyailota yene; wako kwigwa kunyonya kwake kanji haunamanya kwaipan-

† *Lola Dimu 69:9.* †† *Kwali: a ...akavanalekwa kavili.* ‡ *Mu Eshekieli 36:25-27, Nnungu ankulivikila kwavanentete medi akuvaaladyanga vanu mumadambi na imumu yake yakuvabadilisha ntima. Apa Yesu ankulinganianga kuvalekwa kwamedi na imumu na kuvalekwa kwakuwa. Lola 3:3.*

dukanga na kwayenda. Nimumo momo kwakula munu ávalekwa kwa Imumu."

⁹ Nikodemu akanjang'ula, "Na doni po inkuululika dashi?" ¹⁰ Yesu akanjang'ula kushidoni, "Wako umwalimu wavanaishilaeli, napane haunamanya shinu vinu avi? ¹¹ Ninkukwaulila mwiu mwiu, shatumanyite ni shatutangola, shatugwene ni shatumya ushuda kanji ushuda wetu hamunakulupila shinu. ¹² Ikava kenga nditangola vyamushilambo mwenu hamukulupidile, napane nikatangola vyakuwa mulota kukulupila dashi? ¹³ Hapali munu ákwadile kuwa ila ni aijá áalweke kuwa, Mwana Wamunu. ¹⁴ Ni kenga momo mwannyanyulidile Musha nyoka munnandi kushimbweshe †† nanae Mwana Wamunu inimmaikila anyanyuligwe ¹⁵ pakulota vanu uti vankulupila nae vavenavo shingumi shíkamalilika.

Nnungu andinagwaledya shilambo

¹⁶ "Amu ni mwanagwaladidye Nnungu shilambo, ata mpaka nae kumumya mwanagwe ávele jumo jojo pakulota uti vankulupila nae havanajaike kanji vavenavo shingumi shíkamalilika. ¹⁷ Mwaa Nnungu hantumididye mwanagwe mushilambo aukumu shilambo kanji shilambo sho shambwalegwe kwaindila yake nae. ¹⁸ Aijá ánkulupila nae hanaukumigwa shinu, aijá napane ákankulupila andyukumigwa tayali kwamwaa úkave wakukulupila lina lya Mwana wa Nnungu, mwana jo ávele jumo jojo. ¹⁹ Ukumu yo ni ai: lilangadyo lindida mushilambo kutwala vanu kunagwaledya shii kuleka lilangadyo mwaa vitendo vyave vivele vyakunyata. ²⁰ Kula munu ánatenda vyakunyata andávangedya lilangadyo na hanavandika kulilangadyo pakulota vitendo vyake vyo havinalale panda. ²¹ Napane aijá ánatenda vyaumwiu aida kulilangadyo pakulota vitendo vyake vyaneke kuva vitendo vitandéke mu Nnungu."

Ushuda unji umwe Nshuwau Wakubatisha

²² Ling'oto lyavinu avyo Yesu andyúma panjini pamo na vakwoda vake kuka mushilambo shosho sha Yudeya. Ako nae andípagwa na vanavo avapa vanu ubatisho. ²³ Nanae Nshuwau momo ku Enoni pepi na pa Salimu ashindavapa vanu ubatisho mwaa kwanavo ko wakupagwa medi oe, napane vanu vashindamuukila na vashindabatishwa. ²⁴ Doni, wakati awo Nshuwau vakanava kunjela nkalaboshi.

²⁵ Napanelo vakwoda vake Nshuwau vandítaukanan-ganavo munu jumo muyuda kwaing'ano yakulyushani-anga ushapu. ²⁶ Vanavo vandyúka ndatangola namu Nshuwau kushidoni, "Labi, ††† munu avéle namu wako

†† *Nikodemu kenga mwalimu wavanishilaeli inimmaikila amanye doni, vanu indivavaikila vavalekwe kwakuwa. Lola Ishaiya 44:3-5; Eshekieli 37:9-10.* ††† *Maandiko anji akala vandijanjedya: a ...ávele kuwa. ††† Kwamwaa waktangadikanga kwavanaishilaeli vavele kushimbweshe, Nnungu andívapa shaushanga shakulumigwa na dinyoka kanji jo mwene Nnungu andímwaulila Musha akandyange lishinamu lyainyoka akamele munnandi na anyanyulidye kushanya pakulota vanaishilaeli vakalumigwe na in-*

mwangu unji wa Yudani, waumidyeye ushuda ummalan-ganga nae, gwe, aijá apalá ankuvapa vanu ubatisho na vanu uti vankumuukila.”²⁷ Nshuwau akajang'ula kushidoni, “Munu haulula kupata shinu, shinu asho pakapatile kuwa.”²⁸ Ata mwemwe mmene ni mmashuda kwa ashilá shangutangwele, ‘Nangu apa hangunava shinu Klistu, nangu ni aijá ngútumigwe kulangalela.’²⁹ Mwene nkúlombwa ni nkúlomba. Napane mbwadigwe wapantima wankúlomba ni aijá ánannindila nkúlomba. Panamwigwa, nae andápuwanga namene mwaa wakwigwa lidi lyake. Nadoni lipuwilo lyangu ali lindiwikila popo.³⁰ Nae ni ávaikidile aanjadyeke nangu ngupungulike.

³¹ “Aijá áalakela kushanya avelé pashanya pavanu uti. Aijá wamushilambo, wamushilambo na jojo jo atangola vyamushilambo. Napane jo áalakela kuwa jo avelé pashanya pavanu uti.”³² Nae ankumya ushuda wavinu vyagwene na vyaigwite kanji hapali muni áitikila ushuda wake.³³ Aijá áitikila ushuda wake ankuntaa namakong'o kenga Nnungu ni ávenavo umwiu.³⁴ Aijá wantumididye Nnungu atangola malove ake Nnungu mwaa nae andimupa Imumu íkave shipimo.³⁵ Tata-munu ankunnagwaledya Mwana na vinu uti aninkamudya.³⁶ Aijá ánkulupila Mwana ankuva na shingumi shíkamalilika kanji aijá áita kunkukulupila Mwana, shingumi sho alota kwigwa lyatu na shitundi shake Nnungu shinkupagwa pamili pake.”

Yesu na nkongwe nshamaliya

4 Napanelo Yesu akaigwe kenga mapalishayo vandígwa doni, Yesu ankuvatenda vanu kuva vakwoda vake na kuvapa ubatisho kumpunda Nshuwau,² ata ikava kenga jo mwene Yesu hashivapa vanu ubatisho ila vakwoda vake,³ bai nae andyúma pa Yudeya kuujila kavili ku Galileya.

⁴ Mushimwanda shake inímmaikila apitile ku Shamaliya.⁵ Ko ku Shamaliya ko ankwinjila palikaja lyavashema Shikali livéle pepi na palyutu lyajawíle Yakobo kumupa mwanamunu Yoshe.⁶ Popo po shindípagwa shima shimwe Yakobo. Napanelo kwodamwaa Yesu andídabadabanga na shimwanda, andíikala pepi na pashima asho. Wakati wene uvele waliduva pamuti.⁷ Popo po ankwida nkongwe nshamaliya ndateka medi, Yesu kumwaulila doni, “Ngupa medi ngukumbile,”⁸ vakwoda vake muwakati wene wo vaukile kunjini ndashuma shakulya.⁹ Napanelo aijá nkongwe nshamaliya aijá kumudya, “Ivelé dashi wako úvele umuyuda kungujugwa nangu medi ninkongwe nshamaliya?” Mwaa havashilyanila vayuda na vashamaliya.¹⁰ Yesu akanjang'ula kushidoni, “Wako leka úmanyite inudyo ya Nnungu na úmmanyite aijá átangola doni, ‘Ngupa medi ngukumbile,’ ukaninjugwa nae na nae akandikupa medi ashingumi.”¹¹ Nkongwe aijá do, “Nang'olo, wako hauvé shombo shakutakela na shima shindikadaleka, napane medi ashingumi lo, ulota kupata kwashi?”¹² Da wako po únang'olo

yoka, vakalola, vapone. *Lola Ishabu 21:9. ††† a Labini lilove lyashilamaiku; livé na mana a mwilimu.*

kumpunda nakulugwetu Yakobo átupele muto au wakumbidile mwene, vanavake pamo na vanyama vake?”

¹³ Yesu akanjang'ula kushidoni, “Kula muni álota kukumbila medi ala inankola kavili inyota”¹⁴ kanji aijá álota kukumbila medi angulota kumupa nangu mwiko hainkola shinu kavili inyota. Medi angulota kumupa nangu lo andatadya nkati mwake mupandukange libububu lyamedi akumukanga auka kushingumi shíkamalilika.”¹⁵ Nkongwe kutwa kushidoni, “Bai nang'olo ngupa medi lolo lo kwambangidya hainangukole kavili inyota na hangunaide kavili apa ndateka medi.”¹⁶ Yesu kutwala kushidoni, “Wena ukansheme ntwavo, wide.”¹⁷ Nkongwe akanjang'ula kushidoni, “Hanguve ntwangu.” Yesu do, “Unditangola shana paulivalangenge kenga ‘Hanguve ntwangu,’¹⁸ mwaa undívanavo vatavako mwanu na aju waunamanavo ambi apa, nanae hanava ntwavo. Mwiu, unditangola shinu shiu.”

¹⁹ Nkongwe kutwala kushidoni, “Nang'olo ninkukwona wako kuva unkúlava.”²⁰ Vanakuluvetu wetu vashilipudya palishinga ali. Mwenu napane muushidoni, palyutu pavaikidíle kulipudidya ni pa Yelusalemu.”²¹ Yesu kushidoni, “Ajala ngukulupila, unkwida wakati wamulota kulipudya kwa Tatamunu i palishinga ali na ata ku Yelusalemu.”²² Mwenu po munkulipudya kwa aijá wamukammanyite; wetu tunkulipudya kwa aijá watummanyite mwaa kwambola kunkwalakela kwavayuda.²³ Kanji napane unkuwika wakati na wakati wene wo uwikile wavalota vakulipudya vai kulipudya kumwe Tatamunu mwimumu na kwaumwiu. Ni vovo vavalambela Tatamunu valipudye kwake.²⁴ Nnungu ni imumu; avalá valipúdyá kwake vandivaikila valipudye mwimumu na kwaumwiu.”²⁵ Nkongwe kushidoni, “Nangu ndimanya kenga Masiya ankwida, aijá wavanshema Klistu. Pawika andatuvalangangila vinu uti.”²⁶ Yesu, “Ni nene nangu, ngútangola namu wako.”

²⁷ Bai muwakati wowo kutwala kuwika vakwoda vake. Vanavo vandíshanga namene kwamwaa wakumwona atangola na nkongwe kanji hapagwíte wakumudya doni, “Da ulambela nyamani?” kwali, “Mwaa shani unkuatangola namu nae?”²⁸ Nkongwe jo kuleka shilongo shake popo kutwala kuka kulikaja, koko ko andívaulila vanu doni,²⁹ “Ida munnole muni ánguvalangenge vinu uti vyangutandile kanji kwali Klistu?”³⁰ Vanu vandyúma palikaja apalá kumuukila koko kwavéle.

³¹ Napanelo pavishitandeka avyo vakwoda vake vashinankanyilidya, “Labi, lyaa!”³² Kanji Yesu kushidoni, “Nangu ninkuvanavo shakulya shamukamanyite mwenu.”³³ Vakwoda vake kutwa kuudyania, “Da apali muni áidile ndamupa shakulya?”³⁴ Yesu kuvaulila doni, “Shakulya shangu ni kutandedya malotelo ake aijá ángutumididye na kulinganianga shimadengo shake.”³⁵ Da shi vanu vandátangola doni, ‘Vibakidile myedi nsheshe kuwika wakati wamapuno?’ Napane mwenu, nangu ninkumwaulila doni, ng'amula mevo

enu, mulole mmagwelu mo! Vinu vinditandeka pakulota kupunigwa. ³⁶ Ata mpaka ambi apa ápuna anku-pata nshala wake na ankukushania mapuno áuka kushingumi shíkamalilika kwambangidya ápanda na ápuna uti kwaunapamo vave na lipuwilo. ³⁷ Kwaing'ano ai shitangaléka sho shiu, 'Nkúpanda junji na nkúpuna junji.' ³⁸ Nangu nintumidya mwenu mukapune shamukaumidile lyuduku; vanji ni vaudukidíle kutwala mwenu kupata paida yalyuduku lyave."

³⁹ Bai vashamaliya voe vapalikaja alyo vanínkulupila kwamwaa waushuda waumídye nkongwe doni, "Aninguvalanganga vinu uti vyangutandile." ⁴⁰ Napanelo pavamuukidile Yesu vashamaliya avalá, vanínjugwa vaikalenavo, nae kwikala kwanavo maduva mavili ⁴¹ kutwala vanji voe kunkulupila kwamwaa wamalove ake. ⁴² Vanavo vanímwaulila nkongwe kushidoni, "Munu aju wetu hatunankulupila shinu kwamwaa wamalove ako wako mwaa ata wewe tuvene tundimwigwa na tunkumanya kenga aju mwiu ni Mwamboli wamushilambo."

Likulupililo lyananangaledi ndyoko umwe umu

⁴³ Akapite maduva mavili alalá, Yesu andyúma palyutu alyo kutwala kuukanavo mushu shimwanda shake shakuka ku Galileya. ⁴⁴ Napane jo mwene Yesu andyúmya ushuda kenga nkúlava hanaishimika mushilambo shake. ⁴⁵ Napavedoni akawike ku Galileya, vagalileya vanímpwashalela kanji kwamwaa wakwona vinu vyatandíle ku Yelusalemu pashikukulu kwoda navanavo po pashikukulu po vandípagwa.

⁴⁶ Yesu napanelo kutwala kuka kavili ku Kanaa ya ku Galileya kulyutu lyajalulénge medi kuva vinyu. Koko ko andípagwa ndyoko jumo umwe umu e avénavo mwana nnwele ku Kapalanaumu. ⁴⁷ Jojo jo akaigwe kenga Yesu andiwika pa Galileya aalakela ku Yudeya, anímuukila na anínkanyilidya auke akamponie mwanagwe mwaa mwana jo avele nnwele matapata.

⁴⁸ Yesu kutwala kushidoni, "Yani mwenu apa mukanona vimanyikilo na vyakutikinikanga mwiko hamunakulupila." ⁴⁹ Nanangaledi jo kushidoni, "Nang'olo, tuke mwanangu akanava kupela." ⁵⁰ Yesu do, "Wena! Mwanavo jo mumi," kutwala munu aijá kukulupila lilove lyatangwéle Yesu, nae kuka.

⁵¹ Pashaalela auka, andíkadyania na vatumika vake shing'ati indila vamwidila kutwala vanavo kumwaulila doni, "Mwanavo mumi." ⁵² Nae kuvaudya, "Da aponilé wakati shani?" Vanavo do, "Shilwele aponilé lido muwakati wasasaba yamui." ⁵³ Bai tatamunu andíkumbukilinneu kenga uvele wakati wowo wasasaba wamwaulidile Yesu kushidoni, "Mwanavo mumi." Nadoni nae pamo na vanu uti vapaing'ande pake kutwala kukulupila. ⁵⁴ Ashi ni shimanyikilo shambili shatandíle Yesu, shosho sho atandile paujite ku Yudeya kuka ku Galileya.

Yesu ankumponia wakudidimanga madodo

5 Ling'oto lyavinu avyo, shindípagwa shikukulu shavayuda na Yesu andyámboka kuka ku Yelusalemu. ² Napanelo ko ku Yelusalemu ko, pepi na Nnango Wawangandolo, lindípagwa litangi likumene, mushibalaniya vashishema Beteshada. Nnyenje mwake litangi lyolyo lyo, vindípagwa vitala mwanu. ³ Muvitala vyovyvo vyo, vashindalalanga valwele voe, vakuputala mevo, vakulamala na wakudidimanga madodo. ⁴ ⁵ Napanelo popo po, andípagwa munu jumo wakudidimanga madodo auvauvénge vyaka salasi-ni na nane. ⁶ Yesu akamwone àlele na nae àmanyite kenga munu ajo andyuvauvanga muwakati woe, andyúdyá kushidoni, "Da unkulota upone?" ⁷ Wakudidimanga madodo jo kushidoni, "Nang'olo, hanguvé munu wakungutwala kungujela mmedi patindimbukanga. Kula wakati wangulingangila nangu kwinjila mmedi ninkodya junji àinjidile." ⁸ Yesu kushidoni, "Takataka, twala litandiko lyako utwale mwanda uke!" ⁹ Muwakati wowo munu jo kuponenneu na kutwala litandiko lyake kuka.

Liduva lyene lyo livele liduva lyakupumula. ¹⁰ Vayuda napane vanímwaulila aijá munu wavamponídye kushidoni, "Nelo liduva lyakupumula, nkati mulilamulo haivaikidile wako kunyukata litandiko lyo." ¹¹ Munu jo kushidoni, "Munu ánguponidye jo ni ángwaulidile doni, 'Nyukata litandiko lyako uke.'" ¹² Vayuda kumudya, "Da munu ajo ákwaulidile wako doni, 'Twala litandiko lyako uke,' ni nyani?" ¹³ Munu wakupona aijá kanji nae hashimanya nyani ámponidye mwaa Yesu andítivaniva mulyutu alyo kutwala kuma kwamwaa wakupagwa imbumba yoe yavanu.

¹⁴ Ling'oto lya apo, Yesu anínkodya munu wamponídye aijá mwing'ande ya Nnungu kutwala kumwaulila doni, "Wako! Wako apa undipona, nadoni haunatege kavili pakulota hashinakuumililile shakupunda ashi." ¹⁵ Bai munu aijá andyúka ndavavalangangila vayuda kenga, Yesu ni ámponidye.

Yesu ankulilinganianga na Nnungu

¹⁶ Napavedoni vayuda vandítunduvanga kumpapata Yesu mwaa ashindatenda vinu avyo muliduva lyakupumula. ¹⁷ Napane Yesu kuvaulila doni, "Atata ankukola madengo mpaka ambi, nadoni nanangu momo ninkukola." ¹⁸ Bai kwamwaa wamalove ala vayuda vashindamamodya kulambela mwakummalididya Yesu, i kwamwaa wakutimbanga liduva lyakupumula

† Mumaandiko akala, malove aimbandi yambili yanshitali wa 3 na anshitali wa 4, hapali. Kanji mumaandiko anji aatike andyan-jedyeka malove ala: a (3) ...valindila medi atindimbukange. (4) Muwakati unji múntenga wa Nnungu ashindashuluka kwida ndatindimbulanga medi mulitangi. Muwakati wowo, nnwele áshilitandya kwinjila mmedi mo ling'oto lyakutindimbukanga, ashindaponnenne shilwele shoeshoe shashivanavo. †† Mulilamulo lyake Musha kushindalaeka munu kukola shimadengo shoeshoe ata pashikavele shidikidiki muliduva lyakupumula. Ni liduva lyalyapulidile mwene Nnungu kuva lyake mwene. Lola Kuma 34:21.

gweka kanji namomo yakunshema Nnungu tatake alilinganianga jo mwene na Nnungu.

¹⁹ Yesu akavajang'ula kushidoni, "Nangu ninkumwaulila mwiu mwiu doni, Mwana hanaulula kutenda shinu shoeshoe shakubuni jo mwene ila ashilá shamwona Tatake atenda. Kula shinu shatenda Tata-munu nanae Mwana ankutenda shosho. ²⁰ Mwaa Tata-munu ankunnagwaledya Mwanamunu na ankunnodya kula shinu shatenda jo mwene, ata mpaka anannodya vinu vyakupunda avi pakulota mwenu po mushange. ²¹ Doni, mo mwavadyuwidya Tatamunu vakupela kuvapa shingumi, nimumo momo avalá vávalota Mwana, ankuvapa shingumi. ²² Ata jo Tatamunu hanamuukumu muni ila ukumu uti ankamudidye Mwana ²³ kwambangidya vanu uti vamwishimu Mwana kenga mwavamwishimila Tatamunu. Akamwishimu Mwana hanamwishimu shinu Tatamunu, aijá ántumididye.

²⁴ "Nangu ninkumwaulila mwiu mwiu doni, aijá áig-wilila lilove lyangu na kunkulupila aijá ángutumididye, ankuvanavo shingumi shíkamalilika. Muni aju hanaukumigwa shinu, tayali vandimumya mukupela kummika mushingumi. ²⁵ Nangu ninkumwaulila mwiu mwiu doni, wakati unkuwika na wakati wene ni wowo au wavalota vakupela kwigwa lidi lya Mwana wa Nnungu na avalá vaigwa vo, vandanama. ²⁶ Doni, mo mwavalelenavo Atata shingumi shimpandukánga jo mwene, anintadya Mwanamunu momo avenavo shingumi shimpandukánga jo mwene ²⁷ na andimupa madalaka akuukumu mwaa nae ni Mwana Wamunu.

²⁸ "Malove ala mwenu hamunashange mwaa unkwida wakati wavalota vanu uti vavéle muvyonga kwigwa lidi lyake ²⁹ kutwala kuma; avalá vatandadídye wambone mukudyuka kwashingumi, avalá vatan-dadídye vyakunyata mukudyuka kwaukumu.

Yesu ankwamba yaushuda wake

³⁰ "Nangu hangunaulula kutenda shinu shoeshoe shakubuni nene nimwene. Mwangwigwidya nangu ni mwanguukumila na kuukumu kwangu kunkuvanavo shaliya mwaa hangunatenda shinu mwangulatela nimwene ila ninkutenda mwalatela aijá ángutumi-didye.

³¹ "Ikava kenga nangu apa ninkulivalanganga nene nimwene, bai ushuda au haunava wiu. ³² Napane kanji apali junji ánguvalanganga nangu na nangu ninku-manyana kenga ushuda waumya nae anguvalanganga nangu, wiu. ³³ Mwenu mundivatuma vanu kumwe Nshuwau, nae kutwala kumya ushuda waumwui.

³⁴ Nangu napane hangunagambela shinu ushuda wamunu ila vinu avi ninkutangola kwambangidya mwenu mwambolegwe. ³⁵ Nae jo avele ikalaboi ishikalela na ishikangadya; mwenu muwakati padyoko, mundyá-muwa kupuwanga mulilangadyo alyo. ³⁶ Kanji napane ushuda wangu nangu unkuwunda aulá umwe Nshuwau mwaa madengo angupele Atata ngumalile, madengo ala angutenda ankunguvalanganga kenga nditumigwa namu Atata. ³⁷ Atata ángutumididye jo, nae andyuma ushuda anguvalanganga nangu.

Mwenu ata lidi lyake hamwigwite, ata mwavalalele mo, hamumwanite ³⁸ na lilove lyake nae halinaikala shinu mmitima myenu mwaa aijá wantumididye, jojo aju, mwenu hamunkulupidile. ³⁹ Mwenu munkulambela mumaandiko mwaa nkati mwake mo mwona doni mundivanavo shingumi shíkamalilika; lolo lo ankunguumidya nangu ushuda, ⁴⁰ napane mwenu munkwita kwida kwangu nangu pakulota shingumi sho, mupate.

⁴¹ "Nangu lishangelo kwavanu nagambela shinu ⁴² kanji nangu ninkummanyana shana mwenu kenga linagwaledyo kwa Nnungu hamuvenavo. ⁴³ Nangu ng-wídile palina limwe Atata, hamunangupwashalela shinu. Akaida junji palina lyake jo mwene, ajo munam-pwashalela. ⁴⁴ Mwenu mulota kukulupila dashi ikava kenga munkuupana lishangelo shivenevene na lishangelo lyalakéla kwa Nnungu ávele jumo jojo, † hamunalambela shinu?

⁴⁵ "Hamunakumbukile kenga nangu nanshitaki kumwe Atata. Apali jumo ánshitaki mwenu, ni jo Musha kwamuvikile mwenu lilindilililo. ⁴⁶ Mwenu leka munkulupidile Musha, mukaningukulupila nangu momo mwaa nae andyandika vingwamba nangu. ⁴⁷ Napane ikava kenga hamunakulupila shinu vyandike Musha, mulota kukulupila dashi malove angu?"

Yesu ankulisha imbumba yavanu dyalupu mwanu

Mateu 14:13-21; Malukushi 6:30-44; Lukashi 9:10-17

6 Ling'oto lyavinu avyo Yesu andyámboka litanda lya Galileya, kwali lya Tibeliyade, kuka mwangu unji ² kutwala imbumba yavanu kupita imwoda mwaa vashindalaledya vimanyikilo vyashitenda muvalwele. ³ Yesu kutwala kukwela palishinga pamo na vakwoda vake ndaikalanga. ⁴ Napanelo shikukulu sha Pasaka shavayuda shishindavandikanga. ⁵ Yesu pamyangamyenge akona imbumba yavanu immandika nae kumudya Pilipo, "Tushuma kwashi magung'u akuvatosha vanu ava valye?" ⁶ Andímudya davo anninga ila mwene ámanyite avi shashilota kutenda. ⁷ Pilipo kujang'ula doni, "Ata magung'u adinali † dimiya mbili hayulukika kuvatosha vanu ava, kula muni apate kadonji." ⁸ Nkwóda junji Andaleya, nung'une Simoni Patulu akaashidoni, ⁹ "Apali apa nremba jumo ávenavo magung'u mwanu autani na dyomba mbili. Kanji na vinu avi vilota kuntosha nyani?"

¹⁰ Yesu kutwala kushidoni, "Valamulile vanu vaikalange." Palyutu lyolyo lyo undípagwa ukoka woe namene, bai vanu uti vandíikalanga. Pakati pavanu vovo vo, vandípagwa valume vakuwikila shikonda shadyalupu mwanu doni. ¹¹ Yesu akatwala magung'u alalá kunnambwalela Nnungu, kuvajavila avalá vaikaléngé na dyomba adilá kutandela momo kwodana na kenga mo mwashilatela kula muni. ¹² Bai

† *Lishangelo ali ni litangaléka mwinamba 1:14; ni a "lishangelo lyakuva Mwana jumo jojo wakwalakela kwa Tatamunu. "Yesu patang-wele kupana lishangelo shivenevene, ashivamba vanavo váshivikila kuntima shimbili kuliko lishangelo lyalakéla kumwe Nnungu. †† Dinali imo ni njuluku witikanánga kunnipa muni akakola madengo liduva limo mulishamba.*

vanu vakaikutange, Yesu andívaulila vakwoda vake doni, “Kushania makombo uti, hamunaleke ata ingalamwamwa ijaika.”¹³ Vakakushanie makombo avalakile mumagung'u mwanu alalá, vandyúmbadya makalala kumi na mbili.

¹⁴ Napanelo vanu pavagwene shimanyikilo shatandile Yesu vandítangola kushidoni, “Aju mwiu ni jo nkúlava watushinnindila aide mushilambo.”¹⁵ Yesu akamanye kenga vankwida nantwala kwadimongo vauke vakankamudye shiumu, nae andítila kavili kuka gweka kumashinga.

Yesu ankuwena pashanya medi

Mateu 14:22-36; Malukushi 6:45-52

¹⁶ Napanelo pauwikile wakati wayalyulo, vakwoda vake vandyálela mpaka kulitanda.¹⁷ Vakainjila mwingalava kutwala mwanda kulodya ku Kapalanau-mu. Muwakati awo liduva lindídimba na Yesu avele akanava kuwika mulyutu alyo.¹⁸ Napanelo mo mulitanda mo, andílípuka mawimbi kwamwaa waimepo íshipunga na dimongo.¹⁹ Bai vanavo vakatukushe na ding'wau shitamba shavyuluta mwanu kwali sita doni, vanímwona Yesu awena pashanya medi avandikila paingalava kutwala vanavo kujopa namene.²⁰ Yesu napanane kuvaulila kushidoni, “Ni nangu, hamunajope!”²¹ Bai vanavo vanímpwashalela mwingalava amulá na muwakati wowo ingalava indíwikinneu kumwangu kwavashuka.

Yesu ni Ligung'u Lyashingumi

²² Palyamba lyake imbumba yavanu ibakidíle mwangu unji walitanda aulá vandímanya kenga palyutu alyo ipagwite ingalava imo bai na pavakwadile vakwoda vake mwingalava ayo kuka, Yesu haukile pamo na vanavo.²³ Napanelo dingalava dinji dyakwalalakela ku Tibeliyade dindívandika palyutu lyavavéle venentete na lyavalyaladíle magung'u ling'oto limwe *UMU* kunnambwalela Nnungu.²⁴ Bai imbumba yavanu ikone kenga Yesu pamo na vakwoda vake havapagwite mulyutu alyo, vanavo vandíinjilanga mudingalava kuka ku Kapalanau mu vannambela.

²⁵ Napanelo vanavo vakamwone mwangu unji walitanda, vandímudya, “Labi, da wako akuno ko widilé duvani?”²⁶ Yesu akavajang'ula kushidoni, “Nangu ninkumwaulila mwiu mwiu doni, mwenu munkungulambela i kwamwaa wakwona vimanyikilo ila mwaa wakulya magung'u mpaka kwikuta.”²⁷ Hamunakole madengo kwamwaa washakulya shúnda kanji kola kwamwaa washakulya shipágwa mukwing'a shingumi shíkamalilika. Shakulya ashó Mwana Wamunu andamupa mwaa jojo jo, Nnungu Atata anintaa namakong'o.”²⁸ Vanavo napane kumudya, “Napanelo wetu tutende nyamani pakulota tutandedye shimadengo sha Nnungu?”²⁹ Yesu akavajang'ula kushidoni, “Shimadengo shalota Nnungu munkalele ni kunkulupila aijá wantumididye.”

† *Lola Kumbukumbu 18:15.*

³⁰ Vanavo kutwala kumudya, “Wako po ulota kutenda shimanyikilo shani pakulota wetu tukukulupile? Ulota kutenda nyamani?”³¹ Vanakuluvetu, shakulya shamanaa[†] vashindalya kushimbweshe kwakulinganana kenga mwavaandikidile doni, ‘Ligung'u lyakwalakela kuwa, andivapa valye.’”

³² Yesu kutwala kuvaulila doni, “Ninkumwaulila mwiu mwiu doni, Musha i ámpele mwenu ligung'u lyakwalakela kuwa kanji Atata ni ámpa mwenu ligung'u liu lyakwalakela kuwa³³ mwaa ligung'u lyake Nnungu ni aijá áalakadile kuwa kwing'a shilambo shingumi.”³⁴ Vanavo kutwala kumwaulila, “Nang'olo, ligung'u lyo, bai twing'a ngwengwe!”

³⁵ Yesu kushidoni, “Nangu ni Ligung'u Lyashingumi. Aijá áida kwangu, hainkola shinu kavili indala na aijá ángukulupila nangu, mwiko hainkola shinu kavili inyota.³⁶ Kanji napane ndimwaulila doni, mwenu muningwona na hamunakulupila shinu.³⁷ Kula munu wangupa Atata andaida kwangu na aijá áida kwangu nangu, mwiko haninkumulanga.³⁸ Nidoni, ngwaleké kuwa i kwida ndatandedya malotelo angu ila ngwidilé ndatandedya malotelo ake aijá ángutumididye.³⁹ Napanelo malotelo amwe aijá ángutumididye ni ala, vanu uti vangupele, hanapagwe ata jumo wakungujaika kanji muliduva lyamwisho, ndivadyuwe.⁴⁰ Mwaa malotelo amwe Atata ni ala, kula munu ámwona Mwana na kunkulupila apate shingumi shíkamalilika na nangu nandyuwa muliduva lyamwisho.”

⁴¹ Napanelo vayuda vaníntangadikanga shintimatima mwaa wakutangola nae doni, “Nangu ni ligung'u lyalakadíle kuwa.”⁴² Vanavo vandítangola vaashidoni, “Da aju i Yesu mwanagwe Yoshe? Tatake na anyoke, wetu tundivamanya. Napanelo atangola dashi doni, ‘Ngwaleké kuwa?’”⁴³ Yesu akavajang'ula kushidoni, “Hamunatangole shivenevene mungutangadikanga nangu!⁴⁴ Hapali munu wakuulula kwida kwangu bila Atata ángutumididye kunnangalalela aide kwangu. Nangu munu ajo, nandyuwa muliduva lyamwisho.

⁴⁵ Mumabuku avakulava vandyandika doni, ‘Vanavo uti vandava vakupundishigwa na Nnungu.’[‡] Nadoni kula munu ámwigwite Atata na álipundishidye kwake nae ankwiwa kwangu nangu.⁴⁶ I kenga apali munu ángwene Tatamunu ila aijá áaleke kwa Nnungu, aju ni ángwene Tatamunu.⁴⁷ Nangu ninkumwaulila mwiu mwiu doni, aijá ákulupila ankuvanavo shingumi shíkamalilika.⁴⁸ Nangu ni ligung'u lyashingumi.⁴⁹ Lo manaa alalá, vanakuluvenu vandilya kushimbweshe kutwala kupela.⁵⁰ Ali ni ligung'u lyalóka kuwa kwambangidya woewoe alye na hanapele.⁵¹ Nangu ni ligung'u lingu-mi lyalakadíle kuwa. Munu woewoe akalya ligung'u ali andanama ngwengwe. Ligung'u lyene lyo ni wo mili wangu au wangulota kujaula pakulota shilambo shipate shingumi.”

⁵² Napanelo vayuda vandítunduvanga kutaukananga shivenevene vaashidoni, “Ilota kuwa dashi nae kutupa

†† *Manaa ni shakulya shavapéle Nnungu vanaishilaeli kushimbweshe shavailile muvyaka alubaini. Lola Kuma 16:4, 13-15, 31. ‡ Lola Ishaiya 54:13.*

mili wake tumamene?" ⁵³ Yesu kutwala kuvaulila doni, "Ninkumwaulila mwiu mwiu doni, mwenu mukanama-mena mili wa Mwana Wamunu na kukumbila myadi vyake hamuvanavo shingumi nkati mwenu. ⁵⁴ Aijá álota kumamena mili wangu na kukumbila myadi vyangu ankuvanavo shingumi shíkamalilika. Nangu munu ajo, nandyuwa muliduva lyamwisho. ⁵⁵ Mwaa mili wangu ni shakulya shiu na myadi vyangu ni shakukumbila shiu. ⁵⁶ Aijá ámamena mili wangu na kukumbila myadi vyangu, ajo ankunama nkati mwangu na nangu kunama nkati mwake. ⁵⁷ Ni kenga momo Atata mumi aningutumidya na nangu ninkunama kwamwaa wake nae, nimumo momo aijá ángumame-na nangu, ajo andanama kwamwaa wangu nangu. ⁵⁸ Mwenu! Ali ni ligung'u lyalakadile kuwa. I kenga mwavalyalalele vanakuluvenu kutwala kupela; aijá álya ligung'u ali andanama ngwengwe."

⁵⁹ Vinu avi Yesu atangwele ku Kapalanaumu apundisha mushitala shakulipudidya.

Malove amwe Yesu ni shingumi shíkamalilika

⁶⁰ Napanelo vakwoda vake voe vakaigwe vinu avyo vandítangola kushidoni, "Lilove ali lindikamadyanga. Alota kuulula nyani kulyunga ntima kwigwilila?" ⁶¹ Yesu amanya shintimatima kenga vakwoda vake vankutan-gadikanga kwamwaa wavinu avyo, andívaudyá, "Da vinu avi vinkunyatila? ⁶² Ilota kuva dashi mukamwona Mwana Wamunu akwela auka kulyutu lyavéle patandi? ⁶³ Imumu ni átadya shinu shivenavo shingumi, mili hashipali shatenda. Malove animwaulidile ni imumu na ni shingumi. ⁶⁴ Kanji vapali vanu pakati penu vákakulupila." Yesu andívamanya tangu kunantandi avalá vákakulupila na kummanya aijá wakunnimya nae ⁶⁵ kutwala kushidoni, "Ni ashi shitadidyé nangu nimwaulile mwenu doni, hapali wakuulula kwida kwangu Atata akampele litala."

⁶⁶ Kutunduvangila apo vakwoda vake voe vandyújila kunyuma, havashimwoda kavili. ⁶⁷ Napanelo Yesu andívaudyá avalá kumi na mbili kushidoni, "Da namwenu momo mulota mungwambukange?" ⁶⁸ Simoni Patulu kutwala kunjang'ula aashidoni, "Nang'olo, wetu tuka kumwe nyani? Wako ni úvenavo malove ashingumi shíkamalilika. ⁶⁹ Wetu tundikulupila na tundimanya kenga wako ni Wakwilimiyanga wake Nnungu." ⁷⁰ Yesu kuvajang'ula kushidoni, "Da nangu hanintandwele mwenu kumi na mbili? Bai munu jumo pakati penu ankuva Ndamoni." ⁷¹ Yesu pashitangola davo ashimwamba Yudashi mwanagwe Simoni Shikaliyote mwaa jojo jo, avele jumo pakati pa avalá kumi na mbili, ni jojo akaukile nannimya Yesu mushumwake.

Yesu ankuka ku Shikukulu Shamakuta

7 Ling'oto lyavinu avyo Yesu ashipita awena mumakaja a ku Galileya bai. Nae hashilota kupita awena mumakaja a ku Yudeya mwaa vayuda vashindalambela dindila dyakulota kummalididya. ² Napane-

lo Shikukulu Shamakuta [†] shavayuda shishinda-vandikanga ³ kutwala vanung'unuvake kumwaulila doni, "Twala mwanda uke ku Yudeya pakulota vakwoda vako vone shimadengo shako shautenda. ⁴ Hapali ánatenda vinu kwashipii ikava kenga ankulota amanyike ngala. Napane ikava kenga unkutenda vinu avi, bai kalilodye kwashilambo." ⁵ Mwenu, ata vo vanung'unuvake ava, havashinkulupila.

⁶ Yesu napane kuvaulila doni, "Isaa yangu hainava kunguwikila ila mwenu isaa yenu yakutenda vyenu ngwengwe ivelé tayali. ⁷ Shilambo, mwenu mwiko hashimmangedya ila nangu shinkunguvangedya mwaa nangu ninkumya ushuda nguvalanganga kenga vitendo vyake, vindinyata. ⁸ Wena mwenu po kushikukulu ko. Nangu apa, kushikukulu ashi, hanguka mwaa wakati wangu haunava kunguwikila." ⁹ Bai nae akatangole malove alo andíkala ku Galileya.

¹⁰ Napane vanung'unuvake vakauke kushikulu ko, nanae andyúka kanji haukile ngala, aukile shiipiipi. ¹¹ Po pashikukulu po, vananangaledi vavayuda vashinannambela Yesu vaashidoni, "Da munu wene avelé kwashi?" ¹² Pakati paimbumba yavanu andípag-wa manyinyi oe. Vanji vashishidoni, "Munu aju, wambone." Vanji do, "Ata padyoko, aju ankuvaashadyanga venentete." ¹³ Kanji napane hapali áshitangola ngala mwaa wakuvajopa vananangaledi vavayuda.

Yesu ankupundisha ngala mwing'ande ya Nnungu

¹⁴ Napanelo shikukulu shivele shing'ati, Yesu andíinji-la mulugwani lwaing'ande ya Nnungu kutwala kutunduvanga kupundisha. ¹⁵ Bai vayuda vandíshanga vaashidoni, "Munu aju amanyité dashi Maandiko ákapundishigwe?" ¹⁶ Yesu akavajang'ula kushidoni, "Mapundisho ángumya nangu, hanava shinu angu nimwene; amwe aijá ángutumididyé. ¹⁷ Munu woewoe akalota kutandedya malotelo ake jo mwene, andamanya kenga mapundisho ala, a Nnungu kwali ninkutangola yangu nimwene. ¹⁸ Munu ánantangola yake jo mwene, alambela alipatile lishangelo jo mwene kanji aijá ánalambela lishangelo kwa aijá ántumididyé, aju ni munu waumwui na jojo jo nkati mwake, ushwang'a haupali. ¹⁹ Da mwenu Musha hampele Lilamulo? Pakati penu Lilamulo alyo, hapali ata jumo átandedya. Mwaa shani munkulota mungumalidya?"

²⁰ Venentete kutwala kushidoni, "Wako majini andikudulumbuwa! Da wakwashi apa álota kuku-malidya?" ²¹ Yesu akavajang'ula kushidoni, "Nangu ngutandilé lidengo limo kutwala mwenu kushanga. ²² Musha andyumya lilamulo lyalikumbi, ^{††} ata ikava kenga lilamulo ali halyalakadile kwake nae, lyaleke

[†] Shikukulu ashi shitandeka vikapita myedi sita ling'oto lya Pasaka yavayuda, yani mumwedi watisa kwali wakumi na shishitwala maduva nane. Ni shikukulu shavashidanganga makuta vayuda kukondya vyepo vyavinyu na vyepo vyavanakandyanga mauta akulya ling'oto lyakupuna. Lola Valawi 23:33-37. ^{††} Kwali: a Ni mwaa au utadidyé Musha aumye lilamulo lyalikumbi...

kwavanyakala. Na kwamwaa au mwenu munkunku-mula munu likumbi muliduva lyakupumula. †²³ Ikava kenga munkunkumula mwana likumbi muliduva lyakupumula pakulota Lilamulo lyake Musha halinatimbikange, mwaa shani munkunguvikila shitundi mwaa wakumponia nangu munu mili wake uti muliduva lyakupumula? †²⁴ Leka kuukumu kwakupamapama kanji ukumu mutumila ishaliya."

²⁵ Vayelusalemu vanji kutwala kushidoni, "Da aju i jo-jo wavannambela vammalidye? †²⁶ Alo! I aju apa átangola ngala, vanavo me havanatangola shinu? Da vakutawala vankumanya kenga munu aju mwiu ni jo Klistu? †²⁷ Kanji aju wetu tunimanya kwalakadile. Napane Klistu jo, palota kwida hapali munu álota kumanya kwalakela."

²⁸ Napanelo Yesu apundisha mwing'ande ya Nnungu, andítangola pashanya po, "Elo, mwenu muningumanya na kwetu mundimanya. Kanji nangu hangubunidye nimwene kwida akuno ila aijá ángutumididye ni waumwiu. Mwenu nae hamummanyite, †²⁹ napane nangu nimanya mwaa ngwalakadilé kwake na jojo ni ángutumididye." †³⁰ Vanavo napane kulota vankamule kanji hapali alyalavéke kundabunya mwaa wakati wake uvele ukanava kuwika. †³¹ Ata ivé davo, vanu voe pakati paimbumba vaníkulupila vaashidoni, "Da na Klistu palota kwida po, andalodya vimanyikilo vinji vyakupunda vyatenda aju avi?"

³² Napanelo mapalishayo vakaigwe imbumba ing'ung'ulanga vantambulanga Yesu, vanavo pamo na vanang'olo vavakulungalalela-shadaka vandívatuma vakushunga vauke vakankamule. †³³ Yesu kutwala kuvaulila doni, "Ndapagwa kavili namu mwenu muwakati padyoko, kutwala apo ndauma kuujila kumwe aijá ángutumididye. †³⁴ Mwenu munangulambela kanji hamungupata na apalá pangulota kupagwa nangu, mwenu po hamuulula kwida." †³⁵ Venentete kutwala kudyania shivenevene, "Da munu aju alota kuka kwashi kwatukalota wetu kumpata ko? Alota kuka kwavayuda vavé kwavamidi ndavapundisha vamidi? †³⁶ Amba nyamani patangola doni, 'Munangulambela kanji hamungupata na apalá pangulota kupagwa nangu mwenu po, hamuulula kwida?'"

³⁷ Napanelo muliduva lyashidududu, liduva likumene lyakumalilanga shikukulu, Yesu andítakatuka kwimila kutwala kutangola pashanya po aashidoni, "Akapagwa ínkadile inyota, aide kwangu akumbile. †³⁸ Aijá ángukulupila nangu, munu ajo Maandiko ankummalanganga doni, 'Muntima mwake dindapandukanga dyundi dyamedi ashingumi.' " †³⁹ Napane nae ashimwamba Imumu áshilota vampate avalá

† *Lilamulo lishilateka mwana akumuligwe liduva lyanane. Napane pakulota halinatimbikange lilamulo lyo, vashinankumula mwana muliduva lyakupumula ikava kenga liikidilé popo. †† Shikukulu ashi shamakuta, vayuda vashikumbukila magung'u na medi avapéle Nnungu kushimbweshé. Lola kushwali kwavenentete kwavashwalidye muwakati washikukulu ashi shamakuta, Neemiya 9:15, 19-20. Mwinamba ya 6:48, Yesu andilivalanganga kuva ligung'u liu, napane apa ankushidoni, aijá ankulupila nae andapata medi ashingumi na medi ala ni Imumu.*

vankulupidile mwaa muwakati awo Imumu jo vavele vakanava kumpata kwoda Yesu avele akanava kupata lishangelo.

Vanu vankujavanikana kwamwaa umwe Yesu

⁴⁰ Nadoni vanu vanji pakati paimbumba vakaigwe malove alo vandítangola vaashidoni, "Aju mwiu ni nkúlava watushinnindila aide." †⁴¹ Vanji vashishidoni, "Aju ni Klistu!" Napane vanji kushidoni, "Mene. Klistu jo, inkuululika nae kwalakela ku Galileya? †⁴² Da Maandiko hatangwele aashidoni, muudukulu umwe Daudi na mulikaja Iya Beteleemu, likaja lyake Daudi, andaalakela Klistu?" †⁴³ Napavedoni kwamwaa wake nae kundípagwa kujavanikana. †⁴⁴ Vanji pakati pave vashindalota vankamule kanji hapagwite wakulyalavéka kundabunya.

⁴⁵ Kudabanga vila avalá vakushunga kuujila kwa-vanang'olo vavakulungalalela-shadaka na kwamapalishayo kutwala vanavo kuvaudya, "Mwaa shani hamumwidinavo?" †⁴⁶ Vakushunga kushidoni, "Mwiko, hapali wakumanya kutangola kenga munu aijá." †⁴⁷ Mapalishayo kushidoni, "Da namwenu mundiduwangika? †⁴⁸ Da apali nkútawala jumo kwali mpalishayo ánkulupidile nae? †⁴⁹ Bai vanu ava vákamanyite Lilamulo, vandilanika."

⁵⁰ Napanelo Nikodemu aijá e amuukidile Yesu, munu wamushipinga shosho shavananangalaledi, andítangola aashidoni, †⁵¹ "Da mulilamulo lyetu inkupagwa aki yakumuukumu munu ukanava kumwigwa na kumanya shatandile?" †⁵² Vanavo vakanjang'ula doni, "Da nawako momo ungalileya? Wena ukalalyange shana mumaandiko; undaanalalela kenga ku Galileya, mwiko hanaaloka nkúlava ata jumo."

Nkongwe wavankamwile ugoni †

[⁵³ Bai kula munu andyúka kwing'ande yake.

8 Yesu napane kuka ku Lishinga Iya Milandi vya Ulivela. †² Palyamba lyake, lyamba linyeiku andyúka kavili kwing'ande ya Nnungu. Venentete uti vaníntang'anedyá, nae kwikala kuvapundisha. †³ Napanelo vamwalimu vadishaliya pamo na mapalishayo vandímwidanavo nkongwe wavankamwile ugoni kumwimidya shing'ati shave †⁴ kutwala kumwaulila Yesu doni, "Mwalimu, nkongwe aju tuninkamula ugoni. †⁵ Napanelo mu Lilamulo, Musha anditulamulila vakongwe vantindo au kuvaamanga majanga mpaka vapele! Kushi wako po, uushidashi?" †⁶ Vandímudya davo vantela ntego pakulota vapate lilove lyakunkanidyanga. Yesu apalá akatepa kutwala kutunduvanga kwandika na shala pai. †⁷ Bai kwodamwaa vashindauka mushu vamudya, nae andítakatuka kuvajang'ula doni, "Pakati penu, aijá ákave lidambi ave ntandi kuntumbula nkongwe aju lijanga." †⁸ Akatepa kavili kuka mushu aandika pai.

† *Maimyo ala ankongwe wavankamwile ugoni, hanapagwa shinu mumaandiko akala-uti.* †† *Lola Valawi 20:10; Kumbukumbu 22:22-24.*

⁹ Vanavo vakaigwe malove alo vanditunduvanga kuma jumo jumo kutunduvangila vanang'olo. Pashinu apo kubaki Yesu pamo na aijá nkongwe wavamwimidídye shing'ati shipinga. ¹⁰ Yesu akatakutuka kutwala kumudya nkongwe jo kushidoni, "Wako, vanu avalá vavelé kwashi? Andibakila jumo wakulota kukuukumu?" ¹¹ Nkongwe jo do, "Nang'olo, hapali ata jumo." Yesu kushidoni, "Ata nanangu handikuukumu. Wena na haunatege kavili."]

Yesu ni Lilangadyo Lyashilambo

¹² Yesu andítangola kavili na vanavo kushidoni, "Nangu ni Lilangadyo Lyashilambo. Munu woewoe ángwoda nangu hawena shinu mwiko mushii, ngwengwe andavanavo lilangadyo lyashingumi." ¹³ Mapalishayo kutwa kushidoni, "Wako unkumya ushuda ulivalanganga gwegwe umwene; ushuda wako haunava wiu." ¹⁴ Yesu akavajang'ula kushidoni, "Ata ikava kenga nangu ninkumya ushuda ngulivalanganga nene nimwene ushuda wangu wiu mwaa nangu ndimanya kwangwalakadile na kwanguka. Mwenu kanji hamumanyite kwangalakadile na ata kwanguka. ¹⁵ Mwenu muukumu shimunumunu, nangu namuukumu shinu munu davo. ¹⁶ Ata ikava kenga nangu ninkuukumu, kuukumu kwangu kwiu mwaa nangu hangunava shinu gweka, ninkuva namu Atata ángutumidídye. ¹⁷ Na ata mo mu Lilamulo lyenu vandyandika doni, ushuda wavanu vavili ni ushuda wiu. ¹⁸ Napanelo nangu ni nimunu ngumya ushuda ngulivalanganga nene nimwene na junji áumya ushuda anguvalanganga nangu ni Atata ángutumidídye."

¹⁹ Vanavo kutwala kumudya, "Tatako jo avelé kwashi?" Yesu kushidoni, "Mwenu nangu hamungumanyite na ata Atata hamumanyite momo. Leka mungumanyite ata Atata mukanimanya." ²⁰ Malove alo Yesu atangwele ávele pepi na pamashanduku avashitenda vajela njulukuku washadaka akuno apundisha mulugwani lwamwing'ande ya Nnungu. Napane hapali munu ankamwile mwaa wakati wake uvele ukanava kuwika.

²¹ Napanelo Yesu andítangola mumwanda wambili aashidoni, "Nangu ninkulumadyanga, mwenu munangulambela kanji mundapalanga mumadambi enu. Kwanguka nangu apa mwenu po hamuulula kwida." ²² Vayuda do, "Patangola doni, 'Kwanguka nangu mwenu hamuulula kwida,' da alota kulibya mwene?" ²³ Yesu, "Mwenu po mmashilambo ashi, nangu apa kwetu kuwa. Mwenu mmashilambo sho shapai ashi, nangu hangunava shinu washilambo ashi. ²⁴ Ni ashi shitadídye nimwaulile kenga mundapalanga mumadambi enu. Mwaa mukanakulupila kenga Nangu ni Nene, † mundapalanga mumadambi enu." ²⁵ Vanavo kutwala kushidoni, "Wako unyani?" Yesu do, "Nangu ni

† Yesu patangwele doni, a "Nangu ni lilangadyo lyashilambo," ashililinganianganavo na lilangadyo liidanavo kwambola na shingumi kumaagano akala. Kwampano, lola Dimu 36:9; Ishaiya 42:6; 60:19-22. †† Lola Kuma 3:13-14. Yesu patangwele doni, a "Nangu ni Nene," ashitwala lina lyatumidile Nnungu kulyamba nae.

Nene vyangulivalangenge kunantandi. ²⁶ Nindivanavo vyoe vyakutangola na vyakumuukumu mwenu; napane i nangu gweka, aijá ángutumidídye ni waumwui na ashilá shanimwigwite nae ni shosho shanguvalangangila shilambo."

²⁷ Vanavo havashimanya kenga pashivaulila davo ashimwamba Tatamunu. ²⁸ Yesu kutwala kuvaulila kushidoni, "Pamulota kunnyanyula Mwana Wamunu ni pamulota kungumanya kenga Nangu ni Nene. Nangu hangunatenda shinu vinu vyakubuni nene nimwene; ninkutangola avilá vyangupundishídye Atata bai. ²⁹ Aijá ángutumidídye ankupagwa pamo namu nangu. Nae hananguleka shinu gweka mwaa avilá vinnagwéla, ngwengwe ninkutandédyá." ³⁰ Bai akatangole malove alo uti, vanu voe vaninkulupila.

Vana vamwe Abulaamu na vamwe Ndamoni

³¹ Napanelo Yesu andívaulila vayuda váshinkulupila nae kushidoni, "Mwenu mukauka mushu mwigwilila mapundisho angu mundava mwui mmakwoda vangu. ³² Mundamanya umwui na wo umwui wo, unamwambola." ³³ Vanavo vakanjang'ula kushidoni, "Wetu apa ni tuvanu tuvamuudukulu umwe Abulaamu. Mwiko hatunava kutandegwa tuvatumwa vamunu woewoe. Napanelo mwaa shani unkutangola doni, 'Mundava mmamuunaiti?'" ³⁴ Yesu akavajang'ula, "Ninkumwaulila mwui mwui doni, aijá átega, mulidambi mo, ajo ntumwa. ³⁵ Mwenu! Ntumwa hanapagwa ngwengwe paing'ande; mwana ni ánapagwa ngwengwe paing'ande. ³⁶ Nadoni Mwana akamwambola, mwenu mwui mundava mmamuunaiti. ³⁷ Ndimanya kenga mwenu ni mmanu mmamuudukulu umwe Abulaamu kanji munkulota mungubya mwaa lilove lyanangu halinavanavo shinu litala nkati mwenu. ³⁸ Avilá vyangugwene nangu kumwe Atata ni vyanguvalanganga; napane vyamwigwite mwenu kwatatagwenu, ni vyovyovy vyamutenda."

³⁹ Vanavo vakajang'ula, "Tatagwetu wetu ni Abulaamu." Yesu kushidoni, "Mwenu leka müvele mmanavake Abulaamu mukanditenda vyatandile nae. ⁴⁰ Napane munkulambela mungubya, nimunu nimwaulidile umwui, wowo wangwigwite kwa Nnungu. Avi Abulaamu hatandile! ⁴¹ Mwenu mutenda vyatandile tatagwenu." Kutwala vanavo kushidoni, "Hatunava shinu wetu tuvana vakuvaiva. Wetu tunku vanavo Tatagwetu jumo, Nnungu."

⁴² Yesu kuvaulila doni, "Nnungu leka ávele tatagwenu mukaningunagwaledya nangu mwaa nangu ngwaleké kwa Nnungu na ndida kwamwaa wake. Hangwidile kwakubuni nimwene, nae ni ángutumidídye. ⁴³ Da mwenu mwaa shani hamunaigwa shinu vyangutangola? Ni mwaa wamukaulula kwigwa lilove lyangu.

⁴⁴ Mwenu tatagwenu Ndamoni na malotelo atatagwenu jo, ni amulota mutandédye. Nae tangu kala ni nkúbyaa, nkati muumwui, hapali mwaa jojo jo umwui pamilyi pake havenavo. Panatangola vyaushwang'a

‡ Vyatandile Abulaamu ni kumwigwilila Nnungu na kunkulupila, vyavakashitenda vanavo. Lola Kutunduvanga 15:6; 26:5.

alilodya mavalelo ake mwaa nae ni nkúshang'apa na ni lipata lyaushwang'a. ⁴⁵ Doni, kwoda nangu ninkutangola umwiu, mwenu hamungukulupila. ⁴⁶ Kwau-pande washimadambi, wakwashi pakati penu wakunguundukula? Napanelo ikava nangu umwiu ninkutangola, mwaa shani hamunangukulupila shinu? ⁴⁷ Aijá wa Nnungu, vyatangola Nnungu anáigwa. Nadoni mwenu hamunaigwa shinu mwaa hamuvele vake Nnungu."

⁴⁸ Vayuda vakanjang'ula, "Da wetu hatuvenavo ishaliya patukwaulidile doni, 'Wako unshamaliya na majini andikudulumbuwa?'" ⁴⁹ Yesu kuvajang'ula, "Nangu majini hanguvenavo ila Atata ninkumwishimu na mwenu nangu, munkungwiludyanga. ⁵⁰ Nangu hangunanalilambalela shinu lishangelo nene nimwene. Lishangelo alyo, apali álambela; ni jojo áukumu.

⁵¹ Ninkumwaulila mwiu mwiu doni, muni áigwilila lilove lyangu, kupela ko mwiko, haona shinu ngwengwe." ⁵² Vayuda kutwala kushidoni, "Napanelo tundikwanalela kenga mwiu unkuvanavo majini. Abulaamu tu andipela na vakulava momo vandipalanga. Napanelo wako utangola kenga álota kwigwilila lilove lyangu, kupela ko mwiko, halinga ngwengwe! ⁵³ Da wako unkulivika kuva unang'olo namene kumpunda tatagwetu wetu Abulaamu? Nae andipela na ata vakulava momo vandipela. Kushi wako, ulivika kuva unyani?"

⁵⁴ Yesu kushidoni, "Ikava kenga ninkuling'a nene nimwene lishangelo, lishangelo alyo kwangu halive mana. Ángupa nangu lishangelo ni Atata, aijá wamumwamba mwenu doni, 'Nnungu wetu.' ⁵⁵ Mwenu nae hamummanyite, napane nangu ni nímmanyite. Leka ngùtangwele doni hanimmanyite, ndikandiva ninshwang'a kenga mwenu. Nangu kanji nimmanya na lilove lyake, ninkwigwilila. ⁵⁶ Tatagwenu Abulaamu íshinannagwela namene aone liduva lyangu; liduva ali andyóna na andípuwanga." †

⁵⁷ Vayuda kutwala kushidoni, "Wako haunava kuwisha vyaka amusini vyaulinga. Napanelo uushidoni undimwona Abulaamu?" ⁵⁸ Yesu kushidoni, "Ninkumwaulila mwiu mwiu doni, Abulaamu akanava kuvalekwa, Nangu ni Nene." ⁵⁹ Napavedoni vayuda vandílakatanga majanga pakulota vamwamange, †† Yesu kanji kutivaniva kutwala kuma mwing'ande ya Nnungu.

Kupona kwawakuputala mevo tangu shing'ang'enge

9 Napanelo Yesu apita awena andímwona muni ju-mo wakuputala mevo tangu shing'ang'eng'e. ² Vakwoda vake kutwala kumudya, "Labi, da lidambi lintadídye muni aju aputale mevo atagilé mwene kwali atagilé tatake na anyoke?" ³ Yesu kushidoni, "Munu aju hatagile na ata tatake na anyoke momo hatatagile. Shitadídye avalekwe àputele ni pakulota vitendo vya Nnungu vililodye kwa ashilá shilóta kun-

† Shitangodi ashi shinkuwanavo mana akushidoni, lilindilililo lyavenavo Abulaamu, lindiwikila popo nkati mwake nae. †† Shavashilota vamwamangile majanga ni mwaa wakulivika nae kuva Nnungu patangwele doni, "Nangu ni Nene." Lola Kuma 3:14.

tandeka. ⁴⁴ Indituvaikila tukole madengo amwe aijá ángutumididye uvé wo mui au. Shilo shinkwida pakaulula muni kukola madengo. ⁵ Pangupagwite mushilambo, nangu ni lilangadyo lyashilambo."

⁶ Akatangole malove ala, andíshunila mata pai, kukan-da ulongo padyoko kumpaka wakuputala mevo muding'wikwi ⁷ kutwala kumwaulila doni, "Wena ukana-vange medi kulitangi lya Shilowamu," Shilowamu mana ake wakutumigwa. Bai muni wakuputala mevo aijá andyúka ndanavanga medi kutwala kuja alola.

⁸ Napanelo vashitanonomwagwe pamo na vanji váshimwona anama kujugwa, vashindatangola vaashidoni, "Da aju i jojo áshiikala vila ajugwajugwa?" ⁹ Vanji kushidoni, "Ni jojo!" Vanji kavili kushidoni, "Hanava shinu nae, ila vandilandana." Kanji jo mwene kutwala kulivalanga shana kushidoni, "Mwenu nangu ni nene." ¹⁰ Vanavo kutwala kumudya, "Kanji napanelo upatilé dashi kulola?" ¹¹ Nae kushidoni, "Munu jo wavanshema Yesu andikanda ulongo, kungupaka muding'wikwi kutwala kungwaulila doni, 'Wena ku Shilowamu ukanavange medi.' Nangu kuka ndanavanga kutwala popo po, nangu kulalenneu." ¹² Vanavo kumudya, "Napanelo muni wene avelé kwashi?" Nae kushidoni, "Nangu namanya shinu."

¹³ Bai vanavo vaníntwala muni e avéle wakuputala mevo kumuukanavo kwamapalishayo. ¹⁴ Napanelo liduva lyene lyakandíle Yesu ulongo na lyantadídye alole, livele liduva lyakupumula. ¹⁵ Mapalishayo navanavo kutwala kumudya mwapatidile kulola. Nae jo kuvaulila doni, "Angupakilé ulongo muding'wikwi, nangu kunavanga medi na ambi apa ninkulola." ¹⁶ Mapalishayo vanji kutwala kushidoni, "Munu aju hanaaloka shinu kwa Nnungu mwaa ankutimbanga liduva lyakupumula." Vanji kushidoni, "Kanji ilota kuululika dashi muni wakutega kulodya vimanyikilo kenga avi?" Bai pakati pave kundípagwa kuvilingananga. ¹⁷ Vanavo vandímudya kavili aijá e aputéle kushidoni, "Pakuva muni ajo andikuponia, napanelo wako umwona kuva kenga nyani?" Nae kushidoni, "Nkúlava."

¹⁸ Vananangalaledi vavayuda, vanavo havashikulupila kenga kala po muni ajo andíputala mevo kutwala ambi apa kulola mpaka vandyúka ndavashema vatatawake ¹⁹ kuvaudya, "Da aju i jo mwanagwenu wamummalanganga kenga avalakwadidyé àputele mevo? Napanelo apatilé dashi kulola?" ²⁰ Vatatawake kushidoni, "Aju tunimmanya kuva mwanagwetu na avalakwadidyé àputele mevo. ²¹ Napane mwapatidile kulola mo, hatumanyite na aijá ántadídye alole, hatummanyite. Mudye jo mwene jo andikulumuka jo, ankuulula kulivalanganga." ²² Vatatawake vo vandí-jang'ula davo mwaa wakuvajopa vananangalaledi vavayuda. Doni, vananangalaledi vo vandípakani-la pakulota muni woewoe álota kummalanganga Yesu kuva Klistu vamingange pashitala shakulipudidya.

‡ Mumaagano akala ni jo mwene Nnungu ávaing'a kulola wakuputala mevo. Lola Kuma 4:11; Dimu 146:8. Namomo inditangaleka kenga Masiya andatenda yadavo. Lola Ishaiya 29:18; 35:5; 42:7.

²³ Ni ashi shitadidyé vatatawake vatangole doni, "Mudye jo mwene jo andikulumuka ajo."

²⁴ Vanavo vakanshema kavili munu aijá e aputéle mevo kutwala kumwaulila doni, "Mupe Nnungu lishange-lo! Wetu tundimanya kenga munu wene jo, nkútega."

²⁵ Nae kushidoni, "Yakuva nae munu wakutega hangu-namanya shinu. Shangumanyite ni ashi: kala po han-ishilola, ambi apa ninkulola." ²⁶ Vanavo kumudya kavili, "Akutandilé nyamani? Akutandalelé mwashi mpaka wako kupata kulola?" ²⁷ Nae kushidoni, "Nangu nimwaulila kanji mwenu hamunangwigwilila shinu. Napanelo mwaa shani munkulota nimmalangile kavili? Da namwenu momo mulota muve mmakwoda vake?"

²⁸ Bai vanavo vanínniula vaashidoni, "Nkwóda wamunu wako ni gwegwe umwene. Wetu tuvakwoda vake Musha." ²⁹ Wetu tundimanya shana kenga Nnungu anditangola shalowa namu Musha kanji munu ajo kwalakadile, hatumanyite." ³⁰ Munu jo kuvajang'ula doni, "Kulava mwenu! Mwenu ata mukanamanye kwalakadile kanji ni jojo ángutadidyé nangu ngulole.

³¹ Wetu tundimanya kenga Nnungu hanamwigwa nkútega kanji aijá ámwishimu na átandedya malotelo ake, ajo nae ankumwigwa. ³² Tangu kunantandi hainava kwigwinika do, munu woewoe anintadya kulola wakuputala mevo shing'ang'eng'e. ³³ Aju leka àkaalakadile kwa Nnungu hanaulule kutenda ata shidikidiki nyenda." ³⁴ Vayuda kutwala kushidoni, "Wako uvalakwididyé uti mmadambi; napanelo ulota utupundishe wetu?" Bai vanímminganga mushitala shakulipudidyá.

³⁵ Napanelo Yesu akaigwa do, munu wampatiidyé kulola aijá vanimminganga mushitala shakulipudidyá. Akankodye andímudya, "Da wako unkukulupila Mwana Wamunu?" ³⁶ Munu jo kushidoni, "Nang'olo, da munu wene jo wakwashi kwambangidyá nangu ninkulupile?" ³⁷ Yesu kushidoni, "Wako undimwona. Ni jojo átangola namu wako po." ³⁸ Munu kushidoni, "Nang'olo ninkukulupila." Bai nae kutwala kulipudya kumili kwake. ³⁹ Yesu kushidoni, "Shangwidilidile mushilambo amu ni kwamwaa wakuukumu pakulota avalá vákalola vapate kulola na avalá valóla, vaputale."

⁴⁰ Napanelo mapalishayo vanji vapagwíte pepi namu pavéle Yesu vakaigwe malove alo vandímudya, "Da wetu po momo tundiputala?" ⁴¹ Yesu kushidoni, "Mwenu leka mùputele mevo, mukana na lidambi. Kanji kwodamwaa munkushidoni, 'Tunkulola,' lidambi lyenu lyo, linkupagwa."

Yesu ni Nnango Wawangandolo na Nkúshunga Wambone

10 "Ninkumwaulila mwiu mwiu doni, aijá ákainjilila pannango walingongo lyavangandolo † ila áin-jilila akwela lingongo, ajo nkwíva na nkúbyaa. ² Napane áinjilila pannango nae ni nkúshunga wiu wavan-

† *Dingandolo díshishungigwa mumangongo; havashinama muvitundu vyakutununa; lingongo lyavashidenga kwilanga nkati mwake vashindalala vangandolo vavanu voe na ashindapagwa munu wakulaledya lingongo alyo muwakati washilo.*

gandolo. ³ Aijá munu wapannango, anánshimulila nnango kutwala vangandolo kwigwa lidi lyake. Napane vangandolo vake vo, kula ngandolo nae anánshema na lina lyake kutwala kuvaumidya panda kupalangalalela. †⁴ Nae panavaumya panda avalá vangandolo vake uti, mwene andálangalela kutwala vangandolo vake vo kumwoda mwaa lidi lyake vankumanya. ⁵ Vangandolo, mwiko havanamwoda munu nnangadavo, vanavo vanantukuta mwaa madi avanu valangadavo, havamanyite." ⁶ Yesu andívakang'ela nkong'o awo kanji vanavo ashilá shashivaulila, mana ake havashimanya.

⁷ Napavedoni Yesu andítangola kavili aashidoni, "Ninkumwaulila mwiu mwiu doni, nangu ni Nnango Wawangandolo. ⁸ Vanu uti valitandyéngé kwida ‡ nangu nikanava, vanavo uti vákwiwa na vákubyaa; vovo vo vangandolo havavaigwilidile. ⁹ Nangu ni nnango; munu woewoe akainjilila kwangu, andaambwalegwa. Nae andainjila, andauma na andakodya udani wambone. ¹⁰ Nkwíva aidila bai kwiva, kubyaa na kubamola; nangu jo ngwidilé pakulota vanavo vapate shingumi na shingumi shene vavenavo shoe namene.

¹¹ "Nangu ni Nkúshunga Wambone. Nkúshunga Wambone, nae anájaula shingumi shake kwamwaa wawangandolo. ¹² Munu washibalugwa, ákavele nkúshunga na ákavele mwene vangandolo, nae kumwona kwene livinji tu, andávaleka vangandolo kutukuta kuka kutwala livinji jo kuvainjilila, vanavo uti do, pwii. ¹³ Napane amu ni mwanatandela munu washibalugwa, nae hanavatanana vangandolo.

¹⁴ "Nangu ni Nkúshunga Wambone; vangandolo vangu ninkuvamanya na vo vangu vo, vankungumanya ¹⁵ kenga mo mwangumanyila nangu Atata, nanangu momo Atata ninkumanya. Nadoni ninkujaula shingumi shangu kwamwaa wawangandolo. ¹⁶ Ninku-vanavo vangandolo vanji vákavele vamulingongo ali; vovo vo ininguvaikila ndivatwale, vanavo lidi lyangu vandaigwa, vandapagwa shipinga shimo na nkúshunga jumo. ¹⁷ Ni ashi shitádyá Atata angunagwaledye mwaa nangu ninkujaula shingumi shangu pakulota ngupate kavili. ¹⁸ Shingumi shangu sho, hapali wakungupoka; nangu ninkujaula nene nimwene. Ninkuvanavo madalaka akujaula na akupata kavili. Lilamulo ali ngupatilé kumwe Atata."

¹⁹ Napavedoni kwamwaa wamalove alo kundyúmilila kavili kujavanikana pakati pavajuda. ²⁰ Voe pakati pave vashishidoni, "Munu aju animwinjila majini; jojo aju, ankudulumbuka. Napane mwaa shani munkumwigwilila?" ²¹ Vanji kushidoni, "Mwenu! Malove ala hanava

†† *Nkati mulingongo vishindapagwa vipinga vyavanu vene. Napane kula nkúshunga-dingandolo ashindavanavo inamuna yake yakushamela dingandolo dyake na kila akashema dingandolo dyake dishindamanya shimanyikilo asho kutwala kuma kumwoda. (Nkúshunga-dingandolo wakwanavo ankuvilingananga na vakushunga-dingandolo vakwetu akuno mwaa wakwanavo andálangalela kutwala dingandolo kumwoda panyuma kanji vakuno alan-galedya dingandolo mwene kwaloka panyuma.) ‡ Apa Yesu ashiv-amba vanu váshilivikanga kuva vamasiya na váshilota vavalan-galalele venentete kanji bila kuvatanana venentete avo.*

shinu amunu wamajini. Hainatoshe lijini ankuulula kuntadya munu ákalola kulola?"

Yesu na Tatamunu ni shinu shimo

²² Napanelo pa Yelusalemu shindípagwa Shikukulu Shakwapula. † Wakati wene wo uvele washipwepwe. ††²³ Napanelo Yesu ávele mwing'ande ya Nnungu ashindapita awanawananga mulukoma lwashitala shimwe Shalomoni. ²⁴ Vayuda vaníntang'anedyá kutwala kumudya, "Ulota kutuleka mudiwashiwashi mpa-ka duvani? Ikava kenga wako ni Klistu, twaulila ngala." ²⁵ Yesu kuvajang'ula, "Nangu nimwaulila kanji mwenu hamunakulupila shinu. Vitendo vyangutenda nangu palina limwe Atata ni vyovy vinguumidya nangu ushuda. ²⁶ Mwenu po hamunakulupila shinu mwaa hamunava shinu mmangandolo vangu. ²⁷ Vangandolo vangu nangu, vankwigwa lidi lyangu; nangu ndivamanya vanavo na vanavo vankungwoda. ²⁸ Avalá vangwóda nangu, ninkuvapa shingumi shíkamalilika, vovo vo mwiko havajaika na hapali wakungupoka mmakono mwangu. ²⁹ Atata ángupele vanavo ankuva-punda vanu uti ‡ na hapali munu wakuulula kumpoka vanu avo mmakono mwake. ³⁰ Nangu namu Atata tunkuva shinu shimo."

³¹ Bai vayuda vandílatanga kavili majanga pakulota vamwamange. ³² Yesu kushidoni, "Nditenda vinu vyoe vyambone vyakwalakela kumwe Atata pamevo penu. Napanelo pakati pavinu avyo, shakwashi shamulota mungwamangile majanga?" ³³ Vayuda kushidoni, "Wetu hatunalota shinu kukwamanga majanga kwamwaa washinu shoeshoe shambone shautandile, ni kwamwaa wakukupulu. Wako umunu, napane unkuvivika kuva Nnungu." ³⁴ Yesu kushidoni, "Da mu Lila-mulo lyenu havaandike doni, 'Nangu nditangola doni, Mwenu po, mmannungu?' ††³⁵ Ikava kenga avalá vapatile ntenga wake Nnungu, andivashema kuva vanningu, napane Maandiko hapali wakuulula kuputanga, ³⁶ kushi aijá walyapulidile Atata jo kuntumidya mushilambo? Mwaa shani munkutangola doni, 'Unkukupulu, pangulivalanga doni, Nangu ni Mwana wa Nnungu?' ³⁷ Ikava kenga nangu hangunatandedya shinu vinu vimwe Atata bai hamunangukulupile ³⁸ kanji ikava ninkutandedya, ata mukanangukulupila nangu, bai kulupila kwavinu vyangutenda vyo pakulota mumanye na muke mushu mumanya kenga Atata ankupagwa nkati mwangu na nangu nkati mumwe Atata." ³⁹ Bai vayuda vandílingangila kavili kunkamula kanji nae andívativaniva.

⁴⁰ Yesu andyúma kavili kuka mwangu unji wa Yudani kulyutu alilá lyashivatishidya Nshuwau vanu, nae kutwala kwikala koko. ⁴¹ Napanelo vanu voe vashin-

† Shikukulu ashi shishitandeka mwitalee 25, mwedi watisa mushivalangidi shave, mumwedi ulilódyá kuva kenga wakumi na mbili mushivalangidi shamaduvano, vakumbukila kwapula kwambili kwaing'ande yake Nnungu ling'oto lyavashalaliya baada yakutaa ushapu. †† Mushilambo asho, wakati washipwepwe ushiva kutunduvangila mwedi wakumi na mbili mpaka mwedi wantatu. ‡ Nkati mumavalangangidi anji akala vaandike doni, a Ashilá shangupele Atata ni shakukulupilika kupunda vinji. †† Lola Dimu 82:6.

damwidila na vashindatangola shivenevene vaashidoni, "Nshuwau hatandile shimanyikilo kanji uti vyashimmalanganga munu aju, viú." ⁴² Bai mulyutu alyo vanu voe vaníngkulupila Yesu.

Kupela kumwe Lashalu

11 Napanelo andípagwa munu jumo Lashalu áshipagwa mushilwele wapalikaja lya Betaniya, † likaja lyolyo lyashinama Maliya na nkulumunu Malita. ² Avele Maliya aijá ampakéngé *UMU* mauta na ampukuténgé mmadodo atumila ugwimbu wake e avéna-vo numbumunu nnwele, Lashalu. ³ Napanelo valumbumunu avalá vandítuma vakamwaulile Yesu doni, "Nang'olo, mujo waunnagwaledya namene wako aijá, nnwele." ⁴ Yesu akaigwe, andítangola kushidoni, "Shilwele asho hashinava shinu shakuka ndamalilikila mukupela kanji shilota kulodya lishangelo lyake Nnungu pakulota kwaindila yashilwele asho, Mwana wa Nnungu apate lishangelo."

⁵ Yesu ashinannagwaledya namene Malita na nung'une pamo na numbugwave Lashalu. ⁶ Napavedoni nae áigwite avi kenga Lashalu nnwele, andíkalá maduva mavili mulyutu lyavéle ⁷ kutwala apo andívaulila vakwoda vake kushidoni, "Tuke kavili ku Yudeya." ⁸ Vakwoda vo kushidoni, "Labi, madudi-madudi apa vananangaledi vashilota vakwamange majanga; napanelo ulota uke koko kavili?" ⁹ Yesu kushidoni, "Da liduva halivenavo disaa kumi na mbili? Munu akawena mui hanalikuvala mwaa nae andóna lilangadyo lyashilambo. ¹⁰ Kanji áwena shilo andálikuvala mwaa lilangadyo nkati mwake halipali." ¹¹ Malove ala nae andítangola naling'oto andítangola kavili aashidoni, "Njetu Lashalu andilala, nangu ninkuka ndamwimulanga." ¹² Vakwoda vake kushidoni, "Nang'olo ikava kenga alelé lwono, bai andapona." ¹³ Yesu pashitangola davo ashivalanga kupela kumwe Lashalu kanji vakwoda vashikumbukila kenga nae ashamba kulala kwalwono. ¹⁴ Napavedoni Yesu andívaulila ngala kushidoni, "Lashalu andipela. ¹⁵ Nangu ninkupuwanga kwamwaa wenu mwenu mwaa kwana-vo nangu hangupagwite pakulota mwenu mukulupile. Kanji leka tuke tukannole." ¹⁶ Napanelo Tome, aijá áshimanyika Didimu, †† andívaulila vavagwe kushidoni, "Leka tuke tukapalange pamo namu nae."

Yesu ni Kudyuka na Shingumi

¹⁷ Yesu pawikile ànkadidye Lashalu àtwete maduva nsheshe mushonga. ¹⁸ Napanelo kuma pa Yelusalemu mpaka pa Betaniya shivele shitamba shavyuluta vitatu. ¹⁹ Napavedoni vanu voe pakati pavayuda vandyúka nannidya Malita namu Maliya kwamwaa wanumbugwave. ²⁰ Malita paigwite kenga Yesu ankwida, andyúka anshinga. Maliya andíbaki pakaja. ²¹ Malita kumwaulila Yesu, "Nang'olo, wako leka úpagwite apa numbwangu

†† Likaja ali lya Betaniya, halinava shinu alilá livéle akulá kwashivapela Nshuwau vanu ubatisho pepi na lundi lwa Yudani livalangika mwinamba ya 1:28 kanji ali ni alilá livandíke pa Yelusalemu. ††† Mushigalegu lina lya a Didimumana ake a maaaa.

hanapele. ²² Ata ambi apa ninkumanya kenga shoeshoe shaulota kunjugwa Nnungu, Nnungu andakupa." ²³ Yesu kutwala kumwaulila doni, "Numbuvo andadyuka." ²⁴ Malita, "Nangu ninkumanya kenga nae andadyuka mukudyuka kwamuliduva lyamwisho." ²⁵ Yesu doni, "Nangu ni Kudyuka na Shingumi. Aijá ángukulupila nangu, ata akapela andavanavo shingumi." ²⁶ Kula munu ánama na ángukulupila nangu, mwiko hapela. Dashi wako unkukulupila malove ala?" ²⁷ Malita kushidoni, "Elo nang'olo. Nangu ndikulupila kenga wako ni Klistu, Mwana wa Nnungu aijá úshilota kwida mushilambo amu."

Kudyuka kumwe Lashalu

²⁸ Akamalile kutangola malove alo andyúka kwanung'unumunu Maliya nanninyitila doni, "Mwalimu jo andiwika, andákushema." ²⁹ Maliya akaigwe, andítakatukinneu kumuukila Yesu ³⁰ pakuva Yesu avele akanava kwinjila nkaja ávele palyutu lyolyo lyankodídye Malita. ³¹ Napanelo vayuda vapagwíte namu Maliya paing'ande pake vannidya, vakamwone atakatuka na auma shipajelo vandímwoda vakumbukila doni, auka kuvyonga ndalila.

³² Bai Maliya akawike pavele Yesu, pangwene andíguguvula mmadodo mwake aashidoni, "Nang'olo, wako leka úpagwite apa numbwangu hanapele."

³³ Yesu pangwene Maliya alila na vayuda vamwodíle navanavo momo valila, unímmeta ntima wake na vyakunkodya muntima mwake viníntindinganianga.

³⁴ Kutwala kudya, "Da munshikilé pashi?" Vanavo kushidoni, "Nang'olo, ida ulole." ³⁵ Yesu andyúmadyanga myodi. ³⁶ Vayuda do, "Munkwona mwashinnagwalyedya nae munu aju!" ³⁷ Vanu vanji pakati pave kushidoni, "Da aju i jojo ántadidye munu aijá wakuputala mevo kulola? Napane hainaululike kuntadya munu aju hanapele?"

³⁸ Napanelo Yesu akuno ummeta ntima wake kavili, andyúka kulikabuli. Likabuli alyo livele ntupa † na vandídiva lijanga. ³⁹ Yesu kutwala kushidoni, "Usha lijanga lyo!" Malita numbugwe wakujala do, "Nang'olo, ambi apa ankunung'a mwaa andipita maduva nsheshe." ⁴⁰ Yesu, "Da nangu handikwaulidile doni, ukakulupila undona lishangelo lyake Nnungu?" ⁴¹ Bai vanavo vandyúsha lijanga lyo Yesu kunyanyula shilaka kutwala kushido, "Atata, ninkukulambwalela mwaa uningwigwilila." ⁴² Ninkumanya kenga wako ngwengwe unkungwigwa kanji nditangola davo pakulota vanu vanguard'andídye vakulupile kenga wako po, ni úngutumididye."

⁴³ Akatangole malove ala andítangola pashanya po aashidoni, "Lashalu, umila panda apa!" ⁴⁴ Munu e apadíle aijá kuma apalá, makono na madodo vântavilidyenge shanda, ing'ope vâungangidile lilesho. Yesu kushidoni, "Muungulange munneke auke."

Nguguvale wakummyaila Yesu

Mateu 26:1-5; Malukushi 14:1-2; Lukashi 22:1-2

⁴⁵ Kutwala vanu voe pakati pavayuda ve vamwidíle Maliya pavagwene avilá vyatandile Yesu vaníngukulupila. ⁴⁶ Napane vyovy vyo, vanji vandyúka ndavalanganga kwamapalishayo. ⁴⁷ Vanang'olo vavakulangalalela-shadaka pamo na mapalishayo vandiikala nguguvale kutwala kushido, "Na wetu apa shipali shatwamba? Munu aju ankulodya vimanyikilo vyo namene." ⁴⁸ Tukanneka auka mushu atandedya, vanu uti vanankulupila. Valoma vandaida ndatupoka lyutu lyetu pamo na venentete vetu." ⁴⁹ Napanelo Kaipashi, munu jumo wamushipinga shosho, avéle nkúlangalalela-shadaka nkumene mumwaka awo, andívaulila, "Mwenu hashipali shamumanya! ⁵⁰ Hamu- naanalela shinu kenga ni shambone kupela munu jumo kwamwaa walikola kuliko kumalilika venentete uti?" ⁵¹ Malove ake Kaipashi havele gweka akubuni jo mwene. Ni kwamwaa wakuva nkúlangalalela-shadaka nkumene mumwaka awo ni shintadídye avalangange kenga Yesu andapela kwamwaa wavenentete ⁵² na ata i gweka venentete avo, namomo kwamwaa wavana va Nnungu vamwadilikanéngé pakulota vanavo, nae avanganiange vave shipinga shimo.

⁵³ Bai kutunduvangila muliduva alyo, vandyámuwa kummalidya. ⁵⁴ Kwaing'ano ayo, Yesu hashiwena kavili ngala pakati pavayuda ila andyúma kuka isemu ívele pepi na kushimbweshe palikaja lyavashema Epulaimu. Pashinu apo, nae andíikala na vakwoda vake. ⁵⁵ Napanelo Pasaka yavayuda ishindavandikanga. Vanu voe vaisemu ayo, Pasaka ikanava kuwika vandyúka ku Yelusalemu ndalyushanianga ushapu. ⁵⁶ Vanavo vashinannambela Yesu na vâimilenge mwing'ande ya Nnungu vashindaudyania doni, "Mwenu mwona dashi? Mwiu, jojo jo andaida pashikukulu apa?" ⁵⁷ Doni, vanang'olo vavakulangalalela-shadaka pamo na mapalishayo vandyúmya lilamulo lyakulota munu ámanyite lyutu lyavele Yesu, avalangange kwambangidya vakankamule.

Yesu ankupakigwa mauta ku Betaniya

Mateu 26:6-13; Malukushi 14:3-9

12 Napanelo ábakidile maduva sita kuwika Pasaka, Yesu andíwika pa Betaniya likaja lyashinama Lashalu aijá wandyuwídye pakati pavakupela. ² Koko ko vaníngandyangidya shakulya shalyulo; Malita ashindamwangaikangila pashilya akuno Lashalu áikele pandamu namu nae. ³ Napanelo Maliya andítwala ishupa yamauta akunung'angila ambone-uti aúka njuluku woe kumpaka mmadodo mwake Yesu, kupukutanga mmadodo mo atumila ugwimbu wake. Kunung'angila kwamauta alo, kundyána uti nng'ande mo.

⁴ Napanelo Yudashi Shikaliyote, jumo pakati pavakwoda vake aijá álota kunnimya, andítangola doni, ⁵ "Mwaa shani mauta ala havashumididye, njuluku wo kuvapa vamashikini? Dikandipatikananga dinali dimiya nnatu." ^{†6} Nae andítangola davo i kwamwaa waku-

† Ntupa au vashaakola vanu mulijanga na ushindatumika kuvashika vanu uti valikola limo. Munu akapela vashinantwala kuka nanshika muntupa awo kutwala kudivila lijanga.

vatanana vamashikini kanji mwaa wakuva nkwíva. Lipeta lyanjuluku lishiikala namu nae; njuluku úshiinjila amo, nae ashindadadamola. ⁷ Yesu kushidoni, “Nneke, nae atandilé davo pakulota alikandyedye muliduva lyamashiko angu. ⁸ Vamashikini vo munda-pagwanavo ngwengwe, napane nangu namu mwenu ngwengwe hangupagwa.”

⁹ Napanelo imbumba yavayuda paimanyite doni, Yesu apali ku Betaniya, indyúka koko i yakunnola Yesu gweka, yadavo ivele yakunnola Lashalu aijá wandyuwídye pakati pavakupela. ¹⁰ Nadoni vanang'olo vavakulungalalela-shadaka vandípanga nnugu pakulota vammalidye yadavo Lashalu ¹¹ mwaa, kwamwaa wake, vanu voe vashindavaambukanga vayuda kutwala kunkulupila Yesu.

Imbumba inkupuwangila kwinjila kumwe Yesu

Mateu 21:1-11; Malukushi 11:1-11; Lukashi 19:28-40

¹² Napane palyamba pake po, imbumba yavanu ye iidile pashikukulu, paiigwite doni, Yesu ankwida pa Yelusalemu, ¹³ vanavo vandínyakatanga maalati amalala kuka nanshinga vajunga pashanya po vaashidoni,

“Ashibike!

Aalaligwe aijá áida palina limwe *UMU!* †

Aalaligwe Umu wa ku Ishilaeli!”

¹⁴ Yesu anímpata mwana wapunda kutwala kunkwela kenga mwavaandikidile,

¹⁵ “Mmanashiyau, hamunajope!

Mwenu, *UMU* wenu ankwida ànkwadile mwana wapunda.” ††

¹⁶ Kunantandi vakwoda vake havashimanya vinu avi, napane paukile ndapata Yesu lishangelo ni pavakumbukidile doni, vinu avi vindyandikigwa vimwamba nae na vyovy vyo, vanintenda.

¹⁷ Napanelo imbumba ye ipagwíte namu Yesu muwakati wanshamíle Lashalu mushonga na kundyuwa pakati pavakupela, indyúka mushu yumya ushuda. ¹⁸ Ni mwaa wakwigwa kenga Yesu andítenda shimanyikilo asho shitadídye imbumba ya pa Yelusalemu yuke ikampwashalele. ¹⁹ Nadoni mapalishayo vandyaulanila shivenevene kushidoni, “Wetu apa hshipali shatwamba! Shapo lola, shilambo uti shindimwoda nae!”

Yesu ankulangaledya kuvalanganga kupela kwake

²⁰ Napanelo pakati pavanu ve vaukíle ndalipudya kwa Nnungu pashikukulu sha Pasaka, vanji vo vavele vagelegu. ²¹ Vovo vo, vandímuukila Pilipo munu wa ku Beteshaida ya ku Galileya nanjugwa doni, “Nang'olo, wetu tulota tumwone Yesu.” ²² Pilipo ankuka ndamwaulila Andaleya kutwala uti vavili, vankuka ndamwaulila Yesu. ²³ Yesu ankuvajang'ula doni, “Wakati wakupata Mwana Wamunu lishangelo, undi-

†† *Dinali dimiya nnatu ni njuluku wítikanánga nshala wakunni-pa munu akakola madengo mulishamba mumwaka umo. Kula liduva lyamadengo munu vashinnipa dinali imo. † Lola Dimu 118:25-26. †† Lola Shakaliya 9:9.*

wika. ²⁴ Ninkumwaulila mwiu mwiu doni, imbeju yangano painagwilila pai ikanawa, ivalela momo. Napane ikawa, indápa vyepo vyoe. ²⁵ Aijá ángwaledya shingumi shake andakatoka na aijá ányatila shingumi shake mushilambo ashi, andakondya musingumi shíkamalilika. ²⁶ Aijá ángutumika, inimmaikila angwode. Pangulota kupagwa nangu, ntumika wangu momo andapagwa popo. Munu akangutumika, Atata andamupa ishima.

²⁷ “Napanelo ambi apa ungumi wangu unkwangaikanga. Da ngushi dashi? ‘Atata, muwakati au ngwambola?’ Mene, shangwidilile muwakati au ni shosho ashi. ²⁸ Atata, ing'a lishangelo lina lyako!” Bai lindíigwinika lidi lyakwalakela kuwa líishidoni, “Lishangelo tayali nding'a na yadavo ndaing'a kavili.” ²⁹ Imbumba ye ipagwíte mulyutu alyo ikaigwe lidi alyo, indítangola doni, “Ayo, ing'uva.” Vanji do, “Njelo andítangola namu nae.” ³⁰ Yesu akajang'ula kushidoni, “Lidi ali haliidile kwamwaa wangu nangu, liidilé mwaa wenu. ³¹ Wakati wakuukumigwa shilambo ashi undiwika. Amba apa, andavingigwa nkútawala washilambo ashi. ³² Napane nangu pavalota kungunyanyulidya kushanya mushilambo amu, vanu uti ndavashombela kwangu.” ³³ Nae andítangola malove ala avalanganga inamuna yashipaledi yalota kuvauvanga.

³⁴ Imbumba kutwala kujang'ula, “Lilamulo linkutupundisha kenga, ‘Klistu ngwengwe andanama,’ napane utangola dashi, ‘Mwana Wamunu inimmaikila vanyanyule?’ Da ‘Mwana Wamunu jo’ ni wakwashi?” ³⁵ Yesu kushidoni, “Muwakati padyoko lilangadyo lindapagwa pakati penu. Nadoni wena po pamuvenavo lilangadyo apa kwambangidya shii hashinan-shushuwange. Aijá ánwena mushii, hanamanya kwashi kwauka. ³⁶ Po pauvenavo lilangadyo apa, kulupila lyo lilangadyo lyo pakulota muve mmana mmalilangadyo.” Yesu akamalile kutangola, andyúma kutwala kuvativaniva.

Shavakankulupilila Yesu venentete

³⁷ Napanelo ata ikava kenga Yesu andítenda vi-manyikilo pakati pave, vanavo havashinkulupila. ³⁸ Avi vinditandeka pakulota viwikile popo avilá vyatangwéle nkúlava Ishaiya doni, “*UMU*, ntenga wetu akulupidilé nyani na dililadidyé pamili pamwe nyani dimongo dyake *UMU?*” ³⁹ Ni mwaa au utadídye vanavo havanaulule kukulupila. Doni, Ishaiya andítangola kavili kushidoni,

⁴⁰ “Mevo ave andivaputadya, mitima vyave andivananopya, pakulota havanalole na mevo na ata mmitima vyave havanaanalele kutwala kushiliuka na nangu kuvaponia.” ††

‡ *Mwaing'ilile Nnungu lishangelo lina lyake ni kwaindila yakwida Yesu mushilambo na kwaindila yavimanyikilo vyatandile. Lola 1:14; 2:11; 11:40. Namomo mwawala kwing'ila Nnungu lishangelo ni kwaindila yakupela kwake Yesu na kudyuka. Lola 13:31-33; 17:1, 5. †† Lola Ishaiya 6:10.*

⁴¹ Ishaiya anditangola malove ala mwaa andyóna lishangelo lyake Yesu na anditangola amwamba nae. ^{†42} Kanji napane ata po pakati pavakutawala po, voe vaninkulupila Yesu kanji kwamwaa wamapalishayo havashilivalanganga likulupililo lyave vajopa kuvingigwa muvitala vyakulipudidya. ⁴³ Vovo vo, lishindavanagwela lishangelo lyakwalakela kwavanu kuliko lishangelo lyakwalakela kwa Nnungu.

Yesu haidile ndaukumu shilambo ila ndaambola

⁴⁴ Napanelo Yesu andítangola pashanya po aashidoni, "Aijá ángukulupila nangu, hanangukulupila shinu nangu, ankukulupila aijá ángutumididye. ⁴⁵ Ángwona nangu, ankumwona aijá ángutumididye. ⁴⁶ Nangu ni Lilangadyo ngwídile mushilambo pakulota kula munu ángukulupila nangu, hanapagwe mushii. ⁴⁷ Munu akaigwa malove angu na mene kutandedya, nangu namuukumu shinu. Nangu hangwidile ndaukumu shilambo, ngwidilé ndaambola. ⁴⁸ Munu ángwita nangu na mene kwitikila malove angu, apali wakuumuukumu. Lyo lyene lilove lyanguvalanganga ni lilóta kumuukumu muliduva lyamwisho. ⁴⁹ Doni, hangutangwele vyangu nimwene; Atata ángutumididye ni nae ángulamulidile ngutangole nyamani na nguvalangange nyamani. ⁵⁰ Nangu ninkumanya kenga lyo lila-mulo lyake ali ni shingumi shíkamalilika. Napavedoni, mo mwangwaulidile Atata, nimomo mwangutan-galalela nangu."

Yesu ankuvanavyanga medi vakwoda vake mmadodo

13 Napanelo shikukulu sha Pasaka shikanava kuwika, Yesu àmanyite kenga wakati wake wakuma mushilambo ashi kuka kwatatake undiwika, namomo pakuva andívanagwaledya vake mushilambo, andívanagwaledya mpaka kumwisho. ² Napane valya shakulya shalyulo, Ndamoni àvikile muntima umwe Yudashi mwanagwe Simoni Shikaliyote shabaa yakunnimya ³ na Yesu àmanyite kenga Tatamunu aninkamudya vinu uti mmakono mwake, namomo àalakadile kwa Nnungu na ankuujila kwa Nnungu, ⁴ andítakatuka pandamu apalá, kula likoti lyake kutwala itaulu kulyungila mwinono. ⁵ Nae ankutwala medi kutaa mushuniya kutunduvanga kuvanavyanga vakwoda vake mmadodo na kuvaanyalanga na itaulu yalyungidile mwinono. ⁶ Ankuwika pamwe Simoni Patulu, Patulu jo ankushidoni, "Nang'olo, wako ulota kuvanavyanga madodo angu?" ⁷ Yesu kushidoni, "Wako ambi apa haumanya shandikutenda ila mushu mo, undamanya." ⁸ Patulu do, "Mene. Wako madodo angu, mwiko haunavyanga!" Yesu akanjang'ula, "Ndikanakunavyanga, haupagwa nkati mwangu." ⁹ Simoni Patulu kushidoni, "Bai nang'olo, hanave madodo gweka kanji makono na muti wangu uti momo." ¹⁰ Yesu do, "Munu áliingile medi, iloteka anavange mmadodo gweka mwaa mili wake uti unditakata. Mwenu munditakata

kanji i uti." ¹¹ Nae anímmanya aijá áshilota kunnimya; ni ashi shintadidye atangole doni, "I uti mútakete."

¹² Pamalidile kuvanavyanga medi mmadodo, andítwala kavili likoti lyake kugwala, kuuujila palyutu lyake kwikala kutwala kuvaudya, "Da shanintandile ashi, mana ake munkumanya? ¹³ Mwenu munkungushema nangu Mwalimu na Nang'olo, munkuvanavo shaliya mwaa ni shosho shanguvele. ¹⁴ Napane ikava kenga nangu ngúvele Nang'olo na Mwalimu ninnavyanga mwenu medi mmadodo, bai namwenu momo inimmaikila munavyanie. ¹⁵ Doni, nimpelé kenga mpano pakulota mo mwanintandalele mwenu, namwenu mutandele momo. ¹⁶ Nangu ninkumwaulila mwiu mwiu doni, ntumika hanampunda nang'olo wake na ata wawantumile kumpunda aijá ántumile. ¹⁷ Napane ikava kenga mundimanya vinu avi, mundaaligwa mukatandedya.

Yudashi ankuma kulota nannimya Yesu

Mateu 26:20-25; Malukushi 14:17-21; Lukashi 22:7-13

¹⁸ "Nangu namwamba shinu mwenu uti; ndivamanya avalá vandivatandwele kanji ni pakulota awikile popo Maandiko, 'Aijá áshilya namu nangu andijalukanga kuva mmongo wangu.' ^{††19} Ninkumwaulila kaladavo vikanava kutandeka pakulota pavitandeka po, mwenu mukulupile kenga Nangu ni Nene. ²⁰ Ninkumwaulila mwiu mwiu doni, álota kumpwashalela aijá wanintumidya nangu, angupwashalela nangu na aijá ángupwashalela nangu, ampwashalela aijá ángutumididye."

²¹ Bai akatangole malove alo, ntima wake uníntindin-ganianga kutwala kumya ushuda aashidoni, "Ninkumwaulila mwiu mwiu, pakati penu apali álota kungulimya." ²² Vakwoda vake vandílalana shiven-evene vaambabidyania nyani washimwamba. ²³ Napane andíkala pepi-pepi namu nae po pandamu nkwódá wake jumo aijá washinnagwaledya namene Yesu. ²⁴ Simoni Patulu kunkwidula, "Mudye wamwamba jo." ²⁵ Nkwódá aijá akatepa kutwala kumudya, "Nang'olo, da wakwashi?" ²⁶ Yesu kushidoni, "Aijá wangulota kumupa shibadu shaligung'u shangulota kulidya mundamu, ni jojo." Bai akalidya shibadu shaligung'u kumupa Yudashi Shikaliyote mwanagwe Simoni. ²⁷ Nae akalye shibadu ashilá, Shatwani kumwinjilinneu. Yesu kutwala kumwaulila, "Shaulota kutenda sho, tenda shipajelo." ²⁸ Napane vanu ve vapagwíte pandamu apalá havamanyite mwaa shani andímwaulila davo. ²⁹ Kwoda Yudashi avele munu áshiwenanavo lipeta lyanjuluku, vanji vashona kenga amwaulila auke akashume vinu vilotéka pashikukulu kwali auke akavajavile vinu vákalyulula. ³⁰ Doni, Yudashi palile ligung'u alilá andyúminne. Wakati wene wo, uvele washilo.

Lilamulo lyaambi ni kunagwaladyania

³¹ Ling'oto lyakuma Yudashi, Yesu andítangola doni, "Ambi apa Mwana Wamunu ankuwapa lishangelo na

† Lola Ishaiya 6:1-3.

†† Lola Dimu 41:9.

Nnungu ankupata lishangelo nkati mwake. ³² Ikava kenga Nnungu nkati mwake ankupata lishangelo, nanae Nnungu momo andamupa lishangelo Mwana nkati mwake na lyo lishangelo lyo, anampenneu.

³³ "Mmanavangu, undibakila wakati padyoko wakupagwa namu mwenu. Munangulambela napane kenga mo mwandivauidile vayuda, ambi apa ninkumwaulila mwenu, 'Kwanguka nangu mwenu hamuulula kuka.' ³⁴ Ninkumupa lilamulo lyaambi; nagwaladyania. Mo mwaninnagwaladidye nangu mwenu, namwenu momo nagwaladyania. ³⁵ Amu ni mwavalota kummanyila vanu kenga mwenu ni mmakwoda vangu, mukangwaladyania."

Patulu anankana Yesu

Mateu 26:31-35; Malukushi 14:27-31; Lukashi 22:31-34

³⁶ Simoni Patulu kutwala kumudya, "Da Nang'olo, ulota kuka kwashi?" Yesu kushidoni, "Kwanguka nangu, ambi apa mwenu hamuulula kungwoda ila mushu mo, munangwoda." ³⁷ Patulu kushidoni, "Nang'olo mwaa shani nakwode ambi apa? Kwamwaa wako wako, nangu ndajaa shingumi shangu." ³⁸ Yesu, "Wako undajaa shingumi shako kwamwaa wangu nangu? Ninkukwaulila mwiu mwiu doni, ng'uku hakangavela wako ukanava kungukana myanda mitatu.

Yesu ni Indila, Umwiu na Shingumi

14 "Hamunaushaushange mitima vyenu. Nkulupile Nnungu; ngukulupila nangu momo. ² Kukaja kumwe Atata apali mautu oe namene. Leka ikavele davo, nikanimwaulila. Doni, ninkuka nampanganangidya mautu. ³ Nikauka nampanganiangidya mautu, ninkwida kavili nantwala pakulota apalá panguve nangu namwenu mupagwe popo. ⁴ Kwanguka nangu, mwenu mundimanya indila."

⁵ Tome kushidoni, "Nang'olo, wetu kwauka wako ko, hatumanyite. Napane indila ayo, tulota kumanya dashi?" ⁶ Yesu kushidoni, "Nangu ni Indila, Umwiu na Shingumi. Hapali wakwida kumwe Atata pakapitila kwangu nangu. ⁷ Ikava kenga muningumanya, Atata momo munamannya. Kutunduvangila ambi apa munimannya na munimwona."

⁸ Pilipo kushidoni, "Nang'olo, Tatamunu jo, bai tulodya itunagwele." ⁹ Yesu kutwala kushidoni, "Nangu ndiikala namu mwenu muwakati woe, mpaka ambi haunava kungumanya Pilipo? Munu ángugwene nangu, animwona Atata. Napanelo wako utangola dashi doni, 'Ngulodya Tatamunu?' ¹⁰ Da wako po huanakulupila shinu kenga nangu ninkupagwa nkati mumwe Atata na Atata kupagwa nkati mwangu nangu? Malove animmalangangila hanava shinu akubuni nene nimwene; Atata ápagwa nkati mwangu ni átandaedya vinu vyake avi. ¹¹ Ngukulupila kenga ninkupagwa nkati mumwe Atata na Atata kupagwa nkati mwangu, kwali mene, kwamwaa wa vyo vinu vyene, kulupila.

¹² Ninkumwaulila mwiu mwiu doni, aijá ángukulupila nangu, vyangutenda avi nanae momo andatenda na yakwanjadyeka kupunda avi, nae andatenda mwaa

nangu mwanda kumwe Atata. ¹³ Kula shinu shamulota kujugwa palina lyangu, nangu ndatandedya kwambangidya Atata apate lishangelo nkati mu Mwana. ¹⁴ Mukangujugwa shoeshoe palina lyangu, nangu ndatandedya.

Yesu ankulivikila yakuntumidya Imumu Wanashwe

¹⁵ "Mukangunagwaledya, malamulo angu mundaigwilila ¹⁶ na nangu nanjugwa Atata na nae andamupa nkúpambadyanga junji aikale namu mwenu ngwengwe, ¹⁷ aijá Imumu Waumwiu. Nae shilambo hashuulula kumpwashalela mwaa hashinamwona shinu na hashinamannya shinu. Mwenu munimannya mwaa ankunama namu mwenu na andapagwa nkati mwenu. ¹⁸ Haninneka muushiva, namwidila kavili. ¹⁹ Undiijalila wakati padyoko shilambo hashingwona ila mwenu munangwona. Kwoda nangu ninkunama, namwenu momo mundanama. ²⁰ Muliduva alyo mwenu mundamannya kenga nkati mumwe Atata ngupali nangu, nkati mwangu mwenu mupali na nkati mwenu, ngupali nangu. ²¹ Munu ávenavo malamulo angu na áigwilila, ajo ni ángunagwaledya. Jo ángunagwaledya nangu jo, Atata anannagwaledya na nangu nannagwaledya kutwala kulilodya kwake."

²² Napanelo Yudashi kanji i aijá Shikaliyote kushidoni, "Nang'olo, ilota kuululika dashi wako kulilodya kwetu wetu gweka bila shilambo?" ²³ Yesu kunjang'ula doni, "Woewoe akangunagwaledya andaigwilila malove angu, Atata anannagwaledya na wetu tundamwidila kutwala kutenda lyutu pamo namu nae. ²⁴ Aijá ákangunagwaledya, malove angu hanaigwilila. Mwenu! Malove amwigwite, hanava shinu angu; amwe Atata ángutumididye.

²⁵ "Vinu avi nangu nimwaulila panishipagwa namu mwenu ²⁶ napane nkúpambadyanga, aijá Imumu Wanashwe walota kuntumidya Atata palina lyangu, nae anampundisha mwenu kula shinu na anankumbuwanga uti vyanimwaulidile nangu. ²⁷ Ninkunnakela amani; amani yangu ninkumupa. Hangunamupa shinu kenga mwaijaulila shilambo. Hamunaushaushange mitima vyenu na hamunajope. ²⁸ Mundigwa vyanimwaulidile kenga ninkuka na namwidila kavili. Leka mungunagwaladidye, mukandipuwangila ing'ano yakuka nangu kumwe Atata mwaa nae ni nang'olo kungupunda nangu. ²⁹ Vinu avi ninkumwaulila kaladavo vikanava kutandeka pakulota pavitandeka po, mukulupile. ³⁰ Hangutangola shinu kavili vinu vyoe namu mwenu mwaa nkútawala washilambo ashi ankwi-da. Nae kwangu nangu hatenda shinu ³¹ kanji pakulota shilambo shimanye doni, nangu ninkunnagwaledya Atata, nadoni avilá vyangulamulidile nae ngutende, ninkutandedya. Bai takatukanga, tume apa.

Yesu ni Nnandi Wiu Wavyepo

15 "Nangu ni nnandi wiu wavyepo [†] na Atata ni nkúlima. ² Kula lutavi lúkapa vyepo nkati mwangu nae andausha na kula lutavi lúpa vyepo, andapan-

gulangila pakulota lupe namene. ³ Mwenu tayali munditakata kwalilove lyanimmalangangidile. ⁴ Pagwa nkati mwangu na nangu ngupagwe nkati mwenu. Mo mwalukapela lutavi vyepo lwolwene kwabila kupagwa munnandi, namwenu ni momo mukanapagwa nkati mwangu.

⁵ “Nangu ni nnandi wavyepo, mwenu po dinavi. Aijá ápagwa nkati mwangu, nangu kupagwa nkati mwake nae, ajo andápa vyepo vyoe. Doni, bila nangu mwenu hashipali shamulota kuulula kutenda. ⁶ Leka munu akapagwa nkati mwangu, munu ajo akandijalegwa ako kenga lutavi kutwala kujuma. Dinavi adyo vándalakota, kujela pamoto kutwa kupya. ⁷ Mwenu mukapagwa nkati mwangu, malove angu kupagwa nkati mwenu, shoeshoe shamulota, jugwa na vinantandakela momo. ⁸ Ni amu mwapatila Atata lishangelo; mwenu mukapa vyepo vyoe mukalilodya kuva mmakwoda vangu.

⁹ “Mo mwangunagwaladyedya Atata nangu ninkunagwaledya mwenu; pagwa mulinagwaledyo lyangu. ¹⁰ Mwenu mukaigwilila malamulo angu mundapagwa mulinagwaledyo lyangu kenga nangu malamulo amwe Atata ndiigwililila na ninkupagwa mulinagwaledyo lyake. ¹¹ Nangu nimmalangangila vinu avi pakulota lipuwilo lyangu lipagwe nkati mwenu na lipuwilo lyenu, liwikile popo. ¹² Lilamulo lyangu ni ali: nagwaladyania kenga mo mwaninnagwaladyedya nangu. ¹³ Hapali ávenavo linagwaledyo likumene lyakupunda ali, lyakujaula munu shingumi shake kwamwaa wavavagwe. ¹⁴ Mwenu ni mmavangu mukatandedya avilá vyaninnamulila nangu. ¹⁵ Haninshema kavili kuva mmatumika mwaa ntumika hanamany shatenda nang'olo wake; mwenu napane ninkunshema kuva mmavangu mwaa uti vyangwigwite kumwe Atata, nintadya mumanye. ¹⁶ I mwenu múngutandwele, ila ni nangu níntandwele mwenu na kuntenda muke mukape vyepo na vyepo vyovyoy vyo, havinaunde pakulota shoeshoe shamulota kunjugwa Atata palina lyangu, nae amupe. ¹⁷ Ali ni lilamulo lyangu: nagwaladyania!

Shilambo shindavavangedya vakwoda

¹⁸ “Napanelo shilambo shikammangedya, manya kenga shitandi shinguvangadidyé nangu. ¹⁹ Leka múvele mmashilambo, shilambo shikaninnagwaledya pakuva mmake. Doni, pakuva mwenu po hamunava shinu mmashilambo kanji nangu mushilambo amu nintandola, ni ashi shitádyá shilambo shimmangedye. ²⁰ Kumbukila malove animwaulidile, ‘Ntumika hanampunda nang'olo wake.’ Ikava kenga vaningupapata,

† *Ku Maagano Akala, vanaishilaeli vashivalinganianga na nnandi wavyepo vyavinyu kwali lishamba lyamilandi avyo. Maandiko ala ankutangola doni, Nnungu andivapanda vanaishilaeli kenga nnandi wavyepo pakulota vipe vyepo, namomo ankushidoni, vanavo vankuva kenga lishamba litimbikéngé líkapa vyepo, livaikidile lyukuumigwe. Lola Dimu 80:8-16; Ishaiya 5:1-7; Yelemiya 2:21; Eshekieli 15:1-8; 19:10-14; Osheya 10:1. Yesu patangola doni, a “Nangu ni nnandi wiu wavyepo,” ankulyamba nae kuwisha popo malotelo a Nnungu kwavanaishilaeli.*

namwenu momo vanampapata na ikava kenga vandiigwilila lilove lyangu, namwenu momo lyenu lyo, vandaigwilila. ²¹ Vanavo mwenu vanantenda davo kwamwaa walina lyangu pakuva havammanyite aijá ángutumididye. ²² Leka ndikaidile ndatangola na vavano, vakanavenavo madambi. Napane ambi apa, madambi ave hampali mwakwinikidyangidya. ²³ Ánguvangedya nangu, ankummangedya Atata. ²⁴ Leka ndikatandile vinu vyakanava kutenda munu woewoe pakati pave, vakanavenavo madambi. Kanji napane vanavo vandyona kutwala kunguvangedya nangu namomo kummangedya Atata. ²⁵ Napane avi uti vinditandeka pakulota shiwikile popo ashilá shaandikike mu Lilamulo lyave doni, ‘Vaninguvangedya pashikapali.’ †

²⁶ “Napanelo palota kwida aijá nkúpambadyanga wangulota kuntumidya kwaloka kumwe Atata, Imumu Waumwuu áalakela kumwe Atata, nae jo andaumya ushuda wangu nangu. ²⁷ Namwenu momo mundaumya ushuda wangu mwaa mwenu mundápagwa namu nangu tangu kunantandi.

16 “Nangu ninkumwaulila uti avi kwambangidya hamunalikuvale. ² Mwenu mundavingigwa muvitala vyakulipudidya; leka apo, wakati unkuwika umwe aijá álota kumyaa mwenu andona kenga alipudya kwa Nnungu. ³ Vinu avi vandatenda mwaa havammanyite Atata na ata nangu momo havammanyite. ⁴ Kanji napane vyovyoy vyo, ninkumwaulila kaladavo pakulota pavitandeka po, mukumbukilinneu vyanimmanyiya.

Shimadengo shimwe Imumu Wanashwe

“Vyanavo kunantandi hanimwaulidile mwaa nangu ndípagwa namu mwenu. ⁵ Napane ambi apa panguka kumwe aijá ángutumididye, pakati penu hapali ata jumo wakungudya, ‘Da wenda kwashi?’ ⁶ Doni, kwoda nimwaulila davo, mmitima myenu mo shinimuumbala shipalodi. ⁷ Kanji napane ninkumwaulila mwiu uti doni, kudyanga nangu nguke mwaa ndikanauka, nkúpambadyanga jo hamwidila; nangu ndikauka, nantumidya nae. ⁸ Palota kwida po, nae jo andaundukula shilambo kwamwaa wamadambi, ishaliya na ukumu; ⁹ kwamadambi mwaa havangukulupidile nangu; ¹⁰ kwaishaliya mwaa nangu ninkuka kumwe Atata na mwenu hamungwona kavili; ¹¹ kwaukumu mwaa nkútawala washilambo ashi andyukumigwa.

¹² “Nangu ninkuvanavo vinji vyoe vyakulota kummanyiya ila ambi apa, hamulipililila. ¹³ Napane palota kwida aijá Imumu Waumwuu anannangalalela mwenu uti muumwuu mwaa nae halivalanganga shinu jo mwene, ila andavalanganga vyalota kwigwa na anammalangangila vilóta kwida. ¹⁴ Nae po anangupa nangu lishangelo mwaa alota kupata ashilá shangu nangu kutwala kummalangangila mwenu. ¹⁵ Uti vyavenavo Atata, vyàngu. Ni ashi shitadidyé nguushidoni, vyangu nangu nae andapata kutwala kummalangangila mwenu.

† *Lola Dimu 35:19; 69:4.*

Shipalodi shavakwoda shindava lipuwilo

¹⁶ “Muwakati padyoko hamungwona; muwakati padyoko kavili, munangwona.”

¹⁷ Napanelo pakati pavakwoda vake vanji vandyáulanila doni, “Da shosho sho amba nyamani paashidoni, ‘Muwakati padyoko hamungwona; muwakati padyoko kavili, munangwona,’ na, ‘Mwaa ninkuka kumwe Atata?” ¹⁸ Nadoni vashindaudyania, “Da amba nyamani paashidoni, ‘Wakati padyoko? Wetu hatunamwigwa shámba.” ¹⁹ Yesu andívamanya kenga vashilota kumudya, nae kutwala kuvadya, “Da muudyania malove lo angutangwele doni, ‘Muwakati padyoko hamungwona; muwakati padyoko kavili, munangwona?’

²⁰ Ninkumwaulila mwiu mwiu doni, mwenu mundalila na mundatangadikanga kanji shilambo shipuwanga. Mundavanavo shipalodi ila shipalodi shenu sho shindava lipuwilo. ²¹ Nkongwe ukamwikila wakati wake wakuvaleka, andávanavo shipalodi mwaa wakati wamauvilo undimwikila. Napane pammaleka mwana, nae andálivaliva mauvilo uti kwamwaa walipuwilo lyakwida munu mushilambo. ²² Doni, mwenu ambi apa munkuvanavo shipalodi kanji nangu ndamwona kavili na mitima vyenu vindapuwanga, lipuwilo alyo hapali wakumpoka. ²³ Muliduva alyo hashipali shamulota kungudya. Nangu ninkumwaulila mwiu doni, shoeshoe shamunjugwa Atata palina lyangu, nae andamupa. ²⁴ Mpaka ambi apa hashipali shamunjugwile palina lyangu nangu. Jugwa mundapata kwambangidya lipuwilo lyenu liwikile popo.

²⁵ “Vinu avi nditangola kwamikong’o; undawika wakati wandikatangola ngutumila mikong’o, napane kwamwaa umwe Atata nammalangangila ngala. ²⁶ Muliduva alyo mundajugwa palina lyangu. Hanganatangola shinu kenga nangu nanjugwila kumwe Atata ²⁷ mwaa jo mwene Atata aju ankunnagwaledya mwenu kwoda mwenu muningunagwaledya nangu na muningukulupila kenga ngwaleké kumwe Nnungu. ²⁸ Nangu ngwaleké kumwe Atata kutwala kwida mushilambo shapai, napane ninkuma mushilambo amu kuujiila kumwe Atata.”

²⁹ Vakwoda vake kutwala kushidoni, “Napanelo unku-tangola ngala haunatumila shinu mikong’o. ³⁰ Wetu napane ambi tunkumanya kenga wako undimanya kula shinu na haunalindila shinu vanu vakuudyangidye. Napavedoni tunkukulupila kenga walakadilé kumwe Nnungu.” ³¹ Yesu kutwala kushidoni, “Da napane munkukulupila? ³² Mwenu! Wakati unkuwika na wakati wene ni wowo au wavalota kummwadiilikanianga kula munu kuka kwing’ande yake. Munanguleka gweka yangu kanji hangunava shinu gweka, Atata apali pamo namu nangu. ³³ Vinu avi nangu nimwaulila pakulota nkati mwangu, mwenu muvenavo amani. Mushilambo mundapata mauvilo kanji lyunge ntima; nangu nditema shilambo.”

Yesu ankulishwalidya jo mwene

17 Yesu akatangole davo andínyanyula shilaka kulola kuwa kutwala kushidoni, “Atata, wakati undiwika! Mupe mwanavo lishangelo pakulota nanae akupe lishangelo ² kenga mo mwaumpalale wako madalaka pashanya pavanu uti pakulota avape shingumi shíkamalilika avalá vaunkamudidye. ³ Shingumi shíkamalilika sho ni ashi, vakumanye wako kuva Nnungu wiu úvele jumo jojo na vammanye aijá wauntumididye, Yesu Klistu. ⁴ Nangu ndikupa lishangelo mushilambo pangumalidile shimadengo uti shaungukamudidye ngutende. ⁵ Nadoni napanelo Atata ngupa lishangelo pamevo pako, lishangelo lyolyo lyanguvénavo pamo namu wako shilambo shikanava kukandyangigwa.

Yesu ankuvashwalidya vakwoda vake

⁶ “Nangu nditadya lina lyako limanyike kwa avalá vaungupele mushilambo amu. Vovo vo, vavelé vako kutwala wako kungupa nangu na vanavo vankwigwilila lilove lyako. ⁷ Ambi apa vanavo vandimanya kenga uti vyaungupele vyàlakadile kwako ⁸ mwaa lilove lyaungupele, nangu ndivapa na vanavo vandipwashalela; vandimanya mwiu kenga nangu ngwalakadilé kwako na vandikulupila kenga wako uningutumidya.

⁹ “Nangu ninkuvajugwila vanavo; hangunavajugwila shinu vashilambo, ila avalá vaungupele mwaa vako wako umwene. ¹⁰ Uti vyanguvenavo vyàko na uti vyauvenavo vyàngu, nadoni nangu ndipata lishangelo kwaindila yavanavo. ¹¹ Hangupagwa shinu kavili mushilambo amu ila vanavo vandapagwa mushilambo; nangu ninkwida kwako. Atata Wakwilimyanga, vashunge mulina lyako, lina ali lyaungupele pakulota vave shinu shimo kenga mwatuvalalele wetu. ¹² Nangu pangushipagwa namu vanavo, ndivashunga mulina lyako, lina lyaungupele. Ndivalaledya, hapali ata jumo ájajike. Ajajiké aijá wavampangidile kubamalegwa kwambangidya awikile popo Maandiko. †

¹³ “Napanelo ambi apa ninkwida kwako; vinu avi ninkutangola ngúvele mushilambo pakulota mmitima myave lyumbale likulupililo lyangu. ¹⁴ Nangu ndivapa lilove lyako kutwala vashilambo kuvavangedya mwaa havanava shinu vashilambo; vanavo vavelé mo mwanguvalalele nangu ndikave washilambo. ¹⁵ Hangunajugwa shinu uvaumye mushilambo ila uvashunge kwa aijá nkalau. ¹⁶ Vanavo havanava shinu vashilambo kenga mo mwanguvalalele nangu ndikave washilambo. ¹⁷ Lyapulile nkati muumwii; †† lilove lyako ni umwii. ¹⁸ Mo mwaungutumididye wako mushilambo, nanangu ndivatumidya mushilambo. ¹⁹ Kwamwaa wavanavo nangu ninkulyapulila pakulota navanavo momo valyapulile nkati muumwii. ‡

† Lola Dimu 109:8. †† Kwali: a Vailimyange nkati muumwii...

‡ Kwali: a Kwamwaa wavanavo nangu ninkulilimyanga pakulota navanavo momo vailimyange nkati muumwii.

Yesu ankuvashwalidya uti avalá valóta kunkulupila

²⁰ “Nangu navajugwila shinu gweka vanavo; ninkuva-jugwila momo uti avalá valóta kungukulupila nangu kwaindila yantenga wave. ²¹ Vanavo uti vave shinu shimo kenga mo mwaupagwididye wako Atata nkati mwangu na nangu kupagwa nkati mwako. Navanavo momo vave nkati mwetu pakulota shilambo shikulupile kenga wako uningutumidya. ²² Lishangelo lyolyo lyaangupele, nanangu ndivapa pakulota navanavo vave shinu shimo kenga mo mwatuvalalele wetu; ²³ nangu ngupagwe nkati mwave, wako upagwe nkati mwangu; vadyavalele muupamo kwambangidya shilambo shimanye doni, wako uningutumidya na unkuvanagwaledya kenga mo mwaungunagwaladyedya nangu.

²⁴ “Atata, vaangupele vo, ninkulota vapagwe po panguvele nangu vone lishangelo; lishangelo lyo lyaangupele mwaa uningunagwaledya shilambo shikanava kukandyangigwa. ²⁵ Atata Waishaliya, ata ikava kenga shilambo hashikumanyite, nangu ndikumanya na vavéle namu nangu ava, vandimanya kenga wako uningutumidya. ²⁶ Nangu ndivatadya vamanye lina lyako namomo ndauka mushu ndivatadya vakumanye pakulota linagwaledyo lyauvenavo kwangu nangu lipagwe nkati mwave na nangu ngupagwe nkati mwave.”

Kunnimya kumwe Yesu

Mateu 26:47-56; Malukushi 14:43-50; Lukashi 22:47-53

18 Napanelo pamalidile kushwali, andyúma pamo na vakwoda vake kuka mwangu unji walundi lwa Kedeloni. Mwangu unji walundi alwo, lindípagwa liteka, nae akainjila na vakwoda vake. ² Napane Yudashi aijá namalimya wakunnimya Yesu andímánya lyutu alyo mwaa myanda vyoe Yesu ashindauka na vakwoda vake mulyutu alyo. ³ Jo Yudashi jo andyúka kuliteka àvenavo shipinga shavaing'odo pamo na vakushunga vakwalakela kwavanang'olo vakulangalalela-shadaka na mapalishayo vanyukatenge vyenje, ditoshi na dyuti. ⁴ Yesu àmanyite avi uti víshilota kuntandeka, andílyumilidya kutwala kuvaudya, “Munnambela nyani?” ⁵ Vanavo, “Yesu wa ku Nashaleti.” Yesu kushidoni, “Ni nangu apa.” Bai Yudashi aijá namalimya andípagwa pamo na vanavo. ⁶ Napanelo Yesu pavaulidile doni, “Ni nangu apa,” vanavo vandyújila kunyuma kutwa kugwanginneu. ⁷ Nae kuvaudya kavili, “Da munnambela nyani?” Vanavo doni, “Yesu wa ku Nashaleti.” ⁸ Yesu kushidoni, “Nangu nimwaulila, ni nangu apa. Napane ikava kenga mwenu mungulambela nangu, valeke ava vauke.” ⁹ Vinu avi vinditandeka pakulota liwikile popo lilove lyatangwéle jo mwene doni, “Vaangupele uti, hapali ata jumo ánguajike.”

¹⁰ Napanelo Simoni Patulu e anyukéte lyambila, andyálamola kutwala kupanyula lyatu lyakunkanakono lyantumika wake nkúlangalalela-shadaka nkumene. Lina lyantumika ajo, livele Maluku.

¹¹ Yesu napane kumwaulila Patulu doni, “Kondya lyambila! Da hangunakumbile shikombe shangupele Atata?”

Kukamuligwa kumwe Yesu

Mateu 26:57; Malukushi 14:53-54; Lukashi 22:54

¹² Nadoni shipinga shavaing'ondo pamo namu nanangaledi wave na vakushunga vavayuda vakankamula Yesu vakamunga. ¹³ Shitandi vakamuukanavo kumwe Anashi nkwegwe Kaipashi e avéle nkúlangalalela-shadaka nkumene mumwaka awo. ¹⁴ Kaipashi aju ni jojo aijá e avaulidíle vayuda doni, ni shambone kuvapalela venentete munu jumo bai.

Patulu ankunkana Yesu

Mateu 26:69-70; Malukushi 14:66-68; Lukashi 22:55-57

¹⁵ Napanelo Yesu vashindamwoda Simoni Patulu pamo na nkwódá junji. Nkwóda aju, pakuva vandímanyana namu nkúlangalalela-shadaka nkumene, nae andíinjila pamo namu Yesu mpaka mulugwani lwanang'olo ajo. ¹⁶ Patulu napane andíimila panda pannango alindila. Nkwóda aijá e amanyíke na nkúlangalalela-shadaka nkumene, andyúka kuka ndatangola namu mwali nkúshunga-nnango kutwala kumwidanavo Patulu nkati. ¹⁷ Mwali jo kumudya Patulu, “Da wako i unkwóda pakati pavakwoda vake munu aju?” Nae kushidoni, “Mene, hangunava nangu.” ¹⁸ Ishindadidima imepo, vatumika pamo na vakushunga vandítang'anedyá moto wavakang'íle pakulota ajote. Patulu nanae andípagwa na vanavo àimidile ajota moto.

Anashi ankumudya Yesu

Mateu 26:59-66; Malukushi 14:55-64; Lukashi 22:66-71

¹⁹ Napanelo nkúlangalalela-shadaka nkumene andímuudyangidya Yesu yavakwoda vake na mapundisho ake. ²⁰ Yesu kutwala kushidoni, “Nangu nditangola ngala na shilambo; ndipundisha ngwengwe muvitala vyakulipudidya na mwing'ande ya Nnungu mwavakadyania uti vayuda. Hashipali shangutangwele kwashipii. ²¹ Napane mwaa shani munkungudya? Vaudye avalá vangwigwíte. Vanavo vandimanya shana ashilá shangushitangola.” ²² Akajang'ule davo, nkúshunga jumo e ammandíke, anínkanyola lilatuma aashidoni, “Wako unjang'ula davo nkúlangalalela nkumene?” ²³ Yesu kushidoni, “Ikava kenga nangu nditangola kunyata, umya ushuda wakunyata wene wo! Kanji ikava kenga nditangola viu mwaa shani unangukanyola?” ²⁴ Bai Anashi aníntumidya Yesu vamuungile mmakono kumwe Kaipashi, aijá nkúlangalalela-shadaka nkumene.

Patulu ankunkana kavili Yesu

Mateu 26:71-75; Malukushi 14:69-72; Lukashi 22:58-62

²⁵ Napanelo Simoni Patulu akuno àimidile ajota moto, vanavo vandímudya, “Da wako momo i unkwoda pakati pavakwoda vake?” Nae kukana aashidoni, “Mene, hangunava nangu.” ²⁶ Ntumika jumo umwe nkúlangalalela nkumene, mulikola wake aijá wan-

numwile Patulu lyatu kutwala kushidoni, "Da nangu handikugwene ùvele namu nae paliteka apalá?" ²⁷ Patulu kukana kavili. Bai muwakati wowo ng'uku kukan-gavalenneu.

Yesu pamevo pamwe Pilatu

Mateu 27:1-2, 11-23; Malukushi 15:1-15; Lukashi 23:1-5, 13-25

²⁸ Kavili vayuda vandímumya Yesu paing'ande imwe Kaipashi kumuukanavo kumwe gavana. Wakati wene wo uvele lyamba linyeiku, napane vanavo pavakalota kulitaa udagwa, havainjidile nng'ande vajopa pakulota vaulule kulya Pasaka. ²⁹ Nadoni Pilatu andyúma kuka ndatangola na vanavo kutwala kuvaudya, "Munu aju mummalanganga makosha shani?" ³⁰ Vanavo vakan-jang'ula kushidoni, "Nae leka akavele nkalau, hatu-namwidenavo ndakukamudya wako." ³¹ Pilatu kushi-doni, "Ntwale mmene mukamuukumu kenga mwali-tangalela lilamulo lyenu." Vayuda kushidoni, "Wetu hatuvenavo lilamulo lyakumpambilila munu woewoe." ³² Avyo vindítandeka pakulota liwikile popo lilove ly-atangwéle Yesu avalanganga inamuna yalota kupela nae. ³³ Pilatu andíinjila kavili nng'ande kutwala kunshe-ma Yesu kumudya, "Wako ni umu wavayuda?" ³⁴ Yesu kushidoni, "Da kudya aku kwàko wako umwene kwali vapali vakwaulidile yangu?" ³⁵ Pilatu akajang'ula, "Da nangu po ni muyuda? Vakwenu pamo na vanang'olo vavakulangalalela-shadaka ni vakutumidídye kwangu nangu. Da ukashidyé nyamani?" ³⁶ Yesu kushidoni, "Utawala wangu haunava shinu washilambo ashi. Leka ùvele washilambo ashi, vatumika vangu vakanditenda ing'ondo vangushililidya pakulota nangu hangunaka-muligwe na vayuda. Kanji napanelo utawala wangu haunava shinu washilambo ashi." ³⁷ Pilatu kutwala kushidoni, "Bai wako po, umu!" Yesu akajang'ula, "Wako ni úvalanganga. Kwakutangola mwíu ndivalek-wa kwamwaa au na kwamwaa wowo ndida mushilambo amu pakulota ngumye ushuda kwaumwíu. Uti avalá vaumwíu, vankwigwa lidi lyangu."

³⁸ Pilatu kumudya, "Da umwíu ni nyamani?" Nae akatangole malove ala andyújila kwavayuda kutwala kushidoni, "Munu aju nangu hangunamwona makosha." ³⁹ Nadoni mwenu mundivanavo lidyavalelo lyakumuungulilila nkúngwa jumo muwakati wa Pasa-ka. Napane mulota nimuungulilile 'umu wavayuda?' ⁴⁰ Vanavo kwakujang'ula kwave, vandíjunga vaashidoni, "Mene, nae mene! Tunnota Balabashi!" Mwenu, Balabashi aju avele nkalau.

Pilatu ankuvakamudya Yesu vakampambilile

Mateu 27:24-31; Malukushi 15:16-20

19 Bai Pilatu andílamulila Yesu vanshape viboko. ² Vaing'ondo vakakandyanga lidaka lyadimiva kutwala kungwadya mmuti. Vaníngwadya ikanju yailangi yanshambalau ³ kutwala kummandika kumwaulila kushidoni, "Shikamu, umu wavayuda!" Namomo vashinankanyola malatuma.

⁴ Mwanda unji kavili Pilatu andyúmilila panda kutwala kuvaulila vayuda doni, "Mwenu! Ninkumwidana-

vo munu aju kwenu pakulota mumanye doni, nangu hangunamwona makosha." ⁵ Bai Yesu andyúmila pan-da àgwete lidaka lyadimiva mmuti na ikanju yailangi yanshambalau. Pilatu kutwa kuvaulila kushidoni, "Mwenu! Munu jo, aju." ⁶ Vanang'olo vavakulangalalela-shadaka pamo na vakushunga pavangwene vandíjunga vaashidoni, "Mpambilile! Mpambilile!" Pilatu kutwala kushidoni, "Ntwale mwenu po, mukam-pambilile. Nangu, hangunamwona makosha." ⁷ Vayuda vandíjang'ula, "Wetu tunkuvanavo lilamulo na kwodananavo lilamulo ali, nae inimmaikila apele mwaa andilivalanga kuva Mwana wa Nnungu."

⁸ Paigwite malove alo, Pilatu andímamodya kujopa ⁹ kutwala kuujiila kavili nng'ande. Napane andímudya Yesu doni, "Da wako kwenu kwashi?" Kanji Yesu han-jang'wile. ¹⁰ Pilatu kushidoni, "Hautamwa kungu-jang'ula? Da haunamanya shinu kenga ninkuvanavo madalaka akukuleka wako kuka kwali akukukamela panshalaba?" ¹¹ Yesu kushidoni, "Wako haunavenavo madalaka kwangu nangu leka madalaka alo akaalakadile kuwa. Nadoni aijá ángukamudidye kwako wako ni ávenavo madambi akumamodya." ¹² Kutunduvangila apo Pilatu ashindalambela mwakumuungulila Yesu kanji vayuda vashindajunga vaashidoni, "Uka-muungula munu aju, wako haunava shinu umuje Shashali. Mwaa woewoe álvika kuva umu, ankumpin-ga Shashali." ¹³ Paigwite malove alo, Pilatu andímwidanavo Yesu panda kutwala kwikala paikiti yake yaukumu lyutu lyavashema shimbambanda shamajanga, mushibalaniya Gabata.

¹⁴ Napanelo uve wakati waliduva pamuti liduva lyaishumana yakulipanganianga Pasaka. Pilatu andí-vaulila vayuda kushidoni, "Mwenu! Umu wenu jo ajo!" ¹⁵ Napane vanavo vandíjunga vaashidoni, "Mmalidye! Mmalidye! Mpambilile panshalaba." Pilatu kuvaudya, "Da mulota nimpambilile panshalaba umu wenu?" Vanang'olo vavakulangalalela-shadaka kutwala kushi-doni, "Hatuvé umu junji ila Shashali tu bai." ¹⁶ Kumwísho kwake Pilatu andívapa pakulota vauke vakampambilile panshalaba.

Kupambililigwa kumwe Yesu

Mateu 27:32-44; Malukushi 15:21-32; Lukashi 23:26-43

Nadoni vanavo vakantwala Yesu. ¹⁷ Nae ànyukete nshalaba wake, andyúma kuka pashinu pavashema Lyutu lya Shivanga, alilá lishaméka mushibalaniya Gol-ogota. ¹⁸ Popo po vanímpambilila panshalaba pamo namu nae vanu vanji vavili, junji nkono au, junji nkono au, Yesu pakati. ¹⁹ Napanelo Pilatu kwandika malove mulibau kuka ndakamela panshalaba; malove alo aandike doni, "YESU NNASHALETI, UMU WAVAYU-DA." ²⁰ Vayuda voe vandíshomya shavaandike mulibau alyo mwaa palyutu lyavampambilidile Yesu, lindívandi-ka na panjini namomo libau alyo vaandike mushibalaniya, mushilatini na mushigalegu. ²¹ Vanang'olo vavakulangalalela-shadaka vavayuda vanímpinga Pi-latu vaashidoni, "Haunaandike doni, 'Umu Wavayuda,'

ila, 'Aju atédoni, Nangu Umu Wawayuda.' " ²² Pilatu kushidoni, "Shangwandike, ndyandika!"

²³ Napanelo Yesu vakampambilile, vaing'ondo vandít-walanga dinguvo dyake kujavanianga mapungu nsheshe, kula mwing'ondo kupata lipungu lyake kutwala kubakila ikanju. Ikanju yo havatatile ivele vila kuma kushanya mpaka pai. ²⁴ Nadoni vaing'ondo vandyáulanila doni, "Ikanju ai hatunapapulange. Leka tuntende gudugudu pakulota tummanyenye nyani álota kupata." Avi vindítandeka pakulota awikile popo Maandiko aashidoni, "Vandijavananga dinguvo dyan-gu na ikanju yangu, vandítandela gudugudu." † Ashi ni shavatandile vaing'ondo.

²⁵ Napanelo pepi na panshalaba umwe Yesu andí-pagwa anyoke, nkulugwe anyoke, Maliya ndyagwe Kolopashi namu Maliya wa ku Magadalema. ²⁶ Yesu na-pane pangwene anyoke pamo na nkwóda wake aijá washinnagwaledya vavele pamo, andímwaulila anyoke doni, "Mwanavo ajo apo," ²⁷ kutwala kumwaulila nkwó-da jo kushidoni, "Anyoko ajo apo." Kutunduvangila muwakati wowo wo, nkwóda aijá anímpwashalela kutwala kumuukanavo kwing'ande kwake.

Kupela kumwe Yesu

Mateu 27:45-56; Malukushi 15:33-41; Lukashi 23:44-49

²⁸ Ling'oto lya avyo Yesu amanya kenga uti vindi-malilika na pakulota Maandiko awikile popo, nae andítangola kushidoni, "Inangukola inyota." ²⁹ Popo po shindípagwa shitumba shavaumbadídye medi aulimu. Bai vandítwala shipande shaivonu, kupambya munkungulandi, kushuvika mmedi aulimu amulá kuka nampaka pakanywa. ³⁰ Nae akalinge medi alalá, andítangola kushidoni, "Vindiwikila popo." Bai andítepya muti wake kutwala kujaa imumu.

³¹ Nadoni pakuva livele liduva lyakulipanganianga liduva lyakupumula na pakuva liduva lyakupumula alyo livele likumene namene, bai pakulota mili avilá havinapagwe panshalaba muliduva lyakupumula, vayuda vanínjugwa Pilatu doni, madodo avanu avalá vatamange na mili vyo, vaushe. ³² Vaing'odo kutwala kuka ndatamanga madodo amunu ntandi na wambili ve vavapambilidile pamo namu Yesu. ³³ Kanji pavawikile pamwe Yesu, vakamwone ápadile nae po madodo havantamenge. ³⁴ Napane mwing'ondo jumo aníntalo-la Yesu nkushi ndimbau kutwala kuuminneu myadi na medi. ³⁵ Aijá ágwene vinu avi andyumu ya ushuda na ushuda wake ni waumwii. Nae andimanya kenga ankuvalanganga umwii; ankuvalanganga pakulota namwenu momo mukulupile. ³⁶ Vinu avyo vitandeka pakulota awikile popo Maandiko aashidoni, "Halipagwa ligwangwa lyake ata limo lilóta kutameka," †³⁷ na kavili kenga mwatangalela Maandiko anji doni, "Vanannola aijá wavantaweke nkushi." ‡

† Lola Dimu 22:18. †† Lola Kuma 12:46; Ishabu 9:12; Dimu 34:20. ‡ Lola Shakaliya 12:10.

Kunshika kumwe Yesu

Mateu 27:57-61; Malukushi 15:42-47; Lukashi 23:50-56

³⁸ Napanelo vikapite vinu avyo, Yoshe wa ku Ali-mateya, nkwóda wake Yesu kanji shipiipii kwamwaa wakuvavajopa vayuda, nae anínjugwa Pilatu mili umwe Yesu. Pilatu kulumulila, nae kutwala kuka ndausha mili aulá kuukanavo. ³⁹ Namomo Nikodemu aijá amuukidile kunantandi Yesu shilo nanae andyúka ányukete mauta akunung'angila na ubani shilinga shadikilu salasini. ⁴⁰ Vanavo pavatwete mili umwe Yesu aulá, vandyávilidyanga mushanda yakunamikanga kutwala kuminyangila mauta akunung'angila kwodana na madyavalelo avayuda nkati mukushika. ⁴¹ Palyutu lyavampambilidile Yesu lindípagwa liteka; mo muliteka mo lindípagwa likabuli lyaambi lyavakanava kunshika munu. ⁴² Napane pakuva livele liduva lyakulipangani-anga lyavayuda; namomo kwoda likabuli alyo livele pepi, vanavo vanínshika Yesu mulikabuli alyo.

Kudyuka kumwe Yesu

Mateu 28:1-10; Malukushi 16:1-8; Lukashi 24:1-12

20 Napanelo muliduva litandi lyaishumana lyamba linyeiku padimbile vila, Maliya wa ku Magadalema ankuka kushonga, ankukodya lijanga lyavadvile pashonga apalá, vashidye. ² Nadoni nae ankutukuta, ankumuukila Simoni Patulu na nkwóda junji aijá washinnagwaledya namene Yesu, ankuvaulila doni, "UMU mushonga mo, vandimumya. Hatunamanya shinu kwavaukile nammika." ³ Patulu pamo na nkwóda junji jo kuuminneu kuka kushonga. ⁴ Vanavo uti vavili vashindauka vatukuta pamo kanji nkwóda junji aijá andítukuta shipajelo kuliko Patulu kutwala kuva ntandi kuwika kushonga. ⁵ Akapandalele mushonga amulá, agwené vila ishanda yakunamikanga ailá ivele pai kanji hainjidile. ⁶ Simoni Patulu áshimwoda panyuma, nanae kuwika kutwala kwinjila, kwona vila ishanda yakunamikanga ivele pai ⁷ pamo na alilá lilesho lyavamuungile Yesu mmuti. Lyanavo lindípindigwa kuvikigwa isemu inji kwapukanianga na ishanda yakunamikanga. ⁸ Napanelo aijá nkwóda junji ntandi kuwika pashonga apalá, nanae kwinjila, kwona kutwala kukulupila. ⁹ Napane vovo vo, ve vakanava kumanya Maandiko aashidoni, "Inímmaikila adyuke pakati pavakupela." ¹⁰ Bai vakwoda avalá vandyúja kuka kuka-ja.

Yesu ankulilodya kumwe Maliya wa ku Magadalema

Malukushi 16:9-11

¹¹ Napane Maliya andíimila pepi na pashonga alila. Akuno alila, andíshiliuka kupandalela mushonga ¹² kutwala kuvona vanjelo vavili vágwete dinguvo dyanashwe, vâikalenge palyutu lyauvéle mili wake Yesu, jumo áikele kumuti, junji kumadodo. ¹³ Vanavo kutwala kumudya, "Ajala, mwaa shani unkulila?" Nae kushidoni, "Ninkulila mwaa UMU wangu vanintwala na hangunamanya shinu kwavaukile nammika."

¹⁴ Bai nae andíshiliuka kulola panyuma kutwala kumwona Yesu àimidile kanji hashimanya. ¹⁵ Yesu kutwala kushidoni, “Ajala, mwaa shani unkulila? Da un-nambela nyani?” Nkongwe ona kenga munu ajo ni nkúkandyanga liteka, andímudya kushidoni, “Nang’olo, ikava kenga wako unintwala ngwaulila paummikile po, nintwale.” ¹⁶ Yesu kushidoni, “Maliya!” Nae kushiliuka kutwala kumwaulila mushibalaniya doni, “Laboni,” mana ake Mwalimu. ¹⁷ Yesu kushidoni, “Haunangukamule mwaa hangunava kukwela kuka kumwe Atata. Napane wena kwavanung’unumunu ukavaulile doni, ‘Ninkukwela kuka kumwe Atata, jo Tatagwenu; kwa Nnungu wangu, jo Nnungu wenu.’” ¹⁸ Maliya wa ku Magadalela ankuka ndavavalangangi-la vakwoda, “Ndimwona *UMU!*” Namomo ankuvalan-ganga avilá vyamalangangidile.

Yesu ankulilodya kwavakwoda

Mateu 28:16-20; Malukushi 16:14-18; Lukashi 24:36-49

¹⁹ Napanelo paiwikile yalyulo muliduva lyolyo litandi lyaishumana, vakwoda vake pavavéle po nnango vashimile kwamwaa wakuvajopa vayuda, Yesu andíinjila kwimila shing’ati shave kutwala kushidoni, “Amani ipagwe namu mwenu!” ²⁰ Akatangole davo andívalodya manda ake na mulumbau. Bai vakwoda vandípuwanga namene pavangwene *UMU*. ²¹ Napanelo Yesu andívaulila kavili kushidoni, “Amani ipagwe namu mwenu! Kenga mo mwangutumidididye nangu Atata, nanangu ninkuntumidya mwenu.” ²² Napavedoni, andívaavaedya Imumu kutwala kushidoni, “Pwashalela Imumu Wanashwe! ²³ Mukannivaliva munu madambi ake, munu ajo madambi ake andalivalivigwa. Napane mukanannivaliva munu madambi ake, munu ajo madambi ake halivalivigwa.”

Yesu ankulilodya kumwe Tome

²⁴ Napanelo Tome aijá áshimanyika Didimu, nkwóda jumo pakati pa avalá kumi na mbili, hapagwíte mulyutu alyo muwakati wavaumilidíle Yesu vavagwe. ²⁵ Vavagwe kutwala kumwaulila doni, “Tundimwona *UMU!*” Kanji nae kushidoni, “Nangu ndikanona makwanda amishumali mmakono mwake, ndikanajela shala shangu pavankamadile mishumali na ndikanajela lyanda lyangu mulumbau, hangukulupila.” ²⁶ Ishumana imo ikapite, vakwoda vake vandípagwa kavili pamo; nanae Tome kupagwa popo. Ata ikava kenga milango vandígalola, Yesu andílyumilidya pakati pave kutwala kushidoni, “Amani ipagwe namu mwenu.” ²⁷ Napane Yesu andímwaulila Tome kushidoni, “Jela shala shako apa, lola manda angu. Nyalodya nkono utwale ujele ndimbau. Haunauke mushu muungakulupila kanji kulupila.” ²⁸ Tome kushidoni, “*UMU* wangu na Nnungu wangu!” ²⁹ Yesu kutwala kumwaulila doni, “Ukulupila mwaa wakungwona? Vaalaligwe avalá vágagwene kanji vandikulupila.”

³⁰ Yesu andítenda vimanyikilo vinji vyoe pamevo pavakwoda vake víkaandikigwe mulibuku ali. ³¹ Avi vindyandikigwa pakulota mwenu mukulupile doni, Yesu

ni Klistu Mwanagwe Nnungu na kwakukulupila, mupate shingumi palina lyake.

Yesu ankulilodya kwavakwoda vake pa Galileya

21 Vikapite avyo, Yesu andífilodya kavili kwavakwoda vake nanyenje litanda lya Tibeliyade.

Kulilodya kwake ko kuvé doni, ² mulyutu alyo vandípagwa pamo Simoni Patulu, Tome áshimanyika Didimu, Nataniyele wa ku Kanaa ya ku Galileya, vanavake Shebedeu na vakwoda vanji vavili. ³ Simoni Patulu kutwala kuvaulila doni, “Mwanda ndaaka dyomba.” Vanavo kushidoni, “Tuke pamo.” Bai vakauka ndainjilanga mwingalava kanji ushilo uti havapatíle shinu shoeshoe.

⁴ Paushwenge wiko, Yesu andípagwa nanyenje litanda ila vakwoda havashimanya kenga aju Yesu. ⁵ Nae kutwala kuvadya, “Mmanavangu, hamuvenavo dyomba?” Vanavo do, “Um, mene.” ⁶ Nae kushidoni, “Jalangila lungau kunkanakono ko, mundapata dyomba.” Vanavo pavautile lungau lwo, havaulwíle kumya kwamwaa wakujola dyomba dyoe namene. ⁷ Napanelo nkwóda aijá áshinagwaleka namene namu Yesu andímwaulila Patulu kushidoni, “Aju *UMU!*” Bai Simoni Patulu paigwite davo, nae andítwala inguvo yake kugwala mwaa avele matakodavo kutwala kulijela mmedi. ⁸ Vakwoda vanji vandyúka na ingalava vautanga lungau lùumbele dyomba mwaa havavéle kushu na kumwangu shivele shitamba shakuwikila kenga mado-do tisini doni.

⁹ Pavashulukangidile kumwangu, vandyona moto na yomba jumo vànjanikidile pamakala na shibadu shaligung’u popo. ¹⁰ Yesu kutwala kushidoni, “Idanavo dyomba dinji dyamubyee ambi dyo!” ¹¹ Bai Simoni Patulu andíinjila mwingalava kutwala kuutila lungau kumwangu. Lwanavo lundyúmbala dyomba ding’umene miya imo na amusini na tatu. Ata ikave davo lungau halupapwíke. ¹² Yesu kushidoni, “Idananga mulye!” Hapagwíte ata nkwóda jumo e alyalavéke kumudya do, “Da wako unyani?” mwaa vandímanya kenga avele *UMU*. ¹³ Yesu andíavandika kutwala ligung’u alilá kuvaing’a na yomba yo, kutandela momo.

¹⁴ Au uvele mwanda wantatu avaumililila vakwoda vake ling’oto lyakudyuka pakati pavakupela.

Yesu ankundyuwangidya Patulu

¹⁵ Vakamalile kulya, Yesu andímudya Simoni Patulu, “Simoni mwanagwe Nshuwau, da wako unkungunagwaledya namene kuvapunda ava?” Nae doni, “Elo *UMU*, wako unku manya kenga ninkukunagwaledya.” Yesu kushidoni, “Valishe vangandolo vangu.” ¹⁶ Kavili Yesu kushidoni, “Simoni mwanagwe Nshuwau, da wako unkungunagwaledya?” Nae doni, “Elo *UMU*, wako unku manya kenga ninkukunagwaledya.” Yesu kushidoni, “Vashunge vangandolo vangu.” ¹⁷ Kutwala kumudya mwanda wantatu, “Simoni mwanagwe Nshuwau, da wako unkungunagwaledya?” Patulu shindímwida

shipalodi kwamwaa wakumudya mwanda wantatu doni, "Da wako unkungunagwaledya?" Napanelo anín-jang'ula do, " *UMU*, wako undimanya vinu uti na undimanya kenga nangu ninkukunagwaledya." Yesu kushidoni, "Valishe vangandolo vangu. ¹⁸ Ninkukwaulila mwiu mwiu doni, wako pauvele unnemba ushindalyunga inguvo yako na kuka kwoekwoe kwaulota; napane paulota kuva unang'olo po, unanyalodya makono ako † kutwala munu junji kukunga na kukuukanavo kwaukalatile." ¹⁹ Yesu andítangola davo amba inamuna yashipalelo shake Patulu mwalota kumpela Nnungu lishangelo. Patangwele doni, animwaulila, "Ngwoda."

²⁰ Napanelo Patulu akashiliuka kutwala kumwona aijá nkwóda washinnagwaledya namene Yesu amwoda. Aju avele aijá e atapíle muwakati wavashilya shakulya shashilo na amuudídye *UMU* doni, "Nyani álota

† *Malove a unanyalodya makonomana ake ni a kupambiligwa panshalaba.*

kukulimya?" ²¹ Patulu pangwene andyúdyá, " *UMU*, kushi aju?" ²² Yesu kushidoni, "Ikava kenga nangu ninkulota nae apagwe mpaka pangulota kwida, wako shako nyamani? Wako po, ngwoda!" ²³ Ni ashi shitadídye dyandavale dyabali pakati pavanung'unumunu dyakushidoni, "Nkwóda aju, mwiko hapela." Kanji hamwaulidíle doni, "Nae po, hapela," ila amwaulidile doni, "Ikava kenga nangu ninkulota nae apagwe mpaka pangulota kwida, wako shako nyamani?"

Kukumalilikila

²⁴ Aju ni nkwóda jojo áumya ushuda wavinu avi na áandike. Wetu tunkumanya kenga ushuda wake wo, wíu. ²⁵ Vipali vinji vyoe vyatandile Yesu. Leka kula shinu shàandikike, ngwona kenga mushilambo uti hainapagwe inapashi yakutosha kuvika mabuku akaandikike.

Vitendo vya Vamyombe

Imumu Wanashwe andaida

1 Nang'olo Teopilo! Mulibuku lyangu litandi kwandika, ndivalanganga vinu uti vyatandile Yesu na vyapundishidye kutunduvangila kunantandi ² mpaka muliduva lyaukile ndatanduligwa kuka kuwa ling'oto lyakumya malailililo na dimongo dya Imumu Wanashwe kuvapa vamyombe vake vavatandwele. ³ Ling'oto lyakupela nae andidyuka na andililodya myanda vyoe kumili kwave na vimanyikilo vikave ntau vyakulilodya nae kuwa mumi. Vanavo vandyonanavo muwakati wamaduva alubaini avalangangila ing'ano yautawala wa Nnungu. ⁴ Pakati pamaduva alo, muliduva limo vavele pamo, andivaanyaalela lilamulo aashidoni, "Hamunatumuke pa Yelusalemu apa; lindila ashilá shalivikile Atata shamungwigwite nimmalangangila. ⁵ Mwiu Nshuwau andibatisha na medi kanji mwenu mundabatishwa na Imumu Wanashwe muwakati wakuvandika."

Yesu ankutanduligwa kuka kuwa

⁶ Napanelo vakwoda vake vakaimang'anange vandímudya, " *UMU*, undadyuwangidya kavili ambi apa utawala kwavanaishilaeli?" ⁷ Nae kushidoni, "Mwenu haimmaikidile kumanya wakati na maiko ávikile Atata kwamadalaka ake jo mwene ⁸ kanji mwenu mundapata dimongo dya Imumu Wanashwe álota kumwidila na mwemwe mundava mmashuda vangu kutunduvangila pa Yelusalemu, ku Yudeya, ku Shamaliya mpaka mwisho washilambo." ⁹ Akatangole malove alo, nae kutanduligwa vanavo vamwona kwinjila mulyundi kutwala kugwalagwala pavakamwona kavili. ¹⁰ Vanavo valola kuwa ndoo, nae áukile, mwe! Popo po kwaneka vanu vavili vadikanju dyanashwe ¹¹ kutwala kushidoni, "Mmagalileya, mulalela nyamani kuwa? Jo Yesu wavamu midye pakati penu kuka kuwa, andaaloka kenga mo mwamumwanalele auka kuwa."

Lyutu limwe Yudashi lindivaikila adiva junji

¹² Napanelo vanavo vandyúma palishinga lyamilandi vyaulivela livéle pepi na pa Yelusalemu kuka ku Yelusalemu; lyutu ali lishitwala shitamba shamwanda waliduva lyakupumula. ^{†13} Vanu avo, yani Patulu, Nshuwau, Tiyagu namu Andaley, kwida Pilipo, Tome, Balutolomeu namu Mateu, kwatika Tiyagu mwanagwe

† Shitamba ashi shivele kenga shuuluta shimo doni shashuulula kuwena munu kwabila kupujungula lilamulo lyaliduva lyakupumula.

Alupeu, Simoni aijá Shelote namu Yudashi mwanagwe Tiyagu, pavawikile nkaja amulá vandyúka ndainjila mushumba shavawikidile shapashanya ulungu. ¹⁴ Bai vanavo uti kwaunapamo vashindashwali; vashindashwalinavo Maliya anyoke Yesu na vanung'unuvake Yesu pamo na vakongwe vanji.

¹⁵ Napanelo muwakati awo muliduva limo vandíkadyanianga vanung'unumunu vakuwikila kenga imiya imo na ishilini kutwala Patulu kutakatuka pakati pave kutangola doni, ¹⁶ "Mmanung'unumunu, Maandiko atangwele kala Imumu Wanashwe kwaindila imwe Daudi andivaikila awikile popo; Maandiko lo amwamba Yudashi, nannimya wakulangalalela shipinga shinkamwile Yesu ¹⁷ mwaa nae avele munu wamushipinga shetu na jojo jo, vanínjavila imbandi muutumika au." ¹⁸ Mwenu, munu aju andíshuma lyutu kwapaidya yashitendo shaungave-shaliya; palyutu lyolyo lyo, nae andígwanga kutwala kutumbuka utumbu kupushuka. ¹⁹ Shitendo asho vayelusalemu uti vandígwa; ni ashi shitadídye mwinangodi yave lyutu alyo vasheme Akelidama yani lyutu lyamyadi. ²⁰ Patulu andyúka mushu aashidoni, "Mulibuku lya Dimu vandyandika doni,

" Ing'ande yake ive lidembe

hanapagwe munu wakwikala kavili mulyutu alyo.' ^{††} Kutwala kavili kushidoni,

" Shinang'olo shake akamule junji.' [‡]

²¹ Napavedoni jumo pakati pavalume valyunganiéngé namu wetu muwakati uti washitupamba *UMU* Yesu ²² kutunduvangila paubatiso umwe Nshuwau mpaka muliduva lyavantandwile *UMU* Yesu pakati petu kuka kuwa, jumo pakati pavalume avo ave nshudamwetu wakudyuka kwake Yesu." ²³ Bai vandívalodya vanu vavili: Yoshe áshimanyika kwalina lya Balishabashi na lya Yustu na kunnodya Matiyashi. ²⁴ Kutwala apo vandíshwali vaashidoni, " *UMU*, wako úmanyite mitima vyanu uti tulodya wauntandwele pakati pavanu vavili avo ²⁵ wakutenda imbandi muutumika au waumyombe wo waukile ndaashela Yudashi kuka lyutu limmaikidile." ²⁶ Vakatende shimwavi shinínkalela Matiyashi; nadoni nae vanímpambanianga mushipinga shavamyombe kumi na moja avalá.

Muliduva lya Pentekoste

2 Napanelo liduva lya Pentekoste likawike vakwoda vake Yesu uti vandípagwa pashinu pamo. ^{‡‡2} Kwashingangala, kuwa kwaloka lidi lyakuuluta ken-

†† Lola Dimu 69:25. ‡ Lola Dimu 109:8.

ga kupunga kwaimepo yadimongo kutwala kwanela uti nng'ande mwavaikaléngé. ³ Kutwala apo, vindyáne-ka vinu mwadindimi dyamoto dyakujavanikana na kula shinu shitulidile pamuti pakula munu ⁴ kutwala vanu avo uti kuvaumbala Imumu Wanashwe na kwatuka kutangola dinangodi dyakuvilingananga kwodana na lyululilo lyavapéle Imumu.

⁵ Napanelo ku Yelusalemu vashindaikala vayuda vanu vakulipudya ngwengwe kwa Nnungu ve vaalakadile muvenentete uti vamushilambo shapai. ⁶ Kuuluta akulá kukaigwinike, imbumba yavanu indikadyania kutwala vovo vo kushanga mwaa kula munu vanu avo ashivaigwa vatangola mwinangodi yake mwene. ⁷ Bai vanavo vashangile na divapulugike ding'ano vandyúdyania, "Da vanu ava uti vatangalánga apa ava i vagalileya ava?" ⁸ Kanji mwaa shani wetu apa uti pavatangola vanavo kula munu pakati petu ankuvaigwa mwinangodi yake yashing'ang'eng'e? ⁹ Apa tupali tuvalipaliti, tuvamedi, tuvaelami, twálakadile ku Meshapotamiya, ku Kapadokiya, ku Pontu, ku Ashiya, tuva ku Yudeya akuno, ¹⁰ twálakadile ku Piligiya, ku Pampiliya, ku Mishili, twálakela ku Libiya twíkala pepi na pa Kulene, twálakela kunjini wa Loma, ¹¹ tuvanji tuvayuda na kavili tuvanji túliinjidyenge, twálakadile ku Kaleta na tuvanji kwavaalabu; kanji wetu apa vanavo pavatangola vavalanga vitendo vyakujowa vya Nnungu tunkuvaigwa mudinangodi dyetu tuvene dyashing'ang'eng'e!" ¹² Bai vanavo vashangile na vadhubele vashindaudyaania, "Da shitendo ashi shilodya nyamani?" ¹³ Vanji pakati pave kuvakajola vaashidoni, "Vandyambalwanga ugwalwa avo."

Lipundisho limwe Patulu pa Pentekoste

¹⁴ Napanelo Patulu andítakatuka pakati pavavagwe kumi na moja avalá kutwala kutangola pashanya po, amanyiya imbumba kushidoni, "Mmayudeyamwangu pamo na mwenu múnama pa Yelusalemu, tela matu enu mwigwe vyangulota kummalangangila. ¹⁵ Mwankumbukilila mwenu mo, i mwanavo. Vanu ava vaambalwidye dashi na ashi ni satatu! ¹⁶ Doni, ashi ni ashilá shitangaléke kwaindila yankúlava Yoweli aashidoni, ¹⁷ " 'Mumaduva amwisho, atangola Nnungu, vanu uti ndavamiminila Imumu wangu. Vanavenu valume na vakongwe vandalava, vanemba venu vandaona maono, vanang'olo venu vandalatanga dindoti. ¹⁸ Ata kwavatumwa vangu valume na vakongwe, mumaduva lolo lo, ndavamiminila Imumu wangu na vandalava. ¹⁹ Kuwa kumaundi ndalodya vyakutikinikanga, mushilambo shapai ndalodya vimanyikilo, vindaaneka myadi, moto na lyoui yakutita dimumu. ²⁰ Liduva lindava shii, mwedi kuwa myadi, liduva limwe *UMU*, liduva lyo likumene na lyalishangelo,

†† Liduva lya Pentekoste ni liduva lyashikukulu yani liduva lyaamusini ling'oto lyaliduva lya Pasaka.

likanava kuwika.

²¹ Napane ilota kuwa doni, woewoe átambulanga lina limwe *UMU*, andaambwalegwa.' " †

²² Patulu kutwala kuka mushu aashidoni, "Mmanaishilaeli ngwigwa! Yesu nnashaleti, munu áakikishigwe pamevo penu kwavyamakango, vyakutikinikanga na vimanyikilo vyatandile Nnungu kwenu mwenu kwaindila yake nae kwodananavo mwamumanyilile mwemwe mmene, ²³ munu aju vaninkamudya kwaishabaa na imanyika kaladavo na Nnungu, mwenu jojo jo, kwalipwashalelo lyavaungave-lilamulo muninkamela panshalaba kutwala kumpedya. ²⁴ Kanji napane jojo jo, Nnungu anindyuwa pakati pavakupela amposha mumauvilo akupela mwaa haishuulukika kupela kundingile. ²⁵ Ing'ano yo yake nae ai Daudi atédoni,

" 'Ngushindamwona *UMU* wangu ngwengwe pamevo pangu

mwaa nae anakupagwa kunkanakono kwangu kwambangidya hangunajagajega.

²⁶ Ni ashi shitadídye ntima wangu upuwange, lulimi lwangu lulitamange na ata mili wangu undapagwa mulilindilililo.

²⁷ Mwaa wako hawambukanga ungumi wangu kumoka

na ata haunneka Nkwílimyanga wako alinge kunda.

²⁸ Wako uningulangudya dindila dyashingumi, unanguumbadya lipuwilo kwakupagwa kwako.' ††

²⁹ "Mmakwetu leka nimwaulile shana doni, nakulugwetu Daudi andipela namomo vaninshika na shonga shake shipali mpaka nelo apa. ³⁰ Napane jo Daudi jo, avele nkúlava na amanya doni Nnungu andilivikila kwakulilapa kenga jumo wamuudukulu wake andadiva pashiumu shake, ³¹ nae andyóna kaladavo na kutangola yakudyuka kumwe Klistu ‡ kenga havamwambukenge kumoka na ata mili wake haulingile kunda. ³² Jo Yesu aju, Nnungu anindyuwa na wetu apa uti ni tuvashuda vashitendo asho. ³³ Nae pavankwadidye vammika kunkanakono kwake Nnungu na pampatile Imumu Wanashwe walivikidile Tata-munu, andimiminila uti avi vyamwona na vyamwigwa.

³⁴ Mwenu, Daudi hakwadile kuwa kanji jojo jo atédoni, " ' *UMU* andimwaulila *UMU* wangu,

Ikala kunkanakono kwangu

³⁵ mpaka nangu vamongo vako, ndivatende kuwa lyutu lyakuluvatila.' ††

³⁶ Napanelo mmaishilaeli uti ikala mumanya shalowa doni, Yesu jo, jo wamunkamadile panshalaba jo, Nnungu anintenda kuwa *UMU* na kuwa Klistu."

³⁷ Bai vanavo vakaigwe malove ala, vindívabuka mitima kutwala kumudya Patulu pamo na vamyombe vanji kushidoni, "Mmanung'unumunu, napanelo wetu po tutandelé mwashi?" ³⁸ Patulu kushidoni, "Lijugulange na kula munu apate ubatisho palina limwe Yesu Klistu

† Lola Yoweli 2:28-32. †† Lola Dimu 16:8-11. ‡ Klistu kwali Masiya ni aijá mwamboli walivikile Nnungu kuntumidya kwida. †† Lola Dimu 110:1.

kwakulivalivigwa kwamadambi enu na mundapata inu udyo ya Imumu Wanashwe. ³⁹ Mwaa kulivikila aku ni kwenu mwenu, kwaudukulu wenu na kwauti vavelé kushu; uti avalá vashamégwa namu *UMU*, jo Nnungu wetu." ⁴⁰ Napane kwamalove anji oe ashindaumya ushuda na auka mushu avajugwangila kushidoni, "Liposhe mushaushanga shiidíla udukulu au wantau." ⁴¹ Napanelo vanu avalá vapakadíle lilove lyake vandí-pata ubatisho; muliduva alyo vandílyunganianga kwavakwoda vanu vakuwikila shikonda shavanu dyalupu nnatu.

Shinamidyo shavakwoda vatandi

⁴² Napanelo vanavo vashindangaikangila mapundisho avamyombe, upamo, kumajananga ligung'u na kushwali.

⁴³ Bai vishindatandeka vyakutikinikanga na vimanyikilo kwaindila yavamyombe, nadoni mmitima vyavanu uti mushindapagwa kujopa. ⁴⁴ Napanelo uti avalá vashikulupila shavo shishiva shimo na vinu uti vishiva vyaupamo; ⁴⁵ vashindashumidya vinu vyave kutwala njuluku kuukanavo ndajavananga vamupa kula muni kwodananavo vishimwova pamili pake. ⁴⁶ Liduva kwaliduva vakadyania mwing'ande ya Nnungu, vama-jananga ligung'u muding'ande, vashindamajananga kula muni na muje kwamitima vyalipuwilo na vyakujaulanga, ⁴⁷ vantumbyanga Nnungu na vavanavo litananilo kwavenentete uti. Bai liduva kwaliduva *UMU* ashindavaanjadyyedya vanu vakwambolegwa.

Patulu ankumponia wakudidimanga madodo

3 Muliduva limo muwakati wasatisa wakati wakushwali, Patulu namu Nshuwau vauka shalumo kwing'ande ya Nnungu. ² Koko ko, vanu vaninyukata muni wakudidimanga madodo tangu mmunda mwanoyoke, muni wavashimmika kula liduva panango waing'ande ya Nnungu wavashishema Nnango-wakwalala atende avajugwajugwa njuluku vanu vashinjilila apo. ³ Muni aju akamwone Patulu namu Nshuwau vainjila mwing'ande ya Nnungu nae andíva-jugwa. ⁴ Patulu na muje kunnola ndoo, kutwala kushidoni, "Tulola wetu apa!" ⁵ Nae apalá, ng'amung'amu, kuvalola ona kenga andapata shinu shoeshoe. ⁶ Kanji Patulu kushidoni, "Hanguve njuluku kanji sho shanguvenavo sho ndakupa; palina limwe Yesu Klistu wa ku Nashaleti, takatuka uwene!" ⁷ Patulu kunkamula nkanakono kumwimidya kutwala muni jo madodo ake na malundi, kuliimiliyangidyanne. ⁸ Nae kudaloka kutunduvanga kuwena, kwinjila shalumo namu vavano mwing'ande ya Nnungu awena, adalakangana antumbyanga Nnungu. ⁹ Vanu uti kutwala kumwona awena na antumbyanga Nnungu ¹⁰ na vandímanya kenga ni muni jojo áshikala ajugwajugwa pa Nnango-wakwalala waing'ande ya Nnungu. Bai vanavo vandítikinanga na vandíshanga shitendo ashoo.

Patulu ankuvalangangila ntenga vayuda

¹¹ Napanelo muni aijá ànamatidile kumili kwake Patulu namu Nshuwau mulukoma lwake Shalomoni, vanu uti vandítukutula koko vashangile. ¹² Patulu pagwene davo, andívautila vanu avo kushidoni, "Mmanaishilaeli! Mwaa shani munkushanga shitendo ashoo na mwaa shani munkutulola namene? Da mwona kenga muni aju tumwanaidyé kwadimongo dyetu wetu kwali kwaunungu wetu wetu tuvene?" ¹³ Nnungu umwe Abulaamu, umwe Ishaki, umwe Yakobo, Nnungu jojo wavanakuluvetu aninkwedya amupa lishangelo Yesu ntumika wake, jo wamunkamudidye mwenu na kumwita pamevo pamwe Pilatu paukile ndaamuwa nae amuungule. ¹⁴ Kanji mwenu mundimwita Wakwilimiyanga na Waishaliya kutwala kujugwa vamuungulile nkúbyaa. ¹⁵ Napavedoni, mwenu munimpedya mwene shingumi kanji napane Nnungu, jojo jo, anindyuwa mushipinga shavakupela na wetu nelo tuvashuda vashitendo ashoo. ¹⁶ Napanelo dimongo dyalina limwe Yesu dinintadya muni aju wamumwona na wamummanyite, aliimiliyange. Andiliimiliyanga mwaa wakukulupila lina limwe Yesu; likulupililo lyolyo linditadya aju aponele uti kenga mwenu uti munkwona. ¹⁷ Mmanung'unumunu, nangu ndimanya kenga mwenu pamo na vakutawala venu munditenda shinu ashoo pamukamanya shamutenda. ¹⁸ Kanji napavedoni, Nnungu anditandedya ashilá shatangwéle kala kwaindila yavakulava vake uti kenga Klistu wake inimmaikila auvauvange. ¹⁹ Nadoni lijugulange na nshiliukile pakulota madambi enu alivalivigwe ²⁰ na wakati wakuliimiliyanga umwikile mwenu walakela pamevo pake *UMU* na kwambangidya ampalakadyedye Klistu wampangidile tangu kala, aijá Yesu. ²¹ Jo Yesu jo inimmaikila apagwe kuwa mpaka muwakati ulóta kukandyangigwa vinu uti, wakati wowo wavalangenge Nnungu tangu kala kwaindila yavakulava wakwilimiyanga. ²² Mwenu, Musha atédoni, *UMU*, jo Nnungu wenu anantakatuwa pakati pavanung'unumunu venu nkúlava jumo kenga nangu. Nkúlava ajo, kula shinu shalota kutangola, mwigwilile. ²³ Muni akanamwigwilila nkúlava ajo, andaapuligwa mushipinga shavenentete na andabamolegwa. [†]

²⁴ "Vakulava uti kutunduvangila Samuwele na vanji uti vamwatíke nae vandivalanganga vitendo vyamaduva ala. ²⁵ Mwenu munkupata vyalivikile Nnungu kwavakulava na munkupata avilá vyalivikile pampangile imbodi vanakuluvetu pamwaulidile Abulaamudoni, 'Kutunduvangila kuudukulu wako makola uti amushilambo shapai andaalaligwa.' ²⁶ Nnungu pan-takatuwidye ntumika wake, ampalakadidyé shitandi kwenu mwenu pakulota amwalaliye anshinjiula kula muni mushinamilo shake shakunyata."

Patulu namu Nshuwau paikamati

4 Napanelo Patulu namu Nshuwau vatangola na venentete mwing'ande ya Nnungu, vandívaídila

† *Lola Kumbukumbu 18:15, 18-19.*

vakulangalalela-shadaka, nang'olo wavakushunga-ing'ande ya Nnungu namu mashadukayo ² akuno ivap-wateka namene mmitima mwaa vanavo vashinda-pundisha vavalanganga doni, nkati mumwe Yesu kunkupagwa kudyuka kwavakupela. ³ Nadoni vandí-vakamula kuvajalenneu nkalaboshi mwaa wakuva lyulo kulindila wiko ulangale. ⁴ Kanji vanu voe pakati pave vaigwite lilove, vandíkulupila. Vanu avo vandíwikila shikonda shavalume kenga dyalupu mwanu doni.

⁵ Napanelo palyamba lyake vakutawala vave pamo na vanang'olo na vamwalimu vadishaliya vandikadyania pa Yelusalemu. ⁶ Popo po, andípagwa Anashi nkúlangalalela-shadaka nkumene, Kaipashi, Nshuwau, Alishandele na kupagwa vanu uti valikola alyo lyankúlangalalela-shadaka nkumene. ⁷ Vanavo kuvatwala vapatulu kuvaimidya pakati kutwala kushidoni, "Mwenu mumponidyé dashi muni aju? Kwadimongo shani na palina limwe nyani munkutenda vinu avi?" ⁸ Patulu pamuumbe Imumu Wanashwe andíva-jang'ula kushidoni, "Mmakutawala vavenentete na mmanang'olo!" ⁹ Ikava kenga nelo tunkulalyangigwa kwaing'ano yashitendo ashi shambone shintandéke muni aju e avéle wakudidimanga madodo mwaponedile, ¹⁰ bai mwenu apa na mmanailaeli uti ikala mumanya kenga ni palina lyake Yesu Klistu wa ku Nashaleti wamunkamadile mwenu panshalaba kutwala Nnungu kundyuwa pakati pavanu vapidile, kwadimongo dyake nae muni aju áimidile mushu mwenu andípata kupona. ¹¹ Nae ni,

"Ijanga lyamwiludyenge mwenu mmakudenga kanji lyolyo lyo, lindiva lijanga shii lyavavikile palitununa."

¹² Hakunapagwa shinu kwambolewa kwaindila yamuni junji mwaa mushilambo shapai, halipali lina linji lyajawile Nnungu kuvapa vanu kulota livaambole."

¹³ Napanelo vakone ntima shii umwe Patulu namu Nshuwau vamanya kenga vavele vanu vákashamidye na vanu vila tu, vandíshanga namene kutwala kwanalela kenga vovo vo, vandinama namu Yesu.

¹⁴ Kanji mwaa wakumwona muni wavamponidyé vavenavo shalumo, vanavo vandídubwala. ¹⁵ Nadoni vandívakumulanga vapatulu palyutu lyanguguvale kutwala vene kwikala valya shemba ¹⁶ vaashidoni, "Da vanu ava apa tuvatandele mwashi? Mwaa kula muyelusalemu andimanya ngala kenga shimanyikilo ashi shakushanganiya, vatandadidyé vanavo na ata wetu shitendo ashi hatukania. ¹⁷ Kanji pakulota shitendo ashi hashinauke mushu shiigwinika kwavenentete leka tuvatishange kwambangidya havanavalangange kavili lina ali kwamuni woewoe." ¹⁸ Napavedoni vandí-vashema vapatulu kuvaulila doni, "Tunkunneya, hatutamwa ata padyoko vela kumwigwa kavili muvalanganga na muvapundisha vanu palina limwe Yesu."

¹⁹ Kanji Patulu namu Nshuwau kuvajang'ula kushidoni, "Da ni shambone pamevo pake Nnungu kumwigwilila mwenu kwali kumwigwilila Nnungu? Amuwa mwemwe mmene! ²⁰ Mwaa wetu apa, vyatwona na vyatwigwa hatuulula kuleka kutambulanga." ²¹ Nadoni

vakavatishange kavili vandívaleka, havapatíle indila yakuvapela shaushanga kwamwaa wavenentete mwaa uti vashindamupa lishangelo Nnungu kwamwaa washitendo asho. ²² Doni, muni jo washintandéke shimanyikilo ashi shakuponia, andívanavo ulinga wavyaka vyakupunda alubaini doni.

Kushwali kwakujugwa dimongo

²³ Napanelo pavaukile ndaunguligwa, vandyúka kwavavave ndavavalangangila vyavavatangaladile vanang'olo vavakulangalalela-shadaka pamo na vanang'olo. ²⁴ Vavave pavaigwite malove alo, kwaunapamo vandyúmya lidi vatangola na Nnungu vaashidoni, "UMU Wadimongo-uti úkandyenge kuwa na pai, imanga pamo na vinu uti vipagwite amo ²⁵ útangwele kwa Imumu Wanashwe kwaindila yaikanywa yanakulugwetu Daudi ntumika wako uushidoni,

"Mwaa shani vamidi vankushimwa na venentete kupanga milugu bule?"

²⁶ Vaumu vamushilambo vandinyanyamala vakutawala vandikadyanianga uti vampinge *UMU*, vampinge Wakupakigwa wake.' †

²⁷ Namwiu, Elode, Ponji Pilatu, vamidi pamo na vanaishilaeli vandíkadanyianga nkaja amu pakulota vapange milugu vyakumyaa ntumika wakwilimyanaga áalakadile kwako, Yesu waumpakile mauta.

²⁸ Vandíkadanyianga pakulota vitandéke avilá vyau-pangidile tangu kunantandi kwadimongo dyako na malotelo ako. ²⁹ Napanelo *UMU*, lola mevo mavili mitisho vyave utupe dimongo tuvatumika vako pakulota tuvalangange lilove lyako patukajugulanga shinu ³⁰ akuno unyalodya nkono wako kwakuponia, kwavimanyikilo na kwavyakutikinikanga palina lyantumika wako wakwilimyanaga, Yesu." ³¹ Bai pavamalidile kushwali, palyutu lyavakadyaniéenge pandíndangenda, vanavo uti kuvaumbala Imumu Wanashwe na vashindavalanganga lilove lya Nnungu pavakajugulanga shinu.

Shinamidyo shaupamo shavakwoda

³² Napanelo imbumba ya avalá vashikulupila, ntima wavo uele umo wowo; hapali muni ashona kenga ashilá shavenavo shàke mwene gweka kanji kula shinu shishiva shaupamo. ³³ Vamyombe vashindataa ushuda na dimongo namene ing'ano yakudyuka kwake *UMU* Yesu na umonyo ukumene ushindapagwa na vanavo. ³⁴ Pakati pave hashipagwa áshuuvauvangila shinu mwaa avalá vashivanavo mushinu kwali ding'ande vashindashumidya, ³⁵ njuluku wo kuvakamudya vamyombe, vamyombe kunjavila kula muni kwodana na avilá víshimwova pamili pake. ³⁶ Nadoni pakati pavanu avo, mulawi Yoshe muni wa ku Kupulu wavashinshe-ma vamyombe Balinaba kwakuvalangangila mana ake nkúnonowanga, ³⁷ andíshumidya lishamba lyake lyavenavo njuluku wo, kuka ndavakamudya vamyombe.

† *Lola Dimu 2:1. Kwali: a ...vampinge Klistu wake.*

Kuukumigwa kumwe Ananiya namu Shapila

5 Kanji napanelo, munu junji wavashinshema Ananiya pamo na ndyagwe Shapila, momo vandishumidya pashinu pave. ² Njuluku wo nae unji kutitikulila, ndyagwe shitendo asho kuungila nkono kutwala unji kuka ndavakamudya vamyombe. ³ Patulu kutwala kumudya, "Ananiya, mwaa shani uninneka Shatwani akuumbala muntima ata mpaka kushang'apila Imumu Wanashwe na kutitikulila njuluku unji walishamba Iyaushumididye? ⁴ Lishamba Iyo ukanava kushumidya livele lyako na ata paushumididye apa njuluku wo mwiu wako wakulota wako kutumila mwaulatela umwene. Kanji mwaa shani unditunga ding'ano adi muntima mwako? Bai manya kenga haunduwenge munu, unduwenge Nnungu." ⁵ Ananiya po paigwite malove ala, andijanguka apadile. Vanu uti vaigwite shitendo asho vandijopa namene. ⁶ Bai vanemba vakantatela mwishanda vakanyukata kuka nanshika.

⁷ Napanelo dikapite disaa kenga nnatu doni, ndyagwe pakamanya shitandéke akainjila nng'ande amulá, ⁸ Patulu kumudya, "Da njuluku walishamba Iyamushumididye na ntwavo ni wowo au bai?" Nae kushidoni, "Elo, ni wowo wo bai." ⁹ Patulu kutwala kushidoni, "Ivelé dashi mwenu kuunganila kunninga Imumu umwe *UMU*? Lola, vanemba vavéle pannango vo, vauja kukunshika ntwavo, nawako vandakunyukata momo." ¹⁰ Shapila apalá kugwenne apadile kugwilila mushu mwake Patulu. Vanemba pavijidile nng'ande amulá vaninkodya apadile; vanavo kunnyukata kuka nanshika pavanshikile ntwagwe. ¹¹ Nadoni kujopa kukumene kundiidila liganiha pamo na uti vaigwite dyabali dyavitendo avyo.

Vyamakango na vyakutikinikanga

¹² Bai kwaindila yavamyombe, vishindatandeka vi-manyikilo na vyakutikinikanga pakati pavenentete na vakwoda uti vashindakadyania kwaunapamo mulukoma Iwake Shalomoni. ¹³ Napanelo mulyutu alyo vanu vakavele vakwoda hapali áshilyalaveka kulyunganianga namu vanavo, ata ikava kenga venentete uti vashindavashibanga namene vakwoda. ¹⁴ Bai dimbumba dyavalume na dyavakongwe dishinkulupila *UMU* dishindaanjadyeka namene. ¹⁵ Kwodana na vitendo avyo, venentete vashindavaumya valwele muding'ande kuka ndavaladya mudigoli na mmakande kulangele pakulota Patulu papita kananga shimbedi vela ashi shiviinikidye. ¹⁶ Na ata dimbumba dyavanu dyakwaloka mumakaja ashitanono, vashindaumbalanila pa Yelusalemu na valwelwe vave pamo na vanu vashuu-vauvanga na majini mashapu uti vashindapona.

Kupapatigwa kwavamyombe

¹⁷ Napanelo nkúlangalalela-shadaka nkumene pamo na vavagwe uti vavele vamushipinga shamashadukayo, vandítunduvanga kuvaanangila

ing'ou vamyombe. ¹⁸ Nadoni vandívakamula vamyombe kuka ndavajela nkalaboshi yankaja amo. ¹⁹ Kanji shilo shake liduva alyo njelo wake *UMU* akashimulanga milango vyakalaboshi, akavaumidya panda kutwala kuvaulila doni, ²⁰ "Wena mukalilodye kwing'ande ya Nnungu mukavape venentete malove a Shingumi ashi." ²¹ Bai vamyombe vakaigwilile malove alo; Iyamba linyeiku vandyúma kuka kwing'ande ya Nnungu ndavapundisha venentete.

Napanelo nkúlangalalela-shadaka nkumene pamo na vavagwe vandívanavo nguguvale wavanangan-galaledi vamaakaja va ku Ishilaeli. Vanavo kutwala kuvatuma vakulaledya vauke vakavatwale vamyombe kukalaboshi. ²² Vakushunga vakauke kukalaboshi, vamyombe havavakodidye kutwala kuja kuka ndavalanganga kwavanang'olo ²³ kushidoni, "Mwe! Wetu tundyuka mpaka kukalaboshi; wetu kukodya milango uti vágagowidye shana, vakulaledya vaimilenge panda vashunga kanji patushimwile, nkati kukodya vyo, ngwe!" ²⁴ Bai nang'olo wavakushunga-ing'ande ya Nnungu pamo na vanang'olo vavakulanganalalela-shadaka pavaigwite dyabali adi vandítikinanga kutwala kushidoni, "Ing'ano ai ilota kuva dashi!" ²⁵ Napanelo popo po, andíwika munu jumo kutwala kushidoni, "Mwenu, vanu vamuvajadile nkalaboshi vo, avalá paing'ande ya Nnungu po, vankuvapundisha venentete." ²⁶ Bai nang'olo wavakulaledya pamo na vakushunga vakauke vandívatwala vamyombe kwasiyasa vavajopa venentete kuvaamanga majanga.

²⁷ Napanelo vakavaidenavo vandívaimidya shing'ati nguguvale kutwala nkúlangalalela-shadaka nkumene kuvanyika ²⁸ aashidoni, "Da mwenu wetu hatunnaidye ngala kupundisha palina Iyamunu ajo? Shapo lola, nkaja mu Yelusalemu amu malove enu andyaandavala uti na ata mpaka mulota twitikange yamyadi vyamunu aju." ²⁹ Kanji Patulu pamo na vamyombe kujang'ula doni, "Kudyanga kumwigwilila Nnungu kuliko kuvaigwilila vanu. ³⁰ Nnungu wavanakuluvetu anindyuya Yesu, munu wamummyee mwenu kwaindila yakunkamela panshalaba. ³¹ Jojo jo, Nnungu animmika palyutu lyashimbili kunkanakono kwake antenda kuva Nang'olo na Mwamboli kwambangidya avape vanaishilaeli kulijugulanga na kulivalivigwa kwamadambi. ³² Wetu apa pamo na Imumu Wanashwe wanjawile Nnungu kuvapa vanu vamwigwilila ni tu-vashuda vavitendo avyo."

³³ Napane vanavo pavaigwite malove alo, vandínyanyamukanga kulota kulumulila kuvovya shingumi. ³⁴ Kanji munu jumo mpalishayo wavashinshema Gamaliyele mwaliimu wadishaliya na wavashimwishimu namene venentete, andíimila panguguvale kulumulila vavaumidye padyoko panda vamyombe ³⁵ kutwala kushidoni, "Mmanaishilaeli! Lilaledye na vitendo vyamulota kuvatenda vanu ava. ³⁶ Muvyaka vyapanyuma padyoko, andyúmilila Teudashi munu áshilivika kuva wakwishimika; vandílyunganianga namu nae vanu vakuwikila shikonda kenga shadimiya nsheshe doni. Kanji pavamwovidye shingu-

mi, avalá uti vâshinkulupila vandímwadilikananga kutwala ing'ano ayo kumalilikila popo. ³⁷ Kutwala apo, muwakati washaandika shavenentete andyúmilila Yudasshi wa ku Galileya; nae andívashomba vanu voe kanji vakampedye, avalá uti vâshinkulupila vandí-jaikananga. ³⁸ Napavedoni kwaing'ano ai ninkumwaulila doni, vanu ava hamunavaavalele mwaa ivelé doni, nnugu au na shitendo ashi vikava vyakubuni vanu, vindatimbikanga ³⁹ kanji vikava vya Nnugu hamuvaulula kuvatema na ata inkuululika mwenu kupagwa mukumpinga Nnugu." Bai vanavo vandyúngila nkono. ⁴⁰ Nadoni vakavashema vamyombe avalá vakavashapa viboko kutwala kuvaduma havanatangole palina limwe Yesu na kuvaleka vauke. ⁴¹ Vamyombe vandyúma panguguvale awo vapuwanga pakuva vandivalangiligwa aki yakunyambikanga kwamwaa wa Lina ali. ⁴² Bai vanavo kula liduva mwing'ande ya Nnugu na muding'ande dyavanu, havashilakela kunyuma kupundisha na kummalanganaga Yesu kuva Klistu.

Kutandalegwa kwavanu saba

6 Napanelo muwakati washishaanjadyeka shipinga shavakwoda, avalá vâshitangola shigalegu vashindavatangadikanga vabalaniya mwaa vanamwili vave vashindalivalivigwa mulipwashalelo lyakula liduva. ² Bai vamyombe kumi na mbili avalá vandíshema imbumba yavakwoda uti kutwala kushidoni, "Hashina-va shambone wetu kuleka kuvalanganga lilove lya Nnugu pakulota tutumike pandamu." ³ Napavedoni mmanung'unumunu vatandole vanu saba pakati penu vaushuda wambone, vakuvaumbala Imumu Wanashwe, valimanyilo tuvakamudye shimadengo ashi ⁴ pakulota wetu apa ngwengwe tupagwe mukushwali na mukutumikila lilove. ⁵ Malove ala imbumba yavakwoda uti andívanagwela. Nadoni vandívatandola vanu ava: Shiteva munu walikulupililo lyoe na wakumuumbala Imumu Wanashwe, kwatika Pilipo, Polokolo, Nikanoli, Timoni, Palamena namu Nikolau munu wa ku Antiyokiya e aliinjidyéngé mwidini yavayuda. ⁶ Kutwala apo, imbumba indívalodya vanu avo kwavamyombe kutwala vamyombe kushwali na kuvavikila makono. ⁷ Nadoni lilove lya Nnugu lishindaandavala; pa Yelusalemu vakwoda vashindaanjadyeka na vakulangalalela-shadaka voe vashindaigwilila likulupililo.

Kukamuligwa kumwe Shiteva

⁸ Napanelo Shiteva àumbaligwidye umonyo na dimongo ashindatenda vyakutikinikanga vikumene na vimanyikilo pakati pavenentete. ⁹ Napavedoni vanu vashitala shakulipudidya shavashishema "Shavanu vamuunaiti" pamo na vaalakadíle ku Shilene, ku Alishandaliya, ku Kilikiya na ku Ashiya vandíbuwa ntau namu Shiteva ¹⁰ kanji havashuulula kutauka limanyilo na Imumu Wanashwe áshinnangalalela nae mukutango-la. ¹¹ Napanelo vandívonga vanu pakulota vankanidyange Shiteva kenga vandimwigwa ankupulu

Musha na ankupulu Nnugu. ¹² Nadoni vandí-vakang'ela venentete, vanang'olo pamo na vamwalimu vadishaliya kutwala kuka kwashingangala nankamula Shiteva kumuukanavo kunguguvale. ¹³ Po panguguvale po, vandívaivanavo vashuda vakushang'apa vâshishidoni, "Munu aju ngwengwe ankwabwalanga lyutu ali lyakwilimiyanga na ankwiludyanga Lilamulo. ¹⁴ Wetu tundimwigwa atangola kenga ashii Yesu wa ku Nashaleti andabamola lyutu ali na kupindikulanga yadi yatulakadile Musha." ¹⁵ Bai vanu uti ve vaikaléngé panguguvale awo, vakannole ndoo Shiteva, vandyóna ing'ope yake kuva kenga yanjelo.

Shiteva ankulishilidya panguguvale

7 Kutwala apo, nkúlangalalela-shadaka nkumene andímudya Shiteva kushidoni, "Da vyavakwaula avi vù?" ² Shiteva kushidoni, "Mmanung'unumunu pamo na mmatatamunu, ngwigwa! Nnugu walis-hangelo andímuumililila nakulugwetu Abulaamu ku Meshapotamiya akanava kwikala ku Alani ³ kutwala kumwaulila doni, 'Leka shilambo shako, leka likola lyako uke kushilambo shangulota kukulangudya.' ⁴ Nae kuma kushilambo shavakaladeu kuka ndaikala ku Alani. Papadile tatake, Nnugu anínnangalalela kwida mushilambo shamwikala mwenu ashi. ⁵ Mushilambo shosho ashi, Nnugu Abulaamu hampele ata shitamba shalidodo limo shaulongo kanji andílivikila kumupa shive shake pamo na udukulu wake ata akanava kumpata mwana.

⁶ "Napanelo Nnugu andímwaulila Abulaamu kushidoni, 'Vanu vamuudukulu wako vandava vamidi mushilambo shavene, vandavatenda vatumwa na vandavatenda vyaukalau muvyaka dimiya nsheshe.' ⁷ Nnugu nae do, 'Kanji nanangu ndavaukumu venentete vavatumikila vanavo kenga vatumwa. Kutwala apo, vandauma mushilambo ashokwida ndalipudya kumili kwangu mulyutu ali.' ⁸ Nnugu kutwala kumpanga imbodi Abulaamu na anínnamulila likumbi live shimanyikilo shaimbodi ayo. Nadoni Abulaamu akammaleke Ishaki anínkumula likumbi muliduva lyanane kutwala nanae Ishaki kummaleka Yakobo, Yakobo kuvavaleka vana kumi na mbili vaukile ndava vatatavetu.

⁹ "Napanelo vatatavetu vakammikila ing'ou nung'un-ugwave Yoshe kutwala kunshumidya akave ntumwa ku Mishili kanji Nnugu andípagwa namu nae.

¹⁰ Anímposha mumauvilo ake uti, aníntadya Palao antanane na amwone kuvanavo limanyilo lyoe mpaka jo Palao umu wa ku Mishili kummika kuva nang'olo washilambo shake na wapaing'ande pake. ¹¹ Kutwala apo, mushilambo sha Mishili na sha Kanaani lindíinjila lipungu liidínavo mauvilo oe mpaka vanakuluvetu kukunakuna mwaa washakulya. ¹² Napanelo Yakobo paigwite doni ku Mishili shipali shakulya, andívatumidya vanakuluvetu mumwanda utandi ku Mishili.

¹³ Mumwanda wambili Yoshe kulivalanganga kwavakuluvake nanae Palao andívamanya valikola vake Yoshe. ¹⁴ Napanelo Yoshe andítuma vanshamele tatamunu

Yakobo pamo na valikola vake; vanu vakuwikila shikonda shavanu sabini na tano. ¹⁵ Bai Yakobo andyálela kuka ku Mishili kutwala koko ko, nae pamo na vatavetu kupalanga ¹⁶ mili vyave kwidanavo pa Shikemu ndashika muntupa washumíle Abulaamu na njuluku kumakono kwavanavake Amoli tatamunu wa pa Shikemu.

¹⁷ "Napanelo pauvandikenge wakati wakatandeya Nnungu avilá vyalivikidíle kumwe Abulaamu, vakwetu vandívalakananga poe mushilambo sha Mishili ¹⁸ mpa-ka muwakati watunduvenge kulangalalela umu junji ákammanyite Yoshe. ¹⁹ Nae andítumila ujanja kuvau-vyauvyanga valikola vetu mpaka nae kuvalamulila vatatamunu vavajange vana vakuvalekwa ambi kwambangidya vapalange. ²⁰ Mumaduva lolo kuvalekwa Musha mwana wakunagwaleka pamevo pake Nnungu kutwala vatavunge kunshunga mwing'ande myedi mitatu. ²¹ Vatatawake vakanjae, mwanagwe Palao nkongwe anínakota kuka nannela kenga mwanagwe mwene. ²² Bai Musha andípundishigwa ding'anong'ano dyashinamidyo shashimishili uti; nadoni, malove ake na vitendo vyake vivele vyadimon-go.

²³ "Napanelo Musha pawishidye vyaka alubaini vyashilinga andyámuwa muntima mwake kuka ndavala-ola vakwave, vo vanaishilaeli. ²⁴ Kwanavo Musha akamwone mmishili jumo amwanela mwishilaeli nae anínshilidya mwishilaeli jo kutwala kulipilila am-malidya mmishili ²⁵ aona kenga vakwave vandamanya kenga Nnungu andavaambola kwaindila yake kanji havashimanya. ²⁶ Palyamba lyake nae kuvona vanaishilaeli vavili vakamanana kutwala kuvaungani-anga ipagwe amani aashidoni, 'Shasho da mwenu i mmanung'unumunu? Napanelo mwaa shani munkwanalanila?' ²⁷ Napane áshimwanela muje aijá aníngang'ola Musha kutwala kushidoni, 'Áshikutandola nyani kuva nkútawala na nkúukumu wetu wetu?' ²⁸ Da ulota nanangu ungupedye kenga mwaumpadyadidye mmishili lido?' ²⁹ Bai Musha paigwite malove alo andítukuta ku Mishili kuka ndaikala kushilambo shavene sha ku Midiyani; koko ko nae andívapata vana vavili.

³⁰ "Ling'oto lyavyaka alubaini Musha àvele kushimb-weshe pepi na palishinga lya Shinai njelo andí-muumililila mulilamba lyamoto úshikalela mulyukutu. ³¹ Musha pagwene shitendo asho andíshanga namene. Pavandike alota alole shana, andígwa lidi lyake *UMU* limwaulila doni, ³² 'Nangu ni Nnungu wa-vanakuluvako; Nnungu jojo umwe Abulaamu, umwe Ishaki na umwe Yakobo.' Bai Musha andítatamela mwaa wakujopa na halingangidíle ata padyoko vela kulola shinu shene. ³³ *UMU* kutwala kushidoni, 'Ulanga vilatu vyo mwaa lyutu lyawimidile ali ni ulongo wak-wilimyanga. ³⁴ Nangu apa kwamwaa wakwona shana mauvilo autumwa avapata venentete vangu ku Mishili na kwigwa kutangadikanga kwave, ndishuluka kwida ndavapasha; napavedoni, ninkukutuma uke ko ku Mishili ko.'

³⁵ "Napanelo Musha jo wavamwitíle vaashidoni, 'Áshikutandola nyani kuva nkútawala na nkúukumu wetu wetu' jojo jo, Nnungu aníntandola kuva nkútawala na nkwámbola kwaindila yanjelo e amuumilidíle mulilamba lyamoto úshikalela mulyuku-tu. ³⁶ Aju ni ávaumidye vanakuluvetu ku Mishili atenda vyakutikinikanga na vimanyikilo mushilambo asho, mu Imanga Yanauvi na muvyaka alubaini mushimbweshe. ³⁷ Jo Musha aju e avaulidíle vanaishilaeli, 'Nnungu anantakatuwa pakati pavanung'unumunu venu nkúla-va jumo kenga nangu.' ³⁸ Ni jo Musha apagwíte mu-shipinga shavanakuluvetu kushimbweshe na njelo andítangola namu nae pamo na vanakuluvetu pal-ishinga lya Shinai; nae ni ápwashaladile malove mangumi akutupa wetu. ³⁹ Kanji vanakuluvetu jojo jo, havashilota kumwigwilila; kupunda apo vanavo vandímwita na mitima vyave uti kuujila ku Mishili ⁴⁰ vamwaulila Aloni doni, 'Tukandyangidya vannungu vatulangelalele mwaa Musha muna átumidye kushil-ambo sha ku Mishili hatumanyite shintandéke.' ⁴¹ Bai vandíkandyanga lishinamu lyakuva mwamwana wang'ombe nannume kutwala kushindanga dinyama dyakuntandela shadaka na kutenda shikukulu shaku-tumbyanga lishinamu lyavakandyéngé. ⁴² Nnungu na-pane andívaambukanga pakulota avaleke valipudye kudinondo na kuvinu vinji vivéle kumaundi. Ni ku-valela momo mwavaandikidile mulibuku lyavakulava doni,

" 'Mmanaishilaeli! Da vanyama vamuvashindenge kushimbweshe

kuvatenda shadaka muwakati wavyaka alubaini, shadaka asho mungutandalelé nangu?

⁴³ Mundivilinganianga! Munyuketé yema yakulipu-didya imwe nnungu Moloki

na lishinamu lyainondo Lepani, nnungu wenu.

Mundilipudya kumashinamu amukandyenge mwenu mmene.

Nadoni nankumulanga muke kushilambo shakushu kupunda ku Babiloni.'

⁴⁴ "Kushimbweshe akulá vanakuluvetu vandívanavo yema yaushuda ye yakandyéngé Musha kenga mwan-namulilidíle átangwele namu nae na kwodana na ntin-do wagwene. ⁴⁵ Vanakuluvetu vakapate yema ayo kwalakela kwavanyakalavave, muwakati wavaukile na-mu Yoshuwa ndateka vilambo Nnungu avapukusha venentete váshiikala vilambo avyo vanavo vona, yema yoyo vandínyukata. Yoyo indípagwa pamo na vanavo mpaka muwakati umwe Daudi, ⁴⁶ jo ápatile litananilo lyake Nnungu na ájugwile pakulota akandyange lyutu lyakunama Nnungu umwe Yakobo ⁴⁷ kanji ándangadile ing'ande ni Shalomoni. ⁴⁸ Kanji napane, Nnungu Wa-pashanya-uti hanaikala muding'ande dyavadangile vanu kenga mwatangaladile nkúlava,

⁴⁹ " 'Kuwa ni shiteng'u shangu,

shilambo ni pakuvika madodo angu.

Mwenu mundaulula kungudangela nangu ing'ande? Avi atangola *UMU*.

Da lipali lyutu livaikidíle nangu ngupumulilile? †

⁵⁰ Da vinu uti vyamwona avi hangukandyenge nangu?"

⁵¹ Kukumalilila Shiteva kushidoni, "Mmanu mmaim-beve, múkakumuligwe mmitima na kumatu, múmpinga ngwengwe Imumu Wanashwe. Kenga mo mwa-vatandalele vanyakalavenu, namwenu momo munku-tandela momo. ⁵² Shapo nkúlava shani wávakampapete vanyakalavenu? Vanavo vandivabyaanga vakulava vake Nnungu váshivalanganga kwida aijá Waishaliya umwe Nnungu na mwenu jojo muninnimya na munimpedya. ⁵³ Mwemwe mundipwashalela Lila-mulo kwaindila yavanjelo kanji hamwigwilidile."

Shiteva vankumwawanga majanga

⁵⁴ Bai avalá vanang'olo vapanguguvale vakaigwe davo shindívalipuka shitundi mmitima mwave kutwala kushimwa mpaka kutuka shulu. ⁵⁵ Kanji Shiteva pamuumbale Imumu Wanashwe, andíloa kuwa ndoo kutwala kwona lishangelo lyake Nnungu na kumwona Yesu àimidile kunkanakono kwake Nnungu. ⁵⁶ Nae kutwala kushidoni, "Mwe! Ninkwona kuwa kushimwike na kumwona Mwana Wamunu àimidile kunkanakono kwake Nnungu." ⁵⁷ Vanavo vakadivanga kumatu akuno vajunga pashanya po na kwaunapamo vanímwinjila ⁵⁸ kungang'alangidya kunyenje likaja kutwala kumwamanga majanga. Vashuda vapagwíte apo, vandyúlanga makoti ave kunkamudya nnemba jumo walina Saulu. ⁵⁹ Shiteva akuno vamwamanga majanga, nae ashindakugwa aashidoni, " *UMU* Yesu pwashalela imumu yangu!" ⁶⁰ Bai andíguguvula kutwala kukuta pashanya po, aashidoni, " *UMU* haunavaukumu mwaa walidambi ali." Patangwele malove ala, nae kujaa shingumi.

8 Bai Saulu andyúngila nkono ing'ano yakumpedya kwake.

Saulu ankupapata Liganisha

Napanelo kutunduvangila muliduva lyolyo, shindyúmilila shititumbu shakupapatigwa liganisha, yani shipinga shavakwoda váshipagwa pa Yelusalemu. Nadoni vakwoda vandíamwadikanianga pa Yelusalemu vanavo kutukutila mumakaja a ku Yudeya na a ku Shamaliya kanji vamyombe vandíjalila pa Yelusalemu. ² Vanu vakunjopa Nnungu vandítwala mili umwe Shiteva kuka ndashika na vanínnilila namene. ³ Napanelo Saulu alota kumalidya liganisha, ashindainjila muding'ande uti dyavakwoda apita avakamula valume na vakongwe auka ndavajela nkalaboshi.

Pilipo ankuwisha ntenga ku Shamaliya

⁴ Napanelo avalá vamwadilikanéngé vashindauka valalanganga lilove. ⁵ Pilipo nae paalaladile kunjini wa ku Shamaliya ashindavavangangila venentete Klistu. ⁶ Dimbumba dyavanu kwaunapamo dishindamwishimu Pilipo mwaa vashindamwigwa shana namene vyashitangola na vashindona vimanyikilo

vyashitenda ⁷ mwaa vanu vavénavo majini mashapu, anavo ashindauma mumili mwave akuta namene na vakudidimanga madodo pamo na vakukwava vashindapona. ⁸ Nadoni panjini awo lishindapagwa lipuwilo lyoe namene.

⁹ Napanelo panjini wowo, andípagwa munu jumo walina Simoni. Munu aju muwakati wapanyuma pake ashindatandedya vinu vyashaviavi vyashivatikiniyanga vashamaliya na kulitenda kuva munu wakujowa. ¹⁰ Simoni vanu uti va ku Shamaliya bila kumpambula munu vashindamwishimu namene na vashindatango-la doni, "Munu aju ni dimongo dya Nnungu dishamég-wa 'Ding'umene.'" ¹¹ Nae vashamaliya vashindamwishimu namene mwaa dimindi dyoe ashindavatikiniyanga na vitendo vyake vyashaviavi. ¹² Kanji Pilipo pavalangenge ntenga wambone wautawala wa Nnungu na yalina limwe Yesu Klistu, valume na vakongwe vashindapata ubatisho. ¹³ Ata mpaka jo mwene Simoni momo andíkulupila kutwala nanae kupata ubatisho na ngwengwe ashindamwoda Pilipo alaledya shana vimanyikilo na vyamakango vikumene vishitandeka kutwala nae kushanga doni.

¹⁴ Napanelo vyamyombe vapagwíte pa Yelusalemu pavigwite doni ku Shamaliya vanu vandiitikila lilove lya Nnungu, vaníntumidya Patulu namu Nshuwau koko. ¹⁵ Vakawike pa Shamaliya vandíavashwalidya pakulota vampate Imumu Wanashwe ¹⁶ mwaa Imumu Wanashwe avele akanava kunshulukila munu ata jumo pakati pave ila vandípata ubatisho palina limwe *UMU* Yesu. ¹⁷ Bai vanavo vandíavikila makono kutwala kumpata Imumu Wanashwe.

¹⁸ Napanelo Simoni akone doni, Imumu ankuvashulukila vanu kwaindila yavamyombe kuvavikila makono, nae andyúmya njuluku avape vamyombe ¹⁹ aashidoni, "Nanangu ngupa madalaka lolo kwambangidya nikammikila munu woewoe makono ampate Imumu Wanashwe." ²⁰ Kanji Patulu kushidoni, "Jaikila kushena na njuluku wako wo. Da wako wona kenga inudyo ya Nnungu vashuma na njuluku? ²¹ Wako haunapagwa shinu ata padyoko nkati mushimadengo ashi mwaa ntima wako haunava shinu washalowa pamevo pake Nnungu. ²² Lijugulange, leka nnugu wakunyata wauv- navo! Njugwe *UMU* nakapanji andakulivaliva shabaa yamuntima wako. ²³ Nangu ninkukwona wako kuva umunu wakukubyya liu lyakupunda apo na ungaveshaliya undikutawala." ²⁴ Kutwala Simoni kushidoni, "Shonde, mwenu nangu ngujugwila kumwe *UMU* kwambangidya vyamutangola hashinapagwe shakungutandeka." ²⁵ Bai vamyombe vakaumye ushuda na vakatangole lilove lyake *UMU*, vandyújila ku Yelusalemu kupita vavalanganga ntenga wambone mumakaja oe avashamaliya.

Pilipo ankumbatisha mwitiyope

²⁶ Napanelo njelo wake *UMU* andímwaulila Pilipo kushidoni, "Panganika uke nkono wakwina shilambo utumila indila yúma pa Yelusalemu kwalalela ku Gasha." Ayo ivelé kushimbweshe. ²⁷ Pilipo kutwalinneu

† *Lola Ishaia 66:1-2.*

mwanda. Mwe! Nae kumwona munu jumo wavamunile avele nanangalaledi nkumene umwe umu nkongwe wa ku Etiyopiya walina Kandaki munu áshaangalanganga mali uti amwe umu ajo. Nae aukile ku Yelusalemu ndalipudya kwa Nnungu. ²⁸ Pashuja áikele mulingishi lyake ashindashomya shidingo shalyamba shimwe nkúlava Ishaiya. ²⁹ Bai Imumu Wanashwe andímwaulila Pilipo kushidoni, "Vandika lingishi lyo upite woda!" ³⁰ Pilipo kutumanuma mpaka palingishi kutwala kumwigwa munu jo ashomya shidingo shalyamba shimwe nkúlava Ishaiya Pilipo kumudya, "Da vyaushomya vyo unkumanya shana mana ake?" ³¹ Mwitiope kushidoni, "Ngulota kumanya dashi akapali munu ánguvalangangila?" Bai nae apalá anínjugwangila Pilipo akwele mulingishi vaikale pamo. ³² Napanelo lipungu lyamaandiko lyashishomya lishishidoni,

"Vanintwala kenga mwavanantwalila ngandolo wava-muukanawa kukunshinda,

mo mwanamalalila ngandolo pavankaja magwimbu, nanae momo hajamwile ikanywa.

³³ Vanintanila na havampele shaliya, halakile udukulu,

mwaa shingumi shake vandyovya mushilambo." †

³⁴ Bai mwitiope andímudya Pilipo, "Ninkukujugwa, da nkúlava malove ala apa amwamba nyani? Alyamba jo mwene kwali amwamba munu junji?" ³⁵ Napanelo Pilipo kutunduvangila mulipungu alyo lyamaandiko andyúka ammalangangila munu ajo ntenga wambone umwe Yesu. ³⁶ Vauka mushu na shimwanda shave, vandíwika pashinu pavéle medi kutwala mwitiope kumwaulila Pilipo doni, "Wako, medi ala apa. Da shipali shinu shingudingadínga shakungutadya napate ubatisho?" ³⁷ †³⁸ Mwitiope andílamulila kwimidya lingishi alilá, Pilipo namu nae kushulukanga kuukananga mmedi Pilipo kutwala kumbatisha.

³⁹ Pavaumanenge mmedi, Imumu wake *UMU* aníntwala Pilipo; bai mwitiope hangwene kavili kanji andyúka mushu na shimwanda shake apuwanga. ⁴⁰ Bai Pilipo andílyona ávele panjini wa Ashoto. Nae ashindapita avalanganga ntenga wambone mumakaja uti mwa-shipita auka ku Shashaleya.

Saulu linkutang'anedyá lilangadyo

9 Napanelo Saulu amamodya mitisho yakuvabyaanga vakwoda vake *UMU* andímuukila nkúlangalalela-shadaka nkumene ² nanjugwa shitambulisho shakuka ndalodya muvitala vyamikodyanio vya ku Damashiko kwambangidya akavakodya váshinama mushinamidyo shake *UMU*† valume na vakongwe, avakamule avaidenavo pa Yelusalemu.

³ Napanelo pashuka ávandike palikaja lya Damashiko, kwashingangala Saulu kundang'anedyá lilangadyo yakushenga lyakwalakela kuwa. ⁴ Nae pashinu apo kugwa kugwilila pai na kwigwa lidi líishi-

† *Lola Ishaiya 53:7-8.* †† *Maandiko ainamba ya 37 nkati mu-maandiko akala ashigalegu hapali.* ‡ *Mushigalegu: a ...kwambangidya akavakodya va mu Indila...*

doni, "Saulu, wako Saulu! Mwaa shani unkungupapata?" ⁵ Saulu kushidoni, "Nang'olo, da wako unyani?" Lidi lyo kushidoni, "Nangu Yesu, jo waumpapata wako jo. ⁶ Napavedoni takatuka winjile nkaja mo! Mo nkaja mo, vandakwaulila shilotéka utende." ⁷ Napanelo vanu vaadanéngé namu Saulu vandíimilanga vákakatele vaigwa lidi kwabila kumwona munu. ⁸ Saulu vaníntakatuwa pai apalá, pang'amwile mevo kulamana na kwona shinu; vavagwe vavénavo kunkamula nkono kumwinjidya nkaja mu Damashiko. ⁹ Bai Saulu andíikala maduva matatu áputele pakalya na pakakumbila shinu.

¹⁰ Napanelo po pa Damashiko po, andípagwa nkwo-da jumo walina Ananiya; jo Ananiya aju *UMU* anínshe-ma mwindoti aashidoni, "Ananiya!" Nae doni, "Nangu *UMU!*" ¹¹ *UMU* kutwala kushidoni, "Panganika uke na ibalabala yavashema Yakwaloka mpaka paing'ande imwe Yudashi; pauwika, muudyangidye munu jumo walina Saulu wa ku Talashishi; nae ankupagwa mukushwali ¹² na mwindoti ninnodya munu walina Ananiya amwidila nammikila makono anshwalidya pakulota aujile kulola." ¹³ Ananiya do, "*UMU*, nangu munu aju ndivaigwanga vanu voe vammalanganga ukalau wake wavatandile nae vakwilimyanga vako ku Yelusalemu. ¹⁴ Nae vanang'olo vavakulangalalela-shadaka vandimupa madalaka akwidila apa ndavakamula uti vatambulánga lina lyako." ¹⁵ *UMU* kutwala kushidoni, "Wena! Mwaa munu ajo ni shombo shangu shakutandalegwa pakulota aumaniange lina lyangu kwavamidi, kwavaumu, kwavanaishilaeli na ¹⁶ nene nimwene nannodya mauvilo oe álota kumpata kwamwaa walina lyangu." ¹⁷ Nadoni Ananiya andyúka paing'ande apo kwinjila nng'ande kutwala kummikila makono Saulu aashidoni, "Nung'unumunu Saulu, *UMU* Yesu ákuumililidile niindila wida akuno, aningutumidya kwako wako pakulota uujile kulola na uumbaligwe na Imumu Wanashwe." ¹⁸ Bai mmevo mwake Saulu vindígwanga vinu kenga makakamba kutwala muwakati wowo nae kutunduvanginneu kulola kavili; andítakatuka kuka ndabatishwa ¹⁹ na akalye, andípata dimongo.

Saulu ankuvalanganga ntenga ku Damashiko

Bai Saulu andítwala maduva aikala pamo na vakwoda váshipagwa pa Damashiko. ²⁰ Nae kutunduvanginneu kwinjila muvitala vyamikodyanio apita ammalanganga Yesu doni, "Nae ni Mwana wa Nnungu." ²¹ Napanelo vanu uti váshimwigwa vashinanshanga na vashindaudyania, "Da munu aju i jo ávatandile ing'on-do avalá vatambulánga lina ali ku Yelusalemu? Nae akuno aidilé kukuvakamula vanu avaukenavo kwavanang'olo vavakulangalalela-shadaka?" ²² Saulu napané ashindauka mushu dimwanjadyeka dimongo na ashindavavilinganianga vayuda váshiikala ku Damashiko aakikisha kenga Yesu aju ni Klistu.

Saulu ankupalanyoka ku Damashiko

²³ Napanelo akapite maduva oe namene, vayuda vandyunganila vamyae Saulu ²⁴ kanji Saulu vanimanyia nnugu wave. Vanavo shilo na mui vashindaledya milango vyakwinjilila panjini valota vamyae Saulu. ²⁵ Vakwoda vake napane vakantwala Saulu shilo kunjela mulitenga kunshuluwidya panda lishiti lyalikaja.

Saulu ankuujila ku Yelusalemu

²⁶ Napanelo Saulu pawikile ku Yelusalemu, andilinganga kulyunganianga na vakwoda kanji vanavo uti vaninjopa mwaa havashinkulupila kuva nkwo-damwave. ²⁷ Napane Balinaba anintwala kumuukanavo kwavamyombe ndavavallenganga mwashi mwangwanalele *UMU* niindila ya ku Damashiko na jo *UMU* anditangola namu nae, namomo mwashi mwavallengangidile ku Damashiko kwabila kujopa palina limwe Yesu. ²⁸ Nadoni Saulu andilyunganianga na vakwoda na ashindapita avalanganga palina limwe *UMU* nkaja mu Yelusalemu pakajugulanga shinu. ²⁹ Namomo ashindatangola na ashindataukananga na vayuda vashitangola shigalegu kanji vanavo vashindalambela dindila dyakummyaila. ³⁰ Napanelo vanung'unumunu pavaanaladile nnugu awo vanintwala kumuukanavo ku Shashaleya, ako kunnudya kuka kwave ku Talashishi. ³¹ Bai liganisha lya ku Yudeya, lya ku Galileya na lya ku Shamaliya lindivanavo amani na lishindaliimiliyanga; linama mukunjopa *UMU* na mukumpambadyangigwa kwa Imumu Wanashwe, lyanavo lishindaanjadyeka.

Patulu ankumponia Eniyashi

³² Napanelo Patulu pashipita awanawananga kula kushinu momo andyalela kuka ndavalola vakwilimyanaga vashipagwa pa Lida. ³³ Koko ko, aninkodya munu jumo walina Eniyashi alagile pagoli vyaka nane mwaa wakudidimanga madodo ³⁴ kutwala Patulu kumwaulila doni, "Eniyashi! Yesu Klistu ankukuponia. Takatuka upindange litandiko lyako!" Eniyashi kutakatukinneu. ³⁵ Bai vanu uti va pa Lida namu va ku Shalona vakamwone munu ajo, vaninshinjiulila *UMU* mitima vyave.

Patulu ankundyuwa Tabita

³⁶ Napanelo panjini wa Yope andipagwa nkongwe jumo nkwo-da walina Tabita, lina lyavashema mushigalegu Dolakashi, † nae avele wavitendo vyambone na ashindavapwashela vamashikini. ³⁷ Muwakati wowo nae andyula mpaka kupela. Akapele vandimwinga medi na kuntwala kuka nammika mushumba shapashanya ulungu.

³⁸ Napanelo pa Yope namu pa Lida hapalapanenge namene; nadoni, vakwoda pavaigwite kenga Patulu apali pa Lida vanavo vandivatumidya vanu vavili kuka nanjugwangila Patulu aide shipajelo aonane namu

† *Mushigalegu lina lya a Dolakashimana ake a mmala.*

vanavo pa Yope. ³⁹ Bai Patulu andyuka namu vanavo. Akawike, vanintwala kumuukanavo mushumba shapashanya ulungu kutwala vanamwili uti kuntang'anedya valila na vannodya vyakulijalangila vyakuvilingananga vyakandyenge Dolakashi pavele mumi. ⁴⁰ Patulu napane akavaumadyanga vanu uti mushumba mo akaguguvala kushwali, akashiliuka kulola mili kutwala kushidoni, "Tabita, takatuka!" Bai Tabita anding'amula mevo kunnola Patulu kutwala kutakatuka kwikala. ⁴¹ Nae kunkamula nkono ampwashela pakulota aimile kutwala kuvashema vanamwili pamo na vakwilimyanaga kuvalodya Tabita mumi. ⁴² Shitendo ashi shindiigwinika pa Yope uti na vanu voe vaninkulupila *UMU*. ⁴³ Bai andikala maduva oe pa Yope namu munu jumo wakuushila magwogwe walina Simoni.

Koluneli ankupata indoti

10 Napanelo pa Shashaleya andipagwa munu jumo walina Koluneli, nang'olo wavaing'ondo miya vamushipinga shavashishema shavaitaliya. ² Munu aju pamo na vanu uti vapaing'ande yake vandyalala mitima na vashindanjopa Nnungu; nae ashindavapa lipwashalelo lyoe vamashikini na ashindashwali ngwengwe kwa Nnungu. ³ Muliduva limo, muwakati wasatisa yalyulo, mwindoti Nnungu aninnodya Koluneli njelo wake kutwala njelo jo kunshema, "Koluneli!" ⁴ Koluneli aninnola ndoo, anjopa kutwala kushidoni, "Da nyamani nang'olo?" Njelo kushidoni, "Kushwali kwako na lipwashalelo lyaunaumya uvapa vamashikini Nnungu inkunnagwela na hanalivaliva shinu. ⁵ Napavedoni vatumidye vanu ku Yope vakakushamele Simoni, munu amanyika kwalina lya Patulu; ⁶ jojo jo avele paing'ande imwe Simoni munu wakuushila magwogwe, ing'ande ivéle nanyenje imanga." ⁷ Bai njelo ashitangola namu Koluneli akaume, Koluneli andivashema vatumika vake vavili vapaing'ande pake namu mwing'ondo wake jumo wakwalala ntima wamushipinga shavaing'ondo vake, ⁸ kuvavallenganga vinu uti vitandéke kutwala kuvatumidya ku Yope.

Patulu ankupata indoti

⁹ Palyamba lyake vandike panjini, muwakati waliduva pamuti Patulu kunjini ko kukwela paulungu kuka ndashwali. ¹⁰ Kanji ikankole indala, andilota apate shakulya; napanelo vankandyangidya shakulya asho, Nnungu andimupa indoti ¹¹ kutwala nae kwona kuwa na kwona shinu mwalikuba likumene lyakukandapala kenga lyavakamulanidile mumapepe uti nsheshe lishulukila pai; ¹² nkati mwake kupagwa kula likola lya-vanyama vamadodo nsheshe na kula likola lyavanyama vakulyuta vapagwite mushilambo na kula likola lyavyuni vyakuniania. ¹³ Kutwala nae kwigwa lidi lishishidoni, "Patulu, takatuka uvashinde uva-mamene!" ¹⁴ Kanji Patulu kushidoni, "*UMU!* Davo po mene; nangu tangu hangunava kulya shinu ata shimo shishapu kwali shidagwa." ¹⁵ Lidi kutangola mwanda

wambili liishidoni, "Haunone kuva shishapu shata-didye Nnungu kuva shakutakata!"¹⁶ Shitendo ashi shikatandeleke myanda mitatu, likuba vandyújidya kuwa.

Patulu kwing'ande imwe Koluneli

¹⁷ Napanelo Patulu akuno alambela kumanya mana aindoti yapatile kwalakela kwa Nnungu, vanu vavatumile Koluneli vandyúdyangidya ing'ande imwe Simoni na vandíwika mpaka pannango. ¹⁸ Vanavo kushema kutwala kudya, "Da paing'ande apa apali njeni walina Simoni ámanyika kwalina Iya Patulu?" ¹⁹ Patulu akumbukilanga indoti yapatile ailá, Imumu andímwaulila doni, "Wako, vanu vatatu vankukulambela pai po! ²⁰ Takatuka ushuluke! Haunaambambidye kuka namu vanavo mwaa vovo vo, palyutu ali nivatumididye nangu apa." ²¹ Patulu akashuluke andívaulila doni, "Munu wamunnambela jo, ni nangu apa. Da shana mwidilidilé nyamani?" ²² Vanavo kushidoni, "Wetu twalakela kwanang'olo wavaing'ondo walina Koluneli; nae ni munu waishaliya na wakunjopa Nnungu na ni munu waushuda wambone kwavenentete uti vayuda. Jojo jo, njelo wakwilimyanga andimwaulila akusheme uke kwing'ande yake ukamwaulile shauvenavo." ²³ Bai Patulu andívapwashalela vajeni vo paing'ande; palyamba lyake nae namu vanavo vandímalidya mwanda kutwala vanung'unumunu vanji va pa Yope kumpalakela.

²⁴ Muliduva lyambili lyake, vanavo kuwika pa Shashaleya. Koluneli avalindila, andívalalika valikola pamo na vavagwe vapantima. ²⁵ Patulu pawikile paing'ande, Koluneli andyúka ndampwashalela kutwala kuunama alipudya kumwe Patulu. ²⁶ Patulu napane kuntakatuwa aashidoni, "Takatuka! Mwaa nangu momo nimunu kenga wako." ²⁷ Nae atangola namu Koluneli, andíinjila nng'ande kuvakodya vanu vâumbalanidile ²⁸ kutwala kushidoni, "Mwenu mundimanya shana kenga nkati mulilamulo munkulaeka muyuda woewoe kulijalania ngamushipinga shavamidi kwali kulitenda shijeni muding'ande dyave. Kanji Nnungu aningwaulila haninansheme munu woewoe kuva nshapu kwali ndagwa. ²⁹ Ni ashi shitadidye nangu mukangusheme kwida panikava na shinyadinyadi; napanelo munkuulula kungwaulila shamungushamadile?"

³⁰ Koluneli kutwala kushidoni, "Mumaduva matatu † apitíle nangu ngushindapagwa mukushwali nng'ande mwangu amu muwakati kenga wowau wasatisa. Bai kwashingangala andyáneka munu ágwete dinguvo dyakumalameta ³¹ kutwala kushidoni, 'Koluneli, kushwali kwako ngwengwe Nnungu ankwigwa na lipwashalelo lyako Iyaunaumya uvapa vamashikini hanalivaliva shinu. ³² Napavedoni vatumidye vanu ku Yope vakakushamele Simoni, munu ámanyika kwalina Iya Patulu; jojo jo avelé paing'ande imwe Simoni munu wakuushila magwogwe, ing'ande ivéle nanyenje imanga.' ³³ Nangu kuvatuminneu vanu kwida ndakushema

† Mumaandiko akala ashigalegu vaandiké doni, a Mumaduva nsheshe...mwaa vanavo kuvalanga kwamaduva vashipambanianga liduva litandi mpaka liduva Iyavavalanga shinu.

na tundilambwalela mwaa wakuwika kwako. Napanelo wetu apa tundikadyania pamevo pake Nnungu paku-lota twigwe uti vyakutumenge *UMU* utuvalangangile."

³⁴ Patulu kutwala kutunduvanga kutangola aashidoni, "Napanelo mwiu ninkumanya kenga Nnungu hanampambula munu ³⁵ kanji muvenentete uti woewoe ánjopa Nnungu na kutandedya ishaliya, ajo ankukubaligwa namu nae. ³⁶ Kwaupande walilove Iyatumididye nae kwavanaishilaeli livalangánga ntenga wambone waamani kwaindila imwe Yesu Klistu àvele *UMU* wavanu uti, ³⁷ mwemwe mmene mundimanya shana nyamani shitandéke Yudeya uti kutunduvangila ku Galileya ling'oto Iyaubatisho wavalangenge Nshuwau, ³⁸ mwashi mwampakidile mauta Yesu wa ku Nashaleti kwa Imumu Wanashwe na dimongo kutwala nae kuwena atandedya wambone apita avaponia vanu vâshitawaligwa na Ndamoni mwaa Nnungu andípagwa namu nae. ³⁹ Wetu apa tuvashuda wavinu vyatandile nae mushilambo uti shavayuda mpaka pa Yelusalemu. Jojo jo vanu vanímpedya kwaindila yakunkamalela panshalaba ⁴⁰ kutwala Nnungu muliduva Iyantatu kundyuwa na kunnodya ⁴¹ kanji i kwavanu uti ila kwetu wetu tuvashuda vátutandwele Nnungu tangu kala, wewe túlile na túkumbidile namu nae ling'oto Iyakudyuka pakati pavakupela. ⁴² Nae wetu andítutuma tuvalangange ntenga kwavenentete na tumye ushuda kenga nae Nnungu andimupa madalaka akuva nkúukumu wavangumi na vapidíle. ⁴³ Ajo vakulava uti vankuumidya ushuda kenga kula munu ánkulupila nae ankupata kulivalivigwa kwamadambi kwaindila yalina lyake."

Imumu Wanashwe ankuvashulukila vamidi

⁴⁴ Patulu akuno atangola, vanu uti vâshimwigwilila muwakati wowo andívashulukila Imumu Wanashwe. ⁴⁵ Kanji vakukulupila vaaléke namu Patulu ku Yope vâvele vayuda, vandíshanga pavagwene vamidi navanavo momo Nnungu avamiminila Imumu Wanashwe ⁴⁶ mwaa vanavo vashindavaigwa vamidi avalá vatangola dinangodi dyakutikinikanga na vantumbyanga Nnungu. Patulu kutwala kushidoni, ⁴⁷ "Da apali munu álota kuvaleya vanu ava havanabatishwe na medi ikava kenga navanavo vanimpata Imumu Wanashwe kenga mo mwatumpatidile wetu?" ⁴⁸ Bai Patulu andílamulila vavabatishe palina limwe Yesu Klistu na vanavo vanínjugwa vaikanavo maduva akudyangangila.

Patulu ankuvaigwiniya va pa Yelusalemu

11 Napanelo vamyombe pamo na vanning'unumunu ku Yudeya uti vandígwa doni, ata vamidi momo vandipwashalela lilove Iya Nnungu. ² Napavedoni Patulu paambweke kuka ku Yelusalemu, vakwoda vayuda vakumulígwe vanímpwatiyanga ³ vaashidoni, "Kumanya dashi wako kulitenda shijeni paing'ande yavanu vâkakumuligwe † na kulyanavo

ndamu umo?"⁴ Kanji Patulu kutwala kuvaigwiniya avapangila shana aashidoni,

⁵ "Muliduva limo nangu ngupagwite mukushwali mulikaja Iya Yope, Nnungu aningupa indoti kutwala kwona shinu mwalikuba likumene lyakukandapala kenga lyavakamulanidile mmapepe uti nsheshe lyaloka kuwa lishulukila pepi na panguvéle nangu. ⁶ Pangu-ladile shana nkati mwake, nangu kutwala kuvona vanyama vamadodo nsheshe, vanyama vakunundu, vanyama vakulyuta na kwona vyuni vyakunia.

⁷ Muwakati wowo nangu kwigwa lidi lingwaulila doni, 'Patulu! Takatuka uvashinde uvamamene!' ⁸ Kanji nangu kushidoni, 'UMU, davo po mene! Mwaa nangu nkanywa mwangu hangunava kupisha shinu shoeshoe shishapu kwali shidagwa.' ⁹ Lidi lyakwalakela kuwa kutangola mwanda wambili liishidoni, 'Shata-didye Nnungu kuwa shakutakata, haunasheme shishapu.' ¹⁰ Shitendo ashi shinditandeka myanda mitatu na kumwisho kwake, uti vandyujidya kuwa. ¹¹ Kwashingangala, vanu watatu vavatumile ku Shashaleya kungwidila nangu kuwika paing'ande yanishiikala. ¹² Kutwala Imumu kungwaulila nguke namu vanavo pandikaambambidya; † vanung'unumunu ava sita ku-ka pamo namu nangu ku Shashaleya mpaka paing'ande imwe Koluneli. ¹³ Koluneli kutwala kutu-valangangila mwamwanadile njelo wa Nnungu àimidile paing'ande pake amwaulila doni, 'Ntumidye munu ku Yope akakushamele munu jumo walina Simoni ámanyika kwalina Iya Patulu. ¹⁴ Nae andaku-valangangila ntenga ulóta kukutadya wako pamo na vanu uti vapaing'ande pako mwambolegwe.' ¹⁵ Nangu pangutunduvenge kutangola namu vanavo Imumu Wanashwe andivashulukila kenga momo mwatushulukidile wetu kunantandi. ¹⁶ Nangu kutwala kukumbukilinne vyawile UMU doni, Nshuwau mwiu andibatisha na medi kanji mwenu mundabatishwa na Imumu Wanashwe. ¹⁷ Napanelo ikava kenga Nnungu andivapa vanavo inudyo yoyo yatupele wetu patunkulupidile UMU Yesu Klistu, kushi nangu nikandyulula kwimidya madengo ake Nnungu?" ¹⁸ Bai pavaigwite malove alo, vanavo vandidimikila na kumpa lishangelo Nnungu vaashidoni, "Kumbe mwiu! Ata vamidi Nnungu andivapa kulijugulanga madambi ku-ka mushingumi."

Lilove linkuwika pa Antiyokiya

¹⁹ Napanelo vakwoda vakajaikanange mwaa wakupapatigwa kuumilidile ling'oto lyakumpedya Shiteva, vanji vandíwika mpaka ku Poiniki kutwala vanji mpaka ku Kupulu na vanji kavili mpaka ku Antiyokiya. Kanji mwavashipita mo, lilove Iya Nnungu vashivalangangila vayuda gweka bai. ²⁰ Kanji vakwoda vanji va ku Kupulu na va ku Shilene vakawike pa Antiyokiya, vanditangonavo vagalegu vavavalangangila ntenga wambone umwe UMU Yesu. ²¹ UMU ashindapagwa na

†† *Mushinamidi shavayuda, vanavo vashindavakumula vana valume muliduva Iyanane ling'oto lyakuvalekwa. † Kwali: a ...pandikapambula.*

vanavo na voe vakulupidile, vaninshinjilila UMU mitima vyave. ²² Napanelo dyabali dya ku Antiyokiya dindíigwinika na liganisha, Iyo Iya pa Yelusalemu kutwala vanavo kuntumidya Balinaba koko. ²³ Balinaba akawike kwanavo akone umonyo wa Nnungu pakati pave andipuwanga namene na ashindavanonowanga vanu uti pakulota vavenavo ntima wakukulupilika na kuvalaililila havanamwambukange UMU²⁴ mwaa Balinaba avele munu wambone, wakumuumbala Imumu Wanashwe na walikulupililo Iyoe. Nadoni vanu voe vandílunganianga namu UMU.

²⁵ Napanelo Balinaba andyúka ku Talashishi nannambela Saulu. ²⁶ Akamwone, anintwala kumwidanavo pa Antiyokiya. Bai vanavo vandíikala pa Antiyokiya mpaka kumalila mwaka umo vavapundisha vakwoda voe vapoliganisha lyankaja amo. Napane pa Antiyokiya ni pavavashamile vakwoda lina Iya Vaklistu mumwanda utandi.

²⁷ Mumaduva lolo, vandípagwa vakulava vaumile pa Yelusalemu kuka ku Antiyokiya. ²⁸ Napanelo pakati pave jumo walina Agabu alangalalegwa na Imumu, andimanyiya kenga mushilambo uti indaumilila indala yamadigida. Namwiu indala ayo yumilidile mumaduva amwe Kalaudiu. ²⁹ Bai vanavo vandyámuwa kula nkwo-da atumidye lipwashalelo kwodananavo shilinga shalyulula kwavanung'unumunu va ku Yudeya. ³⁰ Bai vandítandedya vatumidya kwavanang'olo kwaindila imwe Balinaba namu Saulu.

Tiyagu ankubyaigwa na Patulu ankungwa

12 Napanelo muwakati awo umu Elode †† andítunduvanga kuvapapata vanji vamuliganisha. ² Nae aninshinda na Iyambila Tiyagu nung'une Nshuwau ³ na akone kenga shitendo asho vayuda shinkuvanagwela, aninkamula Patulu momo. Avyo vitandeke mumaduva ashikukulu shamagung'u ákave nkukumuku. ⁴ Patulu akakumuligwe, Elode aninjela nkalaboshi kutwala kummikila vipinga nsheshe vyamabulisha váshipishania nsheshe-nsheshe vashungu pakulota ling'oto lyashikukulu sha Pasaka ‡ amuukumu paumbala. ⁵ Bai Patulu ávele nkalaboshi, liganisha lishindashwali vanjugwa Nnungu na dimongo mwaa wake nae.

Njelo ankumumya Patulu nkalaboshi

⁶ Napanelo Elode pashilota antwale akamuukumu, shilo shosho Patulu álele shing'ati mabulisha mavili vákamulidile mang'unyang'unya mavili avamuungile, pannango vâpagwite mabulisha váshishunga ikalaboshi, ⁷ mwe! Njelo wake UMU apalá pulumundu, nng'ande nkalaboshi mo uti do, ngwe; njelo kuting'inianga amwimulanga aashidoni, "Takatuka shipajelo!" Muwakati wowo Patulu mang'unyang'unya

†† *Umu Elode aju ni ndukulugwe umu Elode ntandi áshitawala muwakati wavalakwadidye Yesu. ‡ Shikukulu shamagung'u ákave nkukumuku shishitandeka muwakati waishumana imo ling'oto lyaliduva Iya Pasaka kanji kwodamwaa vishindalundananga, vashindaunganianga kushema uti a Pasaka. Lola Kuma 12:1-20; Kum-bukumbu 16:1-8.*

mmakono mo kulumukanga ⁸ kutwala njelo kushidoni, "Lyunge nkanda wako na ugwale makabasha ako!" Patulu kutandela momo. Njelo kavili kushidoni, "Gwala likoti lyako ungwode!" ⁹ Vauma, Patulu andimwoda kanji akamanya kenga vyashintenda njelo vivele viui; nae ashona kenga avelé mwindoti. ¹⁰ Vakapite mautu mavili avakushunga, pavawikile pannango ukumene wavitali wavashuumila vauka kunjini, wanavo undishimuka wene, vanavo kupita kuka vawena mwibalabala imo idikidiki kutwala muwakati wowo njelo kunnambaleka. ¹¹ Patulu apalá kumwida ding'ano kutwala kushidoni, "Napanelo ninkumanya mwiu doni, *UMU* anintumidya njelo wake kwida nangu-posha kumakono kwake Elode na kunguposha muvitendo uti vyavashilota kungutenda vayuda."

¹² Patulu pamanyite shana uti vishitandeka avilá andyúka mpaka paing'ande imwe Maliya anyoke Nshuwau, Nshuwau jo áshimanyika kwalina Iya Malukushi. Popo po, vandikadyania vanu voe vashwali. ¹³ Akakanyola nnango wakunnango ataa odi kutwala mwali ntumika wapaing'ande walina Loda kuka ndamwitika. ¹⁴ Mwali pamanyite kenga lidi alyo limwe Patulu, nae kwamwaa walipuwiyo lyoe andileka kushimula nnango kutwala kuujila kwavakwoda ndavaulila doni, "Mwenu Patulu panda apa!" ¹⁵ Vanavo kushidoni, "Unaigwa na kudulumbuka ko ni aku!" Nae kuka mushu aashidoni, "Mene mwenu, mwiu!" Vanavo, "Wako, ajo inkuululika kuva njelo wake." ¹⁶ Kanji Patulu ashindauka mushu akanyola nnango. Vanavo vakashimule, pavangwene vandishanga namene. ¹⁷ Patulu kung'aniang'anianga nkono kuvamaladya kutwala kuvavangangila mwamuumididye *UMU* nkal-aboshi kutwala kushidoni, "Tiyagu jo pamo na vanning'unumunu, vavangangile." Nae kutwala kuma kuka kulyutu linji.

¹⁸ Napanelo wiko paushwenge, mabulisha ding'ano dyave dindivatindinganianga namene mwaa havashimanya shintandéke Patulu. ¹⁹ Bai Elode andilamulila vannambe kanji havangwene. Nadoni nae andivalalyanga mabulisha avalá kutwala kulamulila kuvatanalanga kutwala kunyema ku Yudeya kuka ndaikala palikaja Iya Shashaleya.

Kupela kumwe Elode

²⁰ Napanelo Elode, ashindavavikila namene shitundi venentete va ku Tilu namu va ku Shidoni, vanavo kutwala kunga shipinga kuka nannola ling'oto lyakunshomba Balashitu, mmádengo nang'olo wapaing'ande imwe umu, vandijugwa pakulota ipagwe amani mwaa shakulya shavashilya mmakaja ave shishaalakela kushilambo shake Elode.

²¹ Napanelo liduva lyankodyanio lyavikile Elode likawike, andigwalangila dinguvo dyake dyashiumu kuka ndaikala pashiteng'u shashiumu kutwala kutangola na venentete. ²² Bai venentete vashindajunga vaashidoni, "Lidi ali halinava shinu lyamunu vila kanji lyannungu." ²³ Kutwala popo na popo, njelo wake *UMU* kunkanyola Elode mwaa hampéle lishangelo Nnungu

kutwala kumulya vakoko mmunda kwishidyanneu nti-ma, kupela.

²⁴ Napanelo lilove Iya Nnungu lishindaandavala na vakwoda vashindaanjadyeka. ²⁵ Bai Balinaba namu Saulu pavatandadidye shimadengo shave pa Yelusalemu vandyúma na mumwanda wave vanintwala Nshuwau aijá áshimanyika kwalina Iya Malukushi.

Balinaba namu Saulu vankuka kwavamidi

13 Napanelo paliganisha Iya pa Antiyokiya vandipagwa vakulava na vamwalimu kenga ava: Balinaba, Shimiyau áshimanyika kwalina Iya Wakudimba, Lushiu wa ku Shilene, Manaeni munu ákulumwike pamo namu umu Elode † na kupagwa Saulu. ² Muliduva limo vakwoda uti valipudya kumwe *UMU* na vavele mukunga, Imumu Wanashwe andivaulila kushidoni, "Mwapule Balinaba namu Saulu vauke vakakole madengo anivashamadile." ³ Bai vanavo pavamalidile kunga na kushwali, vandivavikila makono kutwala kuvatumidya vauke.

Balinaba namu Saulu ku Kupulu

⁴ Napanelo vanavo vatumigwe na Imumu Wanashwe, vandyálela mpaka pa Selushiya, apo kukwela mwingalava kuka mpaka pashitingi sha Kupulu. ⁵ Pavawikile pa Salamishi, vandivalanganga lilove Iya Nnungu muvitala vyamikodyanio vyavayuda na Nshuwau Malukushi avele nkúpwashela wave. ⁶ Napane pavadingukenge shitingi asho mpaka pa Papu vaninkodya nkúlava jumo wakushang'apa mwavi muyuda walina Bali-Yesu. ⁷ Nae avele muje Shelishu Paulu gavana wapashitingi asho. Shelishu, munu wamang'amung'amu na walimanyilo lyoe, anínshema Balinaba namu Saulu mwaa ashindalota vammalangangile lilove Iya Nnungu. ⁸ Kanji Elimashi mwavi jo, mwaa aku ni kusalangangila kwalina lyake, ashindavangedya vamyombe alambela antividyanage gavana hanaliinjidyange mulikulupililo. ⁹ Napanelo Saulu áshimanyika momo kwalina Iya Paulu, pamuumbele Imumu Wanashwe aninnola ndoo, mwavi jo kutwala kushidoni, ¹⁰ "Umwana umwe Ndamoni gwe! Ummongo waishaliya gwe! Ummunu wakukubya ushwang'a na vitendo vyakunyata gwe! Da wako ulota kuleka duvani kudinguwanga dindila dyashalowa dyake *UMU*? ¹¹ Bai ambi popa *UMU* andakupa shaushanga! Ambi popa undaputala na undatwala wakati paukona ata ng'ading'adi vela." Mwenu, mwavi jo kundimbinneu kumemo, kutunduvanga kulidingula popo annambela wakunkamula nkono. ¹² Bai gavana washitingi pagwene davo, andishanga mapundisho ammalanganga *UMU* kutwala kukulupila.

Paulu namu Balinaba pa Antiyokiya ya ku Pishidiya

¹³ Paulu na vavagwe vakaume pa Papu vandikwela mwingalava kuka mpaka pa Palegi shilambo sha ku

† *Umu Elode aju ni mwanagwe umu Elode ntandi, ni aijá álamulidile kunshinda Nshuwau Wakubatisha na ni jojo ámuukwime Yesu.*

Pampiliya, napane Nshuwau Malukushi andivaleka kuujila ku Yelusalemu. ¹⁴ Vakaume pa Palegi vandyúka mpaka pa Antiyokiya ya ku Pishidiya kutwala muliduva lyakupumula vanavo kuka ndaikalanga pashitala shakulipudidya. ¹⁵ Vakainuke kushomya Lilamulo na Vakulava, vananangaledi vashitala shakulipudidya vandituma vavajugwe doni, "Mmanung'unumunu, likapagwa lilove lyakuvanowanga venentete, tangola." ¹⁶ Paulu kutakatuka kuvamaladyanga na makono kutwala kushidoni, "Mmanaisihilaeli pamo na mmanji múnjopa Nnungu, ngwigwa! ¹⁷ Nnungu wavenentete ava vanaishilaeli andivatandola vanakuluvetu na kuvatenda kuva venentete vakumene vanama kenga vamedi mushilambo sha Mishili kutwala kuvauya kwankono wadimongo mushilambo asho. ¹⁸ Kutwala apo, andivapililila muvyaka kenga alubaini doni vavele mushimbweshi ¹⁹ na paukile ndavamalidya venentete saba mushilambo sha ku Kanaani, ulongo wave andivapa kuva maleko. ²⁰ Vinu avi uti vinditandeka muwakati wavyaka dimiya nsheshe na amusini. Kutwala apo, Nnungu andivapa vakulungwa vakuvalangalalela mpaka muwakati umwe nkúlava Samuwele. ²¹ Napanelo vanaishilaeli vakanjugwe umu wakuvalangalalela, Nnungu andivapa Saulu mwanagwe Kishi wamulikola lyavanabenjameni kutwala kuvalangalalela vyaka alubaini. ²² Pamuumidye Saulu, aníntandola Daudi ave umu wave. Jo Daudi aju, nae andímuumidya ushuda aashidoni, 'Ndimwona Daudi mwanagwe Yeshe kuva munu kwakwodananavo ntima wangu; nae andatandeya malotelo angu uti.'

²³ "Napanelo mo muudukulu wake Daudi kwodana na kulivikila kwake, Nnungu animpalakedya kwavanaishilaeli Mwamboli Yesu. ²⁴ Kanji Yesu akanava kuumilila, shitandi Nshuwau Wakubatisha andipita avalaililila venentete uti vanaishilaeli vapate ubatisho wakulijugulanga madambi ave. ²⁵ Napanelo Nshuwau àvele pepi na kumalila shimadengo shake, andivaudya vanu doni, 'Da mwenu nangu mungwona kuva nyani? Nangu hangunava shinu aijá wamunnindila. Kanji ling'oto lyangu nangu, ankwida aijá wandikavaikidile nangu kumuulanga vilatu.'

²⁶ "Mmanung'unumunu mmashipinga shaudukulu wake Abulaamu pamo na mwenu mmanji múnjopa Nnungu! Lilove lyakwambwalegwa aku, wavantumidididye ni wetu. ²⁷ Venentete va ku Yelusalemu pamo na vakutawala vave kwamwaa wakuntikinanga na ata mene kumanya vyavatangwele vakulava vishaméka kula liduva lyakupumula, vanavo vanditandeya pavaukile ndamuukumu. ²⁸ Ata ikava kenga havangwene likosha lyakupalela, vanínjugwa Pilatu pakulota abyagwe. ²⁹ Napanelo vakatandeye uti avilá vyavaandike vimwamba nae, vanínshuluwa panshalaba kuka nammika mushonga ³⁰ kanji jojo jo, Nnungu anindyuwa pakati pavakupela. ³¹ Akandyuwe, vavagwe vaalekenavo ku Galileya mpaka ku Yelusalemu, vandyónananavo mumaduva oe na vovo vankumya ushuda wake kwavanaishilaeli. ³² Nadoni wetu apa tundida nammalangangila ntenga wambone uvalánga

kenga Nnungu uti avilá vyalivikile kwavanakuluvetu, ³³ anditandeya kwetu wetu tuvadukuluvave pakundyuwa Yesu kenga mwavaandikidile mulibuku lya Dimu inamba yambili doni,

"Wako apa umwanangu kutunduvangila nelo nangu nitatako.' †

³⁴ "Nnungu anindyuwa Yesu pakavele pakuujila kavili nae mukupela; shitendo ashi ni shatangwele Nnungu doni,

"'Ndamwing'a vyakulivikila vyakwilimyanga na vyakukulupilika vimwe Daudi.'

³⁵ Namomo lipungu linji litédoni,

"'Haunneka Nkwilimyanga wako aunda.' ††

³⁶ "Napanelo Daudi muwakati wake akatandeye malotelo ake Nnungu, andíjaa shingumi na vandyúka nanshika pavyonga pavalala vanakuluvake kutwala kunda ³⁷ kanji aijá wandyuwidye Nnungu pakati pavakupela, haundile. ³⁸ Nadoni mmanung'unumunu ikala mumanya doni, kwaindila yamunu jojo aju tunkumalangangila kulivalivigwa kwamadambi na muvinu uti vyo vyamukashiulula mwenu kuvalangiligwa ishaliya kwalilamulo limwe Musha ³⁹ kwaindila yake nae kula munu ákulupila, ankuvalangiligwa ishaliya.

⁴⁰ Nangu ninkushidoni, shonde liledye pakulota havinankodye avilá vyavatangwele vakulava doni,

⁴¹ " 'Ngwigwa mwenu mmadyeluelu!

Shanga na jaikangila kushu ko!

Mwaa shinu shangutenda muwakati wenu ashi,

ata munu akammalangangila shana

hamukulupila.' " †

⁴² Bai Paulu namu Balinaba vauma pashitala shakulipudidya, venentete vandívajugwangila vaujile kavili mulyutu alyo muliduva linji lyakupumula vakaanjedye malove alo.

⁴³ Kutwala nkodyanio paumalilike, vayuda voe pamo na vanu valiinjidyéngé vandímwoda Paulu namu Balinaba váshitangola na vanavo vavashomba pakulota vauke mushu muumonyo wake Nnungu.

⁴⁴ Napanelo muliduva lyakupumula lyatíke, vanu vakwinjipika vapalikaja alyo vandíkadyania pakulota vaigwe lilove lyake *UMU*. ⁴⁵ Bai vayuda pavagwene imbumba yavanu vakadyénie indívaumbala ing'ou kutwala kuntuakanga Paulu na kumwabalanga. ⁴⁶ Ata ikave davo Paulu namu Balinaba vandítangola pavakajugulanga shinu vaashidoni, "Indívaikila shitandi tuvalangange lilove lya Nnungu kwenu mwenu kanji kwodamwaa munkwita na munkulyapula musingumi shíkamalilika, bai wetu mwanda au kwavamidi.

⁴⁷ Mwaa *UMU* anditulaililila doni,

" 'Ninkukuvika wako uve lilangadyo kwavamidi

pakulota uukenavo ntenga wakwambola mushilambo uti.' " ††

⁴⁸ Bai vamedi vakaigwe malove alo, vashindapuwanga namene na vashindaing'a lishangelo lilove lyake *UMU*; kutwala avalá vatandalégwe vapate shingumi shíkamalilika, vandíkulupila. ⁴⁹ Nadoni lilove lyake *UMU*

† *Lola Dimu* 2:7. †† *Lola Dimu* 16:10. ‡ *Lola Abakuki* 1:5; *Ishaiya* 29:14. †† *Lola Ishaiya* 49:6.

lishindavalangangika mulijimbo alyo uti. ⁵⁰ Kanji vayuda vandívatumbilikanga vanang'olo pamo na vakongwe vakulipudya na vakwishimika vapalikaja alyo kutwala vanavo kutunduvanga kuvapapata vapaulu na vandíavinganga mulilanga alyo. ⁵¹ Bai vamyombe vandípumunanga litutunga mmadodo mwave † kutwala vanavo kuma kuka pa Ikoni. ⁵² Kanji vakwoda va ku Antiyokiya vandípuwanga namene na vandyúm-baligwa na Imumu Wanashwe.

Paulu namu Balinaba pa Ikoni

14 Napanelo pa Ikoni Paulu namu Balinaba vandíinjila mushitala shakulipudidya shavayuda na kwainamuna yavatangwele, imbumba yavayuda na yavagalegu indíkulpila. ² Kutwala vayuda vákaitikidile lilove alyo vandivatubya vamidi pakulota vavapinge vavung'unumunu avo. ³ Napavedoni vandíikala maduva oe namene pa Ikoni vammalanganga *UMU* pavakajugulanga shinu na *UMU* nae ashindaing'a ushuda kwalilove lyaumonyo wake kwaindila yakuvapa dimongo dyakutandela vimanyikilo na vyakutikinikanga. ⁴ Nadoni vanu vankaja amo vandíjavanikana; kupagwa shipinga shavayuda na kupagwa shipinga shaupande wavamyombe. ⁵ Bai vayuda, vamidi pamo na vakutawala vave, vandyúnganila kuvauvyauvyanga na kuvaamanga majanga vamyombe. ⁶ Napanelo Paulu namu Balinaba vakamanye nnugu awo, vandíttila ku Lishitala na ku Delebe makaja ashilambo sha ku Likaoniya na kutilila mumakaja anji ashitanono. ⁷ Vanavo mumakaja alo, vashindavalanganga ntenga wambone.

Paulu ankwamangigwa majanga pa Lishitala

⁸ Napanelo pa Lishitala andípagwa munu jumo wakudidimanga madodo áshiikala vila, avele mmashikini tangu shing'ang'eng'e shake na ákashiwena. ⁹ Munu aju pashimwigwilila Paulu; Paulu pannodile ndoo, akamwone kuanavo likulupililo lyakulota apone, ¹⁰ andítangola pashanya po, amwaulila doni, "Takataka wimile!" Munu aijá kutakatukinnee na kutunduvanga kuwena. ¹¹ Vanu vaumbalanidíle apo pavagwene shitendo ashi shatandile Paulu, vandíjunga vatangola mushitangodi shalikaoniya vaashidoni, "Vannungu vandíjalukanga kuva mwavanu kutwala kushuluka kutwidila!" ¹² Balinaba vashinshema Sheushi na Paulu kunshema Elimeshi mwaa nae ni ashiva nku-tangola. ††¹³ Napanelo nkúlangalalela-shadaka wake Sheushi, nnungu wavandangaléle ing'ande yake pashengo likaja, andívaukanavo vang'ombe na lidaka lyadinduva pashengo likaja mwaa nae pamo na imbumba yavanu vanji vashilota vavashindange vanyama avo, vatende shadaka shakulipudidya kumili kwave.

† Shitendo shakupumunanga litutunga mmadodo shive na mana akulodya kuvaulila vene makosha ave akwita kwigwilila lilove lya Nnungu. †† Sheushi namu Elimeshi, mushinamidyo shavagalegu vavele vannungu pakati pavannungu vanji. Sheushi avele nnungu nkumene kutwala Elimeshi kuva nnungu múntenga.

¹⁴ Kanji Balinaba namu Paulu, vamyombe avo pavaigwite shitendo asho, vandípapulanga dinguvo dyave, kulijela shing'ati imbumba vatangola pashanya po ^{†15} vaashidoni, "Mwenu, mwaa shani munkutenda davo? Wetu apa, tuvanu túumbigwe kenga mwenu; apa wetu twidilé nammalangangila ntenga wambone pakulota muleke vinu vyamambinya avi, mushinjiulile mitima vyenu kwa Nnungu mumi ákandyenge kuwa na pai, imanga na vinu uti vipagwite mumautu alo. ¹⁶ Muwakati wapanyuma, Nnungu andívaleka venen-tete uti vawene mwaalatela vo vene. ¹⁷ Kanji ata ikave davo, nae ngwengwe halakíle kulilodya kwavanavo; andilodya wambone wake kwaindila yakuntanyela imbula yakuwa, kumupa mapuno muwakati wake, kumu-pa shakulya shoe shamwikuta na kumuumbadya lipuwilo mmitima vyenu." ¹⁸ Kanji ata vamyombe vavatangalele malove alo pakulota valalakeye kutenda shadaka shakulipudidya kumili kwavanavo pandíka-madyanga namene.

¹⁹ Napanelo mo nkaja mo, vandíwika vayuda vaantiyokiya ya ku Pishidiya na vaikonu kutwala kuvatum-bilikanga vanu vankaja amo; bai vandímwamanga majanga Paulu, kumuutanga kuka nanjaa kunyenje likaja vona kenga andipela. ²⁰ Kanji vakwoda vakauke nantang'anedya Paulu, Paulu andítakatuka kuujila nkaja. Kutwala palyamba lyake nae namu Balinaba kuka pa Delebe.

Paulu namu Balinaba vankumalila shimwanda

²¹ Napanelo vanavo vakavalangange ntenga wambone pa Delebe vandítadya voe vave vakwoda. Kutwala apo, vandyújila pa Lishitala, kuma apo kuka mpaka pa Ikoni na vandíwika pa Antiyokiya ya ku Pishidiya. ²² Mumakaja alo, vanavo vashindapita vavanonowanga vakwoda vavapa ntimu pakulota vauke mushu mulikulupililo na vavamanyiya doni, "Indivaikila tupite mumauvilo oe kwambangidya twinjile muutawala wa Nnungu." ²³ Namomo mumaganisha uti avashipita, vashindavatandola vanang'olo; ling'oto lyakushwali na kunga vashindavavika vakwoda uti mmakono mwake *UMU* wavankulupidile. ²⁴ Vakapite shilambo sha Pishidiya vandíwika ku Pampiliya. ²⁵ Vakavalangange ntenga wa Nnungu pa Pelege vandyálalela pa Ataliya. ²⁶ Pavaumile pa Ataliya vandíinjila mwingalava kuujila ku Antiyokiya ya ku Shiliya palikaja lyavavakamudídye kwaumonyo umwe Nnungu kwashimadengo asho shavamalidile. ²⁷ Pavawikile, vandíshema liganisha kutwala kuvalanganga vyatandile Nnungu kwaindila yavanavo na mwavapalalele litala vamidi pakulota vavenavo likulupililo. ²⁸ Bai vanavo vandíikala maduva oe namene nkaja amo pamo na vakwoda.

‡ Shitendo shakupapulanga dinguvo shinkulodya kwita kata-kata vitendo na malove akunkupulu Nnungu.

Ikamati yavamyombe pa Yelusalemu

15 Napanelo vanu vanji vandyúma ku Yudeya kuka ku Antiyokiya kutwala kutunduvanga kuva-pundisha vanung'unumunu vaashidoni, "Mwenu vakanankumula likumbi kenga mwililatela lidyavalelo lyake Musha, mwiko hamwambolegwa." ² Bai ing'ano ai iníntadya Paulu namu Balinaba vapwatane yakudimba kumevo na vanu avo. Nadoni indyámuligwa pakulota Paulu namu Balinaba pamo na vanung'unumunu vanji vapaliganisha lya pa Antiyokiya vauke ku Yelusalemu vakakadyanie na vamyombe pamo na vanang'olo pakulota valalyange ing'ano ayo.

³ Napanelo liganisha likavatumidye, vanavo vandípitila ku Poiniki na ku Shamaliya vavavallenganga vamidi mwavashinjiulidile mitima vyave kwa Nnungu; bai vanung'unumunu vandípuwanga namene mwaa wadyabali adyo. ⁴ Bai vanavo pavawikile pa Yelusalemu, liganisha, vamyombe pamo na vanang'olo vandívapwashalela landa kutwala vapaulu kuvavallengangila vinu vyatandile Nnungu na vanavo. ⁵ Kanji vakukulupila vanji vaishama yamapalishayo † vandíimila kutwala kutangola doni, "Vamidi indivavaikila vakumuligwe na tuvalamulile vaodedye Lilamulo lyake Musha."

⁶ Bai vamyombe pamo na vanang'olo vandíkadyania pakulota valipundishe ing'ano ayo. ⁷ Napanelo ukau-milile ntau utwéte wakati woe, Patulu andítakatuka kutwala kushidoni, "Mmanung'unumunu, mwenu mundimanya shana doni tangu kala Nnungu aningutandola pakati penu pakulota dashi, kwindila yaikanywa yangu vamidi vaigwe lilove lyantenga wambone na vakulupile. ⁸ Nnungu ámanyite mitima vyavanu, andivaumidya vanavo ushuda pakuvapa Imumu Wanashwe kenga mo mwapalalele wetu. ⁹ Wetu namu vanavo Nnungu hatupambulanienge; nae andyushanianga ushapu mitima vyave kwindila yalikulupililo. ¹⁰ Napanelo mwaa shani munkumwangu Nnungu pakuvatika ligogo likumene vakwoda lyavakaulwile vanakuluvetu kulitika ata nawetu momo? ¹¹ I davo, wetu tunkukulupila kenga kwindila yaumonyo wake *UMU* Yesu, wetu tundyambolegwa kulingana kenga mo mwavaambwalagwidye vanavo."

¹² Nadoni vanu uti vakadyaniéngé palyutu alyo vandímalalanga na vandímwigwilila Balinaba namu Paulu pavashivalanganga vimanyikilo na vyakutikinikanga vyatandile Nnungu kwavamidi kwindila yavanavo. ¹³ Napanelo vanavo pavamalidile kutangola Tiyagu kushidoni, "Mmanung'unumunu, ngwigwa! ¹⁴ Mwenu mundigwa mwanagaladile Simoni †† Patulu pammalangenge Nnungu mwavatananidile vamidi tangu kala; nae andivatandola venentete pakati pave vave vake. ¹⁵ Shitendo ashi shinkwitikananga na malove avakulava avaandike doni,

† Mapalishayo vavele vanadini yavabalaniya kanji vavele vanu vashivikila namene kuntima kutandedya Lilamulo lyake Musha. †† Mushigalegu: a Shimiyau. Tiyagu anshamile Shimiyau atumila inangodi yashibalaniya pakulota vayuda vapagwite apo valigwe shana.

¹⁶ "Ling'oto lyavinu avi ndauja kwida ndadenga kavili ing'ande igwile imwe Daudi;

ndakandyanga lidembe alyo, ndadenga kavili

¹⁷ kwambangidya vakwijalila pakati pavanu na vamidi vashamagwidye kwalina lyangu vannambebe *UMU*,

malove ala atangola *UMU*

¹⁸ ámanyidye vinu avi tangu kunantandi.' ‡

¹⁹ "Napavedoni kulalyanga kwangu ni aku, hatu-navadingadinge vamidi vashinjiulila mitima vyave kwa Nnungu ²⁰ kanji tuvaandikile vila havanalitae ushapu kwavannungu vakushang'apa, havanalavalave, havanamamene dinyama dyavanyama vakuvapambilila †† na havanalye myadi. ²¹ Mwaa tangu kala lilamulo lyake Musha linkuvalangangigwa mmakaja uti na kula liduva lyakupumula linkushomegwa muvitala vyamikodyanio."

Ibalugwa kwavakwoda vamidi

²² Bai vamyombe, vanang'olo pamo na liganisha uti vandyámuwa kuvatandola vanu pakati pave vam-palakele Paulu namu Balinaba ku Antiyokiya. Nadoni vandívatandola vananangalaledi ava pakati pavanung'unumunu: Yudashi áshimanyika kwalina lya Balishabashi namu Shilashi ²³ kutwala kuvapa vaukenavo ibalugwa yavaandike doni,

"Vamyombe pamo na vanang'olo vavele vanung'unumunu, kwavanung'unumunu avalá vamidi vapágwa disemu uti dya ku Antiyokiya, ku Shiliya na ku Kilikiya, mumpate nandele.

²⁴ "Wetu tundigwa kenga pakati petu vandyuma vanu bila lilamulo lyetu kwida nantindinganianga na vitangodi vyave mpaka kuntadya mmanu kummilinganianga makumbukililo. ²⁵ Nadoni wetu uti kwau-napamo tundyona kuva shambone kuvatandola vanu vanji vavapalakedye kwenu vanung'unumunu vetu vakunagwaleka Balinaba namu Paulu ²⁶ vanu vajawile shingumi shave kwamwaa walina limwe *UMU* wetu Yesu Klistu. ²⁷ Napavedoni tunintumidya Yudashi namu Shilashi vaide vammalangangile malove ankanywa kwa avilá vyatwandike. ²⁸ Imumu Wanashwe pamo na wetu tundyona kuva shambone hatunantike mwenu ligogo ila mutandedye avi vivaikidile: ²⁹ Hamunalye vyakulya vyavavaumididye vannungu vakushang'apa, hamunalye myadi, hamunamamene dinyama dyavanyama vakuva-pambilila na hamunalavalave. Vinu avyo mukatand-edyo ni shambone namene.

"Bai apa ni pamwiso."

³⁰ Bai vanu vatumigwe avalá liganisha lindivalaila kutwala vanavo kuma kuka ku Antiyokiya. Pavawikile, vandíshema nkodyanio waliganisha kutwala kujaula ibalugwa kuvapa. ³¹ Vanung'unumunu pavashomidye, malove alo andívapa ntima shii na vandípuwangila

‡ Lola Ishaiya 45:12; Yelemiya 12:15; Amoshi 9:11-12. †† Shitendo shakuvabyaa vanyama kwindila yakuvapambilila mididi shavashitenda vamidi kutwala kuvamamena hashivaikidile vatende vakwoda. Lola yadavo mwinamba ya 15:29.

namene ³² kutwala Yudashi namu Shilashi vo vene vavele vakulava momo, vandítangola namene vavapa ntima shii na vavanonowanga vanung'unumunu. ³³ Vanavo vakaikalange maduva avaikalenge pa Antiyokiya, vanung'unumunu vaantiyokiya vandílananganavo kwaamani na vandívaleka vaujile kwa avalá vavatumidídye. ³⁴ ^{†35} Napane Paulu namu Balinaba vandíikala pa Antiyokiya maduva avaikalenge vavapundisha na vavalanganga lilove lyake *UMU* pamo na vanung'unumunu vanji.

Paulu namu Balinaba vankwambukananga

³⁶ Akapite maduva doni, Paulu andímwaulila Balinaba kushidoni, "Ambi apa tuke tuvalola vavavung'unumunu mumakaja uti atupitile tuvalanganga ntenga wake *UMU* kwambangidya tuvamanye mwavanamila." ³⁷ Napanelo Balinaba ishinannagwela vauke shalumo namu Nshuwau áshimanyika kwalina lya Malukushi. ³⁸ Kanji Paulu hashona kuva shambone vavamukenavo aijá e alyumadyéngé ku Pampiliya na ákaukile na vanavo kushimadengo ³⁹ kutwala kuumilila ntau wakujowa mpaka kuvatadya kwambukananga. Balinaba akantwala Malukushi kwinjila mwingalava kuka ku Kupulu. ⁴⁰ Paulu kanji kuntwala Shilashi kuka ling'oto lyavanung'unumunu kunkamudya kwavumonyo umwe *UMU*⁴¹ na ashindapita ku Shiliya namu ku Kilikiya anonowanga maganisha.

Paulu namu Shilashi vankuntwala Timoti

16 Nae andyúka mushu na shimwanda shake mpaka pa Delebe na pa Lishitala; napanelo pavalyutu alyo ashindanama nkwoða jumo walina Timoti; anyoke avele nkúkulupila walikola lyashiyuda kanji tatake avele mugalegu. ² Jo Timoti aju, vashinamalanganga wambone vanung'unumunu va pa Lishitala na va pa Ikoni. ³ Paulu inínngwela antwale ave wakumpalakela. Akantwale nae anínkumula likumbi ^{††} mwaa vayuda váshiikala ako vandímanya doni tatake Timoti avele mugalegu. ⁴ Napanelo mumakaja vavashipita, vashindavapa vakwoda uwamushi wavavumidye vamyombe na vanang'olo ku Yelusalemu kwambangidya vatandedye. ⁵ Nadoni maganisha ashindaliimiliyanga nkati mulikulupililo na vanu vashindauka mushu vaanjadyeka.

Paulu ankushamegwa ku Makedoniya

⁶ Vanavo vandípita isemu ya ku Piligiya na ku Galata vakadivililigwa kwa Imumu Wanashwe kuvalanganga lilove ku Ashiya. ⁷ Pavawikile pa Mishiya, vandílingangila vauke ku Bitiniya kanji Imumu wake Yesu havalataléle vauke. ⁸ Napavedoni vanavo vandípita pa Mishiya kwalalela pa Tolowashi. ⁹ Napanelo shilo Paulu indímwidila indoti: munu wa ku Makedoniya àimidile anjugwangila doni, "Shonde, amboka wide kwetu ku

† *Inamba ai mumaandiko uti akala ashigalegu haipali.* †† *Mushinamidi shavayuda mwana nnume vashinkumula likumbi àvenavo maduva nane ling'oto lyakuvalekwa.*

Makedoniya utupwashele." ¹⁰ Ling'oto lyakwona indoti ayo, tundílipanganianyangidyanne kuka ku Makedoniya tumanya kenga Nnungu anditutuma tuke tukavavalangangile vavamakedoniya ntenga wambone.

Lidiya ankunshinjulila *UMU* ntima wake

¹¹ Kutwala wetu kuma pa Tolowashi kukwela mwingalava kuka shalowa mpaka pashitingi sha Shamotolaki; palyamba lyake wetu kuwika pa Neyapolishi. ¹² Patumile apo tundyúka mpaka pa Pilipo likaja lya dishikilitu itandi yashitajili yalijimbo lya Makedoniya lyavashitawala valoma. Palikaja ali, wetu tundíikala maduva atwikaléngé. ¹³ Napanelo muliduva lyakupumula, wetu tundyúma palikaja po kuka kulundi kushinu kwatushona kenga tundapata lyutu lyakushwalidya; wetu kwikalanga kutwala kutunduvanga kutangonavo vakongwe vakadyaniéngé mulyutu alyo. ¹⁴ Pakati pavakongwe váshitwigwilila andípagwa nkongwe jumo áshilipudya kwa Nnungu walina Lidiya áshishumidyanga dinguvo dyakupapeka dyailangi yanshambalau na wakwalakela kulikaja lya Tiyatila. *UMU* napane andímuungula ntima pakulota kwigwa shana vyashitangola Paulu. ¹⁵ Ling'oto lyankongwe ajo kupata ubatisho pamo na vavaping'ande pake, andítujugwangila aashidoni, "Ikava kenga mwenu munkungwona kenga nangu ninkúkulupila wake *UMU*, tuke mukaikale kwing'ande kwangu." Bai nae andítuulula kutuukanavo kwing'ande kwake.

Paulu namu Shilashi nkalaboshi

¹⁶ Napane ive doni, wetu tuka kulyutu lyakushwalidya alilá, andítwidila mwali jumo ntumwa e avénavo lijini lyadyangele; jojo jo, ashindavapatiya malupulupu oe vanang'olo vake kwashimadengo shake shadyangele. ¹⁷ Nae amwoda Paulu namu wetu ashindakugwanga pashanya po aashidoni, "Vanu ava ni vatumika vake Nnungu Wapashanya-uti; vankumalangangila indila yakwambola." ¹⁸ Malove ala nae andítangola mumaduva oe kutwala kumwisho kwake Paulu kunnyatila; akashiliuka kumwaulila lijini jo doni, "Palina limwe Yesu Klistu ninkukulumulila, kuma mumi mwamwali aju!" Lijini kuuminneu.

¹⁹ Napanelo vanang'olo vene mwali ntumwa aijá pavagwene kenga lilindilililo lyave lyamalupulupu linditimbikanga, vaníntwala Paulu na muje Shilashi kupita vavautanga mpaka kwavakutawala kushiwanja shikumene shamikodyanio ²⁰ kutwala kuvalodya kwavananangalaledi valibengi vaashidoni, "Vanu ava vayuda na vovo vankutimbanga likaja lyetu. ²¹ Hainatoshe vankwidanavo mapundisho alaéka kwetu wetu tuvalo ma kwitikila na kwodedyo." ²² Bai imbumba yavanu ikatunduvange kuvakanyalanga, vavanangalaledi valibengi vandílamulila vavavulange dinguvo na vavashape. ²³ Ling'oto lyakuvakoma namene, vandívatwala kuvagang'aledya nkalaboshi kutwala kumwaulila nanangalaledi waikalaboshi avavaledye namene. ²⁴ Bai nanangalaledi waikalaboshi akapate malamulo alo,

andívatwala kuka ndavajela kushumba shankati uti kutwala madodo kuvaungangila mulikukwa.

Kwambwalegwa kwananangalaledi waikalaboshi

²⁵ Napanelo ívele kenga shilo shing'ati doni, Paulu namu Shilashi vashindashwali na vashindaimba dimu dyakuntumbyanga Nnungu akuno vakungwa vanji vavaigwilila. ²⁶ Kwashingangala kuumilila shindangenda shakujowa mpaka ikalaboshi kundangenda uti, milango kushimukanginneu na vakungwa uti mang'unyang'unya kuungukanga. ²⁷ Napanelo nanangalaledi waikalaboshi paimwike, akone milango vivele mwandwa, andítwala lyambila pakulota alibyaee mwaa ashona kenga vakungwa vanditipukanga. ²⁸ Kanji Paulu andíkugwa namene aashidoni, "Haunalitende shakunyata! Wetu uti tupali." ²⁹ Bai nanangalaledi waikalaboshi andíshamela shenje kutwala kwinjila shipajelo nkalaboshi akuno atatamela kuka ndaunama mushu mwake Paulu namu Shilashi. ³⁰ Nae kutwala kuvau midya panda kuvaudya, "Mmanang'olo inguvaikidile ngutende nyamani ngwambolegwe?" ³¹ Vanavo kushidoni, "Nkulupile *UMU* Yesu, undaambwalegwa, wako pamo na ing'ande yako." ³² Bai vanavo vanímmalangangila lilove lyake *UMU* nae pamo namu avalá uti vamwing'ande yake. ³³ Mwisaa yoyo nae andívatwalinneu kuvaukanavo ndavaukanga vilonda na muwakati wowo andíbatishwa pamo na vanu vake uti. ³⁴ Akabatishwe, andívatwalinneu vapaulu kuvaukanavo kwing'ande kwake ndavapa shakulya. Bai nae andípuwanga namene pamo na vapaing'ande pake uti mwaa wakunkulupila Nnungu.

Paulu namu Shilashi vankuunguligwa

³⁵ Napanelo wiko paushwenge, vananangalaledi valibengi vandívatuma vadyoko vave vaashidoni, "Vaungule vanu avalá." ³⁶ Kutwala nanangalaledi waikalaboshi kumwaulila Paulu kushidoni, "Vananangalaledi valibengi vandilamulila mwenu muunguligwe. Nadoni umananga muke kwaamani!" ³⁷ Kanji Paulu andíva-jang'ula vanavo kushidoni, "Aba! Vatushapilé paumbala na kutugang'aledya nkalaboshi pavakalalyanga shana mwaa wene na wewe túvele tuvaloma! Napanelo valota vatuungule shipiipii? I mwanavo! Indivaikila vaide vo vene, vatuungule." ³⁸ Vadyoko kuja kuka ndavaulila vananangalaledi vave valibengi malove alo. Vanavo pavaigwite kenga vapaulu vavele venentete valoma, vandíjopa namene. ³⁹ Bai vanavo vandída ndavajugwa samaani vapaulu na ling'oto lyakuvaungula nkalaboshi, vandívajugwangila vaume nkaja. ⁴⁰ Vapaulu vakaume nkalaboshi vandyúka kwing'ande imwe Lidiya na paing'ande apo vandívakodya vanung'unumunu; bai vanavo vandívapa ntima shii vanung'unumunu avo kutwala kuma nkaja mu Pilipo mo kuka.

Paulu namu Shilashi pa Teshalonika

17 Vakapite pa Ampipolishi namu pa Apoloniya vandíwika pa Teshalonika; po pa Teshalonika po shindípagwa shitala shakulipudidya shavayuda. ² Napanelo mudishumana nnatu mumaduva akupumula, Paulu kenga lidyavalelo lyake andyúka kushitala shakulipudidya ndataukananganavo vayuda atunduvangila mu Maandiko ³ avaulila na avalodya kenga Klistu inímmaikila auvauvange na adyuke pakati pavakupela na ashindatangola aashidoni, "Jo Yesu wanímmalanganga aju, ni Klistu wene." ⁴ Bai vayuda vanji vandishambegwa kutwala kulyunganianga namu Paulu namu Shilashi; namomo indílyunganianga imbumba yavagalegu váshilipudya kwa Nnungu pamo na vakongwe voe vakwishimika. ⁵ Kanji vayuda vandívanavo ing'ou vakavatwalanga vakubanga vanji vashakoni vakaunga shipinga shavo shaupuju kupita vataa upuju nkaja; vanavo vandyúka ndapajola ing'ande imwe Yashoni valota vankamule Paulu namu Shilashi vavaukenavo kuumbala. ⁶ Kanji kwodamwaa havavapatíle, vanavo vandímuutanga Yashoni pamo na vanung'unumunu vanji kuvaukanavo kwavananangalaledi vapalikaja alyo vajunga pashanya po vaashidoni, "Vanu ava vapíta vatindinganianga shilambo, nkaja amu momo vandíwika. ⁷ Vanu vovo Yashoni andivapwashalela paing'ande pake. Vovo vo vyavatangola uti vakutimbanga malamulo ake Shashali vatangola doni, apali umu junji wavanshema Yesu." ⁸ Bai imbumba yavanu pamo na vananangalaledi vapalikaja pavaigwite malove alo, vindívananyanyamuka mitima. ⁹ Kanji Yashoni akavalipe njulukulu washamana vanínneka auke pamo na vavagwe.

Paulu namu Shilashi pa Baleyá

¹⁰ Palidimbile liduva vanung'unumunu vaníntwalinneu Paulu namu Shilashi kuvaukanavo ku Beleya. Pavawikile ako vandyúka kushitala shakulipudidya shavayuda. ¹¹ Kanji vayuda vankaja amo vavele vakuligwa kuvapunda va ku Teshalonika; vanavo vandípwashalela ntenga na ntima wave uti na kula liduva vashindalalyanga Maandiko pakulota vamanye kenga munkulinganana na amulá mwatangalela Paulu. ¹² Nadoni voe pakati pave vandíkulupila namomo pakati pavagalegu vakongwe vakwishimika na valume voe. ¹³ Kanji vayuda va ku Teshalonika vakamanye kenga Paulu ankuvalanganga lilove Iya Nnungu pa Beleya momo, vandyúka koko ndavakang'ela venentete na kutaa upuju. ¹⁴ Muwakati wowo vanung'unumunu vandímwaulila na vanímpanganangidyanne Paulu auke nanyenje imanga kanji Shilashi namu Timoti vandíikala mo nkaja mu Baleyá. ¹⁵ Bai vanung'unumunu váshimpalakela Paulu vandímuukanavo mpaka pa Atena na ling'oto lyakupata lilamulo lyakuinneu ikaululika Shilashi namu Timoti kwanavo, vanavo vandyúma.

Paulu pa Atena

¹⁶ Paulu pashivalindila vanavo ku Atena, ntima wake ushinanshanona mwaa wakwona likaja lya Atena kumbalanga mashinamu avannungu. ¹⁷ Napavedoni nae ashindataukananganavo vayuda na vanu vanji vakunjopa Nnungu mushitala shave shakulipudidya na kutaukananga na vanu vanji vashipita pashiwanja shamikodyanio.

¹⁸ Napanelo vakumanya vanji vaepikuli na vaestoiku † vashindomba mwaa namu Paulu kutwala vanji kushidoni, "Munu álambukanga mwanambwe aju aamba nyamani?" Kutwala vanji kavili kushidoni, "Aju twona kenga avalanganga vannungu vavilambo vinji." Vandítangola davo mwaa Paulu ashimmalanganga Yesu na kuvalanganga kudyuka kwavakupela.

¹⁹ Nadoni vanavo vaníntwala kumpalakela kunguguvale ukumene pa Aliyopagu ndamuudyangidya doni, "Unkuulula kutwaulila mana amapundisho aambi autupa ala? ²⁰ Mwaa wako unkutupa mapundisho akumadyanga namene. Napanelo tulota tumanye mana ake." ²¹ Napane vaatena uti na vanu vanji vakwaloka vashipagwa nkaja amo, hashipali shinji shavashitenda ila kuvalanganila na kwigwa vyaambi.

Paulu ankuvapundisha pa Aliyopagu

²² Napanelo Paulu andíimila pa Aliyopagu kutwala kushidoni, "Mmaatena! Nangu ninkumwona mwenu nkati mushinamidi shenu uti kuva mmanadini namene ²³ mwaa pangupitile ngudingukanga nkaja amu ngulalyanga vyakulipudidya vyenu ndikodya namomo alutali yavaandike doni, 'Kwannungu Ákamanyika.' Napane aijá wamulipudya kwabila kumanya ni jojo wanimmalanganga. ²⁴ Aju ni Nnungu ákandyenge shilambo na uti vipagwíte amo; jojo ávele *UMU* wakuwa na pai hananama muding'ande dyakushwalidya dyavadangile vanu ²⁵ na ata hanatumikiligwa kwamakono ashimunu kenga shipali shimwóva mwaa nae ni ávapa vanu uti shingumi, imumu na uti vinu. ²⁶ Kutunduvangila kumunu jumo andivakandyanga venentete uti pakulota vaname mushilambo uti; ni jojo ávápangidile kaladavo wakati wakunama na ávavikidile kaladavo mautu wakunama kula venentete ²⁷ kwambangidya vannambe Nnungu; nakapanji vanampamangapamanga na kumwona ata ikava kenga nae havele kushu na kula munu pakati petu. ²⁸ Ivelé kenga mwavatangaladile doni,

"Nkati mwake tunkunama, tunkuvena na tunkuvanavo umunu wetu," ††

kenga mwavatangaladile vanu venu vashilanga doni,

"Nawetu momo ni udukulu wake nae."

²⁹ "Napanelo ikava kenga wetu ni udukulu wake Nnungu, haivaikidile tukumbukile kenga unnungu unkulinganana na lishinamu lyashaabu, lyashitali shavanakandyanga dyela kwali lyalijanga lyavadile munu

† Vanu vavipinga avi vivili, kula vanu vashindavanavo makumbukililo ave na vashiva vanu vashipundisha mwakunamila vanu mushilambo. †† Lola Jobi 12:10; Daniele 5:23.

kwamakumbukililo na ulanda wake mwene. ³⁰ Kanji Nnungu pakavalangila wakati aulá waungamanya, ambi apa ankuvalangangila vanu uti mumautu avanama valijugulange madambi ave ³¹ mwaa Nnungu andipanga liduva lyakuukumu shilambo kwaishaliya kwaindila yamunu jumo wantandwele mwene. Ing'ano ai andilodya umwiu kwauti pakundyuwa munu ajo pakati pavakupela."

³² Napanelo vanavo pavamwigwite Paulu atangola ing'ano yakudyuka kwavakupela, vanji vandímwiludyanga kutwala vanji kushidoni, "Ing'ano ai tundakwigwilila kavili muwakati unji." ³³ Napavedoni Paulu andílyumadyanga pakati pave. ³⁴ Kanji vanji vakalyunganiange namu nae, vandíkulupila: pakati pave, Dionishiu washipinga shavaliyopagu, nkongwe jumo walina Damalishi na vanu vanji.

Paulu pa Kolintu

18 Ling'oto lyavinu avi, Paulu andyúma pa Atena kuka ku Kolintu. ² Pa Kolintu, Paulu andíkadyania na muyuda Akila munu wa ku Pontu áwikile mwaambi aalakela ku Italiya pamo namu Pilishila nkongwe ndyagwe mwaa Kalaudiu andívakumulanga vayuda uti pa Loma. Nae andívaokila ³ napanelo kwodamwaa shimadengo shave shivele shimo shosho shakukandyanga dyema, bai nae andíikala namu vanavo vakola pamo madengo ave. ⁴ Kula liduva lyakupumula Paulu ashindatangola muvitala vyamikodyanio alota avashombe vayuda pamo na vagelegu.

⁵ Napanelo Shilashi namu Timoti pavawikile vaalakela ku Makedoniya, Paulu ashindabanigwa kwalilove aumya ushuda kwavayuda kenga Klistu ni Yesu. ⁶ Kanji vanavo vakampinge na vakamwabalange, Paulu andípumunanga dinguvo dyake kutwala kushidoni, "Myadi vyenu vipagwe pamuti penu! Nangu hanguve likosha kwenu mwenu. Kutunduvangila ambi apa, mwanda kwavamidi."

⁷ Bai Paulu andyúma pashitala shakulipudidya po kuka kwing'ande yamunu jumo walina Titu Yustu, munu wakunjopa Nnungu na ing'ande yake indíjimananga na shitala shakulipudidya. ⁸ Napane Klishipu nanangalaledi wapashitala shakulipudidya aníkulupila *UMU* pamo na vanu uti vapaing'ande pake. Namomo vakolintu voe vakaigwe vyashitangola, vandíkulupila na vandípata ubatisho. ⁹ Napanelo muliduva limo shilo, *UMU* andímwaulila Paulu mwindoti kushidoni, "Hau-najope, kaleya kutangola, haunamalale ¹⁰ mwaa nangu ngupali namu wako na hapali munu álota kukwinjila pakulota akubya mwaa nkaja amu ninkuvanavo vanu voe." ¹¹ Bai Paulu andíikala nkaja amo mwaka umo na myedi sita avapundisha lilove lya Nnungu.

¹² Napanelo Galyu ávele gavana walijimbo lya Akaya, vayuda kwaunapamo vanínnanyamalila Paulu na vaníntwala kumuukanavo kumwe gavana kushiwanja shamikodyanio ¹³ ndaashidoni, "Munu aju ankuvashomba vanu valipudye kwa Nnungu kanji kwaindila íkaitikananga na Lilamulo." ¹⁴ Paulu alota ajang'ule,

Galyu andívaulila vayuda kushidoni, “Mmayuda, ing'ano ai leka ívele yakutenda kunyata kwali ukalau wakumamodya, ikandipagwa shaliya yakulota nimwig-wilile ¹⁵ kanji kwodamwaa ing'ano yene ai yamalove, yamena na yalilamulo lyenu, aangangalanga mmene. Nangu hangutamwa kuva nkúukumu wamyaa avi.” ¹⁶ Nadoni nae andílamulila vavakumulange palyutu alyo. ¹⁷ Bai vanavo vanínkamula Shoshiteni nanan-galedi wapashitala shakulipudidya kunkoma, Galyu amwona kanji Galyu hashitanana ata padyoko.

Paulu ankuujila ku Antiyokiya

¹⁸ Napanelo Paulu andíkala maduva oe pa Kolintu. Kutwala apo, andívalaila vanung'unumunu kuka ku Kenkeleya akakwele mwingalava auke ku Shiliya namu Pilishila pamo namu Akila. Kanji pa Kenkeleya, andíbubula ugwimbu wake mwaa andílivikila kwa Nnungu. ¹⁹ Pavawikile pa Epeshu, nae andívaleka kutwala kuka ndainjila mushitala shakulipudidya ndataukananganavo vayuda. ²⁰ Bai vanavo vanínjugwa Paulu vaikanavo maduva akudyangangila kutwala nae kwita ²¹ kanji andívalaila aashidoni, “Nnungu akalota ndamwidila.” Kutwala apo, andíkwela mwingalava kuma pa Epeshu. ²² Pawikile pa Shashaleya, andyám-b-wakenne kuka ndaudyanga liganisha ku Yelusalemu kutwala kwalalela ku Antiyokiya. ²³ Akaikalange maduva aikalenge pa Antiyokiya, andyúma kupita awanawananga mmaganisha a ku Galata na a ku Piligiya avanonowanga vakwoda uti.

Apolo ankuvalanganga ntenga pa Epeshu

²⁴ Napanelo ku Epeshu andíwika muyuda jumo wali-na Apolu wa ku Alishandaliya. Nae avele munu waku-manya kutangola na andímanya namene Maandiko. ²⁵ Munu aju andípundishigwa shana mwindila yake *UMU* na atangola na ntima wake uti ashindapundisha pakakowa shinu avalanganga vimwámba Yesu ata ika-va kenga amanyite vila ubatisho umwe Nshuwau. ²⁶ Bai jojo jo, andítunduvanga kutangola pakajugulan-ga shinu pashitala shakulipudidya. Pilishila namu Akila vakamwigwe mwashitangalela, vaníntwala ku-muukanavo kukaja kwave kuka nammalangangila kwankati indila yake Nnungu. ²⁷ Napanelo Apolu pakumbukidile kwamboka imanga kuka ku Akaya, vanung'unumunu vanínnonowanga na vandyándika ibalugwa pakulota vakwoda vakwanavo, vamp-washalele. Kuwika kwake Apolu ku Akaya nae andívap-washela namene avalá ve vakulupidíle kwaindila yau-monyo ²⁸ mwaa ashindavataukanga kwadimongo vayuda paumbala alodya mumaandiko kenga Klistu ni Yesu.

Paulu pa Epeshu

19 Napanelo Apolu ávele pa Kolintu, Paulu andyám-bwakanga mashinga kutwala kwalalela pa Epeshu. Popo po andívakodya vakwoda, ² nae kutwala kuvaudya, “Mwenu pamukulupidile po, munim-

pata Imumu Wanashwe?” Vanavo do, “Wetu ing'ano yene ya Imumu Wanashwe tukwigwa gwegwe.” ³ Nae kuvaudya kavili, “Kanji napane mupatilé ubatisho shani?” Vanavo, “Tupatilé ubatisho umwe Nshuwau.” ⁴ Paulu kutwala kushidoni, “Nshuwau andívapa vanu ubatisho wakulijugulanga madambi avaulila vankulupile aijá áshaaloka panyuma pake, yani Yesu.” ⁵ Bai vanu ve vaigwíte malove alo, vandípata ubatisho palina limwe *UMU* Yesu. ⁶ Paulu akavavikile makono, andívashulukila Imumu Wanashwe na muwakati wowo vandítunduvanga kutangola dinangodi dyaku-tikinikanga na kulava. ⁷ Vanu avo uti vavele valume kenga kumi na mbili doni.

⁸ Paulu muwakati wamyedi mitatu, ashindauka kushitala shakulipudidya aombanga myaa na avashomba pakajugulanga shinu kwamwaa wautawala wa Nnungu. ⁹ Kanji vanu vanji vashindali-taukanga, havashilota kukulupila na vashindatangola kunyata Indila paumbala wavanu. Napavedoni Paulu andyúma pakati pave pamo na vakwoda kuka ndava-pundisha kula liduva pashitala shimwe Tilanu. ¹⁰ Bai shimadengo asho Paulu andítenda muvyaka vivili mpaka vanu uti valijimbo lya Ashiya, vayuda namu vamidi kwigwa lilove lyake *UMU*.

Vana saba vamwe Shikeva

¹¹ Nadoni Nnungu ashindatandeya vyamakango vyakutikinikanga kwaindila imwe Paulu ¹² mpaka vanu kutwala maesho pamo na dinguvo dye dikumbíle likalogwe limwe Paulu kuka ndavakwaa valwele kutwala vanavo vilwele vyo kupona na majini aukalau mo-mo kuumananga mumili. ¹³ Napanelo vayuda vanji vá-shipita valaula majini aukalau, muliduva limo vandílin-gangila kukumulanga majini mumili vyavanu vatam-bulanga lina limwe *UMU* Yesu vaashidoni, “Palina limwe Yesu wanammalanganga Paulu, nangu ninkun-namulila, uumananga!” ¹⁴ Pakati pavanu vene váshi-tenda vinu avyo vandípagwa vana saba vamwe muyu-da jumo walina Shikeva nkúlangalalela-shadaka nkumene. ¹⁵ Kanji lijini lyaukalau andívajang'ula doni, “Yesu nangu nimmannya na Paulu ninkumwigwanga; napane kushi mwenu po, mmakwashi?”

¹⁶ Bai munu walijini lyaukalau apalá leka avaulukile! Ni kutwala kuvatimba namene mpaka vanavo uti do, pwii, matakudavo na makana avo mumili. ¹⁷ Napanelo vanu uti váshinama pa Epeshu yani vayuda pamo na vamidi pavaigwite shitendo asho vandíjopa namene na vandímamodya kutumbyanga lina limwe *UMU* Yesu. ¹⁸ Vanu voe ve vankulupidíle *UMU* vashindalilodya paumbala valivalanganga ngala vitendo vyave vyakun-yata. ¹⁹ Namomo vanu vanji váshitumila vitendo vyashaviavi, vandíkushania mabuku ave ashaviavi kutwala kushashola moto paumbala wavanu. Mabuku alo vakalalyange njuluku wake, undítimila shikonda shadimiliyoni dyoe namene. ²⁰ Bai kwamwaa waviten-do avi, lilove limwe *UMU* lishindauka mushu lyandavala na lishindaavanavo dimongo.

Shititumbu shinkubuka pa Epeshu

²¹ Ling'oto lyavinu avyo, Paulu alangalalegwa na Imumu Wanashwe andyámuwa kuka ku Yelusalemu apitila ku Makedoniya na ku Akaya aashidoni, "Panguwika ku Yelusalemu nikaikalanga, ininguvaikila momo nguke ndikawike ku Loma." ²² Napavedoni andívatuma vatumikamwagwe yani Timoti namu Elashitu vauke ku Makedoniya kutwala nae kwikala padyoko ku Ashiya.

²³ Mumaduva lolo, pa Epeshu shindíbuka shititumbu shakudimba kumevo kwamwaa wa Indila. ²⁴ Mwaa munu jumo nkwaá walyava walina Demetiliu áshikandyanga mashinamu alinganianga ing'ande ya nnungu nkongwe walina Alitimishi † na áshivapatiya vamadengo vake malupulupu oe, ²⁵ andívashema vamadengo vake pamo na vanji vashimadengo shosho kuvaulila doni, "Mmavangu, mwenu munkumanya kenga mali etu ankwalakela mushimadengo ashi.

²⁶ Mwenu munkwona na munkwigwa shana vinu vyapita atenda munu wavanshema Paulu akuno ku Epeshu na mpaka Ashiya yene ai uti. Nae andívashomba na andivashinjulanga vanu atangola doni, 'Vanungu vakuvakandyanga vanu vene havanava shinu vannungu vaiu.' ²⁷ Napavedoni shipali shijoidyo i gweka yakuliuligwa nshulushu wetu kanji namomo ata yo ing'ande imwe nangangonda nnungu Alitimishi, vanu vandailudyanga na shimbili uti shannungu wene wavalipudya vanu uti ku Ashiya akuno na muvilambo vinji, shindamalilika."

²⁸ Bai vanu avo vakaiigwe malove alo, shindívatindimbukanga shitundi kutwala kutunduvanga kujunga kwakudivana kumatu vaashidoni, "Nangangonda wa ku Epeshu ni Alitimishi bai." ²⁹ Muwakati ungwipi likaja uti lindíinjila mpulugu; venentete vanínkamula Gayu namu Alishitaliku vanu va ku Makedoniya váshipita vawena shalumo namu Paulu kupita vavautanga vavaukanavo kushiwanja shamishesho. ³⁰ Napanelo Paulu andílota auke akalilodye kuumbala kanji vakwoda vanínneya. ³¹ Namomo vananangaleledi vanji vashilikali valijimbo Iya Ashiya vavagwe Paulu navanavo vandítumidya ntenga vanjugwangila hanalyalaveke kuka kushiwanja shamishesho. ³² Bai panguguvale awo upagwite upuju gweka; vanji váshijunga vatangola ashi, vanji vatangola shinji na voe havamanyíte shavaukidile mulyutu alyo. ³³ Vanji pavashivona vayuda vangang'alangila mushu Alishandele, vashikum-bukila kenga ing'ano ayo yàke nae. Napanelo Alishandele andíng'aniang'anianga makono ajugwa vamaalale pakulota alishililidye pamevo pave. ³⁴ Kanji vakamwanalele kenga avele muyuda, iminga uti indíjunga kwaunapamo muwakati kenga wadisaa mbili iishidoni, "Nangangonda wa ku Epeshu ni Alitimishi bai!"

³⁵ Napanelo nshadolo wapalikaja andívamaladya vakupujungula vo kutwala kushidoni, "Mmaepeshu,

† Alitimishi vagalegu vashimwona kuva nnungu walutuba áshivatadya vanu vapune namene na ing'ande yake yakulipudidya indivanavo shimbili shoe muvilambo uti vishitawaligwa na valoma.

wakwashi apa átkinenge kenga likaja ali ni lishúnga ing'ande yannungu nangangonda Alitimishi na waing'ope yake igwile kuwa? ³⁶ Pakuva mundimanya kenga vinu avi hapali wakutauka, bai malalanga! Hamunatende vinu bila kukumbukila! ³⁷ Vanu vamuvividinavo ava havaivite vyombo vyamwing'ande yannungu wetu na ata havanankupulu shinu nnungu ajo. ³⁸ Ikava kenga Demetiliu pamo na vavagwe vanku-vanavo mwaa na munu woewoe, mabengi avelé mwandwa na vagavana vakwangangola vapali; nadoni vanavo vauke vakakashali kwanavo. ³⁹ Kanji mwenu apa shikapagwa shinji shamulota vaangangole, shindi-vaikila shangangaleke kunguguvale wenewene. ⁴⁰ Ing'ano ai mwaivalalele nelu inkuululika tuvanu kushitakigwa vatutambudyanga kutaa upuju nkaja amu patukaulula kujang'ulanga mwaa haipali shaliya." ⁴¹ Ling'oto lyakutangola davo, andílamulila nguguvale wapukanange.

Paulu ankupitila ku Makedoniya na ku Akaya

20 Napanelo shititumbu ashilá shímalilikenge, Paulu andívashema vakwoda kuvanonowanga kutwala kulilaila kuka ku Makedoniya. ² Shilambo asho nae andípita awanawananga avananonowanga vakwoda kutwala kuwika ku Galashiya. ³ Ako nae andíikala myedi mitatu. Pashipanganikanga pakulota ainjile mwingalava auke ku Shiliya, andýanalela kenga vayuda vankupanga milugu vyakuntenda ing'ondo. Nadoni nae andyámuwa kuja apitila ku Makedoniya. ⁴ Mushimwanda asho andyódana namu Shopatulu wa ku Beleya mwanagwe Pilu, Alishitaliku namu Segundu vanu va ku Teshalonika, Gayu wa ku Delebe, Tikiku namu Tolopimo vanu va ku Ashiya namu Timoti. ⁵ Vanavo vandílangalela kuka ndatulinda pa Tolowashi. ⁶ Napanelo shikukulu shamagung'u ákave nkukumuku shikapite, wetu tundyúma pa Pilipo kukwela mwingalava kutwala mwanda wamaduva mwanu kuka ndakadyania na vavetu pa Tolowashi. Palikaja ali tundíikala maduva saba.

Paulu ankundyuwa Eutiku pa Tolowashi

⁷ Muliduva litandi Iyaishumana lyulo tuvakwoda tundíkadyania pakulota tulye pamo. Napanelo kwodamwaa Paulu ashindalota aume palyamba lyake, andyúka mushu atangola na vakwoda mpaka shilo shing'ati. ⁸ Mushumba shaigalopa shatuvéle dindípagwa dikalaboi dyoe dishikalela. ⁹ Napanelo nnemba jummo walina Eutiku andíikala palidilisha kutwala kwindila lwono akuno Paulu alapayanga kutangola. Bai andílala lwono lwakulikandangila na andígwa mwigalopa yantatu mo kugwilila pai; vaukilé nannakota wiu wakudidima. ¹⁰ Kutwala nanae Paulu kushuluka mpaka apalá pavéle nnemba, kutepa kunkumbatila kutwala kushidoni, "Hamunaushaushange mitima, aju apa mumi." ¹¹ Bai Paulu andíkwela kavili mwigalopa kutwala kumajanianga shakulya kutwala vanavo uti kulya. Kutwala apo, andítangola vila mpaka linyeiku kutwala kuma

kuka. ¹² Vakwoda avalá vaníntwala nnemba aijá àvele mumi. Shitendo ashi shindívapa ntima shii namene.

Paulu ankuma pa Tolowashi kuka ku Miletu

¹³ Napanelo wetu tundíinjila mwingalava kuka tulan-galela mpaka pa Asho nannindila Paulu tuwenenavo shalumo mwingalava mwaa nae andípangila na andí-pakanila namu wetu auke mwanda wamadodo.

¹⁴ Patukadidye nae pa Asho, tunímpwashalela mwingalava kutwala tuvanu kumalidya mwanda kuka ku Mitileni. ¹⁵ Palyamba lyake tukaume pa Mitileni tundyúka vila mpaka pepi na pashitingi sha Kiu. Muliduva lyambili lyake tuvanu kuka mpaka pa Shamoshi kutwala ling'oto lyaliduva limo kuwika pa Miletu. ¹⁶ Paulu andyámuwa kupita umungu pa Epeshu kwambangidya mulijimbo alyo Iya Ashiya ha-natimatimange mwaa avele na ntima wakuwika shipa-jelo ku Yelusalemu na ata leka yúlulike awike liduva Iya Pentekoste likanava kuwika.

Paulu ankuvalaila vanang'olo va pa Epeshu

¹⁷ Napanelo po pa Miletu, Paulu andívashema vanang'olo valiganisha va ku Epeshu. ¹⁸ Pavawikile nae andívaulila doni, "Mwenu mundimanya mwangu-namidile nangu panguvéle namu mwenu kutundu-vangila muliduva Iyangu litandi Iyanguluvete akuno ku Ashiya. ¹⁹ Mwenu mundimanya shana mwanintu-mikidile *UMU* na kulishapeya na shipalodi pamo na mauvilo oe angupatile kwamwaa wamilugu vyakunya-ta vyavayuda. ²⁰ Mundimanya kenga hashipali shoeshoe shapaida shangupiyapiyenge; nimpundisha muumbala na muding'ande dyenu ²¹ ngumya ushuda kwavayuda na kwavamidi wakulijugulanga madambi kwa Nnungu na walikulupililo nkati mumwe *UMU* wetu Yesu. ²² Napanelo lola, ninkuka ku Yelusalemu ngu-ungigwa na Imumu Wanashwe panikamanya shilóta kungutandeka kwanavo. ²³ Shangumanyite apa nidoni, Imumu Wanashwe ankumya ushuda mumakaja uti mwangupita kenga kungwa na kuvauvanga kunkungulindila. ²⁴ Kanji navalangilila shinu shingumi shangu kuva shinu shamana kwangu nene nimwene pakulota ngudududile shitamba shangu na utumika wanguka-mudidye *UMU* Yesu yakutaa ushuda ntenga wambone waumonyo wake Nnungu.

²⁵ "Napanelo lola, nangu apa ndimanya doni pakati penu mwenu wanimmalangangidile utawala, hapali ata jumo álota kwona kavili ing'ope yangu. ²⁶ Napavedoni nelo apa ninkulyakikisha ngala kenga hanguve likosha kwamyadi vyenu ²⁷ mwaa ndivalanganga panikapiyapiyanga malotelo uti a Nnungu. ²⁸ Nadoni lishunge mwemwe mmene na shunga shipinga shavangandolo uti shankamudidye Imumu Wanashwe muve mmakulaledya vake kwambangidya mushunge liganisha Iya Nnungu Iyapatile kwindila yamyadi vyake jo mwene. ²⁹ Nangu ndimanya shana doni, ling'oto Iyakuma nangu andaamilila mavinji akujowa

pakati penu pavakapambeya likundi Iyavangandolo. ³⁰ Namomo pakati penu vandabuka vanu vatangola vinu vyakudinguwanga pakulota vavaute vakwoda vavode vanavo. ³¹ Napavedoni lilaledye mukumbukila doni, nangu muvyaka vitatu shilo na mui hangu-lakadile kunyuma kunnangalalela kula muni pakati penu ngulilidyanga.

³² "Napanelo nangu ninkunkamudya kwa Nnungu na kwalilove Iyaumonyo wake Iyulúla kunkulumuwa na kumupa maleko pakati pa avalá vailimyangígwa.

³³ Hangung'unwike njuluku, shaabu kwali inguvo kwa-muni woewoe. ³⁴ Shasho! Mundimanya mwe, kenga makono lolo ala andikola madengo pakulota ngulyan-gangole nimwene na nivaangangole vavangu momo.

³⁵ Kula shinu shangutandile, ninnodya mwenu kenga kwindila yashimadengo shikumene shatutenda indituvaikila tuvapwashale vákalyulula tukumbukila mal-ove atangwele jo mwene *UMU* Yesu aashidoni, 'Wak-walaligwa ni aijá áing'a kuliko ápwashalela.' "

³⁶ Pamalidile kutangola malove alo nae andíguguvala pamo na vakwoda vanji kutwala kushwali. ³⁷ Bai vana-vo vandíilanga namene na vandíilangananganavo vatuwanidyanavo makono na vankumbatila. ³⁸ Shinu shivatadídye vanavo vamamodye kvanavo shipalodi shoe ni mwaa washitangodi shavatangaladile aashidoni, "Hamwona kavili ing'ope yangu." Bai vana-vo vanímpalakela mpaka kwingalava.

Paulu ankuka ku Yelusalemu

21 Ling'oto Iyakulailananga namu vanavo, wetu tundíinjila mwingalava kuka shalowa mpaka pashitingi sha Koshi. Kutwala palyamba lyake tuvanu kuka mpaka pa Lodeshi, tukapite apo tundyúka mpaka pa Patala. ² Pa Patala wetu kukodya ingalava yamboka yuka ku Poiniki, wetu kukwela kuka. ³ Patuwikile isemu íshaaneka Kupulu, wetu tundítukulidya kunshanda kutwala kulodya ku Shiliya kuka ndaimila panshiko wa pa Tilu palyutu líshiloteke vipakuligwe vinu mwingalava. ⁴ Napanelo popo po, tundívalambela vakwoda mpaka kuvakodya kutwala wetu kwikalanavo maduva etu saba. Vakwoda vovo vo, valangalalegwa na Imumu Wanashwe vandímwaulila Paulu hanaamboke kuka ku Yelusalemu. ⁵ Nkaja amo tukaikalange maduva etu alo, wetu tundyúma kulodya kwatushuka. Kutwala vakwoda na vadyavavo pamo na vanavavo kutupalakela kumalila likaja mpaka ndawika nanyenje imanga; koko ko, tundíguguvalanga kutwala kushwali.

⁶ Tukulailanange namu vanavo, wetu tundíinjila mwingalava yetu, vanavo kuuji kuding'ande dyave.

⁷ Patumalidile shimwanda shetu tuma pa Tilu, tundíwika pa Patolamaida. Apo, wetu tundívaudyanga vanung'unumunu na tundíikalanavo liduva limo twambanganavo myaa. ⁸ Palyamba lyake, tundyúma mpaka pa Shashaleya. Pakaja apo, wetu tundyúka ndawikila paing'ande yake nkúvalanganga-ntenga walina Pilipo muni wamushipinga shavanu saba. ^{††9} Jo

† Maandiko anji akala vandyanjedya, a ...Klistu.

†† Vanu saba ava ni avalá vatandalégwe ku Yelusalemu vaan-gaikangile vinu vyashimadengo sha Nnungu. Lola 6:3-5.

Pilipo aju andívanavo vanavake vakanava kulombwa nsheshe váshilava. ¹⁰ Napanelo mulyutu alyo tukaikalange maduva akudyanga, nkúlava Agabu kwaloka ku Yudeya. ¹¹ Nae paidile ndakadyania namu wetu, andítwala nkanda wainguvo umwe Paulu kulyunga mmadodo na mmakono kutwala kushidoni, “Imumu Wanashwe atédoni, ‘Mwene nkanda au vayuda vandamunga ku Yelusalemu kutwala kunkamudya kwavamidi.’”

¹² Bai wetu pamo na vanung'unumunu vene kaja ayo, patwigwite malove ala tushinannaililila Paulu hanaukenavo mushu shimwanda shakuka ku Yelusalemu. ¹³ Kanji Paulu kutwala kushidoni, “Mwaa shani mwenu munkulila na munkungutaa shipalodi shoe muntima mwangu? Mwaa nangu apa i ngukubalidyé gweka kungwa kanji ata yakupela kwamwaa walina limwe *UMU* Yesu, ndikubali momo.” ¹⁴ Napane pakuva haululike kushambegwa, tundíshukulu tuushidoni, “Bai vitandeke kenga mo mwalatela *UMU*.”

¹⁵ Napanelo tukaikalange maduva etu atwikalenge, wetu tundílipanganianya kutwala kwamboka kuka ku Yelusalemu. ¹⁶ Mushimwanda shetu vakwoda vanji va pa Shashaleya vandítupalakela mpaka paing'ande pake Manashoni, palyutu lye livaikidíle tuwikile. Munu aju avele wa ku Kupulu na avele nkwódá wamushipinga shavakwoda vatandi.

Paulu ankuwika pa Yelusalemu

¹⁷ Bai patuwikile pa Yelusalemu, vanung'unumunu vandítupwashalela na lipuwilo lyoe. ¹⁸ Palyamba lyake Paulu andyúka namu wetu nannola Tiyagu kutwala vanang'olo uti kwidananga. ¹⁹ Paulu akavaudyange, andívalalangangila kula shinu shantandalele Nnungu kwaindila yautumika wake pakati pavamidi. ²⁰ Vanavo vakaigwe vyavavalangangidile, vandímupa lishangelo Nnungu na vandímwaulila Paulu kushidoni, “Nung'unumunu, unkwona makumi manga avayuda vakulupidíle. Vanavo vankuvanavo dukuduku kwa Lilamulo, ²¹ napane vandigwa kenga wako unkuva-pundisha vayuda uti vanáma muvilambo vyavamidi vaambukange lilamulo lyake Musha uvapundisha havanavakumule likumbi vanavavo na unkuvaleya kwod-edyá yadi yave yashiyuda. ²² Napanelo tutandelé mwashi? Kwamwiu vanavo vandaigwa kenga wako undiwika nkaja amu. ²³ Wako tenda vyatulota kuk- waulila avi: apa vapali vanu nsheshe pakati petu valóta vantandele Nnungu vyavalivikile. ²⁴ Napavedoni wako lyunganiange na vanavo utende pamo shimadengo shakulyushanianga ushapu na gwegwe ulipile njuluku shimadengo ashó na ling'oto vanavo vandabubuligwa ugwimbo wave; nadoni, vanu uti vandamanya kenga uti vyavashiigwanga vakwamba wako ni vyaushwang'a mwaa valota kwona kenga nawako momo mpaka ambi unkwodedyá Lilamulo lyake Musha. ²⁵ Kanji kwau- pande wavakukulupila vaumíle pakati pavamidi, wetu tundivaandikila ibalugwa yakuvamanyiya mwatwamu- lidile wetu tuushidoni, ‘Havanamamene inyama yavashindile vavaumidya shadaka vannungu

vakushang'apa, havanalye myadi, havanamamene in- yama yannyama wakumpambilila na ata ha- vanalavalave.’” ²⁶ Bai mwiu Paulu palyamba lyake andívatwala vanu avalá kuka ndalyushanianganavo ushapu; ling'oto andyúka ndainjila mwing'ande ya Nnungu ndavalanganga liduva lyakumalila vanu avo kulyushanianga ushapu na kuvalanganga shadaka shíshiloteka vantandele kula munu pakati pave.

Paulu ankukamuligwa mwing'ande ya Nnungu

²⁷ Napanelo maduva saba akulyalaliya alota kumalili- ka, vayuda va ku Ashiya vakamwone Paulu mwing'ande ya Nnungu vanavo vandívakang'ela ve- nentete na vanímwinjilinneu ²⁸ vajunga vaashidoni, “Mmanaishilaeli, tupwashela! Munu aju ni jojo ápita avapundisha vanu uti kula kushinu vavavangedye vanaishilaeli; ankupundisha vapinge Lilamulo na vailudyange lyutu ali. Na hainatoshe avatwete vamidi kuvainjidya mwing'ande ya Nnungu nadoni anditaa ushapu lyutu ali lyakwilimyangá.” ²⁹ She shivatadídye vatangole davo ivele mwaa vandímwona palikaja po ávele namu Tolopimu munu wa ku Eshu nadoni vanavo vashona kenga Paulu munu ajo andiinjinavo mwing'ande ya Nnungu.

³⁰ Napanelo nkaja mo shindíinjila shititimbu shaku- jowa namene. Dimbumba dyavanu dindyúka ditukuta vakankamule Paulu. Vakankamule vandípita vamu- tanga kumumya mwing'ande ya Nnungu amulá na mi- lango vandíshimanginneu. ³¹ Valingangila kummyaa, kuwika dyabali dishivalanganga kuumilila kwashititim- bu pa Yelusalemu kwanang'olo nkumene wavaing'on- do wavaloma. ³² Nae apalá kuvatwalinneu vanang'olo vavaing'ondo vamwina mwake pamo na vaing'ondo kuka koko. Venentete pavangwene nang'olo nkumene wavaing'ondo aijá pamo na vaing'ondo vake, vandíleka yakunkoma Paulu. ³³ Bai nang'olo nkumene wavaing'ondo aijá anímmandika Paulu kutwala kumwaulila kenga avele mmakono mwashilikali na andílamulila vamunge mang'unyang'unya mavili kut- wala kudya, “Da munu aju nyani na atandilé nyamani?” ³⁴ Kwamwaa washititimbu shuumilidíle pakati paim- bumba vanji vajunganila ashi vanji kujunganila shinji, nang'olo nkumene wavaing'ondo hashipali shawakika shashigwa nadoni nae andílamulila vamuukenavo Paulu kulingongo lyavaing'ondo. ³⁵ Pavawikile pavika- da vyalingongo, vaing'ondo vanínnyanyulidya Paulu kushanya kwamwaa washitundi shavashimmikila ve- nentete ³⁶ váshipita vamwoda pepi-pepi vajunga vaashidoni, “Mmalidye!”

Paulu ankuvajang'ula venentete

³⁷ Napanelo Paulu valota vanjele mulingongo andí- mudya nang'olo nkumene wavaing'ondo kushidoni, “Inkuululika nangu kukumanyiya shinu shimo?” Nang'olo nkumene wavaing'ondo kushidoni, “Wako unátangola shigalegu? ³⁸ Da wako hauvele mmishili ai- já átandile mandamano akupinga shilikali mumaduva

apitile kutwala kuvatwala vakupinga-shilikali dyalupu nsheshe kuvaukanavo kushimbweshe?"³⁹ Paulu kutwala kushidoni, "Nangu nimuyuda nguvalakwidyé pa Talashishi likaja lyakwigwinika lya ku Kilikiya. Kanji napane ninkukujugwa ungupe litala lyakutangola na venentete."⁴⁰ Nang'olo nkumene wavaing'ondo aijá kumupa litala kutwala Paulu kwimila pavikada apalá kunyanyula makono avamaladyanga venentete. Pava-malalenge do vii, nae anditunduvanga kutangola na vanavo mwinangodi yashibalaniya aashidoni,

22 "Mmanung'unumunu pamo na mmatatamunu, ngwigwa kulishililidya kwangu kwenu mwenu."

² Napanelo pavamwigwite atangola mushibalaniya, vandímamodya kulimaladya kutwala nae kushidoni, ³ "Nangu ni muyuda nguvalakwadidye nkaja mu Talashishi ya ku Kilikiya ngukulukumidile nkaja mo mu Yelusalemu amu ngushungigwe mmadodo mwake Gamaliyele ngupundishigwe kwodananavo kushinyigwa kwa Lilamulo lyavanyakala vetu na nguvanavo dukuduku kwa Nnungu kulingana kenga mo mwampagwidya mwenu nelu amu. ⁴ Nangu ndivapapata vanu vashoda Indila ai ata mpaka kuvabyaa nguvaunganga na nguvajela mudikalaboshi i gweka valume kanji namomo vakongwe. ⁵ Ata jo nkúlangalalela shadaka nkumene ing'ano ai ankuulula kutaa ushuda pamo na nkodyanio wavanang'olo uti. Vovo ava vaningupa shitambulisho shakuka ndalodya kwavanning'unumunu va ku Damashiko pakulota ndivatwale vavé kwanavo ndivaidenavo na mang'unyang'unya pa Yelusalemu apa vavape shaushanga.

⁶ "Napanelo nguka kwanavo, panguwikile pepi na pa Damashiko, muwakati kenga waliduva pamuti doni, kwashingangala kungutang'anedyo lilangadyo lyakushenga namene lyakwalakela kuwa ⁷ kutwala nangu kugwa kugwilila pai na kwigwa lidi liishidoni, 'Saulu, wako Saulu! Mwaa shani unkungupapata?' ⁸ Nangu kudya, 'Da wako nang'olo unyani?' Nae kushidoni, 'Nangu Yesu munashaleti, jo waumpapata wako jo.' ⁹ Napanelo avalá vanu vāngwadanengenavo mushimwanda, lilangadyo lyo vandyóna kanji lidi lya-munu áshitangola namu nangu vanavo havaigwite.

¹⁰ Nadoni nangu ndímudya, 'UMU, napanelo ngutende nyamani?' UMU kushidoni, 'Takataka winjile nkaja mu Damashiko mo! Mo nkaja mo vandakumanyiya uti vikuvaikidile utende.' ¹¹ Napanelo kwodamwaa mevo angu andíbidikanga mwaa wakushenga kwalilangadyo, avalá vanguvénavo vaníngukamula nkono ku-ka nanguwisha nkaja mu Damashiko.

¹² "Napanelo mo nkaja mo andípagwa munu jumo walina Ananiya, munu wakunjopa Nnungu na wakwigwilila lilamulo lyetu, wavashimuumidya ushuda wambone vayuda uti vashinanama nkaja mu Damashiko, ¹³ nae andída nangulola kutwala kungwimila pepi aashidoni, 'Nung'unumunu Saulu, ujila kulola!' Muwakati wowo nangu kulola na kumwanenneu.

¹⁴ Nae kavili kushidoni, 'Nnungu wavanakuluvetu andikutandola pakulota umanye malotelo ake, andikutadya umwone aijá Waishaliya na umwigwe atangola

jo mwene. ¹⁵ Nadoni wako undava unshuda wake pakulota uvalangangile vanu uti vyaugwene na vyawigwite. ¹⁶ Napanelo ulinda nyamani kavili? Takatika upate ubatisho, madambi ako alivalivigwe utambulanga lina lyake.'

¹⁷ "Napanelo nangu panguujidile ku Yelusalemu, nikauke kwing'ande ya Nnungu kukushwali, Nnungu aníngupa indoti. ¹⁸ Mwindoti yoyo nangu kumwona UMU angwaulila doni, 'Uma shipajelo pa Yelusalemu apa mwaa venentete ava ushuda waulota kumya wako unguvalanganga nangu, havaitikila.' ¹⁹ Kanji nangu kushidoni, 'UMU vanavo vandimanya shana kenga nangu nishindapita ngutanela vitala vyakulipudidya, nivaunganga na nivashapa viboko vanu vashikukulupila wako, nivaukanavo ndavajela mudikalaboshi.

²⁰ Namomo pavashimuumadyanga myadi Shiteva nshuda wako wako, nangu ndípagwa popo na ndyúngila nkono shitendo asho na ata makoti avalyuléngé vanu vashikukula apo vammaa, ngukamulidile nangu nimwene.' ²¹ Kanji UMU kushidoni, 'Wako uma mwaa nangu ngulota kukutumidya kushu namene kwavamidi.' "

Paulu namu nang'olo nkumene wavaing'ondo

²² Mpaka apo vanu vashindamwigwilila, napane po patangwele lilove lyamwisho, vandíjunga vaashidoni, "Munu aju mwovye mushilambo amu! Haimmaikidile kunama." ²³ Vanavo vajunga na vashimwa vang'aniang'anianga makoti kushanya na vamwadilila dimbwe kushanya, ²⁴ nang'olo nkumene wavaing'ondo andívalamulila vanu vake vanjele Paulu mulingongo lyavaing'ondo na vamuudyangidye kwaindila yakunshapa † pakulota avalangange shitadíye imbumba injungile. ²⁵ Napanelo Paulu pavashimunga dimbuu dya-magwogwe, andímudya nang'olo wavaing'ondo miya apagwite mulyutu alyo kushidoni, "Da mwenu munku-vanavo lusha lwakunshapa mwenentete muloma viboko vakanava kulalyanga shana mwaa wake?"

²⁶ Nang'olo wavaing'ondo paigwite malove ala, andyú-ka ndamudya nang'olo wake kushidoni, "Nang'olo, ulota kutenda nyamani? Munu jojo aju ni mwenentete muloma." ²⁷ Kutwala nang'olo nkumene wavaing'ondo aijá kumuukila ndamudya, "Kushidashi, wako ni umwentete muloma?" Paulu doni, "Elo!" ²⁸ Nang'olo nkumene wavaing'ondo kushidoni, "Nangu pakulota ngupate wenentete washiloma uningutumbuka nju-luku woe namene." Kanji Paulu aníngang'ula aashidoni, "Bai nangu apa ninkuvanavo wenentete awo kwashivalekwelo shangu." ²⁹ Bai muwakati wowo avalá vashilota kumuudyangidya vandínyamanga na ata nang'olo nkumene wavaing'ondo aijá andíjopa mwaa Paulu vanímunga kwalilamulo lyake nae.

† Kushapa aku vashitumila mishasha yamagwogwe vyavaungangidile dimbalukila dyamagwangwa na dimbalukila dyavitali; kushapa aku kushiva inamuna yakumuudyangidya munu ákavele mwenentete muloma.

Paulu shing'ati ikamati

³⁰ Napanelo palyamba lyake, nang'olo nkumene wavaing'ondo aijá alota amanye uwakika waing'ano yavashintambulanga Paulu vayuda, andílamulila vamuungule Paulu na upagwe nguguvale wavanang'olo vavakulangalalela-shadaka pamo na vanang'olo vanguarduvale uti kutwala nae kuntwala Paulu kumwimidya shing'ati nguguvale.

23 Napanelo Paulu andívalola ndoo vanu uti vupagwite panguguvale po kutwala kushidoni, "Mmanung'unumunu, mpaka nelo nangu ninkunama pamevo pake Nnungu mumakumbukililo ambone amuntima." ² Kanji Ananiya nkúlangalalela-shadaka nkumene andívalamulila vanu ve vammadíke Paulu vambwabwade pakanywa. ³ Paulu kutwala kumwaulila, "Bai nawako Nnungu andakubwabwada umunu wamalambi davo gwe! Wako apo wikelé pakulota unguukumu kwodana na mwalitangalela Lilamulo, napane mwaa shani unkupejungula Lilamulo ulamulila vangukome?" ⁴ Vanu vammadíke Paulu kushidoni, "Wako ulyalaveka kuntukananga nkúlangalalela nkumene wake Nnungu?" ⁵ Paulu doni, "Ji, mmanung'unumunu, hanishimanya kenga aju ni nkúlangalalela-shadaka nkumene! Na mwiu, lilove lya Nnungu litédoni, 'Haunantukanange nkútawala wavenen-tete vako.'"

⁶ Napanelo Paulu kwodamwaa andímanya kenga panguguvale awo vanji vavele mapalishayo, vanji kuva mashadukayo, andítangola pashanya po aashidoni, "Mmanung'unumunu, nangu ni mpalishayo mwana wamapalishayo. Apa ninkuukumigwa kwamwaa walilindilililo lyakudyuka kwavakupela." ¹⁷ Patangwele davo, mapalishayo na mashadukayo kundíbuka kupwatana kwakudimba kumevo kutwala pashinu apo imbumba kujavanikana vipinga vivili ⁸ mwaa mashadukayo kudyuka kwavakupela, kupagwa kwavanjelo vake Nnungu na kupagwa kwaimumu, havanakulupila shinu kanji mapalishayo uti avyo vankukulupila. ⁹ Bai ing'ano ai indítadya vanavo kupwatana kumamodya. Napanelo vamwalimu vanji vadishaliya, vashipinga shamapalishayo vandítakatuka kutwala kutunduvanga kutaukanga vaashidoni, "Wetu munu aju hatunamwona likosha. Da inkuululika imumu kwali njelo kutangola namu nae?"

¹⁰ Bai pashinu apo kupwatana kundyúka mushu kumamodya mpaka nang'olo nkumene wavaing'ondo kujopa mwaa wakwona kenga Paulu vananshap-walananga; nadoni andívalamulila vaing'ondo vake vavapoke Paulu vakanjele kavili mulingongo lyavaing'ondo.

¹¹ Napanelo muliduva lyolyo shilo shake, *UMU* andímwimila Paulu pepi kutwala kumwaulila doni, "Lyunge ntima! Mwaa mo mwaumididye ushuda unguvalanganga nangu pa Yelusalemu apa, ku Loma undatandela momo."

† *Mushigalegu: a ...kwamwaa walilindilililo na kudyuka kwavakupela.*

Shemba shakulota kummalidya Paulu

¹² Napanelo wiko paulangele, vayuda vanji vandíkadyanianga kulya shemba kutwala kulilapa vatangola kenga havalya na havakumbila shinu shoeshoe vakanava kummalidya Paulu. ¹³ Vayuda valíle shemba asho vandíwikila shikonda shavanu vakupunda kenga alubaini doni. ¹⁴ Bai vanavo vandíva ukila vanang'olo vavakulangalalela-shadaka pamo na vanang'olo ndavaulila doni, "Wetu apa tundililapa tukanatandedya itukodye ilana tutangola kenga hatulya patukanava kummalidya Paulu. ¹⁵ Nadoni mwenu apa kenga mmananangalaleli vanguguvale, tumidya ntenga kwanang'olo nkumene wavaing'ondo pakulota antumidye kwenu mulitenda kenga mulota kulalyanga shana myaa vyake. Wetu tuvelé tayali kummalidya ata akanava kuwika kwenu."

¹⁶ Kanji ndukulugwe Paulu mwana wannumbugwe akaigwe nnugu awo, andyúka kulingongo lyavaing'ondo nammalangangila njombawake vinu avyo uti.

¹⁷ Paulu kutwala kunshema nang'olo jumo wavaing'ondo miya kumwaulila doni, "Ntwale nnemba aju umuukenavo kwanang'olo nkumene wavaing'ondo mwaa ankuvanavo ntenga wakummanyiya."

¹⁸ Nang'olo wavaing'ondo aijá kuntwala ndyoko jo kumuukanavo kwanang'olo wake ndamwaulila doni, "Paleshi Paulu aníngushema kutwala kungujugwa nimpalakedye ndyoko kwako wako mwaa ankuvanavo ntenga wakukumanyiya."

¹⁹ Nang'olo nkumene wavaing'ondo aijá anínkamula nkono ndyoko jo kutwala kumuukanavo kwagweka ndamuudyangidya, "Wako widilé na ntenga shani kwangu?" ²⁰ Ndyoko kushidoni, "Vayuda vandilya shemba vakujugwe wako lunduno untwale Paulu umuukenavo kunguguvale valitenda kenga valota vaudyangidye shana myaa vyake. ²¹ Kanji wako haunalote kushambegwa na vana-vo mwaa vapali vanu vakupunda shikonda shavanu kenga alubaini doni, valóta kuvandama vannindile Paulu vammalidye. Vovo vo vandililapa mwiu mwiu kenga havalya na havakumbila shinu shoeshoe pavakanava kummalidya Paulu. Muwakati au vanavo vandilipanganianga uti valindila lilamulo lyako bai."

²² Bai nang'olo nkumene wavaing'ondo aijá anínnaila ndyoko auke amwaulila doni, "Haunammalangangile munu junji kenga uninguvalangangila nangu ntenga kenga au."

Paulu vankuntumidya kumwe gavana Pilishi

²³ Napavedoni nang'olo nkumene wavaing'ondo aijá andíwashema vadyoko vake vavili pakati pavadyoko vake kuvamanyiya doni, "Vapanganiange vaing'ondo dimiya mbili, vaing'ondo vavapunda sabini na vaing'ondo vanji dimiya mbili vamikushi vauke ku Shashaleya satatu yashilo. ²⁴ Vapanganiange momo vapalashi vakumpakila Paulu vakamwiche shana kwananangalaleli wamajimbo Pilishi." ^{†25} Nadoni

nang'olo nkumene wavaing'ondo andyándika ibalugwa kenga mwaivalalele ai:

²⁶ "Kalaudio Lishiyashi kumwe wakwishimika nanangalaledi wamajimbo Pilishi, nandele.

²⁷ Ninkukumanyiya doni, vayuda vanínkamula munu aju na vashilota kumyaa. Kanji nangu vakangu-manyiye kenga munu jojo muloma, nindyúka koko na vaing'ondo vangu namposha. ²⁸ Nikantwale kumuukanavo kulibengi lyavayuda ngulota ngwigwe myaa vyake vyavashintambulanga, ²⁹ nindyona kenga vashintambulanga vinu vyodana na lilamulo lyave kanji hangugwene likosha lyakuntadya nae apele kwali aungwe. ³⁰ Napanelo pavaukile nangu-manyiye kenga vayuda vandipanga milugu vyakulota kummalidya, ndyamuwa kukupalakadyedya wako munu aju na avalá vavénavo mwaa namu nae ndivaulila vaide vaangalangane namu wako ako."

³¹ Napanelo vaing'ondo kwodana na lilamulo lyavapatile kwananangalaledi wave, vaníntwala Paulu shiloshilo mpaka palikaja lya Antipatilishi. ³² Palyamba lyake vaing'ondo váshiwena na madodo vandyújila kulingongo lyave kutwala kuvaleka vaing'ondo vavapunda vamuukanavo Paulu kulikaja lya Shashaleya. ³³ Pavawikile nkaja amo vandítwala ibalugwa ailá kumwing'a nanangalaledi wamajimbo na kuntwala Paulu kunkamudya. ³⁴ Bai nanangalaledi wamajimbo akashomye ibalugwa ailá andímudya Paulu lijimbo lyavalakwadidye. Napanelo akamanye kenga Paulu avele wa ku Kilikiya, ³⁵ andímwaulila kushidoni, "Myaa vyako ndaudyangidya pavalota kwida vanu vakukashalidye vo." Bai nae andílamulila vantwale Paulu akapagwe mmakono mwaishilikali kwing'ande ye ivéle imwe Elode.

Vyavantambudya Paulu vayuda

24 Napanelo ling'oto lyamaduva mwanu nkúlangalalela-shadaka nkumene Ananiya andyúka ku Shashaleya na vanang'olo vanji pamo na nkúshililidya jumo walina Teletulu. Vakawike, vandímuukila nanangalaledi wamajimbo nankashalya Paulu. ² Pavan-shamile, Teletulu andítunduvanga kunkashalya aashidoni,

"Wako wakwishimika Pilishi, kulangalalela kwako kunkutupa amani na mabadiliko autenda kwalimanyi-lo lyako ankwidanavo maikadi ambone kwavenentete ava. ³ Kwauti vinu vitandéka, kula pashinu tunkukulambwalela na mitima vyetu uti. ⁴ Napavedoni pakulota hatunakujaangile wakati wako, kwaupole wako ninkukujugwangila utwigwilile muwakati padyoko shatulota kutangola. ⁵ Tundyanalela kenga munu aju ni nantindingania wakujowa namene áidanavo shi-titumbu na kupwatananga pakati pavayuda mushilambo uti. Jojo aju ni nanangalaledi nkumene waishama yavanashaleti. ⁶ Hainatoshe jojo aju ashilota kunyatyanga ing'ande yetu ya Nnungu. ⁷ ¹⁸ Napanelo wako

†† Kwali: a kwananangalaledi washilambo sha ku Palastina Pilishi. Kanji shilambo shosho sho pamo vilambo vinji uti vishitawaligwa na valoma vivele mmakono mwake Umu nang'olo Shashali. †

umwene ukannalyanga munu aju undamwigwa shana shantunkashalidya wetu." ⁹ Bai vayuda vanji vandyúngila nkono malove alo vatangola kenga vyatangwele munu ajo vivele uti vinu viu.

Paulu ankulishilidya pamevo pake Pilishi

¹⁰ Napanelo nanangalaledi wamajimbo anínola Paulu pakulota ajang'ule kutwala Paulu kushidoni, "Nangu ndimanya kenga wako ni unang'olo wavakutandwele tangu kala úve unkúukumu pakati paventete ava. Napavedoni ninkuvanavo ntima ngúpagwite pamevo pako apa ngulishilidye panikajugulanga shinu. ¹¹ Unkuulula kumanya do, tangu nguke ku Yelusalemu ndalipudya ninkuvanavo maduva kumi na mbili bai. ¹² Ava havangukadidye ngutaukananga na munu woewoe mwing'ande ya Nnungu, ata havangukadidye ndivakang'ela venentete muvitala vyakulipudidya ata palyutu lyoelyoe lyankaja amo ¹³ na ata wakuulula kwakikisha pamevo pako avilá vyavangukashalya. ¹⁴ Kanji nangu shangulivalanganga kwako ni ashi: ni kwodananavo Indila yavashema vanavo ishama ilangadavo yangulipudya kwa Nnungu wavanakuluvetu ngukulupila uti vya mu Lilamulo na vya mu Vakulava ¹⁵ nguvanavo lilindilililo kwa Nnungu, lyo lyavavenavo vanavo lyakupagwa kudyuka kwavaishaliya na vaungave-ishaliya. ¹⁶ Ni ashi shingutádyá nangu ngwengwe ngukukule pakulota nguvenavo makumbukililo ambone amuntima pamevo pa Nnungu na pavanu.

¹⁷ "Ling'oto lyakupita vyaka vyoe ngúvele muvilambo vinji, ni panguujite kwida pa Yelusalemu ngwidanavo lipwashalelo kwavakave pashinu muvenentetemwangu namomo ngutenda shadaka. ¹⁸ Panishitenda vinu avyo, vayuda va ku Ashiya kutwala kungukodya mwing'ande ya Nnungu kanji ngúlyushanienge kala ushapu; pashinu apo haipagwite imbumba yavanu na haupagwite upuju. ¹⁹ Ni vayuda avo vavaikidile vaide apa vangukashalye nangu kwako wako ikava kenga vaningwona likosha. ²⁰ Kwali vovo ava vavéle apa, vavalangange wakunyata shani wavangugwene panguguvale ²¹ tukaleka ali lyangutangwele nangu pashanya po ngwimidile mushu mwave nguushidoni, 'Ni kwamwaa wakukulupila kenga kupali kudyuka kwavakupela kungutadya nelu nguukumigwe namu wako.'"

²² Bai Pilishi, munu e avénavo limanyilo lyoe lyavinu vyámba Indila, andíimidya mwaa awo aashidoni, "Ing'ano ai ndalalyanga palota kwida Lishiyashi nang'olo nkumene wavaing'ondo." ²³ Kutwala apo, Pilishi anínamulila nang'olo wavaing'ondo anjele Paulu nkalaboshi kanji amupe litala na apate lipwashalelo kwavavagwe.

Mumabuku anji akala na amana, mishitali vya 6b-8a havipali kanji mumabuku anji mwavipagwite vinkushidoni, a (6b) ...Ni ashi shiutadidye tunkamule na tushilota tumuukumu kwodana na malamulo etu. (7) Kanji akawike nang'olo nkumene wavaing'ondo Lishiyashi anditupoka na dimongo (8) kutwala kutwaulila wetu tunkashalidye twide twonane namu wako...

Paulu namu Pilishi

²⁴ Napanelo akapite maduva padyoko, nanangalaledi wamajimbo Pilishi andíwika pamo na ndyagwe walina Dulushila, nkongwe muyuda; bai vanavo vandítuma vavashamele Paulu na vandígwa vyashitangola Paulu avalanganga ing'ano yakunkulupila Yesu Klistu. ²⁵ Kanji Paulu avalanganga ing'ano yaishaliya, yakulishunga, yaukumu ulóta kutandeka, Pilishi andíjopa namene na andímwaulila Paulu aashidoni, "Ambi unkuulula kuka! Mushu mo pangulota kuva na litala ndakushema," ²⁶ akuno alindila momo kenga njuluku undapatikananga kumwe Paulu, nadoni nae ngwengwe ashindatenda anshemashema aombanavo mwaa.

²⁷ Napanelo ling'oto lyavyaka vivili Pilishi andyúma kutwala lyutu lyake kudiva Polikiu Pestu. Kanji Pilishi alota alodye litananilo kwavayuda, anínneka Paulu mukungwa.

Paulu ankujugwa auke kumwe Shashali

25 Napanelo Pestu àwikile mulijimbo, akapite maduva matatu andyúma pa Shashaleya kuka ku Yelusalemu ² kutwala vanang'olo vavakulangalalela-shadaka pamo na vanang'olo vavayuda kumuukila nankashali Paulu na kunjugwangila ³ valipambedy kumili kwake pakulota nae amuujiye ku Yelusalemu kanji vavenavo milugu vyakummandamila shing'ati indila vammalidy. ⁴ Kanji Pestu kushidoni, "Paulu andauka mushu apagwa mukungwa ku Shashaleya na mumaduva akuvandika nangu ndauka koko. ⁵ Napanelo vananangalaledi venu vankuulula kuka namu nangu vakankashalye ikava kenga nae shipali shakoidye."

⁶ Bai Pestu akaikalange namu vanavo maduva akuwika kenga nane kwali kumi doni, andyújila ku Shashaleya. Akawike, palyamba lyake andyúka ndaikala palibengi kutwala kutuma vakantwale Paulu. ⁷ Paulu pawikile, vayuda vakwalakela ku Yelusalemu vaníntang'anedy kutwala kunkashalya vantambudyanga vinu vyakunyata vyoe kanji vinu vyene uti kuva vyaamadumba.

⁸ Kutwala Paulu kulishilidya aashidoni, "Nangu hashipali shangutagile; ata kwalilamulo lyavayuda, ata kwaing'ande ya Nnungu na ata hanintagadile Shashali." ⁹ Kanji Pestu alota alodye litananilo kwavayuda, andímudya Paulu kushidoni, "Da ing'ano yako ai wako unkulota ukenavo ku Yelusalemu pakulota nangu nguke ndikakuukumile kwanavo?" ¹⁰ Paulu kushidoni, "Nangu panguvele apa nguvelé palibengi litíka malamulo amwe Shashali, lyutu livaikidíle kunguukumila; wako undimanya shana kenga vayuda avanangu hashipali shandivaanadile. ¹¹ Ikava kenga shipali shakunyata shangutandile na shikapagwa shoeshoe shivaikidíle ngupele, nangu nguvelé tayali kupela. Kanji shikanapagwa, hanapagwe ata munu jumo wakulota kungukamudya kumakono kwavanu avanngulota nguke kumwe Shashali."

¹² Bai Pestu ling'oto lyakutangonavo vanang'olo vavagwite palibengi anínjang'ula Paulu aashidoni, "Kwoda ulota uke kumwe Shashali, bai ko kumwe Shashali ko, undauka."

Paulu pamevo pamwe Agilipa

¹³ Napanelo akapite maduva padyoko, umu Agilipa namu Belenise vandyúka ku Shashaleya ndamuudyanga nanangalaledi wave Pestu. ¹⁴ Bai kwodamwaa nkaja amo vandíikala maduva oe, Pestu anímmalangangila umu Agilipa ing'ano yake Paulu aashidoni, "Apali munu jumo apa wannakile Pilishi àungwidye. ¹⁵ Nangu nikauke ku Yelusalemu, vanang'olo vavakulangalalela-shadaka pamo na vanang'olo vavayuda vandída nangujugwa ngumye ukumu yamunu ajo.

¹⁶ "Nangu kuvajang'ula kenga mudishaliya dyashiloma halipali lilamulo lyakunkamudya munu vene vankashalídye munu ajo vakapali mulyutu lyolyo pakulota apate litala lyakujang'ula vyavantambula. ¹⁷ Napanelo vanavo vakawike namu nangu nkaja amu ing'ano ai hangutimyatimyenye mwaa palyamba lyake ndíshammeneu nguguvale kulibengi kutwala nangu kutuma vamwidenavo munu ajo. ¹⁸ Napanelo vakukashalya vakamalile kummalanganga, nangu hangugwene likosha ata limo likumene lyavammalangenge pakati pa alalá angushilindila nangu vammalangange. ¹⁹ Ila ing'ano yave ing'umene íshivavilingananga ivele yaidini yave na ing'ano yamunu jumo ápadile wavanshema Yesu kanji Paulu jojo jo, ankummalanganga kenga mumi.

²⁰ "Napanelo nangu ngushanga mwakumanyila shana myaa vyene, ndimudya ikava kenga ankulota auke ku Yelusalemu vakalalyange ing'ano yake yavashintambudyanga. ²¹ Kanji Paulu andíkanyilila ing'ano yake yuke kumwe Shashali akalalyange. Nadoni nangu ndílamulila aikale nkalaboshi alindila mpaka uwike wakati wakuntumidya kumwe Shashali." ²² Bai Agilipa andímwaulila Pestu kushidoni, "Nanangu munu ajo ninkulota nimwigwe nimwene." Pestu doni, "Undamwigwa lunduno."

²³ Palyamba lyake Agilipa namu Belenise vandíwika mulyutu na shimbili shoe namene kutwala kwinjila mushumba shamikodyanio vavele pamo na vananangalaledi vakumene vavaing'ondo na vanang'olo vankaja amo. Bai kwalilamulo limwe Pestu vaníntwala Paulu ²⁴ kutwala nae kushidoni, "Umu Agilipa pamo na mwenu uti múpagwite namu wetu mulyutu ali, nnole munu aju! Munu aju, shipinga shavayuda uti vaningujugwa vajunganila ata ku Yelusalemu ata nkaja amu kenga munu aju, haimmaikidile aname. ²⁵ Kanji nangu apa haningwene likosha lyatandile lyakuntadya apele. Nakavili kwodamwaa nae andijugwa ing'ano yake yuke ikawike kumwe umu nang'olo, nangu ndyamawa kumpalakedy koko. ²⁶ Kwaupande wangu nangu hanguvenavo shinu shakumanyika shalowa shakulota kumwandikila umu nang'olo wangu nimmalanganga munu aju; ni ashi shingutadídye nimwidenavo mushu

mwavanu uti na mushu mwako wako Umu Agilipa pakulota ling'oto lyakunnalyanga nakapanji ndapata shoeshoe shakulota kwandika. ²⁷ Mwaa shinkwaneka kuva shinu shakupuwanyanga kuntumidya nkungwa kwabila lyamba limmalanganga makosha ake."

Paulu ankulishilidya pamevo pake Agilipa

26 Napanelo Agilipa andimwaulila Paulu kushidoni, "Tendi ako livalangange!" Paulu kung'ani-ang'anianga makono kutwala kutunduvanga kulishilidya aashidoni, ² "Umu Agilipa, ninkulyona kuligiligwa mwaa wakupata litala lyakupagwa mushu mwako nelo pakulota ngulishilidye kwavinu uti vyangutambulanga vayuda ³ kupunda namene mwaa wako undimanya kupindukila yadi yavayuda ava na migagolo vyave. Nadoni ninkukujugwa ungwigwilile shana na kulipililila.

⁴ "Vayuda uti vandimanya mwanganamidile nangu kutunduvangila shidyoko shangu shangupitile tangu kunantandi pakati pavenentetemwangu na pa Yelusalemu. ⁵ Vanavo nangu vaningumanya tangu kala na ata leka valotile, vakandyumya ushuda doni kwakwodananavo shipinga shishinya namene mwidini yetu nangu ndinama kenga mpalishayo. ⁶ Napanelo nangu ninkupagwa mulyutu ali nguukumigwa kwamwaa walilindilililo lyangu mukulivikila kwake Nnungu kwavanakuluvetu, ⁷ kulivikila aku makola kumi na mbili avakwetu vankuvanavo lilindilililo lyakupata pavalipudya shilo na mui bila kudabadabanga. Umu wako, ni kwamwaa walilindilililo ali lyavangukashalidya! ⁸ Mwaa shani mwenu munkwona kenga Nnungu kuvadyuwa vakupela ni shinu shikaullika kukulupila? ⁹ Ata nangu momo nishindakumbukila kutumila dindila dyoedye divaikidile pakulota ngutimbange ntenga umwe Yesu, munu wa ku Nashaleti. ¹⁰ Vinu avi nditenda nangu nimwene ku Yelusalemu. Ndivajela mudikalaboshi vakwilimiyanga voe kwamadalaka avanang'olo vavakulangalalela-shadaka na vanji pavashumya lilamulo lyakuvatanola, nangu ngushindaungila nkono. ¹¹ Dimindi dyoe nangu ndipita muvitala vyakupudidya ndivapa shaushanga ndivakanyilidya pakulota vakupulu na mushitundi shangushivavikila, vaningutadya nguke ndikainjile mushimwanda. ¹⁴ Wetu pashinu apala kugwangila pai kutwala nangu kwigwa lidi lishitangola mushibalaniya liishidoni, 'Saulu, Saulu, mwaa shani unkungupapata? Shinkukamadyanga kwako kuvangedya ashila shikukanyola.' ¹⁵ Nangu kutwala kudya, 'Da wako po nang'olo unyani?' Umu kushidoni, 'Nangu apa Yesu, jo waumpapata wako jo. ¹⁶ Kanji takatuka wimile. Nangu

ndikuumililila pakulota uve untumika wangu na uve unshuda wavinu vyaugwene nelo kwalakela kwangu na vyangulota kukulodya ¹⁷ ndikuposha kumakono kwavakwenu na kwavamidi kwangulota kukutumidya ¹⁸ kwambangidya dashi, uvaungule mevo vashiliuke kushii vauke kulilangadyo, vaume mumadalaka amwe Shatwani vauke kumwe Nnungu pakulota vapate kulivalivigwa kwamadambi na vapate lyutu mushipinga sha avala vailimyangigwa kwaindila yakungukulupila nangu.' [†]

¹⁹ "Napavedoni Umu Agilipa, indoti yangupatile kwalakela kuwa, nditandedya mwaishilotela. ²⁰ Ndivavalangangila shitandi va ku Damashiko, kwatika ku Yelusalemu, disemu uti dya ku Yudeya namomo kwavamidi pakulota valijugulange madambi ave na vashinjiulile Nnungu valodya vitendo kwodananavo kulijugulanga kwave. ²¹ Ni ing'ano ai yavangukamulidile vayuda mwing'ande ya Nnungu na kulota vangubyae. ²² Kanji kwalipwashalelo lya Nnungu ngupali mpaka nelo apa; ni ashi shingutadya ngupagwe apa ngumya ushuda kwavadyoko mpaka kwavanang'olo. Shanguvalanganga hashinapundana shinu na ashila shavatangwele vakulava na shatangwele Musha kenga shindatandeka, ²³ doni, Klistu inimmaikila auvauvange na avele ntandi mukudyuka kwavakupela, andavalanganga lilangadyo kwavenentete vetu namomo kwavamidi."

²⁴ Bai Paulu pashitangola avi alishilidya, Pestu anditangola pashanya po aashidoni, "Wako Paulu unkudulumbuka! Mashomo ako oe lo, ankukudulumbuwa."

²⁵ Kanji Paulu kushidoni, "Nang'olo Pestu, nangu hangunadulumbuka shinu; ninkutangola na ding'ano dyangu na ninkutangola vinu viu. ²⁶ Apa apali umu Agilipa amanyite shana vinu vyene uti; ni ashi shingutadya nangu ngutangole na kulitamanga pamevo pake mwaa ninkuvanavo wakika kenga pakati pavinu avi uti hashipali ata shimo shimpundile na hashipali ata shimo shitandéke shipipii. ²⁷ Umu Agilipa, da wako unkuvakulupila vakulava? Nangu ndimanya kenga unkuvakulupila." ²⁸ Agilipa kutwala kushidoni, "Da wako muwakati wo padyoko au ulota unguhombe nguve ninklistu!" ²⁹ Paulu kushidoni, "Elo, nangu ninkunjugwa Nnungu pakulota patime hapana-time wako apa pamo na vanu uti vanguardilila ava vave kenga mo mwanguvalalele nangu kanji bila mang'unyang'unya."

³⁰ Bai anditakatuka umu, gavana namu Belenise pamo na shipinga shave uti. ³¹ Pavashuma panguguvale, vashindapita vaulanila vaashidoni, "Munu aju hashipali shakunyata shatandile shakuntadya apele kwali aungwe." ³² Agilipa kutwala kumwaulila Pestu doni, "Munu aju leka akajugwile auke kumwe Shashali, indivaikila kumuungula."

Paulu vankuntumidya ku Loma

27 Napanelo pavaukile ndamuwa wetu twinjile mwingalava tuke ku Italiya, vanavo vanitwala

† Kwali: a "...mushipinga shavenentete vailimyangike."

Paulu pamo na vakungwa vanji kunkamudya ku-makono kwanang'olo wavaing'ondo miya walina Shulyu wamushipinga shavaitaliyani shimwe umu nang'olo. ² Bai wetu tundíkwela mwingalava ya pa Adalamitiu ivéle tayali yuke kuviko vya ku Ashiya. Mushimwanda shosho tundípagwanavo Alishitaliku munu wa ku Teshalonika ya ku Makedoniya. ³ Palyamba lyake tuvanu kuwika panshiko wa ku Shidoni. Napanelo Shulyu pakuva ashinantanana Paulu, andímu-pa litala lyakuka ndavalola vabwadvake va pa Shidoni na vanshunge. ⁴ Tukaume pa Shidoni, tundíkwela mwingalava tulodya pepi na pa Kupulu mwaa imepo ishaaloka mushu mwetu. ⁵ Tundyúka mushu na shimwanda shetu tuwena mwimanga nkono wa ku Kiliya na ku Pampiliya mpaka ndaimila panshiko wa Mila ya ku Likiya. ⁶ Panshiko awo nang'olo wavaing'ondo miya watuvénavo aijá mushimwanda shetu, andíkodya ingalava ya pa Alishandaliya íshuka ku Italiya, nae wetu kutwinjidya momo.

⁷ Shimwanda shetu shindíva shakukakavanga; nadoni tundítwala maduva oe tuvauvanga mpaka kuka ndawika pepi na pa Kinidu. Kanji kwodamwaa imepo haitulakile tuka shalowa, tundyúka nkono wakwina shitingi sha Kaleta tupita pepi na pa Shalamone.

⁸ Tundyúka shinyenjenyenje kanji na mauvilo makumene mpaka ndawika mulyutu lyavashema Mishiko Vyambone livéle pepi na njini wa Lasheya.

⁹ Napanelo ukatupitile wakati wetu na ata liduva lya Kulivalivigwa Madambi momo likapite, † shindípagwa shijoidyo shikumene kuwena mwingalava; nadoni Paulu andívaduma ¹⁰ aashidoni, "Mmanang'olo, ninkwona kutunduvangila ambi apa shimwanda shetu shindava shashijoidyo na shaasala ing'umene namene nkati muvyombo vyatunyukete na ingalava. Hainatoshe ata wewe tuvene inkuululika kukatoka shingumi." ¹¹ Kanji nang'olo wavaing'ondo miya andíshambegwa na nkútukusha-ingalava pamo na mwene ingalava kuleka shatangwele Paulu. ¹² Kanji kwodamwaa nshiko awo hauvéle shana pakulota vanu vaikale muwakati wakudidima imepo, bai vanu voe vandyóna kudyanga vaume panshiko awo valingangile kuka ndawika panshiko wa Poiniki uvéle mo mushitingi sha Kaleta pakulota tupagwe mulyutu alyo muwakati uti waimepo. Likaja alyo liladilé mevo nkono wakwina shilambo na nkono wakwalyuka liduva.

Mwimanga munkulipuka shimbunga

¹³ Bai indítunduvanga kupunga imepo ikavele yadimongo yakwalakela kwina shilambo kutwala vanavo kwona kenga mwavashikumbukilila vene amulá mundaandakela momo. Nadoni vanavo vandyúmya inanga mmedi mo kutwala kutunduvanga kutukusha ingalava nanyenje imanga ya ku Kaleta. ¹⁴ Kanji muwakati padyoko pashitingi po shindíwika shimbunga shakwalakela kunshanda kwake nkono wak-

† Liduva ali ni lyashikukulu shikumene shavanaishilaleli na shishindatandeka muwakati wakutanyanga medi na waimepo namene.

walakela liduva ¹⁵ kupita ikunga ingalava. Bai imepo indyútanga ingalava na haishululika kushinjiula; nadoni wetu tundítatakela na tundíleka ingalava yode yo imepo yo bai. ¹⁶ Napanelo shitingi shimo shavashema Kauda shindítushililidya padyoko kwaing'ano yaimepo kutwala patupitile kwina kwake pamo na vyakunanopa vyoe tundyúlula kuposha ingalava idikidiki. ¹⁷ Bai vakutukusha-ingalava vandípakila ingalava idikidiki yo na vandítava ingalava ing'umene na mididi vyakunanapedya. Napanelo kwodamwaa vashindajopa ingalava kuka ndambwatamila mudindunda dyadimbwe dyamwisemu yaimanga ya Shilite, vanavo vandíshuluwa ditanga kuleka ingalava yuka yene na imepo. ¹⁸ Napanelo shimbunga shishindauka mushu na palyamba lyake vandyúmadyanga vyombo vyavapakidíle mwingalava kujalangila mmedi. ¹⁹ Muliduva lyantatu vo vene vakutukusha-ingalava vandíjalangila mmedi vyombo vinji vyashimadengo vyamwingalava. ²⁰ Maduva oe kupita patukona liduva na ata dinondo, imepo yadimongo yuka mushu ipunga namene mpaka lilindilililo uti lyakulota tuvanu kwambolegwa, kutujaika.

²¹ Napanelo kwodamwaa vandíikalanga maduva oe pavakalya shinu, Paulu andítakatuka pakati pave kutwala kushidoni, "Mwenu! Leka mungwigwilidile nangu paninnaidye kuma ku Kaleta akulá, mauvilo ala na asala ai uti hamunapate. ²² Kanji napanelo ninkumwaulila doni, lyunge mitima mwaa hapali ata munu jumo álota kupela pakati penu ila ingalava ni ilóta kwalibika ²³ mwaa shilo sho shanelo ashi aningu-umililila njelo wake Nnungu, Nnungu jojo ángutandile nguve wake na wangulipudya nangu kwake ²⁴ kutwala kungwaulila doni, 'Paulu, haunajope! Wako indikuvaikila uke ukawike kumwe Shashali na lola, Nnungu andikukamudya vanu uti vapagwíte namu wako mwingalava.' ²⁵ Napavedoni mwenu lyunge ntima mwaa ninkukulupila kenga Nnungu andatandeya avilá vyangwaulidile. ²⁶ Napane kwamwaa waimepo ingalava indauka ndambwatamila pashitingi."

Malailililo amwe Paulu

²⁷ Napanelo shilo shing'ati shaliduva lyakumi na nsheshe mawimbi atugang'ola mu Imanga ya Meditellani, vakutusha-ingalava vandílyona kenga vankuvandikila kumwangu. ²⁸ Nadoni vanavo vandíjela mmedi shipimo shandidi wavaungangidíle shinu shakwidopa kutwala kwona shitamba shamakono ishilini kwakukadaleka kwake. Vakauke mushu vandípima kavili kutwala kwona kuva shitamba shamakono kumi na tano kwakukadaleka kwake. ²⁹ Napane vajopa ingalava kuka ndalitumbula mumajanga, vandíjalangila dinanga nsheshe mmedi kunyuma ingalava vashwali wiku ulangale ambi. ³⁰ Bai vakutukusha-ingalava valambela mwakutipukila vandítwala ingalava idikidiki kushuluwidya mmedi valivika kenga valota kuka ndaungangilanga dinanga mushu ingalava ³¹ kutwala Paulu kumwaulila nang'olo wavaing'ondo miya pamo na vaing'ondo vake kushidoni, "Vakutukusha-ingalava

avalá vakaumananga mwingalava ing'umene amu, mwenu uti hapagwa wakushumba.”³² Nadoni vaing'ondo vandílumulanga mididi víshilandendya ingalava idikidiki kutwala kuleka igwilila mmedi.

³³ Kumatingatinga Paulu andívalaililila vanu uti valyange vyakulya atangola kushidoni, “Kwoda madu-va kumi na nsheshe andipita mulijugulanga na pamukapamba yolo,³⁴ nangu ninkunjugwangila mulye shinu shoeshoe kwambangidya muve na dimongo mwaa apa hapali ata munu jumo álota kupata likwanda.”³⁵ Ling'oto lyakutangola malove ala, andítwala ligung'u kunnambwalela Nnungu kumeja kutwala kulya.³⁶ Bai vanavo uti vandílyunga mitima na vandítunduvanga kulyanga.³⁷ Mwingalava amo tundípagwa tuvanu dimiya mbili sabini na sita.³⁸ Ling'oto lyavanu uti kulyanga, vaníntwalanga ngano uti kunjalangila mmedi vapungula kwidopa kwaingalava.

Ingalava inkutamakanga

³⁹ Wiku ukashwe, vakutukusha-ingalava havamanyíte shilambo ashō kanji vandyóna kushinu kushaaneka dimbwe nanyenje imanga kutwala vanavo mmitima vyave kulota ingalava yuke ikaimile popo ikava kenga ikandyululika.⁴⁰ Nadoni vandílumulanga mididi vyadinanga kuleka dinanga mmedi akuno vaungulanga ding'wau dyakunyuma dyakulangalalela ingalava pakulota dilangalalele ingalava. Nakavili vandíkwedya itanga idikidiki yakulilomo pakulota ingalava yuke ikashiye kunshanga.⁴¹ Kanji ingalava indímawatamila mwindunda yadimbwe yamwimanga kuleka ikele popo paikating'ina ata padyoko. Kulilomo kundíinjila mudimbwe kutwala kunyuma kwake kutunduvanga kutumbukanga mwaa wamawimbi áshilikoma na dimongo.

⁴² Napanelo vaing'ondo vandípananila vavabyange mapaleshi uti mwaa wakujopadavo vandaagwalela ku-ka ndawika kumwangu kutwala kutipukanga.⁴³ Kanji nang'olo wavaing'ondo kwodamwaa ashilota amwambole Paulu mushijoidyo ashō, andívaleya shitando ashō. Nadoni andívalamulila vanu vashimanya kwagwalela valishushe vainjile mmedi pakulota vaagwele vauke kumwangu⁴⁴ kutwala vanji kuvalamulila vatwale dimbau kwali vipande vyadimbau vyaingalava vivapwashele kwagwela. Nadoni tuvanu uti tundípukangila kumwangu.

Paulu pashitingi sha Malita

28 Napanelo tuvanu uti tukapukange mushijoidyo ashō, patuwikile kumwangu tundímanya kenga shitingi ashō vashishema Malita.² Bai vene shitingi ashō vandílodya litananilo lyakujowa kwetu wetu. Vakaturwashalela na vakatumbulididya moto mwaa wakutunduvanga kutonya medi na mwaa wakutudidima imepo.³ Napanelo Paulu andílakota itu yadinang'ene kutenda akang'ela moto kutwala mo muding'uni mo kuma nyoka walina jaa-ntela atukuta ntukuka kunnamatila Paulu mulyanda lyake.⁴ Napane-

lo vene ikaja ayo pavagwene inyoka inamatidile mulyanda lyake Paulu, vandyáulanila shivenevene vaashidoni, “Munu aju patukamwambambidya ni shimalivanu. Mwaa lola, ata ikava kenga andipuka mmedi kanji jo mwene Ishaliya hanneka anama.”⁵ Kanji Paulu anímpatulidya nyoka jo pamoto na hashipali shintandéke.⁶ Napanelo vanu vapashitingi ashō vashikum-bukila kenga Paulu unammimba nkono kwali kupela shingangala. Kanji vakaikale wakati woe valindila, pavagwene kenga hashipali shimmilinganianga, vana-vo dindívaida ding'ano dinji kutwala kutangola kenga Paulu avele nnungu.

⁷ Napanelo pepi na palyutu alyo, andípagwa mautu ake gavana washitingi ashō walina Pubiliu. Nang'olo aju wetu andítushema na andítukalibisha paing'ande pake na tundíkanavo shana namene maduva matatu.⁸ Napanelo tatake Pubiliu unímpwateka mili na kudalola myadi. Paulu paukile nannola, ling'oto lyakushwali anímikila makono kutwala kumponia.

⁹ Shikatandeke shitando ashō, valwele uti vapashitingi ashō vandímuukila Paulu nanavavo vandípona momo.

¹⁰ Vanu avo vandítupa dinudyo dyoe namene na patuukile ndapanganikanga pakulota twinjile mwingalava vandítupa vinu vyoe vyakutupwashela mushimwanda shetu.

Paulu ankuwika pa Loma

¹¹ Ling'oto lyakwikala wetu pashitingi ashō myedi mitatu, tundíinjila mwingalava ye ipagwíte mulyutu alyo muwakati uti wakudidima imepo. Ingalava yoyo ivele ya ku Alishandaliya na mushu mwake indívanavo mashinamu avannungu mamaa.¹² Tukawike panshiko wa Shilakusha, tundíikala maduva matatu.¹³ Patu-umile apo, tundyúka shalowa mpaka pa Legiu. Palyamba lyake kupunga imepo yakwalakela kwina shilambo kutwala muliduva lyake lyambili wetu kuwika panshiko wa Putiyoli.¹⁴ Pa Putiyoli wetu kuvakodya vanning'unumunu, vovo vo kutujugwangila twikanavo ishumana imo. Kutwala apo, tundyúka ndawika ku Loma.¹⁵ Napanelo vanung'unumunu vashíikala pa Loma vakapate dyabali dyakuwika kwetu, vandíida ndatushinga pashakoni sha pa Apiyo na pa Ding'ande Nnatu Dyavajeni. Paulu akavone vanung'unumunu avo, anínnambwalela Nnungu na ntima wake undímwikala shana.

¹⁶ Patuwikile nkaja mu Loma, Paulu andípata litala lyakunama paing'ande yagweka kutwala kummikila mwing'ondo jumo wakunnaledya.

Paulu ankukadyania na vayuda va pa Loma

¹⁷ Napanelo akapite maduva matatu, Paulu andí-vashamanga vanang'olo vavayuda kutwala vanavo pavaidanenge nae kuvaulila doni, “Mmanung'unumunu, nangu panikatenda shinu shakukowa kwavenentete vetu na kwashinamilo shavatulakadile

† Ava vavele vannungu vavili vavagalegu na vandívanavo mena ala: Kashitoli namu Polushi.

vanakuluvetu, vayuda pa Yelusalemu vaningunga kutwala kungukamudya kumakono avaloma. ¹⁸ Valoma pavalalyenge myaa vyangu vashindalota vanguleke mwaa nkati mo havagwene likosha lyoelyoe lyakulota ngupalele. ¹⁹ Kanji vayuda ni kwita doni kutwala nanangu kujugwa mwaa wangu uwike akune kumwe Shashali pakulota alalyange ata ikava kenga nangu hanguvenavo mwaa woewoe wakuvakashalya venen-tetemwangu. ²⁰ Ni ashi shitadidyeye ngujugwangile nimwone na ngwambange mwaa namu mwenu pakuva ni kwamwaa walilindilililo lyavanaishilaeli lyangunyukati-la nangu mang'unyang'unya ala."

²¹ Vanavo kutwala kushidoni, "Wetu hatupatile ata lyamba limo lyakwaloka ku Yudeya na pakati pavanung'unumunu vaidile akuno hapali hatuvalan-gangidile shitendo shoeshoe shakunyata shako wako.

²² Nadoni tundilota tukwigwe wako umwene mwawonela. Mwaa tundimanya kenga kula kushinu vanu vankuvangedya ishama yawoda wako."

²³ Napane vakavike liduva lyakukadyania namu nae, vandimwidila vanu voe palyutu lyashiikala na nae kutunduvangila lyamba mpaka lyulo andivaigwiniya ataa ushuda yautawala wa Nnungu alingangila avashombe kwing'ano imwe Yesu kutunduvangila mu Lilamulo lyake Musha namomo mu Vakulava. ²⁴ Vanji napane vandivashambegwa na ashilá shitangaléke kanji vanji havakulupidile. ²⁵ Napavedoni vâpagwite muku-taukananga shivenevene, Paulu andívaulila vau-

manange atangola lilove limo, "Imumu Wanashwe anditangola viu na vanakuluvenu kwaindila imwe nkúla-va Ishaiya ²⁶ patédoni,

" 'Wena kwavenentete ava ukavaulile doni, Mundaigwilila matu ngambulii kanji hamumanya shitangaléka,

Mundalola ndoo kanji hamumanya shinu shene.

²⁷ Mwaa mitima vyavenentete ava vindinanopa;

kumatu kwave vandidiva,

mevo ave vandyunidya

kwambangidya havanalole vamanye shinu shene,

havanaigwilile vamanye shitangaléka

na havanaitikile shitangaléka;

leka vakatandile avyo

vakandishinjiulila mitima vyave kwangu,

kutwala nangu kuvaponia.' " †

²⁸ Paulu kavili kushidoni, "Ikala mumanya doni nten-ga au wakwambola wake Nnungu undipalakalegwa kwavamidi na vanavo vandaigwilila." ²⁹ ††

³⁰ Bai Paulu andíikala vyaka vivili paing'ande yake yapangile. Mulyutu lyolyo nae ashindavapwashalela vanu uti váshuka nannola ³¹ avalanganga utawala wa Nnungu na apundisha uti vimwamba *UMU* Yesu Klistu kwantima shii uti ‡ na kwabila kundingadinga shinu.

† *Lola Ishaiya 6:9, 10.* †† *Mumabuku anji akala na amana, nshitali wa 29 haupali. Kanji mumabuku anji mwaupagwite unkushidoni, a Bai Paulu akatangole doni, vayuda vandyápukananga vauka vapwatananga namene shivenevene... ‡ Kwali: a ...kwaungala uti.*

Valoma

Nandele

1 Paulu, ntumwa umwe Klistu Yesu áshamagwidye ave myombe na áapuligwidye kwantenga wambone wake Nnungu, ² wo walivikidile tangu kala kwaindila yavakulava vake nkati mumaandiko akwilimyanga ³ umwamba mwanagwe, jojo jo, kwakwodananavo shimunu ávalakwadidye muudukulu umwe Daudi ⁴ na kwakwodananavo Imumu waukwilimyanga ápangigwidye kuwa Mwana wa Nnungu nkati mudimongo kwaindila yakudyuka pakati pavakupela, Yesu Klistu *UMU* wetu. ⁵ Kwaindila yake nae tundi-pata umonyo na umyombe wakutadya pakati pavenentete uti kwigwilila kwalikulupililo kwamwaa walina lyake ⁶ na pakati pavanavo, munkupagwa namwenu momo múshamagwidye muve vamwe Yesu Klistu.

⁷ Kwenu mwenu uti múpagwa ku Loma, mwemwe mmakunagwaleka vake Nnungu na múshamagwidye muve mmakwilimyanga.

Umonyopagwe kwenu mwenu na amani yakwalakela kumwe Nnungu Tatagwetu na kumwe *UMU* Yesu Klistu.

Malotelo amwe Paulu akuka ku Loma

⁸ Shinantandi ninkunnambwalela Nnungu wangu kwaindila imwe Yesu Klistu kwamwaa wenu mwenu uti mwaa likulupililo lyenu linkuvalangangigwa mushilambo uti. ⁹ Nnungu wanintumika na ntima wangu uti muntenga wambone wa Mwanagwe ni nshuda wangu mwashi mwanintambulanga mwenu ngwengwe ¹⁰ mukushwali kwangu ngujugwa doni, kwadindila dyoedye kwalilotelo lyake Nnungu ling'oto lyawakati woe ambi napane ndaulula kwida kwenu. ¹¹ Ninkuvanavo mweshe wakwida nannola kwambangidya dashi nimwing'e shajo shoeshoe shaimumu pakulota shinnonowange. ¹² Doni ni pakulota tupambadyangigwe kwaindila yalikulupililo lyakula munu, lyenu mwenu pamo na lyangu nangu. ¹³ Hangunalota shinu mmanung'unumunu mutikinange kenga myanda vyoe vyangupanganikenge ngwide kwenu kanji mpaka ambi apa shipali shingudingadínga. Shabaa yangu nikulota ngupune vyepo pakati penu kenga mwan-gupunilile pakati pavamidi vanji vo. ¹⁴ Ninkuvanavo udeni kwavamidi na kwavakamanyika, kwavakumanya na kwavajinga. ¹⁵ Nadoni ninkuvanavo dukuduku yakovalanganga ntenga wambone momo kwenu mwenu múvele ku Loma.

Ntenga wambone ni dimongo dyakwambola

¹⁶ Mwaa hangunona dyoni kwantenga wambone pakuva ni dimongo dyake Nnungu dyakwambola kwaupande wavanu uti vakulupíla; shitandi kwamuyuda ling'oto kwangalegu. ¹⁷ Mwaa mo muntenga mo inkulilodya ishaliya yake Nnungu kutunduvangila mulikulupililo kuka mulikulupililo kenga mwavaandikidile, "Waishaliya andanama kwalikulupililo." †

Shitundi shake Nnungu kwaungave-shaliya

¹⁸ Mwaa doni apa, shitundi shake Nnungu shinkulilodya kutunduvangila kuwa shiidila ungave-Nnungu na ungave-shaliya wavanu vatitikidyánga umwiu kwaindila yakuvova ishaliya. ¹⁹ Mwaa ashilá shuulukíka kumanyika kwamwaa wa Nnungu shanavo shinkulilodya pakuva jo mwene Nnungu, andivalodya. ²⁰ Doni, tangu kukandyangigwa shilambo mavalelo ake ákaaneka yani dimongo dyake díkamalilika na unnungu wake, vyanavo vyaneke ngala kwaindila ya vyo vinu vikandyangígwe. Naivedoni, kwavanavo hamupali mwakukanila. ²¹ Mwaa vàmmanyite avi Nnungu, havampele lishangelo kenga Nnungu na ata havanambwaladile kanji vanavo mmakumbukililo ave vandinyambikanga na mitima vyave vyaujinga vindyumbala shii. ²² Vanavo valivalanganga kuva vading'ano vanditadya kuva vajinga ²³ kutwala kubadilisha lishangelo lyake Nnungu ákapela kwalishinamu lyalinganienge kenga munu ápela, vyuni, vanyama na vakoko vakulyuta.

²⁴ Napavedoni Nnungu andivakamudya muditamaa dyammitima vyave vatandedye ushapu wakutadyania dyoni mumili mwave †²⁵ pakuva vabadilishidyé umwiu wa Nnungu kwaushwang'a kutwala kulipudya na kutumikila viumbe pavakalipudídye Namumba átumbyangilika ngwengwe. Ame.

²⁶ Kwamwaa au, Nnungu avakamudidyé muditamaa dyave dyadyoni, ata mpaka vo vakongwe vave vo, vandibadilisha kutenda wendi muvaikidíle kwakutandela munji múkavaikidile. ²⁷ Namomo valume valeka kutenda wendi muvaikidíle kwankongwe, vanavo vandibyaikanga mumweshe wave washivanavene; nnume na nnumemwagwe vatandana vyadyoni kutwala kulipatila vo vene ukumu ivaikidíle kwamakosha ave.

²⁸ Naivedoni pakuva vanavo havagwene mana yakumanya Nnungu, jo mwene Nnungu andivaka-

† *Lola Abakuki 2:4.* †† *Lola Dimu 81:12.*

mudya mumakumbukililo ave akunyata pakulota vatandedye ashilá shíkavaikidile kutenda. ²⁹ Vandyumbaligwa ungave-shaliya uti; ushapu, lung'unuku na ukalau. Vaumbaligwidyé ing'ou, kubyaa, ing'ondo, kushang'apa na kung'wenya; ³⁰ vanu vakung'wenya, vammangédyá Nnungu, vákave ishima, vakulyona na vakulitumbyanga; vakubuwa vitendo vyaukalau, vákavaigwilila vatatamunu, ³¹ vajinga, vákakulupilika, vákanaagwaledya na vákave shididi. ³² Ata ikava kenga vandimanya lilamulo lyaishaliya lyake Nnungu líishi-doni, avalá vatandédyá avyo indivavaikila vapele. Vanavo i gweka vankutenda kanji namomo vanku-vaungila nkono avalá vaténda.

Ukumu yaishaliya yake Nnungu

2 Napavedoni wako umunu úvaukumu vanji, hamupali mwakukanila mwaa paumuukumu junji po, unkulyukumu gwegwe umwene pakuva wako umwene úkumu po, vyovy vyo unkutenda. ² Tundi-manyá kenga ukumu yake Nnungu kwa avalá vaténda vinu avyo, inkwodananavo umwiu. ³ Napane wako umunu úvaukumu avalá vaténda nawako momo utenda vyovy, wona kenga undapalanyoka ukumu ya Nnungu? ⁴ Kwali wona dashi, mali akutanana kwake, akulipililila na aupole, wako unkwiludyanga kwabila kumanya do, kutanana kwake Nnungu ni kukuukana-vo mukulijugulanga? ⁵ Kanji kwoda mwaa waimbeve yako na kunanopa kwantima wako, bai unkulikungailila shitundi gwegwe umwene muliduva alilá lyashitundi pailota kulilodya ukumu yaishaliya yake Nnungu.

⁶ Nae anannipa kula munu kwodananavo matendo ake. ⁷ Kwa avalá valóta kunanopa nkati mukutand-edyá wambone, valambéla lishangelo, ishima na ungapela, andavapa shingumi shíkamalilika ⁸ kanji shitundi na shishimwashimwa kwa avalá vavénavo malotelo augweka vaíta umwiu kutwala kwigwilila ungave-shaliya. ⁹ Tabu na shaushanga vindapagwa kwakula munu átandédyá ukalau; shitandi kwamuyuda ling'oto kwangalegu ¹⁰ kanji lishangelo, ishima na amani kwakula munu átandédyá wambone; shitandi kwamuyuda ling'oto kwangalegu. ¹¹ Mwaa kumwe Nnungu hakupali kupambula.

¹² Mwaa doni, uti avalá vatéga bila lilamulo, bila lilamulo vandajaika na avalá vatéga mulilamulo, kwa lya lilamulo lya, vandaukumigwa. ¹³ Mwaa vaishaliya pamevo pake Nnungu havanava shinu avalá vaígwa lilamulo kanji avalá vatandédyá lilamulo ni valóta kuvalangiligwa kuva ishaliya. ¹⁴ Doni, vamidi vákave lilamulo pavatandédyá kulingananavo mavalelo ave ashilá shilamulilígwa mulilamulo, vanavo vankuva lilamulo kwavo vo vene ata ikava kenga havave lilamulo. ¹⁵ Vanavo vankulilodya doni shimadengo shalilamulo shindyandikigwa mmitima vyave; makumbukililo ave amuntima aumya pamo ushuda avakashalya na ata avashililidya ¹⁶ muliduva lyaukumu Nnungu vipii vya-

vanu kwaindila imwe Klistu Yesu kwodananavo ntenga wambone wangu.

Vayuda vananapela mulilamulo

¹⁷ Kushi wako úlishema kuva muyuda, únanapela mulilamulo na úlitamangila nkati mu Nnungu, ¹⁸ wako úmanyite shana malotelo ake Nnungu na úungila nkono shakwashi shivénavo mana makumene pakuva upundishigwidyé mulilamulo, ¹⁹ wako úlikulupidile gwegwe umwene kuva nanangaledi wavakalola, lilangadyo lya avalá vavéle mushii, ²⁰ wako nkúpundisha wavajinga, mwalimu wavadyoko pakuva wako undivanavo mulilamulo mo wakikisho walimany-ilo na umwiu. ²¹ Kushi napane wako úvapundisha vanji, me haulipundisha gwegwe umwene? Wako úvalan-ganga uleya kwiva, me unkwiva? ²² Wako útangola uleya kulavalava, me unkulavalava? Wako úvanyatila vannungu, me unkwivanga muding'ande dyave?

²³ Wako úlitamangila mulilamulo, paupujungula lilamulo po, unkunnyambiyanga Nnungu. ²⁴ Mwaa kenga indyandikigwa, "Lina lya Nnungu vankukupulu pakati pavamidi kwamwaa wenu mwenu." ††

²⁵ Mwiu, kukumuligwa likumbi kunkuvanavo mana ikava kenga wako unkwigwilila lilamulo kanji ikava kenga wako ni nkúpujungula lilamulo, bai kukumulig-wa kwako ko kunditadya kuva ungakumuligwe. ²⁶ Napane aijá ákakumuligwe, ikava kenga midimu vyalilamulo andaigwilila, da ava shinu nae álota kuvalangilig-wa kukumuligwa? ²⁷ Aijá ákakumuligwe mumili kanji áigwilila lilamulo, andakuukumu wako úvenavo lilamu-lo lyandikígwe na shitendo shakukuligwa kanji lilamulo lya, upujungula. ²⁸ Mwenu, hapali muyuda, muyuda vila kwapanda na kukumuligwa hakunava shinu kwapanda mili ²⁹ kanji muyuda, muyuda munti-ma na kukumuligwa ni kwamuntima kwaindila ya Imumu i shaandikígwe. Litumbyangidyo lyake nae hali-naalakela shinu kwavanu kanji kumwe Nnungu.

Nnungu ni wakukulupilika

3 Napanelo muyuda ankuvanavo mana shani? ² Kwali kukumuligwa likumbi inkupagwa paida shani? ² Oe! Ankupagwa kula upande! Shitandi vayuda vandikulupiligwa malove ake Nnungu. ³ Napanelo ilota kuva dashi ikava kenga vanji havakulupidile? ‡ Da ungakulupila wave undatadya kuputanga kukulupilika kwake Nnungu? ⁴ Ata padyoko vela! Nneke Nnungu ave waumwiu ata ikava kenga kula munu ni wakushang'apa kenga indyandikigwa, "pakulota uvenavo ishaliya mumalove ako, na paukumu po, uteme." ††

⁵ Kanji napane ikava kenga ungave-shaliya wetu unkulodya ishaliya yake Nnungu, tulota kwamba nyamani? Kwali tutangole do, Nnungu havenavo ishaliya patandédyá shitundi shake? Ngutangola kenga nimunu. ⁶ Ata padyoko vela! Leka ivele davo, Nnungu

† Lola Jobi 34:11; Dimu 62:12; Mikong'o 24:12; Yelemiya 17:10; 32:19; Eshekieli 33:20.

†† Lola Ishaiya 52:5. ‡ Kwali: a ...ikava kenga vanji havakulupilike? Da ungakulupilika wave... †† Lola Dimu 51:4.

akaulwile dashi kuukumu shilambo? ⁷ Kanji ikava kenga kwaindila yakushang'apa kwangu umwiu wake Nnungu unkuumbaligwa kwalishangelo lyake mwaa shani nguukumigwe kenga ninkútega? ⁸ Kwali mwavataukangila vanji vyatutangola wetu avi, "Tutende wakunyata pakulota wide wambone." Ukumu yave ni yashaliya.

Uti vandyashalanga

⁹ Napane tuushidashi? Da wetu tuvayuda ni túvapunda vanu vanji? Mene, ata padyoko! Mwaa ndivalanganaga tayali doni vayuda pamo namu vamidi uti vankupagwa mukutawaligwa na lidambi ¹⁰ kenga indyandikigwa,

"Hapali waishaliya ata jumo,

¹¹ hapali munu ámanya,

na hapali ánnambela Nnungu.

¹² Uti vandyashalanga,

kwaunapamo vandilitenda vákave mana. †

Hapali átandedya wambone,

kulamana na jumo vela.

¹³ Ding'alongo dyave ni makabuli avé mwandwa, ††

dindimi dyave vankutumila mukushang'apa.

Mudindomo dyave munkupagwa ishumu yanyoka, ‡

¹⁴ ndikanywa dyave mundyumbala dilana na

kukalala. ‡†

¹⁵ Madodo ave ankutukutila kukujaa myadi,

¹⁶ mudindila dyave mo, kubamola na madembe,

¹⁷ na indila ya amani havamanyite. ‡†

¹⁸ Hakupali kunjopa Nnungu pamevo pave." ‡††

¹⁹ Napane wetu tundimanya kenga uti vitangóla mulilamulo vinkutangola kwa avalá vatawalígwa na lilamulo kwambangidya dashi, dikanywa uti dimalale na shilambo uti shikapagwe muukumu yake Nnungu ²⁰ mwaa kwaindila yashimadengo shalilamulo hapali álota kuvalangiligwa kuva ishaliya pamevo pake pakuva kwaindila yalilamulo inkutadya lidambi limanyike.

Uti vankupalavalela lishangelo lyake Nnungu

²¹ Ambi napane ishaliya yake Nnungu indililodya yapukananga na lilamulo; ata lyo lyene lilamulo na vakulava vankumya ushuda wake, ²² doni, ishaliya yake Nnungu kwaindila yakukulupila Yesu Klistu kwa avalá uti vankulupila nae. Hakupali kuvilingananga ²³ mwaa uti vanditega na kupalavalela lishangelo lyake Nnungu ²⁴ vavalangiligwa kuva ishaliya muumonyo wake kenga inudyo kwaindila yakwambola kupagwite nkati mumwe Klistu Yesu. ²⁵ Nae jo, Nnungu andimunya kenga shadaka shakudimanga shitundi shake kwamyadi vyake kwaindila yalikulupililo ‡†† kwambangidya dashi ililodye ishaliya yake mwaa kwaupole wake, andifleka madambi akunyuma ²⁶ pakulota alodye ishaliya yake muwakati au na ave

† *Lola Dimu 14:1-3; 53:1-3.* †† *Lola Dimu 5:9.* ‡ *Lola Dimu 140:3.* ‡† *Lola Dimu 10:7.* ‡†† *Lola Ishaiya 59:7-8; Mikong'o 1:16.* ‡††† *Lola Dimu 36:1.* ‡††† *Kwali: a Nae jo, Nnungu andimunya kenga shadaka shakudimanga shitundi shake kwaindila yakukulupila myadi vyake...*

waishaliya namomo wakummalangilila ishaliya aijá ánkulupila Yesu.

²⁷ Napane shakwashi shakulota kulitamangila? Hapali! Kwaililamulo shani? Lilamulo lyashimadengo? Mene kanji kwalilamulo lyakukulupila. ²⁸ Mwaa wetu tunkwakikisha kenga munu ankuvalangiligwa ishaliya kwalikulupililo lyapukanánga na shimadengo shalilamulo. ²⁹ Kwali Nnungu jo ni wavayuda gweka? Da nae po hanava shinu momo Nnungu wavamidi? Elo, ni wavamidi momo ³⁰ pakuva Nnungu avelé jumo bai na kwalikulupililo tu, nae andavavalangilila ishaliya vakumulígwe na vákakumulígwe. ³¹ Da doni po tunkuputanga lilamulo kwaindila yalikulupililo? Ata padyoko vela! Kanji lyanavo lyo, tunkunonowanga.

Kwalikulupililo Abulaamu andivalangiligwa ishaliya

4 Napavedoni, tulota kutangola nyamani vyúkile ndaanalela Abulaamu nakulugwetu kwodananavo unalikota? ² Mwaa ikava kenga Abulaamu aukilé ndavalangiligwa ishaliya kwamwaa washimadengo, bai nae ankuvanavo shakulitamangila kanji i pamevo pake Nnungu. ³ Maandiko ankushidashi? "Abulaamu anínkulupila Nnungu na likulupililo lyolyo lyo vanim-malangilila nae kuva ishaliya." ⁴ Mwenu, aijá ákola madengo nshala haunavalangiligwa shinu kuva kenga inudyo kanji kenga aki yake. ⁵ Napane aijá ákakola madengo kanji ánkulupila aijá ámmalangilila ishaliya ákave Nnungu, bai likulupililo lyake vanim-malangilila kuva ishaliya. ⁶ Nimumo momo Daudi nanae anku-tangola yakwalaligwa kwamunu wammalangilila Nnungu ishaliya yapukanánga na shimadengo, ⁷ "Vandyalaligwa avalá vitendo vyave vyaungave-lilamulo vilivalivígwe, na avalá madambi ave aputangígwe.

⁸ Andyalaligwa aijá wakammalangilila *UMU* madambi ake." ‡†

⁹ Da kwalaligwa aku kunkuvaukila vakumulígwe gweka kwali namomo vákakumulígwe? Wetu tunkushidoni, likulupililo vanim-malangilila Abulaamu kuva ishaliya. ¹⁰ Napane vammalangilidilé dashi? Vammalangilidilé mukukulumulígwa kwali muungakumulígwa? I mukukulumulígwa kanji muungakumulígwa. ¹¹ Shiman-yikilo shakukulumulígwa kwake nae shivele kenga namakong'o waishaliya yalikulupililo muungakumulígwa pakulota dashi, nae ave tatamunu wauti avalá vakulupila muungakumulígwa kwambangidya navana-vo momo vavalangiligwa ishaliya ¹² na yadavo pakulota nae ave tatamunu wa avalá vakumulígwe i gweka vakumulígwe kanji namomo avalá vawéna mudyatuwa dyodyo dyalikulupililo limwe tatagwetu Abulaamu.

¹³ Mwaa hainava shinu kwaindila yalilamulo in-tadídye Abulaamu pamo na udukulu wake kupata kulivikila yakuva nae nkúpata-maleko ashilambo kanji kwaindila yaishaliya yalikulupililo. ¹⁴ Mwenu, ikava kenga vamulilamulo ni vakupata-maleko, bai likulupililo lyene lyo, halive mana na kulivikila kwene ko, kunditimbikanga. ¹⁵ Mwaa lyo lilamulo lyo, linkwidanavo

§ *Lola Kutunduvanga 15:6.* ‡† *Lola Dimu 32:1-2.*

shitundi kanji napane palikapagwite lilamulo, hakupali kupujungula.

¹⁶ Ni ashi shitádyá kulivikila kunanapele mulikulupililo pakulota kwodaneno umonyo kwambangidya dashi kuke bila kwambambidya muudukulu uti i gweka wamulilamulo kanji namomo aijá walikulupililo limwe Abulaamu, jo tatamunu wetu uti ¹⁷ kenga indyandikigwa, “Nangu ndikupangila wako uve tatamunu waimbumba yavenentete.” † Nae ni tatagwetu pamevo pake aijá wankulupidile, Nnungu ávapa shingumi vapidíle na átadya vipagwe víkapagwite.

¹⁸ Ata ikava kenga lilindilililo halipagwíte, mulilindilililo Abulaamu andíkulupila kenga andava tatamunu waimbumba yavenentete kwodananavo mwavamwaulidíle, “Amu ni mwaulatela kuvalela udukulu wako.” †¹⁹ Nae hadabadabéngé mulikulupililo paligwene mili wake kuwa ávenavo ulinga wavyaka kenga miya doni na pagwene kuwa kwalutumbo lumwe Shalaa. ²⁰ Kwakulivikila kwake Nnungu, nae hambambidyege nkati muungakulupila kanji andyuka ndalinanopya nkati mulikulupililo amupa Nnungu lishangelo ²¹ akulupila do, uti avilá vyalivikila Nnungu, vyovyvo vyo ankuulula kutandedya. ²² Ni ashi shitádyá vammalangilile kuva ishaliya.

²³ Mwenu, malove ala akummalangilila nae kuva ishaliya haandikigwe kwaupande wake nae gweka ²⁴ kanji ata kwaupande wetu wetu momo. Vandatavalangilila wetu túnkulupila aijá ándyuwidye pakati pavakupela, Yesu *UMU* wetu. ²⁵ Nae vaninkamudya kwamwaa wakupujungula kwetu na kundyuwa kwakutavalangilila ishaliya.

Amani namu Nnungu kwaindila imwe Yesu

⁵ Napavedoni pakuva tundivalangiligwa ishaliya kwalikulupililo, tunkuvanavo amani namu Nnungu kwaindila imwe *UMU* wetu Yesu Klistu. ² Kwaindila yake nae namomo wetu tundipata litala lyakwinjila kwalikulupililo muumonyo au watupagwa na tunkulitamangila mulilindilililo lyalishangelo lyake Nnungu. ³ I gweka avyo kanji tunkulitamanga momo nkati mu-mauvilo tumanya kenga mauvilo ankwidanavo kulipililila, ⁴ kulipililila kunkwidanavo umana kutwala umana kwidanavo lilindilililo. ⁵ Mwenu, lilindilililo halinatutaa dyoni pakuva linagwaledyo lyake Nnungu lindimiminiligwa mmitima vyetu kwaindila ya Imumu Wanashwe wavatupele.

⁶ Doni, wetu túdabadabenge avi, muwakati wowo wo, † Klistu andipela kwamwaa wa avalá vákave Nnungu. ⁷ Pandikamadyanga namene muni kupela kwamwaa wamunu waishaliya kwali inkuululika muni kujaa shingumi shake kwamwaa wamunu wambone ⁸ kanji Nnungu kwetu wetu andilodya linagwaledyo lyake jo mwene, doni, wetu túvele avi tuvakutega, Klistu andipela kwamwaa wetu wetu.

† *Lola Kutunduvanga 17:5.* †† *Lola Kutunduvanga 15:5.* ‡ *Kwali: a muwakati uvaikidile.*

⁹ Pakuva ambi apa napane tundivalangiligwa ishaliya kwaindila yamyadi vyake, kupunda namene kwaindila yake nae tundaambwalegwa mushitundi. ¹⁰ Mwaa ikava kenga wetu patuvéle tuvammongo vanditutadya twigwanie namu Nnungu kwaindila yakupela kwa Mwanagwe, kupunda namene patwigwenie apa, tundaambwalegwa kwaindila yashingumi shake. ¹¹ I gweka avyo, namomo tunkulitamangila Nnungu kwaindila imwe *UMU* wetu Yesu Klistu átutadidye ambi apa tuate kwigwana.

Kupela kwaindila yalidambi, shingumi ni inudyo

¹² Napavedoni, kulingana kenga mo mwaliinjilidile lidambi mushilambo shapai kwaindila yamunu jumo na kupela kwaindila yalidambi, napane momo kupela kwandavala kwavanu uti mwaa uti vanditega. ¹³ Doni, lilamulo likanava kupagwa, mwiu lidambi lindípagwa mushilambo shapai kanji halishivalangiligwa lidambi pálikapagwite lilamulo. ¹⁴ Kanji napane kupela kunditawala kutunduvangila kumwe Adamu mpaka Musha, ata kuvatawala avalá vátatagile kulingana na kupujungula kumwe Adamu e avéle inamuna imwe aijá álota kwida.

¹⁵ Kanji napanelo hakunapagwa shinu kulinganianga inudyo na kupujungula mwaa ikava kenga vanu voe vandipela kwaindila yakupujungula kwamunu jumo, kupunda namene umonyo wake Nnungu na inudyo yo kwaindila yaumonyo wamunu jumo Yesu Klistu, indikumukanga kwavanu voe. ¹⁶ Hayululika napane kulinganianga inudyo na ashilá shaalakadíle mulidambi lyamunu jumo mwaa ukumu yodananavo kupujungula kwamwanda umo indiidanavo kuukumigwa kanji inudyo yodananavo kupujungula kwamyanda vyeo indiidanavo kuvalangiligwa ishaliya.

¹⁷ Napanelo ikava kenga kwamwaa wakupujungula kwamunu jumo kupela kunditawala kwaindila yamunu ajo, kupunda namene avalá vapáta kuumbaligwa kwaumonyo na inudyo yaishaliya, vanavo vandatawala mushingumi kwaindila yamunu jumo, Yesu Klistu.

¹⁸ Nadoni nimumo momo kwaindila yakupujungula kwamwanda umo, kwavanu uti kundyumilila kuukumigwa, namomo kwaindila yashitendo shimo shaishaliya, kwavanu uti kundyumilila kuvalangiligwa ishaliya iidanavo shingumi. ¹⁹ Mwaa nimumo momo kwaindila yaungaigwilila wamunu jumo, voe vanditadya kuva vakutega, namomo kwaindila yakwigwilila kwamunu jumo, voe vandatadya kuvalangiligwa ishaliya.

²⁰ Mwenu, lilamulo lindida pakulota dashi, kupujungula kwanjadyeke. Napane po palyanjadyeke lidambi, umonyo undipakatika ²¹ kwambangidya kenga mo mwalitawalidile lidambi nkati mukupela, namomo umonyo utawale nkati mwishaliya iidanavo shingumi shíkamalilika kwaindila imwe Yesu Klistu *UMU* wetu.

Tundipela kwalidambi kunama mu Nnungu

6 Napanelo tuushidashi? Da tuke mushu tupagwa mulidambi kwambangidya umonyo wake Nnungu wanjadyeke? ² Ata padyoko vela! Wetu túpadike kwalidambi tulota kuka dashi mushu tunama nkati mulidambi? ³ Kwali hamunamanya shinu kenga uti túpatile ubatisho nkati mumwe Klistu Yesu, da hatupatile ubatisho nkati mukupela kwake? ⁴ Napavedoni wetu tundishikigwa pamo namu nae kwaindila yaubatisho utuukanavo kukupela kwambangidya kenga mo mwavandyuwididye Klistu pakati pavakupela kwaindila yalishangelo lya Tatamunu, nawetu momo tuname mushingumi shaambi.

⁵ Doni, ikava kenga wetu tundyungana namu nae mukupela kulinganána na kupela kwake, mwiu nawetu momo tundaungana namu nae mukudyuka kulinganána na kudyuka kwake ⁶ tumanya kenga umunu wetu wakala undipambiligwa pamo namu nae pakulota dashi, mili walidambi utimbikange kwambangidya hatunatandegwe kavili vatumwa validambi ⁷ mwaa aijá ápadile vanimmalangilila ishaliya vamuushidye mulidambi. ⁸ Napane ikava kenga tundipela pamo namu Klistu, tunkukulupila do, namu nae tundanama ⁹ tumanya kenga paukile ndadyuka Klistu pakati pavakupela, nae hapela kavili; kupela nae hakuntawala. ¹⁰ Mwaa kupela kwake nae, apadilé kwalidambi mwanda umo tu bai kanji shingumi shanama nae, anama kwa Nnungu. ¹¹ Nadoni namwenu momo livalangile kuva mmakupela kwalidambi kanji mmakunama kwa Nnungu nkati mumwe Klistu Yesu.

¹² Napavedoni hamunaleke lidambi lintawala mumili vyenu vipéla pakulota wo mili wo, hamunaigwilile ditamaa dyake. ¹³ Hamunajaule dimbande dyenu dyamili kwalidambi kenga vikalelo vyaungave-shaliya kanji lijaula kwa Nnungu kenga mmanu wavantwete mukupela kuka mushingumi na jaula dimbande dyenu kwa Nnungu kenga vikalelo vyaishaliya. ¹⁴ Mwenu, lidambi halintawala pakuva mwenu hamunatawaligwa shinu na lilamulo kanji munkutawaligwa na umonyo.

Wetu tuvatumwa vaishaliya

¹⁵ Napanelo shakwashi? Da tutege pakuva hatunatawaligwa shinu na lilamulo kanji tunkutawaligwa na umonyo? Ata padyoko vela! ¹⁶ Mwenu hamumanyite do, mukalijaula kwamunu kenga mmatumwa mmakwigwilila, mwiu mundava mmatumwa wamunu aju wamumwigwilila kwali kwalidambi liidanavo kupela kwali kwakwigwilila kwidanavo ishaliya. ¹⁷ Kanji napane lilambwalalelo live kwa Nnungu, mwemwe mwe muvéle mmatumwa validambi mudyuka ndaigwilila na mitima vyenu mpano wamapundisho alalá avankamudidye. ¹⁸ Mwenu mwambwalagwidye avi mulidambi, munditandegwa mmatumwa vaishaliya.

¹⁹ Ngutangola kenga nimunu kwamwaa wakudabadabanga kwenu kwashimunu. Kulingana kenga mo mwamujaulidile dimbande dyenu muushapu na

muungave-lilamulo vyuka kupunda ungave-lilamulo napane ambi jaula dimbande dyenu kenga vatumwa vaishaliya vauka kukwilimyanga. ²⁰ Doni, pamuvéle mmatumwa validambi, mwenu muvele muunaiti kwaishaliya. ²¹ Da mushipata vyepo shani wakati awo kwavinu vyamwanangila dyoni ambi apa? Mwaa kumwisho kwavinu avyo, kupela. ²² Kanji napane mwenu múukile ndaombolekwa mulidambi na kutandegwa mmatumwa vake Nnungu, vyepo vyamupata vyo vinkumuukanavo kukwilimyanga na kumwisho kwake ko, shingumi shíkamalilika. ²³ Mwaa nshala walidambi ni kupela kanji inudyo ya Nnungu ni shingumi shíkamalilika nkati mumwe Klistu Yesu *UMU* wetu.

Tuvelé muunaiti kwalilamulo

7 Kwali mmanung'unumunu hamumanyite do, ngutangola namu mwenu mmanu múmanyite shana lilamulo, da hamumanyite kenga lilamulo linkuntawala munu po panama mushingumi? ² Mwenu, nkongwe álambwidye andyuungwa nkati mulilamulo ntwagwe ávele mushingumi kanji ntwagwe akapela, nkongwe ajo avelé muunaiti kwalilamulo lyashitamo. ³ Nadoni ikava kenga nae andalombwa na nnume junji ntwagwe ávele mushingumi, andavalangiligwa kuva nkúlavalava. Kanji napane ntwagwe akapela, nae avelé muunaiti kwa alilá lilamulo. Nae akalombwa na nnume junji, havalangiligwa shinu kuva nkúlavalava.

⁴ Nimumo momo mmanung'unumunu mwenu momo mundipela kwalilamulo kwaindila yamili umwe Klistu pakulota dashi, muve mmanu mmamunu junji aijá ádyukile pakati pavakupela kwambangidya tupe vyepo kumwe Nnungu. ⁵ Mwaa patushinama mumavalelo etu ashimunumunu, ditamaa dyalidambi dikang'alegwa na lilamulo dishindakola madengo mudimbande dyetu dyamumili kwambangidya tupe vyepo vituúkanavo kukupela. ⁶ Kanji napane vandi-tumya mulilamulo túpadike kwa ashilá shíshitutenda kuva tuvatumwa pakulota tutumike kwainamuna yaambi ilangalalégwa na Imumu i kwainamuna yakala yalilamulo lyandikígwe.

Kutenda ing'ondo lidambi

⁷ Napane tuushidashi? Da lilamulo lyo, lidambi? Ata padyoko vela! Ila leka likapagwite lilamulo, hangunamanye lidambi ni nyamani. Mwenu, nangu hangunamanye nyamani kung'unuka leka lilamulo likatangwele doni, "Haunang'unuke!" ⁸ Napanelo lidambi likatakela litala kwaindila yalilamulo lindikang'ela nkati mwangu kula inamuna yalung'unuku mwaa palyapukananga na lilamulo, lyanavo livelé mukupela. ⁹ Nangu kala ngushinama ngwàpukanenge na lilamulo kanji palingwidilile lilamulo po, linditadya kudyuwangidya kavili lidambi kutwala nangu kupela. ¹⁰ Napanelo ndyuka ndona kenga lilamulo livikíke ling'e shingumi, lyo lyene linding'a kupela. ¹¹ Mwaa lidambi likatakela litala

† *Lola Kuma 20:17; Kumbukumbu 5:21.*

kwaindila yalilamulo, lininguduwanga na kwaindila yalilamulo, liningubya.

¹² Nadoni lilamulo ni lyakwilimyanga na shivéle mulilamulo ni shakwilimyanga, shaishaliya na shambone.

¹³ Napane, da shambone sho shindijalukanga kwangu nangu kuva kupela? Ata padyoko vela! Kanji lidambi pakulota lililodye kuva lidambi, kwaindila ya ashilá she shivéle shambone, lyanavo lindiidanavo kupela nkati mwangu kwambangidya kwaindila yalilamulo, lyanavo lililodye ngala kuva shinu shakutega kupunda apo.

¹⁴ Doni tundimanya kenga lilamulo lyàimumu ila nangu washimunumunu ngúshulushigwe mukutawaligwa na lidambi. ¹⁵ Hangunamanya shinu shangutenda mwaa ashilá shangulota, hangunatenda shinu kanji ashilá shanguvangedya, shosho ni shangutenda.

¹⁶ Napane ikava kenga ashilá shandikalota ninkutenda, bai ninkuungila nkono kenga lilamulo, lyambone.

¹⁷ Nadoni hangunava shinu nangu ngútenda kanji ni lidambi lipágwa nkati mwangu ¹⁸ mwaa ndimanya kenga hashipali shambone shipagwite nkati mwangu yani mushimunu shangu. Doni, ashilá shililódyá kuva shambone ninkulota ngutende kanji hangunaulula shinu kutenda ¹⁹ mwaa aulá wambone wangulota ngutende hangunatenda shinu kanji ukalau wandikalota ngutende ni au wangukanavo mushu ngutenda. ²⁰ Mwenu, ikava kenga shandikalota nangu ninkutenda, bai hangunava shinu nangu ngútenda kanji ni lidambi lipagwite nkati mwangu.

²¹ Bai ndyanalela lilamulo ali: pangulota ngutand-edye wambone, ukalau ngukadyedyanneu úvele pepi namu nangu. ²² Mwenu, nkati muntima mwangu ninkupuwangila lilamulo lyake Nnungu ²³ kanji mudimbande dyamumili mwangu ninkwona lilamulo linji litandána ing'ondo na alilá lilamulo lyamud-ing'anong'ano dyangu, lilamulo lyolyo lingutádyá nguve nintumwa walilamulo lyalidambi livéle mudimbande dyamumili mwangu. ²⁴ Ninkúva nangu mwenu! Nyani álota kunguposha na mili au wakupela? ²⁵ Napane lilambwalalelo lipagwe kumwe Nnungu kwaindila imwe *UMU* wetu Yesu Klistu. Nadoni nene nimwene kwading'anong'ano dyangu ninkutumika lilamulo lyake Nnungu kanji kwashimunumunu, ninkutumika lilamulo lyalidambi.

Kunama nkati mu Imumu

8 Napavedoni ambi apa hakupali kuukumigwa kwa avalá vavéle nkati mumwe Klistu Yesu ² mwaa nkati mumwe Klistu Yesu, lilamulo lya Imumu washingumi liningwambola mulilamulo lyalidambi na lyakupela. ³ Doni, ashilá shíkaulwile lilamulo kutand-edyá kwamwaa wakudabadabanga kwashimunumunu, Nnungu anditandedyá pantumididye Mwanagwe kwaing'ope yashimunumunu yalidambi na kwaupande walidambi, nae andyukumu lidambi mushimunumunu ⁴ kwambangidya ishaliya ilotéka mulilamulo iwikile popo kwetu wetu túnama i kwashimunumunu kanji kwa Imumu.

⁵ Mwenu, avalá vanáma kwodananavo shimunumunu, vananapela ding'anong'ano dyave muvinu vyashimunumunu kanji avalá vanáma kwodananavo Imumu, ding'anong'ano dyave vananapela muvinu vya Imumu ⁶ mwaa ding'anong'ano dyashimunumunu ni kupela napane ding'anong'ano dya Imumu ni shingumi na amani.

⁷ Doni, ding'anong'ano dyashimunumunu ni umongo kwake Nnungu mwaa hadinalivika shinu mwina mwake lilamulo lyake Nnungu na ata hadinaulula kutandedyá. ⁸ Avalá vapágwa mushimunumunu havaulula Nnungu jo, kunnagwela.

⁹ Mwenu napane hamupali mushimunumunu kanji muvelé mu Imumu ikava kenga mwiu Imumu wake Nnungu ankunama nkati mwenu. Mwenu, munu ákavenavo Imumu umwe Klistu, jojo jo hanava shinu umwe Klistu. ¹⁰ Napane ikava kenga Klistu ankupagwa nkati mwenu, kwaupande unji mili undipela kwamwaa walidambi kanji kwaupande unji Imumu ankwing'a shingumi kwamwaa waishaliya. ¹¹ Na ikava kenga Imumu umwe aijá ándyuwidye Yesu pakati pavakupela ankupagwa nkati mwenu, jo ándyuwidye Klistu pakati pavakupela andaing'a momo shingumi mili vyenu vyakupela kwaindila ya Imumu wake ápagwa nkati mwenu.

Tuvakupata-maleko namu Klistu

¹² Napavedoni mmanung'unumunu wetu tuvakudaigwa i kwashimunumunu pakulota tuname twodananavo shimunumunu ¹³ mwaa ikava kenga mwenu munkunama kwodananavo shimunumunu, mundapela kanji kwa Imumu mukatadya kupedya vitendo vyamili, mundanama. ¹⁴ Mwenu, uti avalá valangalalgwa kwa Imumu wake Nnungu ni vanavake Nnungu. ¹⁵ Doni, mwenu hamupatile imumu yautumwa muka kavili mukujopa kanji munimpata Imumu wamwanamunu; nkati mwake wetu tunkulila, "Aba, Atata." ¹⁶ Jo mwene Imumu ankumya ushuda kwaimumu yetu [†] kenga wetu ni tuvanavake Nnungu ¹⁷ na ikava kenga tuvanavake, bai ni tuvakupata-maleko, upande unji kumwe Nnungu na upande unji pamo namu Klistu ikava kenga mwiu tundáuvavanga namu nae pakulota lishangelo tupate pamo namu nae.

¹⁸ Mwenu, nangu ninkuvalangila kenga mauvilo átu-pata muwakati au watuvene, havaikidile kulinganianga na lishangelo lilóta kulilodya nkati mwetu. ¹⁹ Doni, shuumbígwe uti shinkulindila na mweshe kulilodya kwavanavake Nnungu. ²⁰ Mwaa shuumbígwe shindivikigwa mwina mambinya i kwamalotelo ake sho shene kanji kwamalotelo amwe aijá ávikile mwina, mukulindila ²¹ kenga ata sho shene shuumbígwe sho, shindaomboleghwa muutumwa wakupagwa mukunda shiinjala muunaiti walishangelo lyavanavake Nnungu.

²² Mwenu, tunkumanya doni uti shuumbígwe mpaka ambi shinkukuta pamo mumauvilo akushuluwa ²³ i

[†] *Kwali: a Jo mwene Imumu ankumya ushuda pamo na imumu yetu.*

gweka shanavo kanji nawetu momo túpatile vyepo vitandi vya Imumu, tunkukuta shintimatima tulindila na mweshe yakutandegwa kuva tuvanavake Nnungu, kwamboleghwa kwamili vyetu. ²⁴ Mwaa mulilindilililo ali wetu tundyamboleghwa. Kanji napane lilindilililo lyanéka, halinava shinu lilindilililo. Da nyani ávenavo lilindilililo kwashinu shaona? ²⁵ Napane pakuva tunkuvanavo lilindilililo lyashinu shatukona, tunkulindila na mweshe nkati muupole.

²⁶ Nimumo momo Imumu inkutupwashela nkati mukudabadabanga kwetu mwaa hatunamanya shinu shakwashi shakushwalidya kanji jo mwene Imumu ankutujugwila wetu kwakukuta kúkaululika kuvalanganga. ²⁷ Napane aijá álalyanga mitima, nae anku-manyanya ding'anong'ano dya Imumu pakuva Imumu ankuvajugwangila vakwilimyanga kwodananavo malotelo ake Nnungu.

²⁸ Tundimanya napane kwa avalá vannagwalédyá Nnungu ankuvatandela uti kwauwambone, vo vavashamile kwodananavo malotelo ake jo mwene. ²⁹ Mwaa avalá vavamanyite kaladavo, namomo andivapangila kaladavo pakulota dashi valinganane na ing'ope ya Mwanagwe kwambangidya nae ave ntandi kuvalekwa pakati pavanung'unumunu voe. ³⁰ Doni, avalá vavapangidile kaladavo, vovo vo andivashema na vo vavashamile vo, andivavalangilila ishaliya na vo vavavalangilidile ishaliya vo, nae andivapa lishangelo.

Hashipali shakutwapukanianga na linagwaledyo lyake Nnungu

³¹ Napane tuushidashi kwamwaa wavinu avi? Ikava kenga Nnungu ankupagwa upande wetu, nyani álota kutupinga? ³² Aijá ákammikidile shitete Mwanagwe kanji aninkamudya kwamwaa wetu uti, napane haulula kutupa vinu uti monyo pamo namu nae? ³³ Da nyani álota kuvakashalya vakutandaleghwa vake Nnungu? Ni jo mwene Nnungu ávavalangilila ishaliya. ³⁴ Nyani álota kuvaukumu? Klistu Yesu ni ápadile, leka apo ni ádyukile, ni áikele kunkanakono wake Nnungu namomo nae ni átujugwangila. ³⁵ Nyani álota kutwapukanianga na linagwaledyo limwe Klistu? Da ilota kuva tabu, kwali mauvilo, kwali kupapatigwa, kwali indala, kwali wou, kwali shijoidyo, kwali lyambila? ³⁶ Kenga indyandikigwa,

“Kwamwaa wako tunkubyaigwa shilo na mui; tunkuvalangiligwa kenga vangandolo vakuka ndavashinda.” †

³⁷ Kanji kwavinu avi uti tunkuva tuvakutema kupunda apo kwaindila imwe aijá átunagwaladidye. ³⁸ Mwaa ninkuvanavo wakika kenga i kupela, i shingumi, i vanjelo, i vakutawala, i vyaambi apa, i vilóta kwida, i lyululilo, ³⁹ i kushanya, i pai na ata kwali shiumbi shoeshoe shilóta kuulula kutwapukanianga na linagwaledyo lyake Nnungu lipagwíte nkati mumwe Klistu Yesu, *UMU* wetu.

Nnungu amwanangila shididi aijá wannota

⁹ Ninkutangola mwiu nkati mumwe Klistu hangunashang'apa shinu, makumbukililo angu amuntima aumya ushuda kwangu nangu nkati mu Imumu Wanashwe ² kenga ninkuvanavo shipalodi shikumene na mauvilo ákamalilika muntima mwangu. ³ Mwaa ndikandilota ata nene nimwene ngupate dilana na ngwapukanangenavo Klistu kwamwaa wavanung'unumunu vavele vakwetu kwashimunu. ⁴ Vanavo ni vanaishilaeli; vyavanavo ni kuva vanamunu, lishangelo, dimbodi, kupata kwalilamulo, kulipudya mwing'ande yake pamo na vyakulivikila. ⁵ Kwavanavo vanyakalamunu vave na kwashimunu ni kwálakadile aijá Klistu, aijá ávele pashanya pavinu uti, Nnungu átumbyangilika ngwengwe! Ame.

⁶ Kanji napanelo i do lilove lyake Nnungu lindikoweka mwaa i uti udukulu umwe Ishilaeli ni vanaishilaeli, ⁷ na ata i pakuva udukulu umwe Abulaamu vanavo uti vankuva vanavake kanji, “Kwaindila imwe Ishaki vandashameghwa kuva udukulu wako.” †⁸ Kwashitangodi shinji, i vana vashimunu ni vanavake Nnungu kanji ni vana vakulivikila vavalangiligwa muudukulu ⁹ mwaa lilove lyakulivikila ni ali, “Muwakati wowo au mwakaluno ndaida kavili na Shalaa andavanavo mwana nnume.” †¹⁰ I avi gweka kanji Labeka momo paimite shitumbo shavana vavili na nnume jumo, tatagwetu Ishaki, ¹¹ vana vo vakanava kuvalekwa na ata vakanava kutenda wambone kwali wakunyata, mwenu pakulota shabaa yake Nnungu yakutandola yuke mushu i kwamwaa washimadengo kanji kwamwaa umwe aijá áshema, ¹² nae vandímwaulila, “Nang'olo anantumika ndyoko.” †¹³ Kenga indyandikigwa, “Yakobo ninnagwaledya kanji ninnyatila Ishau.” †

¹⁴ Napane tuushidashi? Da Nnungu jo ni waungaveshaliya? Ata padyoko vela! ¹⁵ Mwaa nae animwaulila Musha doni, “Namwanangila shididi aijá waninnota nimwanangile shididi na nantanana aijá waninnota nintanane.” †¹⁶ Napavedoni, ashi shinkunanapela i kwa aijá álota kwali kwa aijá álikanyalidya kanji kwa aijá áanangila shididi, Nnungu. ¹⁷ Mwenu, Maandiko andimwaulila Palao, “Ni ashi shingutadidye ndikukwedye wako kwambangidya dashi nkati mwako ngulodye dimongo dyangu na pakulota livalangangigwe lina lyangu mushilambo uti.” †¹⁸ Napavedoni aijá wannota nae, ankumwanangila shididi na aijá wannota nae, ankunnanopya ntima.

¹⁹ Napane unangudya doni, “Mwaa shani Nnungu mpaka ambi ankutupa makosha? Da nyani álota kutaukanga malotelo ake?” ²⁰ Leka apo, wako umunu unyani wakutaukananga namu Nnungu? Da inkuululika ashilá shavaumbile kutwala kumwaulila aijá áumbile doni, “Mwaa shani unguumbile doni?” ²¹ Da nkúmba havenavo aki yaulongo, mulikamu lyolyo kumba shombo shaishima kwali shikave ishima?

†† *Lola Kutunduvanga* 21:12. ‡ *Lola Kutunduvanga* 18:10.

††† *Lola Kutunduvanga* 25:23. †††† *Lola Malakiya* 1:2, 3. ††††† *Lola Kuma* 33:19. †††††† *Lola Kuma* 9:16.

† *Lola Dimu* 44:22.

²² Napane ilota kuva dashi ikava kenga Nnungu palota kulilodya shitundi na palota dimongo dyake dimanyike andilipililila kwaupole kwa avilá vyombo vyamushitundi shake vyapanganienge kwambangidya dashi vibamalegwe ²³ pakulota uumbala walishangelo lyake umanyike kwavyombo avilá vyamushididi shake vyapanganienge kaladavo kwalishangelo, ²⁴ ata mpaka wetu momo túshamagwidye i gweka pakati pavayuda kanji namomo pakati pavamidi. ²⁵ Amu ni kenga mwatangaladile nkati mu Osheya:

“Avalá vákavele venentete vangu, ndavashema ‘venentete vangu,’

na aijá ákavele wakunagwaleka, nanshema ‘waku-nagwaleka’ ” †

²⁶ na “Apalá pavavaulidile doni, ‘Hamunava shinu mmenentete vangu,’

popo po, vandavashema ‘vanavake Nnungu mumi.’ ” ††

²⁷ Namomo Ishaiya ankutangola pashanya po kwamwaa wavanaishilaeli, “Ata ikava kenga shikonda shavanaishilaeli shinkuva kenga dimbwe dyamwimanga, vakwijalila tu ni valóta kwamboleghwa ²⁸ mwaa *UMU* andatandeya ukumu yake uti mushilambo kwabila kutimatimanga.” ²⁹ Kenga mwatangaladile Ishaiya kaladavo,

“Leka *UMU* Wavaing'ondo akatulakadile udukulu, doni túvele kenga Shodoma na túlinganene kenga Gomola.”

Vanaishilaeli havashoodedya kwalikulupililo

³⁰ Napane tuushidashi? Doni vamidi vákashiv-ingilidya kuvalangiligwa ishaliya vandipata kuvalangiligwa ishaliya, ishaliya yoyo yalakéla kwindila yalikulupililo ³¹ kanji vanaishilaeli vashoodedya lilamulo pakulota vavalangiligwe ishaliya, havapatile.

³² Mwaa wanyamani? Mwaa havashoodedya kwalikulupililo kanji vashoodedya kenga paikavéle kwashimadengo. Vanavo vandilikuvala mulijanga lyakulikuvala. ³³ Kenga mwatangalela Maandiko, “Mwenu, nangu ninkuvika pa Shiyau lijanga lyakulikuvala

lijanga lyo yakutaa shitundi;

aijá álota kukulupila, mwiko hatutala.” ††

10 Mmanung'unumunu, malotelo amuntima mwangu na kujugwa kwangu kwaninjugwa Nnungu ni kulota vanavo vaambwalegwe. ² Mwenu, nangu ninkumya ushuda kwavanavo kenga vanku-vanavo dukuduku kwa Nnungu kanji dukuduku yave hainava shinu yalimanyilo ³ mwaa vavele mukutikinanga ishaliya yake Nnungu na valambela vabuni ishaliya yavo vo vene havalivikile mwina mwaishaliya ailá ya Nnungu. ⁴ Doni, mwisho walilamulo ni Klistu kwambangidya ipagwe ishaliya kwa aijá uti ákulupila.

Lyambwalelo kwa aijá ámwang'ula Yesu kuva *UMU*

⁵ Mwenu, Musha ankwandika kwaing'ano yaishaliya yalakéla mulilamulo, “Munu átandeya vinu avi, andanama kwindila yavyanavo.” ⁶ Kanji ishaliya yalakéla mulikulupililo inkushidoni, “Haunatangole shintimatima, ‘Nyani álota kukwela kuwa?’ ” yani amwidenavo Klistu pai ⁷ kwali, “ ‘Nyani álota kushuluka kulitavaleva?’ ” yani amwidenavo Klistu pashanya ⁸ kanji inkushidashi? “Lilove linkupagwa pepi namu wako, linkupagwa nkanywa mwako na muntima mwako,” ⁹ †† yani lilove lyalikulupililo lyatuvalanganga. ⁹ Mwaa ikava kenga wako undaang'ula kwaikanywa yako kenga Yesu ni *UMU* na undakulupila kwantima wako kenga Nnungu anindywa pakati pavakupela, undaambwalegwa. ¹⁰ Doni, kwa wo ntima, munu anakulupila kutwala kupata ishaliya na kwa yo ikanywa, munu andaang'ula kutwala kwamboleghwa. ¹¹ Kenga mwatangalela Maandiko, “Aijá ánkulupila nae, hatutala.” ¹² Mwaa hakupali kuvilingananga pakati pavayuda na vamidi pakuva *UMU* jojo ni *UMU* wavanu uti avaaliya uti avalá vantambulanga nae ¹³ mwaa “uti aijá átambulanga lina limwe *UMU*, andaambwaleghwa.” ⁵

¹⁴ Napane valota kuntambulanga dashi aijá wá-vakankulupidile? Na valota kunkulupila dashi aijá wá-vakamwigwite vammalanganga? Na valota kwigwa dashi akapali munu ávavalangangidile? ¹⁵ Na valota kuvalanganga dashi vakatumigwidye? Kenga indyandikigwa, “Kwalala dashi madodo a avalá vavalanganga ntenga wavinu vyambone!” ¹⁶ Kanji i uti vaigwilila ntenga wambone mwaa Ishaiya ankushidoni, “ *UMU*, da nyani ákulupidile dyabali dyetu?” ¹⁷ Nadoni likulupililo linkwaloka mukwigwa na kwigwa kunkwalakela kwindila yalilove lyake Klistu. ¹⁸ Kanji nangu ninkudya, da vanavo havaigwite? Elo, vandigwa.

“Lidi lyave lindiigwinika mushilambo uti

na malove ave mpaka kumwisho shilambo.” ¹⁹ ††

¹⁹ Kanji kavili ninkudya, da vanaishilaeli havaigwite shana? Shitandi Musha atédoni,

“Nantadya muvavikile liloko avalá vákave venentete, venentete vákave limanyilo, nantadya muvavikile shitundi.” ²⁰ †

²⁰ Kutwala Ishaiya kwakulyalaveka ankushidoni,

“Vaningupata avalá vákangulambadile,

ndililodya kwa avalá vákashinguudyangidya.” ²¹ ††

²¹ Kanji kwamwaa wavanaishilaeli nae atédoni, “Maduva uti ndivanyaladyedya makono venentete vákai-gwilila na vakupinga.” ²¹ ††

† *Lola Osheya* 2:23. †† *Lola Osheya* 1:10. ‡ *Lola Ishaiya* 10:22-28. †† *Lola Ishaiya* 28:16.

‡† *Lola Valawi* 18:5; *Neemiya* 9:29; *Eshekieli* 20:11, 13, 21. ††† *Lola Kumbukumbu* 30:11-14. Nnungu pavapele lilamulo vanaishilaeli andivaulila kenga “Hamunatangole doni, ‘Nyani álota kukwela kwali kwamboka imanga kuka ndatwala lilamulo?’ ” *Shatangaladile davo mwaa nae andívapa lilamulo tayali. Apa Paulu ankutangola shinu shosho doni, kulingana kenga mo mwaumididye lilamulo Nnungu, apa andimumya Klistu.* ††† *Lola Ishaiya* 28:16. § *Lola Yowelí* 2:32. †† *Lola Ishaiya* 52:7; *Naumu* 1:15. ††† *Lola Dimu*

Da Nnungu ankuvaita venentete vake?

11 Napane ninkudya, da Nnungu jo andivaita venentete vake? Ata padyoko vela! Mwenu, ata nene nimwene ni mwanaishilaeli, wamuudukulu umwe Abulaamu, wamulikola limwe Benjameni. ² Nnungu havaitile venentete vake avalá vavamanyite kaladavo. Da mwenu hamumanyite mwatangalela Maandiko amwámba Liyashi mwanjugwidile Nnungu na dimongo kwamwaa wavanaishilaeli? ³ "UMU, vakulava vako vandivabyanga kutwala dyalutali dyako kutamanga, ngúbakidile ni gweka nangu na vankulambela vangumalidyé." ⁴ Da apatile lijibu shani lyakwalakela kuwa? "Ndilikandyedya vanu dyalupu saba vákanguguvaidile Baali." ⁵ Nadoni ata nelo momo muwakati au watupagwite, vapali vakwijalila vatan-dalagwidye kwaumonyo. ⁶ Napane ikava kenga ni kwaumonyo, hainava shinu kavili kwashimadengo, leka ive davo umonyo haunave kavili umonyo. ⁷ Napane nyamani? Vanaishilaeli, ashilá shavashilambela havapatile. Shindipatikana namu vakutandalegwa kanji vanji vo vandivananopya mitima ⁸ kenga indyandikigwa, "Nnungu andivapa imumu yakwidopa, mevo ákalola na matu ákaigwa mpaka muliduva lyanelo." [†] ⁹ Namomo Daudi atédoni, "Ndamu wave luve kwavanavo lutambo na lungau kwavanavo live liliva na shaushanga. ¹⁰ Mevo ave aputale pakulota havanalole na myongo vyave vipindane ngwengwe ngwengwe." ^{††}

Mmamidi hamunalitumbyange kanji jopa

¹¹ Napavedoni ninkudya, da vandilikuvala pakulota vajale? Ata padyoko vela! Leka apo, kwaindila yakupujungula kwave kwambolegwa kundivawikila vamidi kwambangidya ivatadye vanaishilaeli vavenavo liloko. ¹² Mwenu, ikava kenga kupujungula kwave kundidanavo mali kwashilambo na kukowa kwave kundidanavo mali kwavamidi, kushi kuumbaligwa kwave ko, akumamodya? ¹³ Napane ngutangola namu mwenu mmamidi. Doni, pakuva nangu ni myombe wavamidi ninkutumbudya utumika wangu ngwing'a lishangelo ¹⁴ pakulota dashi, kwadinamuna dyoedye nguvatadye liloko vakwetu kwambangidya ndivaambole vanji pakati pave. ¹⁵ Mwenu, ikava kenga kujaigwa kwave kundidanavo kwigwiania mushilambo, ilota kuva dashi kukubaligwa kwave paikava shingumi shuumíle mukupela? ¹⁶ Napane ikava kenga imbande itandi indiilimyanga bai namomo likamu uti lindiilimyanga na ikava kenga lushija lundiilimyanga bai dinavi momo.

^{19:4.} §‡ *Lola Kumbukumbu* 32:21. §‡† *Lola Ishaiya* 65:1.
^{§†} *Lola Ishaiya* 65:2. † *Lola Ishaiya* 29:10; *Kumbukumbu* 29:4.
^{††} *Lola Dimu* 69:22-23.

¹⁷ Kanji napane ikava kenga dinavi dinji vandipanyulanga na wako úvele ulivela wakunundu vandikunamatidya pakati pave kutwala kumajananga muululu walutuba walushija lwaulivela, ¹⁸ haunalyone kwadinavi adyo na ata ikapagwa yakulyona, manya doni, i mwenu mwángangalanga dinyija kanji ni dinyija dímwangangalanga mwenu. ¹⁹ Napane wako undaashidoni, "Dinavi vandipanyulanga kwambangidya nangu vangunamatidye." ²⁰ Mwiu. Dyanavo vandipanyulanga kwamwaa waungakulupila wave, napane wako unkupagwa kwaindila yalikulupililo. Nadoni haunalitumbyange kanji jopa. ²¹ Mwaa ikava kenga Nnungu havikidile shitete dinavi dyene-dyene nawako momo hakuvikila shitete.

²² Napavedoni, lola litananilo na ukali wake Nnungu: ukali kwa avalá vagwile na litananilo lyake Nnungu kwako wako ikava kenga undauka mushu mulitananilo lyake; ikanavadavo, nawako momo vandakulumula. ²³ Na ata vanavo vakanauka mushu muungakulupila wave, vandanamatiligwa mwaa Nnungu ankuulula kuvanamatiidya kavili. ²⁴ Doni, ikava kenga wako undilumulgwa muulivela kwashivalakwelo wakunundu kutwala kuka ndanamatiidya muulivela wamulishamba uvilinganiánga shivalakwelo, kushi adilá dinavi dyashivalakwelo hadimamodya kunamatiligwa kavili munnandi wave vo vene?

Shipii shakwambolegwa kwavanaishilaeli

²⁵ Mmanung'unumunu hangunalota shinu mutikinance shipii shangulota kutangola kwambangidya hamunave mmanu mmakulyona: kunanopa kwantima kúkwakidile popo kundivawikila vanaishilaeli mpaka kuumbaligwa kwavamidi kuwikile popo. ²⁶ Nimumo momo vanaishilaeli uti vandaambolegwa kenga indyandikigwa, "Ku Shiyau andaalakela Nkúposha nae andaushanianga ungave-Nnungu munayakobo." [‡] ²⁷ "Ai ni imbodi yangu kwavanavo pangulota kuvaushanianga madambi ave." ^{‡†} ²⁸ Kwaupande wantenga wambone, vanavo ni vamongo kwamwaa wenu mwenu kanji kwaupande wakutandalegwa, vanavo ni vakunagwaleka kwamwaa wavanyakalamunu. ²⁹ Mwaa dinudyo na kushema kumwe Nnungu, hakunaputangigwa. ³⁰ Nimumo momo kenga mwenu kala hamushimwigwilila Nnungu kanji ambi mupatilé kwanangiligwa shididi kwaindila yaungaigwilila wave ³¹ namomo vanavo vankuva vákaigwilila pakulota kwaindila yashididi shavannadidyé mwenu navanavo vapate kwanangiligwa shididi. ³² Mwaa Nnungu andipangila uti kwaungaigwilila pakulota uti avaanangile shididi.

[‡] *Lola Ishaiya* 59:20-21. ^{‡†} *Lola Ishaiya* 27:9; *Yelemiya* 31:33-34.

Litumbyangilidyo

³³ Aa, umbala ukumene wamali, limanyilo na umanyi-manyi wake Nnungu! Kukamadyanga dashi kukodyakodya wamushi wake na kukamadyanga dashi kumanya dindila dyake!

³⁴ Mwenu, "Nyani ámanyite ding'anong'ano dyake *UMU*?

Kwali nyani áukile ndava nkúdumangila wake?" †

³⁵ "Nyani ntandi ámpéle shinu, pakulota ling'oto nae annipe?" ††

³⁶ Mwaa kutunduvangila kwake nae, kwaindila yake nae na kwaupande wake nae vinkupagwa vinu uti. Lipagwe lishangelo kwake nae ngwengwe. Ame.

Shadaka shingumi shinnagwéla Nnungu

12 Napavedoni mmanung'unumunu, ninkun-naililila kwashididi shake Nnungu lyumye mili vyenu kumwe Nnungu kenga shadaka shingumi, shak-wilimyanga na shinnagwéla Nnungu; aku ni kulipudya kwenu kwaimumu. †² Hamunalilinganiange na shi-namidyo shawakati au kanji mubadilike kwaindila yakunonowangigwa muding'anong'ano dyenu kwambangidya mutende nningo mwanalela akwashi malotelo ake Nnungu, ambone, akunagwaleka na ashalowa-uti.

³ Mwenu, kwaumonyo wangupatile ninkumwaulila kula munu pakati penu hanalikumbukile jo mwene kupunda amulá muvaikidile alikumbukilile kanji nae alikumbukile kwabila kupundanianga kulingananana-vo shipimo shalikulupililo shanjavidile Nnungu kula munu. ⁴ Doni, kenga mumili umo tunkuvanavo dim-bande dyoe na dimbande uti hadivenavo shimadengo shimo, ⁵ nawetu momo ata ikava kenga tuvelé tuvoe, tunkuva mili umo nkati mumwe Klistu na kula munu pakati petu tunkuva dimbande dyunganéngé. ⁶ Paku-va tunkuvanavo vyajo vyakuvilingananga kwodanana-vo umonyo watuukile ndapata, shikapagwa shakulavi-la, shindivaikila shitumike kwodananavo imbande yake yalikulupililo, ⁷ kwali shakutumika, shitumike mukutumika kwali shakupundisha, mukupundisha, ⁸ kwali shakwing'a ntima shii, mukwing'a ntima shii, †† kwali shakujaula, kwantima, kwali shakulangalalela, kwaidukuduku, kwali shakulodya shididi, kwalipuwilo.

Shinamidyo shankwóda wiu

⁹ Linagwaledyo live líkave shinankulaba. Vangedya ashilá shakunyata na kamulila ashilá shambone.

¹⁰ Nagwaladyania namene kwalinagwaledyo lyashin-ung'unumunu muuvanavo dukuduku yakwishimana.

¹¹ Mwidukuduku, hamunadidimange. Mu Imumu, jaulila. *UMU*, ntumike. ¹² Mulilindilililo, puwanga. Mu-mauvilo, lipililile. Mukushwali, nanopá. ¹³ Kwa avilá

† *Lola Ishaiya 40:13; Jobi 15:8.* †† *Lola Jobi 41:11.* ‡ *Kwali: a ...ni kulipudya kwenu kwiu.* †† *Kwali: a ...shakulaililila, muku-laililila.*

vivóva vakwilimyanga, shangila. Kuvapwashalela va-jeni, lambela.

¹⁴ Vaalaliye avalá vampapáta, vaalaliye na hamuna-vatae dilana. ¹⁵ Puwanga namu avalá vapuwánga, lila namu avalá valíla. ¹⁶ Kumbukilanila mumo momo. Hamunalyone kanji ava tayali kulyunganianga namu avalá vailudyangíka. Hamunalyone mwemwe mmene kuva mmalimanyilo.

¹⁷ Hamunalipe wakunyata kwawakunyata. Lambela kutandedya wambone pamevo pavanu uti. ¹⁸ Ikaululika na kwaupande wenu mwenu, nama kwaamani na vanu uti. ¹⁹ Mmakunagwaleka, mwiko hamunalipilile kanji kulipilila lakela shitundi shake Nnungu mwaa in-dyandikigwa, "Kulipilila ni kwangu nangu; nangu ndalipilila, atangola *UMU*." ††²⁰ Leka apo, "Mmongo wako akavanavo indala, mupe shakulya; ikankola iny-ota, mupe shakukumbila. Pautenda davo po, un-kumpalila makala pamuti pake." †††

²¹ Hamunaleke wakunyata untema kanji tema wakunyata kwauwambone.

Kulivika mwina mwavamadalaka

13 Kula munu alivike mwina mwavamadalaka avalá vatawála mwaa hapali madalaka apagwíte ákaalakadile kumwe Nnungu na madalaka uti apag-wíte, apangiké namu Nnungu. ² Napavedoni aijá ápin-ga madalaka, ankupinga ashilá shavikile Nnungu na aijá átenda davo andaukumigwa. ³ Mwenu, vakutawala havanajaweka kwamunu átenda wambone kanji vajaweka kwamunu átenda vyakunyata. Wako unkulota haunanjope aijá wamadala? Bai tandedya wambone na undapata shimbili kwake. ⁴ Doni, nae ni ntumika wake Nnungu kwauwambone wako wako. Kanji ikava kenga wako undatenda wakunyata, jopa mwaa nae hananyukata lyambila monyo. Nae ni ntu-mika wake Nnungu, munu nkúlipilila áidanavo shitun-di shake Nnungu kwa aijá átandedya vyakunyata. ⁵ Na-pavedoni tulivike mwina i gweka kwamwaa washitundi kanji namomo kwamwaa wamakumbukililo amunti-ma.

⁶ Ni ashi shitádyá mwenu momo mulipe ukodi mwaa vamadala ni vatumika vake Nnungu pakulota vaan-gaikangile ngwengwe shimadengo ashi. ⁷ Napavedoni, vape vanu uti ashilá shivavaikidile: waukodi mupe uko-di, wanshango mupe nshango, ávaikidile kujaweka ajaweke na ávaikidile apate ishima, mupe ishima.

Linagwaledyo ni kutandedya kwalilamulo

⁸ Hamunavenavo lideni na munu woewoe ila lideni lyenu live kunagwaladyania mwaa aijá ánnagwaledya junji, ankutandedya lilamulo. ⁹ Mwaa malamulo ala, "Haunalavalave," "Haunabyae," "Haunaive," "Hau-nang'unuke," ††† kwali likapagwa linji lyoelyoe, vandi-ipyanga mulilove limo, "Nnagwaledye nshi-tanomwavo kenga wako umwene." †††¹⁰ Linagwaledyo

†† *Lola Kumbukumbu 32:35.* ††† *Lola Mikong'o 25:21-22.*

††† *Lola Kuma 20:13-17; Kumbukumbu 5:17-21.* § *Lola Valawi 19:18.*

halinantenda kunyata nshitanonomwavo. Napavedoni linagwaledyo ni kutandedya kwalilamulo.

¹¹ Tandedya vinu avi umanya wakati au do, isaa yaku-takatuka wako mulwono indiwika mwaa kwambole-gwa kwetu kuvelé pepi namene kupunda wakati aulá watuukile ndakulupila kunantandi. ¹² Shilo shindipita, mui undiwika. Napavedoni tulakele kunyenje ko viten-do vyakushii tutwale tugwalange dyuti dyalilangadyo. ¹³ Tuname muvaikidíle kenga tuvanu túwena mui, i nkati mukululuka na kwambalwa, i nkati mukulauka na ushapu, i nkati mumagombi na ing'ou. ¹⁴ Leka apo, ngwale *UMU* Yesu Klistu na hamunaing'e litala lyashimunumunu lyakulota kutandedya malotelo ake.

Hamunaukumane

14 Mwenu, aijá wakudabadabanga mulikulupililo mpwashalele kanji i kwakulota kutaukanan-ganavo kwamwaa wamaoni. ² Junji ankukulupila kenga vinu uti vinkuululika kulyeka kanji junji wakudabada-banga, hanamamena inyama. ³ Aijá álya vinu uti hanamwiludyange aijá ákalya na aijá ákalya, hana-muukumu aijá álya mwaa Nnungu animpwashalela. ⁴ Da wako unyani wakumuukumu ntumika wamunu junji? Avi amanya jo mwene nang'olo wake ikava ken-ga andaimila kwali andagwa. Nae andaimila mwaa *UMU* ankuulula kuntadya aimile.

⁵ Apali ávalangilila liduva kuliko liduva linji, junji ku-valangilila maduva uti mumo momo. Kula munu ali-ikiniye muding'anong'ano dyake. ⁶ Aijá ávalangilila liduva limo, avalangilila kumwe *UMU*. Aijá álya uti, alya kumwe *UMU* mwaa ankunnambwalela Nnungu na aijá ákalya, hanalya momo kwamwaa umwe *UMU* na ankunnambwalela Nnungu momo. ⁷ Mwaa hapali munu woewoe pakati petu ánama yake jo mwene na hapali ápela yake jo mwene. ⁸ Kwali ikava kenga tunkunama, tunkunama kumwe *UMU* kwali ikava ken-ga tunkupela, tunkupela kumwe *UMU*. Nadoni ata tukanama kwali tukapela, tívake jo mwene *UMU*. ⁹ Kwaing'ano ai, Klistu andipela na andidyuka kwambangidya dashi, nae ave *UMU* ata ikava kwavaku-pela kwali kwavangumi.

¹⁰ Napane mwaa shani wako unkumuukumu nung'unumunu? Kwali mwaa shani unkumwiludyanga nung'unumunu? Mwenu, uti wetu tundapagwa pal-ibengi lyake Nnungu ¹¹ kenga indyandikigwa, "Nangu nimumi, atangola *UMU*,

Kula lilundi linangushidikila

na kula lulimi lundaang'ula kwa Nnungu." †

¹² Nadoni kula munu pakati petu andaitikanga jo mwene kumwe Nnungu.

Hauantadye nung'unumunu kulikuvala

¹³ Napavedoni tuleke kuvaukumu vanu vanji kanji le-ka apo, mwenu amuwa mene kummikila nung'unumunu shakulikuvala kwali kunteya ntego.

¹⁴ Nangu ndimanya na ninkuvanavo wakika nkati

† *Lola Ishaiya 45:23.*

mumwe *UMU* Yesu doni, hashipali shakulya shiliténda sho shene kuva shishapu paikavele aijá ávalangila ku-va shishapu kwake nae ko, shishapu. ¹⁵ Mwenu, ikava kenga unantaa shinyadinyadi nung'unumunu kwamwaa wa ashilá sháulya, bai shinamidyo shako hashinalangalalegwa shinu na linagwaledyo. Kwamwaa washakulya shako, haunambamole nung'unumunu wampalalele Klistu. ¹⁶ Ashilá sham-bone kwenu, hamunavaleke vanu vanniulila. ¹⁷ Mwaa utawala wa Nnungu haunava shinu shakulya kwali ug-walwa kanji ishaliya, amani na lipuwilo nkati mu Imu-mu Wanashwe. ¹⁸ Aijá ántumika doni Klistu, anánag-waleka namu Nnungu na kukubaligwa kwavanu.

¹⁹ Napavedoni tvingilidye ashilá shiidanavo amani na shitutádyá tudangane. ²⁰ Haunabamole shimaden-go shake Nnungu kwamwaa washakulya. Kwaupande unji kula shakulya hashive ushapu kanji kwaupande unji inkunyata munu akantadya junji kulikuvala kwa ashilá shálya. ²¹ Ni shambone kudyanga mene kuma-mena inyama kwali kukumbila ugwalwa na ata kuten-da shoeshoe shilóta kuntadya nung'unumunu aliku-vale.

²² Likulupililo lyauvenavo lyo avanavo gwegwe umwene pamevo pake Nnungu. Andyalaligwa aijá áka-lyukumu kwa ashilá shaungila nkono. ²³ Kanji aijá áam-bambidya, andaukumigwa ikava kenga andalya mwaa kulya kwake ko, hakunaalakela shinu mulikulupililo na uti ashilá shíkaalakela mulikulupililo ni lidambi.

Indivaikila tuvanonowange vanji

15 Napanelo wetu tuvakananopa po indituvaikila tulupililile kudabadabanga kwa avalá vákanaanopa na i pakulota itunagwele wewe tuvene. ² Kula munu pakati petu antadye nshitanonomwagwe innagwele kwauwambone wake jo mwene pakulota annonowange. ³ Mwaa ata Klistu halinnagwaladidye jo mwene kanji kenga indyandikigwa, "Kutukana kwa avalá vantukána mwenu, kuningugwilila nangu." ††

⁴ Mwenu, uti avilá vyandikígwe kunantandi, vin-dyandikigwa pakulota vitupundishe kwambangidya dashi kwaindila yakulupililila na yakupambadyangigwa kwamaandiko tuvenavo lilindilililo. ⁵ Napane Nnungu jo áing'a kulupililila na kupambadyanga, antadye mukumbukile shinu shosho pakati penu kwodananavo amulá mumwe Klistu Yesu ⁶ kwambangidya kwantima umo na lidi limo, mumupe lishangelo Nnungu umwe *UMU* wetu Yesu Klistu jo Tatamunu wake nae. ⁷ Nadoni kalibishania kenga Klistu mwenu aninkalibisha, tenda davo po kwalishangelo lyake Nnungu.

Klistu ni lilindilililo lyavayuda na vamidi

⁸ Mwenu, nangu ninkumwaulila doni, Klistu andili-tenda kuva ntumika wa avalá vakumulígwe likumbi kwamwaa waumwui wake Nnungu pakulota atand-edye kulivikila kwavanyakalamunu ⁹ kwambangidya

†† *Lola Dimu 69:9.*

vamidi vamupe lishangelo Nnungu kwamwaa washidi-di shake kenga indyandikigwa,

“Napavedoni nangu ndakutumbyanga pakati pavamidi,

ndaimba ngutumbyanga lina lyako.” †

¹⁰ Kutwala kavili kushidoni,

“Puwanga mmamidi pamo na venentete vake.” ††

¹¹ Kavili doni,

“Ntumbyange *UMU*, uti mwenu mmamidi, indivaikila venentete uti vantumbyange.” ‡

¹² Kutwala Ishaiya nanae ankushidoni,

“Lundapandukanga lushija kumwe Yeshe, lwanavo lundatakutuka kuvatawala vamidi, kwalwanavo, vamidi vandavika lilindilililo lyave.” ††

¹³ Napane Nnungu walilindilililo amuumbadye lipuwilo uti pamo na amani nkati mukukulupila pakulota kwaindila yadimongo dya Imumu Wanashwe, muumbaligwe na lilindilililo.

Utumika umwe Paulu kwavamidi

¹⁴ Mmanung'unumunu nangu nimwene ninkuvanavo wakika kenga mwenu mundyumbaligwa na wambone mumbaligwidye na limanyilo uti muulula kupundishania shivanavene. ¹⁵ Kanji napane mumyaa vinji nimwandikila pandikajugulanga shinu pakulota ninkumbuwanage. Nditenda davo kwamwaa wau-monyo wangupele Nnungu ¹⁶ wakuva nintumika umwe Yesu Klistu kwavamidi mukutumika ntenga wambone wa Nnungu muunashilangola wakupalakedya shadaka kwambangidya vamidi vatandegwe kuva shadaka shinnagwéla Nnungu, † shadaka shi-tandégwe kuva shakwilimiyanga kwa Imumu Wanashwe.

¹⁷ Napavedoni nkati mumwe Klistu Yesu, nangu ninkulitamangila kwa avilá vivéle kwa Nnungu.

¹⁸ Mwenu, hangunalyalaveka shinu kutangola shoeshoe pashikava ashilá shatandile Klistu Yesu kwaindila yangu yakuvaidanavo vamidi mukwigwilila; kwalilove na kwashimadengo, ¹⁹ kwadimongo dyavimanyikilo na vyakutikinikanga, kwadimongo dya Imumu wa Nnungu. Nadoni kwangu nangu apa, kutunduvangila pa Yelusalemu na indila uti mpaka ku Ililiku ndivalanganga ngala ntenga wambone umwe Klistu.

²⁰ Doni, shabaa yangu ni kuvalanganga ntenga wambone apalá pavakanava kwigwa lina limwe Klistu kwambangidya dashi, hangunadenge pashanya shi-tunduvangilo shamunu junji ²¹ kenga indyandikigwa, “Avalá vákaigwite vammalanganga, vandamwona na avalá vákamwigwite, vanammanya.” †††

Nnugu umwe Paulu wakuka ku Loma

²² Ni ashi shíshingudingadinga pakulota hangunaide kwenu. ²³ Kanji pakuva hanguvenavo lyutu kavili mudisemu adi lyakukola madengo na kwoda myaka vyoe

† *Lola II Samuwele 22:50; Dimu 18:49.* †† *Lola Kumbukumbu 32:43.* ‡ *Lola Dimu 117:1.* †† *Lola Ishaiya 11:1, 10.* †† *Kwali: a ...kwambangidya shadaka shavamidi shikubaligwe.* ††† *Lola Ishaiya 52:15.*

nguvanavo lilotelo lyakwida nannola, ²⁴ pangutwala mwanda kuka ku Eshipanya ngupita ako, ninkulindila kunnola na mwenu mungupwashele mushimwanda shangu shakwanavo ling'oto lyakupuwanga padyoko namu mwenu. ²⁵ Ambi napane ninkuma kuka ndavatumika vakwilimiyanga ku Yelusalemu. ²⁶ Mwaa ku Makedoniya na ku Akaya indivanagwela kutenda nshango kwamwaa wavakave pashinu pakati pavakwilimiyanga va ku Yelusalemu. ²⁷ Indivanagwela kutenda davo na kwaumwii vanavo ni vakudaigwa kwaupande wave. Mwaa ikava kenga vamidi vandiliinjidyanga muvinu vyaimumu vyave, indivavaikila momo vavatumike mu-shipato shave. ²⁸ Nadoni pangulota kumalila shimadengo asho na kuvakamudya aulá nshango utandéke kwamwaa wavanavo, ndapita ninnola mwenu nguka ku Eshipanya. ²⁹ Ninkumanya kenga pangulota kwida kwenu ndaida nguumbaligwidye kwalaligwa kumwe Klistu.

³⁰ Ninkunnaililila mmanung'unumunu kwaindila imwe *UMU* wetu Yesu Klistu na kwalinagwaledyo Iya Imumu doni, ling'e dimongo namu nangu mukushwali munjugwa Nnungu kwamwaa wangu ³¹ pakulota dashi, nangu nguposhegwe kwa avalá vákaigwilila vavéle ku Yudeya na pakulota utumika wangu ku Yelusalemu witikilike na vakwilimiyanga ³² kwambangidya Nnungu akalota, ngwide ninnole na lipuwilo ngutwale ngupagwe namu mwenu ngupumula. ³³ Nnungu waamani apagwe namu mwenu uti. Ame.

Nandele waugweka

16 Ninkuntumbyangidya kwenu mwenu numbumunu Pebe ntumika waliganisha Iya ku Kenkeleya ² pakulota mumpwashalele nkati mumwe *UMU* kenga muvaikidile kwavakwilimiyanga, namomo mpwashele muvyoeyoye vyalota kulota kwenu mwaa nae ankuvapwashalela vanu voe na ata nangu momo.

³ Mupe nandele Pilishila pamo namu Akila vamadengomwangu nkati mumwe Klistu Yesu. ⁴ Vanavo vandilimiyanga shingumi shave kwamwaa washingumi shangu; avyo navalambwalela shinu nangu gweka kanji na liganisha uti lyavamidi momo. ⁵ Nandele lipate momo liganisha likadyania paing'ande yave. Mupe nandele Epenetu wakunagwaleka wangu shepo shi-tandi kumwe Klistu ku Ashiya. ⁶ Mupe nandele Maliya ákadile namene madengo kwamwaa wenu. ⁷ Mupe nandele Andoloniku pamo namu Yuniya vakwetu na vavangu nkati mukungwa, vanu vamanyaike namene pakati pavamyombe na vanavo vatandi kupagwa nkati mumwe Klistu nangu nikanava. ⁸ Mupe nandele Ampiliyatu wakunagwaleka wangu nkati mumwe *UMU*. ⁹ Mupe nandele Ulubanu mmádengomwetu nkati mumwe Klistu, namomo wakunagwaleka wangu Eshitakiyashi. ¹⁰ Mupe nandele Apeleshi munu ákubaligwidye nkati mumwe Klistu. Vape nandele valikola limwe Alishitobulu. ¹¹ Mupe nandele nkawetu Elodiyau. Vape nandele valikola limwe Nalishishu vavéle nkati mumwe *UMU*. ¹² Mupe nandele Tilipena namu Tili-

posha vakongwe vankaléla *UMU* madengo. Mupe nandele wakunagwaleka Pelishide ákadile namene madengo nkati mumwe Klistu. ¹³ Mupe nandele Lupu nkútandalegwa nkati mumwe *UMU* pamo na anyoke àvele yadavo jujumunu wangu. ¹⁴ Mupe nandele Ashinkilitu, Pilegonte, Elimeshi, Patolobashi, Elimashi pamo namu vanung'unumunu vavéle pamo namu vanavo. ¹⁵ Mupe nandele Pilologu namu Yuliya, Neleu pamo na nkulugwe, Olipashi pamo na uti vakwilimyanaga vapagwíte namu vanavo. ¹⁶ Udyanianga kwashimanyikilo shalinagwaledyo. Maganisha uti amwe Klistu ankumuudyanga.

Malailililo amwisho

¹⁷ Ninkunnaililila mmanung'unumunu pakulota mulishunge kwa avalá váidanavo kujavanikana na kuvika ligogo mapundisho amulipundishidye mwenu. Vaambukange vanu avo! ¹⁸ Mwaa vanu kenga ava havanan-tumika shinu Klistu *UMU* wetu kanji vatumika vitumbo vyave. Kwamalove ave akuutila na lutumbyango, vankuduwanga mitima vyavanu vákajavanianga. ¹⁹ Doni, ing'ano yakwigwilila kwenu indiwika kwavanu uti, nadoni nangu ninkupuwanga kwamwaa wenu kanji napane shangulota nangu mwenu muve mmalimanyilo kwa ashilá shambone na muve múkave makosha kwa ashilá shakunyata. ²⁰ Nnungu waamani

anankandinneu Shatwani ambi apa mmadodo mwenu. Umonyó umwe *UMU* wetu Yesu upagwe namu mwenu.

²¹ Timoti mmádengomwangu ankuntumidya nandele, namomo Lushiu, Yashoni namu Shoshipatulu valikola lyangu. ²² Nangu Telishiu ngwándike ibalugwa ai ninkuntumidya nandele nkati mumwe *UMU*. ²³ Gayu mwene ing'ande yangupagwa na palikadyanianga lig-anisha, ankuntumidya nandele, namomo Elashitu nkondya-njuluku wapanjini au pamo namu nung'unumunu Kwatulu. ²⁴ †

Litumbyangilidyo

²⁵ Napane kwa aijá áulula kunnonowanga mwenu kwodananavo ntenga wambone wangu na kummalan-ganga kumwe Yesu Klistu kulingananavo kulilodya kwashipii she shilipiídye muwakati úkamalilika ²⁶ kanji napane, shindyunukuligwa na kwaindila yamaandiko akulava shindimanyika kwavenentete uti kwodananavo lilamulo lyake Nnungu ákamalilika pakulota kupagwe kwigwilila kwalikulupililo; ²⁷ kwake Nnungu jumo walimanyilo apate lishangelo ngwengwe kwaindila imwe Yesu Klistu. Ame.

† *Maandiko anji aatíke vandyanjedya malove ala: a Umonyó umweUmu a wetu Yesu Klistu upagwe na mwenu uti. Ame.*

I Vakolintu

Nandele

1 Paulu áshamagwídye kwalilotelo lyake Nnungu kuva myombe umwe Yesu Klistu pamo namu nung'unumunu Shoshiteni. ² Kwaliganisha lyake Nnungu lipágwa ako ku Kolintu, kwa avalá vatandagwídye kuva vakwilimyanga nkati mumwe Klistu Yesu na vashamagwídye vave vakwilimyanga pamo namu avalá mudisemu uti vatambulánga lina limwe *UMU* wetu Yesu Klistu, *UMU* wave na wetu.

³ Umonyó upagwe kwenu mwenu na amani yakwalakela kumwe Nnungu Tatagwetu na kumwe *UMU* Yesu Klistu.

Lilambwalelo

⁴ Ngwengwe ninkunnambwalela Nnungu wangu kwamwaa wenu mwenu kwaumonyo wake nae wampele nkati mumwe Klistu Yesu. ⁵ Ni ashi shuukíle ndatadya nkati mwake nae, mwenu muumbaligwe muvinu uti, nkati mulilove na nkati mulimanyilo ⁶ kwo-da ushuda umwe Klistu undyuka ndaanakana pakati penu. ⁷ Nadoni mwenu hashipali shajo sha Imumu shimwóva pamupagwa mukulindila kulilodya kumwe *UMU* wetu Yesu Klistu. ⁸ Nae anannonowanga mwenu mpaka kumwisho pamukaaneka makosha muliduva alilá limwe *UMU* wetu Yesu Klistu. ⁹ Nnungu ni wakukulupilika, kwake nae mwenu mundishamegwa muke mukapagwe muupamo wa Mwanagwe, Yesu Klistu *UMU* wetu.

Kujavanikana muliganisha

¹⁰ Mmanung'unumunu, palina limwe *UMU* Yesu Klistu ninkunnaililila mwenu uti mwigwane na hakunapagwe kwapukananga pakati penu kanji ava mmakuungana nkati muding'anong'ano dimo dyodyo na mumakumbukililo amo lolo. ¹¹ Mwenu, nangu ndipata dyabali dyenu mwenu mmanung'unumunu kwalakela kwavakolowe kenga kunkupagwa kutaukananga pakati penu. ¹² Ninkutangola doni mwaa kula munu pakati penu ankushidoni, "Nangu umwe Paulu," kwali "Nangu napane umwe Apolu," kwali "Nangu napane umwe Kepashi," † kwali "Nangu napane umwe Klistu."

¹³ Da Klistu jo andijavanikana? Da ni Paulu áukile ndakamalalegwa panshalaba kwamwaa wenu mwenu? Da mwenu mupatilé ubatisho palina limwe Paulu? ¹⁴ Ninkunnambwalela Nnungu mwaa hapali

† *Kepashi ni jo Patulu. Lola disemu dinji mwibalugwa ai: 3:22; 9:5; 15:5.*

wanimpele ubatisho pakati penu ila Klishipu namu Gayu ¹⁵ pakulota dashi, hanapagwe munu wakushi-doni mupatilé ubatisho palina lyangu. ¹⁶ Mwiu, ndiva-pa ubatisho valikola limwe Eshitepanashi, kupunda ava namanya shinu ikava kenga ndimupa munu junji ubatisho. ¹⁷ Doni, Klistu hangutumididye pakulota ndivape vanu ubatisho kanji nguvalangange ntenga wambone i kwalimanyilo lyashitangodi kwambangidya nshalaba umwe Klistu, haunagalukange.

Klistu ni dimongo na limanyilo lyake Nnungu

¹⁸ Mwenu, lilove lyanshalaba ni ujinga kwa avalá vajaika kanji kwetu wetu túpagwite mukwambole-gwa ni dimongo dyake Nnungu. ¹⁹ Pakuva indyandikigwa, "Ndabamola limanyilo lyavalimanyilo,

mang'amung'amu avamang'amung'amu, ndaita." ††

²⁰ Da avé pashi nkúmanya? Avé pashi mwalimu wadishaliya? Avé pashi walukalakowa wawakati au? Da Nnungu hatandile kuva ujinga limanyilo lyashilambo ashi? ²¹ Doni, kutunduvangila mo mulimanyilo lyake Nnungu shilambo hashuukile namanya Nnungu kwaindila yalimanyilo, inínnagwela Nnungu kwaindila yaujinga aulá watuvalanganga wetu kuvaambola avalá vakulupidíle. ²² Mwenu, vayuda vankujugwa vimanyikilo, vamidi kulambela limanyilo ²³ kanji napane wetu tunkummalanganga Klistu wakukamalalegwa panshalaba, kwavayuda kuva shakulikuvála na kwavamidi kuva ujinga, ²⁴ napanelo kwa avalá vashamagwídye ata ikava vayuda kwali vamidi, Klistu dimongo dyake Nnungu na limanyilo lyake Nnungu. ²⁵ Mwaa ujinga wake Nnungu ni limanyilo likumene kuliko munu na kudabadabanga kwake Nnungu ni dimongo ding'umene kuliko munu.

²⁶ Mmanung'unumunu, takumbukila mwamuvalaléle wakati wamuukile ndashamegwa: padyoko muvele mmalimanyilo kwodananavo shimunumunu, padyoko muvele mmadimongo, padyoko múvalakwadidye mumakola avanu shii. ²⁷ Kanji Nnungu atandwelé avilá vyanéka na shilambo kuva vyaujinga pakulota kuvataa dyoni vakumanya; Nnungu atandwelé avilá vyanéka na shilambo kuva vyakudabadabanga pakulota kutaa dyoni avilá vyadimongo; ²⁸ Nnungu atandwelé vinu vyanéka mushilambo kuva vyakunyambikanga, vyakwiludyangika na ata víkapagwite pakulota dashi amalidye avilá vipagwite ²⁹ kwambangidya hanapagwe wakulitumbudya pamevo pake Nnungu. ³⁰ Ni kwamwaa wake nae shitádyá mwenu mupagwe nkati

†† *Lola Ishaiya 29:14.*

mumwe Klistu aijá áukile ndava kwetu wetu limanyilo lyalakéla kumwe Nnungu, ishaliya, kwilimiyanga na kwambole gwa³¹ kenga indyandikigwa, “Álota kulum-budya, alitumbudye nkati mumwe *UMU*.” †

2 Mmanung'unumunu, nangu pangwidile kwenu hanimalangangidile ushuda wa Nnungu †† kwashitangodi shakumanyangila kwali shalimanyilo. ² Mwaa ndyámuwa namanye shoeshoe pakati penu ila Yesu Klistu na yakukamalalegwa panshalaba. ³ Doni, nangu panguvéle namu mwenu nguvele mukudabad-abanga, mukujopa na mukutatamela kukumene. ⁴ Malove angu na kuvalanganga kwangu hakuvéle kwamalove akuutila kwalimanyilo kanji kwakulilodya kwa Imumu na kwadimongo ⁵ kwambangidya likulupililo lyenu halinanapele mulimanyilo lyavanu kanji mudimongo dya Nnungu.

Limanyilo lyalakéla kwa Imumu

⁶ Kanji napane pakati pa avalá vakaméle, limanyilo tundátangola ata likanava limanyilo lyawakati au kwali lyavakutawala vawakati au vo vapagwíte nkati mukulambaleka. ⁷ Leka apo, tundátangola limanyilo lyake Nnungu lipiike mushipii, lyo lyapanganienge wakati ukanava kwalishangelo lyetu wetu. ⁸ Hapali ata jumo pakati pavakutawala vawakati au ámanyite mwaa leka vàmanyite, havanampambilile *UMU* walishangelo.

⁹ Kanji kenga indyandikigwa, “Vikagwene mevo, ata víkaigwite lyatu na ata vikakumbukiligwe muntima wamunu,

ni vyovy vyapanganienge Nnungu kwa avalá vanagwalédyá;” ‡

¹⁰ Nnungu napane anditulodya wetu kwaindila ya Imumu. Mwenu, Imumu inkulalyanga kula shinu ata mpaka vivéle nkati-uti vya Nnungu. ¹¹ Da nyani ámanyite makumbukililo amunu paikava yo imumu yamunu ipagwíte nkati mwake? Nimumo momo hapali ámanyite makumbukililo ake Nnungu pakava jo Imumu wake Nnungu. ¹² Kanji napane wetu hatupatile imumu yamushilambo ashi kanji Imumu áalakadile kwake Nnungu pakulota tumanye vinu vyatupele Nnungu monyo. ¹³ Vyanavo momo tunkutangola i kwamalove apundishígwa kwalimanyilo lyashimunumunu kanji kwamalove apundishígwa kwa Imumu avalangangilila umwiu waimumu kwa avalá vaimumu.

¹⁴ Munu washivalakwelo hanakubali vinu vya Imumu wa Nnungu mwaa kwake nae ni ujinga; haulula kumanya pakuva vyanavo vinkujavaniangigwa mwimumu. ¹⁵ Aijá waimumu andáukumu vinu uti na jo mwene jo, hapali wakumuukumu. ¹⁶ “Mwaa wakwashi ámanyite ding'anong'ano dimwe *UMU* pakulota ampundishe?” †† Kanji wetu tunkuvanavo ding'anong'ano dimwe Klistu.

Ing'ano yakujavanikana muliganisha

3 Nangu mmanung'unumunu hanguulwile kutangola namu mwenu kenga mmanu mmaimumu kanji kenga mmanu mmashimunumunu, mmana mmadikidiki nkati mumwe Klistu. ² Ninnisha kwamashiwa i kwashakulya shakunanopa mwaa muvele mukanava kuulula kulya na ata mpaka ambi apa, hamunava. ³ Doni, mpaka ambi mwenu ni mmanu mmashimunumunu mwaa paipagwa ing'ou na ing'on-do pakati penu, da hamunava shinu mmashimunumunu na hamunaodedya shinu malotelo ashimunumunu? ⁴ Mwaa munu akaashidoni, “Nangu umwe Paulu,” junji do, “Nangu umwe Apolu,” na davo po, hamunava shinu mmashimunumunu?

⁵ Da Apolu ni nyani? Paulu ni nyani? Vanavo ni vatumika tu; kwaindila yavanavo mwenu mundikulupila kwakwodananavo shimadengo shampele *UMU* kula munu. ⁶ Nangu ndipanda, Apolu kutayangila medi kanji Nnungu ni átadidye vikulumuke. ⁷ Nadoni ata aijá ápanda na ata aijá áayangila medi have mana kanji aijá ákulumuwa, Nnungu. ⁸ Aijá ápanda na aijá áayangila medi vankuva shinu shimo na kula munu andapata lidaka kwodananavo shimadengo shake.

⁹ Mwaa wetu ni vamadengomwagwe Nnungu, mwenu po lyala lyake Nnungu na ing'ande yake Nnungu.

¹⁰ Kwodananavo umonyo wake Nnungu wangupatile nangu kenga nkúmanya-kudenga, ndivika shitunduvangilo kutwala junji ankudenga pashanya pake. Napane nnole kula munu mwadangela. ¹¹ Mwenu, hanapagwe wakuulula kuvika shitunduvangilo shinji shipúnda ashilá shivikike yani Yesu Klistu. ¹² Napane ikava kenga munu andadenga pashanya shitunduvangilo ashi atumila shaabu, lyava, majanga alimashi, dimbau, udani kwali makuti, ¹³ shimadengo shakula munu shindaaneka mwaa Liduva alyo lindalodya ngala. Doni, shindaunukuligwa kwamoto na wo moto wo, undatenda nningo wainamuna yashimadengo shakula munu. ¹⁴ Ikava kenga ashilá shadangile munu pashanya shindananopa, bai munu ajo andapata lidaka. ¹⁵ Kanji ikava kenga ashilá shadangile munu shindatikinyuka, andakatoka ila munu ajo, andaambwalegwa kanji kenga áshumbile pamoto.

¹⁶ Da hamunamanya shinu kenga mwenu ni ing'ande yake Nnungu na Imumu wake Nnungu ankunama nkati mwenu? ¹⁷ Ikava kenga munu andabamola ing'ande yake Nnungu, Nnungu munu ajo anambamola mwaa ing'ande yake Nnungu ni yakwilimiyanga na ing'ande yene yo, ni mwenu.

¹⁸ Hamunaliduwange, munu woewoe pakati penu akalyona kuva walimanyilo lyawakati au, inimmaikila alitende kuva njinga pakulota ave walimanyilo.

¹⁹ Mwaa limanyilo lyashilambo ashi ni ujinga pamevo pake Nnungu. Kenga indyandikigwa, “Nae ankuvap-atikanianga valimanyilo nkati muujanja wave.”

††²⁰ Namomo, “*UMU* ankumanya makumbukililo avakumanya kenga amambinya.” ††²¹ Napavedoni munu

† *Lola Yelemiya 9:23-24.* †† *Maandiko anji akala ankushidoni, a hanimalangangidile shipii sha Nnungu...* ‡ *Lola Ishaiya 64:4.* †† *Lola Ishaiya 40:13.*

‡† *Lola Jobi 5:13.* ††† *Lola Dimu 94:11.*

hanalitungyangidye vanu! Mwaa vinu uti, vyènu. ²² Ata akava Paulu, ata akava Apolu, ata akava Kepashi, ata shikava shilambo, ata shikava shingumi, ata kukava kupela, ata ukava wakati au kwali wida, uti vyènu mwenu ²³ na mwenu po, mmamwe Klistu na Klistu jo, umwe Nnungu.

Vamyombe ni vatumika vamwe Klistu

4 Nadoni amu ni muvaikidife munu atualangilile: atualangilile kenga tuvatumika vamwe Klistu na wavatukamudidye vipii vyake Nnungu. ² Kupunda apo, shitakigwa kwavavakamudidye ni kulota vaonekane kukulupilika. ³ Kwangu nangu napane ni shinu shidikidiki namene kuukumigwa namu mwenu kwali ukumu yoeyoe yamunu na ata nene nimwene hangunalyukumu shinu. ⁴ Doni, hashipali shangwona nkati mwangu kanji asho hashinava na mana kenga ndivalangiligwa ishaliya. Anguukumu ni *UMU*. ⁵ Nadoni hamunaukumu wakati ukanava, do *UMU* akanava kwi-da. Nae andavika palangele vilipiidyè mushii na kulyumilidya ngala makumbukililo ammitima. Bai apo kula munu andapata lutumbyango lwake kwa Nnungu.

⁶ Avi mmanung'unumunu ndilitandedya kwangu nangu namu Apolu kenga mpano kwamwaa wenu mwenu kwambangidya dashi, kwetu wetu mulipundishe mene kupunda ashilá shaandikigwe pakulota hanapagwe wakulyona kwamwaa wamunu jumo kunneka junji. ⁷ Wako akupambwilé nyani? Da shakwashi shauvénavo shavakakupele? Napanelo ikava kenga vandikupa mwaa shani unkulyona kenga havakupele?

⁸ Mwenu mulyona kuanavo tayali vinu uti vyamulota! Tayali munditajilika! Kwabila wetu mwenu mundiva mmaumu! Nangu ngushindalota mwiu yakuva mwenu mmaumu kwambangidya dashi nawetu momo tuve tuvaumu namu mwenu. ⁹ Mwaa mwangwonela nangu, Nnungu anditulodya wetu tuvamyombe mulyutu lyamwisho, wetu kenga túukumigwa kupela, pakuva tuukilé ndava vyadimbenje kwashilambo ata ikava kwavanjelo kwali kwavanu. ¹⁰ Wetu tuvajinga kwamwaa umwe Klistu kanji mwenu ni mmalimanyilo nkati mumwe Klistu! Wetu ni tuvakudababanga kanji mwenu ni mmadimongo! Mwenu ni mmakwishimika kanji wetu ni tuvakwiludyangika!

¹¹ Mpaka ambi apa tunkuvauvanga indala na inyota, tunkuvanavo wou, vankutukanyola malatuma, hatuve lyutu lyakwikala, ¹² tunkukola shimadengo shakupwateka kwamakono etu tuvene. Pavatutukana tunkuvaalaliya, pavatupapata tunkulipililila, ¹³ pavatutambudya tunkuvajugwangila kwaamani. Tuukilé ndava dinywashwa dyashilambo, pakati pavinu uti wetu ni túmamadidye mpaka ambi.

Malailililo atatamunu

¹⁴ Hangunaandika shinu vinu avi pakulota nintae dyoni kanji kenga mmanavangu mmakunagwaleka nikulota nindume. ¹⁵ Mwenu, ata ikava kenga munkuvana-

vo vakunnela makumi manga nkati mumwe Klistu, hamuvenavo vatatavenu voe mwaa kwaindila yantenga wambone nangu nimmaleka mwenu nkati mumwe Klistu Yesu. ¹⁶ Napavedoni ninkunnaililila pakulota muve mmakujedya vangu. ¹⁷ Kwaing'ano ai nintumidya kwenu Timoti mwanangu wakunagwaleka na wakukulupilika nkati mumwe *UMU*; nae anankumbuwanga mwanganamila nkati mumwe Klistu Yesu kwodananavo amulá mwangupundishidya mumautu uti kwakula liganisha.

¹⁸ Kenga nangu hangushida kwenu, vanji vandilitenda kuva vakulyona. ¹⁹ Ndaida napane shipajelo kwenu, *UMU* akalota. Apo ndamanya, i shitangodi shave vakulyona ava kanji dimongo shani dyavavenavo vanavo. ²⁰ Mwaa utawala wa Nnungu haunava shinu mukutangola kanji unkupagwa mudimongo. ²¹ Da mulota nyamani? Ngwide kwenu na mishasha kwali na ntima walinagwaledyo na upole?

Nkúlauka mmingange

5 Kwamwiu, inkuvalangangigwa kenga kwenu mwenu kunkupagwa kulauka, kulauka kúkapagwite ata kwavakammanyite Nnungu ata mpaka munu kulanavo ndyagwe tatake. ² Napane mwenu kutwala kulitenda kuva mmakulyona! Leka apo hamunavenavo shipalodi kutwala kumminganga átandile shitendo asho pakati penu? ³ Ata ikava kenga nangu hangupali kwamili ninkupagwa namu mwenu mwimumu, † nadoni kenga ngúpagwite popo po, nimuukumu tayali átandile shitendo asho. ⁴ Pamulota kukadyanianga palina limwe *UMU* wetu Yesu, imumu yangu ipagwite pamo na dimongo dimwe *UMU* wetu Yesu, ⁵ nkamudye munu ajo kumwe Shatwani akabamalegwe shimunumunu kwambangidya imumu yake yambolegwe muliduva limwe *UMU*.

⁶ Kulyona kwenu hakunava shinu kwambone. Da mwenu hamunamanya shinu kenga nkukumuku padyoko unátadya likamu uti kukukumuka? ⁷ Ushanianga nkukumuku wakala pakulota muve likamu lyaambi kenga mwiu hamuve nkukumuku mwaa ngandolo wetu wapasaka Klistu jo, vaninshinda. †† Nadoni tukukulule shikukulu kanji i kwankukumuku wakala, nkukumuku wavyakunyata na vyaukalau kanji kwamagung'u avakataile nkukumuku, magung'u ashalowa na aumwiu.

⁹ Nimwandikila mwibalugwa doni, hamunalyunganiange na vanu vakulavalava. ¹⁰ Avi hangunavamba shinu vakulavalava vashilambo ashi na ata vashojo, vakutindinganianga kwali valipúdyá kwavakushang'apa. Leka ive davo mwenu ikanimmaikila mume mushilambo amu. ¹¹ Kanji napane nimwandikila mene kulyunganianga na woewoe wawanshema nung'unumunu kanji ava nkúlavalava,

† Mana malove ala, a ninkupagwa namu mwenu mwimumuni a malamulo angu ankupagwa namu mwenu. †† Shadaka shangandolo wampashika shinditutenda kenga ligung'u likave nkukumuku mwaa kupela kumwe Klistu kundituukanga madambi etu, lo aambangila mwaa Paulu mwimbande ai kenga nkukumuku.

washojo, wakulipudya kwavakushang'apa, nkúng'wenya, nkwámbalwa kwali nkútindinganianga. Kwamunu wantindo au, mwenu ata mpaka hamunalyenavo. ¹² Da shangu nyamani yakulota nangu kuvaukumu vanu vákapagwite muliganisha? Da haivaikidile mwenu kuvaukumu vo vavé muliganisha amu? ¹³ Nnungu ni álota kuvaukumu avalá vavéle panda. "Mmingange nkalau pakati penu." †

Kukashalyania pakati pavanung'unumunu

6 Munu pakati penu paavanavo nnando na nung'unumunu junji, alota kulyunga dashi ntima kuka ndaukumigwa pamevo pavaungave-ishaliya kuvaleka vakwilimyanga? ² Da mwenu hamunamanya shinu kenga vakwilimyanga vandaukumu shilambo? Napane pakuva mwenu mundaukumu shilambo, da hamuvenavo lyululilo lyakwangangola milando vyan-golo? ³ Da mwenu hamunamanya shinu kenga tunda-vaukumu vanjelo? Kushi vinu vyamushinamidyo ashi? ⁴ Napavedoni, ikava kenga mwenu munkuvana-vo milando vyashinamidyo ashi mwaa shani muukena-vo kwa avalá vákave lidi muliganisha? ⁵ Ninkwamba vinu avi pakulota nintae dyoni. Da hapali munu walimanyilo pakati penu wakuulula kwangangola myaa pakati pavanung'unuvake? ⁶ Kanji nung'unumunu ankutwala dashi nung'unumunu junji kumuukanavo kulibengi kutwala kuukumigwa na vákakulupila? ⁷ Po pakupagwa kukashalyania pakati penu, inkulilodya ngala kenga munditamewga. Da mwaa shani hamunakubali kwanalegwa? Mwaa shani hamunakubali kupakanyalegwa? ⁸ Kanji leka apo mwemwe mmene munkwanela na kupakanyola na ata mpaka munku-vatandela vanung'unuvunu.

⁹ Kwali, da mwenu hamunamanya shinu kenga avalá vaungave-ishaliya havapata maleko autawala wa Nnungu? Hamunaduwangike, ata vaténda vyawendi, ata valipúdyá kwavakushang'apa, ata vakulavalava, ata valume valalígwa na valumemwave, ata valume vavalála valumemwave, ¹⁰ ata vakwiva, ata vashojo, ata vakwambalwa, ata vakung'wenya na ata vakukwinyanga, havapata maleko autawala wa Nnungu. ¹¹ Pakati penu po vanji vavele yadavo kanji muukilé ndaukangigwa, muukilé ndatandegwa mmak-wilimyanga, muukilé ndavalangiligwa ishaliya mulina limwe *UMU* Yesu Klistu na mu Imumu umwe Nnungu wetu.

Tukuta vitendo vyawendi

¹² "Vinu uti ndilamuliligwa," kanji i uti vingupwashéla. "Vinu uti ndilamuliligwa," kanji hanguleka ngutawalig-wa na shinu shoeshoe. ¹³ "Vyakulya kwashitumbo, shi-tumbo kwavyakulya," napane vyovy vyo, Nnungu andamalidya kwaunapamo. Mili haupagwite kwamwaa wakulavalava kanji kwamwaa umwe *UMU* na *UMU* kwamwaa wamili. ¹⁴ Napane Nnungu anindyuwa *UMU* kwadimongo dyake nawetu momo andatudyuwa

kwadimongo dyake. ¹⁵ Da mwenu hamunamanya shinu kenga mili vyenu ni dimbande dimwe Klistu? Da nangu ninkuulula kutwala dimbande dimwe Klistu kuukanavo ndaunganianga namu dimwe lilaja? Ata padyoko vela! ¹⁶ Kwali, da mwenu hamunamanya shinu kenga aijá áungana namu lilaja ankuva mili umo namu nae? Mwaa inkushidoni, "Vavili vandava mili umo." ††¹⁷ Kanji aijá áungana namu *UMU* ankuva imu-mu imo namu nae.

¹⁸ Tukuta vitendo vyakulauka. Madambi anji uti átega munu, ankutega panda mili wake kanji aijá átenda vyakulauka ankutega mo mumili wake jo mwene.

¹⁹ Kwali, da hamunamanya shinu kenga mili vyenu mwenu ni ing'ande yake Imumu Wanashwe ánama nkati mwenu wamumpatile mwenu kumwe Nnungu? Mwenu hamunava shinu mwemwe mmene ²⁰ mwaa mundishumigwa kwaibei. Napavedoni mupe lishange-lo Nnungu mumili vyenu.

Ing'ano yakulombana

7 Napanelo kwamyaa vyamungwandikidile vyo; mwenu mutédoni, "Ni shambone nnume hanalale na nkongwe." ² Kanji kwamwaa wakulavalava, kula nnume inimmaikila avenavo nkongwe ndyagwe na kula nkongwe avenavo nnume ntwagwe. ³ Nnume inimmaikila atandedye avilá vilotéka nkati mukulombana kwankongwe ndyagwe, nanae nkongwe momo atandedye yadavo kwannume ntwagwe. ⁴ Nkongwe havena-vo madalaka amili wake jo mwene ila nnume ntwagwe; nanae nnume havenavo madalaka amili wake jo mwene ila nkongwe ndyagwe. ⁵ Hamunaimane aki yenu kwali paikava yakwigwania muwakati padyoko pakulota muliikiniye mukushwali. Ling'oto imang'ananga kavili pakulota Shatwani hanantubye kwamwaa wakumwova kulishunga mwemwe mmene.

⁶ Vyangulota kutangola avi ni kenga vikubalike, havinava shinu kenga lilamulo. ⁷ Ishinangunagwela doni uti vave kenga mwanguvalalele nangu kanji kula munu ankuvanavo shajo shake jo mwene shaalakéla kwa Nnungu; junji shainamuna inji na junji shainamu-na inji.

⁸ Kwa avalá vákana-va kulomba pamo na vanamwili, ninkuvaulila kushidoni, shambone ni kudyanga kupag-wa mwanguvalalele nangu amu. ⁹ Kanji vakanalyulula kulishunga kudyanga valombe mwaa kudyanga kulomba kuliko kukushanona mweshe muntima.

¹⁰ Kwa avalá vakulomba ninkuvalamulila doni, i nangu kanji *UMU*: nkongwe hanaapukanange na nnume ntwagwe. ¹¹ Napane akaapukananga, aikale bila kulombwa kwali mene, aigwanie na nnume ntwagwe. Namomo nnume hananneke nkongwe ndyagwe.

¹² Kwavanji vo, ninkuvaulila doni, i *UMU* kanji nangu, ikava kenga nung'unumunu andivanavo ndyagwe ákakulupila na jojo jo ankukubali kunama namu nae, bai hananneke. ¹³ Namomo ikava kenga nkongwe andivanavo ntwagwe ákakulupila na jojo jo ankukubali kunama namu nae, bai hananneke. ¹⁴ Mwaa nnume

† *Lola Kumbukumbu* 13:5; 17:7; 19:19; 21:2; 22:21-4, 24; 24:7.

†† *Lola Kutunduvanga* 2:24.

ntwagwe ákakulupila anikutandegwa kuva wakwilimyanga kwaindila yandyagwe na nkongwe ndyagwe ákakulupila anikutandegwa kuva wakwilimyanga kwaindila yanume ntwagwe. Leka ikave davo, vanavenu vakandiva vaushapu kanji napane vankuva vakwilimyanga. ¹⁵ Kanji ikava kenga aijá ákakulupila akalyumadyanga, alyumadyange. Kwaing'ano ai nung'unumunu kwali numbumunu ankuva muunaiti mwaa Nnungu aninshema pakulota muname mu amani. ¹⁶ Gwe ndyamunu, da umanyité dashi kenga unamwambola nnume ntwavo? Kwali gwe ntwamunu, da umanyité dashi kenga unamwambola nkongwe ndyavo?

Nama kulingana mwavanshamalele

¹⁷ Kula munu napane aukenavo mushu anama shi-namidyo shosho shampangidile *UMU* na kenga mwan-shamalele Nnungu. Mumaganisha uti, ashi ni shangulamulila. ¹⁸ Da apali áshamagwidye ákumuligwe likumbi? Hanatimbange likumbi lyake. Apali áshamagwidye akakumuligwe likumbi? Hanalikumule. ¹⁹ Mwaa kukumuligwa likumbi hakuve mana na ungakumuligwa momo hauve mana kanji shivénavo mana ni kwigwilila malamulo ake Nnungu.

²⁰ Kula munu nkati mushinamidyo sho shavan-shamile, auke mushu apagwa mushosho. ²¹ Da vakushamile úvele untumwa? Haunangaikange kwamwaa awo kanji mwiu ukapata litala lyakuva muunaiti, katakela. ²² Doni, aijá áshamegwa namu *UMU* ávele ntumwa, nae wamuunaiti umwe *UMU*. Nimumo momo aijá áshamagwidye ávele muunaiti, nae ntumwa umwe Klistu. ²³ Mwenu mundishumigwa kwaibei, hamunave mmatumwa vavanu.

²⁴ Nadoni mmanung'unumunu, kula munu mushi-namidyo shoeshoe shaukile ndashamegwa, mushosho sho auke mushu anama namu Nnungu.

Vanamwili na vakanava kulomba

²⁵ Napane kwaing'ano ya avalá vákanava kulombwa † hanguvenavo lilamulo limwe *UMU* ila ninkumya maoni angu kenga nimunu kwamwaa wakungulodya *UMU* shididi shake kuva wakukulupilika. ²⁶ Kwamwaa wamapinjikapinjika apagwíte muwakati au, ngwona kudyanga munu apagwe kenga mo mwavalalele. ²⁷ Da undilyunganianga na nkongwe? Hamunalakane. Da uvelé muunaiti kwankongwe? Haunannambele nkongwe. ²⁸ Kanji ukalomba, haunatega shinu. Namomo mwali ntete akalombwa, hanatega shinu momo. Kanji napane avalá valóta kulambana, vandapata matatisho amushilambo ila nangu, matatisho alo ngushilota mudivilile.

²⁹ Shangulota kutangola mmanung'unumunu ni ashi; wakati undidadakanga. Nadoni kutunduvangila ambi apa, avalá valombíle, vaname kenga havalombile; ³⁰ avalá valíla, kenga havanalila; avalá vapuwánga, kenga havanapuwanga; avalá vashúma, kenga vákave

† *Mushigalegu: a ...vatete.*

shinu; ³¹ avalá vashulúsha mushilambo, kenga vákaungana uti na shilambo mwaa mwatwanela shilambo wakati au, mwakupita.

³² Nangu ngushindalota mwenu po muve mmakwambolegwa mukwangaikanga. Munu ákalombile aangaikangila vimwe *UMU* mwashi mwakunnagwalela nae. ³³ Napane aijá álobmile aangaikangila vyamushilambo mwashi mwakunnagwalela ndyagwe; ³⁴ nae jo andijavanikananga. Nimumo momo nkongwe ákalombwidye kwali mwali ntete aangaikangila vimwe *UMU* mwashi mwakuvala wakwilimyanga mumili kwali mwimumu. Kanji álobmbwidye nae jo aangaikangila vyamushilambo mwashi mwakulota kunnagwalela ntwamunu. ³⁵ Ninkutangola vinu avi kwawambone wenu mmene i pakulota nindingadinge kanji kwamwaa wa ashilá shashalowa na pakulota muliikiniye nkati mukuntumika *UMU* kwabila kudumbadumba.

³⁶ Ikava kenga munu ankwona kenga hanantandela shana mwali walota kunnomba, doni mweshe wake wo unkumpunda nadoni hamupali mwakutandela, bai atende ashilá shimwidíla muntima, hanatega shinu, valeke valambane. ³⁷ Kanji munu ánanwepe muntima mwake, áulula mwakutandela mwaa atawelé mweshe wake, áamuwa muntima mwake akanannomba mwali jo, bai munu ajo andatenda shinu shambone. ³⁸ Napavedoni, aijá ánnomba mwali wake ankutenda shana napane aijá ákalomba ankutenda shinu shambone namene-uti.

³⁹ Nkongwe avelé mushipungu muwakati wanama ntwagwe kanji ntwamunu akapela, nae ankuva muunaiti wakulombwa na munu woewoe wannota ila munu ajo ave nkati mumwe *UMU*. ⁴⁰ Kanji napane kwona kwangu nangu andapuwanga poe ikava kenga andapagwa kenga mo mwavalalele, nanangu momo ninkulyona kuvanavo Imumu wake Nnungu.

Ing'ano yavyakulya vyakuvaumidya vannungu

8 Napanelo kwaing'ano yavyakulya vyavavaumidya vannungu vakushang'apa, tunkumanya mwamutangalela mwenu kenga, "Wetu uti tunkuvanavo limanyilo." Limanyilo ali kanji linkuntadya munu alyone ila linagwaledyo linkudenga. ² Aijá ákumbukila doni ankumanya shinu, mpaka ambi hanava kumanya mwashi muvaikidíle amanye. ³ Napane munu akanagwaledya Nnungu, ajo andimanyika namu Nnungu.

⁴ Napavedoni kwaing'ano yavyakulya vyavavaumidya vannungu vakushang'apa, tundimanya kenga "nnungu wakushang'apa mushilambo amu hapali," na "hapali nnungu pakava jumo tu bai." ⁵ Mwaa ata ikava kenga vapali vashamégwa vannungu kwali kuwa kwali pai, kenga mo mwavapagwididye "vannungu" voe kwali "vaumu" voe, ⁶ kanji kwetu wetu ankupagwa Nnungu jumo, Tatamunu kwavyalakela vinu uti na kwaupande wake tunkunama, na *UMU* jumo Yesu Klis-tu kwavipagwa vinu uti kwaindila yake na kwaindila yake nae, wetu tunkunama.

⁷ Kanji i uti vavénavo limanyilo ali. Vanji pakuva vandivadyavalela vannungu vakushang'apa, vankulya kenga pashikavele mwiu shakulya shavavaumididye vannungu vakushang'apa kutwala makumbukililo ave amuntima kwoda akudabadabanga, ankwambukishigwa. ⁸ Doni, shakulya hashinatutadya shinu tutumbyangilike pamevo pake Nnungu; hatumamodya tukanalya na hatudyangangila tukalya.

⁹ Kanji napane lilaledye pakulota aki yenu hainauke ndava lijanga lyakulikuvala kwa avalá vakudabadabanga. ¹⁰ Mwaa munu akakwona wako úvenavo limanyilo wikele pandamu mwing'ande yavannungu vakushang'apa, da munu aju akavanavo makumbukililo amuntima akudabadabanga, havanavo ntima wakulya vinu avyo vyavavaumididye vannungu vakushang'apa? ¹¹ Nadoni wakudabadabanga aju ankubamalegwa kwalimanyilo lyako, nung'unumunu aijá wampalalele Klistu. ¹² Nadoni pauvatagela vanning'unumunu na paubyaa makumbukililo ave amuntima ádadababenge, unkuntagela Klistu. ¹³ Napavedoni, ikava kenga shakulya shinkuntadya nung'unumunu kulikuvala, mwiko hangumamena inyama kwambangidya hangunantadye nung'unumunu kulikuvala.

Aki yavamyombe

9 Da nangu hanguve muunaiti? Da nangu i myombe? Da nangu hanimwonite Yesu *UMU* wetu? Da mwenu i shimadengo shangu nkati mumwe *UMU*? ² Ata ikava kenga nangu kwavanu vanji hangunava shinu myombe kanji padyoko vela kwenu mwenu ninkuva, mwaa mwenu ni namakong'o waumyombe wangu nkati mumwe *UMU*.

³ Kulishililidya kwangu pamevo pa avalá vangulalyán-ga ni aku: ⁴ da wetu hatuvenavo aki yakulya na kukumbila? ⁵ Hatuvenavo aki yakutupalakela ndyamunu nkwódá kenga mwavatandela vamyombe vanji, vanning'unumunu vamwe *UMU* pamo namu Kepashi? ⁶ Kwali ni gweka nangu namu Balinaba túkavenavo aki ikavele yakukola madengo? ⁷ Nyani átumika kenga mwing'ondo alilisha kwanshala wake jo mwene? Nyani ápanda nnandi wavyepo kutwala mene kulya vyepo vyake? Nyani áshunga ding'ombe kutwala mene kukumbila mashiwa ake?

⁸ Avi hangunatangola shinu kwodananavo shimunu; kwali da lilamulo halinatangola shinu vyovyó? ⁹ Mwaa indyandikigwa mulilamulo lyake Musha, "Haunamunge ng'ombe ikanywa wakati wavamuulanga ngano." † Kwakutangola mwiu, da ni ing'ano yavang'ombe yangaikangila Nnungu? ¹⁰ Da hainava shinu ing'ano yetu wetu tu yatangalela davo? Indyandikigwa kwamwaa wetu wetu. Mulilindilililo inimmaikila aijá álima alime na aijá ámmula ngano, ammule mulilindilililo lyakuliinjidyanga mmapuno. ¹¹ Napane ikava kenga wetu pakati penu tundipanda vyaimumu, da pankukamadyanga nyamani wetu kupuna

vyamushilambo ashi? ¹² Ikava kenga vanji vankuvana-vo aki ai kwenu mwenu, kushi wetu, i kupunda apo?

Kanji wetu hatutumidile aki ayo, leka apo tundilipililila uti vinu pakulota hatunavike ligogo muntenga wambone umwe Klistu. ¹³ Da mwenu hamunamanya shinu kenga avalá vakóla madengo mwing'ande ya Nnungu, vyamwing'ande ya Nnungu vandálya namo-mo avalá vatumíka palutali vyo vyúma palutali vyo, vandápata? ¹⁴ Nimumo momo, *UMU* andilamulila kenga avalá vavalangánga ntenga wambone, vaname mukutunduvangila mo muntenga.

¹⁵ Kanji nangu hangutumidile kulamana na padyoko aki ayo na ata hangunaandika shinu ngulinda ive davo kwangu nangu. Kudyanga ngupele kuliko munu agaluwange kulyona kwangu. ¹⁶ Doni, ikava kenga ninkuvalanganga ntenga wambone hainava shinu yakulota kulyona mwaa ni shitakígwa pamuti pangu. Ngupambale nangu nikanavalanganga ntenga wambone! ¹⁷ Mwaa ndikavalanganga na malotelo an-gu nimwene, ninkuvanavo lidaka kanji napane ndikavalanganga kwabila malotelo an-gu, mpaka ambi ndikulupiligwa kushunga. ¹⁸ Da napane ni lyakwashi lidaka lyangu? Mukuvalanganga kwangu ngutadye ntenga wambone uve wamonyo kwambangidya hangunatumile aki yangu muntenga wambone.

¹⁹ Mwenu, pakuva nguvelé muunaiti kwavanu uti, ndilitenda nintumwa kwavanu uti pakulota ndivapate voe. ²⁰ Kwavayuda nguukilé ndava muyuda kwambangidya ndivapate vayuda. Kwa avalá vavéle mulilamulo nguukilé ndava kenga ngúvele mulilamulo ata ikava hangupali mulilamulo pakulota ndivapate vavéle mulilamulo. ²¹ Kwavakapagwite mulilamulo nguukilé ndava ndíkapagwite mulilamulo, i kenga hanguvele mulilamulo lyake Nnungu kanji ngúvele mulilamulo limwe Klistu pakulota ndivapate vákapagwite mulilamulo. ²² Kwavakudabadabanga nangu nguukilé ndava nkúdabadabanga kwambangidya ndivapate vakudabadabanga. Nguukilé ndava uti kwavanu uti kwambangidya kwadindila dyoedyo ndivaambole vanji. ²³ Ninkutenda uti kwamwaa wantenga wambone kwambangidya nanangu nguke ndikama-janange mo nkati mo.

²⁴ Da mwenu hamunamanya shinu kenga nkati mu-mashindano akutukuta, vakutukuta uti vandátukuta kanji nkúpata lidaka ni jumo tu bai? Tukuta pakulota lidaka lyo, mupate. ²⁵ Uti avalá vánaliinjidyanga mu-mashindano, vanavo vandálilaledya muvinu uti. Kwavanavo, vankutenda davo vapate lidaka litimbikánga napane wetu tutenda pakulota tupate líkatimbikanga. ²⁶ Napavedoni, nangu hangunatukuta shinu kenga munu átukuta bila shababu, hangunajela dishuku kenga munu ájalangajalanga imepo. ²⁷ Kanji ninkuvyauvyanga mili wangu na kutenda wanavo kuva ntumwa wangu kwambangidya ling'oto lyakuvavangangila vanu vanji ntenga, nene nimwene hangunaitigwe.

† *Lola Kumbukumbu 25:4.*

Lidumilo kwamwaa wavanaishilaeli

10 Mmanung'unumunu, ninkulota hamunatikinange kenga vanakuluvetu uti vandípagwa mwina lyundi † na uti vandípita mwimanga, †† uti vanavo mulyundi na mwimanga vandíbatishwa nkati mumwe Musha, †‡ uti vandílya shakulya shimo shosho shaimumu, †‡‡ uti vandíkumbila medi lolo aimumu; †‡ doni vanavo vandíkumbila kwalakela mulijanga lyaimumu alilá lishivoda, lijanga lyo àvele Klistu. †‡‡‡ Kanji napane voe pakati pave Nnungu andívanatila mili vyave vilalange mangunda kushimbweshe.

6 Mwenu, vinu avi vinditandeka kenga mpano kwetu wetu kwambangidya hatunavikile liu vyakunyata kenga mwavatandalele vanavo † na ata hamunave mmakulipudya kwavakushang'apa kenga vanji pakati pave, kenga indyandikigwa, "Venentete vandíikala kulya na kukumbila kutwala kutakatukanga, kupikita." ††‡ Na ata hatunalavalave kenga pakati pave vanji vandilavalava kutwala kupalanga vanu dyalupu ishilini na tatu muliduva limo. ††† Na ata hatunanninge Klistu †† kenga vanji pakati pave vaníninga kutwala kubamalegwa kwadinyoka. †††† Na ata hamunatangadikange kenga vanji pakati pave vanditangadikanga kutwala kubamalegwa na Nkúbamola. †††††

11 Avi uti napane vanavo vindivatandeka kenga mpano na vinyandikigwa pakulota kutuduma wetu túnama wakati au wamwisho. †‡ Nadoni aijá áona kenga andinanopa, alilaledye kwambangidya hanagwe. †‡‡ Hapali malingo amuvauvanga mwenu pakava akawaida mushinamidyo shavanu. Nnungu ni wakukulupilika, nae hanneka mwenu mutubigwa kupunda shilinga shenu kanji pamo na kutubigwa, nae andamupa mwenu mwashi mwakushumbila pakulota muulule kulipililila.

Tukuta vikukulu vyavavatandela vandamoni

14 Napavedoni mmakunagwaleka vangu, tukuta mukulipudya kwavakushang'apa. †‡ Ngutangola namu mwenu kenga mmanu mukumbukila; lalyanga mwemwe mmene avi vyangutangola. †‡‡ Da i mwilu wene lwakwalaligwa alulá lwatulambwalela, hakunava shinu kuliinjidyanga mummyadi vimwe Klistu? Ligung'u lyatumajana hakunava shinu kuliinjidyanga mumili umwe Klistu? †‡‡‡ Pakuva ligung'u livelé limo, wetu ata tukava tuvoe tuvelé mili umo mwaa wetu uti tunkumajana ligung'u lyolyo limo.

18 Valole vanaishilaeli mwavavalalele mushimunu; da avalá válya vyadaka, havanava shinu vakuliinjidyanga vyapalutali? †‡‡‡ Da ngulota kutangola nyamani? Da shadaka shavaumididye vakushang'apa shinkuvanavo mana? Kwali nnungu wakushang'apa ankuvanavo mana? †‡‡‡‡ Mene! Ngulota kushidoni, ashilá shavaumya,

† Lola Kuma 13:21. †† Lola Kuma 14:22. †‡ Lola Kuma 16:15, 35. ††† Lola Kuma 17:6. †††† Lola Kuma 32:6. ††††† Lola Ishabu 25:1, 9. †††††† Maandiko anji akala ankushidoni, a ...hamunanninge Umu. § Lola Ishabu 21:5; Kuma 17:2, 7. §† Lola Ishabu 14:2, 29-37; Kuma 12:23; II Samuwele 24:16; I Maimyo 21:15.

vavaumidya vandamoni i Nnungu. Doni, hangunalota shinu mwenu muke mukave mmakuliinjidyanga na vandamoni. †‡ Mwenu hamuulula kukumbilila luwene lumwe Umu na luwene lwavandamoni, hamuulula kuliinjidyanga pandamu umwe Umu na pandamu wavanadamoni. †‡‡ Da doni po, tulota tuntae liloko Umu? Da wetu tunkuvanavo dimongo kumpunda nae?

Tenda uti kwalishangelo lyake Nnungu

23 "Vinu uti vindilamuliligwa," kanji i uti vingupwashéla. "Vinu uti vindilamuliligwa," kanji i uti vidénga. †‡ Munu hanalambela wambone wake jo mwene kanji wamunu junji. †‡‡ Alya uti avilá vyavashumidya pashakoni bila kuudyangidya kwamwaa wamakumbukililo amuntima †‡‡‡ mwaa, "shilambo shimwe Umu na uti vipagwite nkati mwake." ††††† Munu ákakulupila akakulalika kutwala wako kuka, alya uti avilá vyalota kukuvikila bila kuudyangidya kwamwaa wamakumbukililo amuntima. †‡‡‡‡ Kanji munu akakwaulila doni, "Shakulya ashi vaumidyé kenga shadaka," haunalye kwamwaa wamunu aijá ákwaulidile na kwamwaa wamakumbukililo amuntima; †‡‡‡‡‡ hangunamba shinu makumbukililo amuntima mwako kanji amunu ajo. Da mwaa shani unaiti wangu nangu uke ukaukumigwe na makumbukililo avanu vanji? †‡‡‡‡‡‡ Ikava kenga ninkuliinjidyanga mukulya ngulambwalela mwaa shani ngutangadikangigwe kwashinu shangulambwaladile?

31 Napavedoni, ikava kenga munkulya kwali munkukumbila kwali munkutenda shoeshoe, tenda kwalishangelo lyake Nnungu. †‡‡‡‡‡ Hamunavatadye shinyadinyadi vayuda kwali ata vagalegu na ata ligandisha lya Nnungu †‡‡‡‡‡‡ kulingana mo mwandivanagwalyedya nangu vanu uti muuti mene kulambela paida yangu kanji yavanu voe pakulota vaambolegwe.

11 Ngujedya nangu kenga nangu mwaninjadyedya Klistu.

Vakongwe vainikidye muti mukushwali

2 Napanelo nintumbyanga mwenu pakuva munkungukumbukila muvinu uti, namomo munkukumulila mavalelo mo mwanimpalakadyadidye. †‡ Napane ninkulota mumanye kenga muti wakula nnume ni Klistu, muti wankongwe ni nnume †‡‡ na muti umwe Klistu ni Nnungu. †‡‡‡ Kula nnume áshwali kwali álava akuno ainikididye muti wake, ajo ankutaa dyoni aulá muti wake. †‡‡‡‡ Napane kula nkongwe áshwali kwali álava bila kwunikidya muti wake, ajo ankutaa dyoni aulá muti wake. Mwaa nimumo momo kenga ugwimbu andibubula. †‡‡‡‡‡ Doni, ikava kenga nkongwe muti wake hainikidya inimmaikila ashingule ugwimbu. Kanji napane pakuva ni shinu shadyoni kwankongwe kushingula ugwimbu kwali kububula, bai inimmaikila ainikidye muti wake.

7 Doni, nnume haimmaikidile ainikidye muti wake pakuva ni ing'ope na lishangelo lyake Nnungu kanji

††† Lola Dimu 24:1. §† Malove ashigalegu avalalangangidile mwimbande ai a nnumena a nkongwe inkuululika kuvalanganga na ntwanununa a ndyamunu. Lola inamba idikidiki 2-15.

nkongwe ni lishangelo lyake nnume. ⁸ Mwaa nnume haalakadile munkongwe kanji nkongwe ni áalakadile munnume ⁹ na ata nnume hakandyangigwe kwamwaa wankongwe kanji nkongwe kwamwaa wannume. ¹⁰ Kwamwaa au nkongwe inimmaikila avenavo madalaka pamuti pake kwamwaa wavanjelo. ¹¹ Kanji napane nkati mumwe *UMU* nkongwe i shinu bila nnume na ata nnume i shinu bila nkongwe. ¹² Mwaa, nimumo momo nkongwe áalakadile munnume na nnume kwaindila yankongwe. Napane uti vinkwalakela kumwe Nnungu.

¹³ Amuwa mwemwe mmene, da shindivaikila nkongwe ashwali pamevo pa Nnungu bila kwiniidya muti? ¹⁴ Da ata maumbile avinu hanampundisha shinu kenga nnume akalanga ugwimbu ni shinu shadyoni kwake nae ¹⁵ kanji nkongwe akalanga ugwimbu, kwake nae ni lishangelo? Mwaa ugwimbu vandimupa kenga shinu shakuliinikidya. ¹⁶ Napanelo ikava kenga munu andavanavo mitau kwaing'ano ai, wetu nkati mo hatupali na ata maganisha ake Nnungu momo.

Ndamu umwe *UMU*

¹⁷ Napanelo mumalailililo ala angulota kumupa mwiko haninantumbyanga shinu mwaa pamukadyanianga mwenu hainava shinu yakutenda vyambone kanji vyakunyata. ¹⁸ Mwenu, shitandi ninkwigwa doni, pamukadyania kenga liganisha, pakati penu kunkupagwa kupambulananga. Kwaupande unji nangu ninkukulupila ¹⁹ mwaa indivaikila vipagwe vipinga pakati penu pakulota vakukubaligwa pakati penu vanyike. ²⁰ Pamukadyanianga lyutu limo hashinava shinu shikukulu shimwe *UMU* shamulya ²¹ mwaa mukulya, kula munu ankulya gweka; junji ávele na indala, junji áambalwidye. ²² Da hamuve ding'ande divaikidile mulye na mukumbile? Kwali munkwiludyanga liganisha lya Nnungu na kuvataa dyoni avalá vákave pashinu? Da nimwaulile nyamani? Nangu nintumbyange? Mene, kwaing'ano ai ninantumbyanga shinu!

²³ Mwaa ngupatilé kumwe *UMU* ashilá shanim-palakadyadidye momo doni, *UMU* Yesu ushilo aulá waukile ndalimigwa, andítwala ligung'u ²⁴ na ling'oto lyakulambwalela, kumeja kutwala kushidoni, "Au ni mili wangu kwamwaa wenu mwenu, tenda doni kenga kumbukumbu yangu nangu." ²⁵ Nimumo momo ling'oto lyakulya andítwala shikombe kutwala kushidoni, "Ashi ni shikombe shaimbodi yaambi mummyadi vyangu; kula wakati pamutenda, kumbilila shanavo kenga kumbukumbu yangu nangu." ²⁶ Mwaa ngwengwe pamulya ligung'u ali na kukumbilila shikombe ashi, munkuvalanganga kupela kumwe *UMU* mpaka palota kwida.

²⁷ Nadoni aijá álota kulya ligung'u kwali kukumbilila shikombe shimwe *UMU* múkavaikidile, nae ankuva wamakosha wamili na wamyadi vimwe *UMU*. ²⁸ Napavedoni kula munu alilalyange jo mwene ling'oto alye ligung'u na akumbilile shikombe. ²⁹ Mwaa aijá álya na ákumbila mene kumanya mili umwe *UMU*, ankulya na kukumbila ukumu kwake jo mwene. ³⁰ Ni ashi shitádyá

pakati penu voe vave vakudabadabanga, valwele na vanji, vandipela. ³¹ Kanji leka wetu tulilalyange wewe tuvene, hatunapate ukumu. ³² Napane patuukumigwa namu *UMU*, tunkudumigwa pakulota hatunaukumigwe pamo na shilambo.

³³ Napavedoni mmanung'unuvangu, pamukadyania pakulota mulye, lindana. ³⁴ Ikava kenga munu ininkola indala, alye kwing'ande kwake kwambangidya pamulota kukadyanianga po, hakunaidenavo ukumu. Napane vibakidile vyo, ndalingula pangulota kwida.

Vyajo vyaimumu

12 Napanelo kwaing'ano vavyajo vyaimumu mmanung'unumunu, hangulatile muve mmakutikina. ² Mundimanya shana kenga pamukashimanya Nnungu vandimwashadyanga kwavakushang'apa vabubu, mwavantwalidile mo hangumanyite. ³ Nadoni ninkumwaulila mwenu doni, hapali wakutangola alangalalegwa kwa Imumu wake Nnungu aashidoni, "Yesu alaanike," na hapali wakuulula kushidoni, "Yesu ni *UMU*," pakalangalalegwa kwa Imumu Wanashwe.

⁴ Kunkupagwa napane kuvilingananga kwavyajo kanji Imumu jojo. ⁵ Kunkupagwa kuvilingananga kwakutumika kanji *UMU* jojo. ⁶ Kunkupagwa kuvilingananga kwamakaledi kanji Nnungu jojo átandedya uti muuti. ⁷ Kwakula munu vankumupa kulilodya kwa Imumu kwapaida yavanu uti. ⁸ Mwaa kwamunu jumo kwaindila ya Imumu, vankumupa lilove lyalimanyilo, junji kumupa lilove lyaumanyimanyi kwodananavo Imumu jojo, ⁹ junji kwa Imumu jojo kumupa likulupililo, junji kumupa shajo shakuponia kwa Imumu jumo ¹⁰ junji kutandedya vyamakango, junji kulava, junji kupambula dimumu, junji dinangodi dyakuvilingananga na junji kusalangangila dinangodi. ¹¹ Vinu avi uti vinkutandeka namu Imumu jumo jojo ánjavila kula munu shigwekagweka kwodananavo amulá mwalatela nae.

Mili umo unkuvanavo dimbandi dyoe

¹² Doni, kenga mo mwauvalalele mili umo na wanavo unkuvanavo dimbandi dyoe na dimbandi adyo ata dikava dyoe, dyanavo dinkuva mili umo, nimumo momo mwaivalalele kumwe Klistu. ¹³ Mwaa mu Imumu jumo tundibatishwa nkati mumili umo, vayuda kwali vamidi, vatumwa kwali vamuunaiti, na uti wetu tundyuka nankumbila Imumu jumo.

¹⁴ Mwenu, mili haunava imbandi imo kanji dyoe. ¹⁵ Leka lidodo litedoni, "Pakuva hangunava shinu nkono, bai hangunava shinu wamumili," asho hashinatadya shinu lileke yakuva imbandi yamumili. ¹⁶ Leka lyatu litedoni, "Pakuva hangunava shinu liu, bai hangunava shinu wamumili," asho hashinatadya shinu lileke yakuva imbandi yamumili. ¹⁷ Leka mili uti úvele liu, kwigwa ko kukaikele pashi? Leka mili uti úvele kwigwa, kujambula ko kukaikele pashi? ¹⁸ Kanji napane Nnungu andivika dimbandi adyo, kula imo pakati pa adyo mumili kenga mwalatalalele jo mwene. ¹⁹ Leka

dimbandi uti ðivele imbandi imo, mili wo ukavele pashi? ²⁰ Kanji napane, dimbandi ðivele ðyoe kanji mili uvelé umo.

²¹ Liu halyulula kumwaulila nkono doni, "Wako hand-ikutamwa," na kavili muti haulula kwaulila madodo doni, "Mwenu hanintamwa!" ²² Leka apo, dimbandi dyamili dyaneka kuva dyakudabadabanga namene ni dyodyo ðivénavo mana. ²³ Dimbandi dyamumili dy-atukumbukila kenga dindinyambikanga ni dyodyo dy-atutanana namene. Dimbandi dyatwona kuva dyadyoni, adyo tunkwishimu namene. ²⁴ Mwaa avilá vyatwona wetu kuva vyakuvaikila vyanéka, havinatakigwa shinu kutananigwa. Kanji Nnungu andipanga mili aing'a ishima ing'umene kwadimbandi adilá ðikashishimika ²⁵ kwambangidya hakunapagwe kupambuligwa mumili kanji ðishungane mumo momo. ²⁶ Imbandi imo ikauvauvanga, ðinji dyo nadyanavo dyuvauvange kwali imbandi inji ikaishimika, ðinji dyo nadyanavo dipuwange.

²⁷ Mwenu napane ni mili umwe Klistu na imbandi kwaimbandimwagwe. ²⁸ Ivédoni, muliganisha Nnungu andivavika shitandi vamyombe, shambili vakulava, shantatu vamwalimu kwatika vatandédyá vyamakango, vavénavo vyajo vyakuponia, vyakupwashela, vyakulangalalela na vyadinangodi dyakuvilingananga. ²⁹ Da uti ni vamyombe? Uti ni vakulava? Uti ni vamwalimu? Uti ni vaténda vyamakango? ³⁰ Da ni uti vavénavo vyajo vyakuponia? Ni uti vatangóla dinangodi? Ni uti vavalangangíla? ³¹ Kanji napane avanavo malotelo amuntima avyajo vikumene.

Napanelo nannodya indila yambone namene-uti.

Indila yambone-uti yalinagwaledyo

13 Ndikatangola shitangodi shavanu na shavanjelo kanji ndikanavanavo linagwaledyo, ninkuva shitali shúma kwali shombo shinyakónya. ² Ndikavanavo kulava na kumanya vipii uti na umanyimanyi uti, ndikavanavo likulupililo uti pakulota ngushe mashinga kanji ndikanavanavo linagwaledyo, hangunava shinu. ³ Ndikaumya uti vyanguvenavo na ndikajaula mili wangu pakulota vatae moto kanji ndikanavanavo linagwaledyo, hashipali shangupata.

⁴ Linagwaledyo ni kulupililila, linagwaledyo ni kutanana. Linagwaledyo halive ing'ou, halinalitumbyanga, halinalyona, ⁵ halinava lijinga, halinalambela vyake jo mwene, halinashimwa, halinakondya vyakunyata, ⁶ halinapuwangila ungave-shaliya kanji lipuwangila umwiu. ⁷ Lindáshikulila uti, [†] lindákulupila uti, lindálindililila uti, lindálipililila uti.

⁸ Linagwaledyo halive mwisho. Kwavyakulava, vindapita; kwadinangodi, dindamalilika; kwalimanyilo, lindapita. ⁹ Mwaa kwaupande padyoko, tunkumanya na kwaupande padyoko, tunkulava ¹⁰ kanji pashilota kuwika ashilá shilinganéne, ^{††} ashilá shíkalinganene sho, shindapita. ¹¹ Panguvéle nindyoko, ngushitangola kenga nindyoko, ngushikumbukila kenga nindyoko,

[†] Kwali: a Lindáuvauvanga uti. ^{††} Kwali: a ...pashilota kuwika ashilá shashalowa-uti.

ngushimanya kenga nindyoko. Panguvele ninang'olo apa, vyashidyoko uti, ndileka. ¹² Mwenu, ambi tunkwona vila mushilolo kwakudingala kanji mushu mo, tundona mevo kwamevo. Ambi ninkumanya padyoko kanji mushu mo, ndamanya uti kenga mo mwangumanyikila nangu.

¹³ Napanelo linkupagwa likulupililo, lilindilililo na linagwaledyo, vinu vitatu kanji avi uti shikumene ni linagwaledyo.

Kulava na inangodi yaambi

14 Vingilidya linagwaledyo na avanavo malotelo amuntima mupate vyajo vyaimumu kanji namene pakulota mulave. ² Mwaa aijá átangola inangodi yaambi, ajo ankutangola i na vanu kanji namu Nnungu. Doni, malove alo hapali ámanya; nae ankutangola nkati mwimumu vinu vilipiídye. ³ Napane aijá álava, atangola na vanu kwamwaa wakuvadenga, kuvapa ntima shii na kuvapambadyanga. ⁴ Aijá átangola inangodi yaambi, alidenga jo mwene kanji aijá álava jo, adenga liganisha. ⁵ Ngushindalota mwenu uti mutangole dinangodi dyaambi kanji kupunda namene mulave. Mwaa aijá álava ni ávenavo mana kuliko aijá átangola dinangodi dyaambi kwali apagwe wakuvalangangila kwambangidya liganisha, lidangegwe.

⁶ Napanelo mmanung'unumunu, ikava kenga nangu ndaida kwenu kutwala kutangola inangodi yaambi, ngulota kumupa paida shani ndikanaidanavo maono kwali limanyilo kwali lilavilo kwali lipundisho? ⁷ Ikava kenga ata vinu víkave shingumi vyúmya madi kenga shinanda kwali ibangu, vakanapanga shana madi, munu alota kujavanianga dashi ashilá shavomba mushinanda kwali shavomba mwibangu? ⁸ Lipalapan-da likanaumya lidi lyakumanyika, nyani álota kulipangania kwaing'ondo? ⁹ Nimumo momo kwenu mwenu; mukatangola malove ákaigwinika, nyani álota kumanya shitangaléka? Mwenu mulota kutangalela vila imepo. ¹⁰ Bila kwambambidya, dinkupagwa dinangodi dyoe mushilambo amu na dinangodi adyo, haipali ata imo ikave mana. ¹¹ Kanji napane ndikanamanya mana ashitangodi asho, nangu nindava nimmidi kumwe aijá átangola na nae andava mmidi kwangu nangu. ¹² Nimumo momo kwenu mwenu; pakuva mwenu munku- vanavo dukuduku yakupata vinu vyaimumu, bai avanavo dukuduku yakudangela liganisha.

¹³ Napavedoni, aijá átangola inangodi yaambi, inim- maikila ashwali apate lyululilo lyakuvalangangilila. ¹⁴ Mwaa ndikashwali mwinangodi yaambi, imumu yan- gu ni ishwáli kanji ding'ano dyangu hadinavanavo shinu vyepo. ¹⁵ Napane ngutende dashi? Ndashwali kwaimumu kanji namomo ndashwali kwading'ano; ndaimba kwaimumu kanji namomo ndaimba kwad- ing'ano. ¹⁶ Ikanavadavo, wako untumbyanga Nnungu kwaimumu, napane ilota kuva dashi kumwe aijá ávele muungapundishigwa kwitikila, "Ame" ajang'ula ku- lambwalela kwako na nae akamanyite ashilá shautan- gola? ¹⁷ Mwaa inkuululika wako unkulambwalela shana kanji junji jo, hanadangegwa shinu. ¹⁸ Ninkun-

nambwalela Nnungu kwamwaa wakutangola dinangodi kuliko mwenu uti. ¹⁹ Kanji muliganisha kudyanga ngutangole malove mwanu kwading'ano dyangu kwambangidya ndivapundishe vanji kuliko kutangola malove alupu mwinangodi yaambi.

²⁰ Mmanung'unumunu, hamunave mmana mmadikidiki mumakumbukililo enu. Ava mmana mmadikidiki muvyakunyata kanji mumakumbukililo, ava mmanang'olo. ²¹ Mulilamulo indyandikigwa doni, "Kwaindila yavanu vadinangodi dinji na kwaindomo dyavanu vanji, ndatangola na venentete ava kanji ata ivedavo, havangwigwilila, atangola *UMU*." †

²² Nadoni dinangodi dyaambi ni shimanyikilo i kwavakukulupila kanji kwavakukulupila. Napane kula-va ni shimanyikilo i kwavakukulupila kanji kwavakukulupila. ²³ Napavedoni, ikava kenga ligandisha uti lindakadyania kutwala uti kutangola dinangodi dyambi, napane mo nkati mo kwinjila vanu vákapundishigwe kwali vákukulupila, da havatangola doni, mwenu po munkudulumbuka? ²⁴ Kanji napane ikava kenga uti munkulava kutwala kwinjila munu ákukulupila kwali ákapundishigwe, andalyanalela kwauti, andaukumigwa kwauti, ²⁵ shipii shamuntima mwake shindaudukuka kutwala kuunama kulipudya Nnungu aashidoni, "Mwiu, Nnungu ankupagwa pakati penu!"

Ishima na kulipanga muliganisha

²⁶ Da ivé dashi mmanung'unumunu? Pamukadyani-anga, kula munu ankuvanavo lwimu kwali kuvanavo lipundisho kwali kuvanavo maono kwali kuvanavo inangodi yaambi kwali kuvanavo kuvalangangilila; uti avi vive vyakudenga. ²⁷ Akapagwa wakutangola inangodi yaambi, inkuulukika vave vavili kwali pandi-mamodya vatatu, kula munu na wakati wake, namo-mo apagwe wakuvalangangilila. ²⁸ Akanapagwa wakuvalangangilila, bai alimaladye muliganisha; atangole jo mwene shintimatima atangola na Nnungu. ²⁹ Vakulava vavili kwali vatatu vatangole, vanji vo valalyange ashilá shitangaléka. ³⁰ Akapagwa ápatile maono áikele, ntandi jo, amalale. ³¹ Mwaa uti mwenu munkuulula kulava jumo jumo kwambangidya uti mulipundishe na munonowangike. ³² Dimumu dyavakulava dinkulalyangigwa na vo vene vakulava. ³³ Mwaa Nnungu hanava shinu Nnungu wampulugu kanji ni waamani.

Kwakulinganana kenga mo mwaivalalele mmaganisha uti avakwilimyanga vake Nnungu, ³⁴ vakongwe indivavaikila valimaladye muliganisha. Havave lilamulo lyakutangola kanji valivike mwina kenga momo mwali-tangalela lilamulo. ³⁵ Ikava kenga vankulota vaudye shinu, vakavaudye vatavave kuding'ande dyave mwaa ni shinu shadyoni kwavakongwe kutangola muliganisha.

³⁶ Da lilove lyake Nnungu lipandukenge kwenu? Kwali limwididile mwenu gweka yenu? ³⁷ Ikava kenga munu ankulyona kuva nkúlava kwali kulyona kuva waimumu, amanye kenga vyanimwandikila avi, ni lilamulo

lyake *UMU*. ³⁸ Kanji munu akatikinanga vinu avi, nanae momo vanantikinanga.

³⁹ Napavedoni mmanung'unumunu, avanavo malotelo amuntima pakulota mulave na hamunanneye munu kutangola inangodi yaambi. ⁴⁰ Kanji uti indivaiki-la vitandeke kwaishima na kulipanga.

Kudyuka kumwe Klistu

15 Napane ninkulota ninkumbuwange mmanung'unumunu ntenga wambone aulá wanim-malangangidile, wamupwashaladile, wo wamupagwa mwenu ² na kwaindila yawanavo mundaambolegwa ikava kenga munkukumulila lilove alilá lyanimmalangangidile, ikanava kenga mukulupidilé monyo.

³ Mwaa nangu nimpalakadyedya kenga shinu shitan-di shamana ashilá shangupatile nangu momo: doni, Klistu andipela kwamwaa wamadambi etu kwodananavo Maandiko; ⁴ doni, nae vaninshika; doni, nae vanindyuwa muliduva lyantatu kwodananavo Maandiko; ⁵ doni, andimumilila Kepashi ling'oto kuvaumilila vamyombe avalá kumi na mbili. ⁶ Kutwala apo, kuvaumilila vanung'unumunu vakupunda vanu dimiya mwanu kwamwanda umo, vanji pakati pave voe vankupagwa mushingumi mpaka ambi kanji vanji vo, vandipela. ⁷ Kutwala apo, kumuulila Tiyagu ling'oto kuvaumilila vamyombe uti. ⁸ Kumwisho kwake ko, kenga kwamunu ávalakwadidye wakati úkavaikidile kutwala kunguulila nangu. ⁹ Mwaa nangu nindikidiki namene pakati pavamyombe na ata hanguvaikidile kushamegwa myombe mwaa ndipapata ligandisha lyake Nnungu. ¹⁰ Kanji kwaumonyo wake nae nguvelé kenga mo mwanguvalalele na umonyo wake kwangu nangu haunava shinu wabule. Leka apo, nangu nditenda madengo kuvapunda vanavo uti ila hangunava shinu nangu kanji umonyo wake Nnungu uvéle nkati mwangu. ¹¹ Napavedoni kwali nangu kwali vanavo, amu ni mwatuvalangangila na amu ni mwamukulupilila.

Kudyuka kwavakupela

¹² Mwenu, ikava kenga Klistu ankuvalangangigwa kudyuka mukupela, napane mwaa shani vanji pakati penu vankushidoni, hakupali kudyuka kwavakupela? ¹³ Kukanapagwa kudyuka kwavakupela, ata jo Klistu hadyukile. ¹⁴ Napane akanadyuka Klistu, bai kuvalanganga kwetu, kwabule na kukulupila kwenu ko, kwabule. ¹⁵ Kupunda apo, tundaaneka kuva tuvashuda vakushang'apa kwake Nnungu mwaa tunkumya ushuda kwaupande wake Nnungu kenga anindyuwa Klistu kumbe akandyuwidye ikava kenga vakupela havanadyuka. ¹⁶ Mwaa ikava kenga vakupela havanadyuka, ata jo Klistu hadyukile. ¹⁷ Napane Klistu akanadyuka, likulupililo lyamavenavo mwenu lyo, lyabule; mpaka ambi munkupagwa mumadambi enu. ¹⁸ Namomo avalá vapidile nkati mumwe Klistu, vandijaika. ¹⁹ Ikava kenga tunkuvanavo lilindilililo nkati mumwe Klistu

† *Lola Ishaiya 28:11-12.*

mushingumi shosho ashi tu bai, wetu ni tuvanu tú-vaikidile twanangiligwe shididi kuliko vanu uti.

²⁰ Kanji napanelo Klistu mwiu andidyuka mukupela; jojo jo kuva shepo shitandi pakati pa avalá valéle.

²¹ Doni, kwoda kupela kundida kwaindila yamunu, kudyuka kwavakupela kundida momo kwaindila yamunu. ²² Doni, pakuva kwakuungana namu Adamu uti vankupela, namomo kwakuungana namu Klistu uti vandapata shingumi. ²³ Kanji kwakula munu na mwanda wake: Klistu kuva shepo shitandi, ling'oto kwatika vamwe Klistu mukwida kwake. ²⁴ Kutwala apo, undawika mwisho muwakati walota Klistu kunkamudya Tata-munu Nnungu utawala ling'oto lyakumalidya utawala uti, madalaka na dimongo uti. ²⁵ Mwaa indivaikila Klistu atawale mpaka avavike vamongo vake uti kumaulu kwake. ²⁶ Mmongo wamwisho kubamolegwa alota kuva kupela. ²⁷ Mwaa nae, "vinu uti, andivika kumaulu kwake." † Mwenu, paitangaleke doni, "uti andivika kumaulu kwake," inkumanyika ngala doni, hanalyangani-anga shinu na jo mwene Nnungu ávikile uti kumaulu kwake. ²⁸ Napanelo pavilota kuvikigwa uti kumaulu kwake, bai jo mwene Mwana andavikigwa kumaulu kumwe aijá ávikile uti kwake nae kwambangidya Nnungu ave uti muuti.

²⁹ Napane kukanapagwa kudyuka pakati pavakupela, kushi avalá vapáta ubatisho kwamwaa wavakupela? Ikava kenga mwiu vakupela havanadyuka, mwaa shani vankupata ubatisho yavanavo? ³⁰ Namomo mwaa shani wetu tunkupagwa mushijoidyo kula wakati?

³¹ Kula liduva ninkupela! Mmanung'unumunu, ninkutangola avi kwakulyona kwangu kwenu mwenu kwanguvenavo nkati mumwe Klistu Yesu *UMU* wetu.

³² Ding'ondo adilá dyangutandene na vakoko vakujowa ku Epeshu, leka dívele kwashabaa yashimunumunu, ndikapatile nyamani? Ikava kenga vakupela havanadyuka, "Leka tulye na tukumbile mwaa lunduno tundapela." ††

³³ Hamunaduwangike, "Unyagwe wakunyata undá-timbanga mavalelo ambone." ³⁴ Ujila kud-ing'anong'ano dyenu, nama kwaishaliya ‡ na leka kute-ga mwaa vanji havammanyite Nnungu ata padyoko vela. Ninkutangola avi kwadyoni dyenu.

Kudyuka kwamili

³⁵ Kanji junji andaudya, "Da vakupela vadyuka dashi? Valota kuanavo mili shani?" ³⁶ Unjinga gwe! Ashilá shaupanda wako hashivanavo shingumi shikanapela.

³⁷ Ashilá shaupanda i mili ulóta kupagwa kanji ni imbeju vila kwali yangano kwali yavyepo vinji. ³⁸ Kanji Nnungu ankwing'a imbeju mili walota jo mwene na kula imbeju ankwing'a mili wake. ³⁹ Mili havinalinganana shinu; upali mili wamunu, kupagwa mili unji wanyama, mili unji wavyuni, unji wadyomba. ⁴⁰ Napanelo vinkupagwa mili vyakuwa na kupagwa mili vyamushilambo kanji lishangelo lyamili wakuwa, linji na lishangelo lyamili wamushilambo, linji. ⁴¹ Kupagwa lishangelo

† *Lola Dimu* 8:6. †† *Lola Ishaiya* 22:13. ‡ *Kwali: a Ujila kud-ing'anong'ano dyenu kenga muvaikidíle...*

lyaliduva, lishangelo linji lyamwedi, lishangelo linji lyadinondo na lishangelo lyainondo imo linkuviligananga na lyainondo inji.

⁴² Amu ni mwaivalalele kudyuka kwavakupela.

Shipandígwa ashi ni shakulambaleka; shidyúka sho ni shíkalambaleka. ⁴³ Shipandigwa mukunyambikanga; kutakatuwa mulishangelo. Shipandigwa mukudabababanga; kutakatuwa mudimongo. ⁴⁴ Upandigwa mili washivalakwelo; kutakatuwa mili waimumu. Ikava kenga unkupagwa mili washivalakwelo, namomo unkupagwa mili waimumu. ⁴⁵ Kenga indyandikigwa, "Munu ntandi Adamu nae andyuka ndava ungumi unáma"; †† Adamu wamwisho aju, nae andyuka ndava imumu íng'a shingumi. ⁴⁶ Kanji napanelo, ntandi kwida hanava shinu waimumu ila washivalakwelo; ling'oto kwida aijá waimumu. ⁴⁷ Munu ntandi aalakadilé pai ávele ulongo; munu wambili nae aalakadilé kuwa. ⁴⁸ Kenga mo mwaivalalele aijá wamuulongo, amu ni mwavalalele vamuulongo; kenga mo mwaivalalele aijá wakuwa, amu ni mwavalalele vakuwa. ⁴⁹ Kenga mo mwatulikila íng'ope yawaulongo, namomo tundalitika íng'ope yawakuwa.

Kutamegwa kumwe kupela

⁵⁰ Napanelo ninkushidoni mmanung'unumunu, mili na myadi havyulula kupata kenga maleko utawala wa Nnungu na ashilá shilambaléka hashuulula kupata ungalambaleka. ⁵¹ Mwenu, nimwaulila shipii i uti tundalala ila wetu uti tundajaluwangigwa, ⁵² muwakati umo tu, kulola na kuunidya palilota kuma lipalapanda lyamwisho. Mwaa lipalapanda lindauma, vakupela vandavadyuwa kuva vákapela na wetu tunda-jaluwangigwa. ⁵³ Doni, mili au wakulambaleka uligwadye ungalambaleka; mili au wakupela uligwadye ungapela. ⁵⁴ Napanelo wakulambaleka paulota kuligwadya ungalambaleka na wakupela paulota kuligwadya ungapela, apo ni palilota kuwikila popo lilove lyandikígwe, "Kupela andimiligwa mukutema." ††

⁵⁵ "Kupela gwe, kutema kwako ko kuvelé pashi?"

Kupela gwe, ishumu yako yo ivelé pashi? †††

⁵⁶ Mwenu, ishumu imwe kupela, lidambi na dimongo dimwe lidambi, lilamulo. ⁵⁷ Kanji lilambwalalelo lipagwe kwa Nnungu átwing'a kutema kwaindila imwe *UMU* wetu Yesu Klistu.

⁵⁸ Napavedoni mmanung'unumunu mmakunagwaleka, nanopa na hamunajagajeye ngwengwe muumbaligwidye shimadengo shimwe *UMU* mumanya kenga nkati mwake *UMU* shimadengo shenu hashinava shinu shabule.

Mishango kwavakwilimyanga

16 Napanelo kwaing'ano yamishango kwavakwilimyanga, kenga mo mwangulamulidile maganisha a ku Galata, namwenu momo tenda. ² Muliduva litandi lyaishumana, kula munu pakati penu inimmaik-

†† *Lola Kutunduvanga* 2:7. ††† *Lola Ishaiya* 25:8. †††† *Lola Oshaya* 13:14.

ila aapule isemu imo akondye kulingana na ashilá shapata pakulota hamunatende nshango wakati nangu ngúwikile. ³ Napanelo muwakati wangulota kuwika, avalá vamulota kuvaungila nkono, nangu ndavatumidya na ibalugwa kwambangidya vapalakedye inudyo yenu ku Yelusalemu. ⁴ Ikava kenga indavaikila nanangu momo kuka, bai vanangupalakela.

Nnugu wakuujila ku Kolintu

⁵ Ndaida nannola mwenu ling'oto lyakupitila ku Makedoniya mwaa ndapitila kwanavo, ⁶ nakapanji ndaikala namu mwenu kwali ata mpaka kupita shipwepwe kwambangidya mwenu mutadye nguke kwoekwoe kwangulota kuka. ⁷ Mwaa hainangunagwela shinu kumwona mwenu ngupita vila. Ninkulindila ngwikale namu mwenu wakati wakudyangangila ikava kenga *UMU* anangupa litala. ⁸ Kanji ndapagwa apa pa Epeshu mpaka pa Pentekoste ⁹ pakuva nnango ukumene vaningushimulila pakulota ngutende madengo apaida na vammongo vangu vavelé voe.

¹⁰ Paida Timoti po, mwenu ntadye nae aligwe shana pakati penu mwaa jojo jo, ankukola madengo ake *UMU* kenga nene. ¹¹ Napavedoni, hanapagwe wakumwiludyanga. Mpwashele mushimwanda shake kwaamani pakulota aujile kwangu nangu mwaa nangu pamo na vanung'unumunu, tunkunnindila.

¹² Kwaupande umwe nung'unumunu Apolu, nin-naililila namene pakulota aide kwenu pamo na vanung'unumunu vanji napane haivéle yamalotelo ake ambi apa. Andaida ako palota kupata litala.

Malailililo amwisho

¹³ Ava mevo, nanopa mulikulupililo, ava mmakulishiya na mmadimongo. ¹⁴ Uti vyamutenda, tenda kwalinagwaledyo.

¹⁵ Napane ninkunnaililila mmanung'unumunu, mwenu mundimanya shana kenga unalikola umwe Eshitepanashi, vanavo ni vyepo vitandi ku Akaya na vandilijaula mukuvatumika vakwilimiyanga. ¹⁶ Doni, livike mwina mwavanu kenga ava na kula mmáden-gomwave ákola shimadengo shakupwateka.

¹⁷ Ndipuwanga kuwika kumwe Eshitepanashi, Polutunato namu Akaiko mwaa vandidiva lyutu livéle mwandwa kwenu mwenu. ¹⁸ Vanavo vandipambadyanga ntima wangu namomo mitima vyenu. Nadoni vaishimu vanu kenga ava.

Nandele

¹⁹ Maganisha uti a ku Ashiya, ankuntumidya nandele. Akila namu Pilishila pamo na liganisha likadyaniánga paing'ande pave, vankuntumidya nandele wadimongo nkati mumwe *UMU*. ²⁰ Vanung'unumunu uti vankuntumidya nandele. Mwenu udyanianga kwashimanyikilo shalinagwaledyo.

²¹ Nangu Paulu, ninkuntumidya nandele aju ngwandika na nkono wangu nimwene.

²² Ikava kenga munu hanannagwaledya shinu *UMU* Yesu Klistu, apate dilana! *UMU* wetu, ida!

²³ Umonyonyo umwe *UMU* Yesu upagwe namu mwenu.

²⁴ Linagwaledyo lyangu lipagwe namu mwenu uti nkati mumwe Klistu Yesu. Ame.

II Vakolintu

Nandele

1 Paulu, myombe umwe Klistu Yesu kwalilotelo lyake Nnungu namu nung'unumunu Timoti kwali ganisha lipágwa ako ku Kolintu pamo na vakwilimyan-ga uti vapágwa disemu uti dya ku Akaya.

² Umonyonyo upagwe kwenu mwenu na amani yak-walakela kumwe Nnungu Tatagwetu namu *UMU* Yesu Klistu.

Nnungu walipambadyangidyo uti

³ Atumbyangilike Nnungu umwe *UMU* wetu Yesu Klis-tu, jo Tatamunu wake nae, Tatamunu washididi na Nnungu wakupambadyanga uti ⁴ átupambadyanga mumauvilo etu uti kwambangidya wetu tuulule kuva-pambadyanga avalá vapágwa mumauvilo oeo kwakupambadyanga kwatupambadyangigwa namu Nnungu. ⁵ Mwaa, kenga mo mwatuumbaligwidya we-tu mauvilo amwe Klistu nimumo momo kwindila imwe Klistu kupambadyanga tunkuumbaligwa kwetu wetu. ⁶ Ikava kenga tunkupata mauvilo ni kwamwaa wakupambadyangigwa na kwambolegwa kwenu mwenu; ikava kenga tunkupambadyangigwa ni kwamwaa wakupambadyangigwa kwenu mwenu akulá kwamupata mulipililila mauvilo lolo átuuvauvan-ga wetu. ⁷ Napane lilindilililo lyetu kwenu mwenu lind-inanopa mwaa tunkumanya do, kenga mo mwamuliin-jidyangidya mwenu mumauvilo etu, namomo mundaliinjidyanga mukupambadyangigwa kwetu.

⁸ Mwenu, hatunalota shinu mmanung'unumunu mu-tikinange mauvilo átupatile ku Ashiya. Mauvilo alo, andítupunda shilinga mpaka kutwova lilindilililo lyaku-nama. ⁹ Namwiu, wetu tundílyona kuukumigwa kupela kanji ni pakulota hatunalikulupile wewe tuvene kanji Nnungu ávadyuwa vakupela. ¹⁰ Nae mushijaidyo shikumene do, andituposha na andauka mushu atu-posha. Kwake nae wetu tundivika lilindilililo lyetu ken-ga andauka mushu atuposha ¹¹ mwenu mutupwashela mukushwali kwenu kwambangidya dashi, vanu voe valambwalele kwaupande wetu kwamwaa walitananilo lyatupatile kwindila yakushwali kwavanu voe.

Shitadídye Paulu atingudyange nnugu wake

¹² Kulitamanga kwetu ni aku, makumbukililo etu amuntima ankumya ushuda kenga mwatunamila mushilambo amu na kupunda namene kwenu mwenu

† Kwali: a ...akulá kutadya mwenu mulipililile mauvilo lolo átu-uvauvanga wetu.

kuvelé kwakulishapeya na ushalowa walóka kumwe Nnungu i kwalimanyilo lyashimunumunu kanji kwau-monyo wake Nnungu. ¹³ Doni, hashipali sha-tumwandikila shamukaulula mwenu kushomya kwali kwigwa shana. Ninkulindila napane yakumanyila uti shana ¹⁴ kenga mwamutumanyila padyoko do, mulidu-va limwe *UMU* Yesu, wetu tundava kulitamanga kwenu kenga mwenu momo munkuva kulitamangila kwetu.

¹⁵ Ngùvenavo wakika au, ngushindapanga shitandi ngwide ninnole pakulota mwenu mupate paida myan-da mivili. ¹⁶ Doni, ngupite ninnola nguka ku Make-doniya kutwala panguma apo, nguujile kwenu mwenu, mwenu mungutumidye ku Yudeya. ¹⁷ Da pan-gushipanga davo po, ngwaneké kenga nimunu wakudumbadumba? Kwali ngutenda milugu vyangu kwashimunu muwakati umo wowo nguushidoni, "Elo, elo" namomo "Mene, mene"? ¹⁸ Kanji kenga Nnungu ákulupilike, lilove lyetu kwenu mwenu halinava shinu "Elo" namomo "Mene." ¹⁹ Mwaa Mwana wa Nnungu, Yesu Klistu ávalangangiligwe pakati penu kwindila yetu, nangu, Shilivanu namu Timoti, haivele "Elo" namomo "Mene" kanji nkati mwake mo, ngwengwe muvelé "Elo." ²⁰ Mwaa vyo vyakulivikila vyake Nnungu vipagwite vyo, nkati mwake nae munkupagwa "Elo." Ni kwamwaa au watutangalela wetu kwindila yake nae "Ame" kwaupande umwe Nnungu kwalishangelo lyake. ²¹ Mwenu, Nnungu ni átadya wetu pamo namu mwenu tunanope nkati mumwe Klistu. Nae ni átupak-ile, ²² ni jojo átutaile namakong'o na kutuvika Imumu wake mmitima vyetu kenga shinu shakwimididya.

²³ Napanelo ninkunshema Nnungu kenga nshuda kwaupande wangu; ivele nimmikile shitete shanikaidilile nangu ku Kolintu. ²⁴ I do, tunkutawala likulupililo lyenu kanji tuvamadengomwenu kwalipuwilo lyenu mwaa kwalikulupililo, mudi-nanopa.

2 Nadoni ndyamuwa nene nimwene hangunaide kavili kwenu mwenu mushipalodi. ² Mwaa ikava kenga nantaa shipalodi, nyani álota kungupa lipuwilo pakavele aijá wanintaile shipalodi? ³ Nimwandikila vy-ovyo vyo kwambangidya pangwida kwenu ko, hangu-navenavo shipalodi kwa avalá ve vavaikidíle vangupe lipuwilo pakuva nangu ndivanavo likulupililo kwenu mwenu uti kenga lipuwilo lyangu ni lyenu mwenu uti. ⁴ Mwaa kutunduvangila mmauvilo oe na ntima ushanona nimwandikila na myodi vyoe i pakulota kun-taa shipalodi kanji pakulota mumanye kuumbaligwa kwalinagwaledyo lyanguvenavo kwenu mwenu.

Kulivalivigwa kwankútega

⁵ Napanelo ikava kenga munu pakati penu atadidyé kupagwa shipalodi, hangutaile nangu kanji kwau-pande unji nikanava wakukalipa namene, atadidyé kwenu mwenu uti. ⁶ Kwamunu kenga aju, shaushanga shavampele vakwinjipa, shinditosh. ⁷ Nadoni paikave davo po, indivaikila munnivalive na mumpambadyange munu ajo pakulota hanatitimile mushipalodi shakumamodya. ⁸ Napavedoni ninkunnaililila mulodye linagwaledyo lyenu kwake nae. ⁹ Ni kwashabaa ai, nimwandikila mwenu pakulota nintende nningo wakumanya kenga kwali muvinu uti, munkuva mmakwigwilila. ¹⁰ Napane aijá wamunnivaliva mwenu kwashinu shoeshoe, nanangu momo nannivaliva. Mwaa shangulivalidile ikava kenga shipali shakulivaliva, asho ndilivaliva kwamwaa wenu pamevo pake Klistu ¹¹ kwambangidya dashi, Shatwani hanatupate kwaujanja wake mwaa hatunatinanga shinu milugu vyake.

¹² Mwenu, panguwikile ku Tolowashi pakulota ngualangange ntenga wambone umwe Klistu, ata ikava kenga *UMU* aningushimulila nnango, ¹³ muntima mwangu hanguvenavo unaiti mwaa palyutu alyo, haninkodídye nung'unumunu Titu. Nadoni ndikavalaila vanavo kutwala kuka ku Makedoniya.

Kutema nkati mumwe Klistu

¹⁴ Napanelo lilambwalalelo lipagwe kwa Nnungu átu-langalalela wetu ngwengwe mumandamano akutema nkati mumwe Klistu na áandadya momo mo kwaindila yetu wetu lyumba lyakunung'angila lyakumanya nae mumautu uti. ¹⁵ Mwaa wetu ni lyumba lyakunung'angila limwe Klistu kwa Nnungu pakati pa avalá vaambolégwa na pa avalá vajaíka. ¹⁶ Kwavanji tunkuva lyumba lyakupela kwakupela; kwavanji tunkuva lyumba lyashingumi kwashingumi. Napane, wakwashi ávenavo lyululilo lyavinu avi? ¹⁷ Wetu hatunava shinu kenga voe vatandéla nshulusho lilove lyake Nnungu kanji kenga tuvanu vaumwiu, kenga tuvanu twaloka kwa Nnungu, pamevo pake Nnungu na nkati mumwe Klistu, tunkutangola.

Wetu ni tuvatumika vaimbodi yaambi

3 Da doni po tunkutunduvanga kavili kulitumbyanga wewe tuvene? Kwali kenga vanji tunkulota ibalugwa yamalailililo kwenu kwali kwaloka kwenu? ² Mwemwe mmene ni ibalugwa yamalailililo etu yandikígwe mmitima vyetu imanyíka na ishomégwa na vanu uti ³ mulilodya kuva ibalugwa imwe Klistu ipalakadígwe namu wetu na yandikígwe i kwawinu kanji kwa Imumu wake Nnungu mumi, i mmabau amajanga † kanji mmabau ammitima vyavanu. ††

⁴ Napanelo ni kwaindila imwe Klistu yatavenavo likulupililo kenga ali kwa Nnungu. ⁵ I do, tunkuvanavo

† *Lola Kuma 24:12; 31:18; Kumbukumbu 9:10-11.* †† *Lola Eshikieli 11:19; 36:26; Yelemya 31:33.*

lyululilo wewe tuvene lyakukumbukila shinu shoeshoe kenga shinkwalakela kwetu kanji lyululilo lyetu linkwalakela kwa Nnungu. ⁶ Nae ni átupele lyululilo lyakuva wetu tuvatumika vaimbodi yaambi i imbodi yalutembo kanji ya Imumu mwaa lutembo lunkubyaa kanji Imumu ankwing'a shingumi.

Lishangelo lyaimbodi yaambi

⁷ Kanji napane ikava kenga utumika widínavo kupela vávangile dinembo mmajanga undiidanavo lishangelo ata mpaka kuvatadya vanaishilaeli havanaulule kwona ing'ope imwe Musha kwamwaa wakushenga shenye shake kushenga ko kúshilambaleka, ⁸ da napane utumika wa Imumu wo, haumamodya lishangelo lyoe? ⁹ Doni, ikava kenga utumika widínavo ukumu uvénavo lishangelo, kushi utumika wídanavo ishaliya wo, haumbaligwa lishangelo! ¹⁰ Namwiu kwaing'ano ai ashilá she shivénavo lishangelo hashive lishangelo kwamwaa walishangelo alilá likumene limpundíle. ¹¹ Mwaa ikava kenga ashilá shíshilambaleka shivénavo lishangelo, kushi ashilá shíkamililika sho, hashuumbaligwa lishangelo!

¹² Napavedoni pakuva tunkuvanavo lilindilililo ali, tunkuvanavo ntima shii. ¹³ Hatunava shinu kenga Musha áshiinikidya inguvo ing'ope yake pakulota vanaishilaeli havanone ata kumwisho kwakushenga akulá kúshilambaleka. ¹⁴ Kanji ding'anong'ano dyave dindinanapegwa mwaa ata mpaka nelo inguvo yoyo inkupagwa paishomegwa imbodi yakala. Yanavo indáushika bai nkati mumwe Klistu. ¹⁵ Napane mpaka nelo pavashomya vimwe Musha, inguvo inkudivilikidya mitima vyave. ¹⁶ Kanji akapagwa jumo ánshinjiulila *UMU* ntima wake, bai inguvo ayo indaushika. ¹⁷ Mwenu, *UMU* ni Imumu na pashinu papagwite Imumu wake *UMU*, apo upali unaiti. ¹⁸ Nadoni wetu uti kwading'ope dyavakatwinikididye twaneka lishangelo lyake *UMU*, tunkujaluwangigwa kwaing'ope yoyo kwalishangelo kuka kulishangelo, kujaluwangigwa kwalakéla kumwe *UMU* ávele Imumu.

Lilangadyo lyantenga wambone

4 Napavedoni, pakuva tunkuvanavo utumika au watupatile kwashididi shake, havinatudidima mitima. ² Leka apo, tundita uti vyashipii na vyadyoni patukanama muvyaushwang'a kwali patukaashadyanga lilove lyake Nnungu kanji kwaindila yakuvalanganga ngala umwiu, tunkulitumbyanga mmakumbukililo amuntima vyavanu uti pamevo pake Nnungu. ³ Kanji ata ikava kenga ntenga wambone wetu undiinikiligwa, winikiligwé bai kwa avalá vajaíka. ⁴ Kwavanavo, nnungu wawakati au andivaputadya ding'anong'ano dyavakakulupila kwambangidya havanone lilangadyo lyantenga wambone walishangelo lyake Klistu ávele ing'ope yake Nnungu. ⁵ Mwaa hatunalivalanganga wewe tuvene kanji tummalanganga Yesu Klistu kuva *UMU* kutwala wetu kuva tuvatumwa venu kwamwaa umwe Yesu. ⁶ Doni, Nnungu átangwele, "Kushii lipag-

we lilangadyo," † ni jojo álangadidye mmitima vyetu pakulota kutwing'a lilangadyo lyalimanyilo lyalis-hangelo lyake Nnungu mwing'ope imwe Klistu.

Mali muvyombo vyaulongo

⁷Wetu napane tunkuvanavo mali ala muvyombo vyaulongo pakulota yaneke kenga dimongo dipunda apo ni dya Nnungu i dyetu wetu. ⁸Kula upande tunkwikaliligwa kanji hatunakandigwa shinu; tunkwambambidyanga kanji hatunajaa lilindilililo; ⁹tunkupapatigwa kanji hatunaambukangigwa shinu; tunkuligwanga kanji hatunabamalegwa shinu, ¹⁰ngwengwe tunyukata kupela kumwe *UMU* wetu Yesu Klis-tu mumili pakulota shingumi shake Yesu shililodye momo mumili vyetu. ¹¹Doni, wetu tûpagwite musingumi ngwengwe tunkujauligwa tupele kwamwaa umwe Yesu kwambangidya shingumi shake Yesu shililodye momo mumili vyetu vipéla. ¹²Nadoni kupela ankukola madengo nkati mwetu kanji shingumi shinkukola madengo nkati mwenu.

¹³Napanelo pakuva tunkuvanavo imumu imo yoyo yalikulupililo kenga mwavandikidile, "Ndikulupila napane nditangola," nawetu momo tundikulupila napane tunditangola ¹⁴tumanya kenga aijá ándyuwidye *UMU* Yesu, andatudyuwa nawetu momo pamo namu nae kutwala kutuukanavo pamo namu mwenu pamevo pake. ¹⁵Mwaa uti avi ni kwapaida yenu mmene kwambangidya umonyo uvawikila kula wakati vanu voe utadye lilambwalalelo lyanjadyeke kwalishangelo lyake Nnungu.

¹⁶Napavedoni havinatudidima mitima. Ata ikava kenga umunu wetu wapanda unkunda kanji umunu wetu wankati unkutandegwa waambi kula liduva. ¹⁷Mwaa mauvilo awakati au, maangolo na akupita, anavo ankwidanavo kwetu wetu lishangelo líkamalilika liidópa namene kupunda uti ¹⁸akuno tulola vinu i vyanéka kanji víkaaneka. Mwaa vyanéka, vyakupita kanji víkaaneka ni víkamalilika.

Nama kwalikulupililo i kwakwona

5 Mwenu, tundimanya kenga ikabamalegwa yema yatunama mushilambo amu, tunkuvanavo ing'ande kumwe Nnungu, ing'ande yavakadangile na makono yangwengwe kuwa. ²Mwaa tûpagwite mwiye-ma ai, tunkuula tulindila na mweshe ukumene kutugwadya ing'ande yetu yakuwa ³ikava kenga mwiu tûg-wete ing'ande ayo, hatwaneka kuva matakudavo. †⁴Mwenu, tûpagwite mwiye-ma ai, tunkuula vitwidopa mwaa hatunalota shinu tuulangigwe kanji vatugwadye pakulota ashilá shipéla shimiligwe na shingumi. ⁵Átu-panganiangididye kwashinu shosho ashi ni Nnungu jo átupele Imumu kuva kenga shinu shakwimididya.

⁶Napavedoni, ngwengwe tunkuvanavo ntima shii tu-manyanya do, patupagwite na mili au, tunkuva kushu namu *UMU*. ⁷Mwaa tunkunama kwalikulupililo i kwak-

† *Lola Kutunduvanga 1:3.* †† *Maandiko anji akala: a ...ikava kenga mwiu tûulenge dinguvo, havatukodya tûvele matakudavo.*

wona. ⁸Napane tunkuvanavo ntima shii na inkutunagwela tupagwe kushu kwamili na tupagwe kumwe *UMU*. ⁹Nadoni ata ikava kenga tuvelé nng'ande kwali panda, shabaa yetu ni kulota innagwele *UMU*. ¹⁰Mwaa wetu uti indituvaičila twimile palibengi lyaukumu lyake Klis-tu pakulota kula munu apate kulingana na shimaden-go ashilá shatandile mumili, kwali shambone kwali shakunyata.

Ntenga waliigwilanilo

¹¹Napavedoni pakuva tundimanya kunjopa *UMU*, tunkuvashomba vanu. Shatuvele sho, shinkumanyika na Nnungu; ninkulindila kenga shinkumanyika momo mmakumbukililo enu amuntima. ¹²I do, tunkulitum-byanga kavili kwenu mwenu kanji tunkumupa mwenu litala lyakulota mulyone kwamwaa wetu wetu kwambangidya muvenavo shakuvajang'ula avalá vallyóna kwapanda i kwa ashilá shivéle muntima. ¹³Mwenu, ikava kenga kwali tunkudulumbuka ni mwaa wa Nnungu, ikava kenga kwali tunkuvanavo ding'ano ni mwaa wenu mwenu. ¹⁴Mwaa linagwaledyo limwe Klistu linkututawala mwaa tundiwikila pamwisho kenga jumo andipela kwamwaa wavanu uti, nadoni uti vandipela. ¹⁵Nae andipela kwamwaa wavanu uti pakulota avalá vanáma, havananame kavili kwamwaa wave vo vene kanji vaname kwamwaa umwe aijá ápadile na kudyuka kwamwaa wavanavo.

¹⁶Nadoni kutunduvangila ambi apa hapali watum-malangilila kwodananavo shimunu. Ata ikava kenga kunantandi Klistu tushimlangilila kwodananavo shimunu kanji napane hatunammalangilila shinu kavili davo. ¹⁷Napavedoni, ikava kenga munu ankupagwa nkati mumwe Klistu, ajo ni shiumbi shaambi. Vyakala vindipita. Mwenu, viidilé vyaambi. ¹⁸Avi uti vinkwalakela kwake Nnungu aijá áttutadidye twigwane na jo mwene kwaindila imwe Klistu atwing'a utumika waliigwilanilo, ¹⁹yani Nnungu andipagwa nkati mumwe Klistu atadya shilambo shiigwane namu jo mwene pakavavangilila kupujungula kwave na atukamudya ntenga waliigwilanilo. ²⁰Napavedoni wetu ni mabaloshi vamwe Klistu; Nnungu alaililila kwaindila yetu wetu. Tunkunjugwangila kwamwaa umwe Klistu, mwigwane namu Nnungu. ²¹Aijá áka-manyite lidambi anintadya kuva lidambi kwamwaa wetu wetu kwambangidya tuvalangiligwe kuva ishaliya yake Nnungu nkati mwake.

6 Napane, tukola madengo namu Nnungu tunkun-naililila hamunapwashalele bule umonyo wake Nnungu. ²Mwaa nae atédoni, "Nangu ndikwigwa muwakati uvaikidíle, ndikupwashela muliduva lyakwambola." ‡ Mwenu, au ni wakati uvaikidíle. Mwenu, ali ni liduva lyakwambola.

‡ *Lola Ishaiya 49:8.*

Mauvilo amwe Paulu mukutumika

³ Hatumpele munu ishaliya yakulota kulikuvala kwambangidya utumika wetu, haunaanekke makosha. ⁴ Leka apo, nkati muvinu uti tunkulilodya kenga tuvatumika vake Nnungu, nkati mukulipililila kwoe, mu-mauvilo, muwou, muvyakujowa, ⁵ mukushapigwa viboko, mukungwa, muvijungulima, mushimadengo shakupwateka, muushilo bila lwonu, mwindala, ⁶ kwaungave-ushapu, kwalimanyilo, kwakulipililila, kwalitananilo, kwa Imumu Wanashwe, kwalinag-waledyo líkave shinankulaba, ⁷ kwalilove lyaumwiu, kwadimongo dyake Nnungu, kwadyuti dyaishaliya kunkanakono na kunshanda, ⁸ nkati mukwishimika na mukwiludyangigwa, mukupata shimbili shakunyata na shambone, twaneka kenga tuvakushang'apa kumbe tuvelé tuvaiu, ⁹ kenga túkamanyika kumbe tunkumanyika namene, kenga túpela kumbe mwe, tuvangu-mi, kenga túpata shaushanga kumbe patukabyaigwa, ¹⁰ kenga túvenavo shipalodi kumbe ngwengwe tunkupuwanga, kenga tuvamashikini kumbe ni túvatadya voe vatajilike, kenga túkave pashinu kumbe tunkuvanavo uti.

¹¹ Tunditangola ngala namu mwenu mmakolintu; nti-ma wetu uvelé mwandwa. ¹² Wetu hatunandivilila shinu mwenu ila mwenu munkudivililigwa kwalilotelo lyenu kwetu wetu. ¹³ Napane kwakubadilishania, ngutangola namu mwenu kenga mmana mmadikidiki, ungula momo mitima vyenu.

Hamunalyunge likangoti na vákakulupila

¹⁴ Hamunalyunge likangoti namu vákakulupila. Mwaa ipagwité imbodi shani pakati paishaliya na ungave-lilamulo? Kwali upagwité upamo shani pakati palilangadyo na shii? ¹⁵ Da lipagwité lyunganilo shani pakati pamwe Klistu namu Shatwani? † Kwali imbande shani yajavananga nkúkulupila namu ákakulupila? ¹⁶ Da lipagwité lyunganilo shani pakati paing'ande ya Nnungu na vannungu vakushang'apa? Mwaa wetu ni ing'ande ya Nnungu mumi. Kenga mwatangalela Nnungu,

“Ndatenga lyutu kwavanavo ndawena pakati pave, nangu ndava Nnungu wave, vanavo vandava venentete vangu.” ††

¹⁷ Napavedoni, “Lyumadyange pakati pave, vaambukange, atangola *UMU*, hamunakamule shinu shishapu na nangu nampwashalela. ‡

¹⁸ Nangu ndava tatamunu kwenu na mwenu mundava mmana valume na vakongwe kwangu nangu, atangola *UMU* Wadimongo-uti.” ††

† *Mushigalegu: a Belialilina linji limwe Shatwani.* †† *Lola Kuma 29:45; Valawi 26:12; Yelemiya 32:38.* ‡ *Lola Ishaiya 52:11; Eshhekieli 20:34, 41; Shepaniyashi 3:20.* †† *Lola Kuma 4:22; II Samuwele 7:8, 14; Ishaiya 43:6; Yelemiya 31:9; Osheya 1:10.*

7 Mmakunagwaleka, pakuva tunkuvanavo vyakulivikila avi, tulyushaniange vyaudagwa uti vyamumili na vyamwimumu tuwisha popo kwilimyan-ga nkati mukunjopa Nnungu.

Lipuwilo limwe Paulu

² Panganianga litala lyetu mmitima vyenu. Hapali watumwanadile, hapali watumwashadyenge na hapali watunshandile. ³ Hanganatangola shinu vinu avi pakulota kumuukumu mwaa kenga mo mwanimwaulidile, mwenu munkupagwa mmitima vyetu kwambangidya tupele namu mwenu kwali tuname namu mwenu. ⁴ Ninkuvanavo ntima shii kwenu mwenu; kwenu mwenu ko, ninkulyumya shumbi poe. Ninkuumbaligwa kupambadyangigwa; nkati mumauvilo etu uti, ninkuumbaligwa lipuwilo mpaka kupakatika.

⁵ Doni, patuwikile ku Makedoniya hatupatile litala lyakupumula kanji tundipata mauvilo akula inamuna; panda apa ugombi na nkati mmitima mo, kujopa. ⁶ Kanji napane Nnungu ávapambadyanga vakwanaleg-wa, anditupambadyanga wetu kwaindila yakuwika Titu, ⁷ i gweka pakuwika nae kanji namomo kwakupambadyanga kwamumpambadyenge mwaa nae andituvalangangila mweshe wenu, shipalodi shenu pamo na dukuduku yenu kwamwaa wangu mpaka kutadya lipuwilo lyangu kwanjadyeka poe.

⁸ Mwenu, ata ikava kenga nangu nintadya shipalodi mwibalugwa, hangunalyambila shinu ata ikava kenga ngushindalyambila yakwigwa do, ibalugwa yangu inintadya shipalodi ata paikavele wakati ungwipi tu. ⁹ Kanji napane ambi ninkupuwanga i kwamwaa wakutaigwa shipalodi kanji kwashipalodi shenu shinimuukanavo mukulijugulanga. Mwaa mwenu mundipata shipalodi kwodananavo mwalatela Nnungu, nadoni hamupatile ashala yoeyoe kwamwaa wetu wetu. ¹⁰ Mwaa shipalodi shoodánanavo malotelo ake Nnungu shinkwidanavo kulijugulanga kuka mukwambolegwa bila kulyambila. Kanji shipalodi shamushilambo shinkwidanavo kupela. ¹¹ Talola shana shipalodi shosho ashi shaalakéla kwa Nnungu shíng'a vyepo nkati mwenu: kutumbama shani, kushilidya shani, kushanga shani, kujopa shani, mweshe shani, dukuduku shani, ukumu shani! Nkati muuti mwenu mundililodya kuva mmanu múkave ushapu kwamwaa au. ¹² Nadoni ata ikava kenga nimwandikila haivéle kwamwaa umwe aijá ámwandile muje na ata i kwamwaa umwe aijá wavamwanadile kanji pakulota mwemwe mmene muulule kwanalela dukuduku yenu kwetu wetu pamevo pake Nnungu. ¹³ Napavedoni wetu tundipambadyangigwa.

Leka yakupambadyangigwa ai, tundipuwanga namene patwonite lipuwilo limwe Titu mwaa nkati muntima mwake mundipatikana kudidimidya kwamwaa wenu uti. ¹⁴ Doni, ikava kenga shipali shangulyumididye shumbi yenu mwenu kwake nae ko, havangutaile dyoni kanji kwoda uti vyanimmalangidile mwenu viu, namomo kulyona kwetu pamevo pake Titu, kwiu. ¹⁵ Nadoni lilotelo lyake kwenu mwenu

linkwanjadyeka namene akumbukila kwigwilila kwenu, mwamumpwashaladile mujopa na kutatamela.
¹⁶ Ninkupuwanga namene mwaa kwakula shinu ninkukulupila mwenu.

Kupakatika kwautajili wakujaula

8 Tunkumanyiya napane mmanung'unumunu umonyo umwe Nnungu upatikanéngé mumaganisha a ku Makedoniya. ² Doni, nkati mumauvilo oe, kumbaligwa kwalipuwilo lyave na ungave-pashinu wakumamodya wave, undipakatika utajili wakujaula kwaupande wave. ³ Mwaa ninkumya ushuda kenga vanavo kwamalotelo avo vo vene, vandyumya kwodananavo lyululilo lyave na ata mpaka kupunda apo ⁴ vatujugwangila kwakutukanyalidya vapate paida yakuliinjidyanga † mukuvapwashela vakwilimyanga. ⁵ Namomo havatandile gweka vyatushilindila wetu kanji shitandi vandilyumya vo vene kumwe *UMU* kutwala kulumya kwetu wetu kwamalotelo ake Nnungu. ⁶ Nadoni tuninnaililila Titu doni, mo mwatunduvangidile, amalilile momo shimadengo ashi shaumonyo pakati penu. ⁷ Napanelo kenga mo mwamuumbaligwididye nkati muuti; mulikulupililo, mukutangola, mulimanyilo, mukutumbama kwiu na mulinagwaledyo lyetu nkati mwenu, namomo likanyalidye muumbaligwe na umonyo wowo au.

⁸ Avi ninkutangola i kenga lilamulo kanji pakulota ninninge ngulinganianga na kutumbama kwavanji kenga linagwaledyo lyenu Iyaumwui. ⁹ Mwaa mwenu mundimanya umonyo umwe *UMU* wetu Yesu Klistu doni, àvele avi ntajili kwakunnagwaledya mwenu nae andilitenda kuva ákave pashinu kwambangidya kwaindila yaungave-pashinu wake, antadye mwenu muke mukave mmatajili. ¹⁰ Ala napane ni maoni angu: shitendo ashi ni kwapaida yenu mwenu mwemwe mútunduvange mwaka upitile i gweka mukutenda kanji namomo mukunagwaledya. ¹¹ Kanji napane malila ashilá shamutunduvange kwambangidya dashi, kenga mo mwaipagwididye dukuduku yakunagwaledya namomo kupagwe kukumalilila nkati muvinu vyamuvenavo. ¹² Mwaa ikapagwa dukuduku, nshango ukukulubaligwa kwodananavo ashilá shavenavo muni i shakavenavo.

¹³ Malotelo etu i do vanji vapate kugalukigwa, mwenu mwidopelwe kanji pakulota kupagwe kulinganana. ¹⁴ Muwakati au kuumbaligwa kwenu mwenu kundadiva lyutu Iya avalá vákavenavo pakulota namomo kuumbaligwa kwavanavo ko, kudive lyutu lyenu mwenu kwambangidya kupagwe kulinganana. ¹⁵ Kenga indyandikigwa, "Aijá álakwete oe havenavo libadila na aijá álakwete padyoko, halamwovite." ††

Titu vankuntumidya ku Kolintu

¹⁶ Napanelo lilambwalalelo lipagwe kwa Nnungu ávikile kutumbama koko kwanguvenavo kwenu mwenu muntima mumwe Titu. ¹⁷ Mwaa Titu haigwi-

† Kwali: a ...umonyo wakuliinjidyanga. †† Lola Kuma 16:18.

lidile gweka lijugwangilo lyetu kanji àvenavo kutumbama kwoe, ankwida kwenu mwenu kwamalotelo ake jo mwene. ¹⁸ Namu nae wetu tunkuntumidya nung'unumunu, jojo jo, shimbili shakuvalanganga ntenga wambone shindyandavala mmaganisha uti. ¹⁹ I gweka asho kanji namomo anditandalegwa na maganisha pakulota atupalakele patukola shimadengo ashi shaumonyo shatutumikila kwalishangelo lyake jo mwene *UMU* na kwambangidya kulodya malotelo etu ambone. ²⁰ Tunkulinyemya doni kwambangidya muni hanatushashulange kwamwaa wanshango ukumene watutumikila. ²¹ Mwaa tunkwangaikangila ashilá shashalowa i gweka pamevo pamwe *UMU* kanji namomo pamevo pavanu. ²² Tunkuntumidya napane pamo na vanavo nung'unumunu junji, jojo jo, myanda vyoe na kwadinamuna dyoe tunintenda nningo kutwala kumwona kuva muni átumbama namene kanji napane ankuvanavo dukuduku yoe kwamwaa walikulupililo lyavenavo kwenu mwenu. ²³ Kwaupande umwe Titu, nae po ni nyangu na mmádengomwangu kwamwaa wenu mwenu. Kwaupande wava-nung'unumunu vanji vo, vanavo ni vakutumigwa vamaganisha, àvele lishangelo lyake Klistu. ²⁴ Napavedoni pamevo pamaganisha, valodye umwui walinagwaledyo lyenu na shabaa yatulyumidya wetu shumbi kwenu mwenu.

Lipwashalelo kwavakwilimyanga va ku Yelusalemu

9 Mwenu, kwaing'ano yakuvatumika vakwilimyanga haivakidile nimwandikile. ² Mwaa ndimanya kutumbama kwenu, shinu shangulyumidya shumbi kwavamakedoniya ndivaulila doni, tangu mwaka upitile vaakaya vanavo vavelé tayali na dukuduku yenu inkuvaimulanga voe. ³ Kanji napane ndivatumidya vavung'unumunu ava pakulota kulumya kwetu shumbi yenu mwenu hakunagalukange kwamwaa au kanji kwambangidya muve mmakulipanganianga kenga mwangutangaladile. ⁴ Ikanavadavo, vamakedoniya ikava kenga vandaida pamo namu nangu kutwala kunkodya mwenu mukalipanganienge, wetu tundapata dyoni patukatangola dyoni dyamulota kupata mwemwe mmene kwamwaa walikulupililo likumene ali. ⁵ Napavedoni ndyona kudyanga ndivalaililile vavung'unumunu valangalele pakulota vapangange kaladavo shadaka shamulivikidile kunantandi kwambangidya dashi, shanavo shive tayali kenga shadaka shamuumidye kwalilotelo lyenu i kwaku-muungila.

Nnungu annagwaledya nkúmya walipuwilo

⁶ Nidoni, ápanda padyoko, andapuna padyoko; ápan-da poe, andapuna poe. ⁷ Kula muni aumye amulá mwamulidile muntima mwake i kwashipalodi kwali kwakumuungila mwaa Nnungu ankunnagwaledya nkúmya walipuwilo. ⁸ Nnungu napane ankuulula kutadya umonyo uti uumbaligwe kwenu mwenu paku-

‡ Lola Mikong'o 3:4. †† Lola Mikong'o 11:24-25; 22:9.

lota muuti na muwakati uti, muvanavo uti vitósha, muumbaligwidye mushimadengo uti shambone.

⁹ Kenga indyandikigwa,

“Andimwadila kuvapa vákave pashinu; ishaliya yake inkupagwa ngwengwe.” †

¹⁰ Mwenu, Nnungu ájaula imbeju kwankúlima na ligung'u pakulota tulye, jojo jo andamupa na anaanjadyedya imbeju yenu na andatadya ainjipike mapuno aishaliya yenu. ¹¹ Mwenu mundatajilika mudinamuna uti mpaka mwinjile mukujaulanga, ko kutadya kwaindila yetu wetu lilambwalalelo lipagwe kumwe Nnungu. ¹² Doni, utumika wamutenda au, haunava shinu wakuvapa gweka avilá vivóva vakwilimyanga kanji namomo, unkupakatika mulilambwalalelo lyoe kumwe Nnungu. ¹³ Kwaindila yakulilodya ngala utumika au, vanavo vandamupa lishangelo Nnungu kwamwaa wakwigwilila kwenu kwalakéla mukulyaula kwenu nkati muntenga wambone umwe Klistu na kwamwaa wakujaulanga kwenu munshango kwavana vo na kwavanu uti. ¹⁴ Mukushwali kwave yenu mwenu vanavo vankuvanavo mweshe woe kwenu kwamwaa waumonyo wakupunda apo wampele mwenu Nnungu. ¹⁵ Lilambwalalelo lipagwe kumwe Nnungu kwamwaa wainudyoyake íkaulukika kutadolya.

Madalaka amwe Paulu ankwaloka kumwe *UMU*

10 Mwenu, nene nangu Paulu ninkunjugwangila mwenu kwakulishapeya na kwaupole umwe Klistu, nene ngwaneka kuva wakulishapeya pangupagwa namu mwenu kanji ninkali ndikanapagwa. ² Ninkunjugwangila doni, pangupagwa po, haivaikidile kwangu nangu kuvanavo ntima wakulishiya kwadimongo dyangwona kenga ndalyalaveka ngutumila kwa avalá vatwóna wetu kwodananavo shimunu. ³ Mwaa ata tukanama shimunu, hatunatenda shinu ing'ondo kwodananavo shimunu. ⁴ Mwenu, dyuti dyatutandela ing'ondo yetu hadinava shinu dyashimunu kanji dyanavo, dinkuvanavo dimongo dimwe Nnungu dyakubamalanga mangongo. ⁵ Tunkubamalanga makumbukililo na kulyona uti kulumilídyá apinga limanyilo lyake Nnungu na tunkuteka makumbukililo uti pakulota amwigwilile Klistu ⁶ tuva tayali kuukumu ungaigwilila uti, po pailota kuwikila popo kwigwilila kwenu.

⁷ Mwenu mulola vinu kwapanda tu. Ikava kenga munu ankulikulupila jo mwene kuva umwe Klistu akumbukile kavili jo mwene shinu ashi: kenga mo mwavalalele nae umwe Klistu, nawetu momo tuvamwe Klistu. ⁸ Mwaa ata ikava kenga nangu ninkumamodya kulumyuma shumbi kwamwaa wamadallaka etu alalá aumidye *UMU* pakulota kundenga i kumbamola, hangutaigwa dyoni. ⁹ Hangunalota shinu ngwaneke kenga nanjujuwanga kwadibalugwa dyangu. ¹⁰ Mwaa vanji vankushidoni, “Dibalugwa dyake dinajowa na dyadimongo kanji mavalelo ake amili akudabadabanga na shitangodi shake shakulidyuka.”

¹¹ Munu kenga aju amanye doni, ashilá shatutangola

† *Lola Dimu 112:9.*

mudibalugwa tukanapagwa, ni shosho shatuvele muvitendo tukapagwa.

¹² Hatunalyalaveka shinu kulivikanga kwali kulilinganianga namu avalá valitumbúdyá vo vene. Pavalipima shivanavene na pavalilinganianga shivanavene, havave ding'ano. ¹³ Wetu napane hatulyumyuma shumbi kupunda shipimo kanji kulumyuma kwetu shumbi kundavanavo mpaka kulingananavo shipimo shatukamudidye Nnungu, sho shimwikidile ata mpaka mwenu. ¹⁴ Mwaa hatunapunda shinu shipimo shetu kenga tuvanu tókawikile kwenu; wetu tuvelé tuvatandi kuwika ata mpaka kwenu twidanavo ntenga wambone umwe Klistu. ¹⁵ Hatunalyumyuma shinu shumbi kupunda shipimo kwashimadengo shavanu vanji. Tunkulindila napane palikulumuka likulupililo lyenu, shimadengo shetu pakati penu shikulumwike namene kwodananavo shipimo shetu ¹⁶ pakulota tualangange ntenga wambone mudisemu dimpúnda mwenu i kwakulumyuma shumbi kwashimadengo shitandéke mwisemu yamunu junji. ¹⁷ “Aijá ályumyuma shumbi, alyumye shumbi nkati mumwe *UMU*.” ††¹⁸ Mwaa hanakubalika munu álitumbudya jo mwene kanji akubalika aijá wantumbudya *UMU*.

Paulu na vamyombe vakushang'apa

11 Nangu ngushindalota mwenu mungupililile muujinga padyoko! Mwiu nangu munkungupililila! ² Mwenu, dukuduku yanguvenavo kwenu mwenu ni dukuduku yakwalakela kumwe Nnungu mwaa nangu ndilivikila kunnombya mwenu kwanume jumo; ndikankamudye kumwe Klistu kenga mwali ntete ákave ushapu. ³ Kanji shangujopa ni ashi, kenga mo mwanduwangidídye nyoka Eva kwaujanja wake, ding'anong'ano dyenu inkuululika kumwashadyanga mukulipudya kwivu na kúkave ushapu kumwe Klistu. ⁴ Mwaa ikava kenga andaaloka munu junji nammalangangila mwenu Yesu junji watukammalangéngé wetu, kwali ikava kenga mundapwashalela imumu inji yamukapwashaladíle, kwali ntenga wambone unji wamukapwashaladíle, mwenu uti avi munkulipililila shana! ⁵ Mwenu, hangunalyona shinu ata padyoko vela kuva nindikidiki kwa avalá “vamyombe vakumene.” ⁶ Ata ikava kenga hangunava shinu nimunu wakumanya kutangola kanji i mwanguvalalele nkati mulimanyilo. Shinu ashi tundilodya ngala kwenu mwenu kula lyutu na kula wakati.

⁷ Da nditenda lidambi pangulishapaidye kwambangidya mwenu vankwedye kwamwaa wakummalangangila ntenga wambone wake Nnungu monyo? ⁸ Ndipakanyola vyamaganisha anji ngupata lipwashalelo lyavanavo kwambangidya nintumike mwenu. ⁹ Nangu pangupagwíte namu mwenu vingwo va vinu, hapali wanintikile ligogo mwaa vanung'unumunu vaalakadíle ku Makedoniya vanavo vaníngupa avilá víshingwova nadoni ndilishunga pakulota hangunantike ligogo mwenu na ndauka mushu

†† *Lola Yelemya 9:23-24.*

ngulishunga yadavo. ¹⁰ Kwoda umwiu umwe Klistu un-kupagwa nkati mwangu, kulyumya kwangu aku shumbi hapali wakumaladya isemu ya ku Akaya.

¹¹ Mwaa shani? Da, nangu mwenu nannagwaledya shinu? Ámanya ni Nnungu.

¹² Napanelo shangutenda sho, ndauka mushu ngutenda kwambangidya ngudivilile litala lya avalá valóta vapate litala lyakulota vaaneke kulinganana namu wetu muvinu vyavalyumidya vanavo shumbi.

¹³ Mwaa vanu avo ni vamyombe vakushang'apa, vamadengo vakuduwanga valijaluwánga kuva vamyombe vamwe Klistu. ¹⁴ Ashi hashinava shakutikinika mwaa jo mwene Shatwani, nae andálijaluwanga kuva njelo walilangadyo. ¹⁵ Napavedoni, hashinava shinu shakujowa vatumika vake kulijaluwanga kuva vatumika vaishaliya. Mwisho wave undava kulingananavo vitendo vyave.

Paulu ankulyumya shumbi muvinu vyakudabadabanga

¹⁶ Kavili ninkushidoni, hanapagwe munu wakungwona kuva ninjinga. Kanji ikava kenga mwui munangwona kuva ninjinga, ngupwashalela kenga mwamukampwashaladíle njinga kwambangidya nanangu momo ngupate kulyumya shumbi ata padyoko vela! ¹⁷ Shangutangola mukulishiya kwakulyumya shumbi aku, hangunatangola shinu nimwoda *UMU* kanji kenga ninjinga. ¹⁸ Pakuva voe vankulyumya shumbi kwodananavo shimunumunu, nanangu momo ndalyumya. ¹⁹ Mwaa mwenu kwoda muvenavo ding'ano dyoe, munkulipililila kwavajinga. ²⁰ Mwenu munkulipililila ata mpaka munu akamuukanavo muutumwa, kwali akanshonda, kwali akankangola, kwali akankoma malatuma. ²¹ Kwadyoni dyangu ninkushidoni, kwavinu avi wetu tundidabadabanga namene!

Ashilá shavalota kulyalaveka vanji kulyumidya shumbi, ngutangola kenga ninjinga, nanangu momo ndalyalaveka. ²² Da vanavo vo, vabalaniya? Nanangu momo. Vanavo vo, vanaishilaeli? Nanangu momo. Vanavo vo, udukulu umwe Abulaamu? Nanangu momo. ²³ Da vanavo vo, vatumika vamwe Klistu? Nangu po ndimamodya, ngutangola kenga nimunu wakudulumbuka, mushimadengo shoe, mukungwa myanda vyoe, mukushapigwa viboko myanda vyoe, muvijoidyo vyakulota kupela myanda vyoe. ²⁴ Myanda mwanu vayuda vangushapa viboko alubaini kusha shimo. ²⁵ Myanda mitatu ngukanyalegwa ding'ong'o, mwanda umo ngwamangigwa majanga, myanda mitatu ngutitimila mwimanga, mwanda unji wo shilo uti na mui ngwalela lela-lela-lela shing'ati imanga. ²⁶ Ngwengwe nguvé mushimwanda, muvijoidyo vyadyundi, muvijoidyo vyamajambashi, muvijoidyo vyavakwetu, muvijoidyo vyavamidi, muvijoidyo munjini, muvijoidyo kushimbweshe, muvijoidyo mudimanga na muvijoidyo pakati pavanung'unumunu vakushang'apa, ²⁷ mushimadengo shakupwateka, shilo myanda vyoe bila lwonu, mwindala na mwinyota, mukwova shakulya myanda vyoe, mukudidima imepo na muwou. ²⁸ Leka

vyapanda avi, kunkupagwa kula liduva kwidopa kwamangaikangilo angu kwamaganisha uti. ²⁹ Wakwashi ádabadabenge pandikadabadabenge nangu? Wakwashi wavantadidye agwe paikangupwateke nangu muntima?

³⁰ Ikava kenga indivaikila ngulyumye shumbi, ndalyumidya muvinu vilódyá kudabadabanga kwangu.

³¹ Nnungu umwe *UMU* wetu Yesu Klistu, jo Tatamunu wake nae, átumbyangilika ngwengwe ankumanya kenga hangunashang'apa shinu. ³² Ku Damashiko, gavana ávele mwina mumwe umu Aleta, andávavika vakulaledya milango vyanjini vyavadamashiko pakulota vangukamule. ³³ Kanji kupitila palidilisha lyalin-gongo, vaníngushuluwa ngúvele mulitenga kutwala kupalanyoka mmakono mwake.

Maono amwe Paulu na miva mumili mwake

12 Ininguvaikila ngulyumye shumbi. Ata ikava kenga haipali paida, ndauka napane ndavalangan-ga dindoti na maono aalákéla kumwe *UMU*. ² Nimmanya munu nkati mumwe Klistu, vyaka kumi na nsheshe vipitíle kunyuma, andítanduligwa mpaka kuwa kwantatu, kwali aukile na mili kwali haukile na mili hangumanyite, ámanya ni Nnungu. ³ Nangu ndimanya doni munu kenga aju, kwali aukile na mili kwali haukile na mili hangumanyite ámanya ni Nnungu, ⁴ nae andítanduligwa mpaka kulyutu lyalipuwilo kutwala kwigwa malove apúnda shitangodi na alaéka munu kuvalanganga. ⁵ Kwaupande wamunu kenga aju ndalyumidya shumbi kanji kwaupande wangu nangu nimwene, hangulyumidya paikava mukudabadabanga kwangu. ⁶ Ata leka ngulyumidye shumbi hangunave ninjinga mwaa ndikatangwele vinu viu. Hangutamwa napane kutenda davo kwambangidya hanapagwe munu wakunguvikila namene nangu kupunda vyaona kwangu na vyaigwa kwangu.

⁷ Napanelo kwamwaa waukumene wakupunda apo wamaono na pakulota nangu hangunalikwedye, vaningujaulila miva mumili mwangu, ávele múntenga wake Shatwani pakulota angutindinganiange kwambangidya dashi hangunalikwedye. ⁸ Ninjugwangila *UMU* myanda mitatu pakulota angunyemye miva awo ⁹ kutwala nae kungwaulila doni, "Umonyonyo wangu unditoshá kwako mwaa dimongo dyangu di-wikila popo nkati mukudabadabanga." [†] Napavedoni ndyona kudyanga kulyumya shumbi mukudabadabanga kwangu kwambangidya dimongo dimwe Klistu ditulile pashanya pangu. ¹⁰ Nadoni kwamwaa umwe Klistu, ninkupuwanga nkati mukudabadabanga, mukutukanigwa, mukuvauvanga, mukupapatigwa na matatisho. Mwaa panguva wakudabadabanga ni panguva wadimongo.

Lijugulangilo limwe Paulu kwavakolintu

¹¹ Ndilitenda kuva ninjinga kanji mwenu ni múngu-ungidile. Mwaa mwenu ni múkangutumbyenge nangu

† *Lola Ishaia 40:29-31.*

pakuva hangunava shinu nindikidiki kwavamyombe vakumene avalá ata ikava kenga nangu hangunava shinu. ¹² Kanji namwiu vimanyikilo vyaumyombe vindingandeka ngala pakati penu nkati mukulipililila uti, kwavimanyikilo, kwavyakutikinikanga na kwavyamakango. ¹³ Da mushakwashi shamutanananigwe mwenu padyoko kuliko maganisha anji pandikavele nangu nimwene kuva ligogo kwenu? Likosha kenga ali ngulivaliva!

¹⁴ Mwenu nguvelé tayali kwamwanda wantatu kwida nannola. Hanguva ligogo mwaa shangulota i vyenu kanji mwemwe mmene. Doni, vanamunu havanaungigwa shinu kuvavikila libadila vatatamunu kanji vatatamunu kwavanamunu. ¹⁵ Nangu kwantima wambone ndajaanga na ndalijaangila uti kwamwaa waungumi wenu. Ikava kenga nangu ninkunnagwaledya namene mwenu, ndanagwaleka padyoko? ¹⁶ Mwenu, mo mwaitota kuvalela mo, nangu hanguvéle ligogo kwaupande wenu. Kanji pakuva nangu ninjanja, nimpata mwenu kwaujanja. ¹⁷ Da kwaindila yamunu woewoe wanintumididye kwenu, nangu ninshonda mwenu? ¹⁸ Ninnaililila Titu aide ako na nintumidya pamo namu nung'unumunu junji jo. Da doni po, Titu jo aninshonda? Da wetu hatunalangalalegwa shinu kwaimumu jumo jojo na hatunalivata shinu mumo momo?

¹⁹ Da mwenu mwona kenga wakati uti wetu tunkulishililidya pamevo penu? Nkati mumwe Klistu pamevo pake Nnungu ni patutangola na uti vyatutenda mmakunagwaleka ni pakulota kunnonowanga mwenu. ²⁰ Mwaa ninkujopa doni pangwida ako, nankodya mwenu i mwangulatela nangu, namomo nangu munangukodya i mwamulatela mwenu. Ninkujopa kupagwa pakati penu ding'ondo, ing'ou, shishimwashimwa, umongo, kunyambiyanga, kung'wenya, kulyona na upuju. ²¹ Ninkujopa pangwida kavili po, Nnungu wangu kunguvika mudyoni pamevo penu na ndatangadikanga kwamwaa wa avalá vatagíle kala kutwala mene kulijugulanga kwaushapu, kwauwendi na kwakulauka kwavatandile.

Malailililo amwisho

13 Au ni mwanda wantatu wangwida kwenu. “Kwaushuda wavanu vavili kwali vatatu, kula lilove lyakikishigwe.” ^{†2} Nangu ndivamanyiya kaladavo

avalá vatagíle pamo na vanji uti namomo ninkuvamanyiya ambi apa pándikapagwite kenga mo mwandivamanyiidyemumwanda wambili pangupagwíte doni pangwida po, hanimpambedyamunu ³ pakuva mwenu munkulambela nningo wakutangola Klistu kwaindila yangu. Nae kwenu mwenu hanava shinu wakudababanga kanji ni wadimongo pakati penu. ⁴ Mwaa mwiu vaninkamalela panshalaba mukudabadabanga kanji ankunama kwadimongo dyake Nnungu. Nawetu momo tunkuva vakudabadabanga nkati mwake kanji kwenu mwenu tundinama namu nae kwadimongo dyake Nnungu.

⁵ Lilalyange mwemwe mmene pakulota mumanye ikava kenga munkupagwa mulikulupililo. Litende nningo mwemwe mmene. Kwali hamunalimanya shinu kenga Klistu Yesu ankupagwa nkati mwenu? Kwali ikava kenga nningo wo, hamukawidye. ⁶ Ninkulindila doni, mwenu po mundamanya kenga wetu nningo hatukawidye. ⁷ Tunkushwali Nnungu napane kwambangidya dashi, mwenu hamunatende wakunyata woewoe i pakulota twaneke kenga tukubaligwe kanji kwambangidya mwenu mutandedye wambone ata ikava kenga wetu tunkwaneka kenga túkakubaligwe. ⁸ Mwaa hatuulula kutenda shoeshoe shipingánanavo umwiu kanji tunkutenda uti kwaupande waumwiu. ⁹ Mwenu, tunkupuwanga patudabadabanga, mwenu muvanavo dimongo. Kushwali kwetu ni kulota mwenu mudyuwangigwe. ¹⁰ Napavedoni, ninkumwandikila vinu avi ndikapali namu mwenu kwambangidya pangupagwa namu mwenu po, hangunatumile na dimongo madalaka angupele *UMU* kwakundenga i kwakumbamola.

Nandele wamwisho

¹¹ Kumwisho akuno mmanung'unumunu puwanga, dyuwangika, avanavo ntima shii, kumbukilila momo, nama kwaamani na Nnungu walinagwaledyo na wamani andapagwa namu mwenu.

¹² Udyanianga kwashimanyikilo shalinagwaledyo. ¹³ Vakwilimiyanga uti, vankumupa nandele. ¹⁴ Umonyonyumwe *UMU* Yesu Klistu, linagwaledyo lyake Nnungu na upamo wa Imumu Wanashwe vipagwe namu mwenu uti.

† *Lola Kumbukumbu 19:15; Ishabu 35:30.*

Vagalata

Nandele

1 Nangu Paulu, myombe kanji níkaalakadile kwavanu na ata i kwaindila yavanu ila kwaindila imwe Yesu Klistu pamo na Nnungu Atata ándyuwidye Yesu pakati pavakupela, ^{†2} nene pamo na vanung'unumunu uti vapagwíte namu nangu akuno tunkwandikila kwamaganisha a ku Galata ko.

³ Kwenu mwenu, umonyo ^{††} na amani yakwalakela kwa Tatagwetu Nnungu pamo namu *UMU* Yesu Klistu ⁴ ályumidyé jo mwene kwamwaa wamadambi etu pakulota atuposhe muwakati au wakunyata [‡] kwodananavo malotelo atatagwetu Nnungu. ^{††5} Kwake nae, lipagwe lishangelo ngwengwe ngwengwe. Ame.

Haupali ntenga unji wambone

⁶ Napanelo nangu ninkunshanga mwenu mwaa muwakati ungwipi tu mundimwambukanga aijá ánsamile mupagwe muumonyo ^{‡‡} wake Klistu kutwa kwoda ntenga wambone unji. ^{††7} Kwakutangola mwiu haunava unji ila vapali vanji valota kuntindinganianga na kuvilinganianga ntenga wambone aulá umwe Klistu. ⁸ Napane ata ikava kenga wetu kwali njelo wakwalakela kuwa ammalangangidile ntenga wambone uvilinganége na watummalangangidile, munu ajo aavenavo dilana. ⁹ Nadoni tunkuujila kavili kutangola tuushidoni, ikava kenga munu woewoe anammalangila ntenga wambone uvilinganánga na aulá wamupatile, munu ajo aavenavo dilana!

† *Mushu mwake Paulu andauka atangola aashidoni, ntenga wake unkwalakela shalowa kwa Nnungu. Lola 1:11-24. Nadoni ntenga wake wo ni waumwii uvilinganánga na wavamongo vake. †† Dibalugwa dyoe dimwe Paulu, ankutumidyá umonyo na amani na ankumalilila avalaililila vanu vapagwe muumonyo umwe Klistu. Lola 6:18. Napane nkati mwibalugwa ai, ing'ano yaumonyo ni ntipu ukumene. Mushu andatangola ing'ano yakwambukanga umonyo umwe Klistu. Lola 1:6; 2:21; 5:4. Namomo ankupundisha kenga amani inkumwidila aijá ápwashalela umonyo umwe Klistu. Lola 5:22; 6:16. ‡ Mushu mwake, Paulu ankupundisha kenga umonyo wake Nnungu unkuwatananga bai kwaindila yakupela kwake Klistu. Lola 2:21; 3:1-2, 13-14. †† Munandele aju (1:1-5), Paulu ankuujila atangola myanda mitatu yakuva Nnungu Tatagwetu. Kavili mushu mo, ankuvapundisha vagalata kuva vanavake Nnungu. Ni ashi shivatádyá vampwashalele Imumu na vave muunaiti; havanapagwa shinu muutumwa. Lola 3:26-4:11. ‡‡ Kwali: a kwaindila yaumonyo. ††† Mudibalugwa dinji ling'oto lyakuudyanga, Paulu andáambwalela kwa ashilá shavatandeya nkati muntenga wambone kanji ai mene. Linganianga Valoma 1:8; I Vakolintu 1:4; II Vakolintu 1:3; Vapilipo 1:3-5; na dinji. Kwaupande wavagalata vo, nae ankwona doni, ntenga wambone wo, vanavo vankwambukanaga.*

¹⁰ Da mwenu mwona kenga ambi apa ngulota ndivashombe vanu kwali Nnungu? Kwali ngulota ivanagwele vanu? Leka ivele yakuvanagwela vanu mpaka ambi apa, bai nangu hangunave nintumwa wake Klistu. ^{‡‡}

Ntenga wake Paulu walakadilé kwa Nnungu

¹¹ Mmanung'unumunu, ninkulota mumanye doni ntenga wambone wanguvalanganga haunava shinu washimunu. ¹² Hangupatile kwamunu na ata havangupundishidye ila ntenga wo ndipata kwaindila yamaono akungulodya Yesu Klistu. ^{†13} Mwenu mundigwa shana mavalelo angu panguvéle nkati mwidini yashiyuda; mwashi mwangushipapatila liganisha lyake Nnungu na mwangushitandela ing'ondo. ¹⁴ Nangu mwidini yashiyuda mo, ngushindavapunda vavangu vaulinga wangu nguvikila namene dukuduku dijadi dyavanyakala vetu. ¹⁵ Kanji napanelo Nnungu aningutandola tangu kala nikanava kuvalekwa na aningushema kwaindila yaumonyo wake. ¹⁶ Jojo jo, painnagwadile kunnodya mwanagwe nkati mwangu nangu pakulota nimmalangange kwavamidi, hangulambadile maoni kwamunu ¹⁷ na ata hanguujiidile ku Yelusalemu kwa avalá vamyombe vatandi ila ngumidinne kuka ku Alabiya kutwala kuujiila kavili ku Damashiko. [†]

¹⁸ Napanelo vikapite vyaka vitatu, ndyúka ku Yelusalemu nannola Kepashi ^{††} kutwa kwikanavo maduva kumi na tano. ¹⁹ Koko ko, handivagwene vamyombe vanji ila Tiyagu nung'une *UMU*. ²⁰ Mwenu! Vyandimwandikila avi, viu. Pamevo pake Nnungu, nashang'apa shinu.

²¹ Badae ndyúka disemu dya ku Shiliya na dya ku Kilikiya. ²² Nangu muwakati awo hangushimanyika mumaganisha a ku Yudeya avéle nkati mumwe Klistu. ²³ Ila koko ko vashiigwanga vila doni, "Aijá áshitupapata, ambi apa ankuvalanganga likulupililo lyolyo

‡‡‡ *Mushinu munji, Paulu ankuvalanganga shimadengo shake kuva shakuvashomba vanu, hashinava shinu shakuvanagwela vanu. Linganianga II Vakolintu 5:11, 20 na I Vateshalonika 2:4-6. Nadoni ankuka mushu alodya kenga ntenga wake unkwalakela shalowa kwa Nnungu i kwavanu (1:11-24). Kumwisho kwake ankushidoni, kwa avalá vavatindinganianga vagalata vo, valambela vanagwaleke kwavanu kwambangidya havanapapatigwe kwamwaa wanshalaba umwe Klistu. Lola 6:12. § Kwali: a kwaindila yamaono amwe Yesu Klistu. Apa Paulu amba kukadyania kwakadyéne namu Yesu mwindila ya ku Damashiko. Lola Vitendo 9:1-9. † Kwamaimyo ala, Paulu ankuvataukanga avalá vashishidoni, ntenga wake apatilé kwavanu. Nae ankushidoni, haukile ku Yelusalemu kushinu kuvaikidile akapate ntenga kwa avalá vamyombe vatandi (1:18-20). †† Kepashi ni jo Patulu. Lola disemu dinji mwibalugwa ai: 2:9, 11, 13.*

lyashitenda ing'ondo kunantandi." ²⁴ Nadoni vashindamupa lishangelo Nnungu kwamwaa wangu nangu.

Vamyombe pa Yelusalemu vankunkubali Paulu

2 Napanelo vikapite vyaka kumi na nsheshe, nindyúka kavili ku Yelusalemu pamo namu Balinaba, mushimwanda shosho ndímuukanavo Titu.

² Kwanavo nguukile kwamwaa wamaono kutwala kuvaigwiniya ntenga wambone wanguvalanganga kwavamidi, ndíikanavo kanji kwagweka avalá vashaaneka kuva vakuvaikila ngwambambidya nakanji ninkutumbama kwali nditumbama yamonyo.

³ Napane ata jo nyangu Titu wanguvénavo ávele avi ngalegu, hapali ámuungidile akumuligwe likumbi.

⁴ Ing'ano ai ishashambwike na vanung'unumunu vakushang'apa vainjidíle na malotelo ashipiipi. Vanavo vandílalanianga kwida ndapalalesha unaiti wetu watuvenavo nkati mumwe Klistu Yesu kwambangidya vatuukenavo muutumwa. ⁵ Wetu hatulidabadabyéngé kuvaigwilila vanavo kulamana na padyoko vela pakulota umwiu wantenga wambone uliikiniye kwenu mwenu.

⁶ Napanelo avalá vashaaneka kuva vakuvaikila, shavavéle sho, kwangu nangu hashinava shinu mwaa Nnungu hanatanana kuvailanga kwamunu na vovo vo, hashipali shavangujanjadidye. ⁷ Vanavo valakilé kwangadedya kutwa kumanya do, ntenga wambone wo, ndikulupiligwa nangu kwavakumuligwe kenga Patulu kwavakumuligwa ⁸ mwaa jo ákadile madengo kumwe Patulu aumyombe kwavayuda ni jojo ákadile kwangu nangu kwavamidi. ⁹ Nadoni vamanya umonyo wangupatile, Tiyagu, Kepashi namu Nshuwau, vo vashaaneka kuva mabodo, vandítuwanidya makono akulodya upamo namu wetu, yani nangu namu Balinaba. Vanavo vandíkubali wetu tuve kwavamidi, vanavo kwavayuda ¹⁰ ila hatunavalivalile vákave pashinu, ni shinu shanguvikidile namene kuntima na kutandedya. †

Paulu ankunshashulanga Kepashi

¹¹ Napanelo Kepashi pawikile pa Antiyokiya nínshashulanga ngala kwamwaa wakutenda makosha.

¹² Mwaa vanu vanji vakwalakela kumwe Tiyagu vakanava kuwika, nae ashindalya na vamidi. Napane pavawikile vanavo, Kepashi andílyapula kutwala kulyumadyanga avajopa avalá vashishilidya likumbi.

¹³ Namomo vayuda vanji uti vandílyunganianga namu Kepashi mo mushinankulaba, ata mpaka Balinaba momo andítwaligwa mushinankulaba shave. ¹⁴ Bai pangugwene kenga havanauka shana nkati muumwii

† Vananangalaledi va ku Yelusalemu hashipali shinu shavanjadidye muntenga wambone utangóla kenga tunkupata ishaliya kwaumonyo kwaindila yalikulupililo. Vanavo havatangwele indivaiki la vakumuligwe likumbi kwali vatandedye lilamulo pakulota vapate ishaliya. Pavatangwele do, vatanane vákave pashinu havashijan-jedya ila vashilaililila vyepo vyantenga wambone wo. Kenga vyepo vyantenga wambone, nanae Paulu ankipundisha doni, indivaiki la tunagwaladyanie. Lola 5:13-6:10.

wantenga wambone, ndímwaulila nae paumbala doni, "Wako umuyuda kanji unkunama kenga ummidi i kenga muyuda. Napane mwaa shani uvalamulila vamidi vaname kenga vayuda?"

¹⁵ Wetu túvele tuvayuda kwashivalakwelo i vakutega vavamidi, ††¹⁶ ata tumanya avi do, munu hanapata shinu ishaliya kwamwaa wakwodedyá lilamulo ila kwaindila yakunkulupila Yesu Klistu, nawetu momo tuninkulupila Yesu Klistu pakulota tupate ishaliya kwaindila yakunkulupila Klistu i kwamwaa wakwodedyá lilamulo. Ni doni, kwakwodedyá lilamulo, hapali álotá kupata ishaliya.

¹⁷ Ikava kenga wetu tulambela tupate ishaliya nkati mumwe Klistu kutwa wewe momo kwaneka kuva tuvakutega, † da napane Klistu jo ntumika walidambi? I mwanavo! ¹⁸ Mwaa ikava kenga avilá vyangubamalenge ninkunonowangidya kavili, bai ninkulilodya ngala kuva nimunu wakupujungula. ¹⁹ Mwaa nangu kwaindila yalilamulo ndipela mulilamulo †† kwambangidya ngunamu mu Nnungu. Nangu ndipela panshalaba namu Klistu. ²⁰ Ninkunama kanji i nangu ila Klistu ni anama nkati mwangu. †† Shingumi shanguvenavo mumili ambi apa, ninkunama kwakunkulupila Mwana wa Nnungu ángunagwaladidye na álijawile kwamwaa wangu nangu. ²¹ Hangunavika shinu kunyenje umonyo wa Nnungu mwaa ikava kenga kwaindila yalilamulo munu ankipata ishaliya, bai Klistu apadilé monyo.

Likulupililo kwali lilamulo?

3 Mmagalata mmajinga mwe! Da mwenu annagwilé nyani, mwemwe wavammalangangidile ngala pamevo penu kenga Yesu Klistu andikamalalegwa panshalaba? ² Shangushilota ngumanye ni ashi, da Imumu jo, mumpwashaladile kwakwodedyá lilamulo kwali kwalikulupililo kwa avilá vyamwigwite? ³ Da mwenu mmajinga mmakumamodya? Shapo mundítunduvanga mu Imumu, napane ambi po mulyala-

†† Paulu patangola doni, a vakutega vavamidiavamba vamidi yamene kuvanavo lilamulo. Mwaa Nnungu anímpanga imbodi Abu-laamu kutwala kunnamulila avakumule vanavake likumbi. Lola Kutunduvanga 17. Mushu mwake andívaambola vanaishilaeli ku Mishili kutwala kuvapa lilamulo. Lola Kuma 20. Napanelo vayuda vashivona vamidi kuva vakutega mwaa havapagwite nkati mulilamulo. † Paulu patangwele doni, a kutwala wewe momo kwaneka kuva tuvakutegaashivalinganianganavo vamidi vashaaneka kuva vakutega. Lola 2:15. †† Paulu patangwele doni, a kwaindila yalilamulo ndipela mulilamulo, inkuululika kwamba vinu vivili. Shitandi, inkuululika kwamwaa wamunu mene kupata ishaliya kwaindila yalilamulo bai andyámbukanga lilamulo. Lola 2:16. Shambili inkuululika kwamba kupela kumwe Klistu panshalaba mwaa Paulu ankuka mushu aashidoni, a ndipela panshalaba namu Klistu. Kavili ankipundisha doni, Klistu andipela kwaindila yalilamulo alitika dilana dyetu wetu dyalakéla mulilamulo. Lola 3:13. Nadoni aijá ánkulupila Klistu ankipela momo kwaindila yalilamulo mwaa ankipela panshalaba namu Klistu. †† Mushu mwake, Paulu ankipundisha atunduvangila ing'ano yakunama Klistu nkati mwavakwoda. Ankuvamanyiya vagalata vaname mu Imumu i kwamalotelo amili. Lola 5:16-26. Kwamwaa wakunama Klistu nkati mwave, vakwoda vankuulula kunama mwalatela Nnungu. Linganianga Vaepeshu 3:16-20; Valoma 8:9-11.

dyanga dashi kwamili? ⁴ Mwenu mundinama muvinu vyoe, † da muvinu avyo munamilé monyo? Davo, i mwanavo. ⁵ Nnungu pampele Imumu na kutandedya vyadimongo pakati penu, da ni kwakwodedya lilamulo kwali kwalikulupililo kwa avilá vyamwigwite?

Valikulupililo ni udukulu umwe Abulaamu

⁶ Mo, “mwankulupilidile Abulaamu Nnungu na likulupililo lyolyo, Nnungu jo anímmalangilila Abulaamu kuva ishaliya” ††⁷ manya doni, vo valikulupililo vo, vanavo ni udukulu umwe Abulaamu. ⁸ Maandiko pagwene kaladavo doni, Nnungu andavapa vamidi ishaliya kwaindila yalikulupililo, anímmalangangila ntenga wambone shitandi Abulaamu aashidoni, “Kwako wako, venentete uti vandaalaligwa.” ⁹ Nadoni uti avalá vakulupíla, vandaalaligwa pamo namu aijá nkúkulupila Abulaamu.

¹⁰ Mwaa uti avalá vakulupíla lilamulo vandilanigwa kwoda indyandikigwa doni, “Alaanigwe aijá ákapagwa muvinu avi uti vyandikigwe mulibuku lyalilamulo na vinu avyo me kutandedya.” ††¹¹ Kanji napane inkuva ngala do, hapali álota kupata ishaliya pamevo pake Nnungu kwaindila yalilamulo mwaa “Waishaliya andanama kwalikulupililo.” ††¹² Doni, indila yalilamulo hainatakigwa shinu mulikulupililo ila “Jo átandedya vinu avyo, andanama.” †††¹³ Klistu anditwambola mudilana dyalilamulo palitandile jo mwene kuva ilana adiva lyutu lyetu mwaa indyandikigwa, “Alaanigwe aijá álota kupambiligwa munnandi.” †††¹⁴ Nae andilanigwa kwambangidya kwalaligwa kumwe Abulaamu kukavawikile vamidi nkati mumwe Klistu Yesu na kwalikulupililo tupwashalele kulivikila, kulivikila aku ávele Imumu.

¹⁵ Mmanung'unumunu, ndavalanganga shinamidyo shetu wetu tuvanu. Ata pakave muni ápanga imbodi hapali ánatauka na wakwanjedya shinu shinji kavili.

¹⁶ Kumwe Abulaamu kulivikila kunditangaleka; kutangaleke kwake nae namomo kwaudukulu wake. Nnungu hanatangola shinu doni, “kwavadukulumunu” kenga avamba vanu voe ila amwamba muni jumo doni, “kwandukuluvo” ⁵ yani Klistu. ¹⁷ Shangutangola ni ashi, Nnungu papangile imbodi tangu kala, likaumulile lilamulo ling'oto lyavyaka dimiya nsheshe na selasini, hlanatingudyanga shinu imbodi yo yakulota kutimbanaga akulá kulivikila. ¹⁸ Mwaa ikava kenga maleko ^{5†} ankwodana na lilamulo bai hanatakigwa shinu kavili mukulivikila kanji ni kwaindila yakulivikila yampalalele Nnungu Abulaamu maleko alo.

† Kwali: a mundyuvavanga vinu vyoe. Kwakuvalangangila kunji kwatuvavenavo, Paulu ankwamba vinu vya mu Imumu vyavanamile.

†† Lola Kutunduvanga 15:6. ‡ Lola Kutunduvanga 12:3; 18:18; 22:18. †† Lola Kumbukumbu 27:26. †† Lola Abakuki 2:4. ††† Lola Valawi 18:5. ††† Lola Kumbukumbu 21:23. § Lola Kutunduvanga 12:7; 13:15; 24:7. §† Maleko ala ni ashilá shavalivikidile kumwe Abulaamu; kwaindila yake nae makola uti andaalaligwa. Lola Kutunduvanga 12:3. Napanelo apa Paulu ankuvalangangila maleko alo kuva vinu vivili: ishaliya pamo na Imumu. Linganianga 3:8-9, 14.

Shitadídye lipagwe lilamulo

¹⁹ Napanelo shitadídye lipagwe lilamulo ni nyamani? Lyanavo linyanjadyeka kwamwaa waukalau mpaka aide aijá ndukulumunu álota kupata akulá kulivikila. ^{5††} Lilamulo lyo, lindikuvika kwaindila yavanjelo kupitila kumwe nkúdumangila. ²⁰ Napane nkúdumangila hana-va wamunu jumo kanji Nnungu avelé jumo. ²¹ Da doni po lilamulo linkutaukanga kulivikila kwake Nnungu? Ata padyoko vela. Mwaa leka lipagwite lilamulo ling'a shingumi, mwii ishaliya ikandyalakela mulilamulo. ²² Kanji Maandiko alo anditadya ^{5†} vinu uti vitawaligwe na lidambi pakulota kulivikila kwalakéla kwaindila yalikulupililo kumwe Klistu Yesu kukapatikanange na avalá vakulupíla.

²³ Likulupililo likanava kuwika, tushindashungigwa mulilamulo, tũngwidye mpaka likulupililo alilá palyukile ndaunukuligwa. ²⁴ Napavedoni lilamulo jo avele nkúlela wetu wakutuukanavo kumwe Klistu kwambangidya tupate ishaliya kwaindila yalikulupililo. ²⁵ Likulupililo napane paliwikile, hatunava shinu kavili mmakono mwankúlela. ²⁶ Mwaa mwenu uti mmanavake Nnungu kwaindila yalikulupililo nkati mumwe Klistu Yesu ²⁷ mwaa uti múpatile ubatisho mumwe Klistu, Klistu muningwala. ²⁸ Hapali muyuda na ata ngalegu, ntumwa na ata wamuunaiti, nnume kwali nkongwe mwaa uti mwenu ni muni jumo mumwe Klistu Yesu.

²⁹ Ikava kenga mwenu ni mmake Klistu, bai mmadukuluvake Abulaamu na kwaupande wakulivikila wo, mmakupata maleko ni mwenu.

Hatunava tuvatumwa ila tuvakupata-maleko

4 Napane shangwamba ambi apa, aijá nkúpata-maleko akava ndyoko, hanavilingananga shinu na ntumwa ata ikava kenga vinu vyo, vyàke. ² Jojo jo ankupagwa mukulalegwa na avalá vavakamudidye vyake mpaka wakati awo wavikile tatake. ³ Nawetu momo patuvéle tuvadyoko tuvele muutumwa wamavalelo amushilambo ashi. ⁴ Napane paukile ndawikila popo wakati we uvikíke, Nnungu anintumidya mwanagwe ávalakwadidye munkongwe na ávalakwadidye mukutawaligwa na lilamulo ⁵ pakulota avaambole avalá ve vavéle mulilamulo kwambangidya tupate kuva tuvana va Nnungu. ⁶ Pakuva mwenu po mmana, Nnungu anintumidya Imumu wamwanagwe mmitima mmyenu; ni jojo áshema, “Aba! Atata!” ⁷ Napavedoni wako haunava shinu kavili untumwa ila umwana; ikava kenga ni umwana, bai ni gwegwe nkúpata-maleko kwaindila ya Nnungu.

Lijugulangilo limwe Paulu kwavagalata

⁸ Mwiu, pamukashimanya Nnungu, mushitandegwa vatumwa va avalá kwamavalelo havanava shinu vannungu ⁹ kanji napane pamummanyite Nnungu

§†† Kulivikila aku kwambika, vamba Imumu. Linganianga 3:14. §‡ Apa, a Maandikoamba a Lilamulo.

apa, kwali tuushidoni mundimanyika na Nnungu, mwaa shani munkuujila kumavalelo lolo akudabada-banga na ákave lyululilo? Da mulota mutandegwe kavili mmatumwa? ¹⁰ Mwenu munkutumbyanga namene pakati pamaduva anji, myedi, wakati na myaka!

¹¹ Ninkunjangangila mwenu, inkulukika shimadengo shaninkalalele mwenu sho, kuva shamonyo.

¹² Mmanung'unumunu ninkunjugwa muve kenga nangu mwaa nangu momo nguvalalélé mo mwamu-valalele mwenu. ¹¹ Hashipali shamungwanadile ¹³ kenga mundimanya doni, ni mwaa wakudabadabanga kwamili shingutadídye nimmalangangile ntenga wambone kumwanda utandi ¹⁴ na ata ikava kenga mili wangu wo uníntadya mwenu mulingigwe, hamung-wiludyenge na ata hamungwitile. Mulakilé yakung-wiludyanga kutwala kungupwashalela kenga njelo wa Nnungu kwali kenga jo mwene Klistu Yesu. ¹⁵ Napanelo kwalaligwa kwenu ko kuvé pashi? Nangu ninkumya ushuda kenga muwakati aulá leka yúlulike mukandyushanianga mevo enu kutwala kungupa nangu. ¹⁶ Da napane doni po nimmongo wenu kwamwaa wakummalangangila umwiu?

¹⁷ Avalá vantanána mwenu, malotelo avo hanava shinu ambone. Vovo vo, valota vamwapukaniange namu nangu kwambangidya muvatanane vanavo. ¹⁸ Ni shambone ngwengwe kutanana shinu shikava shambone i gweka nangu ngúpagwite namu mwenu.

¹⁹ Mmanavangu, mwemwe mmanimuvauvangila kavili mauvilo alalá akuvaleka mpaka Klistu aliikiniye kwenu, ²⁰ nikandipagwa namu mwenu ambi apa ngutangalele munji mwaa ninkwangaikanga yenu mwenu.

Tundivalekwa kwaindila yakulivikila

²¹ Napanelo ngwaulila mwenu múlota mutawaligwe na lila-mulo, da hamunaigwa shinu mwalitangalela lila-mulo lyo? ²² Mwaa indyandikigwa doni, Abulaamu andívanavo vana vavili jumo wankongwe ntumwa, junji jo wamuunaiti. ²³ Mwana wantumwa jo avalakwadidye kwaindila yashimunumunu kanji wamuunaiti, nae avalakwadidye kwaindila yakulivikila.

²⁴ Vinu avi vinkuva mpano, vakongwe vavili ava vankwitika kuva dimbodi mbili. Imbodi imo yalishinga lya Shinai na inkuvavaleka vana vamuutumwa, aju ni Agali. ²⁵ Agali ni lishinga lya Shinai livéle ku Alabiya liití-ka kuva Yelusalemu yamaduvano mwaa yanavo inkupagwa muutumwa pamo na vanavake. ²⁶ Kanji pane Yelusalemu yakuwa, yanavo ivé muunaiti, ayo ni jujuwetu. ²⁷ Mwaa indyandikigwa doni, "Puwanga wako úkavaleka, gwegwe úkave mwana,

† Inkuululika vagalata kuvikila namene kuntima maduva avikíke na lila-mulo lyavayuda pakulota vapate ishaliya pamevo pa Nnungu. Napane Paulu ankuvashashulanga mwaa vanavo vashilota kukulupila namene lila-mulo kuliko likulupililo. Linganianga 2:16. †† Kunantandi Paulu anditangola doni, a nangu ndipela mulilamulo. Lola 2:19. Napanelo apa, ankuvalaililila vagalata vave kenga nae, havanaujile kavili kulilamulo. Namomo anditangola yadavo, a nangu ngúvalalele momo mwamuvalalele mwenu, mwaa vanavo havapagwite mulilamulo.

umya lidi na kugwa, wako úkona kupwateka kwaku-valeka,

mwaa vana vankongwe wavannakile vavelé voe, kuliko vana vankongwe ávele na ntawagwe." ‡

²⁸ Mmanung'unumunu, mwenu kenga Ishaki ni mmana mmakulivikila ²⁹ napane kenga mo muwakati aulá, mwana ávalakwadidye kwaindila yashimunumunu ashinammingilidyanga mwana ávalakwadidye kwaindila ya Imumu, ni shosho shipagwíte ambi apa. ³⁰ Kanji Maandiko ankushidashi? "Mmingange nkongwe ntumwa pamo na mwanagwe mwaa mwana wantumwa, mwiko hapata maleko pamo na mwana wamuunaiti." ††

³¹ Mmanung'unumunu, pavedoni, wetu hatunava shinu tuvana vankongwe ntumwa ila vankongwe wamuunaiti.

Klistu anditwambola pakulota tupagwe muunaiti

5 Ivele mupagwe muunaiti shitadídye Klistu amwambole; napavedoni linatele, hamu-natawaligwe kavili na likangoti lyautumwa. ² Igwa shana yyanimwaulila nangu Paulu, mukakumuligwa likumbi, bai Klistu havanavo shinu mana kwenu. ³ Ninkwakikisha kavili kenga kula munu ákumuligwa likumbi, nae ankudaigwa atandedye lila-mulo uti. ⁴ Mwenu múlambela mupate ishaliya kwalilamulo, mundilyapula kumwe Klistu, mundipalanyoka muumonyo wa Nnungu. ⁵ Mwaa kwa Imumu na kwaindila yalikulupililo wetu tunkulindila na mweshe lilindilililo lyakupata ishaliya. ⁶ Mwaa nkati mumwe Klistu Yesu, kukumuligwa likumbi kwali mene, hakuve mana ila livé na mana ni likulupililo lililódyá mulinag-waledyo.

⁷ Mwenu mushindatumbama shana, napane nyani ándivilidile kwigwilila umwiu? ⁸ Kushomba aku, haku-naalakela shinu kwa aijá ánshamile. ⁹ "Nkukumuku padiki tu, undákukumuwa unga." ¹⁰ Nangu ninkuvana-vo wakika nkati mumwe *UMU* kenga hamukumbukilila mushinu munji. Aijá ántindinganianga ata pakavéle nyani, andaukumigwa. ¹¹ Mmanung'unumunu, ikava kenga nangu mpaka ambi ninkuvalanganga likumbi mwaa shani ninkupapatigwa? Leka ivele davo, bai kunyatilika kwanshalaba kundiputangigwa. ¹² Kwaupande wa avalá vantindinganiánga, nangu ngushindalota mpaka vovo vo, valyune.

¹³ Mmanung'unumunu, ivele mupagwe muunaiti shitadídye mushamegwe kanji napane unaiti awo huanave nkanidyo wakulota kutandedya malotelo enu ashimunumunu ila inimmaikila mutumikane shiven-evene kwaindila yalinagwaledyo. ¹⁴ Mwaa lila-mulo uti vandiipiyanga mulilove limo, "Nnagwaledye mujo kenga mwaulinagwaladedyá wako umwene." ††¹⁵ Kanji ikava kenga mwenu munkulumana na kumamanana shivenevene, lilaledye kwambangidya hamunabamalanange.

‡ Lola Ishaiya 54:1. †† Lola Kutunduvanga 21:10. †† Lola Valawi 19:18.

Nama kwa Imumu

¹⁶ Napane ninkumwaulila doni, nama kwa Imumu, apo mwiko hamuulula kutandedya malotelo ashimunumunu. ¹⁷ Mwaa shimunumunu shinkuvana-vo malotelo anyatilika na Imumu na Imumu ankuvanavo malotelo anyatilika na shimunumunu; vinu avi havinaigwana shinu, bai ni shamwona avilá vyamulota mwenu kutenda hamunaulule kutenda. ¹⁸ Kanji mukalangalalegwa na Imumu, mwenu hamupali kavili mukutawaligwa na lilamulo.

¹⁹ Napanelo vitendo vyashimunumunu vinkuva ngala; kulavalava, ushapu, njeje, ²⁰ kulipudya kwavanungu vakushang'apa, wavi, umongo, ungaigwania, liu, shitundi, shojo, mitau, kumwadilikananga, ²¹ ing'ou, kwambalwa, kululuka na vinji vilinganána na avyo. Ninkumwaulila kala davo kenga mwanimwaulidile kunantandi doni, vaténda vinu avyo, mwiko havapata maleko autawala wa Nnungu.

²² Kanji napane mapuno † a Imumu ni linagwaledyo, lipuwilo, amani, kupililila, kutanana, wambone, kukulupilika, ²³ kulishapeya, kulishunga gwegwe umwene. Pakati pavinu avi, halipali lilamulo. ²⁴ Vamwe Klistu Yesu, shimunumunu shave vandikamela panshalaba pamo na ditamaa na malotelo ake. ²⁵ Tukana-ma kwa Imumu, bai tupagwe momo munkondo wa Imumu. ²⁶ Hatunalyone, hatunaangangane na ata hatunavikanile ing'ou.

Hatunadobe kutenda wambone

6 Mmanung'unumunu, munu akapatikana mukupujungula kwoekwoe, mwenu mmaimumu müvele mwimumu yakulishapeya, nningule munu ajo mulishunga kwambangidya namwenu momo hamunatubigwe. ² Nyakulanila dibasha dyenu; mukatenda davo, mundatandedya lilamulo lyake Klistu. ³ Munu akalyona kuva munu shii kanji akavé, ankuishang'apila jo mwene. ⁴ Kula munu alalyange vyo vitendo vyake mwene; apo ni palota kulitamanga jo mwene i kwa-munu junji ⁵ mwaa kula munu andanyakula ibasha yake.

⁶ Aijá ápundishigwa mulilove, inimmaikila amajanange avilá vyambone uti †† namu aijá ámpundisha.

† Kwali: a vyepo.

⁷ Hamunaduwangike, Nnungu hanaliulika. Shalota kupanda munu ni shosho shalota kupuna. ⁸ Álota kupanda kwashimunumunu, vyashimunumunu andapuna; napane álota kupanda kwa Imumu, andapuna shingumi shíkamalilika. ⁹ Hatunadobe kutenda wambone mwaa tukanadabadabangila, pauwika wakati wake po, tundapuna. ¹⁰ Napanelo po patuvenavo litala lyakutandela wambone, tutandedye kwavanu uti kanji kupunda namene avalá vamwing'ande yalikulupililo.

Shamana ni kuva shiumbi shaambi

¹¹ Lola dinembo ding'umene dyanimwandikila na wo nkono wangu nimwene.

¹² Napane uti avalá valóta valyaneshe wambone mumili, avo ni vamuungila mwenu mukumuligwe likumbi kwambangidya bai havanapapatigwe kwamwaa wanshalaba umwe Klistu. ¹³ Ata vo vakumuligwa likumbi vo, havanaodedya shinu lilamulo ila vannota vankumule likumbi kwambangidya valishibangile kwa ashilá shivéle mumili mwenu. ¹⁴ Nangu mwiko hangunalishibangile paikava kwanshalaba umwe *UMU* wetu Yesu Klistu mwaa kwaindila yanshalaba wo, shilambo shindikamalalegwa kwangu nangu na nangu ndikamalalegwa kwaupande washilambo. ¹⁵ Kukumuligwa likumbi kwali mene hakunapagwa mana. Shamana ni kuva shiumbi shaambi. ¹⁶ Amani na shididi vipagwe na avalá vavéle munkondo walipata ali, vipagwe na yo Ishilaeli ya Nnungu. ††

Kulilaila

¹⁷ Kumwisho akuno, hanapagwe wakungudingadinda mwaa mumili mwangu ninkuvanavo vimanyikilo vimwe Yesu. ¹⁸ Mmanung'unumunu, umonyo umwe *UMU* wetu Yesu Klistu upagwe na imumu yenu. Ame.

†† *Vinu vyambone vyámba Paulu vinkwaneka kuva vinu vyalakéla mu Imumu. Lola 5:22. Nae ankuka mushu atangola ing'ano yakupanda na kupuna mu Imumu. Kwakuvalangangila kunji inkuululika kwamba vinu vyapata nkúpundishigwa ammajele aija nkúpundisha. Linganianga I Vakolintu 9:14; Lukashi 10:7. † Shi-umbi shambi, Paulu ankuvamba vavé mumwe Klistu. Kwaindila ya Imumu ápatikana kwalikulupililo, ankunjalulanga munu kuva waambi. Lola 2:16-26; Linganianga II Vakolintu 5:17. †† Kwamalove ala, Paulu ankuvamba Ishilaeli kuva venentete vavéle mumwe Yesu Klistu.*

Vaepeshu

Nandele

1 Paulu, myombe umwe Klistu Yesu kwalilotelo lyake Nnungu kwavakwilimyanga vapágwa ako ku Epeshu, vo vakukulupilika nkati mumwe Klistu Yesu.
² Umonyo upagwe kwenu mwenu na amani yakwalakela kwa Nnungu Tatagwetu na kumwe *UMU* Yesu Klistu.

Kwalaligwa kwaimumu nkati mumwe Klistu

³ Atumbyangilike Nnungu umwe *UMU* wetu Yesu Klistu, jo Tatamunu wake nae, átwalalidye nkati mumwe Klistu kwakwalaligwa uti kwaimumu mumautu akuwa ⁴ kenga mo mwatutandaladile nkati mwake tangu kala shilambo shikanava kukandyangigwa pakulota tuve vakwilimyanga na túkave makosha pamevo pake. Nae anditutandola mulinagwaledyo ⁵ átupangidile kala mwakulota kututenda tuvanamunu vake jo mwene kwaindila imwe Yesu Klistu kwodana na mo mwainagwaladile jo mwene mumalotelo ake ⁶ kwakutumbyangilika kwalishangelo lyaumonyo wake watutanene nkati mumwe Wakunagwaleka.

⁷ Nkati mwake tundivanavo kwambola kwaindila yamyadi vyake kúvele kulivalivigwa kwakupujungula kwodana na kuumbaligwa kwaumonyo wake Nnungu.
⁸ Wowo wo andimiminila kwetu wetu nkati mulimanyiilo na umanyimanyi ⁹ atadya tumanye shipii shamalotelo ake kwodananavo mwainagwaladile, mo mwalatalele mwene atende nkati mumwe Klistu ¹⁰ kenga nnugu wakulota kutandeka wakati ukawikila popo pakulota aunganiange vinu uti nkati mumwe Klistu, vinu vivéle kuwa na vinu vivéle pai.

¹¹ Nkati mwake momo wetu tunditandegwa kuwa maleko, wewe túpangiligwe kala kwodananavo ishabaa yake aijá átenda vinu uti kwauwamushi wamalotelo ake ¹² pakulota tupagwe kwakutumbyangilika kwalishangelo lyake, wetu tuvatandi túnkulupidile Klistu. ¹³ Nkati mwake namwenu momo pamwigwite ntenga waumwui, ntenga wambone wo umwambwéle; mwenu múnkulupidile nae, mundinamatiligwa kwa Imumu Wanashwe wakulivikila, ¹⁴ nae jo ávele kulivikila kutandi kwamaleko etu mpaka kwambwalegwa kwa avalá vake Nnungu kwakutumbyangilika kwalishangelo lyake.

† Kwali: a ...pakulota tuve vakwilimyanga na túkave makosha pamevo pake mulinagwaledyo. Kwali: a Mulinagwaledyo anditupangila...

Kulambwalela nkati mukushwali

¹⁵ Napavedoni tangu pangwigwite itangaleka pakati penu yalikulupililo kumwe *UMU* Yesu na yalinagwaledyo kwavakwilimyanga uti, ¹⁶ hangunaleka shinu kulambwalela kwamwaa wenu mwenu nintambulanga mukushwali kwangu. ¹⁷ Ndájugwa doni, Nnungu umwe *UMU* wetu Yesu Klistu, Tatamunu Walishangelo, amupe imumu yalimanyilo na yamaono nkati mukumanya shana nae ^{††18} alangadya mitima vyenu pakulota mumanye nyamani lilindilililo lyakushema kwake, nyamani kuumbaligwa kwalishangelo lyamaleko ake kwavakwilimyanga ¹⁹ na nyamani ukumene wadimongo dyakupunda uti kwetu wetu túnkulupidile. Dimongo adi dinkulinganana na shimadengo shakunanopa kwalyululilo lyake ²⁰ likadile madengo nkati mumwe Klistu muwakati wandyuwidye pakati pavakupela na pantadidye kwikala kunkanakono kwake mumautu akuwa, ²¹ kwikala pashanya uti pautawala, madalaka, dimongo, sheo na pashanya pamena uti avatambulanga, i gweka muwakati au kanji na yadavo muwakati wida. ²² Nae andivika vinu uti mmadodo mwake kutwala kunjaula kuwa kenga nangangonda wavinu uti kwali ganisha, ²³ liganisha lyo úvele wo mili wake; kuumbala kwa aijá áumbadya uti kwauti.

Tundyambwalegwa kwaumonyo

2 Mwenu po muvele mukupela nkati mukupujungula na mumadambi. ² Muvinu avyo, mwenu mushindanama kwodana na inamuna yashilambo ashi na kwodana na nkútawala wamadalaka akuniania, imumu ikóla ambi apa madengo muvakaigwilila. ³ Pakati pave nawetu momo tushindalilangalalela kwalimalotelo ashimunumunu, tutandedya malotelo amili na anding'anong'ano. Nadoni kenga vanji uti, nawetu momo kwashimunumunu tundipagwa mushitundi shake Nnungu.

⁴ Napane Nnungu wakuumbaligwa shididi, kwalinagwaledyo lyake likumene lyatunagwaladidye, ⁵ ata ikava kenga wetu tuvele mukupela nkati mukupujungula, nae anditupa shingumi pamo namu Klistu; doni, mundyambwalegwa kwaumonyo. ⁶ Anditudyuwa namu nae na anditutadya namu nae twikale mumautu akuwa nkati mumwe Klistu Yesu ⁷ kwambangidya muwakati wida, nae alodye umbala wamali aumonyo wake mulitananilo lyake kwetu wetu nkati mumwe Klistu Yesu. ⁸ Mwaa mundyambwalegwa kwaumonyo

†† Kwali: a ...mukuumbaligwa yakumanya nae.

kwaindila yalikulupililo; asho hashinaalakela shinu kwenu mwenu, ni inudyo ya Nnungu. ⁹ Hashinava shinu shaudukilidile munu † pakulota hanalitim-byangidye munu woewoe. ¹⁰ Mwaa wetu ni viumbi vyake Nnungu túkandyangigwe nkati mumwe Klistu Yesu kwavitendo vyambone vyapanganienge tangu kala wetu tuname muvyanavo.

Klistu ni amani yetu

¹¹ Napavedoni mwenu kumbukila doni, mwemwe mwe muvéle mmamidi kwamili, múshishamegwa mmashungu kwa avalá vashamégwa vakukumuligwa, shinu shavatenda mumili na makono, ¹² inimmaikila mukumbukile doni, muwakati awo mwenu hamuvéna-vo Klistu, hamushivalangiligwa muuwentete washishilaeli, muvele múkamanyika nkati mudimbodi dyakulivikila; mmanu múkave lilindilililo na múkave Nnungu mushilambo amu. ¹³ Kanji napane nkati mumwe Klistu Yesu, mwenu mwe muvéle kushu munditadya muvé pepi kwaindila yamyadi vimwe Klistu.

¹⁴ Mwaa jo mwene ni amani yetu. Nae andivatenda vanu vavili kuva shinu shimo na kwaindila yamili wake andibamola lishiti lyapakati, aulá umongo ¹⁵ aputanga ishaliya yalóka mulilamulo inanapela muvyakulamulila. †† Nae atandilé davo pakulota vavili ava nkati mwake avatende kuva munu jumo waambi atandedya amani ¹⁶ na pakulota nae avaunganienge vavili ava mumili umo kwa Nnungu kwaindila yanshalaba amalidya umongo. ¹⁷ Nae aidilé ndavallenganga amani kwenu mwenu mwe muvéle kushu na amani kwa avalá ve vavéle pepi; ¹⁸ doni, kwaindila yake nae wetu tuvavili tunkuulula kumuukila Atata nkati mu Imumu jumo.

¹⁹ Napavedoni mwenu hamunava shinu múkamanyika na ata hamunava shinu mmamidi kanji ni mmentetemwagwe mmakwilimiyanga na mmamwing'ande yake Nnungu. ²⁰ Mundidangege pashanya vamyombe na vakulava, lijanga likumene lyashitunduvangilo kuva Klistu. ²¹ Nkati mwake, ing'ande uti pavanaunganianga indákulumuka ndava lyutu lya Nnungu lyakwilimiyanga nkati mumwe *UMU*. ²² Namwenu momo nkati mwake munkudangege pamo pakulota muve lyutu lya Nnungu kwaindila ya Imumu wake.

Shipii shililadidye kwamwaa wavamidi

3 Kwamwaa au nangu Paulu, nkúngwa umwe Klistu Yesu kwauwambone wenu mwenu mmamidi; ² doni, kwaumwii mwenu mundigwa itangaleka ing'ano yaunashilangola waumonyo wake Nnungu uvikígwe nkati mwangu nangu, ³ mwaimanyikidile kwangu nangu sho shipii ashilá ‡ kwaindila yamaono kulingana na mwanimwandikidile kwaungwipi. ⁴ Pamulota kushomya vyangwandike avi, mwenu

† Kwali: a shashimadengo. †† Mushigalegu: a ...aputanga lila-mulo lyamalamulo lishinanapela muvyakulamulila. ‡ Lola 1:9-10.

mundaulela kwanalela limanyilo lyangu nkati mushipii shimwe Klistu, ⁵ shipii shávakavamanyiidye vanu vadimbula dinji kenga mwashuukile ndalilodyedya kwa Imumu ambi apa kwavamyombe vakwilimiyanga na vakulava. ⁶ Shipii shene ni ashi: kwaindila yantenga wambone, vamidi ni vakupatamwagwe maleko, vaimbande yamumili umo na vanyagwe mukupagwa pamo muvyakulivikila nkati mumwe Klistu Yesu.

⁷ Kwashajo shaumonyo wake Nnungu wangupatile kwashimadengo shadimongo dyake, nditadya nguve ntumika wantenga au wambone. ⁸ Ata ikava kenga nangu nindyoko-uti pakati pavakwilimiyanga, vaningu-pa umonyo au wakuvavallenganga vamidi mali akwinjipika amwe Klistu ⁹ na wakuvaigwiniya vanu uti nnugu washipii ashi she shipiike tangu kala nkati mu Nnungu ákandyenge vinu uti ¹⁰ pakulota kwaindila yaliganisha, umbala walimanyilo lyake Nnungu lyuke likamanyike kwavanangalaledi na vakutawala mumautu akuwa ¹¹ shilinganana na nnugu wangwengwe ngwengwe watimishidye nae nkati mumwe Klistu Yesu *UMU* wetu. ¹² Nkati mwake nae, wetu tunkuvanavo ntima shii na litala lyakumuukila Nnungu tulyamini kwalikulupililo lyatuvanavo kwake nae. ¹³ Nadoni ninkunjugwa hamunadabadabange kwamwaa wamauvilo ánguvenavo yenu mwenu mwaa lolo lo, alishangelo lyenu.

Paulu ankuvajugwangila vaepeshu

¹⁴ Ni ashi shitádyá nguguguvale pamevo pa Tata-munu, ¹⁵ jojo aijá kwavapata mena ave makola uti akuwa na apai ¹⁶ pakulota kwautajili walishangelo lyake, antadye munanawangike na dimongo kwaindila yaimumu yake nkati muumunu wenu, ¹⁷ Klistu aname mmitima vyenu kwaindila yalikulupililo kwambangidya mwenu, mulinatela na muliikiniya mulinagwaledyo, ¹⁸ muulule kumanya pamo na vakwilimiyanga uti mugwipi na muleu, mwakulepa na mwakukadaleka ¹⁹ mumanye linagwaledyo limwe Klistu lipúnda limanyilo kwambangidya mwenu muumbaligwe na umbala wake Nnungu.

²⁰ Napanelo kwake aijá ávenao lyululilo lyakutenda kupunda apo uti avilá vyatujugwa kwali vyatukumbukila kwakulingana na dimongo dikóla madengo kwetu wetu, ²¹ kwake nae lipagwe lishangelo nkati muliganisha na nkati mumwe Klistu Yesu kwadimbula uti ngwengwe ngwengwe! Ame.

Upamo nkati mumili umwe Klistu

4 Napavedoni nangu nkúngwa umwe *UMU*, ninkunaililila muname shinamidyo shivaikidile nkati mukushamegwa akulá kwamushamagwidye; ² pagwa mukulishapeya, mukupambadyanga na muupole mupilililana mulinagwaledyo ³ muvanavo ntima wamalotelo akushunga upamo wa Imumu kwaindila yakuungana kwaamani. ⁴ Unkupagwa mili umo na Imumu jumo kenga mo mwavanshamalele mwenu kwalilindilililo limo lyakushamegwa kwenu, ⁵ *UMU* jumo, likulupililo limo, ubatisho umo, ⁶ Nnungu jumo na

Tatamunu wauti, jo ápagwa pashanya pauti, ápagwa mumautu uti na ápagwa nkati muuti. ⁷ Napane kwetu wetu kula munu andipata umonyo kwodananavo shipimo shanjavidile Klistu. ⁸ Ni ashi shitangaléke,

“Pakwadile kuka kushanya, andilangalalela shipinga shikumene shamatondo na kuvapa vanu dinudyo.” †

⁹ Inkuvanavo mana shani, “Nae andikwela?” Inkuvanavo mana kenga andíshuluka momo mpaka isemu yamwina, mushilambo shapai. ¹⁰ Aijá áshulwike ni jojo ákwadile pashanya pakuwa-uti kwambangidya aumbadye vinu uti. ¹¹ Ni jojo ávapele vanji kuva vamyombe, vanji kuva vakulava, vanji kuva vakuvalanganga ntinga, vanji kuva vashungaji na vanji kuva vamwalimu ¹² pakulota ivé dashi, vavapanganiange vakwilimyanga kwashimadengo shautumika kwakudenga mili umwe Klistu ¹³ mpaka uti tuwikile muupamo walikulupililo na walimanyilo lya Mwana wa Nnungu; doni, mpaka tukave tvanu tuvakukamala túwikidile shipimo shashilinga shaumbala umwe Klistu ¹⁴ kwambangidya dashi, hatunave tuvadyoko túgang'alegwa na mawimbi na tuvambaluwigwa kwakula imepo yamapundisho kwaujanja wawanu vaodédyá mukuduwanga milugu vyakushang'apa. ¹⁵ Napane patukumulila umwiu nkati mulinagwaledyo, indituvaikila tukulumuke túpagwite mwake nae muvinu uti, aijá ávele muti, jo Klistu aju. ¹⁶ Kwaindila yake nae mili uti paulyunganianga na paukumulananga na kula imbandi yavampele, kula imbandi paikola shimadengo muvaikidíle, inátadya mili ukulumuke pakulota ulidenge mulinagwaledyo.

Ngwale munu waambi

¹⁷ Nadoni ninkutangola na ninkumya ushuda nkati mumwe *UMU*, hamunaname kavili kenga mmamidi mukunyambikanga makumbukililo ave. ¹⁸ Vanavo muding'anong'ano dyave vankupagwa mushii vavikigwa panda mushingumi sha Nnungu kwamwaa waungamanya upagwite kwavanavo walakéla nkati mukunanopa kwamitima vyave. ¹⁹ Vanavo vo vanditadya kukamaligwa na kulumadyanga nkati mudyoni kutwala kuliinjidyanga mukulauka vatenda kwashipuva kula shinu shaushapu.

²⁰ Kanji kwaupande wenu mwenu, i mwanavo mwamulipundishididye Klistu, ²¹ ikava kenga mwiu mwenu mundigwa itangaleka mwaa wake na mundipundishigwa nkati mwake kwodananavo umwiu upagwite nkati mumwe Yesu aju, ²² kwaing'ano yamavalelo akala, mupundishigwidye kumula munu wenu wakala, munu jo abamalegwa na malotelo akushang'apa, ²³ kunnonowanga kavili mwimumu yamakumbukililo enu ²⁴ kutwala kungwala munu waambi ákandyangigwe kwakulinganana namu Nnungu nkati mwishaliya iu na nkati mukwilimyanga kwiu.

²⁵ Napavedoni, pamulakile kushang'apa, inimmaikila kula munu atangole umwiu kwanshitanono wake mwaa wetu uti ni mili umo. ²⁶ Shimwa na hamunatege. †† Hamunaleke liduva lidimba mushimwidye ²⁷ na

hamunamupe Ndamoni litala. ²⁸ Áshiva, hanaive kavili ila akole madengo atenda shinu shambone kwamakono ake pakulota dashi, apate ashilá shakumpwashela aijá ákave pashinu.

²⁹ Malove akunyatanga hanaume nkanywa mwenu ila aume malove ambone avaididile kuvadenga vanu kwodananavo malotelo ave kwambangidya malove enu ape umonyo kwa avalá vaígwa. ³⁰ Hamunantae shipalodi Imumu Wanashwe wa Nnungu, jo wavanna matididye mwenu mpaka muliduva lyakwambola.

³¹ Shijaujau, kushimwa, shitundi, kunyonya na kwabola; vinu avi uti pakati penu havinapagwe pamo na wakunyata uti. ³² Tananana na ava mmashididi mulivalilanila kulingana kenga mo mwannivalidile mwenu Nnungu nkati mumwe Klistu.

Wena mulinagwaledyo na mulilangadyo

5 Napavedoni ava mmakunjedya Nnungu kenga mmana mmakunagwaleka ² na nama mulinagwaledyo kenga Klistu anditunagwaledya kutwala kulyumya jo mwene yetu wetu kuva inudyo na shadaka shinung'angila kwa Nnungu.

³ Kulauka, ushapu kwali lung'unuku; pakati penu hanapagwe wakwambangila mwaa kenga mwaivalalele kwavakwilimyanga ⁴ ata malove akunyata, aujinga na antau ákavaikidile kanji paikave davopo, kupagwe kulambwalela. ⁵ Mwaa mumanya ngala doni, nkúlauka, nshapu kwali walung'unuku, jo wakulipudya vyakushang'apa, aju have maleko muutawala umwe Klistu namu Nnungu.

⁶ Hamunanneke munu anduwanga kwamalove ashing'alang'ala; kwamwaa wavinu vyovyoy vyo, vinkutadya shitundi shake Nnungu shivawikile avalá vákaigwilila. ⁷ Napavedoni hamunalyunganiange na vanavo muvinu avyo. ⁸ Mwenu kala muvele shii, napane ambi apa ni lilangadyo nkati mumwe *UMU* bai nama kenga mmana mmalilangadyo, ⁹ shepo shalilangadyo shivéle nkati muwambone, mwishaliya na muumwiu, ¹⁰ mwenu likanyalidye kupambula ashilá shinnagwéla *UMU*. ¹¹ Hamunaliinjidyange muvitendo vyamushii víkave vyepo kanji paikave davopo, kashaulanga.

¹² Mwaa avilá vyavatenda vanavo kwashipii ata ko kuvalanganga aku, vinkutaa dyoni. ¹³ Kanji vinu uti vikakashauligwa na lilangadyo vindáaneka ¹⁴ mwaa uti avilá vyúka ndatadya vyaneke ni lilangadyo. Ni ashi shitádyá itangaleke doni,

“Imuka wako úlala, takatuka pakati pavakupela na Klistu andakumulikila.”

¹⁵ Lilaledye shinamilo shamunama; i kenga shavajinga kanji shammanu mmalimanyilo ¹⁶ mutumila shana wakati wamuvenavo mwaa maduva ala, andinyatanga. ¹⁷ Napavedoni hamunave mmajinga kanji manya malotelo ake *UMU* ni akwashi. ¹⁸ Vinyu hamunaambalwe mwaa momo mo, munkupagwa kulauka kanji umbaligwa na Imumu ¹⁹ mutangola shivenevene mudimu, mukutumbyanga na muvyakwimba vyaimumu, mwimba na mushonga dimu mmitima vyenu

† *Lola Dimu* 68:18. †† *Lola Dimu* 4:4; 37:8.

kumwe *UMU*,²⁰ munnambwalela ngwengwe vinu uti Nnungu Atata palina limwe *UMU* wetu Yesu Klistu,²¹ kula munu alivika mwina mwamuje kwakumwishimu Klistu.

Malailililo kwavadyamunu na vatwamunu

²² Mmadyamunu, kula munu alivike mwina mwantwamunu kenga mo mwaivalalele kumwe *UMU*²³ mwaa ntwamunu ni muti wandyamunu kenga mo mwaivalalele Klistu muti waliganisha, jo mwene àvele mwamboli wamili. ²⁴ Nadoni kenga mo mwalilivikila liganisha mwina mumwe Klistu, namomo mwenu mmadyamunu livike muvinu uti mwina mwavatavenu.

²⁵ Mmatwamunu, kula munu annagwaledye ndyagwe kenga mo mwanagwaladyedya Klistu liganisha kutwala kulijaula kwamwaa walyanavo ²⁶ pakulota atadye kuva lyakwilimyanga paushanienge ushapu kwakuukanga na medi kwaindila yalilove

²⁷ kwambangidya alikamudye jo mwene liganisha lyalishangelo, líkave lilemba na ata unyadi kwali vinu vyoevyoe kenga avyo kanji lyakwilimyanga na líkave makosha. ²⁸ Ni kenga momo vatwamunu vavanagwaledye vadyavave kenga wo mili wave vene. Ánnagwaledya ndyagwe, ankulinagwaledya jo mwene.

²⁹ Mwenu, hapali munu ányanyatila mili wo wake mwene kanji shitandi análísha na kutatana kenga mo mwatandela Klistu liganisha ³⁰ mwaa wetu ni dimbandi dyamili wake. ³¹ “Napavedoni nnume ananneka tatake na anyoke kuka ndalyunganianga na ndyagwe kutwala vavili ava kuva mili umo.” ³² Shipii ashi shikumene kanji nangu ninkushidoni shaambíka apa shimwamba Klistu pamo na liganisha. ³³ Kanji napane namwenu kula munu annagwaledye ndyagwe kenga mo mwalinagwaladyedya jo mwene na ndyamunu amwishimu ntwagwe.

Malailililo kwavanamunu na vatatamunu

6 Mmana, vaigwilile vatatavenu nkati mumwe *UMU* mwaa amu ni muvaikidíle. ² “Mwishimu tatako na anyoko,” lilamulo litandi liidanavo kulivikila

³ “kwambangidya vinu vikuukile shana na uname wakati woe mushilambo.” ⁴ Namwenu mmatatamunu, hamunavatae shitundi vanavenu kanji valele mumapundisho na mukuduma kwake *UMU*.

Malailililo kwavatumwa na vanang'olo

⁵ Mmatumwa, vaigwilile vanang'olo venu vamushilambo mujopa na mutatamela kwantima shii kenga pakavele Klistu, ⁶ i mwaneke pakulota ivanagwele vanu kanji kenga vatumwa vamwe Klistu mutenda malotelo a Nnungu mmitima vyenu ⁷ mutumika kwantima wadukuduku kenga muntumika *UMU* i kwavanu.

⁸ Manya kenga shoeshoe shambone shatenda munu,

† Lola Kutunduvanga 2:24. †† Lola Kuma 20:12.

shosho sho andapata kwalakela kumwe *UMU* ata pakavele ntumwa kwali wamuunaiti. ⁹ Namwenu mmanang'olo, vatandele momo vatumwa venu na leka kutishanga kwenu mumanya kenga aijá ávele nang'olo wave na nang'olo wenu mwenu uti avelé kuwa na kwake nae, hakupali kupambula.

Gwalangila vyaing'ondo vimwe Nnungu

¹⁰ Kumwisho akuno ling'e dimongo nkati mumwe *UMU* na nkati mukunanopa kwalyululilo lyake.

¹¹ Gwalangila vyaing'ondo uti vimwe Nnungu pakulota muulule kwimila mupinga mitego vimwe Ndamoni

¹² mwaa ing'ondo yetu hainava shinu yakupingana na munu kanji ni kupinga dimongo dyautawala, kupinga dimongo dyamadalka na kupinga dimongo dya-mushilambo uti mushii ashi shawakati au, kupinga dimongo dyadimumu dyaukalau mumautu akuwa.

¹³ Napavedoni nyukatanga vyaing'ondo uti vimwe Nnungu pakulota muliduva alilá lyaukalau muulule kulanopa na pamumalididya uti muke mushu mwimidile. ¹⁴ Nadoni imila mùlyungile nkanda waumwui, mùgwete pashuva shikopa shaishaliya ¹⁵ na mmadodo mwenu, mùgwete ntenga wambone waamani mwimidile do, go mulyutu lyakunanopa.

¹⁶ Kwavinu avyo uti, mùnyukete shikopa shalikulupililo; shanavo mundafula kudima myumba vyamoto vimwe aijá nkalau. ¹⁷ Twala shijulu shashitali shakwambola na lyambila Iya Imumu livele lilove Iya Nnungu. ¹⁸ Kwakula inamuna yakushwali na kujugwa, shwali kula wakati mu Imumu. Kwadoni, ava mevo mulipililila uti mushwali muvajuugwila kwakwilimyanga uti ¹⁹ namomo mungujugwila nangu kwambangidya dashi ndikashimula ikanywa, ngupate malove pakulota ndivamanyiye vanu na ntima washinannume shipii shantenga wambone, ²⁰ wo wanguvele nangu baloshi vānguungile mang'unyang'unya, nguvalangangile na ntima washinannume amulá muvaikidíle ngutangole.

Nandele wamwisho

²¹ Napanelo Tikiku nung'unumunu wakunagwaleka na walikulupilika, ntumika umwe *UMU*, anamanyiya uti pakulota mwenu momo mumanye vinu vingwamba nangu na nyamani shangutenda. ²² Nintumididyé kwenu kwaing'ano ai kwambangidya mwenu muyanye vinu vitwamba wetu na amupe ntima shii.

²³ Amani ipagwe kwavanung'unumunu, namomo linagwaledyo pamo na likulupililo lyakwalakela kumwe Nnungu Atata na kumwe *UMU* Yesu Klistu. ²⁴ Umonyó upagwe na avalá uti vannagwalédya *UMU* wetu Yesu Klistu kwalinagwaledyo líkave mwisho.

‡ Kwali: a ...na mmadodo mwenu, mùgwete kulipanganianga kwantenga wambone waamani.

Vapilipo

Nandele

1 Paulu namu Timoti vatumwa vamwe Klistu Yesu kwavakwilimyanga uti nkati mumwe Klistu Yesu múpagwa ako ku Pilipo pamo na vakualehya na vatumika.

² Kwenu mwenu upagwe umonyo na amani vyakwalakela kumwe Nnungu Tatagwetu na kumwe *UMU* Yesu Klistu.

Kulambwalela nkati mukushwali

³ Kula mwanda paninkumbukila mwenu, nánnambwalela Nnungu wangu. ⁴ Paninshwalidya mwenu, ngwengwe ndáshwali na lipuwilo ⁵ kwamwaa waupamo wenu nkati muntenga wambone kutunduvangila liduva litandi mpaka nelo. ⁶ Ninkuvanavo wakika kenga aijá átunduvenge shimadengo shambone nkati mwenu, andatadya shiwikile popo mpaka muliduva limwe Klistu Yesu.

⁷ Ni shinu shivaikidíle shakunkumbukila nangu mwenu uti mwaa nangu nimmika muntima mwangu; ata mukungwa kwangu na ata mukushilidya kwali mukwakikisha ntenga wambone, uti mwenu ni mmakumajananga nanangu muumonyo. ⁸ Nnungu ni nshuda wangu wa amulá mwaninnatela mwenu uti kwalilotelo lyake Klistu Yesu.

⁹ Aku ni kushwali kwangu, linagwaledyo lyenu mwenu lyanjadyeke kupunda apo nkati mulimanyilo na mukujavanianga ¹⁰ kwambangidya dashi, mupambule shakwashi shivénavo mana makumene pakulota muve mmanu mmaiu na múkave makosha muliduva limwe Klistu ¹¹ mùumbaligwidye shepo shaishaliya shaalóka kwaindila imwe Yesu Klistu kwalishangelo na kwakutumbyangilika kumwe Nnungu.

Kungwa kumwe Paulu kunkwandadya ntenga

¹² Ngulota mmanung'unumunu mumanye doni avilá vingutandéke, kwakutangola mwiu vyanavo vindipwashela kwandadya ntenga wambone ¹³ mpaka kuka ndamanyika muvipinga uti vyavakushunga vapaing'ande imwe Shashali pamo na vanu uti kenga ninkungwa kwamwaa umwe Klistu. ¹⁴ Namomo vanung'unumunu voe pavapatile dimongo nkati mumwe *UMU* kwamwaa wakungwa kwangu vandyuka ndalyalaveka kusalanganga lilove kwabila kujopa shinu.

¹⁵ Ni mwiu doni, vanji vankummalanganga Klistu kwaing'ou na kwamashindano kanji vanji ni vam-

malangánga kwamalotelo ambone. ¹⁶ Ava vankutenda kwalinagwaledyo vàmányite doni Nnungu angupangidilé kushilidya ntenga wambone. ¹⁷ Vanji vo, vankummalanganga Klistu kwamashindano; vanavo havanakulupilika shinu valota vangutindinganiange mukungwa kwangu. ¹⁸ Hapanapagwa shinu! Shikumene ni ashi, kwaindila yoeyoe ata ikava mukulikuluwa kwali muumwiu, Klistu ankuvalangangigwa; ni ashi shingutádyá ngupuwange.

Kunama ni Klistu, kupela ni paida

Namwiu ndauka mushu ngupuwanga ¹⁹ mwaa ndimanya kenga kwaindila yakushwali kwenu na lipwashalelo lya Imumu umwe Yesu Klistu, asho shindapa vyepo mukuunguligwa kwangu. ²⁰ Shilakolilakoli shangu na lilindilililo lyangu ni ali, hashipali ata nkati mushimo shilóta kungutaa dyoni kanji kwantima washinannume kenga ngwengwe na ata ambi apa, Klistu andatumbyangilika mumili mwangu, ata mushingumi na ata mukupela. ²¹ Mwaa kwangu nangu, kunama ni Klistu na kupela ni paida. ²² Ikava ni yakuka mushu ngunama mushilambo amu, kwangu nangu shipali shimadengo shakupa vyepo. Nadoni shakutandola namanya shinu! ²³ Vivili avi viningutita dimumu. Inkungunagwela ngume ndikapagwe namu Klistu mwaa ashi ni shambone namene kupunda apo ²⁴ kanji kwakupagwa nangu mushingumi ni shambone namene kwenu mwenu. ²⁵ Napanelo panguukile ndashambegwa na ashi, ndimanya doni ndapagwa na ndauka mushu namu mwenu uti kwamwaa wakukulumuka kwenu na lipuwilo lyenu nkati mulikulupililo ²⁶ kwambangidya dashi, nkati mwangu nangu kulitamanga kwenu nkati mumwe Klistu Yesu kwanjadyeke kwamwaa wakupagwa nangu kavili namu mwenu.

²⁷ Shikumene nama muvaikidíle ntenga wambone umwe Klistu pakulota ndikaida nannola kwali ndikanaida, ngwigwe kwenu mwenu kenga munkunanopa mu Imumu jumo, kwaunapamo mulikanyalidya kwamakumbukililo amo lolo kwamwaa walikulupililo lyantenga wambone ²⁸ kwabila kuvajopa nkati mushinu shoeshoe avalá vampínga. Ashi ni shimanyikilo shave shakubamalegwa kanji kwenu mwenu ni lyambwalelo lyenu; lyo lyalakéla kumwe Nnungu. ²⁹ Mwaa kwenu mwenu kwaupande umwe Klistu, vandimupa i gweka yakunkulupila nae kanji yadavo yakumuvauvangila ³⁰ muvanavo ing'ondo yoyo

† Kwali: a ...asho shindapa vyepo mukwambolekwa kwangu.

yamungugwene ngutenda na ata ambi apa munkwig-wa kenga ninkuka mushu ngutenda.

Jedya kulishapeya kumwe Klistu

2 Napavedoni, ikava kenga kunkupagwa kwing'a ntima shii kwoekwoe nkati mumwe Klistu, ikava kenga kunkupagwa kupambadyanga kwoekwoe kwalinagwaledyo, ikava kenga unkupagwa upamo woewoe mu Imumu na ikava kenga linkupagwa lilotelo lyoelyoe na shididi, ² bai tadya lipuwilo lyangu liwikile popo, mupagwa mumakumbukililo lolo, muvanavo linagwaledyo lyolyo, muvanavo upamo, mukumbukila shinu shimo tu. ³ Hamunatende shinu shoeshoe kwamashindano na ata kwakulyona kwamambinya kanji kwakulishapeya, kula munu amwone muje kupagwa muwa mwake nae. ⁴ Kula munu angaikange i gweka yake jo mwene kanji namomo yavanu vanji. ⁵ Pakati penu, avanavo ding'anong'ano adi, dyo dipagwite momo nkati mumwe Klistu Yesu,

⁶ Nae, ata ikava kenga mumavalelo ave Nnungu, hagwene yakulinganana na Nnungu kuva shinu shakung'ang'anikila

⁷ kanji andilishuluwa † jo mwene atwala mavalelo antumika na avalekwa mwaing'ope yamunu.

Paaneke mumavalelo amunu,

⁸ andilishapeya ava wakwigwilila mpaka kupela, ata kupela panshalaba.

⁹ Napavedoni Nnungu aninkwedya kutwala kumupa lina alilá livéle pashanya pamena uti

¹⁰ pakulota palina limwe Yesu, malundi uti ashidike, kuwa, pai na mwina pai

¹¹ na kula lulimi luvalangange kenga Yesu Klistu ni *UMU*

kwalishangelo Iya Nnungu Atata.

Tandedya kwambwalegwa mujopa na mutatamela

¹² Nadoni mmakunagwaleka, kenga mo mwamungwigwilidile ngwengwe, ambi apa i do ngupagwite ako kanji kupunda namene pandikapagwite, tandedya kwambwalegwa kwenu mujopa na mutatamela ¹³ mwaa Nnungu ni ákola madengo nkati mwenu pakulota mwenu mulote na mutandedye kwodanana-vo amulá munnagwéla nae.

¹⁴ Tandedya kula shinu kwabila kutangadikanga kwali kwamitau ¹⁵ pakulota dashi, muve mmanu múkave makosha na múkave ushapu, mmanavake Nnungu múkave malemba pakati paimbula yavanu vakukangadakanga na vakwashalanga, po pamulangala mwenu pakati pave kenga vyakulangala mushilambo ¹⁶ mukamulidile lilove lyashingumi kwambangidya muliduva limwe Klistu nangu ngulitamange kenga hangutukwite monyo na ata hangukadile shimadengo shamonyo. ¹⁷ Ata ikava ken-

† *Mushigalegu: a ...kanji andilimimina.*

ga vankungumimina pashanya shadaka na mukutumika muukulangalalela-shadaka kwalikulupililo lyenu, ninkupuwanga na ninkupuwanga pamo namu mwenu. ¹⁸ Nimumo momo, namwenu puwanga na puwanga namu nangu.

Timoti namu Epapoloditu

¹⁹ Ninkulindila nkati mumwe *UMU* Yesu kenga panika-timangatimanga, nantumidya Timoti kwenu mwenu pakulota nangu nguvenavo ntima shii pangulota kumanya dyabali dyenu. ²⁰ Mwaa hanguvenavo munu junji ávenavo makumbukililo lolo † álota kumwangaikangila mwenu mwiu mwiu. ²¹ Vanji uti vaan-gaikangila vyave i vimwe Klistu Yesu. ²² Kanji napane mwenu mundimanya mana aanakanéngé kwake nae mwaa kenga mwana na tatamunu, nae anditumika namu nangu muntenga wambone. ²³ Nadoni ninkulindila nintumidye ako, po pangulota kumanya shana myaa vyangu ²⁴ na ninkuvanavo likulupililo kumwe *UMU* kenga kwashipajelo ata nene nimwene momo ndaida ako.

²⁵ Kanji napane ndyona do, indivaikila nintumidye kwenu mwenu Epapoloditu, mwanetu, mmáden-gomwangu na mwing'ondomwangu, jo wamuntumile mwenu na ntumika wa avilá vyangulota nangu ²⁶ mwaa nae ankuvanavo mweshe kwenu mwenu na unindimba ntima pakuva mundigwa kenga nae nnwele. ²⁷ Mwiu nae andíva nnwele ata mpaka kuleka indaja. Kanji Nnungu andimwanangila shididi na i gweka nae ata nangu momo kwambangidya hangunavenavo shipalodi pashanya shipalodi. ²⁸ Nadoni ninkuvanavo dukuduku yakupunda apo yakuntumidya kwenu pakulota pamulota kumwona kavili, mwenu muvenavo lipuwilo na nangu shipalodi shangu shipunguke. ²⁹ Napavedoni, mpwashalele nkati mumwe *UMU* kwalipuwilo uti na vaishimu vanu vakuva kenga ajo ³⁰ mwaa nae andípela kwashimadengo shimwe Klistu alimyanga shingumi shake pakulota awishe popo ashilá she shibakidíle mukutumika kwenu kwangu nangu.

Ishaliya kwaindila yakunkulupila Klistu

3 Napanelo kumwisho akuno mmanung'unumunu puwanga nkati mumwe *UMU*! Kumwandikila kavili mwenu malove lolo hashinangukamadyangidya shinu kwangu nangu ila shosho sho ni lishilidyo kwenu mwenu.

² Lishunge kwa avalá vang'avanga. Lishunge kwa avalá vaténda ukalau. Lishunge kwa avalá vaanónge mili. ³ Mwaa wetu ni likumbi shii túlipudya kwa Imumu umwe Nnungu túlitumbyangidya nkati mumwe Klistu Yesu na túkakulupila vyamumili, ⁴ ata ikava kenga nene nimwene ninkuvanavo shaliya yakukulupila vya-mumili.

Ikava kenga woewoe ankwona kuvanavo shaliya yakukulupila vyamumili, bai nangu nimpomo: ⁵ kwaing'ano yalikumbi, nangu ni nimunu wakuku-

†† *Kwali: a ...álinganene namu nae.*

muligwa muliduva lyanane, wamulikola lyavanaishi-laeli, wamulutumbo lwavanabenjamani, mbalaniya mwiu; kwalilamulo, mpalishayo; ⁶ kwaidukuduku, nkú-papata liganisha; kwaishaliya ipagwite mulilamulo, ákave makosha.

⁷ Kanji napane ashilá shíshiva paida kwangu, ninkwona kuva shakujaika kwamwaa umwe Klistu. ⁸ Ata kwakupunda apo, ninkwona vinu uti kuva vyaku-jaika kwamwaa waukumene wakumamodya wali-manyilo limwe Klistu Yesu *UMU* wangu, aijá wanin-jaikangila vinu uti. Avyo uti ninkwona kuva dinywash-wa kwambangidya nimpate Klistu ⁹ na ngunanapele nkati mwake pandikavenavo ishaliya yangu nene nimwene yakwalakela mulilamulo kanji yakwalakela kwaindila yakunkulupila Klistu, ishaliya ailá yalakéla kwa Nnungu na inanapéla mulikulupililo. ¹⁰ Ngulota nimmanyé Klistu, ngumanye dimongo dyakudyuka kwake na ngupagwe muupamo wamauvilo ake ngulin-ganana namu nae mukupela kwake ¹¹ pakulota kwaindila dyoedyoé nguulule kuwikila kwangupata kudyuka pakati pavakupela.

Likanyalidye kuwikila shabaa

¹² I do nangu ndivanavo tayali asho na ata kwali ndi-va tayali washalowa-uti kanji ninkuka mushu ngu-likanyalidya pakulota nguulule kukamula ashilá, sho shangukamulidile nangu Klistu Yesu. ¹³ Mma-nung'unumunu, hangunakumbukila shinu kenga ndikamula tayali shinu ashi kanji shinu shimo shangutenda, ninkulivaliva vyapanyuma kutwala kun-yulukila vyamushu. ¹⁴ Nguka mushu ngulikanyalidya ndikawikile shabaa yainudyo yakushema kwake Nnun-gu kwalakéla kuwa nkati mumwe Klistu Yesu. ¹⁵ Na-pavedoni uti wetu túlota tuve tuvashalowa indituvai-ki-la tukumbukile doni, ikava kenga apali ákumbukilila munji, ajo Nnungu andamuunukulila shinu asho.

¹⁶ Napane ashilá shatuulwile, shosho sho twode.

¹⁷ Mmanung'unumunu, ungana mutwale mungu-jedye na muvalole avalá vanáma kwakulinganana na mpano wamuvenavo mwenu kwetu wetu. ¹⁸ Mwaa voe vanishimwaulila myanda vyoé na vandimwaulila ambi apa kwamyodi, vankunama kenga vammongo wan-shalaba umwe Klistu. ¹⁹ Vanavo mwisho wave ni kuba-malegwa, nnungu wave ni shitumbo na lishangelo lyave linkupagwa mudyoni dyave vakumbukila vinu vyamushilambo tu bai. ²⁰ Kanji wenentete wetu wetu uvelé kuwa akulá kwatunnindila na dukuduku mwamboli, *UMU* Yesu Klistu. ²¹ Nae andabadilisha mili vyetu vyakudabadabanga kutadya vilinganane na mili wake walishangelo kwaindila yadimongo dintádyá aul-ule kuvika vinu uti mwina mwake.

⁴ Napavedoni mmanung'unuvangu mwenu mmaninnagwaledya mwemwe wanguvenavo mweshe, múvele lipuwilo lyangu na lidaka lyangu, imi-la dadoni mukunanopa nkati mumwe *UMU*, mwenu mmakunagwaleka vangu.

Puwanga ngwengwe nkati mumwe *UMU*

² Napanelo shandivajugwangila Evodiya namu Shin-tike ni shinu shimo shosho, vaigwanie nkati mumwe *UMU*. ³ Mwiu, namomo ninkukujugwa wako unyangu wakukulupilika nguushidoni, vapwashele vamama ava. Vanavo vandilyuvyauvyanga namu nangu muntenga wambone pamo namu Kalamende na va-madengomwangu vabakadíle vo. Mena ave ankupag-wa mulibuku lyashingumi.

⁴ Puwanga ngwengwe nkati mumwe *UMU*. Ninkuuji-la kavili nguushidoni, puwanga! ⁵ Wambone wenu † umanyike kwavanu uti. *UMU* avé pepi. ⁶ Hamunan-gaikange kwamwaa washinu shoeshoe kanji kwakula shinu, kwaindila yakushwali na yakujugwa pamo na kulambwalela, palakedya majugwilo enu kwake Nnun-gu ⁷ na amani ya Nnungu ipúnda ding'anong'ano uti indashunga mitima na ding'ano dyenu nkati mumwe Klistu Yesu.

⁸ Kumwisho akune mmanung'unumunu, vyoevyoe uti vyaumwuu, vyoevyoe vyaishima, vyoevyoe vyaishaliya, vyoevyoe víkave ushapu, vyoevyoe vyak-walala, vyoevyoe vyashimbili na ikava kenga vipali vi-vaikidíle kutumbyanga, vinu avyo vikila kuntima. ⁹ Avilá vyamulipundishidye, vyamupatile, vyamwigwite na vyamugwene kwangu nangu, vinu avyo tandedya na Nnungu waamani andapagwa namu mwenu.

Paulu ankuvalambwalela vapilipo

¹⁰ Napanelo ninkupuwanga namene nkati mumwe *UMU* kwamwaa wenu mwenu wamuliladidye kavili kungutanana nangu. Kwaumwuu, mwenu mushinan-gukumbukila ila hamushivanavo litala lyakulilodya.

¹¹ Hangunatangola shinu yakungwova shoeshoe mwaa ndilipundisha kulishika muvyoevyoe. ¹² Ndi-manyá mwakukatakela uti na ndimanya mwakuumb-baligwidya. Nkati muuti ndilipundisha shipii; nkati mukwikuta na nkati mukudoba indala, nkati mukuumb-baligwa na nkati mukwova vinu. ¹³ Uti ninkuulula ku-tandedya nkati mwake aijá ángupa dimongo.

¹⁴ Ata ive davo, mwenu munditandedya wambone kwakuliinjidyanga mumauvilo angu. ¹⁵ Mwenu mmapilipo mundimanya shana kenga kukutunduvan-ga ntenga wambone panguukile ku Makedoniya hali-pali liganisha liliinjidyéngé mwing'ano yakujaula na yakupwashalela ila ni gweka mwenu. ¹⁶ Mwaa ata ngu-vé ku Teshalonika mwenu munditumidya lipwashalelo kwa avilá víshingwova na i mwanda umo. ¹⁷ I do, ninkulambela shadaka shenu kanji shangulambela ni vyepo vyakwanjedya paida yenu. ¹⁸ Nangu ndivanavo uti na ndyumbala. Ndilinganana pangupatile kumwe Eapoloditu avilá vyaléke kwenu; avyo ni kunung'angi-la kwambone, shadaka shakukubalika shinnagwéla Nnungu. ¹⁹ Nnungu wangu andalinganianga uti avilá vyamulota kwautajili wavenavo mulishangelo nkati mumwe Klistu Yesu. ²⁰ Kumwe Nnungu wetu na Tatag-

† Kwali: a Upole wenu...

wetu lipagwe lishangelo ngwengwe ngwengwe. Ame.

Nandele wamwisho

²¹ Vape nandele vakwilimyanga uti nkati mumwe Klistu Yesu. Vanung'unumunu vapágwa namu nangu,

vankuntumidya nandele. ²² Vakwilimyanga uti vankuntumidya nandele kupunda namene vapágwa paing'ande imwe Shashali.

²³ Umonyó umwe *UMU* wetu Yesu Klistu upagwe mushingumi shenu.

Vakoloshu

Nandele

1 Paulu, myombe umwe Klistu Yesu kwalilotelo lyake Nnungu namu nung'unumunu Timoti ² kwavakwilimyanga na kwavakukulupilika vanning'unumunu nkati mumwe Klistu vápagwa ku Koloshu.

Umonyonyo upagwe kwenu mwenu na amani vyakwalakela kumwe Nnungu Tatagwetu. †

Kulambwalela nkati mukushwali

³ Ngwengwe tunkunnambwalela Nnungu Tatamunu umwe *UMU* wetu Yesu Klistu patunshwalidya mwenu ⁴ kutunduvangila patwigwite yalikulupililo lyenu nkati mumwe Klistu Yesu na linagwaledyo lyamuvenavo kwavakwilimyanga uti ⁵ kwamwaa walilindilililo lyavankandyadidye kuwa, lilindilililo lyolyo lyamwigwite kunantandi kwaindila yalilove lyaumwiu, wo ntenga wambone ⁶ umwikidile mwenu wo. Ntenga au, undauka mushu upa vyepo shilambo uti na unkukulumuka kenga mo mwaivalalele kwenu mwenu kutunduvangila muliduva lyamwigwite na kumanya umonyonyo wake Nnungu muumwiu ⁷ kenga mwamulipundishididye kumwe Epapalashi ntumwamwetu wakunagwaleka. Nae ni ntumika wakukulupilika umwe Klistu kwau-pande wenu ⁸ na ni jojo átuvalangidile linagwaledyo lyenu nkati mu Imumu.

⁹ Napavedoni, kutunduvangila muliduva lyatwigwite hatunaleka shinu kushwali yenu mwenu tunjugwa Nnungu pakulota dashi, muumbaligwe na limanyilo lyalilotelo lyake nkati mulimanyilo na umanyimanyi uti waimumu ¹⁰ kwambangidya muname shinamidyo shimmaikila *UMU*, vinnagwela muuti, mupa vyepo mushimadengo uti shambone, mukulumuka mukumanya Nnungu, ¹¹ munanawangika na dimongo uti kwodananavo dimongo dyalishangelo lyake kwakulipililila na kwaupole uti, ¹² munnambwalela na lipuwilo Tatamunu átididye mupagwe mukumajananga maleko avakwilimyanga mulilangadyo. ¹³ Nae ni átu-poshidye muutawala wamushii kutuukanavo muutawala wamwanagwe wakunagwaleka, ¹⁴ mwake nae tunkuvanavo kwambolegwa kúvele kulivalivigwa kwashimadambi.

Klistu ni uti nkati muuti

¹⁵ Nae ni ing'ope ya Nnungu ákaaneka, †† ntandi kuvalekwa waviumbi uti ¹⁶ mwaa nkati mwake mundyuka ndakandyangigwa vinu uti, vinu vivéle kuwa na vinu vivéle pai, vinu vyanéka na vinu víkaaneka, viteng'u kwali vyeo, vakutawala kwali vamadalaka, vinu uti vindikandyangigwa kwaindila yake nae na kwamwaa wake nae. ¹⁷ Nae ni nantandi wavinu uti na nkati mwake, vinu uti vinkuungananga. ¹⁸ Nae ni muti wamili alilá liganisha, shitunduvangilo na ntandi kuvalekwa pakati pavakupela pakulota muvinu uti akumulile lyutu litandi ¹⁹ mwaa Nnungu ininnagwela kumbaligwa kwake uti kuname nkati mwake nae ²⁰ na kwaindila yake aunganiange kavili vinu uti kwake atandedya amani kwaindila yamyadi vyake vijaíke panshalaba, vinu uti ata ikava vivéle mushilambo shapai ata ikava vivéle kuwa.

²¹ Kushi mwenu mwe mwapukanéngé na mwe muvéle mmamongo mumakumbukililo enu kwamwaa wavitendo vyaukalau, ²² ambi apa nae andimuunganianga kavili mumili wake washimunumunu kwaindila yakupela kwake kwambangidya nae akannodye mwenu múvele mmakwilimyanga, múkave makosha na kwabila kupagwa shakunkanidyanga pamevo pake Nnungu ²³ ikava kenga mundauka mushu mulikulupililo munanopa na mulinatela bila kwambukan-ga lilindilililo lyantenga wambone wamwigwite uvalangangilike muviumbi uti vivéle pai. Au ni ntenga wowo ukúle nangutadya nangu Paulu ngúve ntumika.

Kulikanyalidya kumwe Paulu kwavakoloshu

²⁴ Napanelo ninkupuwangila mumauvilo angu kwamwaa wenu mwenu mwaa nkati mumili mwangu, ninkuumbadya mauvilo aovíte amwe Klistu kwamili wake livele lyo liganisha. ²⁵ Lyanavo nditadya kuwa ntumika kwodananavo unashilangola wake Nnungu wangupele kwamwaa wenu pakulota kuwisha popo lilove lyake Nnungu, ²⁶ shipii ashilá shavapiidye tangu kala dimbula kwadimbula kanji ambi apa shitadídye shimanyike kwavakwilimyanga. ²⁷ Kwavanavo, Nnungu andyamuwa avatadye vamanye ukumene shani wamali alishangelo lyashipii ashi pakati pavamidi; shipii asho ni Klistu nkati mwenu, lilindilililo lyalishangelo. ²⁸ Ni jojo watummalanganga, tuduma na tumpundisha kula munu nkati mulimanyilo uti pakulota tunnodye kula munu washalowa-uti ‡ nkati mumwe Klistu.

† Maandiko anji akala vandyanjedya: a ...na kumwe Umu Yesu Klistu.

†† Linganianga Kutunduvanga 1:27. ‡ Kwali: a ...wakula.

²⁹ Kwashabaa ai, ninkukola shimadengo shakupwateka ngulikanyalidya kwodananavo shimadengo shake shikóla namene madengo nkati mwangu na dimongo.

2 Mwaa ninkulota mumanye ukumene shani waku-likanyalidya kwanguvenavo kwenu mwenu na kwa avalá vavéle ku Laudisheya pamo namu uti avalá vakanava kungwona ing'ope yangu ² pakulota doni, mitima vyave vinanawangike vâungene mulinag-waledyo kwambangidya vapate mali uti auwakika uti aalakéla mulimanyilo kwambangidya dashi, vamanye shipii shimwe Nnungu, jo Klistu aju. ³ Nkati mwake nae mundilikondya vidimbi uti vyalimanyilo na umanyi-manyi. ⁴ Avi ninkumwaulila pakulota hanapagwe munu wakunduwanga na malove akuutila ⁵ mwaa ata ikava kenga hangupali ako kwamili kanji kwaimumu ninkupagwa namu mwenu [†] ngupuwanga kwakulipanga kwenu na kunanopa kwalikulupililo lyenu kumwe Klistu.

Tundidyuka namu nae kwalikulupililo

⁶ Napavedoni pakuva mwenu munimpwashalela Klistu Yesu kenga *UMU*, nama nkati mwake ⁷ muvanavo dinyija na mùdangegwe nkati mwake, munanawangika mulikulupililo kenga mo mwavampundishididye na mùumbaligwidye kulambwalela.

⁸ Lilaledye, hanapagwe munu wakuntwala mateka atumila mang'amung'amu na kushang'apa kwamambinya kwodananavo mavalelo ashimunumunu na dimumu ditawála shilambo ashi kanji i kwodananavo Klistu. ⁹ Mwaa nkati mwake nae, kuumbaligwa uti kwaunnungu kunkunama mumili. ¹⁰ Namwenu momo mundyumbaligwa nkati mwake aijá muti wautawala na madalaka uti. ¹¹ Namomo nkati mwake, mwenu mundikumuligwa likumbi i likumbi lyavakumula vanu kanji lyakulyusha mili washimunumunu, lyo lyakumula Klistu ¹² pamuukile ndashikigwa namu nae muubatishe, wo wamuukile ndadyuka namu nae kwaindila yalikulupililo mushimadengo shadimongo shake Nnungu ándyuwidye pakati pavakupela. ¹³ Namwenu pamupadíle nkati mukupujungula kwenu na kwabila kukumuligwa likumbi mili vyenu vyo, Nnungu ampelé shingumi pamo namu nae átulivalidile kupujungula kwetu ¹⁴ na áputenge mashauma uti amadeni etu e apagwíte kwetu wetu. Mashauma ala, nae andimalidya akamalela panshalaba, ¹⁵ avapoka dimongo vakutawala na vamadakala. Nadoni nae avatadyengé dyoni paumbala avatema kwaindila yanshalaba.

Hamunanneke munu ampoka lidaka lyenu

¹⁶ Napavedoni hamunanneka munu woewoe amuukumu kwamwaa waing'ano yavyakulya na vyakukumbila kwali kwamaduva avikukulu vyadidini kwali kwakupuwangila kwakwaneka mwedi waambi kwali kwamwaa waliduva lyakupumula. ¹⁷ Vinu avi ni shimbedi sha avilá vilóta kwida kanji umwiu ni Klistu.

[†] Mana malove ala, a kwaimumu ninkupagwa namu mwenuni a malamulo angu ankupagwa namu mwenu.

^{††18} Hamunanneke munu ampoka lidaka lyenu kwakupuwangila namene mukulishapeya na mukulipudya kwavanjelo, atadolyatadolya avilá vyagwene na alitumbudyatumbudya mumakumbukililo ake ashimunumunu. ¹⁹ Munu kenga aju hanalinamati-la shinu mmuti, muti wowo utádyá mili uti paupwashalalegwa na paungananga mumalundu na mumipa, ukulumuke kwalikumukililo lya Nnungu.

²⁰ Ikava kenga mwenu mundipela namu Klistu kwadimumu ditawála shilambo ashi, mwaa shani napane kenga mo mwamushinamila mushilambo ashi munkulivika mwina lilamulo? ²¹ "Hamunakamule ashi! Hamunalinge ashilá! Hamunakumbe asho!" ²² Avi uti vankwamba avilá vitumika kutwala kutimbikanga. Malamulo alo ankwodananavo mang'amung'amu na mapundisho ashimunumunu tu bai. ²³ Mwiu ankwane-ka kvanavo limanyilo nkati mukulipudya kwavapan-ganianga vanu, nkati mukulishapeya na nkati muku-vyauvyanga mili kanji havive mana akwimidya kunag-waledyo kwamalotelo ashimunumunu.

Kumbukila vivéle kuwa i vyapai

3 Napavedoni ikava kenga mundidyuka namu Klistu, bai lambela vinu vivéle kuwa kwaikele Klistu kunkanakono kwake Nnungu. ² Kumbukila vinu vivéle kuwa i vivéle mushilambo shapai ³ mwaa mwenu mundipela kutwala shingumi shenu kukandyegwa namu Klistu nkati mumwe Nnungu. ⁴ Napane palota kwaneka Klistu ávele shingumi shenu, namwenu momo mundaaneka namu nae mulishangelo.

⁵ Nadoni nkati mwenu, pedyá uti avilá vyashimunumunu; kulavalava, ushapu, ditamaa, malotelo aukalau na ing'ou, ako ni kulipudya kwavyakushang'apa. ⁶ Kwamwaa wavinu avi shinkwida shitundi shake Nnungu [kwa avalá vâkaigwilila]. ⁷ Muvinu avi namwenu momo kala mushindatenda yadavo pamushinama muvyanavo ⁸ kanji ambi apa, nyemya vinu avi uti: shitundi, shishimwashimwa, vitendo vyaukalau, kwabola na kumya malove adyoni nkanywa mwenu. ⁹ Hamunashang'apanile mwaa mwenu mundimula munu wakala pamo na vitendo vyake ¹⁰ kutwala kungwala munu waambi ádyuwangidya kavili nkati mulimanyilo kwodananavo ing'ope yake aijá ámuumbile. ¹¹ Apa hapali ngalegu kwali muyuda, wakukumuligwa likumbi kwali ákakumuligwe, mmidi kwali mushikita, ntumwa kwali wamuunaiti kanji Klistu ni uti na nkati muuti.

¹² Napavedoni kenga mmenentete mmakutandalegwa vake Nnungu, mmakwilimyanga na mmakunagwaleka, gwala shididi shamuntima, kutanana, kulishapeya, upole na kulipililila. ¹³ Pililanila na ikava kenga jumo ankuvanavo shakukashali kwamunu junji, napane pakuva *UMU* aninnivaliva mwenu namwenu momo livalilanila. ¹⁴ Pashanya pavinu avi uti, gwala linag-waledyo, lyanavo ni lyunganilo liu.

^{††} Kwali: a ...kanji umwiu ni umwe Klistu. [‡] Pakati pamaandiko matandi anji havenavo malove ala: a ...kwa avalá vâkaigwilila.

¹⁵ Doni, amani imwe Klistu ave nkwangangola mmitima myenu mwaa kwaamani mwenu mundishamegwa kwamili umo na muve mmakulambwalela. ¹⁶ Lilove limwe Klistu liname namene nkati mwenu, mupundishania na mudumana kwalimanyilo uti, mwimba dimu, † dimu dyalutumbyango na vilanga vyaimumu, muvanavo lilambwalalelo mmitima vyenu kwa Nnungu. ¹⁷ Uti vyamulota kutenda, ata ikava kwalilove kwali kwavitendo, tenda palina limwe *UMU* Yesu munnambwalela Nnungu Atata kwaindila yake.

Malailililo amuding'ande dyavakwoda

¹⁸ Mmadyamunu, livike mwina mwavatavenu kenga mo mwaivalalele kumwe *UMU*. ¹⁹ Mmatwamunu, vanagwaledye vadyavenu na hamunavavikile ukalau. ²⁰ Mmana, vaigwilile vatatavenu muvinu uti mwaa amuni munnagwela *UMU*. ²¹ Mmatatamunu, hamunavaikalile vanavenu kwambangidya hadinavapunguke dimongo. ²² Mmatumwa, nkati muvinu uti vaigwilile vanang'olo venu vamushilambo shapai, i mwaneke pakulota ivanagwele vanu kanji na ntima shii munjopa *UMU*. ²³ Uti vyamutenda, tenda na ntima uti kenga muntandela *UMU* i vanu ²⁴ mumanya doni, mundapata alalá maleko kumwe *UMU* kenga dinudyodyenu. Ni *UMU* Klistu wamuntumika; ²⁵ aijá átenda vyakunyata, andalipigwa ko kunyata mwaa hakupali kupambula.

4 Mmanang'olo, vaangangalange vatumwa venu kwaishaliya na aki mumanya doni, namwenu momo munkuvanavo nang'olo jumo kuwa.

Malailililo anji kavili

² Wena mushu munanopa mukushwali, muva mevo nkati mwake na mulambwalela, ³ mutushwalidya wetu momo pakulota Nnungu atuungulile nnango kwalilove tualangange shipii shimwe Klistu ashilá shitadídye nangu nguungwe. ⁴ Shwali kwambangidya nangu ngutandedye shipii shake shimanyike ngala kenga muvaikidíle ngutende.

⁵ Nama kwalimanyilo kwavanu vapanda, mutumila shana litala lyenu. ⁶ Malove enu ngwengwe ave umonyo mütakidile munyu wakumanyila mwashi mwakunjang'ulila kula munu.

† Dimu adi ni adilá dya Imbodi Yakala.

Nandele wamwisho

⁷ Tikiku nung'unumunu wakunagwaleka na ntumika wakukulupilika, ntumwamwangu mushimadengo shimwe *UMU* nae anammanyiya dyabali dyangu uti.

⁸ Kwamwaa wowo au ninkuntumidya kwenu mwenu pakulota mumanye uti vipíta kwetu wetu na kwambangidya ananawange mitima vyenu. ⁹ Namu nae ninkuntumidya Oneshimu nung'unumunu wakunagwaleka na wakukulupilika jo mwenentete mwenu. Vanavo vanammanyiya dyabali dyavinu uti vitandéka akuno.

¹⁰ Alishitaliku nkúngwamwangu nae ankuntumidya mwenu nandele; namomo Malukushi binamu wake Balinaba. Ing'ano imwe Malukushi, mwenu mundipata malailililo; paida po, mpwashalele. ¹¹ Yesu aijá wavan-shema Yustu yadavo ankuntumidya nandele. Ni vayuda vovo ava gweka tu pakati pavamadengomwangu kwautawala wa Nnungu na vanavo vanditadya kuva lipambadyangidyo kwangu nangu. ¹² Epapalashi mwenentete mwenu na ntumika umwe Klistu Yesu, nanae momo ankuntumidya nandele. Nae ngwengwe anku-likanyalidya mukushwali kwaupande wenu mwenu pakulota mwimile mūdile †† na mūliikindye mumalotelo uti ake Nnungu. ¹³ Kwake nae ninkwing'a ushuda kenga nae ankutenda namene dimongo kwamwaa wenu mwenu na kwa avalá vapágwa ku Laudisheya na ku Ielapolishi. ¹⁴ Lukashi talatolo wakunagwaleka ankuntumidya nandele, namomo nanae Demashi. ¹⁵ Vape nandele vanung'unumunu va ku Laudisheya, namomo Nimpa na liganisha uti likadyaniánga paing'ande pake.

¹⁶ Ling'oto lyakushomya ibalugwa ai pakati penu, tadya yuke ikashamegwe muliganisha lyavalaudisheya, namwenu momo ya ku Laudisheya yo, shomya. ¹⁷ Mwaulile Alikipu doni, "Angaikangila utumika waupatile nkati mumwe *UMU* pakulota ukawishe popo."

¹⁸ Nangu Paulu ninkumwandikila nandele aju na nkono wangu nimwene. Kumbukila mang'unyang'unyanga. Umonyonyo upagwe kwenu mwenu.

†† Kwali: a ...pakulota mwimile muva mmashalowa-uti.

I Vateshalonika

Nandele

1 Paulu, Shilivanu namu Timoti kwaliganisha Iya-vateshalonika livele nkati mumwe Nnungu Tata-munu namu *UMU* Yesu Klistu.

Umonyonyo upagwe kwenu mwenu pamo na amani.

Kulambwalela nkati mukushwali

2 Ngwengwe tunkunnambwalela Nnungu yenu mwenu uti mukushwali kwetu tuntambulanga kwabila kudoba ³ tukumbukila pamevo pamwe Nnungu, jo Tatagwetu, madengo enu alikulupililo, kulikanyalidya kwenu kwalinagwaledyo na kunanopa kwenu kwalilindilililo kumwe *UMU* Yesu Klistu ⁴ tumanya mmanung'unumunu mmakunagwaleka mmake Nnungu kenga nae anintandola mwenu ⁵ pakuva ntenga wambone wetu umwikidilé mwenu i gweka kwalilove kanji namomo kwadimongo, kwa Imumu Wanashwe na nkati mukwakikishidya uti kenga mo mwamumanyi-ilile mwashi mwatunamidile pakati penu kwamwaa wenu mwenu. ⁶ Mwenu mundilitenda kuva mmakujedya vetu na vamwe *UMU* pamupwashaladile lilove nkati mumauvilo oe kwalipuwilo Iya Imumu Wanashwe. ⁷ Nadoni muukilé ndava mpano kwavakukulupila uti va ku Makedoniya na va ku Akaya. ⁸ Mwaa kutunduvangila kwenu mwenu lilove limwe *UMU* lindilipuka ku Makedoniya namu ku Akaya i gweka avi kanji likulupililo lyenu kumwe Nnungu lindyandavala mudisemu uti. Nadoni hashipali shakuvalanganga ⁹ mwaa vo vene vankuvalanganga mwashi mwamutupwashaladile na mwashi mwamunshinjiulidile Nnungu muleka kulipudya kwavannungu vakushang'apa pakulota muntumike Nnungu mumi na wiu ¹⁰ na pakulota munnindile Mwanagwe aaloka kuwa, aijá wandyuwidye pakati pavakupela, Yesu átuposha mushitundi shída.

Shimadengo shimwe Paulu ku Teshalonika

2 Napanelo mwemwe mmene mmanung'unumunu mundimanya kenga kwida kwetu kwenu mwenu hakuvéle kwamonyo. ² Ata ikava kenga tundyúvauvanga na kutananigwa kunyata akulá ku Pilipo mo mwamumanyiilile shana, tundívanavo ntima shii nkati mumwe Nnungu wetu wakummalangangila ntenga wambone wa Nnungu nkati mukupingigwa kwoe.

³ Doni, kujugwangila kwetu hakunaalakela shinu mukushang'apa kwali muushapu kwali muujanja ⁴ kanji kenga mo mwatukubaligwidye na Nnungu

kukulupiligwa ntenga wambone, ni momo mwatutanga-galela i pakulota tutadye ivanagwele vanu kanji innagwele Nnungu aijá álalyanga mitima vyetu. ⁵ Mwaa kenga mo mwamumanyiilile shana, wetu hatwidile na lilove lyakuutila na ata kwaishabaa yakululuka, Nnungu ni nshuda wetu, ⁶ na ata tulambela lishangelo Iyavanu, ata lyenu na ata Iyavanu vanji ⁷ ata ikava kenga tukanimmikila ligogo wetu túvele tuvamyombe vamwe Klistu. Leka apo, tundilitenda kuva tuvana vadikidiki pakati penu. Mo mwavalela jujumunu waku-jang'edya ávalela vanavake, ⁸ amu ni mwatunnagwala-dyedya mwenu wetu mpaka kututadya tuve tayali kumajananga i gweka ntenga wambone wa Nnungu kanji ungumi wetu momo pakuva mwenu mwui mundyuka ndava mmakunagwaleka vetu.

⁹ Takumbukila shana mmanung'unumunu shimadengo shetu shakupwateka na kulikanyalidya kwetu shilo na mui pakulota hatunave ligogo kwamunu woewoe patushimmalangangila ntenga wambone wa Nnungu. ¹⁰ Mwenu munkuva mmashuda pamo namu Nnungu wawakwilimyanga, waishaliya na waukave makosha washiwanelo shetu kwenu mwenu mmakukulupila. ¹¹ Mwaa mundimanya shana mwatupagwididye na kula munu pakati penu kenga tatamunu kwavanamunu ¹² tunnaililila, tumupa ntima shii na tunkanyalidya pakulota muname shinamidyo shimmaikíla Nnungu aijá ánshamile muutawala wake jo mwene na mulishangelo lyake.

¹³ Tunkunnambwalela Nnungu momo kwabila kudo-ba kwamwaa au: pamupwashaladile lilove Iya Nnungu kwaupande wetu, mundipwashalela i kenga lilove Iyavanu kanji kenga mwalivalalele mwui lilove Iya Nnungu likóla madengo nkati mwenu mmakukulupila. ¹⁴ Mwaa mwenu mmanung'unumunu mundilitenda kuva mmakujedya vamaganisha a Nnungu nkati mumwe Klistu Yesu avéle ku Yudeya pakuva mwenu mundyuvauvanga mauvilo lolo kwavenentetemwenu kenga vanavo kwavayuda ¹⁵ vo vammýéé *UMU* Yesu na ata vakulava namomo kutumwadiilyanga wetu. Vana-vo vankuntaa nshelu Nnungu na vankupingana na vanu uti ¹⁶ vakanyalidya vatudinganginge pakulota hatunatangole na vamidi kwambangidya vanavo vo, vaambwalele na pakulota vo vene vaunjikiligwe shipimo shamadambi ave, kumbe shitundi shindi-vagwela.

Mweshe umwe Paulu wakuka navalola

¹⁷ Napanelo patwapukanenge namu mwenu mmanung'unumunu ata ikava ivele yawakati ungwipi na kwapukananga kwene ko kuvele kwamili i kwamuntima, tundyúmbaligwa na mweshe wakwona ding'ope dyenu kavili. ¹⁸ Tundílotá kwida nannola, namwiu nangu Paulu ndílingangila i mwanda umo kanji atudingadingé Shatwani. ¹⁹ Mwenu, da shakwashi shívele lilindilililo lyetu kwali lipuwilo lyetu kwali lidaka lyakulitumbyangidya wetu pamevo pamwe *UMU* Yesu mukwida kwake? Da i mwenu? ²⁰ Mwaa mwenu ni lishangelo lyetu na lipuwilo lyetu.

3 Nadoni patukalipilidile kavili, tundyamuwa tulileke gweka yetu ku Atena ² kutwala kuntu-midya Timoti aijá nung'unugwetu, mmádengomwagwe Nnungu nkati muntenga wambone umwe Klistu pakulota annonowange na amupe ntima shii kwaupande walikulupililo lyenu ³ kwambangidya hanapagwe wakujagajega kwamwaa wamauvilo ala. Mwemwe mmene mundimanya shana kenga vanditupangila kwaing'ano ai. ⁴ Mwaa patupagwíte namu mwenu tushindamwaulila kaladavo kenga wetu tunda uvauvanga na mwiu vinditandakela momo kenga mo mwamumanyilile. ⁵ Napavedoni kwaupande wangu nangu pandikalipilidile kavili nditumidya ngumanye ing'ano yalikulupililo lyenu nakapanji aijá nkútubya kwadindila dyoedyoe anintubya kutwala shimadengo shetu kuva shamonyo.

⁶ Kanji napane paidile kwetu Timoti aalakela kwenu kutwala kutupa dyabali dyambone dyalikulupililo na linagwaledyo lyenu na kutuvalangangila kenga ngwengwe mwenu munkuvanavo likumbukililo lyambone kwetu wetu na munkuvanavo mweshe wakutwona wetu kenga wetu kwenu mwenu, ⁷ napavedoni mutabu yetu na mumauvilo etu uti mmanung'unumunu tundiligwa shana kwalikulupililo lyenu. ⁸ Mwaa ambi tunkuvanavo shingumi ikava kenga mwenu munkunanopa nkati mumwe *UMU*. ⁹ Tulota kunnambwalalela mwashi Nnungu yenu mwenu kwalipuwilo lyatupuwanga kwamwaa wenu mwenu pamevo pake Nnungu wetu ¹⁰ akuno tujungwa kwadimongo shilo na mui pakulota twone ding'ope dyenu na kumupa ashilá shipungwíke mulikulupililo lyenu?

¹¹ Napanelo Nnungu mwene, jo Tatagwetu namu *UMU* wetu Yesu atuungulile indila yakwida kwenu. ¹² *UMU* napane antadye mukulumuke na muumbaligwe kunagwaladyania shivenevene na kwavanu uti kenga wetu kwenu mwenu ¹³ kwambangidya dashi, mitima vyenu vinonowangike mukwilimyanga pakulota vive víkave makosha pamevo pake Nnungu, jo Tatagwetu mukwida kwake *UMU* wetu Yesu pamo na vakwilimyanga vake uti. †

† Maandiko anji akala andyanjedya: a Ame.

Shinamilo shinnagwéla Nnungu

4 Kumwisho akuno mmanung'unumunu tunkunjugwa na kunnaililila palina limwe *UMU* Yesu doni, kulingana kenga mo mwamupwashaladile kwetu wetu amulá muvaikidíle muname na munnagwele Nnungu kenga mwiu mwamutandela, bai wenanavo mushu mutandedya kupunda apo. ² Mwenu mundimanya malamulo shani atumpele kwaindila yamadallaka amwe *UMU* Yesu. ³ Mwaa malotelo amwe Nnungu ni akujaluwangigwa mwenu mukwilimyanga: doni, mwapukanangenavo vyakulauka, ⁴ kula munu amanye kushunga mili wake mukwilimyanga na ishima ⁵ i kwakunshanona ntima kwaushapu kenga vamidi vákammanyite Nnungu. ⁶ Kwaing'ano ai, hanapagwe wakunkwinyanga kwali wakunshonda nung'unumunu mwaa kwavinu vyovyó avi, *UMU* ni nkúlipilila kenga mo mwatumwaulidile kaladavo na mwatummididye ushuda ngala. ⁷ Mwenu, Nnungu hatushamile kwaushapu kanji mukwilimyanga. ⁸ Napavedoni aijá áita avi, hanamwita munu kanji Nnungu ámupa Imumu wake Wanashwe.

⁹ Napanelo kwaing'ano yalinagwaledyo lyashinung'unumunu hainaloteka shinu kumwandikila mwaa mwemwe mmene mundipundishigwa namu Nnungu pakulota munagwaladyanie. ¹⁰ Namwiu munkutenda kwavanung'unumunu Makedoniya uti. Tunkunnaililila napane mmanung'unumunu mutandedye kupunda apo, ¹¹ muvenavo liu lyakunama kwaamani, mwangan-galange vyenu mmene na mukole madengo kwamikono vyenu kenga mo mwatumpondishididye ¹² kwambangidya muname shalowa kwa avalá vapan-da na hashinapagwe shakumwova.

Kwida kumwe *UMU*

¹³ Napanelo hatunalota shinu mutikinange mmanung'unumunu kwamwaa wa avalá valéle kwambangidya hamunavenavo shipalodi kenga avalá vanji vákave lilindilililo. ¹⁴ Mwaa ikava kenga tunkukulupila kenga Yesu andipela kutwala kudyuka nimumo momo tunkukulupila kenga uti avalá valéle nkati mumwe Yesu, Nnungu andavaidanavo pamo namu nae. ¹⁵ Vyatumwaulila avi tunkumwaulila kwalilove limwe *UMU* kenga wetu túvele mushingumi, túbakila mpaka kwida kwake *UMU*, mwiu hatuva tuvatandi kuvapunda avalá valéle. ¹⁶ Mwaa jo mwene *UMU* andashuluka kwaloka kuwa na lidi lyadimongo, lidi lyanjelo nang'olo, lidi lyalipalapanda lya Nnungu na avalá vapidíle nkati mumwe Klistu, vandava vatandi kudyuka ¹⁷ kutwala wetu túvele mushingumi túbakidile, tundatanduligwa pamo na vanavo mumaundi ndakadyania namu *UMU* kuniania, nadoni tundapagwa namu *UMU* ngwengwe. ¹⁸ Napavedoni ing'ana ntima shii kwamalove ala.

Liduva limwe *UMU* lindaída kenga nkwiwa

5 Napanelo ikava yawakati na yamaiko mmanung'unumunu, mwenu haivaikidile mwandikiligwe shoeshoe ² mwaa mwemwe mmene mundimanya shalowa doni liduva limwe *UMU* lindaída kenga mwaidila nkwiwa shilo. ³ Pavaashidoni, "Ipali amani na lishilidyo," bai apo ni palota kuvaidila kubamola shingangala kenga kupwateka kwaluvaleko kumwidila nkongwe washitumbo; kwavanavo hamupali mwakukwapela.

⁴ Kanji napane mwenu mmanung'unumunu hamunapagwa shinu mushii kwambangidya liduva alyo hali nampatikaniange kenga nkwiwa ⁵ mwaa uti mwenu ni mmana mmalilangadyo na mmamui. Hatunava shinu vashilo na ata vamushii. ⁶ Napavedoni hatunalale kenga vanji kanji tuve mevo na tuvakulipanga ⁷ mwaa valála vo, valala shilo na vaambálwa vo, vaambalwa shilo. ⁸ Wetu kanji túvele vamui tulipange tùgwete shikopa shalikulupililo na linagwaledyo na kenga shijulu shashitali, lilindilililo lyakwambolegwa. ⁹ Mwaa Nnangu hatupangidile kwashitundi kanji pakulota tupate kwambolegwa kwaindila imwe *UMU* wetu Yesu Klistu ¹⁰ ápadile kwamwaa wetu kwambangidya ata tukava mevo kwali tukalala, tuname namu nae. ¹¹ Napavedoni, ing'ana ntima shii na nanawananga kenga mo mwamutandela mo.

Malailililo amwisho

¹² Napanelo mmanung'unumunu ninkunjugwa muvaishimu avalá vakóla madengo pakati penu, vo van-

nangalaléla nkati mumwe *UMU* na vandúma. ¹³ Vape ishima ing'umene nkati mulinagwaledyo kwamwaa washimadengo shave. Avanavo amani pakati penu. ¹⁴ Momo tunkunnaililila mmanung'unumunu, avalá vawondo vadume, vivididíma mitima vapambadyange, vakudabadabanga vapwashele na ava mmapole kwavanu uti. ¹⁵ Lilaledye shana kwenu mwenu hanapagwe woewoe wakunnipa muje wakunyata kanji ngwengwe vingilidya ashilá shambone kwaupande wenu mwemwe mmene kwali kwavanu uti. ¹⁶ Puwanga ngwengwe. ¹⁷ Shwali kwabila kudoba. ¹⁸ Lambwalela muuti mwaa ala ni malotelo ake Nnangu kwenu mwenu nkati mumwe Klistu Yesu. ¹⁹ Hamunandime Imumu. ²⁰ Hamunailudyange kulava ²¹ kanji tenda nningo vinu uti mutwale mukamulile ashilá shambone. ²² Apukananganavo inamuna uti yavyakunyata.

Paulu ankuvajugwangila vateshalonika

²³ Napanelo jo mwene Nnangu waamani anjaluwangidye uti mukwilimiyanga na imumu yenu, ungumi wenu na mili vyenu uti vikondyegwe pavikavanavo makosha mukwida kumwe *UMU* wetu Yesu Klistu. ²⁴ Aijá ánshema mwenu ni wakukulupilika; nae uti avi andatandedya.

²⁵ Mmanung'unumunu, tushwalidya nawetu momo.

²⁶ Vape nandele vanung'unumunu uti kwashimanyikilo shalinagwaledyo.

²⁷ Ninkunnaililila nkati mumwe *UMU* doni, ibalugwa aikashameke kwavanung'unumunu uti.

²⁸ Umonyoy umwe *UMU* wetu Yesu Klistu upagwe na mwenu.

II Vateshalonika

Nandele

1 Paulu, Shilivanu namu Timoti, kwaliganisha lya-vateshalonika livele nkati mumwe Nnungu Tatagwetu namu *UMU* Yesu Klistu.

² Umonyonyo upagwe kwenu mwenu na amani yakwalakela kumwe Nnungu Tatamunu † namu *UMU* Yesu Klistu.

Lilambwalalelo kwa Nnungu

³ Indituvaikila tunnambwalele Nnungu ngwengwe mmanung'unumunu kwamwaa wenu pakuva ni shaliya mwaa likulupililo lyenu linkukulumuka namene na linagwaledyo lyakula munu pakati penu kwavanji, linkwanjadyeka ⁴ ata mpaka wewe tuvene kulitamangila mwenu mmaganisha a Nnungu kwamwaa wakunanonopa kwenu na likulupililo lyenu mukupapatigwa na mumauvilo uti amulipililila.

Ishaliya yaukumu yake Nnungu

⁵ Avi uti ni kulodya ngala shaliya yaukumu yake Nnungu kwambangidya mwenu muvalangiligwe kuva mmakuvaikila muutawala wa Nnungu, wo wamuvauvangila wo, ⁶ pakuva namwiu Nnungu ankuvalangilila ishaliya kuvalipa tabu avalá vamwikalíla ⁷ kutwala kumupa mwenu múuvauvanga kupumula pamo namu wetu. Ashi shindatandeka paaneka *UMU* Yesu aumilila kuwa pamo na vanjelo vake vadimongo ⁸ mulilamba lyamoto avapa shaushanga avalá vákamanya Nnungu na vákaigwilila ntenga wambone umwe *UMU* wetu Yesu. ⁹ Vanavo vandauvauvanga ukumu yakubamalegwa kúkamalilika, kuvaapukanianga pamevo pamwe *UMU* na mulishangelo lyadimongo dyake ¹⁰ paida muliduva alyo ndapata lishangelo muvakwilimyanga vake na avashangania pakati pa avalá vankulupidíle pamo na mwenu mwaa mundikulupila ushuda wetu.

¹¹ Kwaing'ano ai tunkunshwalidya mwenu ngwengwe kwambangidya Nnungu wetu antadye mwenu muve mmakuvaikila mukushema kwake na muwishe popo kwadimongo dyake malotelo uti auwambone na kula shimadengo shalikulupililo ¹² kwambangidya dashi, lina limwe *UMU* wetu Yesu lipate lishangelo nkati mwenu na mwenu nkati mwake kwakwodananavo umonyo wa Nnungu wetu na umwe *UMU* Yesu Klistu.

Kwaneka kumwe waungave-lilamulo

2 Kwaing'ano napane yakwida kumwe *UMU* wetu Yesu Klistu na yakukumbuligwa kwetu kwake, tunkunjugwa mmanung'unumunu ² doni, hamunaangaishangigwe shipajelo muding'anong'ano dyenu na hamunaangaikange ata kwaimumu kwali kwalilove kwali kwaibalugwa yaanéka kuva kenga yaloka kwetu iishidoni, liduva limwe *UMU*, tayali lindiwika. ³ Hamunanneke munu anduwanga kwainamuna yoeyoe mwaa liduva alyo, haliwika shitandi kukanava kupagwa kumpinga Nnungu na ankwaneke munu waungave-lilamulo †† aijá mwana wakubamalegwa, ⁴ jo ápinga na álikwedya pashanya pavinu uti avilá vishamégwa kuva Nnungu kwali vinu vyakulipudidya kutadya mpaka kwikala mwing'ande ya Nnungu alivalanganga kuva Nnungu.

⁵ Da hamunakumbukila shinu kenga vinu avi nimmalangangila ngúvele namu mwenu? ⁶ Nadoni ashilá shindingadínga nae ambi apa, mwenu mundimanya kwambangidya aaneke muwakati wene-wene. ⁷ Mwaa shipii shaungave-lilamulo tayali shinkukola madengo ila apali ándingadinga ambi apa mpaka nae vamushe. ⁸ Bai apo andaaneka waungave-lilamulo aijá walota kuntimbanga *UMU* Yesu kwaimepo yankanywa mwake na kummalidya kwakuumilila kwakwida kwake. ⁹ Kwida kumwe waungave-lilamulo kulota kwodananavo shimadengo shimwe Shatwani kwadimongo uti, vi-manyikilo na vyakutikinikanga vyaushwang'a ¹⁰ na kwakuduwanga uti kwaungave-shaliya kwa avalá vavéle mukujaika. Vanavo vankujaika pakuva vandita kunagwaledya umwiu kukavatadidye vaambolegwe. ¹¹ Ni ashi shitádyá Nnungu avapalakadyedye dimongo dyakuvadumbyadumbya pakulota vakulupile ushwang'a ¹² kwambangidya vaukumigwe uti avalá vákakulupila umwiu kanji vapuwangila ungave-shaliya.

Pagwa mukunanopa

¹³ Wetu napane indituvaikila ngwengwe tunnambwalele Nnungu kwamwaa wenu mmanung'unumunu mmakunagwaleka vamwe *UMU* mwaa Nnungu anintandola mwenu kenga vyepo vitandi vyakwambolegwa ‡ kwaindila yakujaluwangigwa mukwilimyanga kwa Imumu na kwakukulupila umwiu. ¹⁴ Kwakwambolegwa aku nae aninshema mwenu kwaindila yantenga

† Maandiko anji akala: a ...Nnungu Tatagwetu.

†† Maandiko anji ankushidoni, a ...munu wamadambi. ‡ Kwali: a mwaa tangu kunantandi Nnungu anintandola pakulota mwambolegwe.

wambone wetu kwambangidya mupate lishangelo limwe *UMU* wetu Yesu Klistu. ¹⁵ Napavedoni mmanung'unumunu, nanopa na kamulila ashilá shamupundishigwidye kwali kwalilove kwali kwaibalugwa yetu.

¹⁶ Doni, jo mwene *UMU* Yesu Klistu namu Nnungu Tatagwetu átunagwaladidye na átupele kupambadyangigwa kúkamalilika na lilindilililo lyambone kwaumonyo, ¹⁷ apambadyange mitima vyenu na anonowange mushimadengo uti na mulilove uti lyambone.

Tujugwangila nawetu momo

3 Kumwisho akuno mmanung'unumunu, tushwalidya wetu pakulota lilove limwe *UMU* lyandavale shipajelo na lipate ishima kenga mwaitandakadile pakati penu ² na kwambangidya tuposhegwe kwavanu vakalau na vakunyata mitima. Mwaa i uti vavénavo likulupililo. ³ Kanji napane *UMU* ni wakukulupilika, nae anannonowanga na ananshunga kumwe aijá nkalau. ⁴ Tunkuvanavo likulupililo nkati mumwe *UMU* ikava yenu mwenu, vinu vyatunnamulidile munkutenda na mundauka mushu mutenda. ⁵ Napane *UMU* alangalele mitima vyenu vinanapele kulinagwaledyo lya Nnungu na kukulupililila kumwe Klistu. †

Ákalota kukola madengo hanalye

⁶ Napanelo tunkunnamulila mmanung'unumunu palina limwe *UMU* wetu Yesu Klistu doni, vaambukange vanung'unumunu vanáma shinamidyo shauwondo i kulingana na mavalelo avapatile kwalakela

† Kwali: a Napane *UMU* alangalele mitima vyenu kwalinagwaledyo kumwe Nnungu na kwalilindilililo kumwe Klistu.

kwetu. ⁷ Mwenu mmene mundimanya mwashi muvaikidíle mutujadyedye mwaa patupagwíte namu mwenu, hatuvéle tuvawondo ⁸ na ata hatulile bule shakulya shamunu woewoe kanji tûpagwite mushimadengo shakupwateka na mumauvilo, tundikola madengo shilo na mui pakulota hatunave ligogo kwamunu woewoe pakati penu. ⁹ I do, hatuvenavo aki ayo kanji pakulota tulyumye wewe tuvene kenga mpano wakujedya mwenu. ¹⁰ Mwaa ata patupagwíte namu mwenu tuninnamulila doni, munu akanalota kukola madengo, bai hanalye. ¹¹ Mwenu, tundigwa kenga vanji pakati penu vankunama shinamidyo shauwondo; havanakola shinu madengo ila vankulijalanianga muvinu vyavanu vene. ¹² Vanu vantindo au tunkuvala mulila na kuvalaililila nkati mumwe *UMU* Yesu Klistu doni, vakole madengo kwaamani kwambangidya valye shakulya shavo vo vene.

¹³ Kwaupande wenu mwenu mmanung'unumunu hamunadobe kutandedya wambone. ¹⁴ Ikava kenga munu hanaigwilila shinu shatutangwele mwibalugwa ai, munu ajo mmanyé, hamunalyunganiange namu nae kwambangidya ataigwe dyoni ¹⁵ kanji hamunamalangilile kuva mmongo ila ndume kenga nung'unumunu.

Paulu ankuvajugwangila vateshalonika

¹⁶ Napanelo jo mwene *UMU* waamani amupe amani muwakati uti na mudinamuna uti. *UMU* apagwe pamo namu mwenu uti. ¹⁷ Nangu Paulu ninkumwandikila nandele aju kwankono wangu nimwene. Ashi ni shi-manyikilo shiu shamudibalugwa dyangu uti; amu ni mwangwandikila. ¹⁸ Umonyó umwe *UMU* wetu Yesu Klistu upagwe namu mwenu uti.

I Timoti

Nandele

1 Paulu, myombe umwe Klistu Yesu kwalilamulo lyake Nnungu Mwamboli wetu pamo namu Klistu Yesu lilindilililo lyetu, ² kumwe Timoti mwanangu waumwiu nkati mulikulupililo.

Umonyonyo, shididi na amani vyakwalakela kumwe Nnungu Tatamunu namu Klistu Yesu *UMU* wetu, vipagwe kwako wako.

Paulu ankunnaililila Timoti apagwe ku Epeshu

³ Kulingana kenga mo mwandikulaililidile nguka ku Makedoniya, wako pagwa ku Epeshu pakulota uvalamulile vanu vanji havanapundishe mapundisho anji ⁴ na ata havanaangaikangile dinano na mashauma avanyakala ákave mwisho atádyá kupagwa mitau kuleka unashilangola walakéla kumwe Nnungu wám-ba likulupililo. ⁵ Malotelo napane amalailililo etu ni linagwaledyo lyúma muntima úkave ushapu, makumbukililo ambone amuntima na likulupililo líkave shinankulaba. ⁶ Kwakwashadyanga avi, vanji vandishinji-ulila mitima kumitau víkave mana ⁷ valota vave vamwalimu vadishaliya pavakamanya nyamani shavamba na ata muvinu vyavaakikisha.

⁸ Tunkumanya doni, lilamulo lyàmbone ikava kenga munu ankutumila mulatéka ⁹ imanyika kenga lyanavo halivikike kwawaishaliya ila livikiké kwa avalá vaungave-lilamulo na vákaigwilila, vákave Nnungu na vakutega, vákamwishimu Nnungu na vadyeluelu, vavakanyalánga vatatavave pamo na vajujuvave, vakubyaa, ¹⁰ vakulauka pamo na valalána shilumelume, vaténda nshulusho wavatumwa, vakushang'apa, valilápa kwaushwang'a na uti avilá vipínga mapundisho mangumi, ¹¹ mapundisho lo aodánanavo ntenga wambone walishangelo lyake Nnungu wakutumbyangilika, ntenga wowo wangukulupilike nangu.

Klistu Yesu aidilé ndavaambola vakutega

¹² Ninkunnambwalela aijá ángupele dimongo, Klistu Yesu *UMU* wetu mwaa nae aningwona kuva wakukulupilika anguvika mushimadengo shake ¹³ nene ngwe nguvéle nkúkupulu, nkúpapata na njauli. Kanji ndipata kwanangiligwa shididi mwaa ngúvele mukutikinanga, nangu ngushindatenda muungakulupila wangu. ¹⁴ Napane umonyo umwe *UMU* undipakatika namene kwangu nangu kwalikulupililo na linagwaledyo lipagwíte nkati mumwe Klistu Yesu.

¹⁵ Shitangodi ashi ni shakukulupilika na shindivaikila shiitikiligwe: doni, Klistu Yesu andida mushilambo ndavaambola vakutega, pakati pavakutega avo, nangu po, ni ngumamadidye. ¹⁶ Kanji shitádyá ngwanangiligwe shididi ni ashi: kwambangidya dashi, nkati mwanangu nangu ninkútega wakumamodya, Klistu Yesu alilodye upole wake uti kenga mpano kwa avalá valóta kunkulupila kwashingumi shíkamalilika. ¹⁷ Ambi napane kumwe *UMU* wangwengwe, ákapela, ákaaneka, jo Nnungu jumo, kwake nae kupagwe ishima na lishangelo ngwengwe ngwengwe. Ame.

¹⁸ Lilailililo ali ninkukukamudya mwanangu Timoti kwodananavo malavilo atangaléke kwamwaa wako kwambangidya dashi, kwaindila yaanavo utende ing'ondo yo yambone ¹⁹ ukumulila likulupililo na makumbukililo ambone amuntima alalá ávaitile vanji, nadoni kwalikulupililo lyave vandititimila mmedi.

²⁰ Pakati pave ankupagwa Imeneu namu Alishandele, vanavo ndivakamudya kumwe Shatwani vakalipundishe pakulota havanakupulu.

Vajugwangile vanu uti

2 Napavedoni shitandi ninkulaililila kupagwe kujugwa, kushwali, kujugwangila na kulambwalela kwaupande wavanu uti, ² kwavaumu na kwauti avalá vavénavo madalaka pakulota tuname shinamidyo shaamani na shakutulila nkati mukunjopa Nnungu na ishima uti. ³ Ashi ni shinu shambone na shakunagwaleka pamevo pake Nnungu Mwamboli wetu ⁴ jo álota vanu uti vaambolegwe na vakawikile mulimanyilo lyakumanya umwiu. ⁵ Mwaa ankupagwa Nnungu jumo na kupagwa nkúdumangila jumo pakati pamwe Nnungu na vanu: munu jo Klistu Yesu ⁶ ályumidye jo mwene kuva lyambolelo kwaupande wavanu uti. Au ni ushuda ukíle ndatandeka muwakati wake.

⁷ Kwamwaa au ndyuka ndapangigwa nguve nkúvalanganga-lilove na myombe, ngutangola mwiu hangunashang'apa shinu, mwalimu wavamidi nkati mulikulupililo na muumwiu.

Kutulila mukushwali

⁸ Napavedoni ninkulota kula lyutu valume uti vashwalye vanyanywile mikono vyakwilimyanga bila shitungi na bila kutaukananga. ⁹ Nimumo momo vakongwe valinemye kwadinguvo dyaishima, kwakutulila na kwakulilaledya i kwakuluka ugwimbu na ata kwashaabu kwali majanga amali kwali dinguvo dyabei ¹⁰ kanji kwa ashilá shivaikidíle kwavakongwe vali-

valangánga ishima kumwe Nnungu, matendo am-bone. ¹¹ Nkongwe inimmaikila alipundishe mukulimal-adya alivika mwina muuti. ¹² Hangunaleka shinu do, nkongwe apundishe na ata kuanavo madalaka kwan-ume kanji alimaladye. ¹³ Mwaa shitandi vankandyengé Adamu kutwala kwatika Eva. ¹⁴ Namomo Adamu haukile ndaduwangiligwa ila nkongwe paduwangiligwe andigwa mulidambi. ¹⁵ Nkongwe jo napane andaambwalegwa avavaleka vana ikava kenga nae andauka mushu mulikulupililo, † mulinagwaledyo, mukwilimyanga pamo na kutulila.

Mwakuvalela nkúlaledya

3 Lilove ali ni lyakukulupilika: munu akavanavo shabaa yakupata shinang'olo shankúlaledya, ankulota shimadengo shambone. ² Napavedoni inimmaikila nkúlaledya ave munu ákave makosha, nnume wankongwe jumo, munu mpole, wakulishunga, wakwishimika, wakukalibisha na wakuulula kupundisha ³ i wakwambalwa na ata wakukanyola kanji ave waupole, ákave ushaka na ákanagwaledya njuluku. †† Ave munu álangalalela shana ing'ande yake jo mwene ávenavo vana valivíka mwina mwake kwaishima uti. ⁵ Mwaa munu akanaulula kulangalalela ing'ande yake, alota kushunga dashi liganisha lyake Nnungu? ⁶ Hanave munu áshinjulidile ambi Nnungu kwambangidya hanalyone kutwala kugwa muukumu imwe Ndamoni. ⁷ Namomo inimmaikila ave munu waushuda wambone pakati pavanu vapanda pakulota hanalapigwe kutwala kujola mulutambo lumwe Ndamoni.

Mwakuvalela diyakonu

⁸ Nimumo momo madiyakonu indivavaikila vave vaishima i vadindimi mbili, vákaliinjidyanga namene muvinyu na ata vákuvikila liu lukwinyango, ⁹ vaka-mulíla shipii shalikulupililo kwamakumbukililo amuntima ákave ushapu. ¹⁰ Vovo vo shitandi momo vava-tende nningo, ling'oto vatumike vakanaaneka likosha. ¹¹ Nimumo momo vadyavave indivavaikila vave vaishima, vákang'wenya, vapole na vakukulupilika muuti. ¹² Madiyakonu kula munu ave nnume wankongwe jumo, vavalangalalela shana vanavave pamo na ding'ande dyave vo vene. ¹³ Mwaa avalá vatumíke shana kenga madiyakonu vandálipatila ishima yambone pamo na kulishiya kukumene mulikulupililo lipagwíte nkati mumwe Klistu Yesu.

Shipii shakuvanavo Nnungu

¹⁴ Ndikwandikila vinu avi ngulindila ndikwidile shipajelo ¹⁵ ila nikakakova umanye mwashi mwakunamila munu nng'ande mwa Nnungu livele liganisha lya Nnungu mumi, libodo na shitunduvangilo shaumwui. ¹⁶ Mwiu shikumene tunkuvalanganga ni shipii shakuvanavo Nnungu:

Aijá átandegwe kumanyika mushimunu,

† Kwali: a ...ikava kenga vanavo vandauka mushu mulikulupililo.
†† Kwali: a ...ákavikila liu njuluku.

áakikishigwe kwa Imumu,
áanakene na vanjelo,
wavammalangenge pakati pavenentete,
wavankulupidile mushilambo,
átanduligwidye mulishangelo.

Uti vyakandyenge Nnungu vyàmbone

4 Imumu napane ankutangola ngala doni, muwakati wamwisho vanji vandaambukanga likulupililo kwigwilila dimumu dyakuduwanga na mapundisho avandamoni, ² kwamalambi avakushang'apa vavénavo makumbukililo amuntima aanyóka. ³ Vanavo vankuleya kulomba na kukanyalidya kuleka vyakulya vyakandyenge Nnungu vipwashalalegwe kwalilambwalalelo kwavakukulupila na kwa avalá vamanyíte umwui. ⁴ Mwaa kula shinu shakandyenge Nnungu shàmbone na hashipali shivaikidíle shiitigwe shikava kenga shindapwashalalegwa kwalilambwalalelo ⁵ pakuva shanavo sho, shitandegwa kwilimyanga kwaindila yalilove lya Nnungu na kushwali.

Malailililo kumwe Timoti

⁶ Ukavaulila vinu avi vanung'unumunu, undava ntumika wambone umwe Klistu Yesu ulidyavalakedya kwamalove alikulupililo na amapundisho ambone awodedya. ⁷ Kanji napane ita dinano díkave ishima na dyashinyakala ila lidyavalakedye shinamidyo shakunjopa Nnungu. ⁸ Mwaa kulidyavalakedya kwamili kunkuvanavo paida yake ila kunjopa Nnungu kunkuvanavo paida muuti kuanavo kulivikila kwashingumi ashi na shída. ⁹ Lilove ali ni lyakukulupilika na lindivaikila likubaligwe uti. ¹⁰ Ni ashi shitádyá wetu tukole madengo akupwateka na tulikanyalidye pakuva tundi-vika lilindilililo lyetu kwa Nnungu mumi ávele Mwamboli wavanu uti kupunda namene kwavakukulupila.

¹¹ Lamulila vinu avi na pundisha. ¹² Hanapagwe wakukwiludyanga kwamwaa wakuva wako unnemba kanji ava mpano kwavakukulupila mukutangola, mushinamidyo, mulinagwaledyo, mulikulupililo na muungave-ushapu. ¹³ Mpaka pangulota kwida, angaikangila kushomya Maandiko paumbala, kulaililila na kupundisha. ¹⁴ Haunaleke kunyenje shajo shavakupele wako kwaindila yakulava pavakuvikidile makono pankodyanio wavanang'olo. ¹⁵ Tandedyá vinu avi, pagwa nkati mwake pakulota likulumukililo lyako lyaneke kwavanu uti. ¹⁶ Lilaledye namene gwegwe umwene na mapundisho ako. Nanopa mwanavo mwaa pautenda davo po, undaliposha wako umwene pamo na avalá vakwigwilíla.

Malailililo kwaliganisha uti

5 Haunanshulange munu ákupundile shilinga kanji nnaililile kenga tatamunu, vanemba kenga vavung'unumunu, ² vakongwe vaulinga kenga vajuju-munu na vali kenga valumbumunu nkati muungave-ushapu uti.

³ Vaishimu vanamwili avalá vanamwili mwiu mwiu vákave pashinu. ⁴ Kanji ikava kenga namwili ankuvana-vo vana kwali udukulu, vanavo shitandi valipundishe kulodya kunjopa Nnungu kwavapaing'ande pave vo vene vavaujidy inu dyo kwavatatumunu, amu ni munnagwéla Nnungu. ⁵ Napane namwili wiu ákave pashinu aijá ávele bai gweka yake, ankuvanavo lilindilililo lyake kumwe Nnungu na ankuka mushu mukujugwangila na mukushwali shilo na mui. ⁶ Kanji namwili áliinjidyenge mushinamidyo shamalotelo ake, ata ikava kenga nae po ankunama, andipela. ⁷ Lamulila vinu avi kwambangidya havanavenavo makosha. ⁸ Ikava kenga munu hanavashunga shinu vakwave na kupunda namene avalá vapaing'ande pake, ajo andita likulupililo na ni ámamodya namene kumpunda aijá ákakulupila.

⁹ Hanaandikigwe namwili mulishauma lyavanamwili pakavenavo vyaka sitini vyaulinga, nkongwe wannume jumo ^{†10} na ámanyike shana kwashimadengo shake shambone: ávaladile vana, ákalibishidye, ánavyenge medi madodo avakwilimyanga, ^{††} ávapwashaladile vakuvavanga na álijawile mushimadengo shambone shakula inamuna. ¹¹ Vaite vanamwili vali pakuva mweshe wave paulota kuvalivadya kumwe Klistu, vandalota valombwe kavili ¹² kutwala kuukumigwa kwamwaa wakwambukanga likulupililo lyave litandi. ¹³ Leka apo, vandálipundisha vave vawondo vawanawananga nding'ande na i gweka vawondo kanji namomo vakung'wenya, vakuliinjidyanga mumyaa vatangola vinu víkavaikidile. ¹⁴ Nadoni nangu ninkulota doni, vanamwili vali valombwe, vavenavo vanavave, vapange shana ding'ande dyave pakulota havanamupe litala mmongo lyakututangola kunyata. ¹⁵ Namwii, vanji vo vandyashalanga kumwoda Shatwani. ¹⁶ Ikava kenga nkongwe nkúkulupila andivanavo vanamwili palikola lyake, inimmaikila avapwashele pakulota liganisha halinaidapelwe kwambangidya dashi lyanavo livashunge avalá vanamwili mwiu vákave pashinu.

¹⁷ Avalá vanang'olo valangalaléla shana, vandidaikila vapate ishima ing'umene kupunda namene avalá vakóla madengo akuvalanganga lilove na kupundisha ¹⁸ mwaa Maandiko ankushidoni, "Haunamunge ng'ombe pampulula ngano," [‡] na, "Mmádengo inimmaikila apate nshala wake." ^{††19} Haunaitikile vyakutam-budyanga vimwámbe nang'olo paukapagwa ushuda wavanu vavili kwali vatatu. ²⁰ Avalá vatéga vashulange paumbala kwambangidya vanji vo, vajope.

²¹ Ninkumya ushuda pamevo pamwe Nnungu, pamwe Klistu Yesu na pavanjelo vakutandalegwa doni, vinu avi vikila kuntima bila kupambula paukatandeya shoeshoe kwashitete. ²² Haunapupange kummikila munu makono na ata haunaliinjidyange mushi-madambi shavanu vanji; nanopa muungave-ushapu.

† Kwali: a ...áshikulupilika na nnume ntwagwe. †† Malove ala ankuvanavo mana akushidoni, a kutenda shimadengo shakulishapeya kwavakwilimyanga. ‡ Lola Kumbukumbu 25:4. †† Lola Valawi 19:13; Kumbukumbu 24:15.

²³ Napane wako haunauke mushu ukumbila gweka yake medi kanji kumbila padyoko vinyu kwamwaa wammunda pamo na malwele akukódy kula wakati. ²⁴ Madambi avanu vanji ankwaneke ngala alangalalela muukumu kanji avanu vanji aatika kunyuma. ²⁵ Nimumo momo shimadengo shambone shinkwaneke ngala na ata ashilá shilipiídye, hashuulula kupiika.

6 Uti avalá vavénavo likangoti kenga vatumwa, in-divavaikila vavatanane vanang'olo vave kenga muvavaikidile kwaishima uti kwambangidya lina limwe Nnungu na lo mapundisho lo, halanaliuligwe. ² Avalá vavénavo vanang'olo vakukulupila, havanavailudyange kwodamwaa vakukulupila kanji vavatumike namene kupunda apo mwaa vapáta paida yashimadengo shave shambone ni vakukulupila na vakunagwaleka.

Kunagwaledya njuluku ni lushija lwavyakunyata uti

Vinu avi pundisha na laililila. ³ Munu woewoe akapundisha mapundisho akuvilingananga na ákaitikananga na malove mangumi amwe *UMU* wetu Yesu Klistu na ata mapundisho aodánanavo kunjopa Nnungu, ⁴ munu ajo ni wakulyona na hashipali shamanya. Nae po ni munu ávenavo mweshe wamitau na ing'ondo yamalove iidanavo ing'ou, ushaka, kwabola, kwambambidyania kunyata ⁵ na mitau víkave mwisho vyavanu vading'ano dyakutimbikanga vákave umwiu vona kenga kupata malupulupu ni kunjopa Nnungu.

⁶ Mwiu, ankupagwa malupulupu nkati mukunjopa Nnungu kukapagwa kutudya ntima kwa ashilá shauvenavo ⁷ mwaa hashipali shatwidinavo mushilambo na ata shakuulula kuukanavo. ⁸ Napanelo ikava kenga tunkuvanavo shakuliilisha kwali shakuliinikidya, bai kwavinu avyo tundatudya ntima. ⁹ Kanji napane avalá vavanavo malotelo muntima vave matajili, vanágwa mukutubigwa, mudinambo na mumalotelo oe ákave mana na akunyata alalá avatitimídy vanu mukubamalegwa na mukujaika. ¹⁰ Mwaa kunnagwaledya njuluku ni lushija lwavyakunyata uti. Kwakuvikila liu njuluku, vanji vandyashalanga mulikulupililo na kulitalalanga kwavipalodi vyoe.

Tenda ing'ondo yambone yalikulupililo

¹¹ Kanji napane wako umunu wa Nnungu linyemye muvinu avyo. Vingilidya napane ishaliya, kunjopa Nnungu, likulupililo, linagwaledyo, lipililililo na upole. ¹² Tenda ing'ondo yambone yalikulupililo. Kamulila shingumi shíkamalilika ashilá shavakushamalele sho shaulyawile pamevo pamashuda oe. ¹³ Ninkukulamulila pamevo pa Nnungu jo áing'a shingumi vinu uti na pamevo pamwe Klistu Yesu áumidye ushuda wambone pamevo pamwe Ponji Pilatu, ¹⁴ shunga lila-mulo ali pakave lilemba na pakave likosha mpaka ku-umilila kumwe *UMU* wetu Yesu Klistu, ¹⁵ akulá ko kwalota kulodya Nnungu muwakati wake; Nnungu jo Wakwalaligwa na Nkútawala wagweka, Umu wavaumu na Nang'olo wavanang'olo, ¹⁶ jumo ákapela, ánama

mulilangadyo lyakavandika munu, aijá ákangwene munu pakati pavanu na ákaululika kwaneka. Kwake nae ipagwe ishima na dimongo díkamalilika. Ame.

¹⁷ Kwavatajili vawakati au, valaililile havanalyone, havanavike lilindilililo lyave mumali ákukulupilika kanji vavike lilindilililo lyave kumwe Nnungu átupa uti kwabila kulakalela kwalipuwilo lyetu. ¹⁸ Vamanyie vatende wambone, vave matajili mushimadengo shambone, vavenavo ntima wakujaula vava tayali mukujavanan-

ga. ¹⁹ Vakatenda davo, vandalikungailila mali vo vene kenga shitunduvangilo shambone shawakati ulóta kwida kwambangidya vakumulile ashilá shingumi shiu.

²⁰ Wako Timoti, shunga ashilá shaukulupilike. Lya-pukaniange na shitangodi shíkave mana na mitau vyavashema kwakushang'apa kuva limanyilo.

²¹ Kwakulivalanganga vinu avi, vanji vandyashalanga mulikulupililo. Umonyopo upagwe namu mwenu.

II Timoti

Nandele

1 Paulu, myombe umwe Klistu Yesu kwalilotelo lyake Nnungu kwakwodanavo kulivikila kwashingumi shipagwíte nkati mumwe Klistu Yesu, ² kumwe Timoti mwanangu wakunagwaleka. Umonyó, shididi na amani vyakwalakela kumwe Nnungu Tata-munu namu Klistu Yesu *UMU* wetu, vipagwe kwako wako.

Shambone shaukulupilike shunga

³ Ninkunnambwalela Nnungu wanintumika kenga mwavantumikidile vanyakala vangu kwamakumbukililo ákave ushupu amuntima pandikukumbukila ngwengwe wako mukushwali kwangu shilo na mui.

⁴ Pangukumbukila myodi vyako, ninkuvanavo mweshe woe wakukwona kwambangidya lipuwilo lyangu liwikile popo. ⁵ Ninkukumbukila likulupililo lyako liu lyo lye lipagwíte shitandi kwanakuluvo Loide na kwanyoko Eunike na ambi apa ninkuvanavo wakika kenga linkupagwa nkati mwako. ⁶ Ni ashi shingutádyá ní kú kumbuwange pakulota ukang'ele shajo shake Nnungu shipagwíte kwako kwaindila yakukuvikila makono angu. ⁷ Mwaa Nnungu anditupa Imumu i yakujopa kanji yadimongo, yalinagwaledyo na yakulimaladya.

⁸ Napavedoni haunaanangile dyoni kumya ushuda umwe *UMU* wetu na ata kwamwaa wangu nangu nkúngwa wake kanji uvauvanga namu nangu kwamwaa wantenga wambone kwodananavo dimongo dya Nnungu ⁹ aijá át wambwele na átushamile kwalishamelo lyakwilimyanga † i kwamwaa washimadengo shetu kanji kwamwaa waishabaa yake jo mwene na umonyo watupatile nkati mumwe Klistu Yesu tangu wakati úkamalilika ukanava kupagwa ¹⁰ napane undililodya kwakuumilila kumwe Mwamboli wetu Klistu Yesu. Kwaupande unji nae andimalidya kupela, kwaupande unji mulilangadyo kwidanavo shingumi na ungapela kwaindila yantenga wambone, ¹¹ ntenga wowo wangutandalagwidye nangu kuva nkúvalanganaga, myombe na mwalimu. ¹² Kwamwaa wavinu avi namomo ninkuvauvanga kanji hangunona dyoni mwaa nimmánya aijá waninkulupidile na ninkuvanavo wakika kenga nae ankuulula kushunga ashilá shangukulupidile †† mpaka muliduva alyo. ¹³ Odedyá mpano wamalove mangumi awigwite kwangu upagwa mulikulupililo na linagwaledyo lipágwa nkati mumwe

† Kwali: a ...átushamile na lishamelo lyakwilimyanga. †† Kwali: a ...ashilá shaninkulupidile nae.

Klistu Yesu. ¹⁴ Ashilá shambone shaukile ndakulupilika, shunga kwa Imumu Wanashwe ánama nkati mwetu.

¹⁵ Wako undimanya doni uti vamulijimbo lya ku Ashiya vaningwambukanga, pakati pave Pigelu namu Elimogeneshi. ¹⁶ *UMU* alodye shididi shake paing'ande imwe Oneshipolu mwaa myanda vyoe aningutaa dimongo na yakungwa yangu, haanenge dyoni, ¹⁷ leka apo pawikile pa Loma aningulambela kwadimongo mpaka kungupata. ¹⁸ *UMU* amupe litala lyakupatila shididi shaalakéla kumwe *UMU* muliduva alyo! Wako undimanya shana uti mwangutumikidile nae akulá ku Epeshu.

Nanopa muumonyo ata ikava mumauvilo

2 Napavedoni wako mwanangu nanopa muumonyo upagwíte nkati mumwe Klistu Yesu. ² Avilá vyawigwite kwangu nangu pamevo pavashuda voe, vakamudye vanu vakukulupilika valóta kuulula kuvapundisha vanu vanji momo. ³ Liinjidyange mu-mauvilo kenga mwíng'ondo wambone umwe Klistu Yesu. ⁴ Hapali átumika kenga mwíng'ondo áliinjidyanga mushinamidyo shavenentete mwaa shabaa yake ni kulota innagwele aijá áns hamile. ⁵ Namomo aijá áten-da mashindano akutukuta hapata lidaka akanatand-edyá mashindano aodedyá mulatéka. ⁶ Nkúlima ákola madengo akupwateka inimmaikila ave ntandi mukupagwa mmapuno. ⁷ Kumbukila vyandikwaulila avi mwaa *UMU* andakupa limanyilo muuti.

⁸ Nkumbukile Yesu Klistu ádyukile pakati pavakupela, ndukulugwe Daudi kwodananavo ntenga wambone wangu ⁹ aulá wanguvauvangila ata mpaka kungwa kenga nkalau kanji lilove lyake Nnungu, halinaungwa shinu. ¹⁰ Napavedoni uti ninkulupililila kwamwaa wavakutandalegwa pakulota navanavo vapate kwambolekwa kupagwíte nkati mumwe Klistu Yesu pamo na lishangelo líkamalilika. ¹¹ Shitangodi ashi ni shakukulupilika:

Ikava kenga tundipela namu nae,
namu nae momo tundanama,
¹² ikava kenga tunkulupililila,
namu nae namomo tundatawala,
ikava kenga tundamwita,
nanae momo andatwita,
¹³ ikava kenga hatukulupilika,
nae jo andauka mushu akulupilika
mwaa haulula kulita jo mwene.

Mmádengo áakikishigwe na Nnungu

¹⁴ Vakumbuwange vanu vinu avi umya ushuda pamevo pake Nnungu pakulota havanataukanange kwa-malove mwaa haipali paida ila vabamalegwa avalá vaigwilíla. ¹⁵ Likanyilidye ulilodye shana pamevo pake Nnungu kenga mmádengo ákubaligwe akang'ana shalowa lilove lyaumwiu. ¹⁶ Linyemye napane mushitangodi shíkave ishima na shíkave mana mwaa shosho sho, shinkuvatadya vanu vamamodye ungave Nnungu. ¹⁷ Malove ainamuna ai, anaandavala kenga shilamba-lwajo; pakati pave apagwité Imeneu namu Piletu. ¹⁸ Vanavo vandyashalanga muumwiu vaashidoni, kudyuka pakati pavakupela kunditandeka tayali nadoni vovo vo, vankutindinganianga likulupililo lyavanji. ¹⁹ Napane shitunduvangilo shakunanopa sha Nnungu shinkuka mushu shipagwa shivanavo namakong'o aju, "UMU ankuvamanya avalá vake," † na, "Woewoe átambulanga lina limwe UMU aapukanange- navo ungave-shaliya uti."

²⁰ Mwenu! Mwing'ande ing'umene hamunapagwa gweka vyombo vyashaabu kwali vyankuva kanji namo-mo vindápagwa vyombo vyadimbau na vyaulongo; vinji kuva vyakwishimika, vinji vyo kuva víkave ishima. ²¹ Napanelo ikava kenga munu andaushanianga avilá víkave ishima andava shombo shakwishimika, shi-tandégwe kwilimyanga, shivénavo mana kwa Nang'olo shavapanganienge kwashimadengo uti shambone. ²² Tukuta ditamaa uti dyashinemba, vingilidya ishaliya, likulupililo, linagwaledyo na amani pamo na avalá vamtambulánga UMU na ntima úkave ushapu. ²³ Napane ita mitau víkave mana na vyaujinga umanya doni, vyanavo vimalilikila muugombi. ²⁴ Ntumika umwe UMU hanave wamagombi kanji ave mpole kwavanu uti, wakuulula kupundisha, wakulipililila, ²⁵ avapundisha kwakulishapeya avalá vampínga nakapanji Nnungu andavapa kulijugulanga kwidanavo kumanya umwiu ²⁶ na ding'ano dyave divaujile kavili vapalanyoka mudinambo dimwe Ndamoni dyavataile pakulota vatende malotelo ake nae.

Vanu havanjopa Nnungu mumaduva amwisho

3 Manya avi napane: mumaduva amwisho undawika wakati wakujowa. ² Mwaa vanu vandava vakulinagwaledya vo vene, vakunagwaledya njuluku, vakulitumbyanga, vakulyona, vakwabola, vákavaigwilila vatatamunu, vákalambwalela, vákanejopa Nnungu, ³ vákave linagwaledyo, vákadumika, vakung'wenya, vákalilaledya, vakukalipa, vákalota wambone, ⁴ vanánimya, vakulitauka, vaimbeve, vakunagwaledya vyakudangadanga kuliko kunnagwaledya Nnungu, ⁵ vavana-vo ding'ope dyakunjopa Nnungu kanji akuno vaita dimongo dyake. Vanu avo, aapukananganavo.

⁶ Pakati pavanu ava ni avalá vainjíla nding'ande ndavashomba vakongwe vakudabadabanga vakwidapelwa na shimadambi valangalalégwa na ditamaa

† Lola Ishabu 16:5; Naumu 1:7.

dyakula inamuna. ⁷ Vakongwe avo vankupagwa ngwengwe valipundisha pavakaulula kuka ndawikila mukumanya umwiu. ⁸ Kulingana kenga momo Yaneshi namu Yambaleshi vanímpinga Musha, namomo vana-vo vankupinga umwiu; ni vanu vatimbikéngé ding'ano dyave, vanu vákave mana kwalikulupililo. ⁹ Kanji vana-vo havauka shinu mushu mwaa ujinga wave undalilodya ngala kenga mwaivalalele kwavanu vavili avalá.

Pagwa muvinu vyaulipundishidye

¹⁰ Kanji napane wako undyodedya pepi-pepi mapundisho angu, shiwani shangu, nnugu wangu, likulupililo lyangu, kulipililila kwangu, linagwaledyo lyangu, kunanopa kwangu, ¹¹ kupapatigwa na mauvilo; vinu vingutandéke ku Antiyokiya, Ikoni na Kulishitala. Kupapatigwa aku uti, ndilipililila na nkati muvinu avyo uti UMU aninguposha. ¹² Kwakutangola mwiu kula álota kunama shinamidyo shakunjopa Nnungu nkati mumwe Klistu Yesu, andapapatigwa. ¹³ Napane vanu vakalau na vakushang'apa vandauka mushu vama-modya kuvaashadyanga vanu na vo vene vaashalangigwa.

¹⁴ Wako napane pagwa nkati muumwiu aulá waulipundishidye na wawakikishidye ummanya aijá waulipundishidye ¹⁵ na kumanya kenga tangu shidyoko shako undimanya Maandiko akwilimyanga aululíka kukutadya kuva walimanyilo kwakwambole-gwa kwaindila yalikulupililo nkati mumwe Klistu Yesu. ¹⁶ Maandiko uti andipumuliligwa †† namu Nnungu na ankupai kupundishidya, kushashulangila, kulingulila na kupundishidya mwishaliya ¹⁷ kwambangidya munu wa Nnungu ave wakuulula, wavampanganienge shana kwashimadengo uti shambone.

Paulu ankunnaililila Timoti avalangange lilove

4 Ninkumya ushuda pamevo pake Nnungu na pamevo pake Klistu Yesu aijá álota kuvaukumu vangumi na vapidíle, ngulaililila kwakuumilila kwake na utawala wake, ² valanganga lilove lyake Nnungu, ava tayali wakati uvaikidíle na úkavaikidile, shashulanga, shulanga, laililila kwaupole uti na kwakupundisha. ³ Mwaa undawika wakati wavakalota kulipililila vanu mapundisho mangumi kanji vavanavo matu akunyang'anyang'a, vandalyumbadidya vamwalimu kwodananavo ditamaa dyave vo vene. ⁴ Vandashinji- ulila matu ave kunji vaita umwiu na kushinjiukila kudinano. ⁵ Kanji napane wako ava umunu wakulilaledya muvinu uti, lipililile mauvilo, kola shimadengo shankú-valanganga ntenga wambone, tandedya utumika wako ukawikile popo.

⁶ Kwaupande wangu nangu ninkumiminiligwa vangumya shadaka na wakati wakuma kwangu, undi-wika. ⁷ Nditenda ing'ondo yambone, ndimalila mashindano, ndishunga likulupililo. ⁸ Kutunduvangila apa, vaningukandyedya lidaka lyaishaliya lyalota kungupa

†† Kwali: a Kula shandikíke shindipumuliligwa...

UMU, nkúukumu waishaliya muliduva alyo na i gweka nangu kanji namomo uti avalá vanagwalédyá kumilila kwake.

Paulu ankunnaililila Timoti ankodye shipajelo

⁹ Tenda dimongo wide ungukodye shipajelo. ¹⁰ Mwaa Demashi kwakunagwaledya wakati au, aningwambukanga kutwala kuka ku Teshalonika. Keleshete kuka ku Galata, Titu kuka ku Dalamashiya. ¹¹ Ni Lukashi gweka yake ápagwite namu nangu. Pawida nt-wale Malukushi mwide pamo mwaa nae ni lipwashalelo likumene kwangu kwautumika. ¹² Tikiku nae nintumidya ku Epeshu. ¹³ Napane paulota kwida po, ngunyakatila likoti lyaninnakalele Kalupu ku Tolowashi na mabuku, kupunda namene alalá amagwogwe.

¹⁴ Alishandale aijá nkwána aningutenda vyakunyata vyoe namene; *UMU* anannipilila kwakwodananavo avilá vyatandile. ¹⁵ Nawako momo lilaledye kwaupande wake mwaa andipinga na dimongo malove etu.

¹⁶ Mukulishilidya kwangu kutandi, hapali munu ata jumo e avéle upande wangu, uti vaningwambukanga. Kwashitendo ashi, havanavalangiligwe. ¹⁷ *UMU* napane andipagwa namu nangu, akangupa dimongo pakulota dashi, kwaindila yangu nangu kuvalanganga kwalilove kutandeke-uti mpaka vamidi uti vaigwe. Namomo ndikaposhegwa nkanywa mwantumi ¹⁸ na *UMU* anan-guposha muvinu uti vyakunyata na anangutwala ngúvele nimumi kwautawala wake wakuwa. Kwake nae lipagwe lishangelo ngwengwe ngwengwe. Ame.

Nandele wamwisho

¹⁹ Mupe nandele Pilishila namu Akila pamo na vapaing'ande imwe Oneshipolu. ²⁰ Elashitu andiikala ku Kolintu kanji Tolopimu ninneka àvele nnwele ku Miletu. ²¹ Napane tenda dimongo wide ukanava kuwika wakati washipwepwe. Ebulu, Pudente, Lino, Kalaudiya pamo na vanung'unumunu uti vandikutumidya nandele. ²² *UMU* apagwe pamo na imumu yako. Umonyonyo upagwe namu mwenu.

Titu

Nandele

1 Paulu, ntumwa umwe Nnungu na myombe umwe Yesu Klistu kwaupande walikulupililo lyavakutandalegwa na kwakumanya umwiu kulin-gananavo kunjopa Nnungu, ² ko kupandukanga mulilindilililo lyashingumi shíkamalilika, sho shalivikidile Nnungu átangola viu tangu wakati ukana-va kupagwa ³ napane muwakati uvaikidíle nae andilodya mulilove lyake kwaindila yakualanganga lilove, ko kwangukulupilike nangu kwalilamulo lyake Nnungu, Mwamboli wetu, ⁴ kumwe Titu mwanangu waumwiu nkati mulikulupililo lyetu lyaupamo. Umony na amani vyakwalakela kumwe Nnungu Tata-munu na kumwe Klistu Yesu Mwamboli wetu, vipagwe kwako wako.

Mwakuvalela nang'olo waliganisha

⁵ Shitadídye ndikuleke ku Kaleta ni pakulota upan-gange shana avilá vibakidíle na uvavikange vanang'olo kula likaja kenga mwandikupundishidídye. ⁶ Inimmaik-ila nang'olo ave munu ákave likosha, nnume wankong-we jumo avénavo vana vakukulupila kwabila kwanakananga likosha lyakulauka na ata lyaku-vangedya. ⁷ Mwaa nkúlaledya kenga munu wavanka-mudidye vyake Nnungu indivaikila ave ákave likosha, i wakulyona, i wadinyang'unyang'u, i wakwambalwa, i wakukanyola kwali ávikila liu lukwinyango. ⁸ Kanji nae ave munu wakukalibisha, wakunagwaledya wambone, wading'ano, waishaliya, wakwilimyanga [†] na wakulilaledya ⁹ akamulila lilove lyakukulupilika kenga mwavapundishidídye kwambangidya aulule kuvapa vanji ntima shii nkati mumapundisho mangumi na ku-vataukanga avalá vapínga.

¹⁰ Mwaa vavé voe vakupinga, vakutangalanianga na vakuduwanga kupunda namene vashipinga shakuku-muligwa likumbi. ¹¹ Vovo vo vadime nshasholo mwaa vankubamola makola uti vapita vapundisha vinu víkavaikidile pakulota vapate shipato shalukwinyango. ¹² Pakati pavakulava vave vo vene, jumo atédoni, "Vakaleta ngwengwe vava vanu vakushang'apa, vakoko vakujowa, vakululuka vawondo." ¹³ Ushuda au, wíu. Napavedoni vashulange namene kwambangidya vave vangumi mulikulupililo ¹⁴ valeka kwigwilila dinano dyashiyuda pamo na malamulo avanu valódya lukoi umwiu. ¹⁵ Kwa avalá vákave udagwa, uti havive udag-wa kanji kwa avalá vadagwa na vákakulupila, hashipali

† Kwali: a wakulijaula.

shíkave udagwa; ata ding'anong'ano dyave kwali makumbukililo ave amuntima, uti andyambukishigwa. ¹⁶ Vanavo vankulivalanganga kummanya Nnungu kanji muvitendo vyave, vankumwita. Vovo vo ni vanu vakun-yatilika, vákawigwilila na vákapai kwakula shimadengo shambone.

Shinamidyo shoodananavo mapundisho mangumi

2 Wako napane tangola avilá vyodananavo ma-pundisho mangumi. ² Valume vaulinga vave va-pole, vaishima, vading'ano na vangumi mulikulupilo, linagwaledyo pamo na lipililililo. ³ Nimumo momo vakongwe vaulinga vavenavo shinamidyo shoodá-nanavo kunjopa Nnungu i vaushaka na ata vapagwa muutumwa waugwalwa kanji vave vakupundisha wambone ⁴ pakulota vavapundishe vakongwe vaulin-ga wangolo kuanagwaledya vatavave pamo na vanavave ⁵ vava vading'ano na vákave ushapu, vakola madengo paing'ande, vambone na valivika mwina mwavatavave pakulota lilove lya Nnungu, halinaliulig-we. ⁶ Mumo momo valaililile vanemba pakulota vave vading'ano ⁷ gwegwe umwene ulilodya kuva mpano wavitendo vyambone muvinu uti. Mumapundisho ako lo, lodya umwiu ungave-dimbenje ⁸ na shitangodi shingumi shíkatangadikigwa kwambangidya dashi, woewoe ákupinga wako avenavo dyoni pakaavanavo shoeshoe shakunyata shakututambulanga wetu. ⁹ Va-tumwa valivike mwina mwavinu uti kwavanang'olo vave vatadya vanang'olo vave ivanagwele pavakali-taukanga, ¹⁰ pavakaiva kanji valodya kukulupilika kwambone uti kwambangidya vanemye muvinu uti, mapundisho ake Nnungu Mwamboli wetu.

¹¹ Mwaa umonyo umwe Nnungu undilyumilidya widanavo kwambole gwa kwavanu uti ¹² utupundisha kwita ungave Nnungu na malotelo ashimunumu tu-name shinamidyo shading'ano, shaishaliya na shakun-jopa Nnungu muwakati au ¹³ akuno tulindila lilindilililo lyakutumbyangilika, kuumilila kwalishangelo lyake Nnungu nkumene Mwamboli wetu Yesu Klistu ¹⁴ ályu-midye jo mwene kwamwaa wetu wetu pakulota at-wambole muungave-lilamulo uti na alikandyangidye jo mwene venentete vavaushanienge ushapu vaugweka vake jo mwene vavénavo dukuduku yakutandedya vi-tendo vyambone. ¹⁵ Vinu avi valanganga, laililila, shashulanga kwamadalaka uti; haunanneke munu ak-wiludyanga.

Vankulupíla Nnungu vaangaikangile vitendo vyambone

3 Vakumbuwange vapagwe mwina mwavakutawala na mwavamadalaka, vave vakwigwilila na vave tayali kwakula shimadengo shambone, ² havananniule munu, havanave vamagombi, vave vaupole valodya kulishapeya kwavanu uti. ³ Mwaa ata nawetu kala po, tuvele tuvanu túkave ding'ano na túkaigwilila vatwashadyenge tuva tuvatumwa kwavinu vyakula inamuna na ditamaa, shingumi shetu tunama mushishimwashimwa na mwing'ou, tuvangadika na tuvangadyania. ⁴ Kanji napane palyukile ndaumilila litananilo na linagwaledyo limwe Nnungu Mwamboli wetu kwavanu, ⁵ i kwamwaa wavitendo vyetu vyaishaliya vyatutandile kanji kwamwaa washididi shake, nae anditwambola kwaindila yakuukangigwa kwakuvalekwa kwaambi na kudyuwangigwa kwa Imumu Wanashwe ⁶ watumiminidile nae kwabila shipimo kwaindila imwe Yesu Klistu Mwamboli wetu ⁷ kwambangidya dashi, wetu tūvalangiligwe ishaliya kwaumonyo wake, tuve tuvakupata-maleko kwodananavo lilindilililo lyashingumi shikamalilika. ⁸ Lilove ali, lyakukulupilika na kwavinu avi ninkulota doni, wako wigwiniye shana kwambangidya dashi,

avalá vankulupíla Nnungu vaangaikangile kupagwa muvitendo vyambone. Vinu avi vyamana na vinkuvanavo paida kwavanu. ⁹ Mitau napane víkave mana, linyemye pamo na lishauma lyavanyakala, ushaka na mitau kwamwaa walilamulo mwaa vinu avyo, have mana na vyabule. ¹⁰ Munu áidanavo kwapukanianga, ling'oto lyakunduma mwanda utandi na wambili, mwambukange ¹¹ umanya doni munu wantindo au, andyashela na jojo jo ankutega, kwake jo mwene andilyukumu.

Malailililo na nandele wamwisho

¹² Napanelo pangulota kuntumidya kwako wako Alitemashi kwali Tikiku, tenda dimongo wide ungukodye ku Nikopolishi mwaa ndyamuwa ngupagwe kwanavo muwakati washipwepwe. ¹³ Likanyalidye kupwashela shimwanda shimwe Shenashi munu wadishaliya pamo namu Apolu kwambangidya hashinapagwe shakuvova. ¹⁴ Vetu wetu vo, valipundishe kwangaikangila vitendo vyambone pakulota vaangalange vinu vikumene vitakígwa na havanave vákapa vyepo.

¹⁵ Uti avalá vapagwite namu nangu vankukutumidya nandele. Nandele kwa avalá vatunagwalédya nkati mulikulupililo. Umonyo upagwe na uti mwenu.

Pilemoni

Nandele

1 Paulu, nkúngwa kwamwaa umwe Klistu Yesu pamo namu nung'unumunu Timoti, kumwe Pilemoni mmádengomwetu wakunagwaleka ² pamo na numbumunu Apiya namu Alikipu mwing'ondomwetu na liganisha likadyaniánga po paing'ande pako po. ³ Umonyonyo upagwe kwenu mwenu pamo na amani vyakwalakela kumwe Nnungu Tatagwetu na kumwe *UMU* Yesu Klistu.

⁴ Ngwengwe ninkunnambwalela Nnungu wangu pandikukumbukila wako nkati mukushwali kwangu ⁵ mwaa ninkwigwa itangaleka yalinagwaledyo lyenu kwavakwilimyanga uti pamo na likulupililo lyamuvenavo kumwe *UMU* Yesu. ⁶ Ninkujugwa doni, mukumajanja likulupililo lyenu lyuke likaing'e paida yakumanyila uti kula shinu shambone shipagwite nkati mwetu kwaupande umwe Klistu. ⁷ Mwaa linagwaledyo lyako liningupa lipuwilo likumene na kungupambadyanga pakuva mitima vyavakwilimyanga vindi-didimigwa kwaindila yako wako nung'unumunu.

Lijugwilo limwe Paulu kwamwaa umwe Oneshimu

⁸ Napavedoni, ata ikava kenga nangu ninkuvanavo ntima wakutosha nkati mumwe Klistu kulota kukulamulila wako utende ashilá shikuvaikidíle, ⁹ napane kwamwaa walinagwaledyo ndyona kudyanga ndikujugwangile, nene Paulu ngúvele ninang'olo namomo ambi apa ninkúngwa umwe Klistu Yesu. ¹⁰ Ninkukujugwangila kwamwaa wamwanangu Oneshimu wanimmaleke nkati mukungwa kwangu, ¹¹ jo ákashipai kala kanji napane ambi apa ankupai kwaupande wako wako na kwaupande wangu nangu. ¹² Nimuujiya kwako wako nae ni ntima wangu nimwene. ¹³ Ishinangunagwela apagwe namu nangu pakulota angutu-

mike adiva lyutu lyako pangungwa apa kwamwaa wantenga wambone. ¹⁴ Napane kwabila kukubali wako nangu hangulatile kutenda shoeshoe kwambangidya wambone wako haunave wakukuungila kanji uve wakulota gwegwe umwene. ¹⁵ Inkulukika nae andyápukananga namu wako muwakati padyoko kwambangidya apagwe namu wako ngwengwe ¹⁶ i kavili kenga ntumwa kanji ankumpunda ntumwa, nung'unumunu wakunagwaleka. Amu ni mwavalalele kupunda namene kwangu nangu na ata kumamodya namene kwako wako ata mushimunu na ata mumwe *UMU*.

¹⁷ Nadoni ikava kenga unkunguvalangilila kuva nkúmajanangamwavo, mpwashalele kenga mukangupwashaladíle nangu. ¹⁸ Ikava kenga nae andikwanela wako kwali unkundai, bai vika vinu avyo mulipungu lyangu. ¹⁹ Nangu Paulu ndyandika ibalugwa ai na nkono wangu nimwene; lideni alyo ndalipa pakulota hangunatangole doni, gwegwe umwene ninkukudai ata mpaka sho shingumi shako. ²⁰ Elo nung'unumunu, nangu ngulota ngupate kwako paida nkati mumwe *UMU*; didimidy ntima wangu nkati mumwe Klistu. ²¹ Nguvanavo wakika kwakwigwilila kwako, ndikwandikila ngumanya kenga undatandedya kupunda avi vyandikujugwile. ²² Pamo na avyo, ngupanganayangidya lyutu lyakuwikila mwaa ninkulindila kenga kwaindila yakushwali kwenu vananguujidya kwenu.

Nandele wamwisho

²³ Epapalashi nkúngwamwangu nkati mumwe Klistu Yesu ankuntumidya nandele. ²⁴ Namomo Malukushi, Alishitaliku, Demashi namu Lukashi vamadengomwangu, vankuntumidya nandele.

²⁵ Umonyonyo umwe *UMU* Yesu Klistu upagwe pamo na imumu yenu.

Vabalaniya

Ukumene wa Mwana wa Nnungu

1 Kala po Nnungu andítangola na vanyakalavetu myanda vyoe na kwadinamuna dyoe kwaindila yavakulava ² kanji mumaduva ala amwisho nae andítangola namu wetu kwaindila ya Mwanagwe aijá wankamudidye maleko avinu uti na kwaindila yake nae andikandyanga momo kuwa na pai. ³ Nae ni kung'ala kwalishangelo lyake Nnungu na ni ing'ope iu yamavalelo ake akamulila vinu uti kwaindila yalilove lyake lyadimongo; ling'oto lyakukandyanga shakushaniangidya ushapu kwamadambi, nae andiikala kushanya kunkanakono kumwe aijá Wakujowa walis-hangelo ⁴ antenda kuva nang'olo kuliko vanjelo kulin-ganana kenga mo, lina lyapatile ni likumene kupunda avanavo.

Yesu ni nang'olo kuliko vanjelo

⁵ Da wakwashi pakati pavanjelo wamwaulidile Nnungu doni,

“Wako Umwanangu,
nangu nelo ndikuvaleka”? †
Nakavili do,

“Nangu nindava Nitatake
na jo mwene andava Mwanangu.” ††

⁶ Namomo kavili Nnungu pantumididye mushilambo amu Ntandi kuvalekwa atédoni,

“Vanjelo uti vake Nnungu valipudye kwake nae.” †

⁷ Kwaupande wavanjelo nae atédoni,

“Ankuvatenda vanjelo vake kuva imepo
na vatumika vake kuva malamba amoto.” ††

⁸ Kanji kwaupande wa Mwana nae atédoni,
“Shiteng'u shako Nnungu shindapagwa ngwengwe
ngwengwe,

ipimbo yautawala wako, yaishaliya.

⁹ Unkunagwaledya ishaliya kunyatila ungave-lilamulo;
napavedoni Nnungu, jo Nnungu wako,
andikutandola pakati pavavavo,

kukupaka mauta alipuwilo.” ††

¹⁰ Namomo atédoni,

“Wako *UMU* kunantandi undikandyanga vitundu-
vangilo vyashilambo,

kuwa ni shimadengo shamakono ako.

¹¹ Vyanavo vindatimbikanga kanji wako undapagwa
ngwengwe;

† *Lola Dimu 2:7.* †† *Lola II Samuwele 7:14; I Maimyo 17:13; Dimu 89:26-27.* † *Lola Kumbukumbuku 32:43; Dimu 97:7.* †† *Lola Dimu 104:4.* †† *Lola Dimu 45:6-7.*

vyanavo uti vindavandaloka kenga dinguvo.

¹² Kenga ikanju, wako undadinganga,
kenga dinguvo, dyanavo dindabadilishwa.
Kanji wako undavalela momo ngwengwe,
maduva ako havanavo shinu mwisho.” ††

¹³ Da wakwashi pakati pavanjelo wamwaulidile nae an-galau mwanda umo vela do,

“Ikala kunkanakono kwangu
mpaka nangu vamongo vako ndivateke,
wako uvaluvatile kumaulu”? ††

¹⁴ Da vanjelo uti havanava shinu dimumu ditumíka na ditumígwa pakulota divatumike avalá valóta kupata maleko akwambolegwa?

Tukamulile na dimongo vyatwigwite

2 Napavedoni indituvaikila tukamulile namene na dimongo uti avilá vyatwigwite kwambangidya hatunaashalange. ² Mwaa pakuva ntenga uvalangilig-we kwaindila yavanjelo undyanakananga kuva wakukulupilika, kula kupujungula na ungaigwilila undipata ukumu ivaikidíle. ³ Napanelo tulota kupalanyoka dashi ikava kenga hatunatanana shinu kwambolegwa aku kukumene? Kwambolegwa aku kuvalangiligwe kunantandi namu *UMU* kutwala kuka ndaakikishiligwa kwetu wetu namu avalá vaigwíte ⁴ akuno Nnungu aumya ushuda kwaindila yavimanyiki-lo, vyakutikinikanga na vyamakango vyoe pamo na vyajo vya Imumu Wanashwe vyajavile kulingananavo malotelo ake.

Yesu andílyunganianga mumavalelo ashimunumunu

⁵ Mwenu, havanava shinu vanjelo vavavikile Nnungu pakulota vatawale shilambo shilóta kwida shatuvan-ganga; ⁶ kanji leka apo, isemu inji yamaandiko vandyumya ushuda doni,

“Munu ni nyani wakulota untanane?

Kwali mwana wamunu ni nyani wakulota wako umwangaikangile?

⁷ Wako unintenda padyoko tu kuva mwina mwavanje-lo;

uningwadya lidaka lyalishangelo na lyaishima,

⁸ uti undivika mwina madodo ake.” [§]

Mwenu, pashivika uti mwina mwake hashipali sha-lakile panda pakulota hashinatawaligwe namu nae. Kanji napane mpaka ambi, hatunona shinu vinu avyo vipagwa mwina mwake nae ⁹ ila tunkumwona Yesu

††† *Lola Dimu 102:25-27.* ††† *Lola Dimu 110:1.* § *Lola Dimu 8:4-6.*

wauntandile padyoko tu kuva mwina mwavanjelo, waungwadidye lidaka lyalishangelo na lyaishima kwamwaa wakuvauvanga mukupela kwambangidya kwaumonyo wake Nnungu alinge kupela kwamwaa wavanu uti.

¹⁰ Pavatwala vana voe kuvaukanavo kulishangelo, in-
immaikila Nnungu kwamwaa umwe aijá na kwaindila
imwe aijá átadya vinu uti vipagwe, antadye awikile
popo † nkútunduvanga wakwambolewa kwave
kwaindila yamauvilo. ¹¹ Mwenu, aijá átadya kwilimyan-
ga na avalá vailimyangígwa, uti ava vankwalakela kwa
aju, jumo. Napavedoni Yesu hanona dyoni yakuvashe-
ma vanavo vanung'unumunu ¹² paashidoni,

“Ndavalanganga lina lyako kwavanung'unumunu
pakati panguguvale, ndakutumbyanga.” ††

¹³ Namomo ankushidoni,

“Nangu ndavika likulupililo lyangu nkati mwake.” †
Kavili kushidoni,

“Lola, ninkupagwa apa pamo na vana vangupele
Nnungu.” ††

¹⁴ Doni, pakuva vana ava vankuvanavo mavalelo
ashimunu, nanae momo andíiinjidyaanga mumavalelo
ashimunu pakulota kwaindila yakupela, andime aijá
ávenavo lyululilo lyakupedyo yani Ndamoni; ¹⁵ namo-
mo avavike muunaiti uti avalá ve vapagwite muu-
tumwa mushingumi shave uti vajopa kupela. ¹⁶ Mwaa
kwaumwiu nae hanavaangaikangila shinu vanjelo kan-
ji angaikangila udukulu umwe Abulaamu. ¹⁷ Kwamwaa
au, inimmaikila nae atandegwe kuva wakulinganana
na vanung'unumunu nkati mumavalelo pakulota ave
nang'olo washididi na nkúlangalalela-shadaka
nkumene wakukulupilika áigwania namu Nnungu
kwambangidya atandedye kudimanga shitundi
kwamwaa washimadambi shavenentete. ¹⁸ Pakuva jo
mwene andyuvauvanga mukutubigwa, ambi apa
ankuulula kuvapwashela avalá vatubígwa.

Yesu ni nang'olo kuliko Musha

3 Napavedoni mmanung'unumunu mmak-
wilimyanaga múiinjidyaanga pamo mukushameg-
wa kwakuwa, vikila namene kuntima makumbukililo
enu kumwe Yesu, myombe na nkúlangalalela-shadaka
nkumene wakulyaula kwetu. ² Nae andikulupilika
kumwe aijá ántandwele kenga mo mwaukilile
ndakulupilikila Musha mwing'ande uti yani venentete
vake Nnungu. ³ Yesu andivaikila avalangiligwe lis-
hangelo likumene kuliko Musha, nimumo momo nkú-
denga ing'ande ni ánapata ishima kuliko yo yene
ing'ande. ⁴ Mwaa ing'ande uti idangegwa na munu
kanji nkúndenga wavinu uti ni Nnungu. ⁵ Doni, Musha
andikulupilika mwing'ande uti ya Nnungu kenga ntu-
mika áumya ushuda wa avilá vilóta kutangaleka
wakati wamushu; ⁶ kanji Klistu andikulupilika kenga
mwana ávenavo madalaka amwing'ande uti ya Nnun-
gu. Napane ing'ande yene yo, ni wetu ikava kenga tun-

† Kwali: a ...antadye ave washalowa-uti. †† Lola Dimu 22:22.
‡ Lola Ishaiya 8:17; 12:2; Dimu 18:2. †† Lola Ishaiya 8:18.

dashunga kwadimongo kukulupila kwetu na alilá
lilindilililo lyatulutumbyangidya.

Hamunananope mitima vyenu

⁷ Doni, kenga mwatangalela Imumu Wanashwe,
“Muliduva lyanelo ikava kenga munkwigwa lidi lyake,
⁸ hamunananope mitima vyenu kenga mukupinga,
kenga muliduva alilá lyakulinga kushimbweshe,
⁹ lyavangulingile vanyakalavenu vangutenda nningo,
ata ikava kenga muvyaka alubaini vandyona vitendo
vyangu.

¹⁰ Napavedoni ndíshimwa kwamwaa wavanu vaimbu-
la ayo kutwala kushidoni,

‘Mitima vyave ngwengwe vinkuka vyashalanga,
vanavo havanamanya shinu dindila dyangu.’

¹¹ Nadoni ndililapa nkati mushitundi shangu,
‘Mwiko havainjila mukupumula kwangu.’ ††

¹² Lilaledye mmanung'unumunu, hanapagwe munu
pakati penu wantima waukalau na waungakulupila un-
tadya aapukananganavo Nnungu mumi. ¹³ Leka apo,
ing'ana ntima shii kula wakati ushamégwa “Liduva
lyanelo” kwambangidya hanapagwe pakati penu
munu wakunanopa aduwangika mulidambi ¹⁴ mwaa
wetu tuukilé ndaliinjidyanga nkati mumwe Klistu ikava
kenga mwiu tundakumulila mpaka kumwisho
likulupililo lyetu lyatupatile kunantandi. ¹⁵ Ni ashi shi-
tangeléka doni,

“Muliduva lyanelo ikava kenga munkwigwa lidi lyake,
hamunananope mitima vyenu kenga mukupinga.” †††

¹⁶ Da vakwashi vaigwite kanji kutwala kupinga? Da
havanava shinu avalá vaumíle ku Mishili valangalaleg-
wa namu Musha? ¹⁷ Da vakwashi vavavikidile Nnungu
shitundi muvyaka alubaini? Da havanava shinu avalá
vatagile kutwala mili vyave kushikigwa kushimb-
weshe? ¹⁸ Namomo, vakwashi valilapidile Nnungu ken-
ga mwiko havainjila mukupumula kwangu? Havanava
shinu avalá vákamwigwilidile? ¹⁹ Bai tunkwona ngala
doni, havaulwile kwinjila kwamwaa waungakulupila.

Liduva lyakupumula kwavenentete vake Nnungu

4 Napavedoni pakuva kulivikila aku kwakwinjila
mukupumula kwake Nnungu kunkupagwa mpaka
ambi, bai indituvaijila tujope kwambangidya hana-
pagwe ata jumo pakati penu wakwanakananga
kukowa mene kuwikila shabaa. ² Mwaa kwetu wetu
vandituvalangangila ntenga wambone kenga vanavo
momo kanji lilove lyavaigwite hashipali
shavakatakadile kwoda lilove alyo, havapwashadile
kwalikulupililo avalá vaigwite. ³ Kanji kwetu wetu túuk-
ile ndakulupila tunkwinjila amulá mukupumula kulin-
gana kenga mwatanggaladile Nnungu,
“Nadoni ndililapa nkati mushitundi shangu,
‘Mwiko havainjila mukupumula kwangu,’ †††

†† Lola Dimu 95:7-11. ††† Lola Dimu 95:7-8. ††† Lola Dimu
95:11.

ata ikava kenga shimadengo shake shindimalilika tangu kukandyangigwa kwashilambo. ⁴ Mwaa mwimbande inji yamaandiko nae anditangola doni kwamwaa waliduva lyasaba, “Kutwala muliduva lyasaba lyo Nnungu andipumula shimadengo shake uti.”

^{†5} Kavili mwimbande ailá inkushidoni,

“Mwiko havainjila mukupumula kwangu.” ^{††}

⁶ Napanelo pakuva lipali litala lyakwinjila vanji mukupumula kwake na pakuva avalá vavalangiligwe ntenga wambone kaladavo havainjidile kwamwaa waungaigwilila, ⁷ kavili ankuvika liduva linji lyavashe-ma “Liduva lyanelo” patangwele kwaindila imwe Daudi ling'oto lyakupita wakati woe kwodananavo avilá vitan-galéke kaladavo,

“Muliduva lyanelo ikava kenga munkwigwa lidi lyake, hamunananope mitima vyenu.” [‡]

⁸ Mwaa leka Yoshuwa àvapele kupumula, Nnungu hanatangole kavili ing'ano yaliduva linji. ⁹ Napavedoni linkupagwa liduva lyakupumula kwavenentete vake Nnungu ¹⁰ mwaa aijá áinjidile mukupumula kwake Nnungu, nae ankupumula shimadengo shake kenga mwapumulidile Nnungu shimadengo shake. ¹¹ Napavedoni, tulikanyalidye kwinjila mukupumula ako kwambangidya hanapagwe wakugwa aodedyo mpano wowo waungaigwilila. ¹² Mwaa lilove lyake Nnungu lingumi na linkuvanavo dimongo, namomo lyakukola kupunda lyambila likóla kuvili, yanavo linkupulungani-anga pakati-pakati ungumi na imumu, mumagwangwa na muwoba, namomo linkujavanianga makumbukililo na milugu vyamuntima. ¹³ Hashipali shuumbígwe shilipiídye pamevo pake Nnungu. Uti vivelé mwandwa na palangele pamevo pamwe aijá patulota wetu kwitikanga.

Yesu ni nkúlangalalela-shadaka nkumene-uti

¹⁴ Napavedoni pakuva tunkuvanavo nkúlangalalela-shadaka nkumene-uti áinjidile kuwa, Yesu Mwana wake Nnungu, indituvakila tunanope mu ashilá shatulyaula. ¹⁵ Mwaa nkúlangalalela-shadaka nkumene watuvenavo ankuulula kutwanangila shididi mukudabadabanga kwetu. Kanji leka apo, munu kenga wetu nae andyuvavanga dinamuna uti dyakutubigwa kwabila kutenda shimadambi. ¹⁶ Nadoni tuvandikile shiteng'u shaumonyo kwantima shii kwambangidya twanangiligwa shididi na tukakodye umonyo wakulota kutupwashela muwakati ulotéka.

⁵ Mwaa kula nkúlangalalela-shadaka nkumene ankutandalegwa pakati pavenentete na vammika pakulota aitike yavenentete muvinu vimwamba Nnungu aumya dinudyo na vyadaka kwamwaa washimadambi. ² Nae ankuulula kuvatanana vákave li-manyilo na vaashalángwa kwaupole pakuva jo mwene nanae momo avé mwina muungalyulula. ³ Napavedoni nae inimmaikila aumye shadaka kwamwaa washimadambi shake jo mwene kulingana kenga mwaumidya shavenentete. ⁴ Hapali hanalitwalila ishi-

[†] Lola Kutunduvanga 2:2. ^{††} Lola Dimu 95:11. [‡] Lola Dimu 95:7-8.

ma ai jo mwene ila ashamegwe na Nnungu kenga mwaivalaléle kumwe Aloni.

⁵ Nimumo momo, Klistu halikwadidye jo mwene al-ing'a lishangelo yakulitenda kuva nkúlangalalela-shadaka nkumene kanji andipangigwa na aijá ámwaulidile doni,

“Wako Umwanangu,

nangu nelo ndikuvaleka.” ^{‡†}

⁶ Namomo mwimbande inji atédoni,

“Wako ni nkúlangalalela-shadaka ngwengwe kwodananavo upangaji umwe Malikishadeki.” ^{‡‡}

⁷ Yesu mumaduva anamile mushilambo amu, andilyumya mukushwali na mukujugwangila annamadikila pashanya po akuno alila anjugwa aijá áulula amwambole mukupela kutwala nae kumwigwa mwaa wakunjopa Nnungu. ⁸ Ata ikava kenga nae ni Mwana-munu, andilipundisha kwigwilila kwaindila yamauvilo ya avilá vyauvauvenge. ⁹ Namomo pantadidye awikile popo ^{‡‡†} nae anditadya ave ntipu wakwambole-gwa kúkamalilika kwa avalá uti vamwigwilila, ¹⁰ avikigwa na Nnungu kuva nkúlangalalela-shadaka nkumene kwodananavo aulá upangaji umwe Malikishadeki.

Shijaidyo shakwambukanga lilove lya Nnungu

¹¹ Kwashitendo ashi tunkuvanavo vyoe vyakulota kuvalanganga, vinu vikamadyángwa kwaulangila mwaa mwenu mundiva mmanu mmakukakova kwigwa.

¹² Ata ikava kenga wakati au ivaikidile muve mmamwalimu kanji inkuloteka munu ampundishe kavili vitunduvangilo vitandi vyamalove ake Nnungu. Ambi apa immaikidilé mujong'e mavele i shakulya shakukama. ¹³ Aijá álishigwa mavele nae mpaka ambi nunu nadoni havenavo mang'amung'amu alilove lyaishaliya. ¹⁴ Kanji shakulya shakukama ni shavanu vakulumwike, vanavo kwamwaa wakulidyalakedyo ngwengwe, vankuvanavo lyululilo lyakupambula wambone na wakunyata.

⁶ Napavedoni tuleke mapundisho akutunduvanga kwamwaa umwe Klistu na tuke mushu nkati mukukulumuka kwabila kudenga kavili shitunduvangilo yani, kulijugulanga kwavitendo vyakupela, likulupililo kwa Nnungu, ² mapundisho aubatisho, akuvavikila vanu makono, akudyuka kwavakupela na aukumu íkamalilika. ³ Asho shindatandeka ikava kenga Nnungu andatupa litala.

⁴ Mwenu, hayululika kwa avalá ve vapatíle lilangadyo, valingíle inudyo yakuwa, valiinjidyéngwe mu Imumu Wanashwe, ⁵ valingíle wambone walilove lyake Nnungu pamo na dimongo dyawakati ulóta kwida ⁶ kutwala vanavo vo kwambukanga kuululika kavili kuvaukanavo mukulijugulanga mwaa kwavo vo vene vo, vankunkamela kavili panshalaba Mwana wa Nnungu na kuntaa dyoni paumbala.

⁷ Mwaa ulongo upáta imbulu itanyéla kula wakati na umédyo vilyo vyapaida kwankúlima, wanavo unkupata kwalaligwa kwake Nnungu. ⁸ Kanji ukamedya miva na

^{††} Lola Dimu 2:7. ^{‡‡} Lola Dimu 110:4. ^{‡‡†} Kwali: a ...pantadidye ave washalowa-uti.

nashilanga, hauve mana na uvé pepi na kupata dilana, kumwisho kwake kutaigwa moto.

⁹ Kwenu mwenu mmakunagwaleka, ata ikava kenga tunditangola kwainamuna ai, tunkuvanavo wakika wakupagwa kumanyikanga kwavinu vipagwite nkati mukwambolegwa. ¹⁰ Nnungu hanava shinu waungave-ishaliya wakulota kulivaliva shimadengo shenu na linagwaledyo lyamuladidye kwamwaa walina lyake pakuva mundivatumba vakwilimyanga na munkuka mushu muvatumika. ¹¹ Shitunagwéla wetu, kula munu pakati penu alodye dukuduku yoyo mpaka kumwisho pakulota apate wakikisho wiu walilindilililo lyetu ¹² kwambangidya hamunave mmawondo kanji vajedye avalá kwaindila yalikulupililo na kulipililila vandipata maleko akulivikila.

Lilindilililo ni inanga yaungumi wetu

¹³ Mwenu, Nnungu palivikidile kumwe Abulaamu, pakuva hapagwite munu nkúmene walyululilo kuliko nae wakulota kulilapila lina lyake, nae andílilapila jo mwene ¹⁴ aashidoni, “Mwiu, ndakwalaliya na ndakulundulila poe namene udukulu.” ¹⁵ Ivédoni, ling'oto limwe Abulaamu kulindila kwaupole, nae andípata ashilá shaukile ndalivikila Nnungu.

¹⁶ Mwaa vanu vandálilapila kwalina limwe aijá nang'olo kuliko vanavo na kulilapa ni kwakikisha mudimakanila uti. ¹⁷ Nadoni Nnungu palotile kulodya kwabila kwambambidya malotelo ake ákabadilika kwavakupata-maleko akulivikila, nae andyakikisha kwakulilapa ¹⁸ kwambangidya dashi kwaindila yavinu vivili vikabadilika, vyo víkaululika Nnungu kushang'apa, wetu tunkuulula kuvanavo kupambadyangigwa pakulota kukamulila shana lilindilililo lyavavikile mushu mwetu wetu títukutidile kwa Nnungu. ¹⁹ Alyo tunkuvanavo kenga inanga yaungumi wetu, íkajagajega na yauwakika, lilindilililo lipaléta mwinguvo yamulyutu lyakwilimyanga-uti ²⁰ ko kwaukile Yesu kenga nashilangola, andiinjala yetu wetu atandegwa kuva nkúlangalalela-shadaka nkumene ngwengwe kwodananavo aulá upangaji umwe Malikishadeki.

Nkúlangalalela-shadaka Malikishadeki

7 Mwenu, Malikishadeki aju avele umu wa ku Shalemu ^{††} na jojo jo, avele nkúlangalalela-shadaka wake Nnungu Wapashanya-uti, nae andíkadyania namu Abulaamu, Abulaamu auja kukuvatema vaumu nae kutwala kumwalaliya. ² Abulaamu animupa Malikishadeki lipungu lyakumi lyavinu uti. Shitandi lina lyake linkuvanavo mana, “umu waishaliya” namomo avele umu wa ku Shalemu, yani “umu waamani.” ³ Ata have tatake, have anyoke, have udukulu na ata have- navo shitunduvangilo shamaduva kwali mwisho washingumi shake; kanji vankunninganianga na Mwana wa Nnungu mwaa ankuva nkúlangalalela-shadaka ngwengwe ngwengwe.

⁴ Lola ukumene wamunu aju: ata mpaka nyakala Abulaamu animupa lipungu lyavinu uti vyatwéte mateka! ⁵ Mmalamulo linkupagwa lilamulo líishidoni, pakati paudukulu umwe Lawi avalá vatandalégwa pakulota vave vakulangalalela-shadaka indivaikila vapate lipungu lyakumi lyakwalakela kwavenentete, yani vavele vo vanung'unumunu ava, ata ikava kenga vanavo momo ni udukulu umwe Abulaamu. ⁶ Kanji napane munu aju ákapali muudukulu wavanalawi, nae andipwashalela lipungu lyakumi limwe Abulaamu kutwala kumwalaliya aijá ávenavo vyakulivikila vyake Nnungu. ⁷ Mwenu, kwabila kwambambidya ndyoko ni áalaligwa na nang'olo. ⁸ Kwaupande unji vapwashalaléla lipungu lyakumi ni vanu vapéla kanji apa ápwashalela lipungu lyakumi vankumuumidya ushuda kenga nae, ankunama. ⁹ Inkuululika kutangaleka doni, ata jo mwene Lawi ápwashalela lipungu lyakumi, nae andyuma lipungu lyakumi kwaindila imwe Abulaamu ¹⁰ mwaa Lawi mpaka apo ávele nkati mumwe Abulaamu nyakala wake ni pakadyanienge Malikishadeki namu Abulaamu.

Yesu ni álinganene namu Malikishadeki

¹¹ Muunanangalaleli wakulangalalela-shadaka wavanalawi ni mwavapatilile venentete lilamulo, napane leka yúlulike venentete kuwikila popo, † shikaloteke nyamani kavili kuumililila nkúlangalalela-shadaka junji kwaupangaji umwe Malikishadeki i kwaupangaji umwe Aloni? ^{††12} Mwaa unanangalaleli wakulangalalela-shadaka ukabadilika, lilamulo momo lindivaikila libadilike. ¹³ Mwenu, wavimwamba vinu avi jo, avele wamuudukulu unji udukulu úkantumike ata padyoko vela Nnungu kwalutali ¹⁴ mwaa inkumanyika ngala doni, *UMU* wetu ni wamuudukulu umwe Yuda udukulu wákaambangidile mwaa Musha kwaing'ano ailá yavakulangalalela-shadaka. ¹⁵ Vyatumalidile kutangola vinkulilodya namene ngala paumulidile nkúlangalalela-shadaka junji álinganene namu Malikishadeki, ¹⁶ munu ávikigwe kuva nkúlangalalela-shadaka i kwakwoda shilotéka kwalilamulo lyaudukulu kanji kwakwoda dimongo dyashingumi shake shíkaululika kubamolegwa. ¹⁷ Mwaa Maandiko ankumya ushuda yake nae, “Wako ni nkúlangalalela-shadaka ngwengwe kwodananavo upangaji umwe Malikishadeki.” ^{††} ¹⁸ Napavedoni kwaupande unji lilamulo litandi, vandiputanga mwaa wakuva lyakudabadabanga na líkave mana ¹⁹ mwaa lilamulo litandi halyulwile kutandedya shinu shoeshoe kuwikila popo ^{†††} kanji kwaupande unji, vandiingula lilindilililo lyamana na kwaindila yalyanavo tunkuulula kummandika Nnungu. ²⁰ Ashi hashitandeké kwabila kulilapa! Mwaa avalá vashitandegwa kuva vakulangalalela-shadaka, vashitandegwa kwabila kulilapa ²¹ kanji nae anditandegwa namu Nnungu kuva nkúlangalalela-shadaka, jo álilapidile jo amwaulidile doni,

† Kwali: a ...leka yúlulike venentete kuva vashalowa-uti. †† Aloni avele nang'olo ntandi wavakulangalalela-shadaka kwodananavo upangaji wavanalawi. ††† Lola Dimu 110:4. ††† Kwali: a ...kutandedya shinu shoeshoe kuva shashalowa-uti.

“UMU andililapa na halyambila shinu,
 ‘Wako ni nkúlangalalela-shadaka ngwengwe.’” †
 22 Nadoni jo Yesu aju, anditandegwa kuva shakwimi-
 didya mwimbodi yamana.
 23 Mwenu, avalá vakulangalalela-shadaka váshi-
 tandegwa voe mwaa kupela ashindavadvilila pakulota
 havanaukenavo mushu shimadengo shave 24 kanji
 pakuva Yesu ankunama ngwengwe, nae ankuvanavo
 unanangalaledi úkamalilika. 25 Napavedoni nae ankuu-
 lula kuvaambole-uti avalá vammadíka Nnungu
 kwaindila yake pakuva jojo jo, ankunama ngwengwe
 pakulota kuvajungwangila vanavo.
 26 Indituvaikila kuanavo nkúlangalalela-shadaka
 nkumene kenga aju: wakwilimyanga, ákave makosha,
 waungave-udagwa, ávilinganenge na vakutega, wa-
 vankwadidye kuwa-uti. 27 Kwakuvilingananga na vaku-
 langalalela-shadaka vakumene avalá, nae hainatakig-
 wa shinu kulyumidya shadaka kula liduva kwamwaa
 washimadambi shake ling'oto shimadambi shavenen-
 tete. Nae anditenda uti avi kwamwanda umo tu bai
 palyumidye jo mwene. 28 Mwaa lilamulo linkuvavika
 vanu muungalyulula wave kuva vakulangalalela-
 shadaka vakumene kanji akulá kulilapa kwaléke
 ling'oto lyamalamulo, kunimmika Mwana átandag-
 widye kuwikila popo ngwengwe. ††

Yesu ni nkúdumangila waimbodi yaambi

8 Mwenu, shikumene shatwambangila mwaa apa
 ni ashi, tunkuvanavo nkúlangalalela-shadaka
 nkumene kenga aju jo áikele kunkanakono
 washiteng'u shimwe aijá Wakujowa walishangelo,
 kuwa 2 na ankutumika mulyutu Lyakwilimyanga ívele
 yema iu yadangile UMU i munu.
 3 Kula nkúlangalalela-shadaka nkumene ankushag-
 uligwa pakulota aumye dinudyo na vyadaka; nadoni
 indivaikila nanae momo avenavo shakumya. 4 Leka
 nae ápagwite mushilambo shapai ashi, ata hain-
 aulukike kuva nkúlangalalela-shadaka nkumene kwo-
 da vapali avalá vaúmya shadaka kwodananavo lilamu-
 lo. 5 Shavatumika vanavo ni lilodyo vila na shimbedi
 shavinu vivéle kuwa. Musha pashilota kudenga yema
 Nnungu animwaulila kaladavo doni, “Lilaledye, tenda
 kula shinu kwodananavo lilodyo lyandikuladidye akulá
 kulishinga.” †6 Kanji napane ambi apa utumika wap-
 atile Yesu wo, ni wambone kuliko wavanavo, nadoni
 kenga mo, imbodi intadídye nae ave nkúdumangila
 waimbodi yamana kupunda yakala, yoyo yo inku-
 nanapela muvyakulivikila vyamana.
 7 Mwaa leka imbodi itandi ikavenavo makosha,
 hainapagwe yakulambalalegwa yambili. 8 Kanji napane
 Nnungu andyóna kupagwa shoovíte kwavenentete
 kutwala kushidoni,
 “Mwenu, andawika maduva, atangola UMU,
 pangulota kupanga imbodi yaambi na shipinga sha-
 vanaishilaeli
 pamo na shipinga shavayuda.

† Lola Dimu 110:4. †† Kwali: a ...kuva washalowa-uti ng-
 wengwe. ‡ Lola Kuma 25:40.

9 Haiva shinu kenga imbodi yangupangile na
 vanyakalavave
 pandivakamwile nkono ndivaumya kushilambo sha
 ku Mishili;
 kwoda vanavo vo, havananwepe mwimbodi yangu,
 nangu apa ndivaambukanga,” atangola UMU.
 10 “Doni, ai ni imbodi yangulota kupanga na shipinga
 shavanaishilaeli
 ling'oto lyamaduva alo,” atangola UMU.
 “Ndavika malamulo angu muding'anong'ano dyave,
 na ndaandika mmitima vyave.
 Nindava Nnungu wave,
 vanavo vo, vandava venentete vangu.
 11 Hapali álota kumpundisha kavili nshitanonomwag-
 we
 na ata nung'unumunu aashidoni, ‘Mmanyé UMU,’
 mwaa uti vanavo vanangumanya,
 kutunduvangila ndyoko na nkulu.
 12 Mwaa ungave-shaliya wave nangu ndavaanangila
 shididi,
 na shimadambi shave hangukumbukila kavili.” ††
 13 Patangola Nnungu yaimbodi yaambi yakala yo nae
 anditadya ipite na wakati; napane ashilá shipitíle
 wakati na shikangapéle, asho shinkuka mukulambale-
 ka.

Lyutu lyakwilimyanga mushilambo amu

9 Mwenu, imbodi itandi yo indívanavo upangaji
 wake wakulipudidya na lyutu lyakwilimyanga
 mushilambo amu. 2 Doni, vandípanganianga yema na
 isemu itandi indípagwa ikalaboi, imesha na magung'u
 akumuumidya Nnungu; † lyutu alyo, vashishema Lyu-
 tu Lyakwilimyanga. 3 Panyuma inguvo yambili indípag-
 wa isemu yavashema Lyutu Lyakwilimyanga-uti,
 ††4 kushinu kushipagwa alutali lwashaabu lwakututu-
 mididya lubani pamo na lishanduku lyaimbodi lyavam-
 bumbukidyenge kula upande na shaabu. Lishanduku
 ali, shindípagwa shombo shashaabu shivénavo man-
 aa, ipimbo imwe Aloni íshiipukila, namomo kupagwa
 mabau aimbodi. 5 Pashanya lishanduku alyo vandípag-
 wa makelubi ††† valishangelo, vimbedi vyave
 vishindainikidya lyutu lyakudimanga shitundi shake
 Nnungu. Kwaing'ano yavinu avi, ambi apa hatuulula
 kutadyalyedya uti.
 6 Mwenu, vinu pavapanganianga shana, vakulan-
 galalela-shadaka vandáinjila isemu itandi yamwiyema
 kenga mwanamaduva vatandedya utumika wave
 kwakulipudya. 7 Kanji isemu yambili ainjila gweka
 nkúlangalalela-shadaka nkumene, jojo jo ainjila
 mwanda umo kwamwaka. Painjila po, hanainjila bila
 myadi vyakumuumidya Nnungu kwamwaa wake jo
 mwene na kwamwaa washimadambi shavatandile ve-

†† Lola Yelemiya 31:31-34. †† Lola Kuma 25:23-40. Apa
 Nnungu ankumwaulila Musha mwashi mwakulota kuvikila ailá ime-
 sha yamagung'u na ailá ikalaboi mwiye yam yakulipudidya. †††
 Yema indívanavo disemu mbili, pakwinjila apa indípagwa inguvo
 itandi na inguvo yambili ishindajavanianga disemu adi uti. †††
 Makelubi ni viumbi vyakuwa vavénavo dimapa, shimadengo shave
 shivele shakushunga. Lola Kutunduvanga 3:24.

nentete kwabila kulimanya. ⁸ Doni, Imumu Wanashwe ankulodya ipagwite avi isemu itandi, indila yuka Lyutu Lyakwilimyanga-uti hainava kuunguligwa. ⁹ Au ni mpano ulilódyo wakati au kenga dinudyo na vyadaka vyúma, havylulula kutadya awikile popo [†] makumbukililo amuntima ankúlipudya ajo: ¹⁰ vyovyó vyo, vishamba vyakulya, vyakukumbila na mwakunavangila medi; malailililo ala mwakushungila mili andipagwa mpaka muwakati waupangaji waambi.

Klistu ni likameko lyakwambola kúkamalilika

¹¹ Napane Klistu paumilidile kenga nkúlangalalela-shadaka nkumene wavinu vyambone vipagwite ambi apa, nae andipita isemu itandi yamwiyema ing'umene na yakulinganana ^{††} ipúnda ailá inji yákakandyenge munu, yani íkave yashilambo ashi, ¹² andiinjila Lyutu Lyakwilimyanga-uti kwamwanda umo tu bai i kwaindila yamyadi vyavambudi kwali vyavang'ombe kanji kwamyadi vyake jo mwene kutwala kuva likameko lyakwambola kúkamalilika. ¹³ Mwenu, pakuva tundi-manyanya kenga kunyunyangiligwa kwamyadi vyambudi, vyang'ombe na liu lyang'ombe namako kunkuvatadya vailimyangigwe vanu vambukishígwe ushapu kwakuushaniangigwa ushapu wamumili, ¹⁴ kushi napane myadi vimwe Klistu áukile ndalijaula jo mwene kwaindila ya Imumu ákamalilika pakave makosha kwaupande wa Nnungu, hayululika kutuushanianga vitendo vyakupela mmakumbukililo etu amuntima kwambangidya tuntumike Nnungu mumi?

¹⁵ Napavedoni, nae ni nkúdumangila waimbodi yaambi kwa avalá vashamégwa namu Nnungu pakulota vapate akulá kulivikila, yani maleko ákamalilika kwoda kupela kwake kundivaambola mumakosha avatandile mwimbodi itandi. ¹⁶ Mwaa papagwite malailililo amaleko, hanatumika akanapela aijá mwene nkúlaililila; ¹⁷ malailililo amaleko andatumika bai kukaumilila kupela kumwe aijá nkúlaililila mwaa hayulukika kutumika muwakati wanama mwene. ¹⁸ Ni ashi, ata yo imbodi itandi hayukile ndatunduvangilika kwabila kujaa myadi. ¹⁹ Mwaa Musha paukile ndamalila kuvavangangila venentete uti kula lilamulo, nae andítwala myadi vyavang'ombe na vyavambudi pamo na medi, pamba wanauvi na mishasha vyannandi wavashema ishoku kutwala kumyayangila lyo lyene libuku pamo na venentete uti aashidoni, ²⁰ "Avi ni myadi vyaimbodi, yo yakuvile Nnungu kwenu mwenu." ²¹ Yadavo momo paukile ndaalaliya yema na vyombo uti vyakulipudidya, andímyayangila myadi. ²² Doni, kwakwodananavo lilamulo na mpaka vinu uti vinkuushaniangigwa ushapu kwamyadi na kwabila kujaa myadi hakupali kulivalivigwa kwamadambi.

²³ Napavedoni indivaikila malodyo avinu vivéle kuwa auke akaushaniangigwe ushapu kwashitendo ashi kanji vinu viu vyakuwa vindaushaniangigwa ushapu kwavyadaka vyamana vyakupunda avi. ²⁴ Mwaa Klistu

[†] Kwali: a ...kutadya ave ashalowa-uti. ^{††} Kwali: a ...yamwiye-ma ing'umene na yashalowa-uti. [‡] Mushigalegu malove ala: a im-bodina a malailililo amalekoni limo lyolyo. ^{‡†} Lola Kuma 24:8.

hainjidile Lyutu Lyakwilimyanga-uti lyavakandyenge vanu lívele lilodyo vila lya alilá liu; nae andiinjila akulá kuwa kwene-kwene, nadoni ambi apa ankupagwa pamevo pake Nnungu yetu wetu. ²⁵ Kanji napane i pakulota atende alyumya jo mwene shadaka aujila-ujila kenga mwatandela nkúlangalalela-shadaka nkumene painjila Lyutu Lyakwilimyanga-uti kula mwaka kwamyadi vyajunji. ²⁶ Leka ívele yamyadi vyajunji, Klistu akandyuvavanga aujila-ujila kutunduvangila tangu pashikandyangigwe shilambo. Kanji napane pauwikidile popo wakati, nae andyumilila kwamwanda umo tu bai kwambangidya amalidye lidambi kwashadaka shalyumidye jo mwene. ²⁷ Kula munu andipangigwa kupela mwanda umo tu bai kutwala ling'oto lya apo, kupagwa muukumu. ²⁸ Nimumo momo Klistu andilyumya shadaka mwanda umo tu bai alitika madambi avanu voe na nae andauja mwanda wambili i kwalidambi kanji pakulota kuvaambola avalá vannindíla na mweshe.

Klistu ni shadaka shimo tu shangwengwe

¹⁰ Mwenu, lilamulo linkwidanavo shimbedi vila shavinu vyambone vilóta kwida i umwiu wavinu vyene. Nadoni lyanavo halyulula mwiko kwaindila yoyo yavyadaka vyujila-ujila mwaka kwamwaka kutadya kuvawisha popo [‡] avalá vammadíka. ² Leka lyúlwiile kuvawisha popo, da havanaleke yakumya vyadaka avyo? Mwaa vakulipudya avo pavakaushaniangigwe ushapu mwanda umo kwangwengwe, havanalyone kavili kuvanavo madambi. ³ Nadoni vyadaka avyo vinkwidanavo kumbukumbu yalidambi lyakula mwaka ⁴ mwaa hayululika myadi vyaing'ombe na vyaimbodi kuushanianga madambi.

⁵ Napavedoni Klistu paidile mushilambo amu atédoni,

"Shadaka na inudyo haulatile, ila mili uningukandyangidya;

⁶ vyadaka vyakutikinyuki-uti na vyadaka vyashimadambi, haupuwangidile.

⁷ Napane nangu kushidoni, 'Lola, nangu ngupali apa, ndida ndatandedya malotelo ako, wako Nnungu; kenga mwavandikidile mushidingo shalibuku kwamwaa wangu.'" ^{‡††}

⁸ Shitandi nae atédoni, "Vyadaka, dinudyo, vyadaka vyakutikinyuki-uti, dinudyo dyashimadambi haulatile na ata nkati mwake mo, haupuwangidile"; avi uti vishindajaulika kwodananavo lilamulo. ⁹ Kutwala kavili kushidoni, "Lola, nangu ngupali apa, ndida ndatandedya malotelo ako." Nae ankumalidya shitandi kutwala kuvika shambili. ¹⁰ Kwamwaa wamalotelo ala, tundyuka ndatandegwa vakwilimyanga kwaindila yashadaka shamili umwe Yesu Klistu ukile ndaumigwa kwamwanda umo tu bai.

¹¹ Liduva kwaliduva, kula nkúlangalalela-shadaka andáimila atumika mukumya vyadaka aujidya-ujidya

^{‡†} Kwali: a ...kuvatadya kuva vashalowa-uti. ^{‡††} Lola Dimu 40:6-8.

vyovyvo ngwengwe, vyo víkaulula kuushanianga madambi. ¹² Kanji napane Klistu pamalidile kumya shadaka shake kwangwengwe, shadaka shimo tu kwa-madambi, andiikala kunkanakono kwake Nnungu. ¹³ Kutunduvangila apo kuka mushu, nae ankulindila mpaka vammongo vake vavateke vavavike kumaulu kwake ¹⁴ mwaa kwaindila yashadaka shimo tu, nae an-divatadya vawikile popo ngwengwe ngwengwe † avalá vatandégwa kuva vakwilimyanga.

¹⁵ Namomo Imumu Wanashwe ankwing'a ushuda kwetu wetu, shitandi ankushidoni,

¹⁶ "Ai ni imbodi yangulota kupanga na vanavo ling'oto lyamaduva alo," atangola *UMU*.

"Ndavika malamulo angu mmitima vyave, na ndaandika muding'anong'ano dyave." ††

¹⁷ Kavili ankushidoni,

"Shimadambi na vitendo vyave vyaungave-lilamulo, hangukumbukila kavili." ‡

¹⁸ Mwenu, pakuva ambi apa kunkupagwa kulivalivigwa kwa avi, hashipali kavili shadaka kwalidambi.

Tummandike Nnungu kwantima wiu walikulupililo

¹⁹ Napavedoni manung'unumunu tunkuvanavo nti-ma shii wakwinjilila Lyutu Lyakwilimyanga-uti kwaindi-la yamyadi vimwe Yesu, ²⁰ indila yaambi na ingumi yatuungulidile nae apitila ailá inguvo, yani uve wo mili wake au. ²¹ Nadoni tunkuvanavo nkúlangalalela-shadaka nkumene ávenavo madalaka mwing'ande ya Nnungu. ²² Naivedoni, tuke tummandike Nnungu na ntima waumwiu mukwakikisha kwii kwalikulupililo mùvenavo mitima vyukíle ndanyunyangiligwa pakulota kutadya atakate makumbukililo akunyata amunti-ma na mili vyukíle ndaingigwa kwamedi ákave ushapu. ²³ Tukamulile na dimongo lilindilililo lyetu lyatulyaula kwabila kudumbadumba mwaa aijá álivikidile jo, nae ni wakukulupilika. ²⁴ Namomo tukumbukile namene mwashi mwakwimulanila kwalinagwaledyo na kutandedya matendo ambone. ²⁵ Hatunaleke kukadyanianga kulingana kenga mwavatandela vanji kanji indituvakila twing'ane ntima shii, kupunda namene po pamwona kuvandika Liduva apa.

²⁶ Mwenu, ikava kenga tundaoka mushu tutega namadi ling'oto lyakupata limanyilo lyaumwiu, manya kenga hashitandeka shadaka shinji kwashimadambi ²⁷ kanji ni kulindila ukumu yakujowa na moto utikinyúla ulóta kuvamalidya avalá vampínga. ²⁸ Aijá áiludyanga lilamulo lyake Musha ankupela kwabila shididi ukapagwa ushuda wavanu vavili kwali vatatu. ²⁹ Kushi aijá ánnivatanga Mwana wa Nnungu na jojo jo áiludyanga myadi vyaimbodi vimwilimyéngé nae na kuntukana Imumu waumonyo, da mwenu mwona dashi, muni ajo havaikidile kupata shaushanga shakumamodya? ³⁰ Mwaa tunimanya aijá atédoni, "Kulipilila ni kwangu nangu; nangu ndalipilila." †† Kutwala kavili kushidoni, " *UMU* andavaukumu venentete vake."

† Kwali: a ...nae andivatadya vave vashalowa-uti ngwengwe ngwengwe. †† *Lola Yelemya 31:33*. ‡ *Lola Yelemya 31:34*. ††† *Lola Kumbukumbu 32:35*.

³¹ Ni shinu shakujowa kugwela mmakono mwake Nnungu mumi!

³² Kanji napane kumbukila maduva matandi ling'oto lyakupata lilangadyo, mwenu mundilipililila ing'ondo ing'umene kwamauvilo, ³³ myanda vinji mutukanigwa na mutaigwa dyoni paumbala, myanda vinji muva mmakuliinjidyanga na vavenu vapáta mauvilo lolo.

³⁴ Mwenu mundilyunganianga na mauvilo avakungwa, namomo pamushipakanyalegwa vyenu mushindakubali kwalipuwilo mwaa mushindamanya kenga munkuvanavo mali amana ngwengwe.

³⁵ Napavedoni hamunaleke kuvanavo ntima shii mwaa mundapata inudyo yakwidapela. ³⁶ Shivaikidíle kwenu mwenu ni kulipililila ling'oto lyakutandedya malotelo ake Nnungu mundapata ashilá shalivikidile

³⁷ mwaa kenga indyandikigwa,

"Muwakati padyoko, aijá áida jo, andaída na ata hatimanga.

³⁸ Waishaliya andanama kwalikulupililo; ikava kenga nae andatila, ungumi wangu, haumpuwangila." †††

³⁹ Kanji napane wetu hatunava shinu vamushipinga sha avalá vatíla vauka kukubamalegwa kanji tunkupagwa mushipinga sha avalá vavénavo likulupililo vauka kukwambolegwa ungumi wave.

Kwaindila yalikulupililo

11 Mwenu, likulupililo ni kuvanavo wakikisho wavinu vilindililígwa, kukubali avilá víkaaneka.

² Mwaa kwaindila yalikulupililo, vanyakala vashindavaimyanga wambone.

³ Kwalikulupililo tunkumanya kenga kuwa na pai vindikandyangigwa kwaindila yalilove lyake Nnungu, nadoni vinu vyatwona avi havyalakadile muvinu vyanéka.

⁴ Kwalikulupililo Abeli andímuumidya Nnungu shadaka shambone-uti kuliko Kaimu. Kwalikulupililo lyake, Nnungu ashindamwimyanga kuva waishaliya paukile ndakubali dinudyo dyake. Nadoni ata ikava kenga andipela, kwaindila yalikulupililo nae mpaka ambi ankuratangola.

⁵ Kwalikulupililo Enoki andítanduligwa kwambangidya hanalinge kupela; haaneke kavili pakuva Nnungu aníntwala mwaa akanava kutanduligwa, vashindamwimyanga kenga Nnungu animpuwangila.

⁶ Mwenu, kwabila likulupililo hayululika Nnungu kupuwanga mwaa aijá álota ammandike nae, inimmaikila akulupile kenga Nnungu jo apali na ankuvatudya avalá vannambéla.

⁷ Kwalikulupililo Noe pavammanyiidye kaladavo avilá vilóta kutandeka pakuva jojo jo ashinanjopa Nnungu, nae andíkandyanga ingalava yakulota kwambola likola lyake. Nadoni andyúkumu shilambo na kutandegwa kuva nkúpata-maleko aishaliya kwaindila yalikulupililo.

⁸ Kwalikulupililo Abulaamu andígwilila paukile ndashamegwa kuka kulyutu lyaukile ndalivikila Nnun-

†† *Lola Kumbukumbu 32:36; Dimu 50:4; 135:14*. ††† *Lola Abakuki 2:3-4*.

gu kumupa kenga maleko pakamanya kwashi kwashuka. ⁹ Kwalikulupililo, andyámila mushilambo shashijeni ashilá shalivikidile Nnungu anama muyema kenga mwanamidile Ishaki namu Yakobo vakupata pamo maleko lolo akulivikila. ¹⁰ Mwaa nae ashindalindila njini úvenavo shitunduvangilo shakunanopa, aulá wakuvenge jo mwene Nnungu na kudenga jo mwene.

¹¹ Namomo kwalikulupililo jo mwene Shalaa andípa-ta dimongo dyakwimitila shitumbo ata ikava kenga ulinga unimpuda mwaa anímwamini kuva wakukulupilika aijá álivikidile. ¹² Napavedoni kutunduvangila kwamunu aju jumo, jo avéle kenga andipela, undyumilila udukulu makumi manga kenga dinondo dyakuwa na úkaululika kuvalangika kenga dimbwe dyamwimanga.

¹³ Uti ava vandipela mulikulupililo kwabila kupata ashilá shavalivikidile kwavanavo. Kwakushu vandyóna kutwala kupuwangila valimanya kenga vâkwaloka na vâkupita mushilambo amu. ¹⁴ Mwenu, vatangola doni, vovo vo vankulilodya ngala kenga vankulambela shilambo shave. ¹⁵ Namomo leka vâkumbukidile shilambo ashilá shavalakadile, litala lyakuujila kwanavo lindípagwa. ¹⁶ Kanji leka apo, vanavo vashindalikanyalidya vapate shilambo shamana yani shilambo shakuwa. Napavedoni Nnungu hanona dyoni pashamegwa kuva Nnungu wave mwaa jo mwene andivakandyangidya aulá njini.

¹⁷ Kwalikulupililo Abulaamu paukile ndalingigwa, nae andímumya shadaka mwanamunu Ishaki; aijá ápatile vyakulivikila, nae avele tayali kumumya shadaka mwana jo jumo jo, ¹⁸ jojo aijá wamwaulidile Nnungu doni, "Udukulu wako wako ulota kwalakela kumwe Ishaki." ¹⁹ Abulaamu andíkulpila kenga Nnungu ata mpaka andyulula kuvadyuwa vakupela, tukalingananga doni Abulaamu anímpata kavili mwanagwe kwalakela pakati pavakupela.

²⁰ Kwalikulupililo Ishaki andímwalaliya Yakobo namu Ishau kwambangidya vapate kwalaligwa kulóta kwida ling'oto.

²¹ Kwalikulupililo Yakobo pavandikenge na kupela, nae andímwalaliya kula mwana umwe Yoshe alipudya kumwe Nnungu akuno àijamidile ipimbo yake.

²² Kwalikulupililo Yoshe kumwisho shingumi shake, andívakumbuwanga kuma kwavanaishilaeli mushilambo sha Mishili na kuvalakela malailililo kwamwaa wamagwangwa ake. ††

²³ Kwalikulupililo Musha kuvalekwa kwene vatatawake vaníntwala nampiya kwamuda wamyedi mitatu mwaa vandímwona mwana ajo kuva wamana namene na ata havajopíle lilamulo limwe umu.

²⁴ Kwalikulupililo Musha pakulumwike, nae andíta yakushamegwa kuva mwana wamwanagwe Palao ²⁵ mwaa nae andítandola kuvauvanga pamo na venentete vake Nnungu kuliko kunagwaledya lipuwilo lya-madambi lipita. ²⁶ Andívalangilila kutukanigwa kwamwaa umwe Klistu kuva utajili ukumene kuliko vidimbi vya ku Mishili mwaa ashindona inudyo yalota kupata ling'oto. ²⁷ Kwalikulupililo andyúma mushilam-

bo sha ku Mishili kwabila kujopa shitundi shimwe umu mwaa andínanopa kenga ángwene aijá ákaaneka.

²⁸ Kwalikulupililo andítenda shikukulu sha Pasaka na kumyajanga myadi kwambangidya aijá Nkúmalidya hanavadabunye vana vatandi kuvalekwa vavanaishilaeli.

²⁹ Kwalikulupililo vanaishilaeli vandyamboka mwimanga Yanauvi kenga paikavéle muulongo waku-juma; pavalingangidile vamishili kutandela momo, vandímiligwa uti.

³⁰ Kwalikulupililo mangongo a ku Yeliko andígwanga ling'oto lyavanaishilaeli kutang'anedyá kwamuda wamaduva saba.

³¹ Kwalikulupililo Laabe aijá lilaja, haukíle ndapela pamo namu avalá vákaigwilidile mwaa andívakalibisha kwaamani avalá vakupalalesha.

³² Napanelo ngutangole nyamani kavili, wakati huanatosha shinu wakuvalanganga vimwe Gidioni, Balaki, Samisoni, Yepeta, Daudi, Samuwele pamo na vakulava; ³³ kwaindila yalikulupililo vanavo vandíteka vilambo vyavaumu, vandítandedya ishaliya, vandípata kulivikila, vandyúnga dikanywa dyavantumi, ³⁴ vandídima dimongo dyamalamba amoto, vandípalanyoka muuju walyambila; vandídabadabanga kanji vandípata dimongo, vandítandegwa kuva vadimongo kuding'ondo kutwala kuvavingilidyanga vaing'ondo vakwaloka.

³⁵ Vakongwe vanji vandívauidya vakupela vave kwaindila yakudyuka. Vanji vandívauidya vanji vandíta kuunguligwa pakulota vapate kudyuka shii.

³⁶ Vanji vo, vashindaliuligwa na kushapigwa viboko, vanji kavili vandívaunga mang'nyang'unya na kuva-jela mudikalaboshi ³⁷ vaamangigwa majanga, vavaluligwa na nshumeno na vabyaigwa kwamaambila. Vashindawanawananga vâgwalenge magwogwe avangandolo na avambudi, vavele vanu vâkave pashinu, vashindavauvauvyanga na kutandegwa kunyata; ³⁸ vovo vo kupagwa na shilambo havavaikidíle mwaa vavele vambone namene! Vashindadumbadumba kushimbweshe na kumashinga vanama ndimbanda dyamajanga na mmitupa.

³⁹ Napavedoni, ata ikava kenga vanavo uti vashindavaimyanga wambone kwaindila yalikulupililo, hapali ata jumo pakati pave ápatile ashilá shakulivikila

⁴⁰ mwaa Nnungu andivika nnugu wamana kwetu wetu pakulota vanavo pamo namu wetu, tuwikile popo. †

Yesu ni nkútunduvanga na nkúwisha popo

12 Napavedoni, pakuva nawetu momo inditung'anedyá imbumba ing'umene yamashuda ava, indituvaičila tulyulange uti vitudingadínga na lidambi litudingíla pakulota tutukute kwakulipililila kwamwaa wa alalá mashindano avikígwe mushu mwetu ² tunnola Yesu mwene nkútunduvanga na nkúwisha popo walikulupililo lyetu. Nae kwamwaa walipuwilo livikígwe mushu mwake, andilipililila panshalaba ailudyanga dyoni na andiikala kunkanakono pashiteng'u shake Nnungu. ³ Mmikile namene kunti-

† Lola Kutunduvanga 21:12. †† Lola Kutunduvanga 15:13-14.

‡ Kwali: a ...tuve tuvashalowa-uti.

ma aijá álipililidile kupingigwa kukumene kwavakute-ga kwamwaa wake jo mwene pakulota mwenu hamu-nadobe na ata hamunapungukigwe dimongo. ⁴ Muku-tenda ing'ondo lidambi, mwenu hamunava kupinga ata mpaka kuwikila shilinga shakujaa myadi.

Ling'oto lyakuduma vida vyepo vyaishaliya

⁵ Da mwenu mundilivaliva akulá kulaililila kwan-tanana mwenu kenga mmanavake?

“Mwanangu, haunailudyange kuduma kumwe *UMU* na ata haunapungukigwe dimongo muwakati wakushashulanga.

⁶ Mwaa *UMU* ankunduma aijá wannagwaledya na ankumupa shaushanga kula munu wamp-washalela kenga mwanamunu.” [†]

⁷ Lipililile mauvilo enu kenga kudumigwa mwaa Nnungu ankuntanana kenga mmanavake. Da mwana shani ákapata shaushanga kwatatumunu? ⁸ Ikava ken-ga mwenu hamunapata shinu shaushanga na shaushanga ashii vankuliinjidyanga vana uti, bai mwenu hamunava shinu mmanavake ila mmana mmakukanigwa. ⁹ Leka apo, wetu tundivanavo vatatavetu vatuvaléke kwashimunumunu váshitudu-ma na wetu tushindavaishimu. Da haivaikidile kulivika poe namene mwina mwatatagwetu waungumi paku-lota tuname? ¹⁰ Vatatavetu vashindatuduma muwakati ungwipi kwodananavo amulá mwavashoonela vene kuva mwambone kanji Nnungu ankutuduma kwauwambone wetu kwambangidya tukalyungani-ange mukwilimyanga kwake. ¹¹ Kuduma uti haku-nanagwaleka pavaduma ila shiva shipalodi kanji na-pane ling'oto lyakuduma, vipatikananga vyepo vyaishaliya na amani kwa avalá vaukíle ndalinguligwa.

¹² Napavedoni nonowanga makono adabadabéngé na malundi adidiméngé. ¹³ Kandyanga dindila dive dyashalowa kwamadodo enu kwambangidya dashi, aijá wakukudaila hanamamodye kanji apone.

Shijaidyo shakulinyemya muumonyo wa Nnungu

¹⁴ Likanyalidye pakulota muname nkati mu amani kwavanu uti na mukwilimyanga. Kwabila kupagwa mukwilimyanga, hapali álota kumwona *UMU*.

¹⁵ Lishunge, hanapagwe wakulota kulinyemya muumonyo wake Nnungu; halunapagwe lushija lwakukalala ^{††} lwakwipuka pakati penu kutwala ku-tadya kumwangaishanga na kwambukishigwa vanu voe, ¹⁶ hanapagwe munu pakati penu wakulauka kwali wadyeluelu álinganana kenga Ishau áshulushidye shi-nang'olo shake shakuva nae mwana ntandi kwan-damu umo washakulya. ¹⁷ Mwenu mundimanya do, ling'oto lyaukile ndalota apate kavili kwalaligwa kwashinang'olo shake, vanimwitila na halimpag-wididye kavili litala lyakulijugulangila ata ikava kenga nae ashindalambela kwalaligwa ako alila.

[†] *Lola Dimu 94:12; 119:67; Mikong'o 3:11-12.* ^{††} *Lola Kumbukumbu 29:18.*

Tundipata utawala úkandangandegwa

¹⁸ Napanelo mwenu hamuwikile ata padyoko vela pavinu vye vivaikidíle kudabunya: moto ukaléla na ata pashii, na ata kudimba, na ata shimbunga, ¹⁹ lidi lyali-palapanda na lidi lyamalove atadídye vaigwíte vo va-jugwe doni, hatutamwa kwigwa kavili ²⁰ mwaa havaulwíle kulipililila lilmulo likuvíke, “Ata mpaka nkoko álota kudabunya lishinga alyo, andaamangigwa majanga.” ^{‡21} Shitendo ashii shindyáneka kuva shaku-jowa ata mpaka Musha atédoni, “Ninkujopa na ninku-tatamela.” ^{‡†}

²² Kanji napane mwenu mundiwika palishinga Iya Shiyau, ku Yelusalemu yakuwa njini wake Nnungu mu-mi, kwavanjelo makumi manga pankodyanio walipuwilo, ²³ kuliganisha lyavana vatandi kuvalekwa, vo vaandikígwe mena ave kuwa; mundiwika kwake Nnungu nkúukumu wavanu uti, kudimumu dyavanu vaishaliya ditandégwe kuwikila popo, ^{‡‡24} mundiwika kumwe Yesu nkúdumangila waimbodi yaambi na mya-di vyake vyamyajangidile, vitangóla shana kuliko mya-di vimwe Abeli.

²⁵ Lilaledye! Hamunamwite aijá átangola. Ikava ken-ga avalá vamwitíle aijá áshivaduma mushilambo amu havananwile, kushi wetu túmwambukanga aijá átuduma kwalakela kuwa? ²⁶ Aijá átatidye wakati aulá lidi lyake lindungandeye shilambo ambi ankulivikila aashidoni, “Ndandangandeya mwanda unji kavili shil-ambo shapai kanji mwanda awo i gweka shilambo shapai kanji namomo na shakuwa.” ^{‡‡‡27} Malove ala “Mwanda unji kavili” inkulilodya kenga vinu vindan-dandangandegwa yani, vyumbígwe uti vindatimbikanga kwambangidya dashi, avilá víkandangandegwa vipag-we.

²⁸ Napavedoni pakuva tunkupata utawala úkaululika kundandangandegwa, indituvaikila tulambwalele ^{‡‡} na tulipudye kwake Nnungu kwainamuna innagwéla, kwaishima na kwakunjopa ²⁹ mwaa “Nnungu wetu ni moto utikinyúla.” [§]

Shadaka shinnagwéla Nnungu

13 Wena mushu munagwaladyania shin-ung'unumunu. ² Hamunaleke yakuvatanana va-jeni mwaa kwakutenda davo vanji kwabila kumanya vandivatanana vanjelo. ³ Vakumbukile avalá vaung-widye kenga muungwidye pamo namu vanavo; namo-mo avalá vauvauvánga kwabila shaliya vakumbukile kenga mwenu momo mmamili. ⁴ Shitamo shindivaikila shishimike na vanu uti, aki yake itandeke kwaungave-udagwa mwaa Nnungu andavaukumu avalá vakulauka na vakulavalava. ⁵ Shinamidyo shenu hashinave shakunagwaledya njulukulu ila puwangila ashilá shamu-venavo mwaa jo mwene Nnungu ankushidoni, “Mwiko

[‡] *Lola Kuma 19:12-13.* ^{‡†} *Lola Kuma 19:16; Kumbukumbu 9:19.* ^{‡‡} *Kwali: a ...ditandégwe kuva dyashalowa-uti.* ^{‡‡†} *Lola Agai 2:6.* ^{‡‡‡} *Kwali: a ...indituvaikila tukamulile umonyo.* [§] *Lola Kumbukumbu 4:24.*

handikuleka, mwiko handikwambukanga.”¹⁶ Nadoni tunkuulula kutangola kwantima shii,

“ *UMU* ni lipwashalelo lyangu,

hangujopa;

shakwashi shavalota kungutenda vanu?”^{††}

⁷ Vakumbukile vananangalaledi venu vammalangangidíle lilove Iya Nnungu, mulaledya namene shana vyepo vyashinamidyo shave mutwale mujedye likulupililo lyave.

⁸ Yesu Klistu ni jojo, lido, nelo na ngwengwe. ⁹ Hamu-naleke mutwaligwa mumapundisho oeo ashijeni mwaa shambone mitima vyetu kunonowangika muumonyo i kwavyakulya víkavaalalidye avalá vaalíle.

¹⁰ Tunkuvanavo alutali lwetu, alutali alwo vatumika muyema ailá, havave aki yakulya vinu vivé mwanavo.

¹¹ Nkúlangalalela-shadaka nkumene andátwala myadi vyavanyama kuukanavo mulyutu Lyakwilimyanga-uti ndatenda shadaka kwashimadambi kanji mili vyo, aukanavo panda likambi ndatikinyuligwa kwamoto.

¹² Nadoni Yesu momo andyuvauvanga panda likaja pakulota kuvatadya venentete vave vakwilimyanga kwaindila yamyadi vyake jo mwene. ¹³ Napavedoni, le-ka tumuukile po panda likambi po, tulipililila dyoni dyake dyalipililidile nae. ¹⁴ Mwaa mushilambo amu, hatuvenavo njini wamaduva oe kanji tunkulindila njini aulá ulóta kwida.

¹⁵ Nadoni kwaindila imwe Yesu tumuumidye ngwengwe Nnungu shadaka shakuntumbyanga vivele vyepo vyadindomo divalangánga lina lyake. ¹⁶ Hamu-nalivalive kutandedya wambone na yakumajananga na vanji avilá vyamuvenavo mwaa kwavyadaka kenga avi, Nnungu inkunnagwela.

¹⁷ Vaigwilile vananangalaledi venu, namomo livike mwina mwave mwaa vanavo ni vashúnga ungumi

† *Lola Kumbukumbu 31:6.* †† *Lola Dimu 118:6.*

wenu kenga vanu valóta kujang'ulanga pamevo pake Nnungu. Vaigwilile kwambangidya shimadengo shave shive shalipuwilo i kwakung'ung'ulanga mwaa ikava davo, haipagwa paida kwenu.

¹⁸ Tushwalidya wetu, tunkwakikisha kenga tundi-vanavo makumbukililo ambone amuntima tulota tulilangalalele mwishima nkati muvinu uti. ¹⁹ Ninkunjugwa namene mutujugwangile pakulota nangu nguujile shipajelo kwenu mwenu.

Kujugwangila kwalaligwa

²⁰ Mwenu, Nnungu waamani anindyuwa Yesu pakati pavakupela, *UMU* wetu, Nkúshunga nkumene wavangandolo kwaindila yamyadi vyaimbodi ikamalilika,

²¹ nae ampanganiange kwakula shinu shambone pakulota mutandedye malotelo ake na atandedya nkati mwenu ashilá shinnagwéla pamevo pake kwaindila imwe Yesu Klistu, kwake nae lipagwe lis-hangelo ngwengwe ngwengwe! Ame.

Nandele wamwisho

²² Mmanung'unumunu, ninkunjugwangila mulipililile malove angu aninnaililila; kwakutangola mwiu avilá vyanimwandikidile vyo, vive padyoko.

²³ Ninkulota nimmanyiye doni, nung'unumunu Timoti tayali vanimuungula nkalaboshi. Ikava kenga nae andawikinneu apa, nangu ndaida kwenu nannola pamo namu nae.

²⁴ Vape nandele vananangalaledi venu uti pamo na vakwilimyanga uti; va ku Italiya, vanavo vankuntumidya nandele.

²⁵ Umonyonyo upagwe namu mwenu uti.

Tiyagu

Nandele

1 Nangu Tiyagu ntumwa wake Nnungu na umwe *UMU* Yesu Klistu, ninkuntumidya nandele vampate makola kumi na mbili amwadilikanéngé muvilambo uti.

Malingo ampata ona kuva uti lipuwilo

² Mmanung'unumunu, muwakati wamupata malingo akula inamuna ona uti kuva uti lipuwilo ³ mwaa mundimanya kenga kulingigwa kwalikulupililo lyenu kunkwidanavo kulipililila. ⁴ Nadoni leka kulipililila kuvenavo shimadengo shakuwikila popo kwambangidya mwenu muve mmashalowa-uti [†] na mmakulinganana kwabila kumwova shoeshoe. ⁵ Ikava kenga munu pakati penu linkumwova limanyilo, anjugwe Nnungu ávapa vanu uti kwabila shinyadinyadi na ákashulanga; namomo nae andamupa. ⁶ Anjugwe nae kanji kwalikulupililo kwabila kwambambidya mwaa aijá áambambidya jo, ankuva kenga liwimbi lyamwimanga línatwaligwa na kugang'alegwa kwaimepo. ⁷ Munu ajo hanakumbukile kenga andapata shinu shoeshoe kumwe *UMU*⁸ mwaa ankuvanavo makumbukililo auju kuvili na ákananopa nkati mushinamidyo shake.

⁹ Nung'unumunu wakwiludyangika inimmaikila alyumye shumbi mukukwela kwake ¹⁰ kanji napane ntajili inimmaikila alyumye shumbi mukushuluka kwake mwaa nae andapita kenga induva yamumwitu; ¹¹ liduva lindáuma, palinavala namene po, maukutu andajuma kutwala dinduva kupakatika na kwalala kwake ko, kutimbikanga. Nimumo momo ntajili andatimbikanga pakati pashimadengo shake.

¹² Andyalaligwa munu álipililila nkati mmalingo mwaa ling'oto lyakukubaligwa, andapata lidaka lyashingumi lyalivikidile Nnungu kwa avalá vannagwalédya.

¹³ Hanapagwe waktubigwa kutwa kushidoni, "Nnungu ankungutubya." Mwaa Nnungu hanatubigwa na vinu vyakunyata na ata jo mwene Nnungu hapali wantubya. ¹⁴ Kanji kula munu ankutubigwa kwamwaa wamalotelo ake jo mwene na ni lolo anshómba na ambulúsha. ¹⁵ Napanelo malotelo ala akaimita livalekwa lidambi kutwala lidambi palikumumuka po, limmaleka kupela.

¹⁶ Mmanung'unumunu mmakunagwaleka, hamunaduwigike; ¹⁷ kula inudyo yambone na kula shajo uti shakulinganana vinkwalakela kumwe Atata mwene

[†] Kwali: a mmakukamala.

vinu vyakuvala vyakuwa, jojo ákaangaikanga kenga shimbedi na ata ákajalukanga. ¹⁸ Kwamalotelo ake jo mwene, nae andituvaleka kwaindila yalilove lyake lyaumwiu kwambangidya tuve kenga vyepo vitandi muviumbe vyake.

Ava mmakutandedya lilove

¹⁹ Mmanung'unumunu mmakunagwaleka, manya vinu avi: kula munu inimmaikila apajeke kwigwa kanji akakove kutangola na akakove kushimwa ²⁰ mwaa shitungu shamunu hashinaidano shinu ishaliya yake Nnungu. ²¹ Napavedoni, jaa kushu ko ushapu uti na mavalelo akunyata alinatéla na pwashalela lilove lipandigwe nkati mwenu kwabila makukulu, lyolyo livénavo dimongo lyakwambola ungumi wenu.

²² Ava mmanu mmakutandedya alilá lilove, hamunave mmakwigwa vila muliduwanga mwemwe mmene. ²³ Aijá áigwa lilove kutwala mene kutandedya, ankulinganana na munu álilola ing'ope yake mushilolo; ²⁴ nadoni ling'oto lyakulilola, pauma apo kutwala kulivalivinne mwashi mwavalalele. ²⁵ Kanji napane álaledya shana lilamulo lyashalowa-uti líidanavo unaiti, jo ánanopa na ákalivaliva ashilá shaigwite ila atandedya, ajo andaalaligwa kwa ashilá shatenda.

²⁶ Ikava kenga munu ankulyona kuva munu waidini kanji hanatawala shinu lulimi lwake, ankuliduwanga jo mwene muntima mwake, idini yake yo, yabule. ²⁷ Idini yaungave-ushapu na yaungave-udagwa pamevo pake Nnungu Atata ni ai: kuvalola vananshiva na vanamwili nkati mumashida avo, namomo kulishunga gwegwe umwene pakulota shilambo hashinakupake lilemba.

Kumpambula munu ni lidambi

2 Mmanung'unumunu, pakuva munkuvanavo likulupililo kumwe Yesu Klistu *UMU* wetu walis-hangelo, hamunampambule munu. ² Tuke tulole: nkati mumikodyanio vyenu ainjila munu ágwete myala vyake dipete dyashaabu, namomo ágwenge dinguvo dyakuvailanga kutwala yadavo kwinjila munu mmashikini ágwete dinguvo dyakunyambikanga ³ kutwala mwenu kuntanana ágwete dinguvo dyakuvailanga kumwaulila kushidoni, "Ikala apa palyutu lyambone," namomo kumwaulila aijá mmashikini doni, "Imila akulá" kwali "ikala pai panguvikile madodo angu," ⁴ da davo po, hamunalipambulanianga shinu mwemwe mmene mulitenda kuva vakuukumu kwamakumbukililo akunyata?

⁵ Igwa mmanung'unumunu mmakunagwaleka, da Nnungu havatandwele vamashikini pamevo pavanu vamushilambo pakulota vave matajili nkati mulikulupililo na vapate maleko autawala walivikidile nae kwa avalá vannagwalédyá? ⁶ Kanji mwenu munkumwiludyanga mmashikini. Da havanava shinu matajili vannivatíla na kumbulusha vamuukanavo kulibengi? ⁷ Da i vanavo vakupúlu lina lyambone lyavampele mwenu?

⁸ Ikava kenga mwenu mwiu munkutandedya lilamulo lyashiumu litangaléka mumaandiko liishidoni, "Nnagwaledye mujo kenga mo mwaulinagwaladyedya umwene," † davo po, munkutenda shana. ⁹ Kanji mukavapambula vanu, munkutenda lidambi na munkuukumigwa tayali mulilamulo kenga mmanu múpujungula. ¹⁰ Mwaa aijá áigwilila lilamulo uti kutwala mo nkati mo kulikuvala lilamulo limo, ajo ankuva wamakosha auti. ¹¹ Ivedoni, aijá átangwele doni, "Haunalavalave," †† namomo anditangola doni, "Haunabyae." ‡ Ikava kenga mwenu hamunalavalava shinu kanji munkubyaa, bai munkupujungula lilamulo.

¹² Tangola kenga na tandedya kenga mmanu múlota kuukumigwa kwalilamulo lyaunaiti; ¹³ ukumu haivanavo shinu shididi kwa avalá vákalodidye shididi. Shididi shindatema paukumu.

Likulupililo bila vitendo lindipela

¹⁴ Mmanung'unumunu, inkupagwa paida shani munu kutangola doni, "Ninkuvanavo likulupililo," ikava kenga havenavo vitendo? Da likulupililo alyo linkuulula kumwambola nae? ¹⁵ Ikava kenga nung'unumunu nnume kwali nkongwe ankuvanavo wou na kumwova shakulya shakula liduva ¹⁶ kutwala munu jumo pakati penu kumwaulila doni, "Wena kwaamani, kapate ntukuta na kalye wikute," kanji kwabila mwenu kumupa nae vinu vitakígwa pamili pake, inkupagwa paida shani? ¹⁷ Nimumo momo likulupililo gweka yake likanavanavo vitendo, lyo lyene lindipela.

¹⁸ Inkulukika munu kushidoni, "Wako unkuvanavo likulupililo, nangu ninkuvanavo vitendo." Ngulodya likulupililo lyako líkavele vitendo nangu ndakulodya likulupililo lyangu kwaindila yavitendo. ¹⁹ Wako unkuulupila kenga ankupagwa Nnungu jumo? Unkuten-da shana! Ata vo vandamoni vo, vankukulupila shinu asho na vankutatamela.

²⁰ Unjinga gwe! Da valota vakulodye kenga likulupililo bila vitendo, halive mana? ²¹ Tatagwetu Abulaamu ashindalota amumye shadaka mwanamunu Ishaki pashanya alutali; da hapatile ishaliya kwaindila yavitendo vyake? ²² Unkwona, likulupililo pamo na vitendo vyake vindikola shimadengo pamo, namomo kwaindila yavitendo likulupililo lindíwikila popo. ²³ Nadoni andi wikila popo Maandiko atédoni, "Abulaa mu aninkulupila Nnungu, likulupililo lyolyo, *UMU* jo animmalangilila Abulaamu kuva ishaliya;" †† nadoni nae

† *Lola Valawi 19:18.* †† *Lola Kuma 20:14; Kumbukumbu 5:18.* ‡ *Lola Kuma 20:13; Kumbukumbu 5:17.* †† *Lola Kutunduvanga 15:6.*

andishamegwa kuva mbwadigwe Nnungu.

²⁴ Munkwona, munu ankupata ishaliya kwaindila yavitendo i gweka kwaindila yalikulupililo.

²⁵ Kenga mo mwaivalalele kumwe Laabe nkongwe lilaja áukile ndavapwashalela vakupalalesha kutwala kuvaumidya indila inji, da hapatile ishaliya kwaindila yavitendo vyake? ²⁶ Nadoni mili kwabila imumu undipela, namomo likulupililo kwabila vitendo, lindipela.

Hapali áulula kutawala lulimi

3 Mmanung'unumunu, pakati penu mmoe hamu-nave mmamwalimu mwaa mwenu mundimanya kenga wetu túpundisha po, tundaukumigwa poe.

² Kwakutangola mwiu wetu uti tunkulikuvala mudinamuna dyoe. Ikava kenga munu hanalikuvala shinu kwashitangodi, munu ajo ankuva washalowa-uti, namomo ankuulula kutawala mili wake uti.

³ Patunavaunga dimbuu vakavala ndikanywa mwave tulota vanavo vatwigwilile, tunkuvalangalalela momo mili vyave uti. ⁴ Namomo lola mpano wadimeli, ata ikava kenga dyanavo ding'umene na kugang'alegwa na imepo ing'umene, dindalangalalegwa na ing'wau idikidiki namene ilodya kwoekwoe kwodananavo malotelo mwalota kwamulila nkútukusha. ⁵ Nimumo momo lulimi ni imbandi idikidiki yamumili kanji inkulitamangila vinu vikumene. Lola mwitu ukumene ún-dakalela kwayee idikidiki tu, yamoto. ⁶ Nadoni lulimi yadavo ni moto na lilangalanga lyaungave-shaliya. Lwanavo lunkuvanavo lyutu lyake pakati padimbandi dyamili vyetu, lunkumwambukisha mili uti, lunkukaledya shingumi uti; lwo lwene lwo lundikalela moto walakéla kushena.

⁷ Mwenu, munu ankutawala namomo anditawala ku-la likola lyavanyama uti, vyuni, vakoko vakulyuta na vi-umbi uti vyamwimanga; ⁸ kanji napane hapali munu áulula kutawala lulimi. Lwanavo ni ukalau úkaululika kutawaligwa, lundyumbala ishumu ibyáa.

⁹ Na lwo lulimi alu tunkuntumbyangidya *UMU* Atata, namomo na lwo lulimi tunkuvataa dilana vanu vakandyangígwe kwaing'ope yake jo mwene Nnungu.

¹⁰ Kwalaliya na dilana dinkuma mo nkanywa. Mmanung'unumunu, hainave davo! ¹¹ Da inkuululika muto umo wowo kuma medi akunogwa na medi akulalama?

¹² Mmanung'unumunu, inkuululika mwembe kutwala kupa malalange kwali mpapaja kupa membe? Nimumo momo muto wamedi akulalama hayululika kuma medi akunogwa.

Limanyilo lyakwalakela kuwa

¹³ Wakwashi pakati penu walimanyilo na avénavo ding'ano? Bai alodye vitendo vyake kwaindila yamavalelo ake ambone atandeka kwabila makukulu nkati mulimanyilo. ¹⁴ Kanji ikava kenga mmitima myenu munkuvanavo ing'ou yakujowa na malotelo augweka, hanapagwe wakulitamanga na ata hamunalishang'apile umwiu. ¹⁵ Shinamidyo ashi hashinalan-

galalegwa shinu na limanyilo lyakwalakela kuwa ila ni lyashilambo sho shapai ashi, lyashivalakwelo na lyashindamoni. ¹⁶ Mwaa paipagwite ing'ou na malotelo augweka, apo pankupagwa ungaigwania na dinamuna uti dyavitendo vyakunyata.

¹⁷ Kanji napane limanyilo lyalakéla kuwa, lyanavo shi-tandi halive ushapu; ling'oto kuva lyamani, kulimaladya, kwigwilila, kuumbaligwanavo shididi na vyepo vyambone, líkamwapula munu na líkave shinankulaba. ¹⁸ Vo vaidanavo amani vo, vankupanda imbeju yaamani na vankupata mapuno aishaliya.

Umbodi na shilambo ni umongo namu Nnungu

4 Ding'ondo na kupwatananga vipagwíte pakati penu po, vyalakela kwashi? Da havinaalakela shinu nkati muditamaa dyenu adilá dyakunyata ditandána ing'ondo nkati mwenu mo? ² Mwenu munkung'unuka, napane kwoda hamunapata shinu, munkubyaa. Munkuvanavo ing'ou kanji kwoda hamunaulula shinu kupata ashilá shamulota, ni ashi shampwatana na kutandana ing'ondo. Hashipali shamuvनावo mwaa hamunajugwa shinu. ³ Pamujugwa, hamunapata shinu mwaa munkujugwa kwamalotelo akunyata kwambangidya mujaange muditamaa dyenu.

⁴ Mmakulavalava! Da hamunamanya shinu kenga kupangana imbodi na shilambo ni umongo namu Nnungu? Álota ave mbwadimunu washilambo, nae ankulitenda kuva mmongo wake Nnungu. ⁵ Kwali munkwona kenga Maandiko àtangaleke monyo patédoni, Imumu wantadidye nae apagwe nkati mwetu ankuvanavo mweshe waliloko? ^{†6} Ila nae ankutum-badya umonyo namene kenga mwatangalela Maandiko, "Nnungu ankuvapinga vakulyona kanji ankuvapa umonyo avalá valishapéya." ^{††}

⁷ Napavedoni mwishimu Nnungu. Mwrite Ndamoni nae po, anantukuta; ⁸ mmandike Nnungu, nanae momo anammandika! Tadya makono enu atakate mwenu mmakutega, mwemwe múvenavo makumbukililo auju kuvili, ushanianga ushapu mmitima vyenu. ⁹ Avanavo shipalodi, tangadikanga na lila, kweka kwenu kujalukange kuve kutangadikanga na lipuwilo lyenu lijalukange shive shipalodi. ¹⁰ Lishapeye pamevo pake *UMU* na jojo jo, anantumbudya.

¹¹ Mmanung'unumunu, hamunatangalane kunyata. Aijá ántangola kunyata nung'unumunu kwali ámuukumu nung'unumunu, ankutangola kunyata lilamulo na ankuukumu. Wako paukumu lilamulo po, haunatandedyá shinu ila unkulivika kuwa unkuukumu.

¹² Nkúumya-lilamulo na nkúukumu nae ni jumo tu bai aijá áulula kwambola na kubamola. Kanji napane wako po unyani úmuukumu mujo?

Kulitamanga kwamwaa waliduva lyalunduno

¹³ Napanelo igwa mwenu múushidoni, "Nelo kwali lunduno tundauka kunjini au kwali njini aulá ndaikala

† Kwali: a Nae ankuvanavo mweshe waliloko kwaimumu yata-didye ipagwe nkati mwetu. Kwali: a Imumu yavikile nae nkati mwetu ankuvanavo mweshe waliloko. †† Lola Mikong'o 3:34.

mwaka umo, ako tundatenda nshulusho kutwala kupata njuluku." ¹⁴ Mwemwe mmene mukamanyite ashilá shilóta kutandeka lunduno. Shingumi shenu ni nyamani? Mwenu munkuva kenga itabwe yumilíla wakati padyoko, kukungulukinneu. ¹⁵ Kudyanga kutangola doni, " *UMU* akalota tundanama na tundatenda ashi kwali ashilá." ¹⁶ Kanji napane mwenu munkulitamanga nkati mukulyona kwenu; kulitamanga aku, kundinyata. ¹⁷ Bai aijá ámanyite wambone kutwala mene kutenda, kwake nae jo ni lidambi.

Malailililo kwamatajili

5 Napanelo igwa mwenu mmatajili! Lila na tangadikanga kwamwaa wamauvilo álóta kumwidila. ² Mali enu andyunda na dinguvo dyenu dindimanegwa na vamalapende. ³ Shaabu na lyava lyenu vindishuja. Kushuja koko ko, kundaumya ushuda ummalanganga mwenu na kundalya mili vyenu na moto. Mwenu mundilikungailila mali mumaduva ala amwisho. ⁴ Lola, nshala wavamadengo vapuníle mmashamba enu, mwenu mundivakililisha, wanavo unkulamadikanga. Kutangadikanga kwavakupuna, kwanavo kundiigwinika kumatu kumwe *UMU* Wavaing'ondo. ⁵ Mwenu mushilambo amu mundinama shinamidyo shíkave lyuduku na shakulitumbyanga, namomo mundilinyateya mitima vyenu mumaduva akushindanga. ^{†6} Mundimuukumu na kummyaa munu waishaliya, nae mene kupinga.

Kulipililila nkati mumauvilo

⁷ Napavedoni mmanung'unumunu ava mmanu mmakulipililila mpaka kwida kumwe *UMU*. Nnole nkúlima mwanalindililila ulongo umye vyepo vyamana. Nae análipililila mpaka ulongo utanyeke imbula itandi na yamwisho. ⁸ Namwenu momo ava mmanu mmakulipililila na mmakunonowanga mitima vyenu mwaa kwida kumwe *UMU*, kundivandika. ⁹ Mmanung'unumunu, hamunakashalyane kwambangidya hamunaukumigwe. Mwenu, Nkúukumu jo avelé pannango.

¹⁰ Mmanung'unumunu, tenda kenga mpano wamauvilo na kulipililila kwa avalá vakulava vatangwéle palina limwe *UMU*. ¹¹ Mwenu, tunkuvashema vakwalaligwa avalá valipililidíle. Mwenu mundigwa itangaleka kulipililila kumwe Jobi, namomo mundyona kumwisho kwake *UMU* mwashi mwaukile nantanani la mwaa ntima wake *UMU* ni wakuumbaligwa lilotelo na ni washididi.

¹² Mmanung'unumunu pashanya pavinu avi uti, hamunalilapile kuwa kwali shilambo shapai na ata kwali kulilapa kwoekwoe. Kwenu mwenu mukatangola doni, "Elo" ive mwiu elo na mukatangola doni, "Mene" ive mwiu mene kwambangidya hamunapatikanange muukumu.

‡ Liduva lyakushindanga mana ake shikukulu.

Kushwali kwalikulupililo

¹³ Pakati penu apali áuvauvanga? Ashwalye. Apali avénavo lipuwilo? Aimbe dimu dyalutumbyango.

¹⁴ Pakati penu apali nnwele? Avasheme vanang'olo valiganisha pakulota vashwalye kwamwaa wake nae vampaka mauta palina limwe *UMU*. ¹⁵ Nadoni kushwali kwalikulupililo kunkuntadya nnwele apone na *UMU* anantakatuwa. Namomo ikava kenga anditega, andali-valivigwa shimadambi shake. ¹⁶ Napavedoni, valanganila madambi enu na shwalyanidya pakulota mupone. Kushwali kwamunu waishaliya kunkuvanavo dimongo dyakutandeka vinu vyoe.

¹⁷ Liyashi avele munu áumbigwe kenga wetu, nae andíshwali na ntima pakulota imbula hainatonye; imbula indíimila kutonya mushilambo amu wakati wamyaka mitatu na inusu. ¹⁸ Nae andíshwali kavili kuwa ko kushimuka kutonya imbula kutwala shilambo sho, kupa vyepo.

¹⁹ Mmanung'unumunu, ikava kenga pakati penu apali álota aambukange umwiu kutwala munu junji kumuujija; ²⁰ manya doni, aijá ámuujija nkútega áambukenge indila yake, aju andaambola ungumi wamunu ajo mukupela na andaputangigwa madambi akwinjipa.

I Patulu

Nandele

1 Patulu, myombe umwe Yesu Klistu kwavakutan-dalegwa vamwadilikanéngé na vanáma kenga vakwaloka ku Pontu, Galata, Kapadokiya, Ashiya † na ku Bitiniya; ² munditandalegwa kwodananavo mwa-manyilile kaladavo Nnungu Atata na munkutandegwa mmakwilimyanga kwaindila ya Imumu pakulota mumwigwilile Yesu Klistu ámyayangidile myadi vyake. Umony na amani vyanjadyeke kwenu mwenu.

Litumbyangilidyo kwa Nnungu kwamwaa wamaleko akuwa

³ Atumbyangilike Nnungu na Tatamunu umwe *UMU* wetu Yesu Klistu! Kwaindila yakudyuka kumwe Yesu Klistu pakati pavakupela na kulingananavo shididi shake shikumene, nae andituvaleka kavili waambi pakulota tupate lilindilililo lingumi ⁴ na maleko ákatimbikanga, aungave-udagwa na ákadingala avakandidye kuwa kwamwaa wenu. ⁵ Kwadimongo dyake Nnungu, mwenu munkushungigwa kwaindila yalikulupililo mpaka muwakati wamwisho wakulilodya kwambola kuvéle tayali. ⁶ Kwashitendo ashi mwenu puwanga namene, ata ikava kenga muwakati padyoko ambi apa, ata ikaululika shindatenda shinkodya shipalodi shadinamuna uti dyamalingo ⁷ pakulota kutenda nningo walikulupililo lyenu ikava kenga liu. Likulupililo lyo liu lyo linkuvanavo mana makumene kuliko shaabu, shaabu itimbikánga ata ikava kenga vandatenda nningo pamoto; lyanavo linaidana lutumbyango, lishangelo na ishima palota kulilodya Yesu Klistu. ⁸ Ata ikava kenga mwenu hamungwene ila munkunnagwaledya; ata ikava kenga ambi apa hamu-namwona shinu, munkukulupila na munkupuwanga kwalipuwilo líkaululika kusalanganga na lyumbéle lishangelo ⁹ mwaa mwenu munkupata shabaa yalikulupililo lyenu yani kwambolegwa kwaungumi wenu.

¹⁰ Kwakwambolegwa aku, vakulava vammalangidíle kaladavo umonyo ukíle ndamwikila mwenu vandilipundisha na kulalyanga shana. ¹¹ Imumu umwe Klistu e apagwíte nkati mwave andyumya ushuda kaladavo avalanganga mauvilo alóta kumpata Klistu na lishangelo ling'oto lyamauvilo; vanavo vashindalambela vamanye Imumu ishimwamba nyani na wakati wene

† Ashiya ai ni Ijimbo lyashilambo shimanyika nelo apa Tulikiya. Hainava shinu Ashiya ing'umene imanyika nelo apa yavilambo kenga: Shina, Indoneshiya, Indiya na vinji.

wo, wakwashi. ¹² Kwavanavo, indyunukuligwa kenga vashindatumika i kwapaida yavo vo vene ila yenu mwenu kwamwaa wavinu vyamulipundishidye kwa avalá valalangéngé ntenga wambone kwaindila ya Imumu Wanashwe átumigwe kwalakela kuwa. Mwe, ata mpaka vo vanjelo vankuvanavo mweshe namene wakupandalela vinu avyo.

Ava mmakwilimyanga

¹³ Napavedoni mulingangashela muding'anong'ano dyenu, muva mevo vika lilindilililo lyenu muumonyo aulá wavalota kunyukatila mwenu muwakati walota kulilodya Yesu Klistu. ¹⁴ Kenga mmana mmakwigwilila, hamunaname mumalotelo lolo awakati aulá waungamanya. ¹⁵ Kanji napane aijá ánshamile jo ni Wakwilimyanga, nimumo momo namwenu momo ava mmakwilimyanga nkati mushinamidyo shenu ¹⁶ mwaa indyandikigwa doni, "Ava mmakwilimyanga mwaa nangu ni Wakwilimyanga." ††

¹⁷ Pakuva mwenu mundashwali muntambula Atata aijá áukumu kwabila kupambula kwakwodananavo vitendo vyakula munu, avanavo shinamidyo uti shakunjopa nae muwakati au wamuvele kenga mmakwaloka. ¹⁸ Mwaa mwenu mundimanya doni, mundyambolegwa nkati mushinamidyo shenu shamambinya shamukile ndapata kwavanyakalavenu i kwaindila yavinu vitimbikánga kenga nkuva kwali shaabu, ¹⁹ ila mundyambolegwa kwamyadi vivénavo mana vimwe Klistu, myadi vyo vivéle kenga vyangandolo ákave makosha ‡ na ákave lilemba. ²⁰ Ata ikava kenga mwa-manyikidile kaladavo shilambo shikanava kukandyangigwa, andililodya muwakati au wamwisho kwamwaa wenu mwenu; ²¹ kwaindila yake nae mwenu munkukulupila Nnungu ándyuwidye pakati pavakupela kutwala kumupa lishangelo; nadoni likulupililo alyo na lilindilililo lyenu linkupagwa nkati mu Nnungu.

²² Napanelo pamulyushanienge ushapu muungumi wenu kwaindila yakwigwilila umwiu mutadya kupagwa mulinagwaledyo lyashinung'unumunu líkave shinankulaba, bai nagwaladyania kwabila kudabadabanga kwantima úkave ushapu. ²³ Mwaa mwenu mundivalekwa kavili waambi i kwaimbeju ipéla kanji kwaimbeju íkapela kwaindila yalilove lyake Nnungu, lingumi na lipágwa ngwengwe. ²⁴ Mwaa

"Vanu uti vankuva kenga udani, kushenga kwave uti kunkuva kenga induva yaudani. Udani undajuma na dinduva dinanyala,

†† Lola Valawi 11:44-45; 19:2; 20:7. ‡ Kwali: a ...ákalamele.

²⁵ kanji lilove lyake *UMU* linkupagwa ngwengwe!" †
Lilove ali ni aulá ntenga wambone wavammalan-gangidile.

2 Nadoni jaa kushu ko vyakunyata uti: ushwang'a uti, shinankulaba, ing'ou na malove uti akwabola.
² Kenga mmanunu, avanavo mweshe wamavele aimumu akaanganikéne na shinu shoeshoe pakulota kwaindila yaanavo, mwenu mukulumuke kwakwambolegwa ³ kwoda ambi apa mudyanaleda kenga *UMU*, wambone.

Lijanga lyavailudyenge ni lijanga lyamana

⁴ Ngwengwe pamummandike nae lijanga lingumi lyavaitile vanu kanji litandalagwídye na livénavo mana pamevo pake Nnungu, ⁵ namwenu momo kenga majanga mangumi, munkudangegwa ing'ande yaimumu pakulota muve unashilangola wakwilimyanga wakupalakedya shadaka kwambangidya mumye shadaka shaimumu shikubalíka namu Nnungu kwaindila imwe Yesu Klistu. ⁶ Mwaa mumaandiko munkutangaleka, "Mwenu, ninkuvika lijanga ku Shiyau, lijanga lyapalitinuna, lyakutandalegwa na lyamana; aijá ákulupila lyanavo, mwiko hatutala." ††

⁷ Napavedoni kwenu mwenu múkulupila po, linkuvanavo mana; kanji kwa avalá vákakulupila, "Vakudenga, lijanga lyavaitile lyo, lindyuka ndava lijanga lyapalitinuna." ‡

⁸ Namomo, "Lijanga lyakulikuvala, lyo livatádyá vaagwe." ††

Vanavo ni vovo valikuvala mwaa havanaigwilila shinu aliilá lilove kwoda nimomo mwavavapangidile tangu kala.

⁹ Kanji napane mwenu ni likola litandalagwídye, unashilangola washiumu wakupalakedya shadaka, venentete vakwilimyanga, venentete vake jo mwene kwambangidya muvalangange ukumene wake aijá áshamile mushii muke kulilangadyo lyake lyamakango.
¹⁰ Mwenu kala po, ata padyoko vela hamuvéle mmentete kanji ambi apa mmentete vake Nnungu; kala po hamushanaangiligwa shididi kanji napane mudyanaangiligwa.

¹¹ Mmakunagwaleka, kenga mmajeni na mmakwalo-ka, ninkunnaililila pakulota mwambukange malotelo uti ashimunumunu atandána ing'ondo na ungumi.

¹² Shinamidyo shenu shive shashalowa pakati pavamidi; nadoni ata vakantambudyanga kutenda vyakunyata, pavalota kwona vitendo vyenu vyashalowa, vanavo vandamupa lishangelo Nnungu muliduva lyalota kulilodya.

Klistu mpano wetu andyuvavungwa bila makosha

¹³ Kwamwaa umwe *UMU*, livike mwina muunanangalaledi uti wavanu uvikigwe pakati penu kwali umu nang'olo ákuva malamulo ¹⁴ kwali vananangalaledi va-

majimbo, vo vatandalégwa namu nae kulota kuvapa shaushanga avalá vatandédyá vyakunyata na kuvapa ishima avalá vatandédyá wambone. ¹⁵ Mwaa malotelo ake Nnungu ni ala, pamutenda wambone mundadima nshasholo waungamanya wavanu vajinga. ¹⁶ Nama kenga mmanu múvele muunaiti ila hamunatumile kuliinikidya unaiti awo pakulota kutenda vinu vyakunyata; nama kenga mmatumika vake Nnungu.

¹⁷ Mwishimu kula munu, vanagwaledye vanning'unumunumwenu, njope Nnungu na mwishimu umu.

¹⁸ Mmatumika, livike mwina mwavanang'olo venu kwaishima ing'umene i gweka avalá vambone na valimaládyá kanji namomo, avalá vakunyata mitima.

¹⁹ Mwaa ni shinu shakutumbyangilika † munu kwamwaa walikulupililo lyake kwa Nnungu, alipililile matuva auvavungwa pashikapali. ²⁰ Da inkupagwa paida shani pamutega kutwala kulipililila kukanyalegwa? Kanji ikava kenga mwenu munkulipililila muvavungwa mukutandédyá wambone, shitendo ashi ni shakutumbyangilika pamevo pake Nnungu. ††²¹ Ashi ni shavan-shamalele mwenu; mwaa Klistu momo andyuvavungwa adiva lyutu lyenu annakela mpano kwambangidya mwenu mwodedye mwalivete nae.

²² "Nae hatandile shimadambi shoeshoe

na ata ushwang'a haumile nkanywa mwake." †††

²³ Pavashintukana nae hashipindikula, pashuvavungwa po nae hashivatishanga ila ashinnakela aijá ákumu kwaishaliya. ²⁴ Nae jo mwene andilitika mumili mwake madambi etu panshalaba kwambangidya tupele kwamadambi na tuname kwaishaliya; kwaindila yavilonda vyake, mwenu mundipona. ²⁵ Mwaa mwenu muvele kenga dingandolo dyakudumbadumba kanji napane ambi apa, mundimuujila Nkúshunga na Nkúlaledya waungumi wenu.

Vadyamunu na vatwamunu

3 Nimumo momo mwenu mmadyamunu livike mwina mwavatavenu kwambangidya ata ikava kenga vanji havanakulupila shinu lilove lyake Nnungu, vapatikanange kwabila malove kwamwaa washinamidyo shenu mwenu mmadyavave; ² vona shinamidyo shenu shíkave ushapu na shaishima. ³ Kune-ma kwenu hakunave kwapanda kenga mwakulukila ugwimbu, kugwalangila vinu vyashaabu kwali dinguvo dyakunamikanga; ⁴ leka apo, inimmaikila mulinemye mmitima vyenu kunema kúkatimbikanga nkati mwimumu yaupole na yakutulila ivénavo mana makumene namene kwaupande wake Nnungu. ⁵ Mwaa amu ni mwavashinamela vakongwe vakwilimyanga vapanyuma váshivika lilindilililo lyave nkati mu Nnungu. Vanavo kula munu ashindalivika mwina mwantwamunu ⁶ kenga Shalaa ashindamwigwilila Abulaamu na kunshema kuva nang'olo wake. Kwake nae ko, mwenu mundava mmanavake ikava kenga mundatandédyá wambone na mukanajopa mitishango.

† *Lola Ishaiya* 40:6-8. †† *Lola Ishaiya* 28:16. ‡ *Lola Dimu* 118:22. ††† *Lola Ishaiya* 8:14.

‡†† *Kwali: a ...ni umonyo.* †††† *Kwali: a ...ni umonyo pamevo pake Nnungu.* ††††† *Lola Ishaiya* 53:9.

⁷ Namomo mwenu mmatwamunu ava mmanu mmalimanyilo nkati mukunama na vadyavenu na vatanane kwaishima kenga shinu shikanama mwaa ni vakupata-maleko pamo namu mwenu muumonyo washingumi kwambangidya kushwali kwenu ko, haku-nadiviligwe.

Kuvauvanga kwamwaa wakutenda wambone

⁸ Kumwisho akuno ninkushidoni, avanavo makumbukililo amulolo, ava mmashididi, nagwaladyania shin-ung'unumunu, ava mmanu mmakutanana na mmakulishapeya. ⁹ Hamunalipilile wakunyata kwawakunyata, hamunalipilile kutukana kwakutukana kanji paikavele davo po, vaalaliye mwaa ni ashi shavanshamalele mwenu kwambangidya mupate kwalaligwa. ¹⁰ Mwaa

“Aijá álota kunagwaledya shingumi na kunama maduva ambone, ashunge lulimi lwake kwavyakunyata, dindomo dyake hadinashang'ape; ¹¹ aambukange wakunyata na atandedye wambone; alambeke amani na avingilidye.

¹² Mwaa mevo ake *UMU* ankuvalola avalá vaishaliya na matu ake ankuvaigwilila kushwali kwave kanji ing'ope imwe *UMU* inkuvapinga avalá vatandédya vyakunyata.” †

¹³ Mwenu, da nyani álota kuntenda kunyata ikava kenga mwenu munkuvanavo dukuduku yakutenda wambone? ¹⁴ Kanji ikava kenga mundaavauvanga kwamwaa waishaliya, mwenu po mundaaligwa. “Hamunavajope vanavo; namomo hamunashushukange.” ††¹⁵ Leka apo, ntumbyange Klistu *UMU* kenga wakwilimyanga nkati mmitima vyenu. Ava tayali ngwengwe pakulota kunjang'ula aijá álota kunjugwa mwenu amanye mana alilindilililo lipagwite nkati mwenu. ¹⁶ Kanji tenda vinu avi kwaupole na kwaishima mushunga makumbukililo ambone amuntima kwambangidya dashi, avalá vantangóla mwenu kunyata kwamwaa washinamidyo shenu shambone shamupagwa nkati mumwe Klistu, vanavo vavenavo dyoni kwakuliula kwave. ¹⁷ Kudyanga kuvauvanga kwamwaa wakutandedya wambone ikava kenga ni malotelo ake Nnungu kuliko kuvauvanga utandedya wakunyata.

¹⁸ Mwaa mwiu Klistu andyuvauvanga mwanda umo tu bai kwamwaa walidambi, muni waishaliya kwamwaa wavanu vaungave-ishaliya pakulota kutuukanavo kumwe Nnungu. Nae kwashimunu ‡ vanimpedya kanji vanindyuwa kwa Imumu ¹⁹ na mu Imumu jojo andyúka ndavalangangila dimumu divéle mukungwa, ²⁰ dyo díkashiigwilila muwakati wakala Nnungu pashilindila kwaupole mumaduva amwe Noe paishikandyangigwa ingalava. Mwanavo ni vanu padyoko tu vapukile mmedi, vanu avo vavele nane. ²¹ Nadoni ashi ni shimanyikilo shaubatisho

† *Lola Dimu 34:12-16.* †† *Lola Ishaiya 8:12.* ‡ *Kwali: a kwamili. Lilove a shimunulivalangangigwa mudimbandi adi, inkuu-lukika yadavo kuvalangiligwa kwalilove a mili. Lola 3:21; 4:1, 6.*

umwambóla mwenu ambi apa, wanavo haunaushani-anga shinu ushapu washimunu ila ni kulijugwangila kwamakumbukililo ambone amuntima pamevo pake Nnungu kwaindila yakudyuka kwake Yesu Klistu ²² ákwadile kuwa kwikala kunkanakono kwake Nnungu kutwala kuvavika vanjelo mwina mwake, madalaka pamo na dimongo uti.

Shunga shana umonyo wa Nnungu

⁴ Napavedoni pakuva Klistu andipata mauvilo mushimunu, namwenu momo lingangashele mu-makumbukililo lolo mwaa aijá áuvauvenge nkati mushimunu, nae andyapukananga na lidambi. ² Nadoni wakati ubakidíle kwenu mwenu kunama mushilambo amu, hamunaname kavili kwakutand-edyá malotelo ashimunumunu ila tandedya malotelo ake Nnungu ³ mwaa wakati upitíle unditoshá waku-tandedya mwenu vinu vivannagwéla vamidi. Muwakati awo mwenu mushindanama shinamidyo shakunyata kupunda apo, mumalotelo ashimunumunu, kwambal-wa, vikukulu vyaupuju na vyakwambalwanga pamo na kulipudya kwakunyatilika kwavannungu. ⁴ Vanavo ambi apa vankwona kuva shinu shanshelu mwenu pa-mukaungana na vanavo nkati mushinamidyo shaupu-ju; ni ashi shitádyá vamwabalange. ⁵ Kanji vanavo vandaitikanga kumwe aijá áve tayali kuvaukumu vangumi na vapidíle. ⁶ Mwaa ni ashi shitadídye nten-ga uke ukavalangangigwe momo kwa avalá vapidíle kwambangidya vanavo ata ikava kenga vandyuku-migwa kwashimunu kenga vanu uti kanji vaname kwaindila ya Imumu kenga mwanamila Nnungu.

⁷ Mwenu, mwisho wavinu uti undivandika. Nadoni li-pange muding'ano dyenu, namomo ava mevo kwamwaa wakushwali kwenu. ⁸ Kupunda apo likanyalidye kuka mushu munagwaladyania mwaa linagwaledyo linkwinikidya madambi akwinjipa. ⁹ Ava mmakukalibishania kwabila kutangadikanga. ¹⁰ Kwodananavo shajo shapatile kula muni, inimmaiki-la mutumile kwakutumikana kenga wavankamudidye mmambone mmaumonyo wake Nnungu ulilódya mu-dinamuna dyakuvilingananga. ¹¹ Napane átangola jo, atangole malove a Nnungu na átumika jo, atumike kwadimongo dyaloka kumwe Nnungu kwambangidya nkati muvinu uti, Nnungu apate lishangelo kwaindila imwe Yesu Klistu ávaikidile apate lishangelo na lyul-ulilo ngwengwe ngwengwe. Ame.

Kuvauvanga kwamwaa wakuva unklistu

¹² Mmakunagwaleka, hamunashushukange nningo wamoto †† umilíla pakulota mulingigwe pakati penu mwona kuva shinu shashijeni upande wenu. ¹³ Kanji puwangila shipimo shamauvilo shamuliinjidyanga pamo namu Klistu kwambangidya palilota kuunukulig-wa lishangelo lyake, namwenu momo mulitamange na mupuwange. ¹⁴ Mwenu ikava kenga munkutukanigwa kwamwaa walina limwe Klistu, bai mwenu

†† *Lola 1:7.*

mundyalaligwa mwaa Imumu walishangelo àvele Imumu wake Nnungu, ankutulila pamuti penu. ¹⁵ Hana-pagwe pakati penu munu wakulota kuvauvanga kwamwaa wakuva nkúbyaa, nkwiwa, nkalau kwali álijalanianga mummya vyavanu vanji. ¹⁶ Kanji ikava kenga munu ankuvauvanga kwamwaa wakuva unklisu, hanone dyoni ila amupe lishangelo Nnungu kwamwaa walina ali. ¹⁷ Mwaa wakati waukumu utunduvangila mwing'ande yake Nnungu undiwika tayali; napane ikava kenga shitandi namu wetu, ulota kuva dashi mwisho wa avalá vákaigwilidile ntenga wambone wa Nnungu? ¹⁸ Na

“ikava kenga pankukamadyanga waishaliya kwamboleghwa,

ilota kuva dashi kwamunu ákave Nnungu na nkútega?” †

¹⁹ Napavedoni avalá vauvauvánga kwamalotelo ake Nnungu kwakutandeya wambone, indivaikila vankamudye ungumi wave Namumba wave ákulupilika.

Njalele Nnungu mangaikangilo enu uti

5 Doni, nangu ninang'olomwenu na ninshuda wamauvilo amwe Klistu namomo wakuliinjidyanga mulishangelo lilóta kuunukuligwa, ninkuvalaililila vanang'olo vapagwíte pakati penu, ² shunga shipinga shavangandolo vake Nnungu shavankamudidye: mwenu, laledya shanavo i kwakuvakanyalidya kanji kwamalotelo ambone kenga mwalatela Nnungu na ata i kwaditamaa dyanjuluku kanji kwadukuduku yakutumika; ³ hamunavatawale avalá vamuukile ndakulupiligwa kanji ava mpano kwashipinga asho. ⁴ Doni, palota kulilodya Nkúshunga nang'olo, mwenu mundapata lidaka lyalishangelo líkadingala.

⁵ Nimumo momo mwenu mmanemba livike mwina mwavanang'olo.

† *Lola Mikong'o 11:31.*

Mwenu uti gwala kulishapeya pakulota muulule kutumikana mwaa

“Nnungu ankuvapinga vakulyona ila ankuvapa umonyo vakulishapeya.” ††

⁶ Lishapeye mulivika mwina makono adimongo dyake Nnungu kwambangidya antumbudye mwenu muwakati uvaikidíle ⁷ munjalela nae mangaikangilo enu uti mwaa nae ankumwangaikangila mwenu.

⁸ Ava mevo na lilaledye: mmongo wenu mwenu Ndamoni ankudingukanga kenga ntumi akalamanga anambela wakwashi wakulota kummamane-uti.

⁹ Mpinge, nanopa nkati mulikulupililo lyenu mumanya doni, vanung'unumunumwenu mushilambo amu uti vankupata inamuna yamauvilo lolo.

¹⁰ Nnungu waumonyo uti ánshamile mwenu kwalishangelo lyake líkamalilika nkati mumwe Klistu Yesu, jojo jo ling'oto lyakuvauvanga mwenu padyoko, anandyuwangidya, andamwakikisha, andamupa dimongo na anammika pashanya shitunduvangilo.

¹¹ Kwake nae lipali lyululilo ngwengwe ngwengwe. Ame.

Nandele wamwisho

¹² Kwalipwashalelo limwe Shilivanu aijá wanimwami-ni kuva nung'unumunu wakukulupilika, nangu ndimwandikila mwenu kwaungwipi ninjugwangila na ngumyaa ushuda kenga: au ni umonyo wiu wake Nnungu. Pagwa mukunanopa nkati muumonyo wake Nnungu.

¹³ Avalá vavéle ku Babiloni vakutandaleghwa kenga mwenu vankuntumidya nandele kwenu mwenu pamo na mwanangu Malukushi. ¹⁴ Tumidyania nandele kwashimanyikilo shalinagwaledyo. Amani ipagwe kwenu mwenu uti múvele nkati mumwe Klistu.

†† *Lola Mikong'o 3:34.*

II Patulu

Nandele

¹ Simoni Patulu, ntumwa na myombe umwe Yesu Klistu, kwa avalá vapatíle likulupililo lyolyo livénavo mana alinganána na lyetu kwaindila yaishaliya imwe Nnungu wetu, Mwamboli Yesu Klistu.

² Umony na amani vyanjadyeke kwenu mwenu kwaindila yakumanya Nnungu namu Yesu *UMU* wetu.

Kushamegwa na kutandalegwa kwenu kunanope

³ Kwadimongo dyaunungu wake anditupa uti avilá vyatulota mushingumi na mukunjopa nae kwaindila yakumanya aijá átushamile kwalishangelo lyake jo mwene na kwaushalowa wake uti ⁴ kwaindila yavyanavo nae andilivikila vikumene na vyamana kwetu wetu kwambangidya dashi kwaindila yavyakulivikila, mwenu muke mukave mmakuliinjidyanga mumavalelo aunungu mùpalanyweke muudagwa upagwíte mushilambo kwamwaa wamalotelo ashimunumunu.

⁵ Kwaing'ano yoyo ai, tumbama namene mutadye likulupililo lyenu mwanjadyedye muushalowa; muushalowa nkati mulimanyilo, ⁶ mulimanyilo nkati mukulishunga gwegwe umwene, mukulishunga gwegwe umwene nkati mukunanopa, mukunanopa nkati mukunjopa Nnungu, ⁷ mukunjopa Nnungu nkati mukunagwaladyania shinung'unumunu na mukunagwaladyania shinung'unumunu, mulinagwaledyo. ⁸ Ika-va kenga vinu avi vipali pakati penu na vinkukulumu-ka, vyanavo vindatadya hamunave mmawondo na múkapa vyepo mukumanya *UMU* wetu Yesu Klistu. ⁹ Mwaa aijá ákavenavo vinu avi, andiputala ankwona bai vyapepi àlivalidile kuushaniangigwa ushapu washimadambi shake shakala.

¹⁰ Napavedoni mmanung'unumunu, kavili likanyalidye namene pakulota kushamegwa na kutandalegwa kwenu kunanope mwaa mukatenda avyo, mwiko hamulikuvala. ¹¹ Mwaa kwainamuna ai mwenu mundapata aki yakwinjila kwabila kundingadinga shoeshoe muutawala úkamalilika umwe *UMU* wetu na Mwamboli Yesu Klistu.

Lilove lyavakulava ni kenga ikalaboi ilangádyá

¹² Nadoni ngwengwe ndauka mushu ninkumbuwan- ga vinu avi ata ikava kenga mwenu mundimanya na munkunanopa nkati muumwui aulá wamupatile.

¹³ Ninkwona kuva shinu shivaikidíle panguvele mwiye- ma yamili au nimwimulange nkati mumakumbukililo

ala ¹⁴ mwaa ndimanya doni, kwashipajelo nangu nda- jaa yema ai kwodananavo amulá mwanguunukulidile *UMU* wetu Yesu Klistu. ¹⁵ Nadoni ninkulikanyalidya na dimongo kwambangidya ling'oto lyakunyema kwangu mushilambo amu, mwenu mukumbukile vinu avi kula wakati.

¹⁶ Kwamwui, patummalangangidile dimongo na kwi- da kumwe *UMU* wetu Yesu Klistu, hatwodile mikong'o vyavapanganienge shana kanji wewe tuvene ni tu- vashuda túgwene ukumene wake. ¹⁷ Nae andipata ishima na lishangelo lyakwalakela upande umwe Nnungu Atata, muwakati aulá walimwididile lidi lyaléke mulishangelo lyakujowa litédoni, "Aju ni Mwanangu, Wakunagwaleka wangu, ángupa lipuwilo;" ^{†18} wewe tuvene tundigwa lidi ali lyalakela kuwa túvele pamo namu nae palishinga lyakwilimyanga.

¹⁹ Nadoni pashanya avi, tunkunanopa namene nkati mulilove lyavakulava kenga ikalaboi ilangádyá pashii, namwenu momo tandedya mwigwa shana mpaka wiku paulota kulangala na palilota kuma lyaloshu mmitima vyenu. ²⁰ Kupunda namene manya doni, ha- pali malove apagwíte nkati mumaandiko avalan- gangidile munu abuni jo mwene; ²¹ mwaa mwiko mal- ove alo hapandukenge mumalotelo ashimunumunu kanji vanu vandivalanganga kwalakela upande wake Nnungu valangalalegwa kwa Imumu Wanashwe.

Kubamalegwa kwavamwalimu vakushang'apa

² Doni, kala po vandyúmilila vakulava vakushang'apa pakati pavenentete, nadoni pakati penu mwenu momo vandaumilila vamwalimu vakushang'apa. Vovo vo vandainjidyanga mapundisho akushang'apa abamóla vamwita ata mpaka Mwene ávashumile; shinu shilóta kwidanavo kubamolegwa shingangala vo vene. ² Vanu voe vandoda shinamidyo shave shakulauka, namomo kwamwaa wavanavo vanji indila yaumwui vandakupulu. ³ Kwalung'unuku lwave, vanavo vankuvashonda vanu vatumila maimyo akubuni vo vene. Kwavanavo, ukumu ikandyangígwe tangu kala, haididimanga; kubamalegwa kwave ko, hakudidimanga.

⁴ Mwenu, ikava kenga Nnungu havavikidíle shitete vanjelo vatagíle ila andivajela kushena akulá kwakudimba kwavavaungile mang'unyang'unya kwambangidya vavakondye valindila ukumu; ⁵ namo- mo nae havikangidile shitete shilambo shavanu vakala paidinavo livambwe kwavenentete avalá vákave Nnun-

† *Lola Mateu 17:5; Malukushi 9:7; Lukashi 9:35.*

gu kanji anínkondya Noe nkúvalanganga ishaliya pamo na vanu saba; ⁶ na yadavo andyúkumu likaja Iya Shodoma namu Gomola atikinyula kwamoto atadya kuva mpano ulóta kuvatandeka avalá vákave Nnungu ⁷ kanji anímposha Loti munu waishaliya shishinkodya shipalodi kwamwaa wavitendo vyakulauka vyavanu váshinama muungave-lilamulo ⁸ mwaa kula liduva munu waishaliya aijá pashinama pakati pave, ungumi wake waishaliya ushindauvauvanga kwamwaa wavitendo vyave vyaungave-lilamulo vyashona na vyashigwa. ⁹ Napavedoni tundyona do, *UMU* ankumanya kuva-posha avalá vanjópa Nnungu nkati mukulingigwa na mwakuvavikila mushaushanga avalá vavéle muungave-shaliya muliduva alilá Iyaukumu; ¹⁰ kupunda namene avalá vaodédya malotelo audagwa washimunumunu na kwiludyanga unashilangola.

Vamwalimu vo vakushang'apa ava, vakulitauka na vakulyona, havanashushukanga shinu kuvakupulu valishangelo; ¹¹ kanji ata vo vanjelo vo, vavénavo lyululilo na dimongo, havanalyaveka shinu kumya ukumu yakukupulu kwavanavo pamevo pake *UMU*. ¹² Vanavo vankukupulu vinu vyavakamanyite na vankuva kenga vanyama vákave ding'ano vavalekwa kutwala kwodédya mavalelo ave ling'oto kukamuligwa kuka ndashindigwa, vovo vo vandabamolegwa muudagwa wave vo vene ¹³ vapata wakunyata kenga nshala wavyakunyata vyavatandile. Vanavo inkuvanagwela kutenda vikukulu vyaupuju mui liduva livala. Vovo vo, vandilamala na vankuvanavo malemba vapuwangila mukushang'apa kwave muwakati wavalunganianga namu mwenu pandamu. ¹⁴ Mevo ave andyumbala kulavalava ákadoba kutenda lidambi. Vanavo vankuvashomba avalá vákanaanwepe muungumi. Mitima vyave vindilipanganianga kwalung'unuku. Vovo vo ni vana vakulanigwa. ¹⁵ Vanavo vandyambukanga indila yashalowa kutwala kwashela kwoda indila imwe Balaa mwanagwe Beoli munu íshinnagwela kupata paida kwaindila yaungave-shaliya; ¹⁶ nae andidumigwa kwakupujungula kwake, punda nkoko ákatangola, andítangola namu nae kwalidi Iyamunu kutwala kwimidya ujinga wankúlava ajo. †

¹⁷ Vanavo ni myuto víkave medi na itabwe ikungulúka kwaimepo. Kwavanavo vandivakandyedya lyutu lyakudimba do, pii! ¹⁸ Vovo vo, vatangola malove akulyona amambinya, kwaditamaa dyave dyashimunumunu, vankuvashomba avalá vapalanywéke muwakati wakuvandika kwavanu valilangalaléla mukukowa. ¹⁹ Vanavo vankulivikila kuvapa unaiti kumbe vo vene vo, ni vatumwa vaudagwa. Mwaa ashilá shintamíle munu, nae ni ntumwa washinu asho. ²⁰ Napane ikava kenga vanavo vandipalanyoka muudagwa wamushilambo kwaindila yakummanya *UMU* wetu na Mwamboli Yesu Klistu kutwala kujola kavili na kutamegwa muudagwa, shinamidyo shavana vo shinkumamodya kunyata kupunda shitandi.

²¹ Kudyanga vanavo leka vakamanyite indila yaishaliya kuliko kumanya kutwala kuujila kavili kunyuma na

kwambukanga lilamulo Iyakwilimyanga Iyavaukile ndapwashalela. ²² Nadoni kwavanavo unditandeka nkong'o waumwiu uushidoni, "Ng'avanga ankuujila kumatapiyo ake jo mwene," †† namomo "Nguluve wavamwingile medi andyujila kavili ndagalagata mulitope."

Mwiu liduva limwe *UMU* lindaida

3 Mmakunagwaleka, ai apa napanelo ni ibalugwa yambili yanimwandikila. Mudibalugwa adi uti mbili ninkulota ngukang'ele ding'anong'ano dyenu diu kenga kumbukumbu ² yakunkumbuwanga malove atangaléke wakati wapanyuma kwaindila yavakulava vakwilimyanga na alilá lilamulo limwe *UMU* na Mwamboli Iyamuukile ndapundishigwa na vamyombe venu.

³ Shitandi manya doni, mumaduva amwisho vandau-milila vakuliula valóta kupita vanniula vaodédya malotelo ave vo vene ⁴ vaashidoni, "Da shitandeki shinu shani nkati mukulivikila kwake yakwida? Tangu vanyakalavetu kujaa shingumi, vinu vinkuvalela momo kenga kunantandi kukandyangigwa shilambo." ⁵ Kanji vanu avo vankulivaliva shinamadi kenga kuwa kundipagwa tangu kala na kwaindila yalilove Iyake Nnungu shilambo shindikandyangigwa kwamedi na kwaindila yamedi. ⁶ Nimumo momo kwamedi shilambo shawakati aulá shindítwaligwa kwalivambwe kutwala kutimbikanga. ⁷ Kuwa na pai vyo vipagwíte ambi apa, vyanavo vindikondyegwa kwaindila yoyo yalilove; vindikondyegwa pakulota vitaigwe moto muliduva Iyaukumu na Iyakubamolegwa kwa avalá vákave Nnungu.

⁸ Mmakunagwaleka hamunalivalive shinu ashi: kumwe *UMU* liduva limo ni kenga vyaka alupu imo na vyaka alupu imo ni kenga liduva limo. ⁹ *UMU* hanatimatimanga shinu kutandédya kulivikila kwake kenga mwavaanela vanji kutima. Leka apo, nae mpole kwenu mwenu pakalota ata munu jumo kujaiika kanji uti vakawikile mukulijugulanga madambi ave.

¹⁰ Kanji napane liduva limwe *UMU* lindaida mwiu kenga nkwiwa. Kuwa kundalambaleka kwashilindimu shikumene, mili vyakuwa vindatikinyuka kwamoto, shilambo pamo na vinu uti vivéle amo, vindamalilika.

¹¹ Napanelo kwoda vinu uti vindatimbikanga, mwenu po immaikidile muname shinamidyo shani? Immaikidile muname shinamidyo shakwilimyanga na shakunjopa Nnungu ¹² mulindila liduva Iyake Nnungu mutadya liduva alyo lide shipajelo. Muliduva alyo kuwa kundatikinyuka kwamoto na mili vyakuwa vindanyang'anyuka kwalitukuta. ¹³ Kanji wetu kwakwodananavo kulivikila kwake, tunkulindila kuwa kwaambi na shilambo shaambi kwailota kupagwa ishaliya.

† *Lola maimyo amwe Baalu mulibuku Iya Ishabu 22-24.*

†† *Lola Mikong'o 26:11. ‡ Lola Dimu 90:4.*

Malailililo amwisho

¹⁴ Napavedoni mmakunagwaleka, akuno mulindila vinu avi likanyalidye pakulota nae ankodye nkati mu amani, múkave lilemba na múkave likosha.

¹⁵ Mmakumbukililo enu muvalangilila doni, upole umwe *UMU* wetu unkwidanavo kwambola. Namomo nung'unumunu wakunagwaleka Paulu animwandikila mwenu vyovyó kwodanavo limanyilo lyapatile, ¹⁶ nae andyandika dibalugwa dyake uti kwainamuna imo yoyo, nkati mo avalanganga myaa vyoyo. Mudibalugwa dyake vinkupagwa vinu vikamadyánga kwigwa shana, vinu avyo vanu vajinga na vákanaanwepe,

vankutindinganianga kenga mwavatindinganiangidya mudisemu dinji dyamaandiko pakulota kulibamola vo vene.

¹⁷ Mwenu mmakunagwaleka pakuva shinu ashi mundimanya kaladavo, lishunge kwambangidya hamunatwaligwe mushinamidyo shakunyata shavanu vanáma muungave-lilamulo na ata hamunaleke kunjaika kunanopa kwenu kutwala kugwa kenga vanavo ¹⁸ kanji kulumuka nkati muumonyo na mukummanya *UMU* wetu, Mwamboli Yesu Klistu. Kwake nae lipagwe lishangelo ambi apa na mpaka mumaduva ákamalilika! Ame.

I Nshuwau

Lilove lyashingumi

1 Lilove lyashingumi jo, andípagwa kutunduvangila kunantandi: wetu nae tundimwigwa, tundimwona na mevo etu, tuninnalyanga shana na tuninkamulanga tuvene kwamakono etu, ² ata jo shingumi andililodya, wetu tundimwona, tundyumya ushuda kwamwaa wake na wetu tunimmalangangila mwenu aijá shingumi shíkamalilika e apagwíte kumwe Atata kutwala kulilodya kwetu wetu. ³ Aijá watungwene na watumwigwite, tunkummalangangila mwenu momo kwambangidya namwenu muvenavo upamo namu wetu, namwiu upamo wetu unakupagwa namu Atata pamo na Mwanagwe, Yesu Klistu. ⁴ Namomo tunkumwandikila vinu avi pakulota lipuwilo lyetu liwikile popo.

Nnungu ni lilangadyo; tuwene mulilangadyo

⁵ Mwenu, ntenga watumwigwite nae na watummalangangila mwenu ni au: jo Nnungu aju ni lilangadyo kwake nae shii hashipali.

⁶ Ikava kenga tunkushidoni, tunkuvanavo upamo namu nae kanji tuwena mushii, tunkushang'apa hatunatandedya shinu umwiu. ⁷ Kanji tukawena mulilangadyo kenga mwapagwididye nae mulilangadyo, tunkuvanavo upamo kula munu kwamuje na myadi vimwe Yesu, jo Mwanamunu vinkutuushanianga ushapu wamadambi uti.

⁸ Ikava kenga tunkushidoni hatuve lidambi, tunkuliduwanga wewe tuvene na nkati mwetu haupali umwiu. ⁹ Kanji tukalyaula madambi etu, nae ni wakukulupilika na waishaliya pakulota kutulivaliva madambi etu na kutuushanianga ushapu waungaveshaliya uti.

¹⁰ Ikava kenga tunkushidoni hatutagile, tunkummika Nnungu kuva nshwang'a na lilove lyake nkati mwetu, halipali.

2 Mmanavangu, ninkumwandikila vinu avi kwambangidya hamunatege. Kanji aijá átega, tunkuvanavo waktushililidya kumwe Atata, Yesu Klis-tu, Waishaliya. ² Nae ni shadaka shakudimanga shitundi shake Nnungu kwamwaa wamadambi etu kanji i kwamwaa wamadambi etu gweka, namomo madambi amushilambo uti.

Kwigwilila malamulo ake Nnungu

³ Namomo tundimanya kenga tunkumanya nae patwigwilila malamulo ake. ⁴ Aijá aashidoni, "nangu

nae nimmanya" kanji pakaigwilila malamulo ake, nshwang'a na kwake nae umwiu haupali ⁵ kanji aijá áig-wilila lilove lyake, nkati mwake nae, mwiu linagwaledyo lya Nnungu linkuwikila popo. [†] Mwatumanyila kupagwa nkati mwake ni amu, ⁶ aijá aashidoni, ankupagwa nkati mwake nae inimmaikila awene kulingana kenga mo mwawanadile Yesu.

⁷ Mmakunagwaleka! Haninamwandikila shinu lila-mulo lyaambi kanji lila-mulo lyakala, lyo lyamuvénavo kunantandi; lila-mulo alyo lyakala ni wo ntenga wamwigwite. ⁸ Ata ivedavo, ninkumwandikila lila-mulo lyaambi ashilá shiu nkati mwake na mwenu mwaa shii shinkuka shilambaleka na lilangadyo liu tayali linkulangala.

⁹ Aijá áashidoni, ankupagwa mulilangadyo kanji ámmangedya nung'unumunu, mpaka ambi avelé mushii.

¹⁰ Aijá ánnagwaledya nung'unumunu ankupagwa mulilangadyo na nkati mwake hashipali shakuntadya alikuvale. ¹¹ Kanji aijá ámmangedya nung'unumunu ankupagwa mushii na ankuwena mushii. Nae hanamanya shinu kwauka mwaa shii shinimputadya mevo.

¹² Mmanavangu, ninkumwandikila

mwaa madambi enu andilivalivigwa kwamwaa wali-na lyake.

¹³ Mmababa, ninkumwandikila

mwaa munimmanya aijá ápagwite kutunduvangila kunantandi.

Mmanemba, ninkumwandikila

mwaa munintema aijá nkalau.

¹⁴ Mmanavangu, nimwandikila

mwaa munimmanya Atata.

Mmababa, nimwandikila

mwaa munimmanya aijá ápagwite kutunduvangila kunantandi.

Mmanemba, nimwandikila

mwaa mwenu munkuvanavo dimongo, lilove lya Nnungu linkupagwa nkati mwenu na munintema aijá nkalau.

Hamunanagwaledye shilambo

¹⁵ Hamunanagwaledye shilambo na ata vinu vipagwíte amo. Aijá ánnagwaledya shilambo, linagwaledyo kumwe Atata halipali nkati mwake ¹⁶ mwaa uti vipagwíte mushilambo amu yani malotelo ashimunumunu, liu, kulumidya shumbi kwamali amushinamidyo ashi, uti avi havinava shinu vimwe Atata ila vyashilambo sho shashi. ¹⁷ Shilambo ashi pamo na malotelo ake anku-

[†] Kwali: a ...linagwaledyo kumwe Nnungu linkuwikila popo.

malilika kanji aijá átandedya malotelo ake Nnungu andapagwa ngwengwe.

Vanduwánga ni vamongo vamwe Klistu

¹⁸ Mmanavangu, au ni wakati wamwisho. Mo mwamwigwididye kenga mmongo wake Klistu andaida, bai vamongo voe vamwe Klistu vandyumilila tayali, napavedoni tunkumanya kenga au ni wakati wamwisho. ¹⁹ Vanavo vandilyumadyanga pakati petu kanji havavéle vetu wetu mwaa leka vavele vetu wetu vakandipagwa namu wetu kanji vanavo vandilyumadyanga pakulota imanyike ngala kenga pakati pave wetu wetu hapagwite ata jumo. ²⁰ Mwenu napane munkuvanavo kupakigwa kumwe Wakwilimyanga na mwenu uti munkuvanavo limanyilo. ²¹ Shan-imwandikidile mwenu i do, hamumanyite umwiu kanji ni kwamwaa mwenu mundimanya na kwamwaa kushang'apa uti hakupali kwalakéla muumwiu. ²² Da nshwang'a ni wakwashi? Nshwang'a ni aijá ántauka Yesu kuva Klistu; munu aju ni mmongo wake Klistu jo ántauka Tatamunu na Mwanamunu. ²³ Kula munu ántauka Mwanamunu namomo havenavo Tatamunu; aijá ammalanganga Mwanamunu namomo ankuvanavo Atata.

²⁴ Kanji kwaupande wenu mwenu ashilá shamwigwite kunantandi shipagwe nkati mwenu. Ikava kenga ashilá shamwigwite kunantandi shindapagwa nkati mwenu, mwenu momo mundapagwa nkati mumwe Mwanamunu namu Atata. ²⁵ Nadoni shalivikidile nae kwetu wetu ni ashi: shingumi shíkamalilika. ²⁶ Vyangu-malidile kumwandikila avi ni kwamwaa wa avalá vanduwánga. ²⁷ Kanji kwaupande wenu mwenu kupakigwa kwamupatile kwake nae, kunkupagwa nkati mwenu na mwenu hamunatakigwa shinu munu ampundishe. Kwoda kupakigwa kwake kunkumpundisha mwenu kwamwaa wavinu uti na kwaumwiu haku-nashang'apa shinu, pagwa nkati mwake kulingana kenga mo mwampundishididye.

Vana va Nnungu

²⁸ Mmanavangu napanelo pagwa nkati mwake nae kwambangidya dashi, palota kulilodya tuvenavo ntima shii patukalinyemya pamevo pake kwamwaa wadyoni.

²⁹ Kwoda mwenu mundimanya kenga nae ni waishaliya namomo manya doni uti vanatandedya vyaishaliya vandivalekwa kwaindila yake.

3 Mwenu, da linagwaledyo shani lyaladidye Atata kwetu wetu ata mpaka wetu kuka ndashamegwa vana va Nnungu, namwiu nimomo mwatuvalalele. Nadoni shilambo hashitumanyite mwaa nae havamanyite momo. ² Mmakunagwaleka, wetu napanelo ni tuvanavake Nnungu na mwatulota kuvalela mo hamunava kulilodya; napane palota kwida po, tundava kenga nae mwaa tundamwona kenga mo mwalalalele. ³ Kula munu ánanapela lilindilililo lyake nkati mwake nae, ankulyushanianga jo mwene ushapu kulingana kenga mo mwavalele nae ákave ushapu.

⁴ Kula ánatenda shimadambi namomo ankutenda ungave-lilamulo mwaa lidambi ni ungave-lilamulo.

⁵ Mwenu mundimanya kenga nae andáda pakulota aushaniange madambi na nkati mwake nae halipali lidambi. ⁶ Kula ápagwa nkati mwake hanatega shinu; kula ánatega, hangwene na ata hammanyite.

⁷ Mmanavangu, hamunanneke munu anduwanga; aijá átandedya vyaishaliya ni waishaliya kenga mwavalalele nae waishaliya. ⁸ Aijá ánatenda shimadambi umwe Ndamoni mwaa Ndamoni ni wakutega ngwengwe tangu kunantandi. Ni asho shaidilidile Mwanagwe Nnungu pakulota abamalangile-uti vitendo vimwe Ndamoni. ⁹ Kula ávalakwadidye kwaindila ya Nnungu hanatenda shimadambi mwaa ankuvanavo mavalelo ake Nnungu nkati mwake; haulula kutenda shimadambi mwaa andivalekwa kwaindila ya Nnungu. ¹⁰ Amu ni mwavaliladyedya vanavake Nnungu na vanavake Ndamoni: woewoe ákatandedya vyaishaliya hanava shinu wake Nnungu na ata aijá ákannagwaledya nung'unumunu, momo.

Tunagwaladyanie

¹¹ Doni, au ni ntenga wamwigwite tangu kunantandi: wewe tuvene, tunagwaladyanie. ¹² Hatunave kenga Kaimu munu umwe nkalau ámpadidye nung'une.

Mwaa shani animpedya? Mwaa Kaimu vitendo vyake vivele vyashikalau na vyannung'une kuva vyaishaliya.

¹³ Mmanung'unumunu, hamunashange shilambo pashimmangedya. ¹⁴ Wetu tundimanya kenga tundyuma mukupela kuka mushingumi mwaa tunkuvanagwaledya vanung'unumunu. Aijá ákave linagwaledyo ankupagwa nkati mukupela. ¹⁵ Aijá ámmangedya nung'unumunu ajo ni shimalivanu; mwenu mundimanya kenga hapali shimalivanu ávenavo nkati mwake shingumi shíkamalilika.

¹⁶ Mwatumanyidile linagwaledyo ni amu: Yesu Klistu andijaula shingumi shake kwamwaa wetu wetu na wetu leka tujaula shingumi shetu kwamwaa wavannung'unumunu. ¹⁷ Kanji napane aijá ávenavo mali ashilambo ashi akamwona nung'unumunu aijá wavimovovite kutwala kunanopa ntima, da linagwaledyo lya Nnungu lilota kumpagwidya dashi nkati mwake?

¹⁸ Mmanavangu, hatunanagwaledye kwalilove na kwapakanywa kanji muvitendo na muumwiu.

¹⁹ Davo tundamanya kenga wetu ni tuvaumwiu, tundatudya mitima vyetu pamevo pake ²⁰ pavituukumu tulyona kenga tunditega. Mwaa Nnungu ni nkumene kupunda mitima vyetu na ankumanya kula shinu.

²¹ Mmakunagwaleka, ikava kenga mitima vyetu havituukumu shinu, bai tunkuvanavo ntima shii pamevo pake Nnungu ²² na kula shinu shatunjugwa nae, tunkupata kwalakela kwake mwaa tunkwigwilila malamulo ake na kutandedya vyapuwangila. ²³ Napanelo lilamulo lyake ni ali: tukulupile lina lya Yesu Klistu Mwana wa Nnungu na tunagwaladyanie kenga mwatulamulilila nae. ²⁴ Aijá áigwilila malamulo ake ankupagwa nkati mwake Nnungu na nae nkati mwake.

Tundimanya kenga nae ankupegwa nkati mwetu kwaindila ya Imumu watupele.

Tenda nningo kwashi kwadyaloka dimumu

4 Mmakunagwaleka, hamunakulupile kula imumu kanji tenda nningo dimumu adyo ikava kenga dyaloka kwa Nnungu mwaa mushilambo amu vandyumilila vakulava voe vakushang'apa. ² Amu ni mwakumanyila Imumu umwe Nnungu: kula imumu ivalang'anga kenga Yesu Klistu andida mushimunu, ajo ankwaloka kwa Nnungu ³ kanji kula imumu ikamanyana Yesu Klistu, hainaalakela shinu kwa Nnungu. Ayo ni imumu yammongo wake Klistu jo wamumwigwite kenga andaida, tayali andiwiki mushilambo amu. ⁴ Mmanavangu, mwenu apa mmàke Nnungu nadoni mundivatema avalá vakulava vakushang'apa mwaa aijá ápagwite nkati mwenu ni nkumene kumpunda aijá ápagwite mushilambo amu. ⁵ Vanavo vo vamushilambo, nadoni shavatangola vanavo vatangola shamushilambo na shilambo, shinkuvaigwilila. ⁶ Kanji wetu apa ni tuvake Nnungu na aijá ámmanyiite Nnungu ankuwigwilila, aijá ákavele wa Nnungu hanatwigwilila shinu. Nadoni tunkumanya Imumu waumwiu na imumu wakuduwanga.

Linagwaledyo lya Nnungu kwetu wetu

⁷ Mmakunagwaleka, tunagwaladyanie mwaa linagwaledyo linkwaloka kwa Nnungu; kula munu ávenavo linagwaledyo, ajo andivalekwa kwaindila ya Nnungu na ankumanya Nnungu. ⁸ Aijá ákavenavo linagwaledyo, hammanyite Nnungu mwaa Nnungu ni linagwaledyo. ⁹ Amu ni mwalyadidye Nnungu linagwaledyo lyake pakati petu wetu pantumididye Nnungu Mwana jumo jojo mushilambo amu pakulota tuname kwaindila yake. ¹⁰ Amu ni mwalivalalele linagwaledyo: i do wetu tunínagwaledya Nnungu kanji nae ni átnagwaladidye wetu kutwala kuntumidya Mwanagwe pakulota ave shadaka shakudimanga shitundi shake Nnungu kwamwaa wamadambi etu. ¹¹ Mmakunagwaleka, pakuva Nnungu anditunnagwaledya davo, nawetu momo indivaikila tunagwaladyanie. ¹² Hapali ata munu jumo ángwene Nnungu; wetu tukanagwaladyania, Nnungu ankupegwa nkati mwetu na linagwaledyo lyake linkuwikila popo nkati mwetu.

¹³ Amu ni mwatumanyila kenga tunkupagwa nkati mwake na nae nkati mwetu mwaa anditupa Imumu wake. ¹⁴ Wewe tuvene tundyona na tunkumya ushuda kenga Tatamunu anintumidya Mwanagwe pakulota ave Mwamboli wamushilambo amu. ¹⁵ Woewoe ámalanganga Yesu kuva Mwana wa Nnungu, Nnungu ankupegwa nkati mwake na nae kupagwa nkati mwa Nnungu. ¹⁶ Wetu tundimanya na tunkukulupila linagwaledyo ali lyavenavo Nnungu kwetu wetu. Nae ni linagwaledyo na aijá ápagwa mulinagwaledyo alyo, ankupegwa nkati mwa Nnungu na Nnungu kupagwa nkati mwake nae. ¹⁷ Amu ni mwaliwikilila popo linagwaledyo pakati petu kwambangidya dashi muliduva

lyaukumu, wetu tuvenavo ntima shii mwaa kenga mo mwavalalele nae mo, nimomo mwatuvalalele wetu mushilambo amu. ¹⁸ Palipagwite linagwaledyo kujopa hakupali, leka apo linagwaledyo lyakuwikila popo, lindákumulanga kujopa. Mwenu, kujopa kunkwigwana na shaushanga na aijá ávenavo kujopa, hanava kuwikila popo mulinagwaledyo. ¹⁹ Wetu tunkuvanavo linagwaledyo mwaa nae ni ntandi kutunagwaledya. ²⁰ Aijá áashidoni, "ninkunnagwaledya Nnungu" kanji ammangedya nung'unumunu, ajo nshwang'a mwaa aijá ákannagwaledya nung'unumunu wamwona hayululika kunnagwaledya Nnungu aijá wakangwene. ²¹ Ali ni lilamulo lyatupele nae: aijá ánnagwaledya Nnungu, indivaikila momo annagwaledye nung'unumunu.

Ushuda kwamwaa umwe Yesu Mwana wa Nnungu

5 Kula ákulupila Yesu yakuva Klistu, † ajo andivalekwa kwaindila ya Nnungu na kula ánnagwaledya nkúvaleka, namomo anánnagwaledya aijá wammaleke nkúvaleka ajo. ² Amu ni mwatumanyila kenga tunkuvanagwaledya vanavake Nnungu patunnagwaledya Nnungu na patutandedya malamulo ake. ³ Amu ni mwatunnagwaladyedya Nnungu kwaupande wetu: patwigwilila malamulo ake na malamulo ake lo, hanaidopa shinu. ⁴ Kula ávalakwadidye kwaindila ya Nnungu anatema shilambo na aku ni kutema kwantamile shilambo, likulupililo lyetu. ⁵ Da nyani átema shilambo? Ni gweka aijá ákulupila kenga Yesu ni Mwana wa Nnungu.

⁶ Aju ni aijá áalakadile kwaindila yamedi na yamyadi, Yesu Klistu i gweka kwaindila yamedi kanji namomo kwaindila yamedi na yamyadi. Imumu ni áing'a ushuda mwaa Imumu ni umwiu. ^{††} Vapali vatatu vaumya ushuda: ⁸ Imumu, medi na myadi, vatatu ava ushuda wave uvelé umo. ⁹ Ikava kenga tunkukulupila ushuda wavanu, ushuda wa Nnungu ni úvenavo mana makumene mwaa au ni ushuda waumya Nnungu kwamwaa wa Mwanagwe. ¹⁰ Aijá ánkulupila Mwana wa Nnungu, ankuvanavo ushuda au nkati mwake. Aijá ákankulupila Nnungu, ankuenda kuva nae nshwang'a mwaa hanakulupila shinu ushuda waumya Nnungu kwamwaa wa Mwanagwe. ¹¹ Ushuda wene wo ni au: Nnungu anditupa shingumi shíkamililika na shingumi ashi shinkupagwa nkati mwa Mwanagwe. ¹² Aijá ávenavo Mwana, ankuvanavo shingumi na aijá ákavenavo Mwana wa Nnungu, havenavo shingumi.

Tunkuvanavo shingumi shíkamililika

¹³ Nimwandikila mwenu vinu avi mwemwe múkulupila lina lya Mwana wa Nnungu kwambangidya manye kenga munkuvanavo shingumi shíkamililika.

¹⁴ Au ni ntima shii watuvenavo kwa Nnungu: patujugwa kwodananavo malotelo ake, nae ankuwigwa.

¹⁵ Nadoni pakuva tunkumanya kenga nae ankuwigwa kwa ashilá shatunjugwa, tunkumanya kenga tundipata

† a Klistumana ake a Masiya, aijá walivikile Nnungu kuntumidya kwida. †† Inkwaminika kuva medi aubatisho na myadi vijaíke panshalaba apalá paukile ndaumya Nnungu ushuda kwaindila Imumu.

tayali avilá vyatujugwile. ¹⁶Ikava kenga munu anamwona nung'unumunu atega lidambi líkamuukanavo kukupela, anjugwangile na Nnungu andamupa shingumi; andavapa avalá vaténda lidambi líkavaukanavo kukupela. Lipali lidambi livaúkanavo vanu kukupela, nadoni kwa alyo, hangunatangola shinu mwenu mujugwangile. ¹⁷Ungave-shaliya uti ni lidambi kanji lipali lidambi líkamuukanavo munu kukupela.

¹⁸Tundimanya kenga uti aijá ávalakwadidye kwaindi-la ya Nnungu hanatega ila ávalakwadidye mu Nnungu

ananshunga na aijá nkalau, hamwavalela. ¹⁹Wetu tundimanya kenga tuvake Nnungu kanji shilambo uti shivele mwina mwankalau. ²⁰Namomo tundimanya kenga Mwana wa Nnungu andida na anditwing'a li-manyilo kwambangidya tummanyeye aijá Waumwui. Na wetu tunkupagwa nkati mumwe aijá Waumwui kwaindila ya Mwanamunu, Yesu Klistu. Aju ni Nnungu Waumwui na shingumi shíkamalilika.

²¹Mmanavangu, lishunge kwavannungu vakushang'apa.

II Nshuwau

Nandele

1 Kwanang'olo kuka kwankongwe wakutandalegwa pamo na vanavake, † vo vandivanagwaledya kwaumwiu na i gweka nangu ndivanagwaledya kanji namomo uti avalá vamanyaíte umwiu, ² kwamwaa waumwiu upágwa nkati mwetu na ulóta kupagwa kwetu wetu ngwengwe.

³ Umonyó, shididi na amani vyakwalakela kumwe Nnungu Tatamunu na kumwe Yesu Klistu Mwana wa Tatamunu, vindapagwa namu wetu nkati muumwiu na mulinagwaledyo.

Tuwene kwodananavo malamulo ake

⁴ Ndipuwanga poe pandivakadidye vanavako vanji vawena muumwiu kulingana kenga mwatupatidile lila-mulo kwalakela kumwe Atata. ⁵ Nadoni nangu ninkukujugwa mama i do, ninkukwandikila lila-mulo lyaambi kanji alilá lyatuvenavo tangu kunantandi: doni, tunagwaladyanie. ⁶ Linagwaledyo lyo ni ali: tuwene kwodananavo malamulo ake. Lila-mulo lyo ni ali: kenga mo mwamwigwididye mwenu kunantandi, wena mulinagwaledyo alyo.

† *Inkwaminika kenga nkongwe aju wakutandalegwa pamo na vanavake kwamba liganisha lyavandikidile ibalugwa ai.*

⁷ Mwaa vakuduwanga voe vandyumilila mushilambo amu na vovo vo, havanammalanganga shinu Yesu Klistu kwida mushimunu. Amu ni mwavalalele nkúduwanga na mmongo wake Klistu. ⁸ Lilaledye kwambangidya hashinanjaike ashilá shatukalalele namene madengo kanji pakulota mupate inudyo yakulinganana. ⁹ Uti aijá ákapagwa nkati mumapundisho amwe Klistu kanji apundanianga anavo, ajo have Nnungu. Napane aijá ápagwa nkati mumapundisho, ankuvanavo Atata namomo kuvanavo Mwana. ¹⁰ Ikava kenga munu wantindo au andaida kwenu pakaidanavo mapundisho ala, hamunampwashalele muding'ande dyenu na ata hamunamuudyange ¹¹ mwaa aijá amuudyanga jo, nae ankuva munu áliinjidyanga namu nae muvitendo vyake vyaukalau.

Nandele wamwisho

¹² Ninkuvanavo vyo vyakumwandikila mwenu kanji i kwalyamba na wino mwaa ninkulindila ngwide ninnole ngutwale ngutangole namu mwenu ing'ope kwaing'ope kwambangidya lipuwilo lyetu, liwikile popo.

¹³ Vana vankuluvo wakutandalegwa, †† vankuntu-midya nandele.

†† *Inkwaminika kenga vana vankuluvo wakutandalegwa vamba liganisha kwayaloka ibalugwa ai.*

III Nshuwau

Nandele

¹ Kwanang'olo kuka kumwe wakunagwaleka Gayu, aijá waninnagwaledya kwaumwiu.

² Wakunagwaleka, ninkushwali pakulota wako uvenavo shingumi shambone na vinu uti vikuukile shana, doni kenga mo mwaukila shana ungumi wako ³ mwaa ndipuwanga namene pakuwika vanung'unumunu, pavaumidye ushuda wakupagwa wako muumwiu, kwakutangola mwiu unkuka mushu unama nkati muumwiu. ⁴ Hanguvenavo lipuwilo likumene kupunda ali: lyakwigwa kenga vanavangu vankuwena muumwiu.

Malailililo kumwe Gayu

⁵ Wakunagwaleka, ni shinu shakukulupilika shauvatandela vanung'unumunu kupunda namene avalá vaukavamanyite. ⁶ Vanavo vandyumya ushuda muliganisha kwamwaa walinagwaledyo lyako. Wako undatenda shana ikava kenga undavapwashela shimwanda shave kwainamuna innagwéla Nnungu. ⁷ Ni kwamwaa Walina litadídye vanavo vaume kwabila kupwashalela lipwashalelo lyoelyoe kwavamidi. ⁸ Napavedoni indivaikila tuvapwashalele vanung'unumunu kenga ava pakulota tuve vamadengomwave nkati muumwiu.

Haunajedye wakunyata kanji wambone

⁹ Ndyandikila liganisha: kanji Diotelepeshi munu ínannagwela namene ave nang'olo pakati pave, hanatwigwilila. ¹⁰ Napavedoni pangulota kwida ako ndaundukulanga uti vyatenda, malove aukalau na akunyambikanga kwetu wetu. Nae avi havinantosha shinu, leka apo ankwita kuvapwashalela vanung'unumunu, kuvadivilila avalá valóta vavapwashalele na kuvavinganga muliganisha.

¹¹ Wakunagwaleka, haunajedye ashilá shakunyata kanji ashilá shambone. Aijá átenda wambone, ajo wake Nnungu; aijá átenda wakunyata, ajo hamwanite Nnungu. ¹² Kanji napane kwaupande umwe Demetiliu uti vandyumya ushuda wambone na wo umwiu wene unkwing'a ushuda kwamwaa wake. Na wetu momo tunkumya ushuda na wako unkumanya kenga ushuda wetu, wiu.

Nandele wamwisho

¹³ Ndívanavo vyoe vyakukwandikila kanji hangushilota ndikwandikile kwawino na kwalunduja ¹⁴ mwaa ninkulindila ngwide shipajelo. Bai apo, tundaambanga mwaa ing'ope kwaing'ope.

¹⁵ Amani ipagwe kwako wako. Vambodi va akuno vankuntumidya nandele. Vape nandele vambodi va ako jumo kwajumo.

Yudashi

Nandele

1 Nangu Yudashi ntumwa umwe Yesu Klistu na nene ni nung'une Tiyagu, kwenu mwenu mmakushamegwa múnagwaleka nkati mumwe Nnungu Atata na múshungigwa kwamwaa umwe Yesu Klistu.

² Shididi, amani na linagwaledyo vinu avi kwenu mwenu vyanjadyeke.

Shaushanga kwavakave Nnungu

³ Mmakunagwaleka, ata ikava kenga ngushindatum-bama yakumwandikila kwamwaa wakwambolegwa kwaupamo, ndyona kudyanga nimwandikile nin-naililila pakulota mushililidye likulupililo lyavapatile vakwilimyanga kwamwanda umo tu bai. ⁴ Mwaa vanu vanji vandiliinjidyanga shipiipi, vanavo ukumu yave indipangigwa tangu nakala, vanu vákave Nnungu vatindinganiánga umonyo wa Nnungu wetu pakulota shive shinu shakulaukila na vankumwita Nang'olo wetu jumo, jo *UMU* wetu, Yesu Klistu.

⁵ Ata ikava kenga mwenu mundilipundisha tayali, ninkulota ninkumbuwange doni *UMU*[†] andívaambola venentete kushilambo sha ku Mishili kanji ling'oto andívabamola avalá vákakulupidile. ⁶ Namomo vanjelo vakanyalidíle sheo shave vo vene bai vandíleka mautu ave, nadoni Nnungu andivakondya kushii vávaungile mang'unyang'unya ákamalilika pakulota vaukumigwe muliduva alilá likumene. ⁷ Kenga mwaivalaléle makaja a ku Shodoma na Gomola na makaja ashitanono, anavo ankuva kenga mpano washausanga shamoto úkamalilika; venentete vandílipalakedya muvyakulauka na kuvingilidya malotelo ákavele ashivalakwelo.

⁸ Nimumo momo vanu vovo vo, vakulupila dindoti kwaupande unji vankwambukisha mili vyave, kwaupande unji kwita unashilangola na kwaupande unji kuvakupulu valishangelo.

⁹ Doni, ata jo Migele nang'olo wavanjelo pashitaukananga namu Ndamoni vapwatanila mili umwe Musha, nae halyalaveke kumya ukumu yakukupulu kanji atédoni, “*UMU* akushulange.” ¹⁰ Vovo vo, vankukupulu vinu vyavakamanyite, namomo kwav-inu vyavamanya kwamavalelo, nkati muvyanavo vinkuvabamola kenga vakoko vákave ding'ano.

¹¹ Vapambale! Mwaa vanavo vankwodedya indila yoyo imwe Kaimu ^{††} kwamwaa wapaida, vanavo vandiliinjidyanga mumakosha lolo amwe Balaau, [‡] ni-

mumo momo vandabamolegwa nkati mukupinga kumwe Kola. ^{‡†}

¹² Vanu avo vankuva kenga vyongo muvikukulu vyenu vyalinagwaledyo vyamutenda valya namu mwenu kwabila ishima. Vovo vo, ni vakushunga valilísha vo vene. Maundi ákave imbula akunguluka na imepo; milandi víkapa vyepo muwakati uvaikidíle, vibubulígwe na vipadíle myanda mivili; ¹³ vankuva kenga mawimbi akujowa amwimanga, vitendo vyave vyadoni ni shulu shakunyata; namomo vankuva kenga dinondo diwanawananga díkave lyutu; kwavanavo vandivakandyedya ngwengwe lyutu lyakudimba do, pii.

¹⁴ Kwamwaa wavanu vovo ava, Enoki munu wasaba kutunduvangila Adamu nanae momo andívalanganga kaladavo, “Mwenu! *UMU* ankwida pamo na makumi manga avanjelo vake vakwilimyanga ¹⁵ pakulota kuvaukumu uti na kuvapa shaushanga avalá vákave Nnungu muvitendo vyave uti vyaungave Nnungu vya-vatandile na kwamwaa wamalove uti akupwateka avashitangola vakutega vákave Nnungu vamwamba nae.” ¹⁶ Vanu avo vankunama vatangadikanga ngwengwe, vakashalya, vaodedya malotelo ave vo vene, vankulitapila na kutangola malove anagwaléka kwambangidya vapate paida yavo vo vene.

Nanopa nkati mulinagwaledyo lyake Nnungu

¹⁷ Kanji napane mwenu mmakunagwaleka, kumbukila malove alalá avammanyidye kunantandi vamy-ombe vamwe *UMU* wetu Yesu Klistu. ¹⁸ Vanavo vashindamwaulila mwenu doni, “Mwakati wamwisho vandaumilila vakuliula vawena vaodedya malotelo aungave Nnungu.” ¹⁹ Ava ni vatádyá kupagwe kwapukananga pakati penu, vanu vamakumbukililo ashivalakwelo na vákave Imumu.

²⁰ Kanji napane mwenu mmakunagwaleka, mulidenga nkati mulikulupililo lyenu lyakwilimyanga-uti, mushwalya nkati mu Imumu Wanashwe, ²¹ nanopa nkati mulinagwaledyo lyake Nnungu akuno mulindila shididi shake *UMU* wetu Yesu Klistu pakulota shintwale muke kushingumi shíkamalilika.

²² Kwaupande unji avanavo shididi kwa avalá vaambambídyá, ²³ kwavanji vaambole muvajakola pamoto; kwaupande unji avanavo shididi mujopa kwambukishigwa muvangedya ata mpaka dinguvo dyave dyaushapu.

[†] Mumaandiko anji: a Yesu. ^{††} Lola Kutunduvanga 4:5-8.

[‡] Lola Ishabu 22:1-35. ^{‡†} Lola Ishabu 16:1-35.

Litumbyangilidyo

²⁴ Mwenu, kwa aijá Wadimongo pakulota kunshililidya mwenu hamunalikuvale na kwambangidya akamwimidye múkave makosha pamevo palishangelo

lyake kwalipuwilo likumene, ²⁵ kwake Nnungu ávele ju-mo, Mwamboli wetu, lipagwe lishangelo, ukumene, lyululilo na madalaka kwaindila imwe Yesu Klistu *UMU* wetu, kutunduvangila wakati uti, ambi apa na mpaka vyaka uti! Ame.

Maono

Maono avinu vilóta kutandeka

1 Maono amwe Yesu Klistu áumidye Nnungu paku-lota kuvamanyiya vatumika vake vinu vivaikidile vitandeka ambi popa. Nae anintumidya njelo wake kwida nammalangila ntumika wake walina Nshuwau, ² Nshuwau andivalanganga uti vyagwene mulilove Iya Nnungu na ushuda umwe Yesu Klistu. ³ Andyalaligwa aijá áshomya na vandyalaligwa avalá vaigwilíla malove amaono ala na kuvikila kuntima vinu uti vyandikíke; mwaa wakati undivandika.

Nandele na litumbyangilidyo

⁴ Nangu Nshuwau ninkwandikila maganisha saba avéle ku Ashiya, umonyo na amani vyakwalakela kumwe aijá ápagwite, e apagwíte na álota kwida. Namomo vyakwalakela kwa adilá dimumu saba divéle pepi-pepi na pashiteng'u shake ⁵ na vyakwalakela kumwe Yesu Klistu nshuda wakukulupilika, ntandi kudyuka pakati pavakupela na nkútawala wavaumu vamushilambo.

Nae ankutunagwaledya na kwamyadi vyake anditwambola mumadambi etu, ⁶ jojo jo kutwala kututenda kuva utawala, vakulangalalela-shadaka kwa Nnungu wake, jo Tatamunu. Kwake nae lipagwe lishangelo na lyululilo ngwengwe ngwengwe! Ame. ⁷ Mwe! Nae ankwida mumaundi † na kula munu andamwona ata mpaka avalá vantalwéle nkushi; †† makola uti amushilambo andatangadikanga kwamwaa wake nae. Nadoni amu mundatandeka! Ame.

⁸ "Nangu ni Alupa na Omega," ‡ atangola *UMU* Nnungu, "jojo ápagwite, e apagwíte na álota kwida, ni Wadimongo-uti."

Maono amunu ávele kenga Mwana Wamunu

⁹ Nangu Nshuwau ninung'unumunu na ninjenu ngúpagwa pamo namu mwenu mumauvilo, muutawala na mukunanopa nkati mumwe Yesu. Ndípagwa pashitingi shavashema Patimu kwamwaa walilove Iya Nnungu na ushuda umwe Yesu. ¹⁰ Napane muliduva limwe *UMU* ndítwaligwa mu Imumu kutwala kunyuma kwangu kwigwa lidi likumene kenga lipalapanda ¹¹ liishidoni, "Vyawona avi andika mushidingo shalyamba utwa utumidye mmaganisha saba avéle ku Ashiya: Epeshu, Eshimilina, Peligamu, Tiyatila, Shalideshi, Piladelipiya namu Laudisheya."

† *Lola Daniele 7:13.* †† *Lola Shakaliya 12:10.* ‡ *a Alupa na Omegamushigalegu mana ake a lutembo lutandi na lwakumalilila.*

¹² Napanelo ndíshiliuka kunnola nyani áshitangola namu nangu; pangushiliwike, ndyóna ditaa saba dyashaabu ^{††13} na pakati paditaa adyo, andípagwa munu ávele kenga Mwana Wamunu †† ágwete ikanju íshiwika mpaka mmadodo na àlyungile nkanda washaabu pashuva pake. ¹⁴ Muti na ugwimbu uvele wanashwe kenga pamba kwali kenga itabwe, ††† mevo ake kuva kenga lilamba Iyamoto, †††15 madodo ake kuva kenga Iyava Iyavataile nshasha Iyumíle palitungulu, [§] lidi Iyake kuva kenga libububu Iyamedi, ^{§†16} munkanakono wake kunyukata dinondo saba, nkanywa mwake kuma Iyambila Iyakukola kuvili ^{§††} na ing'ope yake kuva yakushenga kenga liduva palivala na dimongo.

¹⁷ Paningwene, ndígwa mmadodo mwake kenga ndipela. Bai nae anínguvika nkono wake wakunkanakono kutwala kushidoni, "Haunajope! Nangu ni Nantandi na Wamwisho. ¹⁸ Nangu Ninene Ngúnama; ndípela kanji napane lola, ninkunama ngwengwe ngwengwe! Nangu ni Nimwene myungulilo vyungulíla Kupela na Kumoka.

¹⁹ "Napanelo andika vinu vyaugwene, vipagwíte na vilóta kutandeka ling'oto Iya avi. ²⁰ Shipii shadinondo saba dyaugwene munkono wangu wakunkanakono na shipii shaditaa saba dyashaabu, mana ake ni ala: dinondo saba ni vanjelo vamaganisha saba na ditaa saba dyashaabu ni maganisha saba.

Kwaliganisha Iya ku Epeshu

2 "Njelo waliganisha Iya ku Epeshu mwandikile, 'Ala ni malove amwe aijá ányukete dinondo saba munkanakono wake na jojo jo, ankuwena shing'ati ditaa saba dyashaabu,

² "Nangu ndimanya vitendo vyako, kulyuvyauvyanga kwako, kunanopa kwako na haunavapambedyo shinu avalá vatandéya vyakunyata; namomo undivatenda nningo valivika kuva vamyombe kumbe vákavele kutwala kuvaanalela kuva vakushang'apa. ³ Wako unkunanopa na unkulipililila mauvilo kwamwaa walina Iyangu na haudabadabenge. ⁴ Ila napane shipali shikunyatyánga; wako undileka linagwaledyo Iyako litandi. ⁵ Kumbukila pashi paugwile. Lijugulange na tandedya vitendo vyako vitandi. Ukanalijugulanga, ninkukwidila ndausha itaa yako palyutu Iyake. ⁶ Kanji pane shipali shalala kwako wako, wako unkuvagedya vitendo

†† *Lola Kuma 25:37; II Maimyo 4:20; Shakaliya 4:2.* ††† *Lola Daniele 7:13.* †††† *Lola Daniele 7:9.* ††††† *Lola Daniele 10:6.* § *Lola Eshekieli 1:7.* §† *Lola Eshekieli 43:2.* §†† *Lola Ishaiya 49:2.*

vyavanikolau kenga mo mwanguvangadyedya nangu.

⁷ "Ávenavo matu, aigwe vyatangola Imumu na maganisha. Nkútema, andapata aki yakulya shepo shannandi washingumi uvéle kwa Nnungu lyutu lyalipuwilo.' "

Kwaliganisha Iya ku Eshimilina

⁸ "Njelo waliganisha Iya ku Eshimilina mwandikile, 'Ala ni malove amwe aijá Nantandi na Wamwisho, e apadíle kutwala kunama:

⁹ "Nangu ndimanya mauvilo ako na ungave-pashinu wako kanji wako po, untajili. Namomo mwavamwabalangila mwenu avalá valivíka kuva vayuda vakavele, kumbe ni shitala shakulipudidya shimwe Shatwani. ¹⁰ Vyaulota kuvauvanga vyo, huanajope. Igwa, pakati penu Ndamoni andavajela vanji nkalaboshi pakulota mulingigwe na mundauvauvanga maduva kumi. Kulupilika mpaka kupela nangu ndakupa lidaka lyashingumi.

¹¹ "Ávenavo matu, aigwe vyatangola Imumu na maganisha. Nkútema, mwiko hashintandeka shinu mukupela kwambili.' "

Kwaliganisha Iya ku Peligamu

¹² "Njelo waliganisha Iya ku Peligamu mwandikile, 'Ala ni malove amwe aijá ávenavo lyambila lyakukola kuvili:

¹³ "Ndimanya doni, paunama po ni pashiteng'u shimwe Shatwani. Ata ive davo mpaka ambi unku-namatila lina lyangu na haukanile likulupililo lyako kwangu, ata muwakati umwe Antipashi nshuda wangu wakukulupilika wavamyale pakati penu, po panama Shatwani po. ¹⁴ Ila vipali vinu padyoko vikunyatyánga wako, ako vapali vaodedya mapundisho ake Balaau, aijá ámpundishidye Balaki kuvateja lutambo vanaishilaeli pakulota valye vyakulya vyavashivaumidya vannungu vakushang'apa na valavalave; ¹⁵ na yadavo vapali pakati pako vanu vaodedya mapundisho avanikolau. ¹⁶ Napavedoni lijugulange! Ukanalijugulanga ndakwidila shipajelo ndavatenda ing'ondo vanu avo na alilá lyambila lyuma nkanywa mwangu.

¹⁷ "Ávenavo matu, aigwe vyatangola Imumu na maganisha. Nkútema ndamupa alye manaa apiíke na ndamupa lijanga lyanashwe lyavandike lina Iyaambi, lina alyo hapali ámanyite Ila jo mwene ápwashalela.' "

Kwaliganisha Iya ku Tiyatila

¹⁸ "Njelo waliganisha Iya ku Tiyatila mwandikile, 'Ala ni malove atangola Mwana wa Nnungu ávenavo mevo kenga lilamba Iyamoto na madodo ake kenga Iyava lyavataile nshasha:

¹⁹ "Nangu ndimanya matendo ako na linagwaledyo lyako pamo na likulupililo lyako, kutumika kwako na kunanopa kwako, ndimanya kenga ma-

tendo ako ankupunda akunantandi. ²⁰ Ila napane shipali shikunyatyánga, wako unkumpambedyá Yeshebeli nkongwe álivika kuva nkúlava. Kwamapundisho ake, nae ankuvaashedya vatumika vangu mukulavalava na mukulya vyakulya vyavavaumididye vannungu vakushang'apa. ²¹ Nangu nimupa wakati wakulota alijugulange kulavalava kwake kanji nae hatamwa.

²² "Napavedoni nantaa shilwele na ndavataa mauvilo akumamodya uti avalá valavaléve namu nae ikava kenga havalijugulanga vitendo vyake.

²³ Ndavamalidya vana vankongwe aju. Nadoni maganisha uti andamanya do, nangu ni nalalyanga nti-ma pamo na makumbukililo, namomo nannipa mwenu kwodana na matendo enu.

²⁴ "Kanji mwenu mmanji mma ku Tiyatila múkaodedya mapundisho alo na múkalipundishidye avilá vyavashema vipii vimwe Shatwani, ninkummanyi doni, hanintika shinu ibasha inji; ²⁵ Ila ashilá shamavenavo, kamulila na dimongo mpaka nangu pangulota kwida.

²⁶ "Nkútema na átandedya uti mwangulatela nangu mpaka kumwisho ndamupa madalaka kuvatawalila venentete: ²⁷ Nae andavalangalalela na ipimbo yashitali na andavapwajanga kenga vilongo; ^{†28} ni madalaka lolo angupatile kumwe Atata. Namomo ndamupa lyaloshi.

²⁹ "Ávenavo matu, aigwe vyatangola Imumu na maganisha.' "

Kwaliganisha Iya ku Shalideshi

3 "Njelo waliganisha Iya ku Shalideshi mwandikile, 'Ala ni malove amwe aijá ávenavo dimumu saba dya Nnungu na dinondo saba:

"Ndimanya vitendo vyako, wako unkuvanavo shimbili shakuva umumi, kumbe undipela. ² Ava mevo! Nonowanga avilá vibakidíle mushingumi vikanava kupalela uti mwaa muvitendo vyako mo, ndilola hashipali shilinganéne pamevo pa Nnungu wangu. ³ Kumbukila avilá vyaupatile na vyawigwite, tandedya na lijugulange. Napane ikava kenga hauva mevo, bai ndakwidila kenga nkwíva, wako huanmanyi isaa yangulota kukwidila. ⁴ Ata ive davo ko ku Shalideshi ko, unkuvanavo vanji padyoko vákanyatyenge dinguvo dyave. Vovo vo, vandawena namu nangu vágwalenge dinguvo dyave dyanashwe mwaa vandivaikila.

⁵ "Mumo momo nkútema vanangwadya inguvo yanashwe. Mwiko hanimputa lina lyake mulibuku lyashingumi Ila nammalanganga pamevo pamwe Atata na pavanjelo vake.

⁶ "Ávenavo matu, aigwe vyatangola Imumu na maganisha.' "

† Lola Dimu 2:8-9.

Kwaliganisha Iya ku Piladelipiya

⁷ “Njelo waliganisha Iya ku Piladelipiya mwandikile, ‘Ala ni malove amwe aijá Wakwilimyanga na Waumwui, ávenavo myungulilo vimwe Daudi. Shaungula nae, hapali wakunga na shaungile nae, hapali wakuungula:

⁸ “ ‘Nangu ndimanya vitendo vyako. Lola, mushu mwako ndishimula nnango wakaulula munu kushima. Ndikumanya do, ata ikava kenga unkuvanavo dimongo padyoko, undishunga lilove lyangu na hawitile lina lyangu. ⁹ Laledya shangulota kuvatenda avalá vamushitala shakulipudidya shimwe Shatwani, vo valivíka kuva vayuda kumbe vakavele vayuda vavele vakushang'apa. Mwiu ndavatadya valipudye mmadodo mwako na vamanye do, nangu ndikunagwaledya. ¹⁰ Pakuva wako undishunga malailililo amukunanopa kwamwaa wangu nangu, nanangu momo ndakushunga wakati wamalingo alóta kwida mushilambo uti pakulota kuvalinga vanu vanáma vamushilambo shapai. ¹¹ Ninkwida shipajelo! Kamulila ashilá shauvenavo kwambangidya hanatwale munu lidaka lyako.

¹² “ ‘Nkútema nantenda kuva libodo Iyaing'ande ya Nnungu wangu na mwiko hauma kavili. Ndamwandika lina Iya Nnungu wangu na lina Iyanjini wa Nnungu wangu yani Yelusalemu yaambi yalakéla kuwa kwa Nnungu wangu; namomo ndamwandika lina lyangu Iyaambi.

¹³ “ ‘Ávenavo matu, aigwe vyatangola Imumu na maganisha.’ ”

Kwaliganisha Iya ku Laudisheya

¹⁴ “Njelo waliganisha Iya ku Laudisheya mwandikile, ‘Avi atangola Ame, nshuda wakukulupilika na waumwui, ntipu wa avilá vyakandyenge Nnungu:

¹⁵ “ ‘Ndimanya vitendo vyako, wako haunadidima shinu na ata haunapiya shinu. Kudyanga paukavéle wakudidima kwali wakupiya; ¹⁶ nadoni kwoda mwaa wako uve pakatipakati, haunadidima shinu na haunapiya shinu, bai nguve pepi-pepi na kukutapika.

¹⁷ ‘Wako uushidoni, ‘Nangu nintajili, nditajilika doni na hashipali shingwova.’ Kumbe haunalimanya shinu kenga wako wakuvavanga, útaa shididi, úkave pashinu, wakuputala na úve matakudavo.

¹⁸ Napavedoni ninkukulingula wide kwangu ushume vinu avi: shaabu ipitidíle pamoto pakulota uve utajili, dinguvo dyanashwe ugwale pakulota dyoni dya-wou wako hadinaaneke na ntela upake mevo ako pakulota ulole. ¹⁹ Nangu ndávaduma na kuvapa lipundisho uti avalá vandivanagwaledya. Napavedoni, avanavo ntukuta na lijugulange. ²⁰ Lola, ndiimila pannango ninkundandonda lwidi. Ikava kenga munu anaigwa lidi lyangu na kushimula, mwiu nangu ndainjila nng'ande mwake na ndalyanavo pamo.

²¹ “ ‘Nkútema ndamupa aki yakwikala namu nangu pashiteng'u pangu kenga nangu momo nditema na ndiikala namu Atata pashiteng'u pake.

²² “Ávenavo matu, aigwe vyatangola Imumu na maganisha.”

Shiteng'u shalishangelo kuwa

⁴ Vikapite vinu avi, ndilola kutwala kwona kuwa nnango úshimwike. Namomo alilá lidi lyangwigwíte kunantandi litangola namu nangu kenga lipalápanda, lyolyo kutwala kushidoni, “Kwela wide apa, nangu ndakulodya vinu vilóta vitandeké ling'oto Iya avi.” ² Muwakati wowo ndítwaligwa mu Imumu, kumbe kuwa ko shindípagwa shiteng'u, mwene shiteng'u àikalidile; ³ aijá aikéle pashiteng'u apalá kwakunnola vila, avele wakung'ala kenga Ijanganga Iyalinjano na Iyanauvi. Namomo indípagwa yuvi íshing'ala mwali-mashi itang'anadidye shiteng'u. ⁴ Yo nanyenje shiteng'u yo, vindípagwa viteng'u ishilini na nsheshe; muviteng'u mo kwikala vanang'olo ishilini na nsheshe vágwalenge dinguvo dyanashwe, myuti vyave vágwalenge madaka ashaabu. ⁵ Po pashiteng'u po, pankumeta na pankuma vilindimu vyading'uva. Mushu mwake, vinkukalela moto vyenje saba, vyenje avi ni dimumu saba dya Nnungu. ⁶ Namomo mushu mwashiteng'u asho, shinkupagwa shinu mwaimanga yashilolo kenga Ijanganga Iyakulangala.

Nyenje mwake shiteng'u vinkupagwa viumbi nsheshe vyakuvaumbala mevo mushu na kunyuma. ⁷ Shiumbi shitandi shinkuva kenga ntumi, shambili kuva kenga ng'ombe, shantatu ashi kuvanavo ing'ope kenga yamunu na shansheshe kuva mwashipungu áuluka. ⁸ Viumbi nsheshe avyo kula shiumbi shinkuvanavo dimapa sita vâumbaligwidye mevo mumili uti mpaka nkati dimapa. Vanavo shilo na mui havanapumula shinu vaashidoni,

“Wakwilimyanga, wakwilimyanga, wakwilimyanga ni *UMU* Nnungu Wadimongo-uti apagwíte, ápagwite na álota kwida.” †

⁹ Napanelo viumbi avilá kula mwanda pavamupa lishangelo, ishima na kunnambwalela aijá áikele pashiteng'u, jojo ánama ngwengwe ngwengwe, ¹⁰ vanang'olo ishilini na nsheshe avalá vandáguguválanga mpaka vyenye kundondya pai pamevo pamwe aijá áikele pashiteng'u, valipudya kwa aijá ánama ngwengwe ngwengwe na vavika madaka ave mushu shiteng'u vaashidoni,

¹¹ “Wako *UMU*, Nnungu wetu, undivaikila kupata lishangelo, ishima na dimongo mwaa wako undikandyanga vinu uti na kwalilotelo lyako vindikandyangigwa na vipali.”

Ngandolo ni ávaikidile kudingula shidingo

⁵ Napanelo munkono wakunkanakono umwe aijá áikele pashiteng'u, ndyóna shidingo shavaandike nkati na panda vânamatidyenge dishelu saba. ² Namomo ndímwona njelo wadimongo alaililila na lidi likumene aashidoni, “Nyani ávaikidile kudingula shidingo na kunamatulanga dishelu?” ³ Kanji hapag-

† *Lola Ishaiya 6:3.*

wíte ata munu jumo kuwa, mushilambo na pai wakuu-lula kudingula shidingo asho kulola shivé nkati mwake. ⁴ Napane nangu ngushindalila namene kwamwaa me kupatikananga munu ávaikidile kudingula kutwa kulola nkati mushidingo asho. ⁵ Kutwala jumo pakati pavanang'olo kungwaulila doni, "Haunalile! Lola, ntumi walikola limwe Yuda, ntipu umwe Daudi, nae anditema. Jojo jo, ankuulula kudingula shidingo sho na kunamatulanga dishelu dyake saba."

⁶ Ling'oto ndímwona Ngandolo áshaaneka kenga andibyaigwa àimidile shing'ati shiteng'u vântang'anadidye viumbi nsheshe na avalá vanang'olo. Jojo jo, andívanavo dimembe saba na mevo saba, alo ankwitika kuva dimumu saba dya Nnungu dyatumididye mushilambo uti. ⁷ Nae andyúka ndavandika kutwala shidingo ashilá shivéle munkono wakunkanakono umwe aijá áikele pashiteng'u. ⁸ Akapwashalele, avilá viumbi nsheshe pamo namu avalá vanang'olo ishilini na nsheshe vandíguguvalanga mpaka vyenye kundondya pai mushu mwa Ngandolo. Kula munu pakati pave andívanavo kanyembe na midamu vyashaabu vyakumbala lubani, vyanavo ni kushwali kwavakwilimiyanga. ⁹ Vanavo vashindaimba lwimu lwaambi vaashidoni,

"Wako ni úvaikidile kutwala shidingo na kunamatulanga dishelu dyake mwaa undibyaigwa na kwamyadi vyako uninshumila Nnungu vanu vakula likola, inangodi, venentete na shilambo. ¹⁰ Undivatenda kuva utawala na vakulangalalela-shadaka kwa Nnungu wetu;

vanavo vandalangalalela mushilambo."

¹¹ Napanelo ndílola kutwala kwigwa lidi lyavanjelo voe, vipinga vyave vivele makumi manga vântang'anadidye shiteng'u pamo na avilá viumbi, vanang'olo

¹² vaimba pashanya po vaashidoni,

"Ávaikidile kupata dimongo na mali, limanyilo na lyululilo, ishima, lishangelo na litumbyangilidyo ni Ngandolo ábyaigwe."

¹³ Napanelo ndígwa kula shiumbi shivéle kuwa, mushilambo, pai, mwimanga na uti vipagwíte amo vi-
ishidoni,

"Kwake aijá áikele pashiteng'u na kumwe Ngandolo, litumbyangilidyo na ishima, lishangelo na utawala vipagwe ngwengwe ngwengwe."

¹⁴ Avilá viumbi nsheshe kushidoni, "Ame." Bai vanang'olo avalá vandíguguvala kutwala kulipudya kwake.

Kunamatuligwa kwadishelu saba

6 Napanelo ndímwona Ngandolo ánamatula isheli itandi pakati pa adilá saba. Kutwala kumwigwa jumo pakati pa avilá viumbi nsheshe átangola lidi lyakuva kenga ing'uva aashidoni, "Ida!" ² Mwe! Ndikalole mushu mwangu kumwona punda wanashwe. Ánkwadile punda ajo, andínyukata upindi na vandimu-

pa lidaka. Nae andyúma kenga nkútema na andyúka mushu atema.

³ Ngandolo panamatwile isheli yambili, ndímwigwa shiumbi wambili aashidoni, "Ida!" ⁴ Bai andyúma punda junji wanauvi. Ánkwadile punda ajo, andípata madalaka akusha amani mushilambo kwambangidya vanu vabyaanange shivenevene, namomo vandímupa lyambila likumene.

⁵ Ngandolo panamatwile isheli yantatu ndímwigwa shiumbi wantatu aashidoni, "Ida!" Ndikalole kutwa kumwona punda wakudimba, ánkwadile punda ajo, andínyukata mmakono mwake ikapani. ⁶ Ndigwa mwalidi lyakwalakela pakati pa avilá viumbi nsheshe li-
ishidoni, "Ipishi imo yangano kwadinali imo, dipishi nnatu dyashavada kwadinali imo † kanji haunaan-gange mauta na vinyu."

⁷ Napanelo Ngandolo panamatwile isheli yansheshe, ndígwa lidi lyashiumbi shansheshe liishidoni, "Ida!" ⁸ Ndikalole ndímwona punda wailangi yaliu. Ánkwadile punda ajo, vashinshema Kupela, Kumoka kushindamwoda pepi-pepi. Vovo vo, vandivapa madalaka akuvabyaa vanu na lyambila, indala, vilwele na vanyama vakukalipa mwimbandi yansheshe yashilambo.

⁹ Napane Ngandolo panamatwile isheli yamwanu, mwina mwake alutali ndyóna ungumi wavanu vabyaigwe kwamwaa walilove lya Nnungu na kwamwaa wakumya ushuda. ¹⁰ Vovo vo, vashindatanga dikanga pashanya po vaashidoni, "Da mpaka duvani wako *UMU* Wakwilimiyanga na Waumwiu undatimatimanga kuvaukumu na undavalipisha vanu vanáma mushilambo kwamwaa wamyadi vyetu wetu?" ¹¹ Bai vandívapa kula munu ikanju yanashwe na kuvaulila valindile kavili padyoko mpaka itimile ishabu yavatumikamwagwe na yavanung'unumunu valóta kubyagwa kenga momo mwavabyaigwididye vanavo.

¹² Napanelo ndílola kumwona Ngandolo pashinamatula isheli yasita kutwala kuumilila shindangenda. Liduva lindídimba kenga inguvo yakaniki na mwedi uti kukunduvula kenga myadi; ¹³ dinondo dyakuwa dindígwangila pai kenga mwembe mwanapakatikangila membe mambii ikapunga imepo ing'umene; ¹⁴ kuwa kundíjavanikananga kutwala kulipindanga kenga mwalinalipindangila likande likalumukananga pakati, kula lishinga pamo na vitingi vandínyemya mumautu ave.

¹⁵ Napane vaumu vamushilambo, vanu vakwishimika, vananangalaledi vavaing'ondo, vatajili, vadimongo, vatumwa uti pamo na vavéle muunaiti, vandílipiyanga mmitupa na mudimbanda dyamashinga, ¹⁶ vatan-galela mashinga na majanga kushidoni, "Tubulikidya utupiye kwambangidya hatunone ing'ope imwe aijá áikele pashiteng'u namomo utupiye mushitundi shake Ngandolo. ¹⁷ Mwaa lindiwika liduva likumene lyashitundi shave, nyani álota kuulula kunanopa?"

† Dinali imo uvele nshala wammádengo kwaliduva limo. Apa pankulilodya kenga dibezi adivele dyalukwinyango.

Kuvikigwa kwanamakong'o vatumika vake Nnungu

7 Napanelo vikapite avyo, ndívona vanjelo nsheshe vaimilenge mumatununa nsheshe amushilambo vakamwile dimepo nsheshe dyamushilambo vadivilila kwambangidya hadinapungile shilambo, ata imanga na ata nnandi woewoe. ² Namomo ndímwona njelo junji akwela kwalyalakela liduva ànyukete shinu shakuntaila namakong'o wa Nnungu mumi. Nae andítangola pashanya po avaulila vanjelo nsheshe avalá vavapéle shimadengo shakwananganga shilambo, imanga ³ aashidoni, "Hamunaanangange shilambo, imanga ata milandi mpaka apalá patulota kummika namakong'o pavyenye vyavatumika vake Nnungu." ⁴ Napane ndígwa ishabu yavanu avalá vavikígwe namakong'o, vanu avo vavele imiya imo alubaini na nsheshe alupu kwamakola uti avanaishilaeli.

⁵ Likola limwe Yuda vavikígwe namakong'o vavele vanu kumi na mbili alupu, limwe Lubeni kumi na mbili alupu, limwe Gadi kumi na mbili alupu, ⁶ likola limwe Asheli kumi na mbili alupu, limwe Naputali kumi na mbili alupu, limwe Manasheshe kumi na mbili alupu, ⁷ likola limwe Shimiyau kumi na mbili alupu, limwe Lawi kumi na mbili alupu, limwe Ishakali kumi na mbili alupu, ⁸ likola limwe Shebuluni kumi na mbili alupu, limwe Yoshe kumi na mbili alupu namomo likola limwe Benjameni vanu kumi na mbili alupu ni vavikígwe namakong'o.

Dimbumba dyakwalakela muvilambo uti

⁹ Napanelo vikapite vinu avyo ndílola, mwe! Ndyóna dimbumba díkaululika kuvalangika; adyo dyakwalakela kula shilambo, makola uti, venentete na dinangodi vaimilenge mushu shiteng'u na mwa Ngandolo vāgwalenge dikanju dyanashwe, mmakono mwave vānyakatenge malala. ¹⁰ Vashindatangola pashanya po vaashidoni,

"Kwambwalegwa kunkwalakela kwa Nnungu wetu, aijá áikele pashiteng'u na kwa Ngandolo."

¹¹ Vanjelo uti vandíimilanga vātang'anadidye shiteng'u, vanang'olo pamo na avalá viumbi nsheshe kutwala kugugvala vyenye kundondya pai valipudya kwa Nnungu ¹² vaashidoni,

"Ame.

Litumbyangilidyo na lishangelo,
limanyilo na lilambwalalelo,
ishima, dimongo na lyululilo
vive kumwe Nnungu wetu
ngwengwe ngwengwe.

Ame."

¹³ Kutwala nang'olo jumo pakati pavanang'olo anígudya, "Da ava vagwaléngé dikanju dyanashwe vananyani na vaalakadilé kwashi?" ¹⁴ Nangu kushidoni,

"Nang'olo, wako ni úmanyite." Nae doni, "Ava ni avalá vaalakadilé mmauvilo akujowa, vashapénge dikanju dyave mummyadi vya Ngandolo kutwala kuva dyanashwe.

¹⁵ "Ni ashi shitádyá vapagwe mushu shiteng'u sha Nnungu;

vanavo vankutumika shilo na mui mwing'ande yake; aijá áikele pashiteng'u andavakunjupulila yema yake.

¹⁶ Vanu avo mwiko haivakola indala kavili, inyota na ata pavakona kupiya liduva kwali kuuduwa. †

¹⁷ Mwaa Ngandolo ávele shing'ati shiteng'u andavashunga

na andavaukanavo papandukenge medi ashingumi na Nnungu andavapukutanga myodi uti kumevo kwave."

Kunamatuligwa kwaishelu yamwisho

8 Napanelo Ngandolo panamatwile ishelu yasaba kuwa kundímalalika wakati kenga wanushu isaa.

² Napane ndívona vanjelo saba vaimilenge mushu mwake Nnungu na vavapa mapalapanda saba.

³ Andíwika njelo junji apalá palutali ànyukete shombo shashaabu shavanatutumididya lubani, kwimila. Jojo jo, vandímupa lubani lwoe lwakulota kwanganianga na kushwali kwavakwilimyanga uti akaumye palutali lwashaabu luvéle mushu shiteng'u. ⁴ Mmakono mwanjelo mundyúma lyou lyalubani pamo na kushwali kwavakwilimyanga kuka kwa Nnungu. ⁵ Napanelo aijá njelo andítwala shombo shalubani ashilá kuumbadya makala amoto apalutali kutwa kujela mushilambo shapai. Bai kundyúmilila ding'uva, shilindimu, kumeta na shindangenda.

Mapalapanda saba

⁶ Napanelo avalá vanjelo saba ve vanyukéte mapalapanda saba vandílipanganianga pakulota kwomba mapalapanda.

⁷ Njelo ntandi andyómba lipalapanda kutwala imbula yadinyanga na moto wanganikéne na myadi kujalegwa mushilambo. Imbandi yantatu yashilambo, imbandi yantatu yamilandu na uti udani umbii, vindítikinyuka.

⁸ Njelo wambili andyómba lipalapanda kutwala shinu shakuva mwalishinga likumene likaléla moto kujalegwa mwimanga, imbandi yantatu yaimanga kujalukanga kuva myadi, ⁹ imbandi yantatu yaviumbi vináma mwimanga vindípalanga na imbandi yantatu yadimeli indíbamalegwa.

¹⁰ Njelo wantatu andyómba lipalapanda kutwala kuwa ko kumatuka inondo ing'umene kenga likamu lyamoto likaléla ndagwilila mwimbandi yantatu yadyundi na mwapandukanga medi: ¹¹ lina lyainondo ayo vashishema, "Lipangapanga." Bai imbandi yantatu yamedi indíjalukanga kuva akukalala na vanu voe vandípalanga kwamwaa wakukalala kwamedi alo.

† *Lola Ishaiya 49:10; Dimu 121:6.*

¹² Njelo wansheshe andyómba lipalapanda kutwala kuligwa imbandi yantatu yaliduva, yamwedi, yadinondo na mpaka imbandi yantatu yavinu avyo indídimba. Imbandi yantatu yamui na yashilo momo, indídimba do pii! ¹³ Akuno ngulola, níndigwa lidi lyashipungu áshuuluka kuniania apita atangola pashanya po aashidoni, “Vapambale, vapambale, vapambale vanu vanáma mushilambo shapai kwamwaa wamadi amapalapanda abakidile avalota kwomba avalá vanjelo vatatu.”

9 Njelo wamwanu andyómba lipalapanda kutwala nangu kwona inondo ikanywéke kuwa igwilidile pai. Inondo jo vandímupa mungulilo wannango wa ku Litavaleva. ² Napane akaungule nnango wa ku Litavaleva, lyoi lyamulitavaleva lindíkwela, lyolyo lyo livele kenga lyapashivanda shikumene. Liduva pamo na niania vindídimba kwamwaa walyoi líshaalakela ku Litavaleva. ³ Mulyoi mo andyúmananga madalombwe kwida mushilambo shapai, madalombwe alo vandíva-pa madalaka kenga aving'ila mushilambo amu. ⁴ Lolo lo, andílamuliligwa pakulota havaananangange udani wamushilambo, mamba na ata milandi ila vanu vákavikigwe namakong'o wake Nnungu pavyenye. ⁵ Vavalamulidile pakulota vanavabyae ila vavaavya-uvyaunge muda wamyedi mwanu. Mauvilo alo, ankulinganana kenga mauvilo ánapata munu wannumile shing'ila. ⁶ Mumaduva alo vanu vandálambela kupela kanji havapata. Vandalota vapele kanji jo kupela jo, andavatukuta.

⁷ Madalombwe alo ashaaneka mwavapunda vavampangienge kuka kwing'ondo. Myuti myave kupagwa shinu mwalidaka lyashaabu na ding'ope dyave divele kenga dyavanu; ⁸ ugwimbu wave uvele wakulepa kenga wavakongwe na meno ave kuva kenga antumi; ⁹ pashuva pave vandívanavo vikopa kenga vikopa vyavitali, shilindimu shadimapa dyave shivele mwashilindimu shamalingishi avapunda voe vatukutíla kwing'ondo. ¹⁰ Madalombwe alo, vanku-vanavo mishila na divola kenga ving'ila kutwala mo mumishila vyave mo, kuvanavo madalaka akuvaananganga vanu muda wamyedi mwanu. ¹¹ Vovo vo, vanku-vanavo umu wave yani njelo wa ku Litavaleva, mushibalaniya Abadoni na mushigalegu, Apoliyoni. ^{†12} Apambale ntandi andipita. Kanji mwe! Ling'oto lya ajo, vankwida vapambale vanji vavili.

¹³ Njelo wasita andyómba lipalapanda kutwala nangu kwigwa lidi lyakwaloka mmatununa nsheshe a alutali lwashaabu avé mwadimembe luvéle pamevo pake Nnungu. ¹⁴ Lidi alyo lishimwamba njelo wasita avénavo lipalapanda, lidi lyo lishishidoni, “Vaungule vanjelo nsheshe vaungwídye pepi na palundi lukumene lwa Eupalati.” ¹⁵ Nadoni vandyúnguligwa avalá vanjelo nsheshe vavapangienge kwambangidya mwisaa ayo, liduva alyo, mwedi awo na mwaka awo, vabyae imbandi yantatu yavanu. ¹⁶ Ishabu yavipinga vyavaing'ando vavapunda ivele dimilioni dimiya mbili; nangu níndigwa nimwene ishabu ayo. ¹⁷ Mumaono,

amu ni mwandivaanalele vapunda pamo na vaku-vatukusha vave vavedoni, vikopa vyave vivenavo dilangi dyakuvilingananga: vyanauvi kenga moto, vyakibulu kenga majanga alimashi na vyamanjano kenga dindimi dyaipataki. Myuti vyavapunda avo vivele mwamyuti vyavantumi na ndikanywa mushindauma moto, lyoi pamo na ipataki.

¹⁸ Kwamwaa wavyaushanga avi vitatu, moto, lyoi na ipataki víshuma ndikanywa, indípela imbandi yantatu yavanu. ¹⁹ Madalaka avapunda avo avele ndikanywa na mmishila vyave mwaa mishila vyave vivele kenga dinyoka na kuvanavo myuti vyakubyaila.

²⁰ Avalá vákapadile muvyaushanga avyo, havalijuguléngé ata padyoko vela yakulipudya kwamajini na kwavinu vyavakandyenge vo vene yani mashinamu ashaabu, alyava, ankuva, amajanga pamo na amilandi, ákaulula kulola, kwigwa na ata kuwena. ²¹ Namomo havalijuguléngé yakubyaa kwave, yawavi wave, yakulavalava kwave na yakwiva kwave.

Njelo na shidingo shidikidiki

10 Napanelo ndímwona njelo junji wadimongo ashuluka kuwa. Njelo ajo lindímwinikidyanga lyundi, pamuti pake kupagwa yuvi. Ing'ope yake kushenga kenga liduva kutwala madodo ake kuva kenga mabodo amoto. ² Nae mmakono mwake andínyukata shidingo shidikidiki shidingukenge. Lido do lyankanakono àlivete mwimanga na lyanshanda àlivete kumwangu ³ atangola na lidi likumene kenga lidi lyantumi. Akatangole, ding'uva saba adilá dindyúmya madi ave. ⁴ Akaume madi ading'uva saba adyo, nangu ngubakidile padyoko na kwandika kanji ndígwa lidi lyakwalakela kuwa liishidoni, “Vinu vitan-galéke na ding'uva saba dyo, piya; haunandike!”

⁵ Napanelo njelo aijá waningwene àimidile mwimanga na kumwangu, andínyaladyedya nkanankono wake kuwa ⁶ kutwala kulilapila kumwe aijá ánama ngwengwe ngwengwe, ákandyenge kuwa na uti vivéle ako, pai na uti vivéle amo, imanga na uti vivéle amo aashidoni, “Wakati wakutimatimanga undipita: ⁷ napane mumaduva álota kwomba lipalapanda aijá njelo wasaba, undawikila popo nnugu washipii shake Nnungu kenga mwavavalangangidile vatumika vake, vo vakulava.”

⁸ Napanelo lidi lyakwalakela kuwa lyangwigwíte alilá lindítangola kavili namu nangu liishidoni, “Katwale shidingo shidingukéngé ashilá shivéle mmakono mwake njelo áimidile mwimanga na kumwangu.” ⁹ Nangu ndímuukila njelo kutwala kunjugwa angupe shidingo shidikidiki ashilá. Nae kungwaulila doni, “Twala ulye. Shanavo munda mwako shindakalala ila nkanywa mwako mo shindanogwa kenga ushi.” ¹⁰ Bai shidingo shangutwéte mmakono mwanjelo kulya ashilá, pangushilya po, nkanywa amu shishindanogwa kenga ushi kanji ndikamile, munda ni kukalala doni.

¹¹ Napane vaníngwaulila doni, “Indikuvaukila ulave kavili kwamwaa wavenentete voe, vilambo, dinangodi pamo na vaumu.”

† a Abadoni namu a Apoliyoni, mana akea Nkúbamola.

Vashuda vavili

11 Napanelo vaníngupa lupambai luvéle mwanandi wavanapimila kutwala kungwaulila doni, “Takatuka ukapime ing'ande yake Nnungu, alutali na uvavange vanu valipúdyá nng'ande mo. ² Ila nshana wo leka, haunapime mwaa wanavo vandivajaulila vamidi. Vovo vo, vandakandanga njini wakwilimyanga mumyedi alubaini na mbili.

³ “Nene ndavapa lilamulo vashuda vangu vavili, vana-vo vandavava mumaduva alupu imo dimiya mbili na sitini vágwalenge maguni.”

⁴ Vashuda vavili avo ni milandi mivili vyaulivela na dikalaboi mbili dipágwa mushu mumwe *UMU* washilambo. ⁵ Munu álota kulingangila kuvatenda kunyata, ndikanywa mwave mundauma moto wakuvalya vamongo vave. Amu ni muvaikidíle kupalangila avalá valóta kuvatenda kunyata vanu avo. ⁶ Vanavo vandivanavo madalaka akushima kuwa kwambangidya imbula hainatonye muwakati wavalava. Namomo vandivanavo lilamulo lyakujalulanga medi kuva myadi na kubyaa shilambo kwakula inamuna yavyaushanga, myanda vyo vyavalota vene.

⁷ Napanelo pavamalila ushuda wave, lidimu wakwalakela ku Litavaleva andavatenda ing'ondo kutwala kuvatema na kuvabyaa. ⁸ Mitui vyave vindapagwa mwibalabala ing'umene yapanjini kwakulinganianga vila vashema Shodoma kwali Mishili palyutu lyavankamadile momo *UMU* wave. ⁹ Vanji pakati paventete, makola, dinangodi na vilambo, vandolola mitui vyave mumaduva matatu na nushu; vanavo vandaleya pakulota mitui avyo vinashikigwe. ¹⁰ Vanu vanáma mushilambo shapai vandapuwanga kwamwaa wave, vandatenda shikukulu na vandajaulanila vibuku. Mwaa vakulava vovo vo, vandivaangaishanga namene vanu vanáma mushilambo shapai. ¹¹ Ling'oto lyamaduva matatu na nushu alalá, imumu yashingumi yakwalakela kwa Nnungu kwinjila mumitui amulá kutwala mitui vyo kutakatukanga kwimila. Napane vanu vavagwéne kundivakumba kujopa kukumene namene. ¹² Bai vashuda avalá vandígwa lidi lyadimongo lyakwalakela kuwa liishidoni, “Kwela mwide kuno.” Vanavo vandikwela kuka kuwa mulyundi akuno vammongo vave valola ndoo.

¹³ Muwakati wowo shindyúmilila shindangenda shakujowa kutwala imbande imo yakumi yanjini kubamoka. Shindangenda shosho sho, vandípela vanu dyalupu saba, vabakidíle vo, kundívaida kujopa na vandímupa lishangelo Nnungu wakuwa. ¹⁴ Apambale wambili andipita. Kanji mwe! Apambale wantatu ankwida shipajelo.

Lipalapanda lyamwisho

¹⁵ Njelo wasaba andyómba lipalapanda kuwa ko kwigwinika madi adimongo ashishidoni, “Utawala wamushilambo shapai, ambi apa uvelé mmakono mwa

UMU wetu jo Klistu wake; † nae andatawala ngwengwe ngwengwe.”

¹⁶ Napanelo avalá vanang'olo ishilini na nsheshe ve vaikaléngé muviteng'u vivéle pamevo pake Nnungu, vandítepa vyenye vyave kundondya pai valipudya kwa Nnungu ¹⁷ vaashidoni,

“Tunkukulambwalela *UMU* Nnungu Wadimongo-uti úpagwite na we upagwite mwaa undilodya dimongo dyako ding'umene na unditunduvanga kutawala.

¹⁸ Venentete vandishimwa

kanji shitundi shako shindiwika. ††

Undiwika wakati wakuvaukumu vapidíle na wakuvatudya vakulava vatumika vako na vakwilimyanga,

uti avalá vajópa lina lyako, vadyoko na vanang'olo.

Ni wakati wakuvabamola uti avalá vabamóla shilambo.”

¹⁹ Napanelo ing'ande yake Nnungu kuwa ko indíshimuka, nng'ande mo kutwala kwaneka lishanduku lyaimbodi yake Nnungu. Nadoni kundyúmilila kumeta, shilindimu, ding'uva, shindangenda na kutonya imbula ing'umene yadinyanga.

Nkongwe, mwanamunu na lijoka lyanauvi

12 Napanelo kuwa kundyáneka shimanyikilo shakutikinikanga: nkongwe jumo ágwete liduva, mwedi úvele mmadodo mwake na lidaka lyadinondo kumi na mbili lívele mmuti mwake. ² Jojo jo, andívanavo shitumbo na ashindakutakutanga mwaa wamauvilo akushuluwa kwoda undivandika wakati wake.

³ Namomo ko kuwa ko kundyáneka shimanyikilo shinji: mwe! Lijoka likumene lyanauvi lyakuvanavo myuti saba na dimembe kumi, myuti mo kuvanavo madaka saba. ⁴ Nshila wake andíkumba imbandi yan-tatu yadinondo dyakuwa kutwala kupakatiyangidya pai. Lijoka andíimila pepi na pavéle nkongwe aijá ávandike na kushuluwa annindila mwana palota kuvalekwa, ammile. ⁵ Nkongwe jo anímmaleka mwana nnume, munu álota kuvalangalela venentete na ipimbo yashitali. Kanji jo mwanamunu jo andíkwapuligwa kuka ndapagwa namu Nnungu pashiteng'u shake. ⁶ Kutwala nkongwe kutukutula kushimbweshe kulyutu lyampanganiangidídye Nnungu kwambangidya vannishe muda wamaduva alupu imo dimiya mbili na sitini.

Shatwani ankujalegwa pai

⁷ Napanelo kuwa indyúmilila ing'ondo: Migele pamo na vanjelo vake vandyúka nantenda ing'ondo aijá lijoka nanae lijoka na vanjelo vake kujang'ula moto. ⁸ Kanji lijoka aijá dinímpunguka dimongo, nadoni vandíkatoke lyutu lyave kuwa. ⁹ Napanelo lijoka likumene alilá lindíjalegwa pai. Aju ni jojo aijá nyoka wakala wavan-

† a Klistu wakeinkuvanavo manaa Wakutandalegwa wake yani a Yesu. †† Lola Dimu 2:5.

shema Ndamoni kwali Shatwani ávaduwanga vanu mushilambo uti. Nae pamo na vanjelo vake vandijalegwa mushilambo shapai. ¹⁰ Napane ndígwa kuwa ko lidi lyadimongo liishidoni, “Ambi apa kwambolegwa kundiwika, dimongo na utawala wa Nnungu wetu na madalaka amwe Klistu wake mwaa andijalegwa pai aijá nkúkashali wavanung'unumunu ávakashali shilo na mui pamevo pa Nnungu wetu. ¹¹ Vanavo vanintema kwamwaa wamyadi vya Ngandolo na kwalilove lyaushuda wave mwaa vanavo havanagwaladídye shingumi shave pakulota vanapele. ¹² Napavedoni, kuwa ko puwanga pamo na mwenu múnama ako! Shipambale shilambo na imanga, Ndamoni aninshulukila mwenu na andishimwa poe namene; nae andimanya kenga wakati wake wo, ubakidile padyoko.”

¹³ Napanelo lijoka jo pamanyite kenga andijalegwa pai, andítunduvanga kummingilidya aijá nkongwe ámaleke mwana nnume. ¹⁴ Nkongwe vandímupa dimapa mbili dyashipungu nkumene kwambangidya auluke akawike mpaka kulyutu lyavampanganangididye akulá kushimbweshe, lyutu lyalota kwikala vanisha mwaka, vyaka vivili na nushu mwaka † ávele kushu na aijá nyoka. ¹⁵ Napanelo nyoka aijá nkanywa mwake andítapika medi kenga lundí kupita lumwoda nkongwe kwambangidya lupite lunjola na dimongo. ¹⁶ Kanji shilambo shapai shinímpwashela nkongwe jo, shindíjama kenga ikanywa kutwala kumila lundí lwatapike lijoka nkanywa mwake. ¹⁷ Bai lijoka jo anínshimwidya nkongwe aijá akalinyemya kuka ndavaten-da ing'ondo udukulu ubakidile wankongwe yani avalá vaigwilíla malamulo a Nnungu na vakamulidíle ushuda wake Yesu. ¹⁸ Nadoni lijoka andíimila mudimbwe dyananyenje imanga. ††

Lidimu áuma mwimanga

13 Napanelo ndímwona lidimu auma mwimanga ávenavo dimembe kumi, myuti saba na mudimembe mo kupagwa madaka kumi, mummyuti avyo vandyándika mena akukupulu. ² Lidimu waningwéne aijá avele kenga shuvi, madodo ake kuva kenga linyoma na ikanywa yake kuva kenga yantum. Lijoka aijá andímwing'a lidimu dimongo dyake, shiteng'u na madalaka oe.

³ Muti umo pakati pamyuti vyalidimu ajo, nindyóna vákang'ene namene kanji shilonda shake shashilota apele, shiponile. Shilambo uti shindíshanga kutwala kumwoda lidimu jo. ⁴ Vanu uti vandílipudya kumwe lijoka kwamwaa wakujaula madalaka ake kumupa lidimu aijá; namomo vandílipudya kumwe lidimu vaashidoni, “Nyani ávele kenga lidimu aju? Na nyani álota kuulula kuntenda ing'ondo?”

⁵ Napanelo lidimu aijá vandímupa ikanywa yakulitapilila na kukupulu Nnungu, andípata madalaka

† *Lola Daniele 7:25; 12:7. Shitangodi ashi shakuvalanganga vya-ka vitatu shinkulodya wakati uvikike wakupapatigwa venentete vake Nnungu.* †† *Mumaandiko anji inamba ai ivele mwainamba ing'umene ya kumi na tatu, mwanavo vandyandika doni, a Nangu ndiimila nanyenje imanga.*

auke mushu atenda muwakati wamyedi alubaini na mbili. ⁶ Nkanywa mwake andítunduvanga kukupulu Nnungu, kukupulu lina lyake, kukupulu yema yake ‡ na uti avalá vanáma kuwa. ⁷ Vandímupa lyululilo lyakuvatandela ing'ondo vakwilimyanga na kuvatema. Namomo vandímupa madalaka akutawalila kula likola, venentete, inangodi na shilambo. ⁸ Vanu uti vanáma mushilambo shapai, vandilipudya kwake nae, vanavo ni avalá vákaandikigwe mena ave mulibuku lyashingumi lya Ngandolo ábyaigwe tangu kala pavakandyenge shilambo. ⁹ Ávenavo matu, aigwe.

¹⁰ Wavampangidile kutwaligwa mateka, mateka andatwaligwa.

Wavampangidile kupela lyambila, lyambila andapela.

Nadoni apa ni patakígwa kunanopa na kukulupila kwavakwilimyanga.

Lidimu áuma pai

¹¹ Napanelo nímwona lidimu junji auma pai ávenavo dimembe mbili dyakulinganana kenga dyangandolo, jojo jo ashitangola kenga lijoka. ¹² Nae andítumila madalaka uti palina limwe aijá lidimu ntandi pamevo pake, ashindatadya shilambo shapai na vanu vanáma amo valipudye kumwe lidimu ntandi e avénavo shilonda shashilota apele kutwala kupona. ¹³ Bai lidimu wambili aju ashindatenda vimanyikilo vikumene ata mpaka kutadya moto ushuluke kuwa wide pai pamevo pavanu. ¹⁴ Kwamwaa wavimanyikilo vyavampéle atende pamevo pamwe lidimu ntandi, nae andívaduwanga vanáma mushilambo. Andívalamulila vakandyange lishinamu kwakuntumbyanga lidimu aijá wavankang'éne lyambila kutwala kunama kavili. ¹⁵ Vandímupa lyululilo lyakupa shingumi alilá lishinamu lyalidimu ntandi. Lyolyo lyo kutwala kutangola na kutadya vabyaigwe avalá uti vákashilota kulipudya kulishinamu alyo. ¹⁶ Namomo andívaungila vanu uti vadyoko na vanang'olo, vatajili na vakavé-pashinu, vamuunaiti na vatumwa pakulota vapate numalu munkono wankanakono kwali pashenye ¹⁷ kwambangidya hanapagwe wakushuma kwali wakushulusha, ila aijá ávenavo numalu walina lya-lidimu kwali inamba iitíka lina lyake. ¹⁸ Apa litakigwa limanyilo. Ávenavo ding'ano alambele kumanya inamba yalidimu mwaa ni inamba yamunu. Inamba yake ni dimiya sita sitini na sita.

Lwimu lwa avalá vashumigwídye mushilambo

14 Mwe! Ndikalole, ndímwona Ngandolo àimidile palishinga lya Shiyau pamo na vanu imiya imo alubaini na nsheshe alupu vaandikigwe pavyenye vyave lina lya Ngandolo na lya Tatamunu. ² Namomo kuwa ko lindíigwinika lidi lyakuva kenga libubu lyamedidi na kenga lyaing'uva yadimongo. Madi alo ashiigwinika kenga avakwomba-kanyembe pavavomba vakanyembe ³ vaimba lwimu lwaambi po pashiteng'u

‡ *Yema yake inkulodya kuva lyutu lyanama Nnungu.*

po pamevo paviumbi nsheshe na pa avalá vanang'olo. Lwimu alwo hapali hashulula kulipundisha ila avalá imiya imo alubaini na nsheshe alupu vashumigwidye mushilambo. ⁴ Ava ni vanu vákaldabuwenge mwavakongwe mwaa vandilishunga musingumi shave uti. Vanavo vankumwoda Ngandolo kwoekwoe kwauka. Vovo vo, vandishumigwa pakati pavanu kwambangidya vave shadaka shitandi shakumuumidya Nnungu na Ngandolo. ⁵ Nkanywa mwave, hamushuma kushang'apa; vavele vanu vákave makosha.

Vanjelo vatatu vankuvalanganga ukumu

⁶ Napanelo ndímwona njelo junji auluka kuniania àvenavo ntenga wambone úkamalilika pakulota avalangangile avalá vanáma mushilambo shapai; kula shilambo, likola, inangodi na venentete ⁷ atangola pashanya po aashidoni, "Njope Nnungu na tumbyan-ga lishangelo lyake mwaa undiwiki wakati waukumu. Namomo lipudye kumwe aijá ákandyenge kuwa, pai, imanga na mwadipandukenge dyundi."

⁸ Njelo wambili andímwatika aashidoni, "Andipandamoka! Andipandamoka Babiloni nkumene átadidye venentete uti vakumbile vinyu vyashitundi vyakulavalava kwake."

⁹ Njelo wantatu andívaatika avalá vatandi átangola pashanya po aashidoni, "Ikava kenga munu andalipudya kwa aijá lidimu, lishinamu lyake na kuvikigwa numalu pashenye kwali munkono, ¹⁰ namomo andakumbila vinyu vyakushimwa kwake Nnungu vyavamiminidile muluwene lwashitundi shake bila kudimulanga. Leka apo, jojo jo andauvauvanga moto na ipataki pamevo pavanjelo vakwilimyanga na pamevo pa Ngandolo; ¹¹ lyoui livauvyauvyanga vanu avo, lindakwela ngwengwe ngwengwe. Koko ko, shilo na mui halipagwa shinu litala lyakupumula avalá valipúdyá kumwe lidimu pamo na lishinamu lyake, namomo uti avalá vavikígwe numalu walina lyake."

¹² Apa ni patakígwa kunanopa kwavakwilimyanga, vashúnga malamulo ake Nnungu na likulupililo lyave nkati mumwe Yesu. ¹³ Napanelo kuwa ko lindíigwinika lidi liishidoni, "Andika! Vandyalaligwa avalá valóta kupela nkati mumwe *UMU* kutunduvangila ambi apa ku-ka mushu."

Imumu ankushidoni, "Elo, vanavo vandapumula shimadengo shave shadimongo mwaa vyepo vyashimadengo shave, vindavoda."

Mapuno amushilambo

¹⁴ Mwe! Ndikalole, mushu mwangu ndyóna lyundi lyanashwe, pashanya lyundi po andíkala ávele kenga Mwana Wamunu ágwete lidaka lyashaabu mmuti, mmakono mwake ànyukete mundu wakukola. ¹⁵ Napane mwing'ande ya Nnungu kuma njelo junji kutwala kutangola lidi likumene amwaulila aijá áikele pashanya lyundi kushidoni, "Twala mundu wako utunduvange kupuna kwoda wakati wakupuna undiwiki

mwaa mushilambo amu, vilyo vinditandeka." ¹⁶ Nadoni aijá áikele pashanya lyundi andínyaladyedya mundu wake mushilambo kutwala vilyo, kupunigwa. ¹⁷ Njelo junji andyúma mwing'ande ya Nnungu ivéle kuwa nanae momo àvenavo mundu wakukola.

¹⁸ Namomo kulutali ko andyúma njelo junji áshaangaikangila moto wa apo kutwala kutangola lidi likumene amwaulila aijá wamundu wakukola kushidoni, "Twala mundu wako wakukola wo ukalumulange mapamala auva amushilambo, ukushanie mwaa vye-po vyake vindyula." ¹⁹ Napanelo aijá njelo andínyaladyedya mundu mushilambo, kukushania mapamala auva alalá kutwala kujela mulitangi likumene lyashitundi shake Nnungu; ²⁰ uva aulá vandíkandangi-la mulitangi † livéle panda njini kutwala mo mulitangi kuma myadi nanshulumbwidi vyakuwikila ulinga kenga wang'ombe, vingalwéle maili dimiya nnatu.

Vyaushanga saba vyamwisho

¹⁵ Napanelo kuwa ko nindyóna shimanyikilo shinji shikumene na shakutikinikanga: vavele vanjelo saba vanyukete vyaushanga saba vyamwisho, mu- vyaushanga avyo ni pashiwikila popo shitundi shake Nnungu. ² Nindyóna shinu mwaimanga yashilolo yanganikéne na moto, popo po vaimilenge avalá ve vamtámile lidimu, lishanamu lyake na inamba yalina lyake. Mmakono mwave vákamulidile dikanyembe dyake Nnungu ³ akuno vaimba lwimu lumwe Musha ntumika wake Nnungu na lwa Ngandolo:

"Makango, vitendo vyako, vikumene,

UMU Nnungu Wadimongo-uti.

Dindila dyaishaliya dyaumwiu,

dyàko, Umu wavenentete.

⁴ Da nyani ákakuropa wako *UMU*?

Na nyani ákaing'a lishangelo lina lyako?

Mwaa wako gweka ni wakwilimyanga, venentete uti vandaida kwako ndalipudya, vitendo vyako vyaishaliya vindililodya ngala."

⁵ Napanelo vikapite avyo ndyóna kuwa ing'ande ya Nnungu ishimwike yani yema yaushuda. ^{††6} Mo nng'ande mo kuma vanjelo saba vávenavo vyaushanga saba. Vanavo vágwalenge dinguvo dyakutakata dyakumalameta kutwala muvyuva vyave kuliyunga mikanda vyalangi yashaabu. ⁷ Napanelo shimumbi shimo pakati pa avalá nsheshe andíjaula midamu saba vyashaabu kuvapa avalá vanjelo saba, midamu avyo vyúmbele shitundi shake Nnungu ánama ngwengwe ngwengwe. ⁸ Bai mwing'ande amulá lindyúmbala lyoui lyalishangelo lyake Nnungu pamo na dimongo dyake. Vikanava kuwikila popo avilá vyaushanga saba vyavanjelo saba, hapali áshuulula kwinjila nng'ande amo.

† Inamuna ai yalitangi lishitumika kukandangila uva; medi ake ashitumika kuva vinyu. †† Yema yaushuda inkuvanavo mana kenga ni lyutu lyavashikondya malamulo kumi.

Midamu saba vyashitundi shake Nnungu

16 Napanelo kuwa ko kwigwa lidi likumene lyalakela mwing'ande yake Nnungu livaulila avalá vanjelo saba kushidoni, "Wena mukamiminile shilambo midamu saba vyashitundi shake Nnungu."² Njelo ntandi andyúma kutwala kumiminila ndamu wake mushilambo, avalá uti vavénavo numalu umwe lidimu na kulipudya kulishinamu lyake, vandíbabukan-ga makana akujowa.³ Njelo wambili andimiminila ndamu wake mwiman-ga kutwala yanavo kujalukanga kuwa kenga myadi vya-munu wakupela na vinu uti vivénavo shingumi vipag-wíte mwimanga, kuwanga.⁴ Njelo wantatu andimiminila ndamu wake mudyun-di na myuto uti kutwala kujalukanga kuwa myadi.⁵ Na-panelo ndímwigwa njelo áshaangaikangila medi aashidoni, "Wako ni waishaliya; wako Wakwilimyanga gwegwe úpagwite, we upagwíte, mwaa vinu avi uti undyukumu.⁶ Mwaa vanavo vandijaa myadi vyavakwilimyanga pamo na vyavakulava, wako undivapa myadi vakumbile; amo ni muvavaikidíle."⁷ Napane ndígwa alutali luushidoni, "Elo *UMU* Nnungu Wadimongo-uti, ukumu yako ni yaumwiu na yaishaliya."⁸ Njelo wansheshe andimiminila ndamu wake palid-va kutwala liduva lyo kupata lyululilo lyakupiya namene.⁹ Vanu avo vandípya namene liduva; ata ive davo vanavo vandíkupulu lina lya Nnungu mwene lyul-uliilo lyavyaushanga avyo na ata havalijuguléngé na havampéle lishangelo Nnungu.¹⁰ Njelo wamwanu andimiminila ndamu wake pashiteng'u sha aijá lidimu kutwala muutawala wake kwinjila shii. Kwamwaa wakupwateka, kula munu ashindamamena lulimi lwake,¹¹ vashinankupulu Nnungu wakuwa kwamwaa wakupwateka na wa-makana ave; ata ive davo, havalijuguléngé vitendo vyave.¹² Napane njelo wasita andimiminila ndamu mulundi lukumene lwa Eupalati kutwala medi alundi alwo, kup-walela kwambangidya vapanganiange indila ya avalá vaumu vakwalakela kwalyaloka liduva.¹³ Bai níndyona nkanywa mwalijoka, mwalidimu na mwankúlava wakushang'apa auma majini mashapu matatu akulan-dana na vitogwa.¹⁴ Adyo ni dimumu dyamajini ditenda vimanyikilo. Vovo vo vankuvaukila vaumu vammilam-bo uti kutwala kuvakumbulila pamo kwambangidya vatende ing'ondo muliduva likumene limwe Nnungu Wadimongo-uti.¹⁵ "Lola, ninkwida kenga ninkwíva! Andyalaligwa aijá álilaledya na ákondya dinguvo dyake kwambangidya hanawene matakudavo na kutaa dyoni paumbala."¹⁶ Napanelo dimumu nnatu dyamajini adilá dindí-vakumbulila pamo vaumu palyutu lyavashema mushibalaniya Alimagedoni.

¹⁷ Njelo wasaba andímimina ndamu kuniania kut-wala kwigwinika lidi likumene líshaalakela pashiteng'u mwing'ande ya Nnungu liishidoni, "Tayali indiwikila popo!"

¹⁸ Bai kundyúmilila kumeta, shilindimu, ding'uva na shindangenda shikumene; shindangenda shakujowa shíkanava kuumilila tangu kukandyangigwa munu mushilambo shapai.¹⁹ Njini ukumene aulá undíjavani-ka disemu nnatu, navyanavo minjini vyavenentete vin-díbamalegwa. Nnungu andíkumbukila njini ukumene wa Babiloni kutwala kwing'a shikombe shavinyu shakushimwa kwake.²⁰ Vitingi vyammedi uti vindílam-baleka na mashinga andígwalagwala.²¹ Kuwa ko, indí-vatanyela vanu imbula yadinyanga ding'umene, kula inyanga ishindaaidopa dikilo kenga salasini na tano doni, vanavo vanínkupulu Nnungu kwamwaa waambu-la ayo mwaa mauvilo lo, andímamodya.

Lilaja nkumene namu lidimu lyanauvi

17 Napanelo njelo jumo pakati pavanjelo saba ve vavénavo midamu saba anínguvandika kutwa kushidoni, "Ida ndikulodye ukumu yalilaja nkumene áikele pashanya medi oe,² aijá wavatandinavo vyaku-lauka vaumu vamushilambo; vanu vanáma mushilam-bo, vandyambalwa vinyu vyakulauka kwake."³ Napanelo njelo aníngutwala mu Imumu kun-guukanavo kushimbweshe. Ako ndímwona nkongwe jumo áikele pashanya palidimu lyanauvi vâmwandikenge mena oe akukupulu, ávenavo myuti saba na dimembe kumi.⁴ Nkongwe jo agwete ligauni lyailangi yanshambalau na yanauvi; andílinemya na shaabu, majanga amali na vyuma vyabei yoe. Mmakono mwake andínyukata shikombe shashaabu shuumbéle vinu vyakudabukanga na vishapu vilódy vyakulauka kwake.⁵ Pashenye pake vandyandika lina lyashipii, "Babiloni nkumene; jujumunu wamalaja na wavyakudabukanga vyamushilambo shapai."⁶ Napane kutwa kumwona aijá nkongwe àmbalwidye myadi vyavakwilimyanga na vyavanu váshumya ushuda umwe Yesu. Paningwene, ngujeeme vila.⁷ Bai njelo aningwaulila kushidoni, "Mwaa shani unkushanga? Nangu ndak-waulila shipii shankongwe aju na shalidimu wankwadile ávenavo myuti saba na dimembe kumi jo.⁸ Lidimu waungwene jo, andípagwa kanji napane hanapagwa shinu. Nae andauma ambi popa ku Litavaleva kwida ndabamalegwa. Vanu vanáma mushilambo shapai uti vákaandikigwe mena ave mulibuku lyashingumi tangu kukandyangigwa shilam-bo, vanavo vandashanga pavalota kumwona lidimu mwaa andípagwa, napane hanapagwa shinu kanji andapagwa kavili.⁹ "Apa pankutakigwa ding'ano na limanyilo: myuti sa-ba avilá ni mashinga saba aikele nkongwe aijá; namo-mo ni vaumu saba.¹⁰ Mwanu vandigwa, jumo anku-pagwa na junji hanava kuumilila, napane palota ku-umilila inimmaikila atime padyoko.¹¹ Lidimu jo andí-pagwa kanji napane hanapagwa shinu, nae ni umu

wanane. Aju ankupagwa pamo na avalá saba, jojo jo ankuka kukubamalegwa.

¹²“Dimembe kumi dyaugwene dyo, ni vaumu kumi vákanava kupata utawala kanji vandapata madalaka akutawala wakati waisaa imo pamo namu aijá lidimu.

¹³Vanavo vankuvanavo makumbukililo amo lolo na vandamupa lidimu aijá dimongo dyave pamo na madalaka. ¹⁴Vandatandana ing'ondo namu Ngandolo kanji Ngandolo pamo namu avalá vavashamile, vavandatwele vavele vo vakulupilike, andavatema mwaa nae ni Nang'olo wavanang'olo, Umu wavaumu.”

¹⁵Napanelo njelo kushidoni, “Medi augwene áikalidile lilaja lo, ni venentete, dimbumba, vilambo na dinangodi. ¹⁶Kanji napane lidimu pamo na dimembe kumi dyaugwene dyo, dinammangedya aijá lilaja kutwala kumbamola. Vanamuulanga kunneka matakudavo, vandamamena inyama yake na kumwananganga pamoto. ¹⁷Mwaa Nnungu andivika mmitima vyave vatandedye malotelo ake kwambangidya vavenavo makumbukililo amo lolo, namomo kumupa madalaka ave akutawalila aijá lidimu mpaka awikile popo malove ake Nnungu. ¹⁸Nkongwe waungwene jo, ni aulá njini ukumene uvatawála vaumu vamushilambo shapai.”

Kugwa kumwe Babiloni nkumene

18 Ling'oto lyavinu avyo, kuwa ko ndimwona njelo junji ashuluka e avénavo madalaka oe kutwala shilambo uti kulangala kwamwaa wakushenga kwake.

²Njelo ajo andíkugwa na lidi likumene aashidoni, “Andigwa! Andigwa Babiloni nkumene!

Nae andidyuka kuva lyutu lyakunama majini, kuva shivava shadimumu dyakunyata, shavyuni vishapu na vyashinyadinyadi.

³Mwaa venentete uti vandikumbila vinyu vyashitundi shawendi wake.

Vaumu vamushilambo vanditenda vyakulauka namu nae,

vamishulusho vamushilambo kutajilika poe kwadimongo dyashinamidyo shake shaditamaa.”

⁴Napane kuwa ndígwa lidi linji liishidoni, “Mmentete vangu, lyumadyange kwake nae kwambangidya hamunaliinjidyange mushimadambi shake,

na vyaushanga vimwidíla nae, mwenu havinampate.

⁵Mwaa madambi ake andyunjikananga mpaka kuwa na ukalau wake, Nnungu andikumbukila.

⁶Mo mwatandalele nae, ntandele momo, nnipe myanda mivili avilá vyatandile, muluwene lwake jo mwene mwanganienge, mwenu mwanganiangidye myanda mivili.

⁷Kwashipimo shosho shakuling'a lishangelo na kunama mushinamidyo shaditamaa, kwashipimo shosho mupe mauvilo na shipalodi.

Muntima mwake nae aashidoni,

‘Ndiikala kenga umu nkongwe,

hangunava shinu ninamwili,

mwiko hangupata shinu shipalodi!”

⁸Naivedoni muliduva limo tu, vinankodya vyaushanga avi:

kupela, shipalodi na indala;

andatikinyuka kwamoto

mwaa *UMU* Nnungu áumidye ukumu ni wadimongo.”

⁹Vaumu vamushilambo vatandíle vyawendi namu nae na kunama shinamidyo shaditamaa, vanannilangila pavalota kwona lyoi nae atikinyuka, vanannilangila na kuntangadikangila. ¹⁰Napanelo kwamwaa waku-jopa mauvilo ake nae, vanavo vandaimilanga kushu vatangola vaashidoni,

“Apambale! Apambale njini ukumene!

Wako Babiloni njini wadimongo!

Kanji gwo, mwisaa imo tu,

ukumu yako indiwikila!”

¹¹Vanu vamishulusho vamushilambo vanannilangila na kuntangadikangila mwaa hapagwa kavili wakushuma mali ave kenga ala: ¹²shaabu, nkuva, majanga alimashi, vyuma vyabei yoe, mataka akunamikanga, mataka ailangi yanshambalau, mataka akung'alangila, mataka anauvi, ntumbati, vinu vyavakandyenge na meno anembo, milandi vyamali, lyava, shitali na majanga amalimoli, ¹³inakilo yalipatu, mauta akuning'angila, lubani, mila, udi, vinyu, mauta aulivela, unga wakunamikanga, ngano; ding'ombe, dingandolo, vapunda pamo na malingishi, vatumwa na ata ungumi wavanu. ¹⁴Vovo vo vandaashidoni, “Vyepo vyaushing'unuka muungumi wako, vindikulambaleka! Vinu vyako uti vyamali, kushenga kwako, vindikulambaleka; mwiko havyaneka kavili.” ¹⁵Váshishulusha vinu avi, vo vatajilike kwamwaa wake nae vandaimila kushu va-

jopa mauvilo ake, vandilila na kutangadikanga ¹⁶vakugwa vaashidoni,

“Apambale! Apambale njini ukumene,

ágwete dinguvo dyakunamikanga,

dyailangi yanshambalau na yanauvi

wavannamidye na shaabu,

majanga alimashi pamo na vyuma vyabei yoe!

¹⁷Kanji gwo, mwisaa imo tu,

mali akwinjipa anditimbikanga!”

Vakutukusha-dimeli uti, vamyanda, vanu vakwan-gaikangila imeli na uti avalá vapáta paida kwamwaa waimanga, vandíimilanga kushu. ¹⁸Pavalota kwona lyoi nae atikinyuka vandítangadikanga vaashidoni, “Nyani junji wakuva kenga njini au?” ¹⁹Vanavo vandí-taa litutunga mmuti † valila na vatangadikanga akuno vatangola pashanya po vaashidoni,

“Apambale! Apambale njini ukumene!

Njini wo wavatajilikidile vanu

ve vavénavo dimeli mwimanga

kwamwaa waditamaa dyake,

kanji gwo, mwisaa imo tu nae anditimbikanga.

²⁰Kuwa ko puwanga kwamwaa wake!

Mmakwilimyanga, mmamyombe pamo na mmakulava puwanga!

† *Shitendo shakulitaa litutunga kwali liu mmuti, shishilodya shipalodi shikumene.*

Nnungu andímuukumu nae kwamwaa wenu mwenu!"

²¹ Napanelo njelo jumo wadimongo andínyanyula lijanga likumene lyakushagila kujela mwimanga akuno aashidoni,

"Kenga mo mwavajalalele lijanga mwimanga, nimomo mwalalota kunjalela Babiloni, njini ukumene na nkukunya pakaaneka kavili.

²² Pakati pako mwiko haliigwinika shinu lidi lyakumwomba kanyembe na lyavakwimba, vityatya na lyakwomba mapalapanda.

Nkati mulingongo lyako, mwiko hashaaneka kavili shimadengo shapundi woewoe.

Mwiko hakwigwinika kavili kunyonya kwamajanga akushagila.

²³ Mulingongo lyako, mwiko hamulangala kavili moto wavyenje.

Nkati mwako, mwiko haliigwinika kavili lidi lyankúlomba kwali nkúlombwa.

Mwaa vamishulusho vako, vavéle vakumene mushilambo shapai, kwawavi wako, venentete uti vandyáshalanga,

²⁴ mwanavo vandikodya myadi vyavakulava na vyavakwilimyanga;

vya uti avalá vabyaígwe mushilambo."

Imbumba inkupuwanga kuwa

19 Vikapite vinu avyo, ndígwa kuwa shinu kenga lidi likumene lyadimbumba liishidoni,

"Aleluya! Kwambwalegwa, lishangelo pamo na dimongo, dyake mwene Nnungu wetu,

² mwaa ukumu yake ni yaumwiu na yaishaliya.

Nae andimuukumu lilaja nkumene áshitindinganianga shilambo kwakulauka kwake.

Aninnipilila kwamyadi vyavatumika vake vyajaile nae kwamakono ake."

³ Kutwala kavili dimbumba kushidoni, "Aleluya!

Lyo! lyakwalakela njini awo, lindakwela ngwengwe ngwengwe."

⁴ Napanelo avalá vanang'olo ishilini na nsheshe pamo na avilá viumbi nsheshe, vandíguguvala mpaka vyenye kundondya pai valipudya kwa Nnungu áikele pashiteng'u vaashidoni, "Ame, Aleluya!" ⁵ Napane pashiteng'u po lindígwinika lidi lishishidoni,

"Ntumbyanje Nnungu wetu, mwenu uti mmatumika vake, mwenu múnjopa,

kutunduvangila ndyoko na nkulu!"

Vakulalikigwa pandamu washitamo shimwe Ngandolo

⁶ Namomo ndígwa lidi lyakuva kenga lyadimbumba dyavanu, lyakuva kenga libububu na lyakuva kenga shilindimu shading'uva liishidoni,

"Aleluya!

Mwaa *UMU* Nnungu wetu Wadimongo-uti, ankutawala.

⁷ Tuke tupuwange! Tulitamange, tumupe lishangelo!

Mwaa undiwika wakati washitamo shimwe Ngandolo, nkúlombwa andilipanganianga tayali.

⁸ Vandimupa agwale inguvo yakunamikanga, yakumalameta na yakutakata."

Inguvo yakunamikanga yo ni matendo aishaliya avakwilimyanga.

⁹ Njelo kutwala kungwaulila doni, "Andika: Vandyalaligwa avalá valalikígwe kupagwa pandamu washitamo shimwe Ngandolo!" Kavili kungwaulila kushidoni, "Ala ni malove aumwiu ake Nnungu." ¹⁰ Napanelo ndígwilangila mmadodo mwake pakulota ngulipudye kwake kanji nae kushidoni, "Haunatende davo! Nangu ni ntumika kenga wako na kenga vanung'unumunu vavénavo likulupililo muushuda wake Yesu. Lipudye kumwe Nnungu! Mwaa ushuda ummalangánga Yesu ni imumu yakulava."

Ánkwadile punda wanashwe ankutenda ing'ondo kwaishaliya

¹¹ Bai nindyóna kuwa kushimwike, mwe! Napane ndímwona punda wanashwe, aijá ánkwadile punda vashinshema Wakukulupilika na Waumwiu. Nae ankuukumu na kutenda ing'ondo kwaishaliya. ¹² Mevo ake kuva kenga lilamba lyamoto na mmuti kupagwa madaka oe pamo na lina lyamanyite jo mwene, munu junji mene. ¹³ Jojo jo andígwala ikanju yavashuvike myadi kutwala lina lyake kuva Lilove Iya Nnungu.

¹⁴ Vashindamwoda vaing'ondo vakuwa vavakwalenge vapunda vanashwe, vavakwalenge dinguvo dyakunamikanga dyanashwe na dyakutakata. ¹⁵ Nkanywa mwake mundyúma lyambila lyakukola pakulota avabyaile venentete, jojo jo andavalangalalela na ipimbo yashitali na andakandangila vinyu mulitangi lyakushimwa kwake Nnungu Wadimongo-uti.

¹⁶ Mwikanju yake na nshija mwake vandyandika lina ali, "Umu wavaumu, Nang'olo wavanang'olo."

¹⁷ Napanelo ndímwona njelo jumo áimidile paliduva atangola pashanya po avaulila vyuni vyulukánga kuni-ania doni, "Idananga muumbalanile pashikukulu shikumene shake Nnungu ¹⁸ pakulota mulye dinyama dyavaumu, dyavanang'olo vavaing'ondo, dyavanu vadimongo, dyavapunda pamo na dyavakuvatukusha vave, dyavanu uti: vamuunaiti na vamuutumwa, vadyoko na dyavanang'olo."

¹⁹ Napanelo ndímwona lidimu, vaumu vamushilambo pamo na vaing'ondo vave vavakwanyeniye pakulota kuntenda ing'ondo aijá ánkwadile punda pamo na vaing'ondo vake. ²⁰ Kanji lidimu aijá, vanínkamula pamo namu nkúlava wakushang'apa áshitenda vi-manyikilo palina lyake avaduwanaga vanu vapwashaladile numalu umwe aijá lidimu na kulipudya kulishinamu lyake. Uti ava vavili vandíjalegwa mulitanda lyamoto likaléla na ipataki vavéle vangumi. ²¹ Vanji uti

vandíbyaigwa na lyambila limwe aijá ánkwadile punda, lyambila lyolyo lyumíle nkanywa mwake. Bai malembo uti vindívakamila vitumbo kwamwaa wadinyama dyave.

Shatwani ankuungigwa vyaka alupu imo

20 Napanelo kuwa ko ndímwona njelo ashuluka, mmakono mwake ànyukete mungulilo wa ku Litavaleva na mang'unyang'unya makumene. ² Nae anínkamula lijoka, aijá nyoka wakala àvele Ndamoni kwali Shatwani kutwala kumunga vyaka alupu imo; ³ kunjela ku Litavaleva kushima kutwala kukamela pashanya pake kwambangidya hanavaduwange kavili venentete mpaka viwike vyaka alupu imo. Ling'oto lya apo, inimmaikila aunguligwe wakati padyoko.

⁴ Napanelo níndyona viteng'u vèikalenge avalá ve vavapéle madalaka akuukumu. Namomo kwona ungu mi wa avalá vashindígwe kwamwaa waushuda umwe Yesu na walilove lya Nnungu. Vanavo havalipudídye kwalidimu na ata kulishinamu lyake, havakubalídye kuvigigwa numalu pashenye kwali munkono. Vovo vo, vandyújila kunama kutwala kutawala namu Klistu vyaka alupu imo. ⁵ Vakupela vanji uti havaujídíle kavili mushingumi mpaka viwike vyaka alupu imo. Aku ni kudyuka kutandi. ⁶ Wakwalaligwa na wakwilimyanga ni aijá álota kupagwa mukudyuka kutandi! Kupela kwam-bili hakuve madalaka kwavanavo; vovo vo vandava vakulangalalela-shadaka vamwe Nnungu na vamwe Klistu, vandatawala namu nae vyaka alupu imo.

Shatwani ankutamegwa ngwengwe ngwengwe

⁷ Pavilota kumalilika avilá vyaka alupu imo, Shatwani andaunguligwa mushipungu shake ⁸ na andauma kupita avaduwanga venentete vavéle mmatununa nsheshe ashilambo shapai, yani Gogi na Magogi kwambangidya avakumbulile kwing'ondo. Ishabu yave ni kenga dimbwe dyamwimanga. ⁹ Venentete vandíwe-na mudibondi uti dyamushilambo kutwala kutang'anedyá ikambi yavakwilimyanga, njini wakunag-waleka. Kanji kuwa ko undíshuluka moto kwida ndavalya. ¹⁰ Ndamoni áshivaduwanga, vaninjela mulitanda lyamoto likaléla na ipataki mo mwavele lidimu pamo namu nkúlava wakushang'apa. Amo vanavo vandapata mauvilo ngwengwe ngwengwe shilo na mui.

Kuukumigwa kwavapadíle

¹¹ Napanelo níndyona shiteng'u shikumene shanash-we mwene shiteng'u jo àikalidile; pai na kuwa vánditila pamevo pake na halipagwíte lyutu lyavinu avyo.

¹² Namomo ndívona vapidíle vadyoko na vanang'olo vaimilenge mushu shiteng'u, popo po mabuku andyúnguligwa. Lindyúnguligwa libuku linji, yani lyashingumi. Vapidíle vo vandyúkumigwa kulingana na avilá vyandikígwe mmabuku kula munu na vitendo vyake. ¹³ Imanga indívajaula vakupela vapagwíte amo, Kupela na Kumoka kuvajaula vakupela vapagwíte

kwanavo, uti avo vandyúkumigwa kula munu kulingana na vitendo vyake. ¹⁴ Bai Kupela na Kumoka vandí-jalegwa mulitanda lyamoto. Litanda lyamoto lya, aku ni kupela kwambili. ¹⁵ Napane aijá líkaaneke lina lyake mulibuku lyashingumi, andíjalegwa mulitanda lyamoto.

Kuwa kwaambi na shilambo shapai shaambi

21 Napanelo níndyona kuwa kwaambi na shilambo shapai shaambi. Mwaa kuwa kwakala, shilambo shapai shakala vindípita na imanga haipagwíte kavili.

² Namomo ndyóna njini wakwilimyanga Yelusalemu yaambi ishuluka kuwa kwa Nnungu kenga nkúlombwa wavampanganinyenge na kunnemya shana auka kwantwagwe. ³ Napanelo ndígwa lidi likumene lyak-walakela pashiteng'u liishidoni, "Mwe! Ambi apa yema † ya Nnungu inkupagwa na vanu na nae andanama na vanavo. Vanavo vandava venentete vake; jo mwene Nnungu ápagwa na vanavo, andava Nnungu wave. ⁴ Nae andavapukutanga myodi uti kumevo kwave; kupela, shipalodi, shililo, kupwateka hakupagwa kavili mwaa vinu vyakala uti, vindipita."

⁵ Napanelo aijá e aikéle pashiteng'u kutwala kushi-doni, "Vinu uti ninkutenda kuva vyaambi." Kavili kushi-doni, "Andika mwaa malove ala ni akukulupilika na aumwiu."

⁶ Aníngwaulila kavili doni, "Vindiwikila popo. Nangu ni Alupa na Omega, Nantandi na Wamwisho. Ávenavo inyota ndamupa akumbile monyo papandukenge medi ashingumi. ⁷ Nkútema andapata maleko avinu avi, nangu ndava Nnungu wake na nae kuva mwanangu.

⁸ Kanji vakujopa, vákakulupila, vakalau, vakubyaa, vakulavalava, vavi, valipúdyá kwavannungu na vakushang'apa uti, vanavo maleko ave, lilota kuva alilá litanda lyamoto likaléla na ipataki; aku ni kupela kwambili."

Yelusalemu yaambi inkwalakela kuwa

⁹ Njelo jumo pakati pavanjelo saba vavénavo midamu vyakuumbala avilá vyaushanga saba vyamwisho, anínguvandika kutwa kushidoni, "Ida, nangu ndakulodya nkúlombwa ndya Ngandolo."

¹⁰ Nae aníngutwala mu Imumu kunguukanavo kulishinga likumene lyakulepa kutwala kungulodya Yelusalemu njini wakwilimyanga úshaalakela kuwa kumwe Nnungu; ¹¹ wanavo ushindashenga kwalishangelo lyake Nnungu, kushenga kwake kuvele kenga limashi kenga lijanga lyalinjano lyakung'ala namene. ¹² Wowo wo, undívanavo lishiti lyalingongo likumene na lyakulepa livénavo milango kumi na mbili; kula nnango andípagwa njelo jumo. Kula nnango vandyándika lina pakati pamena amakola kumi na mbili avanaishilaeli. ¹³ Kwalyalakela liduva vindípagwa milango mitatu, kushanya shilambo kupagwa milango mitatu, kwina shilambo kupagwa milango mitatu na kwalyenda liduva kupagwa milango mitatu. ¹⁴ Lishiti

† Yema ya Nnungu inkulodya kuva lyutu lyanama Nnungu.

lyalingongo lyanjini awo, vadangile pashanya majanga kumi na mbili; namomo pashanya pakula lijanga, vandyándika lina limo pakati pamena a avalá vamyombe kumi na mbili vamwe Ngandolo.

¹⁵ Njelo áshitangola namu nangu aijá, andívanavo nnandi washipimo wavakandyenge na shaabu pakulota apime njini, milango vyake pamo na lishiti. ¹⁶ Njini awo muleu na mugwipi mundílinganana. Nae andípi-ma njini na nnandi aulá kutwala kuma dikilometu dyalupu mbili na dimiya mbili; muleu, mugwipi na mwakuka muwa, mundílinganana. ¹⁷ Nae andípima lishiti alilá kutwala kuma dimatulu sitini na tano kwodana na shipimo shavatumila vanu she shatunmidíle njelo. ¹⁸ Lishiti alyo vadangile na majanga amanjano na njini uvele washaabu íkave ushapu ilinganéne na shilolo. ¹⁹ Majanga avatunduvangidile kudangela lishiti lyanjini awo, vandínemya kwakula inamuna yamajanga alimashi. Shitunduvangilo shalijanga litandi vandínemya na lijanga lyalinjano, shambili kunemya na lyakibulu, shantatu kunemya na lyakalishodoniya, shansheshe kunemya na lyamamba, ²⁰ shamwanu kunemya na lyashalidoniya, shasita kunemya na lyanauvi, shasaba kunemya na lyakilisholitu, shanane kunemya na lyabelilu, shatisa kunemya na lyatopashiu, shakumi kunemya na lyakilishopalashu, shakumi na moja kunemya na lyayashitu kutwala shakumi na mbili kunemya na lyanshambalau. ²¹ Milango kumi na mbili avilá vivele vyuma vyabei yoe kumi na mbili, kula nnango vakandyenge kwashuma shimo bai. Ibalabala ing'umene yanjini awo, vakandyenge kwashaabu íkave ushapu kenga shilolo shakulangala.

²² Mo munjini mo hangugwéne ing'ande ya Nnungu mwaa ako, ing'ande ya Nnungu ni *UMU* Nnungu Wadimongo-uti pamo namu Ngandolo. ²³ Njini awo huanalateka shinu liduva kwali mwedi pakulota kumulikila mwaa lishangelo lya Nnungu linkumulikila kutwala itaa yake kuva aijá Ngandolo. ²⁴ Venentete vandawena mulilangadyo lyake, vaumu vamushilambo vandaidanavo lishangelo lyave. ²⁵ Milango vyake, mui mwiko havashima mwaa shilo, hashipali. ²⁶ Lishangelo na ishima yavenentete uti vamushilambo vandaidanavo munjini awo. ²⁷ Mwanavo, mwiko shinu shishapu hashiinjala, ata munu átandedya vyakudabukanga kwali vyakushang'apa; ila vandainjala bai avalá vaandikígwe mena ave mulibuku lyashingumi limwe Ngandolo.

Lundi lwamedi ashingumi na nnandi washingumi

22 Napanelo njelo aníngulodya lundi lwamedi ashingumi kenga shilolo shakulangala, áshaaloka pashiteng'u shake Nnungu na sha Ngandolo, ² áshipita shing'ati ibalabala yanjini awo. Kula mwangu walundi alwo upali nnandi washingumi upunígwa myanda kumi na mbili, kula mwedi unkupa shepo shake. Mamba annandi awo, atumika kwakuvaponia venentete uti vamushilambo. ³ Dilana munjini awo, hadipagwa. Shiteng'u sha Nnungu pamo na sha Ngan-

dolo shindapagwa munjini na vatumika vake vanantumika, ⁴ vandona ing'ope yake na lina lyake lina daandikigwa muvyyenye vyave. ⁵ Shilo hashipagwa kavili: vanavo lilangadyo lyadikalaboi kwali lyaliduva nkati mo, havapali mwaa *UMU* Nnungu andavalangadya; vovo vo, vandatawala ngwengwe ngwengwe.

⁶ Ling'oto njelo aníngwaulila doni, "Malove ala akukulupilika na maiu. *UMU*, Nnungu wadimumu dyavakulava, anintumidya njelo wake kwambangidya avalodye vatumika vake vinu vilóta kutandeka muwakati wakuvandika."

Yesu ankwida ambi popa

⁷ "Lola ninkwida ambi popa! Andyalaligwa aijá átandedya malove amaono amulibuku ali."

⁸ Nangu Nshuwau ningugwene na kwigwa vinu avi. Ling'oto lyakwigwa na kwona, ndíguguvula mmadodo mwake aijá njelo áshingulodya vinu avyo ngulota ngulipudye kwake. ⁹ Kutwala nae kushidoni, "Gwe! Haunatende davo! Nangu nintumika kenga wako pamo na vanung'unumunu vakulava na uti avalá vatandédyá malove amulibuku ali. Lipudye kwa Nnungu." ¹⁰ Kutwala kavili kushidoni, "Haunapiyapiyange malove amaono amulibuku ali mwaa wakati undivandika. ¹¹ Átenda vyakunyata auke mushu atenda vyakunyata; átenda vyaushapu auke mushu atenda vyaushapu; átenda vyaishaliya auke mushu atenda vyaishaliya; wakwilimyanga auke mushu ailimyanga."

¹² "Lola, ninkwida ambi popa! Dinudyo dyangu dyangwidanavo ndamupa kula munu kwodananavo shimadengo shake. ¹³ Nangu ni Alupa na Omega, Nantandi na Wamwisho, Nkútunduvanga na Nkúmalilila."

¹⁴ Vandyalaligwa avalá vashápa dikanju dyave; nadoni vanavo vandavanavo aki yannandi washingumi na yakwinjilila njini vapidila mumilango vyake.

¹⁵ Vandaikala panda vang'avanga, vavi, vakulavalava, vakubyaa, valipúdyá kwavannungu pamo namu avalá vanagwalédyá na vatandédyá vyakushang'apa.

¹⁶ "Nangu Yesu nintumidya njelo wangu aide aumye ushuda wavinu avi kwenu mwenu mmaganisha. Nangu ni Ntipu na Udukulu umwe Daudi, Inondo Yalyaloshu ing'ála."

¹⁷ Imumu pamo na nkúlombwa vankushidoni, "Ida!" Kula áigwa aashidoni, "Ida!" Aijá ávenavo inyota, aide; aijá álota, atwale medi ashingumi akumbile monyo.

¹⁸ Ninkumya ushuda kwa avalá uti vaígwa malove amaono alibuku ali: ikava kenga munu anaanjadyedya, Nnungu anamwanjadyedya avilá vyaushanga vyandikígwe mulibuku ali. ¹⁹ Namomo ika-va kenga munu andapungula malove avéle mulibuku ali lyamaono, Nnungu andapungula isemu yake yan-nandi washingumi na isemu yanjini wakwilimyanga yavaandike mulibuku ali. ²⁰ Aijá áumya ushuda wavinu avi ankushidoni, "Elo ninkwida ambi popa."

Ame. Ida *UMU* Yesu!

²¹ Umonyó umwe *UMU* Yesu upagwe na mwenu uti. Ame.